

Yesu Xolac

**The New Testament in the Patep
language of Papua New Guinea**

**Nupela Testamen long
tokples Patep long Niugini**



Yesu Xolac

The New Testament in the Patep language of Papua New Guinea
[ptp]

Translation by Wycliffe Bible Translators

© 1986 Wycliffe Bible Translators, Inc.

Print publication, 1986 by Bible League International

Web version

© 2015, Wycliffe Bible Translators, Inc.

<http://www.Wycliffe.org>

<http://pngscriptures.org>

<http://www.ScriptureEarth.org>



Creative Commons license (Attribution-Noncommercial-No Derivative Works)

<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olesem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long

<http://creativecommons.org/licenses/by-nc-nd/3.0>

Sapos yu gat askim long dispela, **plis askim mipela.**

Lê Vihati

<i>Lê Dia</i>	<i>Lê Bo</i>	<i>Kipihac Lihî</i>
Matyu	Mat	5
Mak	Mak	73
Luk.	Luk	115
Jon.	Jon	185
Sinale	Sin	231
Lom	Lom	289
1 Kolin	1 Kol	321
2 Kolin	2 Kol	349
Galesia	Gal	368
Epesas	Epe	379
Pilipai	Pil.	390
Kolosi	Kls.	398
1 Tesalonaika	1 Tes	406
2 Tesalonaika	2 Tes	413
1 Timoti	1 Tim	417
2 Timoti	2 Tim	426
Taitas	Titi	432
Pailimon	Plm	436
Hiblu.	Hib	438
Jems	Jems	463
1 Pita.	1 Pit.	471
2 Pita.	2 Pit.	481
1 Jon.	1 Jon	487
2 Jon.	2 Jon	494
3 Jon.	3 Jon	496
Jut	Jut	498
Levelesen.	Leve.	501

MATYU

Yesu Kilisi xolac nivihā wê Matyu kivuu ge

Yesu Kilisi tivae bue lê
(Luk 3:23-28)

- 1** ¹ Yesu Kilisi tivae bue he lê yêp ga. Devit pum lec Eblaham di Yesu pum lec Devit.
- ² Eblaham nu Aisak.
Di Aisak nu Jekop.
Di Jekop nu Yuda he lie.
- ³ Yuda nu Peles yuu Sila wê ta Tema ge.
Di Peles nu Heslon.
Di Heslon nu Lam.
- ⁴ Di Lam nu Aminadap.
Di Aminadap nu Nason.
Di Nason nu Salmon.
- ⁵ Di Salmon nu Boas wê ta Lehap ge.
Di Boas nu Obet wê ta Lut ge.
Di Obet nu Jesi.
- ⁶ Di Jesi nu Devit wê tu Islel nêk king.
Di Devit nu Solomon. Solomon ta ge wê liya Yulaia.
- ⁷ Di Solomon nu Liaboam.
Di Liaboam nu Abaisa.
Di Abaisa nu Esa.
- ⁸ Di Esa nu Jehosapat.
Di Jehosapat nu Jolam.
Di Jolam nu Asaia.
- ⁹ Di Asaia nu Jotam.

Di Jotam nu Ehas.

Di Ehas nu Hesekaia.

¹⁰Di Hesekaia nu Manasa.

Di Manasa nu Emos.

Di Emos nu Josaia.

¹¹Di Josaia nu Jekonaia he lie wê tibii Babilon vông vevac vô he di hóm he Islel vihati xôn di kô he mi la vac vigwe Babilon nêb he i vông yuac pileva vô he mi dô.

¹²He dô vac vigwe Babilon di Jekonaia nu Sialtiel.

Di Sialtiel nu Selababel.

¹³Di Selababel nu Abaiat.

Di Abaiat nu Elaiakim.

Di Elaiakim nu Eso.

¹⁴Di Eso nu Sedok.

Di Sedok nu Ekim.

Di Ekim nu Elaiat.

¹⁵Di Elaiat nu Eliesa.

Di Eliesa nu Matan.

Di Matan nu Jekop.

¹⁶Di Jekop nu Josep wê vinê Malia.

Di Malia kô nu Yesu wê he nêl lê ên nêbê Kilisi.

¹⁷Om bue wê pum lec Eblaham di i la tyip vô Devit ge, he tiyi xocbê vigê yuu di tô mi la yuudiyuu (14). Di bue wê pum lec Devit di i la tyip vô buc wê tibii Babilon vông vevac vô he Islel di kô he mi la vigwe Babilon ge, he tiyi xocbê 14. Di bue wê dô vô buc wê he Islel dô vac vigwe Babilon di i la tyip vô Kilisi buc ge, he tiyi xocbê 14 êno.

Malia kô nu Yesu Kilisi

(Luk 2:1-7)

¹⁸Kiyang lec wê Yesu Kilisi yubac ge bêga ên nêbê xomxo vinoo nêb Malia ob kô Josep. Lêc yuu gên o kôma lêm, di he yê wê Malia xêyaa ge, lêc ge yuac wê Myakilôhô Ngibua vông. ¹⁹Malia liya Josep ge xomxo nivihã, om nêb ob vông Malia ni yoc vô xomxo manôn lêm, om xo ên nêb ob sea Malia lê, lêc nêb ob nêl kiyang wê nu dô vac Malia xêyaa ge kitong vô xomxo tibeac lêm. ²⁰Josep gên dixo kiyang wê nêb ob sea Malia ge vac nilô, mêdêc Apumtau vông angela ti lam nêl kiyang vô Josep vac vivia bêga ên nêbê, “Devit nu Josep, le i lêc xona ên wê ông ob kô Malia ge lêm, ên nipwo wê Malia ob kô ge Myakilôhô Ngibua vaci vông vô Malia. ²¹Om Malia ob kô nu tuc, di ông ob nêl i lê ên nêbê Yesu, ên lê tige kehe bêga nêbê obêc vô lie vêx yuu vux vêl ên he nên nipaên.”

²²Angela nêl bêge, om kiyang wê Apumtau nêl vô plopete ti ilage vô nôn lec. Plopete tige nêl bêga ên nêbê,

23 “Wê lê. Vêxwo ti ob xêyaa di kô nu ti di ob nêl i lê nêbê Emanyuel.” Plopete nêl bêge, di lê Emanyuel kehe bêga nêbê Anutu dô hixôn il.

24 Josep yêp mi kidi lec di vông tîyi xocbê Apumtau angela nêl vô i ge di viac vinê Malia mi dô hixôn lê, 25lêc o yêp hixôn lêm di i la tyip vô buc wê nu tuc yubac ge di Josep nêl i lê nêbê Yesu.

Xomxo piyôp levac lam nêb ob yê Yesu

2 1Malia kô Yesu vac vîgwe Betlehem vac vîgwe levac Judia. Helot tu he Islel nêl king mi dô vac vîgwe Jelusalem. Mêdêc xomxo piyôp levac ya lam gê vîgwe wê hiyôv tyip lam ge mi val Jelusalem di nêl ên nêbê, 2 “Nipwo paha wê ob tu xam Yuda nêl king ge, tyo dô tina? Xe xê pitua wê i vông ge vac vîgwe wê hiyôv tyip lam ge, om xe lam ên xe nêb xe ob lam yev vixam kitu vô i.” 3 Helot ngô kiyang wê he nêl ge di nilô vô viyin mabu om tibii Jelusalem vihati ge, he nilô vô viyin hixôn. 4 Om Helot tyuc he Yuda levac wê mi si daa gee hixôn he wê xovô Moses xolac gee vihati lam di kinêg vô he ên nêbê, “Xomxo ti wê lê nêbê Kilisi ge ob yubac vac vîgwe tina?” 5 Om he nêl lax vô i ên nêbê, “Tyo ob yubac vac vîgwe Betlehem vac vîgwe levac Judia. Ên plopete ti kivuu kiyang ilage i yêp bêga nêbê,

6 ‘Ông Betlehem vac vîgwe levac Judia, ông vîgwe nipwo, lêc ông tu levac nginoo Judia levac vêl, ên xomxo levac ti obêc val vac xam mahigun di ob viac a lige Islel.’ ”

7 Helot ngô kiyang tige, mêdêc vông kiyang la xôpacên vô xomxo piyôp levac tigeê ên nêb he i lam vô i. He lam om Helot kinêg vô he nêbê buc tina wê pitua val tyip lec ge? Om he nêl kitong vô i. 8 Mêd Helot nêl vô he ên nêbê, “Xam loc Betlehem di loc vông yuac levac lec myagên nipwo tige, di xam obêc wêvô ge od xam lôm nêl vô a ên a êno ob loc yev vixag kitu vô i.”

9 Om he ngô Helot vya di loc mi la, di pitua wê he yê vac vîgwe wê hiyôv tyip lam ge la mug ên he di mila le kisii vôxumac ti wê nipwo tige diyêp vac ge. 10 He yê pitua tige di xêyaa vô nivîha yang, 11 di he la vac xumac nilô di la yê nipwo tyo yuu ta Malia, di yev vixa kitu vô nu tige di pimil i. Pyap dêc he hikwee susu vac he vixec di tung la vô nipwo tyo. Susu wê he vông vô i ge gol di xax myaluc, di susu nivîvea nivîhaviha hixôn. 12 Vô bucên Anutu nêl kitong vô he vac vîvia ên nêbê, “Xam lôc vônê Helot tii vacên i ma.” Om he lax môp bangwe mi la ben.

Josep kô Malia yuu Yesu mi yon la Isip

13 Xomxo piyôp levac tigeê la, mêdêc Josep yê Apumtau nêl angela ti vac vîvia di angela tige nêl vô i ên nêbê, “Kidi lec mi kô nipwo yuu ta di mon pec mi loc Isip mi loc dô di i loc tyip vô buc wê a ob nêl kiyang vô ông i tii vac ge, ên Helot ob myag nipwo tige ên nêb ob hi i yib.” 14 Josep

ngô angela vya om kidi lec vô bucên di kô nipwo tige yuu ta di yon la vigwe levac Isip, ¹⁵di la dô di i la tyip vô buc wê Helot yib vêl ge. Om Apumtau kiyang wê plopete nêl ilage vô nôn lec. Plopete nêl bêga ên nêbê, “A tyuc nug tuc gê Isip mi i lôm.”

Helot vông nue vevac la hi Islele nue vux yib

¹⁶Mêdêc Helot xovô nêbê xomxo piyôp levac tige kityoo di o milax vô i lêm, om xêyaa vô myavinê mabu. Om vông tibii la vigwe Betlehem di la vac vigwe wê yêp ninyawehe vô Betlehem ge hixôn ên nêb he i loc hi vux nipwo wê klismas ti me yuu ge vihati i yib. Helot nêl bêge ên xomxo piyôp levac nêl vô i ên nêbê he yê pitua ila di klismas yuu lam la vêl. ¹⁷Om kiyang wê plopete Jelemaia nêl ilage vô nôn lec. Kiyang tige nêl bêga ên nêbê,

¹⁸“He ngô vya vac vigwe Lama wê xomxo vông tilôt di byag levac mabu ge. Lesel byag ên nue, di xomxo ti o tyi wê ob vông i nilô vô viyin maên ge lêm, ên nue vihati yib mima.”

Josep kô vinê yuu nu tuc mi lax dô Islel

¹⁹Timuên wê Helot yib vêl ge od Apumtau angela ti nêl vô Josep vac vivia ên nêbê, ²⁰“Kidi lec di kô nipwo yuu ta di mon lôc mi loc vac vigwe Islel i tii vac, ên he wê nêb ob hi nipwo tige i yib ge, he yib vêl.” ²¹Mêgem Josep kidi lec mi kô nipwo hixôn ta di yon lax mi la Islel.

²²Lêc Josep ngô wê Akeleas kô ma Helot nipilêhê di viac vigwe Judia, om xona ên nêb ob lax mi la vigwe tige lêm. Om Anutu nêl kiyang vô Josep vac vivia tii vac, om Josep loc mi la vigwe levac Galili, ²³di la dô vac vigwe Nasalet. Om kiyang wê he plopete nêl ilage vô nôn lec. Kiyang tige nêl bêga ên nêbê, “He ob nêl bê i ge xomxo Nasalet ti.”

Jon Lipacên nêl kiyang

(Mak 1:2-8; Luk 3:1-18; Jon 1:19-28)

3 ¹Vô buc tige Jon Lipacên kidi mi la vac vigwe mahigun pileva vac vigwe levac Judia, di nêl kiyang vô xomxo bêga ên nêbê, ²“Xam pilepac xam, ên Anutu buc vô kwabo lec.” ³Jon ge wê plopete Aisaia nêl i kitong ilage bêga ên nêbê,

“Xomxo ti tyuc vya levac vac vigwe mahigun pileva ên nêbê, ‘Xam viac Apumtau môp wê obêc lam vac ge di vông i môp i yêp bôbac.’”

⁴Jon mi vinyum ngakwi wê he vông ya bwoc kamel niviluhu ge di vêx let wê bwoc levac ninivi ge hixôn, di yaên wê mi ya ge hiveac hixôn vinoluc. ⁵Di xomxo Jelusalem di xomxo vac vigwe levac Judia hixôn he vac vigwe toto wê yêp kwabo vô mia Jodan ge, he lam vô Jon vac mia Jodan, ⁶di nêl he nên nipaên kitong, di Jon lipac he ya mia Jodan.

⁷He Palisi hixôn Sadyusi tibeac lam ên nêb Jon i lipac he, lêc Jon yê di nêl vô he ên nêbê, “Myel nipaên nue xam! Letya nêl vô xam ên nêbê xam ob pec ên Anutu xêyaa myavinê wê ob val vô xam timuên ge? ⁸Xam pilepac nilôm i vô paha lec lê, lêc vông môm nivaha wê ob nêl kitong bêga bê xam pilepac xam pyap. ⁹Di le i lêc yong xacxam va di xo bê Eblaham bue xam lêm. Ên a ob nêl vô xam bê Anutu tiyi wê ob nêl di ngidax tigae ob tu Eblaham bue ge. ¹⁰Xam tiyi xocbê xax wê xomxo ob vuv vêl ge. Ên xax wê o vuac nôn nivaha lêm ge, xomxo ob vuv vihati vêl di nêx i la vac ngwax.

¹¹“A lipac xam ya mia ên wê xam pilepac xam pyap ge, lêc xomxo ngwe wê ob val timuên ge, xêkizêc wê i vông ge luu xêkizêc wê a vông ge vêl, di a o nivaha tiyi wê a ob kilê i su ge lêm. Xomxo tyo ob lipac xam ya Myakilôhô Ngibua hixôn ngwax. ¹²Xomxo tyo vigê obêc hôm nôn nivaha di tung i la vac xumac wê nôn nivaha ob dô vac ge, di ninivi pileva ge wê ob nêx i la vac ngwax wê yibên obêc ma ge, ên ngwax i ya vêl.”

Jon lipac Yesu

(Mak 1:9-11; Luk 3:21-22)

¹³Yesu sea vigwe Galili di lam la Jodan vô Jon ên nêb i lipac i. ¹⁴Lêc Jon kol i di nêl vô Yesu ên nêbê, “Ông obêc lipac a ge od nivaha, lêc bêna lêc ông lam vô a ên ông nêb a lipac ôngê?” ¹⁵Lêc Yesu nêl lax vô i ên nêbê, “Ông vông i tiyi wê a nêl ge di lipac a, ên u obêc vông môm vihati wê Anutu vông vô u ge i vô nôn lec.” Om Jon ngô di lipac i.

¹⁶Yesu lipac mia pyap dêc lutibed sea mia di lax kehe, mêdêc lag puunê tax di Yesu yê Anutu Myakilôhô Ngibua tiyi xocbê tuclu manôn ge di i lam dô lec i. ¹⁷Mêdêc vya ti lam gê lag puunê bêga nêbê, “A nug tige wê a xêyaa vin lec i di a xê i nivaha.”

Seten yaxên Yesu

(Mak 1:12-13; Luk 4:1-13)

4 ¹Mêdêc Myakilôhô Ngibua didii Yesu mi la vac vigwe myadongên wê xomxo dô vacên ma ge ên nêb Seten i yaxên i. ²Mêd Yesu o ya yaên ti lêm tiyi vidiiên kehe yuu di bucên kehe yuu, om vip den i. ³Om Seten wê mi yaxên xomxo ge val di nêl vô i ên nêbê, “Ông obêc Anutu nu ge od ông nêl di ngidax tigae i tu yaên ên ông wa.” ⁴Lêc Yesu nêl lax vô i ên nêbê, “Xolac nêl bêga ên nêbê, ‘Susu yaên vaci o tiyi wê ob vông xomxo dô maviha ya ge lêm. Nge, xomxo ob dô maviha ya kiyang vihati wê lam vac Anutu mya ge.’” ⁵Yesu nêl bêge. Nang dêc Seten kô i mi yuu la vigwe ngibua Jelusalem di lax i la lec Anutu xumac ngibua kitôn kisii, ⁶di nêl vô i ên nêbê, “Ông obêc Anutu nu ge od ông sox mi loc kibun, ên kiyang ti yêp vac xolac bêga ên nêbê,

‘Anutu obêc vông angela wê i vông ge lam viac ông, di hôm ông kisii ya vigê ên nêb ông vinuxên vixam lec ngidax i ma.’”

⁷Lêc Yesu nêl vô i ên nêbê, “Xolac nêl kiyang ngwe hixôn bêga nêbê, ‘Le i lêc yaxên Apumtau wê ông Anutu ge lêm.’”

⁸Nang dêc Seten kô Yesu mi yuu la lec kitôn dia ti kisii, di Seten hilung vigwe wê yêp kibun ga ge vihati hixôn susu nivîha vihati vô Yesu, ⁹di nêl vô i ên nêbê, “Ông obêc yev vixam kitu vô a di pîmil a ge od a obêc vông vigwe hixôn susu tigae vihati vô ông di ông ob tu kehe.” ¹⁰Lêc Yesu nêl vô i ên nêbê, “Seten, pec mi loc vêl! Ên xolac nêl bêga ên nêbê, ‘Ông yev vixam kitu vô Apumtau wê ông Anutu ge vaci di vông yuac wê ici va vông ge.’”

¹¹Yesu nêl bêge, mêdec Seten sea i mi la, di angela ya val ngidu Yesu xôn.

Buc taxlee wê Yesu nêl xolac vac vigwe levac Galili

(Mak 1:14-15; Luk 4:14-15)

¹²Yesu ngô wê tibii tung Jon la dô vac xumac kalabuhu ge, om la vigwe levac Galili mi la dô vigwe Nasalet. ¹³Mêdec sea vigwe Nasalet di la vigwe Kapaneam wê yêp vô mia luaên ninya vac vigwe levac wê Sebyulan yuu Naptalai vông ilage. ¹⁴Om kiyang wê plopete Aisaia nêl ilage vô nôn lec. Kiyang tige nêl bêga ên nêbê,

¹⁵“Vigwe Sebyulan hixôn vigwe Naptalai, yuu yêp vô mia luaên ninya, di mia Jodan yêp vîlu ganê. Tibii madîluhu wê o xomxo Yuda lêm ge lam dô vac vigwe Galili tige. ¹⁶Om he wê dô vac mapitoc ge he yê xêseac levac. Di he wê dô vac vigwe yibên mapitoc ge, xêseac val vô he pyap.”

¹⁷Kiyang nêl bêge. Ge buc taxlee wê Yesu nêl xolac vô xomxo bêga ên nêbê, “Xam pilepac xam, ên Anutu buc vô kwabo lec.”

Yesu tyuc xomxo yuudiyuu ên nêb he i timu vô i vixa

(Mak 1:16-20; Luk 5:1-11)

¹⁸Yesu mîla vô mia luaên Galili ninya di yê xomxo yuu, Saimon wê lê ngwe nêbê Pita ge di li vux lê nêbê Andlu. Yuu nêx leac ti vac mia luaên tige nêb ob hi pis, ên yuu mi vông yuac lec pis hiên ên nêb ob kô mone lec. ¹⁹Mêdec Yesu nêl vô yuu ên nêbê, “Muu lam timu vô a vixag, ên a ob vông muu didii xomxo mi lam vô a i tiyi xocbê muu didii pis vac leac ge.” ²⁰Om lutibed yuu sea leac dô xel di la hixôn Yesu.

²¹Mêd yon mîla yê Sebedi nu Jems yuu Jon wê yuu dô lec dipac hixôn ma Sebedi di duu leac wê tip sea ge xôn. Mêdec Yesu keac yuu lam, ²²om lutibed yuu sea dipac hixôn ma di la hixôn Yesu.

Yesu vông xomxo tibeac wê yidac kehe toto ge vô nivîha lec

(Luk 6:17-19)

²³Yesu la vilee vac vigwe levac Galili di la nêl kiyang vô xomxo vac he xumac lîlo toto di nêl xolac nivîha lec Anutu ben lag puunê vô he,

di vông he wê yidac hixôn myavinê toto ge vihati vô nivihha lec. ²⁴Om xomxo nêl Yesu lê la vac vigwe levac Sillia vihati. Di he kô xomxo wê yidac kehe toto ge vihati mi lam vô i, hixôn he wê kô myavinê ge, di he wê vimwo nipaên dô vac he nilô ge, di he wê yidac vông he vixog sea ge, di he wê len vô xêlehe ge. Mêd Yesu vông he vihati vô nivihha lec. ²⁵Di xomxo kidu kidu wê lam gê Galili hixôn vigwe vigê yuu wê lê levac nêbê Dekapolis ge di he Jelusalem di he Judia di he wê lam gê mia Jodan vilu ganê ge, he vihati la timu vô Yesu vixa.

Yesu la lec kitôn kisii di nêl kiyang

(Luk 6:20-23)

5 ¹Yesu yê xomxo kidu levac wê kituc lam vô i ge, om sea he mi la lec kitôn di la dô kibun. Mêdêc nue ngivihhi lec mi la vô i, ²di i nêl kiyang vô he bêga ên nêbê,

³“Xomxo wê xovô ên nêbê he tiyiên ma wê Anutu ob yê he nivihha ge, he i dô hixôn xêyaa nivihha, ên Anutu ben lag puunê tu he ben.

⁴“Xomxo wê nilô vô viyin om he byag ge, he i dô hixôn xêyaa nivihha, ên Anutu obêc vông he nilô vô viyin maên.

⁵“Xomxo wê o kô he lec lêm ge, he i dô hixôn xêyaa nivihha, ên Anutu obêc nêl he lê lec kibun ga vihati.

⁶“Xomxo wê xêyaa vin lec môt nivihha wê Anutu vông ge tiyi xocbê he xêyaa vin lec nêb ob ya yaên di num mia ge, he i dô hixôn xêyaa nivihha, ên môt nivihha wê he vông ge, Anutu ob vông i vô nôn lec.

⁷“Xomxo wê xo vigwe pisiv ên xomxo ge, he i dô hixôn xêyaa nivihha, ên Anutu obêc xo vigwe pisiv ên he.

⁸“Xomxo wê nilô xêseac ge, he i dô hixôn xêyaa nivihha, ên he obêc yê Anutu.

⁹“Xomxo wê vông kisoac vac xomxo wê kunacma ge, he i dô hixôn xêyaa nivihha, ên Anutu obêc nêl ên nêbê he tu i nue.

¹⁰“Xomxo obêc timu vô môt nivihha wê Anutu vông ge, lêc tibii obêc vông viyin vô he ên môt tigege ge od he i dô hixôn xêyaa nivihha, ên Anutu ben lag puunê tu he ben.

¹¹“Xomxo obêc yê wê xam vông i vin a ge lêc obêc so vya vô xam di vông viyin vô xam di kityoo kiyang tibeac tibeac lec xam ge ¹²od xam dô hixôn xêmyaa i nivihha, di hi vixam i pec, ên nôn nivihha wê xam ob kô ge dô bin xam vac Anutu ben lag puunê. Xam xovô ên xam nêbê xomxo vông viyin tibêge vô plopete wê dô mugên ilage.

Kiyang pilepacên lec sol yuu xêseac

(Mak 9:50; Luk 14:34-35)

¹³“Xam tiyi xocbê sol wê ob vô nivihha vô xomxo kibun ga vihati ge. Lêc sol obêc vô nyen maên ge, od il ob vông vatya vô ên i vô nyen nangê?

Ge vô nipaên pyap, di o tiyi wê ob vô niviha tii vac di vông yuac ti ge lêm, om xomxo ob nêx i la dô xel di kê vac kibun.

¹⁴“Xam tiyi xocbê ngwax xêseac wê ob linac lec vigwe vihati ge. Ên vigwe levac ti obêc yêp lec kitôn kisii ge od ob yêp xôpacên lêm. ¹⁵Xomxo ti obêc byêx ngwax vac lam ge od obêc lax i la le xôpacên vac dêg nilô lêm. Nge, ob yu i la yux seac ên nêb i linac lec xomxo vihati wê dô vac xumac nilô ge. ¹⁶Om xêseac wê xam vông ge i léc linac vô xomxo vihati manôn êno bêge, ên he i yê môt niviha wê xam vông ge di hi vixa i pec ên Mag Anutu wê dô lag puunê ge.

Yesu nêl kiyang lec Moses xolac

¹⁷“Le i léc xo bê a lam ên a nêb a ob kitya Moses xolac hixôn plopete kiyang vêl lêm. Ên a o lam ên a nêb a ob kitya kiyang tige vêl lêm. Nge, a nêb a ob vông i vô nôn lec. ¹⁸A nêl vixôhilôg nôn vô xam bê gwêbaga di i loc tyip vô buc wê lag yuu kibun xôa obêc ma ge, kiyang wê yêp vac Moses xolac ge, bo ti xôa obêc ma lêm. Nge, vihati ob yêp di ob vô nôn lec timuên. ¹⁹Om xomxo ti obêc pwoo Moses xolac bo ti vac di didii xomxo vac ên nêb he i timu vô i vixa ge od xomxo tige ob kô lê nipwo vac Anutu ben lag puunê. Léc xomxo ti obêc timu vô xolac vihati di didii xomxo vac ên nêb he i timu vô ge od xomxo tige obêc kô lê levac vac Anutu ben lag puunê. ²⁰A ob nêl vô xam bê môt niviha wê xam vông ge i luu wê xomxo xolac kehe hixôn he Palisi mi vông ge vêl. Léc obêc ma ge od o tiyi wê xam ob la vac Anutu ben ge lêm.

Kiyang lec môt xêyaa myavinê

(Luk 12:57-59)

²¹“Xam ngô kiyang pyap wê yêp vô bume ilage bêga nêbê, ‘Le i léc hi xomxo i yib lêm. Xomxo ngwe obêc hi xomxo ngwe yib ge od ob la kot di kô myaviwen.’ ²²He nêl bêge ilage, léc a ob nêl vô xam bê xomxo ngwe obêc kunac li ngwe ge od ob la kot di kô myaviwen. Di xomxo ngwe obêc so vya vô li ngwe ge od xomxo i vông i loc vô hizap levac ên i titô i. Di xomxo ti obêc nêl nipaên lec li ngwe nêb yacyac ge od ob la dô vac ngwax levac vac vigwe nipaên.

²³“Om ông obêc kô daa mi la le vô alta, léc ông xovô bê muu lime ti kiyang obêc yêp ge ²⁴od ông sea daa tige i dô kwabo vô alta di lôc mi loc, ên muu viac kiyang vêl lê, léc ông lôm tung daa timuên.

²⁵“Xomxo ti obêc kô ông mi la kot léc muu ob gên diloc vô môt ge od muu viac kiyang vômâ. Léc obêc ma ge od xomxo tyo obêc tung ông la vac hizap levac vigê, di hizap levac ob vông ông la vac xêhipu vigê, di xêhipu ob tung ông la dô vac kalabuhu, ²⁶di a nêl vixôhilôg vô ông bê ông obêc lop mi lôm vêl ên kalabuhu lêm. Nge, ông ob dô di hi myaviwen vihati i ma vêl lê.

Kiyang lec mōp yōdac vêx yuu vux

27“Xam ngō kiyang pyap wê xomxo nêl ilage bêga ên nêbê, ‘Le i lêc vông mōp yōdac vêx yuu vux lêm.’ 28He nêl bêge, lêc a ob nêl vô xam bê vux ti obêc yê vêx ti di nilô yetac ên ge od tîyi xocbê vux tige vông yōdac vô vêx tige vac nilô. 29Om ông mamnôn vilu hiyôv obêc didii ông mi la vac mōp nipaên ge od ông pul vêl di nêx i loc, ên ông nimnivi mya tige obêc la xôa ma ge od ông ob dô nimviha, lêc obêc dô ge od ông nimnivi vihati ob la vac vigwe nipaên. 30Di ông vigêm hiyôv obêc didii ông mi la vac nipaên ge od ông kitov vêl di nêx i loc, ên ông nimnivi mya tige obêc la xôa ma ge od ông ob dô nimviha, lêc obêc dô ge od ông nimnivi vihati ob la vac vigwe nipaên.

Yesu nêl kiyang lec xomxo wê nêb ob sea vinê ge

(Matyu 19:9; Mak 10:11-12; Luk 16:18)

31“Xomxo nêl ilage bêga ên nêbê, ‘Xomxo ti obêc nêb ob sea vinê ge od i kivuu kipihac wê nêbê yuu ob seama ge ti mi vông vô vinê lê, lêc yuu i seama.’ 32He nêl bêge ilage, lêc a ob nêl vô xam bê vux ti vinê obêc vông mōp yōdac vô vux ngwe lêm, lêc liya sea vinê tyo dô ge od vux tige vông vinê la vac yōdac, di vux ti obêc kô vêx ti wê liya sea i di la ge od vux tige vông yōdac vô vêx tige.

Kiyang lec mōp wê xomxo hilung vigê la kisii di nêl kiyang ge

33“Xam ngō kiyang pyap wê yêp vô bume ilage bêga ên nêbê, ‘Le i lêc hilung vigê loc kisii di nêl kiyang kityooên hixôn lêm. Nge, xam obêc hilung vigêm la kisii ge od xam timu vô kiyang wê xam nêl ge i yêp bôbac vô Apumtau manôn.’ 34He nêl bêge ilage, lêc a ob nêl vô xam bê le i lêc hilung vigê i loc kisii di nêl kiyang ti hixôn lêm. Di le i lêc nêl kiyang ti di nêl vigwe lag puunê lê hixôn ên nêb i ngidu xam kiyang xôn lêm. Ên vigwe lag puunê ge Anutu ben. 35Di le i lêc nêl kiyang ti di nêl kibun lê hixôn lêm. Ên kibun ga sia nipwo wê Anutu kê vixa lec ge. Di le i lêc nêl kiyang ti di nêl vigwe Jerusalem lê hixôn lêm. Ên Jerusalem ge Anutu wê tu king levac ge ben. 36Di le i lêc hilung vigê lec bazub ên nêb i ngidu xam kiyang xôn lêm. Ên xam o tîyi wê xam ob vông bamzub lihi ti vô kwem me vô viliac lec ge lêm. 37Om xam obêc nêl kiyang ge od xam nêl bê ‘Nge’ me ‘Ma’, di i pyap. Ên xam obêc nêl kiyang ya luu tige vêl ge od ge mōp wê Seten vông ge.

Kiyang lec myaviwen nipaên

(Luk 6:29-30)

38“Xam ngō kiyang pyap wê he nêl ilage bêga ên nêbê, ‘Xomxo ti obêc vông ông mamnôn vô nipaên ge od ông êno vông i manôn i vô nipaên.

Di xomxo ti obêc pwoô ông nivum pec ge od ông pwoô i nivu i pec êno.³⁹ He nêl bêge ilage, lêc a ob nêl vô xam bêga bê le i lêc vông myaviwen nipaên vac nipaên lêm. Nge, xomxo ti obêc pitap ông lia vilu ge od ông pilepac lia vilu i loc vô i hixôn. ⁴⁰Xomxo ti obêc vông kiyang vô ông ên nêb ob kô ngakwi wê ông vông ge od ông vông saket mi i kô hixôn. ⁴¹Xomxo ti obêc keac xêkizêc nêbê ông kilê i susu mi loc môp kwabo tya ge od ông kilê mi muu loc môp dia tya hixôn. ⁴²Xomxo ti obêc kitaa susu ti vô ông ge od ông vông vô i. Di xomxo ti obêc kitaa susu ti vô ông ên nêb ob kô mi la lêc vông i lôm ge, od le i lêc hingoo kiyang wê nêl ge lêm.

Kiyang lec môp xêyaa vin lecên

(Luk 6:27-28,32-36)

⁴³“Xam ngô kiyang pyap wê xomxo nêl ilage bêga ên nêbê, ‘Xam xêmyaa i vin lec lime, di xêmyaa i vô nipaên vô tibii wê vông nipaên vô xam ge.’ ⁴⁴He nêl bêge, lêc a ob nêl vô xam bêga bê xam xêmyaa i vin lec he wê yê xam nipaên ge, di xam kitaa vô Anutu ên i vông nivihã vô he wê vông viyin vô xam ge, ⁴⁵ên xam obêc vông bêge ge od xam obêc tu Mag Anutu lag puunê nue, ên Anutu vông hiyôv linac lec xomxo nipaên di he wê nivihã ge hixôn, di vông lun tô lec he wê timu vô môp bôbac ge di tô lec he wê so môp bôbac ge hixôn. ⁴⁶Ên xam xêmyaa obêc vin lec xomxo wê xêyaa vin lec xam ge od xam ob kô nôn bêna? Ên tibii nipaên mi vông bêge êno. ⁴⁷Di xam obêc nêl kiyang vô lime vaci ge od xam ob luu tibii vêl bêna? Ên tibii madiluhu êno mi vông bêge hixôn. ⁴⁸Mêgem xam viac xam mi dô nivihã lee i tiyi xocbê Mag Anutu lag puunê wê nivihã lee ge.”

Môp wê il ob vông susu vô xomxo ge

6 ¹Yesu nêl vô nue ngivihi ên nêbê, “Xam xona nêm di le i lêc vông môp nivihã vô xomxo manôn bê he i yê xam nivihã lêm. Ên xam obêc vông bêge ge od xam ob kô nôn nivihã ti vô Mam Anutu wê dô lag puunê ge lêm.

²“Om xam obêc nêb xam ob vông susu ti vô xomxo wê nêl susu maên ge, od xam o lêc vông xomxo ti i loc mug di vê vuac bê xomxo i yê xam lêm. Ên xomxo kityooên wê viyum nipaên vac nivihã nilô ge mi vông môp tibêge vac xumac lilo di vông vac môp hixôn ên nêb xomxo i yê di yong he lê. Om a nêl vixôhilôg nôn vô xam bêga bê he kô nôn nivihã pyap, om ob kô ngwe i tii vac vô buc timuên nang lêm. ³Om xam obêc vông susu ti vô xomxo wê nêl susu maên ge od xam vigêm kêd i o lêc xovô yuac wê vigêm hiyôv vông ge lêm. ⁴Nge, yuac tibêge i yêp xôpacên, di Mag Anutu wê yê susu yuu môp xôpacên vihati ge ob vông nôn nivihã vô xam.

Yesu nêl kiyang lec môt kitaaên
(Luk 11:2-4)

5“Xam obêc kitaa ge od le i lêc vông i tiyi xocbê xomxo kityooên wê viyum nipaên vac nivihâ nilô ge mi vông ge lêm. Ên he xêyaa vin lec nêb ob le kisii vac Anutu xumac ngîbua di kitaa, di le vac môt buuên wê xomxo tibeac vilee vac ge di kitaa ên nêb xomxo i yê. Lêc a nêl vixôhilôg nô n vông xam bêga bê he kô nô n nivihâ pyap, om obêc kô ngwe tii vac vô buc timuên lêm. 6Om xam obêc kitaa ge od xam loc vac xam bom xumac lôma di tung vuayen lec di kitaa vô Mag Anutu wê dô xôpacên ge, di Mag Anutu wê yê susu yuu môt xôpacên vihati ge ob vông nô n nivihâ vô xam.

7“Xam obêc kitaa ge od le i lêc kitaa tiyi xocbê kiyang pileva wê nô n maên ge lêm. Ên kitaaên tibêge tiyi xocbê môt wê tibii madiluhu mi vông ge. Ên he xo ên he nêbê he ob kitaa dia ge od anutu wê he vông ge ob yê he nivihâ di vông kiyang wê he nêl ge vô nô n lec. 8Om xam o lêc timu vô môt wê he vông ge lêm. Ên susu wê ma ên xam lêc xam gên o kitaa mi nêl lêm ge, ge Mag Anutu xovô pyap.

9“Om xam kitaa bêga bê,

Xe Mag ông, wê ông dô kisii ge,
ông lêm i lam tu ngîbua.

10 Ông lam tu Apumtau i tiyi viğwe vihati.

Ông kiyang i lam vô nô n gê kibun ga xocbê yêp gê kisii ge.

11 Ông vông nyang vô xe i tiyi buc vihati.

12 Xe nê m myaviwen wê yêp vô xe ge, ông kitya vêl, xocbê xe kitya nê m nipaên vêl vôma ge.

13 Ông o lêc didii xe mi loc vac kiyang wê ob yaxên xe ge lêm. Nge, ông vô xe vêl ên nipaên vihati.

[Ông Apumtau, ông xêpîlihi di xêkizêc di ông xêseac kehe di luta lêc luta. Kiyang nô n.]

14“Wê lê. Xam obêc kitya xomxo nê n nipaên vêl ge od Mag Anutu obêc kitya xam nê m nipaên vêl. 15Lêc xam obêc kitya xomxo nê n nipaên vêl lêm ge od Mag Anutu ob kitya xam nê m nipaên vêl lêm.

Kiyang lec môt wê he mi ngîbua yaên ge

16“Buc wê xam obêc ngîbua yaên lec ge od le i lêc dô ma yux yux tiyi xocbê xomxo kityooên ge lêm. Ên he mi vông môt tibêge ên nêb xomxo i yê he di xovô bê he ngîbua yaên. Lêc a nêl vixôhilôg nô n vông xam bêga bê he kô nô n nivihâ pyap, om obêc kô ngwe tii vac vô buc timuên nang lêm.

17Om xam obêc ngîbua yaên ge od xam hivip bamzub di lipac mamnôn hixôn, 18ên xomxo i yê, lêc o xovô wê xam ngîbua yaên ge lêm. Lêcom Mag Anutu wê dô xôpacên ge vaci ob xovô, di Mag Anutu wê yê susu yuu môt xôpacên vihati ge obêc vông nô n nivihâ vô xam.

Yesu nêl kiyang lec susu nivihaviha
(Luk 12:33-34)

¹⁹“Le i léc kituc susu nivihaviha tibeac gê kibun ga lêm. Ên susu wê yêp kibun ga ge, gwaakivac ob lic sea di guva ob iac sea, di tibii yôdac ob dii xumac di la vun susu tige. ²⁰Om xam kituc susu nivihaviha i loc yêp vac Anutu ben lag puunê. Ên susu wê yêp vac Anutu ben lag puunê ge, gwaakivac ob lic lêm di guva ob iac lêm, di tibii yôdac ob dii xumac di la vun lêm. ²¹A nêl bêge vô xam, ên vigwe wê xam susu nivihaviha dô vac ge, ge xam ob vông nilôm la vô vigwe tige.

Xêseac wê xomxo ninivi vông ge
(Luk 11:34-36)

²²“Xam mamnôn tiyi ngwax xêseac wê linac lec nimnivi ge. Om mamnôn obêc dô nivihava ge od nimnivi vihati ob dô vac xêseac. ²³Lêc mamnôn obêc vô nipaên ge od nimnivi vihati ob vô mapitoc. Di xêseac wê dô vac xam nilôm ge obêc mapitoc ge od mapitoc ob vô levac di hivun xam xôn.

Kiyang lec Anutu di mone
(Luk 16:13)

²⁴“Xomxo ti o tiyi wê ob vông yuac vô xomxo levac yuu ge lêm. Ên xêyaa obêc vin lec ngwe di ob yê ngwe nipaên, me obêc vông nilô la vô ngwe di vô nimi vô ngwe. Om o tiyi wê xam ob vông nilôm i loc vô Anutu hixôn mone ge lêm.

Yesu nêl kiyang lec yaên yuu numên
(Luk 12:22-31)

²⁵“Om a nêl vô xam bê xam o léc vông nilôm i vô viyin lec yaên yuu numên hixôn ngakwi lêm, ên môp wê il ob dô madviha ge luu yaên vêl, di môp wê il ob viac nidnivi ge luu ngakwi vêl. ²⁶Xam wê menac di xovô bê menac o xin yaên vê lêm, di he o kô yaên nôn vac yuac lêm, di he o kituc yaên la dô vac xumac ti lêm. Lêc Mag Anutu wê dô lag puunê ge vaci vet he, di Anutu xêyaa vin lec xomxo luu menac tige vêl om Anutu ob viac xam nivihava êno. ²⁷Xam ti o tiyi wê xam ob xo kiyang tibeac di titul buc wê xam ob dô mamviha ge i vô dia lêm.

²⁸“Bêna léc xam xo kiyang tibeac lec ngakwi? Xam xovô nita wê vuac maviya ge. He o vông yuac ti lec ngakwi me he o duu nivimihi ti lêm. ²⁹Lêc a nêl vô xam bêga bê vunacên wê he vông ge luu vunacên nivihaviha wê King Solomon vông ilage vêl. ³⁰Nita wê vuac maviya ge tyip vac yuac mi le gwêbaga, léc titige xomxo ob kitov vêl di nêx la vac ngwax, léc Anutu vunac vô he nivihava. Xam ge, vông vinên wê xam vông ge nipwo lee tya, lêcom xam xovô bê Anutu

obêc viac xam nivihā luu maviya vêl. ³¹Om le i lêc xo kiyang tibeac di nêl bêga bê, ‘Il ob xa vatya, di il ob num vatya, di il ob vinyum ngakwi tibêna?’ lêm. ³²Ên tibii madiluhu ge wê xo kiyang tibeac ên nêb ob tulec susu tibêgee. Dom Mag Anutu wê dô lag puunê ge xovô susu wê ma ên xam ge pyap. ³³Mêgem xam obêc vông nilôm i loc vô Anutu hixôn môm nivihā wê i vông ge od Anutu obêc vông susu ninivi xen vô xam hixôn. ³⁴Om xam o lêc xo kiyang tibeac lec buc titige lêm, ên obêc titige ge od xam ob xovô susu me vîyin wê xam ob tulec titige. Vîyin wê buc toto vông ge i yêp lec buc titi ge bôbac.”

Le i lêc yaxên xomxo nên kiyang lêm
(Luk 6:37-38,41-42)

7 ¹Yesu nêl vô nue ngivihî ên nêbê, “Le i lêc yaxên xomxo nên kiyang lutibed lêm, ên Anutu i o lêc yaxên xam nêm kiyang lêm. ²Ên Anutu obêc yaxên xam nêm kiyang tiyi xocbê xam va yaxên xomxo nên kiyang ge. Ên môm wê xam vông vô xomxo ge od Anutu obêc vông i tiyi wê xam vông vô he ge vô xam. ³Bêna lêc ông wê xax mavigen nipwo tya wê le vac lim manôn ge di nêlê, di ông lungên xax yatôv wê le vac ôcông va mamnôn ge? ⁴Xax levac le vac ông mamnôn, bêna lêc ông nêl vô lim ên ông nêbê ông ob hôm xax mavigen nipwo tya wê le vac lim manôn ge vêl? ⁵Ông xomxo kityooên, ông hôm xax yatôv wê le vac ông mamnôn ge vêl tax ên mamnôn i seac, ge od ông tiyi wê ông ob hôm xax mavigen nipwo tya wê le vac lim manôn ge vêl.

⁶“Le i lêc nêx susu ngibua i loc vô noo lêm. Di le lêc nêx komkom wê mone levac ge i loc vô bwoc lêm, ên he ob kê i hibû sea di ob pop mi nga xam.

Kiyang lec môm kitaaên
(Luk 11:9-13)

⁷“Xam kitaa vô Anutu ên i vông susu vô xam, di xam myag susu êdêc wêvô, di hi vigêm lec vuayen ên i tax ên xam. ⁸Ên xomxo vihati wê kitaa vô Anutu ge obêc kô nôn tiyi wê he kitaa ge, di xomxo ti wê myag susu ge obêc yêvô, di xomxo ti wê hi vigê lec vuayen ge vuayen obêc tax ên i.

⁹“Xam nume ti obêc kitaa ma ên nêb ob ya blet ge od ma ob vông ngidax ti vô, me? ¹⁰Di nu tige obêc kitaa ma ên nêb ob ya pis ge od ma ob vông myel ti vô, me? ¹¹Xam ga xomxo kibun nimpaên, lêc xam mi vông susu nivihā vô nume. Om xam xovô bêga bê il Mag Anutu wê dô lag puunê ge ob vông susu nivihavihā i luu vêl vô xomxo wê kitaa i ge.

¹²“Om môm vihati wê xam nêb xomxo i vông vô xam ge, xam vông môm bêge vô he êno, ên kiyang wê Moses hixôn plopete nêl ge kehe bêge.

Kiyang lec môm nipwo yuu môm levac
(Luk 13:24)

¹³“Xam loc vô môm vuayen nipwo, ên môm wê ob didii xomxo la xôa ma ge, ge môm levac wê ob vông yuac levac vô xomxo lêm. Om xomxo

tibeac la vô môt ngwe ge. ¹⁴Lêc môt wê ob didii xomxo la dô maviha ge, ge môt nipwo wê vông yuac levac vô xomxo. Om xomxo yuutyabed ob yêvô mi la vô môt tige.

Yesu nêl kiyang lec plopete kityooên

(Luk 6:43-44; Luk 13:25-27)

¹⁵“Xam xona nêl ên plopete kityooên, ên he tiyi xocbê he vinyum bwoc sipsip niviluhu om xam so ên xam nêbê he xomxo nivihâ. Lêc he nilô tiyi xocbê noo nipaên. ¹⁶Xam obêc xovô he lec môt wê he vông ge. Ên xomxo ob yul myedanôn nôn lec kipomac yin yatôv lêm. Di xomxo ob yul kisung nôn lec nyela yatôv lêm. ¹⁷Ên xax nivihâ vihati ob vuac nôn nivihâ, di xax nipaên vihati ob vuac nôn nipaên. ¹⁸Xax nivihâ o tiyi wê ob vuac nôn nipaên ge lêm, di xax nipaên o tiyi wê ob vuac nôn nivihâ ge lêm. ¹⁹Xax vihati wê o vuac nôn nivihâ lêm ge, xomxo ob vuv vêl di nêx i la vac ngwax. ²⁰Om xam obêc xovô plopete kityooên lec môt nipaên wê he vông ge.

²¹“Xomxo wê mi nêl ‘Apumtau, Apumtau’ vac mya pileva ge, he ob la dô vac Anutu ben lêm. Nge, he wê timu vô môt wê Mag Anutu lag puunê vông ge wê ob la dô vac Anutu ben. ²²Ôbêc vô buc levac timuên ge od xomxo tibeac obêc nêl ên nêbê, ‘Apumtau, Apumtau, xe vông yuac plopete lec ông lêm, di xe tii vimwo nipaên vêl ên xomxo lec ông lêm, di xe vông do levac tibeac lec ông lêm.’ ²³Lêc a obêc nêl vô he bê, ‘A lungên xam. Xam ge xomxo nipaên, om xam pec vêl ên a magnôn.’

Kiyang pilepacên lec xumac loxên

(Luk 6:47-49)

²⁴“Xomxo vihati wê ngô a kiyang di vông a vyag vô nôn lec ge, he tiyi xocbê xomxo xovôên nivihâ ti wê lox xumac lec ngidax pitehe kisii. ²⁵Di buc lun val di mia butac, di vigwe viyii, om xumac vô yocyoc, lêc o kipê lêm, ên lox xumac lec ngidax om xumac le xêkizêc. ²⁶Di xomxo vihati wê ngô a kiyang, lêc o timu vô lêm ge, he tiyi xocbê xomxo piyôp maên ti wê lox xumac lec luda pileva. ²⁷Di buc lun val di mia butac di vigwe viyii, om xumac vô yocyoc di kipê mi la dii sea.”

²⁸Yesu nêl kiyang vihati gee pyap di xomxo kidu levac wê kitucma di ngô kiyang ge yetac mabu ên kiyang wê i nêl ge, ²⁹ên Yesu o nêl kiyang vô he tiyi xocbê xomxo wê xovô Moses xolac ge lêm. Nge, nêl kiyang hixôn xêkizêc.

Yesu vông xomxo wê kityax mahizihizi ge ti vô nivihâ lec

(Mak 1:40-44; Luk 5:12-14)

8 ¹Yesu sea kitôn di lop mi la di xomxo tibeac hiwocên timu vô i vixa mi lam. ²Mêd xomxo wê kityax mahizihizi ge ti val vô Yesu di yev

vixa kitu vô di nêl vô i ên nêbê, “Xomxo levac, ông obêc nêb ông ob vông a nignivi i vô nivihha lec ge od ông tiyi.” ³Mêgem Yesu titô vigê mi la vyax lec i di nêl ên nêbê, “A nêb ông vô nimvihha lec.” Yesu nêl di kityax mahizihizi tige wax la vêl lutibed di xomxo tyo ninivi vô nivihha lec. ⁴Mêdec Yesu nêl vô i ên nêbê, “Le i lêc nêl nimnivi wê vô nivihha lec ge kitong vô xomxo ti lêm. Di ông loc hilung nimnivi mô vô xomxo wê mi si daa vô Anutu ge di vông daa i tiyi môt wê Moses xolac nêl ge, ên xomxo vihahi i yê di xovô bê ông nimnivi vô nivihha lec.”

Yesu vông Lom vevac levac nu yuac ti vô nivihha lec
(Luk 7:1-10)

⁵Yesu loc mi la vigwe Kapaneam, mêdec Lom vevac levac wê viac nue vevac 100 ge ti lam vô Yesu di kitaa i ên nêbê, ⁶“Xomxo levac, a nug yuac ti vông yidac levac mi yêp vac a bog, lêc vigê yuu vixa len vô xêlehe di i yaxên myavinê levac.” ⁷Om Yesu nêl vô i ên nêbê, “A ob loc vông i vô nivihha lec.” ⁸Lêc xomxo vevac tige nêl lax vô i ên nêbê, “Xomxo levac, a o nivihha tiyi wê ông ob lam vac a xumac lôma ge lêm. Om ông vyam i nêl di a nug yuac i vô nivihha lec. ⁹Ên a ga êno wê a la vac xomxo levac kwa ngibi, di a nuge vevac ge wê lam vac a kwa ngibi. Om a obêc nêl vô he ti ên a nêb i loc ge od ob la, di a obêc nêl vô ti bê i lam ge od ob lam, di a obêc nêl vô nug yuac ti bê i vông yuac ge od ob vông. Di ông êno, ông ge xomxo xêkizêc, om a xovô ên a nêbê

ông obêc le teva di nêl ge od a nug yuac tige ob vô nivihha lec.”

¹⁰Yesu ngô kiyang wê xomxo tyo nêl ge om yetac, di nêl vô xomxo tibeac wê timu vô i vixa ge ên nêbê, “A nêl vixôhilôg nôn vô xam bê a o xê xomxo Islel ti wê vông i vin xêkizêc tiyi xocbê Lom tiga vông i vin ge lêm.

¹¹“A nêl vô xam bêga bê tibii tibeac ob kidi vac vigwe wê hiyôv tyip lam ge di vigwe wê hiyôv hoo la ge di la dô mi ya hixôn Eblaham yuu Aisak yon Jekop vac Anutu ben lag puunê. ¹²Lêc Islel wê he nêb he ob la dô vac Anutu ben ge, Anutu ob tii he la dô vac vigwe mapitoc. Vac vigwe tige he ob byag levac di ob kic nivu lecma.”

¹³Mêdec Yesu nêl vô Lom vevac levac tige ên nêbê, “Ông loc bom. Kiyang wê ông nêl ge obêc vô nôn lec i tiyi xocbê ông vông i vin di kitaa a ge.” Om hiyôv manôn tibed tige xomxo yuac tige vô nivihha lec.

Yesu vông Saimon Pita yen vêxta vô nivihha lec
(Mak 1:29-31; Luk 4:38-39)

¹⁴Yesu la vac Pita ben, lêc yê wê Pita yen vêxta vông yidac ngwax tum mi yêp. ¹⁵Om la hôm lec vigê, di yidac tip la, mêdec vêx tyo kidi lec di viac yaên ên nêb i ya.

Yesu vông xomxo yidac tibeac vô nivaha lec
(*Mak 1:32-34; Luk 4:40-41*)

¹⁶Vô hucên xomxo tibeac kô lie wê vimwo nipaên dô vac he nilô gee mi val vô Yesu. Mêd Yesu nêl di vimwo nipaên tigege lop mi la vêl ên he, di Yesu vông he wê yidac ge vihati vô nivaha lec hixôn. ¹⁷Om kiyang wê plopete Aisaia nêl ilage vô nôn lec. Ilage Aisaia nêl bêga ên nêbê, “Ici va kô il nêd myavinê hixôn yidac wê vông il ge vêl.”

Xomxo wê nêb ob timu vô Yesu vixa ge
(*Luk 9:57-60*)

¹⁸Yesu yê wê xomxo tibeac buu i ge, om nêl vô nue ngivihi ên nêbê, “Xam lam ên il ob la mia luaên vilu ganê.” ¹⁹Mêdec xomxo wê xovô Moses xolac ge ti val vô Yesu di nêl vô i ên nêbê, “Xolac kehe, vigwe vihati wê ông ob la vac ge, a ob loc hixôn ông.” ²⁰Lêc Yesu nêl vô i ên nêbê, “Le i lêc nêl decdec bê ông ob lam hixôn a lêm, ên lilii mi yêp vac yen, di menac mi vông liwihi lec xax, lêc a, Xomxo Nu, a bog wê a ob xêp vac ge ma.” ²¹Nang dêc xomxo wê mi timu vô Yesu vixa ge ti nêl vô i ên nêbê, “Xomxo levac, ge tiyi wê a ob la yev mag vêl lê, lêc lam timu vô ông vixam, me?” ²²Lêc Yesu nêl vô i ên nêbê, “Ông lam timu vô a vixag, di xomxo yibên vaci i yev xomxo yibên.”

Yesu nêl di lea yuu mia vô ninya lehe vô i vya
(*Mak 4:36-41; Luk 8:22-25*)

²³Nang dêc Yesu la lec dipac di nue ngivihi la hixôn di he la. ²⁴He mila mia luaên mahigun lê, lêc lea mabu val, om mia kipyax la vac dipac nilô mi pup lec, di Yesu diyêp, ²⁵om nue ngivihi la tipi vô i di nêl vô i ên nêbê, “Xomxo levac, ngidu xe xôn, ên il ob la xib.” ²⁶Lêc Yesu nêl vô he ên nêbê, “Xam xona ên va? Xam nêm vông vinên nipwo tya.” Mêd Yesu kidi lec di piping lea yuu mia, om lea levac tip la di mia tipiên ma. ²⁷Om nue ngivihi yetac mabu di nêl vômâ ên nêbê, “Xomxo tiga letya, lêc lea yuu mia vô ninya lehe vô i?”

Yesu tii vimwo nipaên vêl ên xomxo yuu
(*Mak 5:1-17; Luk 8:26-37*)

²⁸Yesu he nue ngivihi dô lec dipac di loc mi la tibii Gadala ben wê yêp mia luaên vilu ganê. Xomxo yuu wê vimwo nipaên dô vac yuu nilô ge dô vac vigwe tige. Yuu mi dô vac vigwe wê xomxo yibên mi yêp vac ge, lêc yuu yê wê Yesu val ge om yuu la vô i. Xomxo yuu ge la dô vimen, om xomxo xona ên yuu di o vilee mi la vô môp tige lêm. ²⁹Mêdec yuu tyuc ên nêbê, “Anutu nu ông, ông ob vông bêna vô xe? Buc tige valên gên ma, lêc ông lam ên ông nêb ông ob vông xe vô nipaên tax, me?” ³⁰Yuu nêl

bêge, mêd bwoc kidu levac diya gê teva tya. ³¹Om vimwo nipaên wê dô vac yuu nilô gee kitaa Yesu ên nêbê, “Ông obêc tii xe vêl ge od ông vông xe la dô vac bwoc tiganêe nilô.”

³²Om Yesu nêl vô he ên nêbê, “Xam loc.” Mêgem vimwo nipaên tigege lop vêl ên xomxo yuu ge di la vac bwoc nilô, mêdec bwoc tigege vihati tup mi la vac madia di la tô vac mia di yib mima vêl.

³³Mêd xomxo wê mi viac bwoc tigege pec mi la viyangtôv di mila nêl kiyang lec bwoc wê yib ge kitong di nêl xomxo yuu wê vimwo nipaên dô vac yuu nilô ge kitong hixôn. ³⁴Om tibii wê dô vac vigwe tige vihati xona ên Yesu om lam myag i mi yêvô, di nêl kiyang xêkizêc vô i ên nêbê i sea he ben di loc vac vigwe bangwe.

Yesu vông xomxo wê len vô xêlehe ge ti vô nivihalec

(Mak 2:1-12; Luk 5:17-26)

9 ¹Yesu lec dipac mi lax mi la mia luaên vilu ganê mi la ben. ²Mêdec tibii ken xomxo wê len vô xêlehe ge ti lec pêt wê i vông ge mi lam vô Yesu. Mêgem Yesu yê wê he vông i vin ge, om nêl vô xomxo tyo ên nêbê, “Nug, ông xêmyaa i vô nivihalec, ên a kitya ông nêl nipaên vêl pyap.”

³Lêcom xomxo wê xovô Moses xolac gee dô hixôn om xo vac nilô ên nêbê, “Xomxo tige so vya vô Anutu.”

⁴Lêc Yesu xovô kiyang wê he xo vac nilô ge, om nêl vô he ên nêbê, “Bêna lêc xam xo kiyang nipaên bêge vac nilômê? ⁵Kiyang bêna il ob nêl lutibedê? A ob nêl bê ‘a kitya ông nêl nipaên vêl,’ me a ob nêl bê ‘ông kidi lec mi loc?’ ⁶Mêlêc a nêb a ob vông xovôên vô xam bê a, Xomxo Nu, a tiyi wê a ob kitya xomxo nêl nipaên vêl gê kibun ga ge.” Mêgem Yesu nêl vô xomxo ti wê len vô xêlehe ge ên nêbê, “Kidi lec mi hôm ông guhu lec di lôc bom.” ⁷Mêd vux tyo kidi lec mi la ben. ⁸Mêgem xomxo tibeac yê di xona mabu di pimil Anutu lê, ên wê i vông xêkizêc tibêge vô xomxo tige.

Yesu nêb Matyu i lam timu vô i vixa

(Mak 2:13-17; Luk 5:27-32)

⁹Pyap dêc Yesu loc mi la, lêc mila yê xomxo ti lê nêbê Matyu wê xeedô vac

xumac wê he mi kô takis vac ge. Om Yesu nêl vô i ên nêbê, “Lam timu vô a vixag.” Mêgem Matyu kidi lec di la timu vô Yesu vixa.

¹⁰Mêdec Yesu la ya vac Matyu ben, di tibii nipaên wê mi kô takis ge hixôn tibii nipaên tibeac, he lam dô mi ya hixôn Yesu he nue ngivihi.

¹¹Lêc he Palisi ge, he yê om nêl vô Yesu nue ngivihi ên nêbê, “Bêna lêc xam nêl xolac kehe la ya hixôn tibii nipaên wê mi kô takis ge yuu tibii nipaên tibeacê?”

¹²Lêc Yesu ngô wê he nêl ge om nêl vô he ên nêbê, “Xomxo nivihalec ob la vô docta lêm. Nge, tibii wê yidac ge wê ob la vô docta. ¹³Om xam loc

di xovô kiyang wê yêp vac xolac bêga ên nêbê, 'A o nêb xam si daa vô a lêm. Nge, a nêb xam xo vigwe pisiv ênma môci.' Xolac nêl bêge, om a o lam ên a nêb a ob tyuc xomxo nivîha lêm. Nge, a lam ên a nêb a ob tyuc xomxo nipaên."

Kiyang lec yaên yuu ngakwi hixôn bwoc ninivi
(*Mak 2:18-22; Luk 5:33-39*)

¹⁴Nang dêc Jon Lipacên nue ngivihi val vô Yesu di nêl vô i ên nêbê, "Xe hixôn Palisi, xe mi ngibua yaên tiyi buc tibeac, lêc bêna lêc ông nume ngivihi o ngibua yaên lêm?"

¹⁵Om Yesu nêl kiyang pilepacên ti vô he ên nêbê, "Tibii lie ti obêc ii vêx lêc gên dô hixôn lie ge od he nilô ob vô viyin, me? Ma vêl. Lêc obêc buc timuên wê tibii ob kô li tige vêl ên he ge od he ob ngibua yaên. ¹⁶Di xomxo ti nên ngakwi obêc tip ge od obêc kiping ngakwi paha myahîpu ti vêl mi la duu lec tikwê lêm. Ên obêc vông bêge ge od myahîpu paha tige obêc titê tikwê lêx di tocên obêc vô myakîpwoc. ¹⁷Di xomxo ti ob too wain paha vac bwoc ninivi tikwê lêm. Ên obêc too vac ge od wain obêc nyôn ninivi tikwê tige tip di too la di ninivi vô nipaên. Om wain paha ge, xomxo too vac bwoc ninivi paha, di wain yuu xôn ninivi ob dô nivîha."

Xomxo levac nu vêx di vêx yidac ngwe, yuu kiyang
(*Mak 5:22-43; Luk 8:41-56*)

¹⁸Yesu gên nêl kiyang bêge vô he, mêdec tibii levac ti lam yev vixa kitu vô i di nêl ên nêbê, "A nug vêx gên yib tya ga om ông lam vyax vigêm lec i, ên i kidi lec maviha i tii vac." ¹⁹Mêgem Yesu kidi lec hixôn nue ngivihi mi he la.

²⁰Mêd vêx ti dô vac he mahigun, lêc vêx tige, yidac kwatuacên ti vông i tiyi kliskas vigê yuu di yuu tô mi la (12), lêc o ma lêm. Vêx tyo val le vô Yesu nimi di vyax vigê lec Yesu ngakwi myahîpu, ²¹ên xo ên nêbê, "A obêc hêm lec Yesu ngakwi myahîpu ge od a obêc vô nivîha lec." ²²Mêdec Yesu pilepac di yê vêx tyo, om nêl vô ên nêbê, "Nug, ông nilôm i vô nivîha, ên vông vinên wê ông vông ge ob vông ông vô nimviha lec." Mêdec lutibed vêx tige vô nivîha lec.

²³Mêd Yesu loc mi la vac xomxo levac tige ben, di yê he wê vê ngivêg ge hixôn kidu levac wê byag di vông nididun levac ge. ²⁴Om Yesu nêl vô he ên nêbê, "Xam kidi lec mi loc, ên nipwo tige o yib lêm. Nge, ici va diyêp." Lêc he nap lec kiyang wê i nêl ge. ²⁵Om Yesu tii he lop mi la vêl, di la xumac lôma di la hêm lec vêx tyo vigê, di i kidi lec maviha. ²⁶Mêgem xomxo nêl kiyang tige vô levac vac vigwe tigege vihati.

Yesu vông xomxo manôn tocên yuu di kwa maên ti vô nivîha lec

²⁷Yesu sea vigwe tige mi la, di xomxo yuu wê manôn toc ge timu vô i vixa, di keac vya levac ên nêbê, "Devit nu, xo vigwe pisiv ên xii."

²⁸Mêdec Yesu la vac xumac nilô, di xomxo yuu ge val vô i, di Yesu kinêg vô yuu ên nêbê, “Muu vông i vin ên muu nêb a tiyi wê a ob vông muu mamnôn i seac ge, me?” Di yuu lee yuu ên nêbê, “Apumtau, ông tiyi.”
²⁹Mêgem Yesu vyax vigê lec yuu manôn di nêl ên nêbê, “Muu mamnôn i seac i tiyi xocbê vông vinên wê muu vông ge.”
³⁰Mêgem yuu manôn seac. Di Yesu nêl xêkizêc vô yuu ên nêbê, “Le i lêc loc nêl wê a vông muu mamnôn seac ge kitong vô tibii lêm.”
³¹Lêc yuu la di la nêl Yesu lê vô levac vac vigwe vihati.

³²Yuu la di xomxo kê vux ti wê vimwo nipaên vông kwa ma ge lam vô Yesu.
³³Mêdec Yesu tii vimwo nipaên la vêl om xomxo tige keac vya tyip nivihia. Om xomxo tibeac ngô di yetac mabu di nêl ên nêbê, “Il o xê do levac bêga ti vac vigwe Islel ila lêm.”
³⁴Lêc he Palisi nêl ên nêbê, “Yesu tii vimwo nipaên vêl ya xêkizêc wê vimwo nipaên nêl levac vông ge.”

Yesu xo vigwe pisiv ên xomxo

³⁵Yesu mila vilee vac vigwe levac hixôn vigwe nipwo vihati, di la nêl kiyang vô xomxo vac he xumac lilo toto di nêl xolac nivihia lec Anutu ben vô he di vông he wê yidac hixôn myavinê toto ge vihati vô nivihia lec.
³⁶Yesu yê xomxo tibeac wê lam vô i ge di xo vigwe pisiv ên he, ên he piyôp juda di he dô hixôn viyin tiyi xocbê bwoc sipsip wê xomxo ti o viac he lêm ge.
³⁷Om Yesu nêl vô nue ngivihia ên nêbê, “Yaên wê dô vac yuac ge vô nôn tibeac pyap, lêc nue yuac wê ob la kê nôn gee, he yuutyabed.
³⁸Om xam kitaa vô Apumtau wê viac yuac ge ên i vông nue yuac tibeac i loc kituc yaên wê i vông ge i dô kidu tixed.”

Yesu nue ngivihia vigê yuu di tô mi la yuu

(Mak 3:13-19; Luk 6:12-16)

10 ¹Yesu tyuc nue ngivihia vigê yuu di tô mi la yuu lam vô i, di vông xêkizêc vô he tiyi wê he ob tii vimwo nipaên vêl ên xomxo di vông xomxo wê yidac hixôn myavinê toto ge vô nivihia lec.

²Nue ngivihia vigê yuu di tô mi la yuu gee lê bêga nêbê, taxlee ge, Saimon wê lê ngwe nêbê Pita ge yuu li Andlu. Di Jems wê ma Sebedi ge yuu li Jon.
³Di Pilip yuu Batolomyu, di Tomas, di Matyu wê mi kê takis ge, di Jems wê ma Alpias ge, di Tadias,
⁴di Saimon Selot, di Judas Iskaliot wê vông Yesu la vac tibii vevac vigê ge.

Yesu vông yuac vô nue ngivihia

(Mak 6:7-13; Luk 9:1-5)

⁵Yesu nêb ob vông nue ngivihia vigê yuu di tô mi la yuu gee i loc, om nêl vô he ên nêbê, “Xam loc vôên tibii baba i ma, di loc vacên tibii Samelia vigwe i ma.
⁶Di xam loc vô lime Islel mô, ên he tiyi xocbê bwoc sipsip wê lung sea di la xôa ma ge.
⁷Om xam loc nêl kiyang vô he bêga

bê, 'Anutu buc vô kwabo lec.' ⁸Xam loc vông xomxo yidac i vô nivîha lec, di tipi vô xomxo yibên i kidi lec, di vông xomxo wê kityax mahizihizi ge i vô nivîha lec, di tii vimwo nipaên i loc vêl ên xomxo. Xêkizêc tige a vông pileva vô xam, om xam vông pileva vô xomxo di le i lêc kô mone lec lêm.

⁹"Le i lêc su mone gol yuu silva di kapa vac xam vixec nu lêm. ¹⁰Di le i lêc bya vixec mi loc vô môt lêm, di le i lêc kô nivimihi yuu lêm, di le i lêc kô su hixôn pitoa lêm. Ên xomxo ti obêc vông yuac vô xomxo ge od ob kô xen yaên vô xomxo tige.

¹¹"Xam obêc la vac vîgwe levac yuu nipwo ge od xam wêvô xomxo nivîha di loc dô hixôn, di i loc tyip vô buc wê xam ob sea vîgwe tige di la ge. ¹²Om wê xam obêc la vac xumac nilô tige ge od xam nêl kiyang nivîha vô he. ¹³Di xomxo wê dô vac xumac tige obêc lee yuu ên nêbê xam dô hixôn he ge od kiyang nivîha wê xam nêl ge i yêp vô he. Lêc he obêc tyuc lec lêm ge od kiyang nivîha wê xam nêl ge i lôm lam vô xacxam va. ¹⁴Di xomxo ti obêc kô xam lec nivîha lêm di ob ngô kiyang wê xam nêl ge lêm ge od xam liloo vîjuva vêl ên vixam, ên i nêl he nêl nipaên kitong vô he, di xam sea xumac yuu vîgwe tige di loc. ¹⁵A nêl vixôhilôg nôn vô xam bê vô buc timuên wê Anutu obêc yaxên xomxo vihati nêl kiyang ge od Anutu obêc vông myaviwen nipaên vô xomxo vîyang tige luu Sodom yuu Gomola vêl.

Yesu nêl kiyang vô nue ngivihi lec vîyin vîyang vîyang

wê ob val timuên ge

(Mak 13:9-13; Luk 21:12-17)

¹⁶"A ob vông xam loc i tiyi xocbê bwoc sipsip wê xam ob la vac noo vimen mahigun ge. Om xam viac môt wê xam vông ge nivîha, di dô mamlehe i tiyi xocbê tuclu ge. ¹⁷Xam viac xam ên xomxo, ên he ob kô xam mi la vông kiyang vô xam, di he ob pisa xam ya yihi vac he xumac lilo, ¹⁸di kô xam mi la lax vô gavman levac yuu king manôn di vông kiyang vô xam ên wê xam vông i vin a ge. Om xam ob nêl a kiyang kitong vô he hixôn tibii madiluhu. ¹⁹Mêlêc buc wê he obêc kô xam mi la vac kot ge od xam o lêc myag môt yuu kiyang wê xam ob nêl ge lêm. Ên kiyang wê xam ob nêl ge Anutu ob vông vô xam vô buc tige. ²⁰Om xacxam va ob nêl kiyang lêm. Nge, Myakilôhô Ngîbua wê Mag Anutu vông ge vaci ob nêl kiyang vac xam myam.

²¹"Vô buc tige xomxo obêc vông lie la vac tibii vîgê ên nêb tibii i hi he yib, di mae obêc vông bêge vô nue, di nue ob yê tae mae nipaên di vông he la vac tibii vîgê ên nêb tibii i hi he yib. ²²Di xomxo vihati xêyaa ob vô nipaên vô xam ên wê xam vông i vin a lêg ge. Lêc xomxo ti obêc le xêkizêc vac vîyin di i la tyip vô buc myahîpu ge od Anutu obêc vông i la dô vac i ben. ²³He obêc vông vîyin vô xam vac vîgwe ngwe ge od xam pec mi loc vac vîgwe bangwe. Ên a nêl vixôhilôg nôn vô xam bêga bê

xam obêc vông yuac vac Islel ben vihati lêm, di a, Xomxo Nu, a ob vena tax.

²⁴“Nipwo xumac xulacên ti ob luu ma wê hilung yuac vô i ge vêl lêm. Di xomxo yuac ti ob luu xomxo levac wê viac yuac ge vêl lêm. ²⁵Lêc nipwo xumac xulacên ti obêc tiyi ma wê hilung yuac vô i ge od pyap, di xomxo ti obêc tiyi xomxo levac wê viac yuac ge od pyap. A tiyi xocbê xomxo levac wê a viac xumac ge, di xomxo nêl Seten lê ngwe Bielsebul lec a, om xam xovô bêga bê he obêc nêl a nipaên ge od he ob nêl nipaên lec a nuge xam hixôn luu vêl.

Xam xona ên Anutu vaci

(Luk 12:2-9)

²⁶“Om xam o lêc xona ên xomxo lêm. Ên kiyang vihati wê yêp vac xomxo nilô ge ob lam yêp seac, di kiyang wê yêp xôpacên ge, vihati ob lam yêp seac di xomxo ob xovô. ²⁷Kiyang wê a nêl xôpacên vô xam ge, xam loc nêl i yêp seac vô xomxo mi he i ngô. Di kiyang wê a nêl kimunaên vô xam ge, xam loc le lec wetôv di nêl i yêp seac vô xomxo mi he i ngô. ²⁸Di xam o lêc xona ên he wê ob hi xam nimnivi yib ge lêm, ên he o tiyi wê he ob hi kinum yib hixôn ge lêm. Xam xona ên Anutu môci, ên Anutu tiyi wê ob vông xam kinum yuu xôn nimnivi la vac vîgwe nipaên.

²⁹“Xomxo mi kisuu menac nipwo yuu ya mone tived. Lêc Anutu obêc lee yuu lêm ge od menac nipwo tigege ti ob tô mi la kibun lêm. ³⁰Di xam ge, Anutu kitong xam bamzub lihi vihati pyap. ³¹Om xam xonaên i ma, ên Anutu xêyaa vin lec xam ngînoo menac nipwo vihati vêl.

³²“Om xomxo ti obêc nêl a kitong vô xomxo ge od a ob nêl xomxo tige kitong êno vô Mag Anutu wê dô lag puunê ge. ³³Lêc xomxo ti obêc yax a vun vô xomxo ge od a ob yax i vun êno vô Mag Anutu wê dô lag puunê ge.

Il xêgyaa i vin lec Yesu i luu vêl

(Luk 12:51-53; Luk 14:26-27)

³⁴“Xam o lêc xo bê a lam ên a nêb a ob kitov vevac i tip gê kibun ga lêm. Ên a o lam ên a nêb a ob kitov vevac i tip lêm. Nge, a kô yipac levac mi lam. ³⁵Ên a lam ên a nêb a ob vông xomxo i dô kidu kidu. Om ma yuu nu vux xêyaa ob vô myavinê vôma, di ta yuu nu vêx xêyaa ob vô myavinê vôma, di yen vêxwo yuu yen vêxta xêyaa ob vô myavinê vôma, ³⁶di xomxo wê dô vac xumac tived gee, he ob yêma nipaên.

³⁷“Xomxo ti xêyaa obêc vin lec ta yuu ma luu wê xêyaa vin lec a ge vêl ge od o tiyi wê ob tu a xe ge lêm. Di xomxo ti xêyaa obêc vin lec nue vêx yuu vux luu wê xêyaa vin lec a ge vêl ge od o tiyi wê ob tu a xe ge lêm.

³⁸Di xomxo ti obêc kilê xax pola wê i vông ge mi timu vô a vixag lêm ge od

o tiyi wê ob tu a xe ge lêm. ³⁹Ên xomxo ti obêc viac ninivi ên yibên ge od ob yib mi la xôa ma. Lêc xomxo ti obêc yib lec a lêg ge od obêc dô maviha.

Xomxo wê obêc kô nôñ nivihã
(Mak 9:41)

⁴⁰“Xomxo ti obêc kô xam lec nivihã ge od tiyi xocbê kô a lec nivihã êno. Di xomxo ti obêc kô a lec nivihã ge od tiyi xocbê kô Anutu wê vông a lam ge lec nivihã êno. ⁴¹Xomxo ti obêc kô plopete ti lec nivihã ên wê i plopete ge od yuu xôn obêc kô nôñ nivihã tiyima, di xomxo ti obêc kô xomxo nivihã ti lec nivihã ên wê i xomxo nivihã ge od yuu xôn obêc kô nôñ nivihã tiyima. ⁴²Di xomxo ti obêc vông mia ningigooên vac kap vô a nuge yuac ti ên wê i tu a nug ge od a nêl vixôhilôg nôñ vô xam bê nôñ nivihã obêc ma vô i lêm. Nge, ob kô nôñ lec yuac wê i vông ge.”

Jon nue ngivihã val vô Yesu
(Luk 7:18-35)

11 ¹Yesu nêl kiyang vô nue ngivihã vigê yuu di tô mi la yuu lec yuac wê he ob vông ge, pyap dêc sea vigwe tige mi la vilee vac vigwe toto wê yêp vac vigwe levac tige di la nêl kiyang vô xomxo di tixuu he ya xolac.

²Jon Lipacên dô vac xumac kalabuhu, di ngô kiyang lec yuac wê Kilisi vông ge. Om vông i nue ngivihã la vô Yesu, ³di he la kinêg ên nêbê, “Xomxo ti wê plopete ilage nêl ên nêbê obêc val ge, ông tyo ga mê, me xe ob dô bin xomxo ngwe?” ⁴Lêc Yesu luu he vya ên nêbê, “Xam lôc nêl yuac wê xam wê di ngô gee kitong vô Jon bê ⁵xomxo wê manôn tocên gee, he manôn seac, di xomxo wê vixa nipaên gee, he vixa vô nivihã lec mi he la nivihã, di xomxo wê kityax mahizihizi gee, he vô nivihã lec, di xomxo wê ninya vô kitu gee ngô kiyang, di xomxo yibên kidi lec maviha, di xomxo wê nêñ susu maên gee ngô xolac nivihã. ⁶Vông vinên wê xomxo ti vông ge obêc vô nipaên ên a lêm ge od ob dô hixôn xêyaa nivihã.”

⁷Jon nue ngivihã lax mi la vêl, di Yesu nêl kiyang vô xomxo kidu levac tige lec Jon bêga ên nêbê, “Ilage wê xam la vô Jon vac vigwe mahigun pileva ge od xam la ên xam nêb xam ob la wê vatyaê? Xam la ên xam nêb xam ob la wê duvac wê lea kilê i la di i hivip lec nang ge, me? Maê. ⁸Om xam la ên xam nêb xam ob la wê vatya? Xam la ên xam nêb xam ob la wê xomxo wê vinyum ngakwi nivihaviha ge ti, me? Maê. Xomxo wê mi vinyum ngakwi nivihaviha ge he mi dô vac king ben. ⁹Om xam la vô i ên va? Xam la ên xam nêb xam ob la wê plopete ti, me? Vixôhilôg, a nêl vô xam bê Jon ge plopete ti wê luu plopete vihati ge vêl. ¹⁰Ilage xomxo kivuu kiyang lec Jon mi i yêp vac xolac bêga ên nêbê,

‘Wê lê. A ob vông xomxo ti i kô a kiyang mi loc mug ông nêñ môp ên i viac môp wê ông obêc mîla vac ge.’

¹¹Kiyang nêl bêge, di a ob nêl vixôhilôg nô n vò xam bê Jon Lipacên ge xomxo levac luu xomxo kibun ga vihati vêl. Lêcom xomxo vihati wê vò nipwo lec vac Anutu ben ge wê nginoo Jon vêl.

¹²“Vô buc wê Jon Lipacên val ge di i lam tyip gwêbaga hixôn, Anutu xolac lam yêp seac om xomxo tibeac ngô di vông he nilô la diluhu vò Anutu. ¹³Ên Moses he plopete vihati nêl Anutu kiyang kitong di i val tyip lec Jon. ¹⁴Di xam obêc nêb xam ob ngô ge, od xam ngô bê Jon ge Ilaija wê he nêl ilage ên nêb ob val ge. ¹⁵Xomxo ninya obêc yêp ge od i ngô kiyang.

¹⁶“Lêc xomxo wê dô vac buc gwêbaga, a ob tixuu he lec vatya? He tiyi xocbê nume nipwo wê dô lec wetôv di tyuc la vô lie nipwo ên nêbê,

¹⁷‘Xame, xe hi vyang, lêc xam o yoo lêm, di xe vông tilôt, lêc xam o vông hixôn lêm.’

¹⁸Môp tibêge wê nume nipwo vông ge tiyi xocbê xam vông vô xii Jon, ên Jon val, lêc o ya yaên di num wain lêm, lêc xam nêl ên xam nêbê vimwo nipaên dô vac i nilô. ¹⁹Nang dêc a, Xomxo Nu, a val, lêc a mi xa di mi num, lêc xam nêl ên xam nêbê, ‘Wê lê. Xomxo tige mi ya levac di mi num levac mi vô mavmav di mi dô hixôn xomxo nipaên wê kô takis ge hixôn tibii nipaên tibeac.’ Xam mi nêl bêge, lêc yuac wê xii Jon vông ge ob hilung vô xam bê Anutu vông xovôên vô xii, di xovôên wê i vông ge vixôhilôg nô n.”

Tibii wê o pilepac nilô lêm

(Luk 10:13-15)

²⁰Yesu vông do levac vac vigwe tibeac, lêc xomxo vac vigwe tige o pilepac he nilô lêm. Om Yesu nêl he nêl nipaên kitong vô he bêga ên nêbê, ²¹“Xam Kolasin, di xam Betsaida, xam xona nêl, ên xam obêc tulec viyin. Ên do levac wê a vông vac xam bom ge, xomxo ti obêc vông vac tibii Taia yuu Saidon ben ilage ge od tibii Taia yuu Saidon obêc yê di xovô he nêl nipaên di lipac viwev lec he di pilepac he nilô la vô Anutu. ²²Om a ob nêl vô xam bê vô buc timuên wê Anutu obêc yaxên xomxo nêl kiyang ge od Anutu obêc vông myaviwen nipaên vô xam luu Taia yuu Saidon vêl. ²³Di xam Kapaneam, xam nêb xomxo i kô xam lec i loc yêp kisiinê, me? Ma vêl. Xam ob la vac vigwe nipaên. Ên do levac wê a vông vac xam bom ge, xomxo ti obêc vông vac tibii Sodom ben ilage ge od vigwe Sodom ob yêp di i val vô gwêbaga hixôn. ²⁴Om a ob nêl vô xam bê vô buc timuên wê Anutu obêc titô xomxo nêl kiyang ge od Anutu obêc vông myaviwen nipaên vô xam luu Sodom vêl.”

Xam lam vô a di dô seac vêl

(Luk 10:21-22)

²⁵Vô buc tige Yesu kitaa bêga ên nêbê, “Mag Anutu, ông lag yuu kibun kehe ông. Om a pimil ông ên wê ông o vông kiyang tige vô xomxo wê

xovôen yuu piyôp levac ge lêm. Nge, ông vông vô xomxo wê gên o xovô lêm ge, ²⁶ên ôcông va xovô ên nêb ông ob vông bêge ge.

²⁷“Mag vông xêkizêc yuu xovôen vihati ge vac a vigêg. Xomxo ti o xovô nu a lêm. Nge, Mag vaci wê xovô a. Di xomxo ti o xovô Mag lêm. Nge, aca va wê a xovô Mag, di xomxo wê a nêb a ob hilung Mag vô he ge, he ob xovô Mag.

²⁸“Xam wê xam vông yuac levac di kilê viyin ge, xam lam vô a ên lam dô seac vêl. ²⁹Xam lam tu a nuge yuac di kô xovôen nivihha vô a, ên a ga xomxo malehe ti di a o yong a lêm, om xam nilôm ob dô seac vêl. ³⁰Ên yuac wê a vông vô xam ge, ge o yuac viyin lêm ên a ngidu xam xôn. Di xolac wê a vông vô xam ên a nêb xam vông ge, ge o viyin lêm.”

Kiyang lec buc sabat

(Mak 2:23-28; Luk 6:1-5)

12 ¹Vô buc wê sabat ge, Yesu he nue ngivihhi la vilee mi la vac yuac lôma wê wit ge. Lêc vip den nue ngivihhi, om he le yul wit nôn mi ya. ²Lêc Palisi ya yê wê he vông ge om nêl vô Yesu ên nêbê, “Wê lê, gwêbaga buc sabat wê Moses xolac vibu nêb il ob vông yuac ti lec lêm ge, lêc nume ngivihhi vông yuac lec.” ³Lêc Yesu nêl vô he ên nêbê, “Mêd xam o kitong xolac wê nêl lec bug Devit ge lêm, me? Devit he lie dô, lêc vip den he, ⁴om he la vac Anutu xumac ngibua di la ya blet wê xomxo daa siên tung vô Anutu manôn ge. Blet tige, Devit he lie o tiyi wê ob ya ge lêm. Nge, xomxo daa siên gee, heche va ob ya. ⁵Mêd xam o kitong kiyang ti wê yêp vac Moses xolac ge lêm, me? Kiyang tige nêl ên nêbê xomxo daa siên mi vông he yuac vac Anutu xumac ngibua lec buc sabat, om xocbê he pwoo kiyang lec buc sabat vac ge, lêc he o vông i so lêm. ⁶Om a ob nêl vô xam bê a ga a luu Anutu vông xumac ngibua tige vêl. ⁷Kiyang yêp vac xolac bêga ên nêbê, ‘A o nêb xam si daa vô a lêm. Nge, a nêb xam xo vigwe pisiv ênma môci.’ Kiyang nêl bêge, om xam obêc xovô kiyang tige kehe ge od xam obêc vông viyin vô he wê nêb kiyang maên ge lêm. ⁸Ên a, Xomxo Nu, wê a tu sabat kehe.”

Yesu vông xomxo wê vigê vilu vô xêlehe ge ti vô nivihha lec

(Mak 3:1-6; Luk 6:6-11)

⁹Yesu sea yuac lôma di la vac Yuda xumac lilo ti. ¹⁰Lêc xomxo wê vigê vilu vô xêlehe ge ti dô. Mêdêc xomxo ya nêb ob vông kot vô Yesu, om he kinêg vô i ên nêbê, “Ge tiyi wê il ob vông xomxo i vô nivihha lec vô buc sabat ge, me?” ¹¹Om Yesu nêl vô he ên nêbê, “Xomxo ti vac xam mahigun ge, bwoc sipsip tibed wê i vông ge obêc tô vac lôva lec buc sabat ge od xomxo tige obêc la pul i lôm kisii ên lôva, me? Nge, obêc pul i lôm. ¹²Xomxo nginoo bwoc sipsip vêl, om ge tiyi wê il ob vông nivihha vô xomxo lec buc sabat.” ¹³Mêdec Yesu nêl vô xomxo ti wê vigê vilu vô xêlehe ge ên nêbê, “Titô vigêm.” Om

xomxo tyo titô vigê, léc vigê vô nivihha lec tiyi xocbê vigê viluo. ¹⁴Om he Palisi kidi lec di la kitucma di myag môp wê nêb he ob hi Yesu i yib lec ge.

¹⁵Lêc Yesu xovô kiyang wê he Palisi nêl vômha ge om sea vigwe tige di la. Lêc xomxo tibeac la timu vô i vixa, om Yesu vông he wê yidac gee vihati vô nivihha lec, ¹⁶lêc vîbu he nêb he nêlên i kitong vôn xomxo i ma. ¹⁷Om Anutu kiyang wê plopete Aisaia nêl ilage vô nôn lec. Kiyang tige nêl bêga ên nêbê,

¹⁸“Wê lê. Xomxo tige, a nug yuac wê a vînoo i pyap. A xêgyaa vin lec i, di a xê i nivihha. A ob vông Myakilôhông Ngibua wê a vông ge i hivun i xôn, di i ob nêl a xolac nivihha vô tibii madiluhu. ¹⁹Di ob nêl kiyang kunacên yuu hîgacên lêm, di ob hibap kiyang vac wetôv bê xomxo i ngô lêm. ²⁰Xomxo ya tiyi xocbê duvac wê hibu nipwo tya ge, léc a nug yuac tige ob hibu he sea lêm. Di xomxo ya tiyi xocbê ngwax wê tum lec kilen ge, léc xomxo tyo ob hi i yib lêm. Xomxo tyo ob vông yuac mi dô ên vông kiyang nivihha i pwo nipaên i pec. ²¹Di tibii baba wê o Yuda lêm ge vihati ob vông i vin i lê di dô bin i.”

**Xomxo nêl ên nêbê Yesu vông yuac ya xêkizêc wê vimwo
nipaên Seten vông ge**

(Mak 3:20-30; Luk 11:14-23; Luk 12:10)

²²Mêd he kô xomxo ti mi lam vô Yesu. Vimwo nipaên dô vac xomxo tyo nilô di vông i manôn toc di vông i dô yac di keacên ma. Om Yesu vông xomxo tyo vô nivihha lec di manôn seac di i yê vigwe di keac. ²³Om xomxo vihati wê yê ge yetac mabu di nêl vômha ên nêbê, “Xomxo tige Devit nu, me?” ²⁴Lêc he Palisi ngô om nêl vômha ên nêbê, “Bielsebul wê tu vimwo nipaên nên levac ge vông xêkizêc vô Yesu, om Yesu tii vimwo nipaên vêl ya xêkizêc wê Bielsebul vông ge.”

²⁵Lêc Yesu xovô kiyang wê yêp vac he piyôp ge om nêl vô he ên nêbê, “Xomxo viyang ti obêc le kidu yuu di vông vevac vômha ge od he ob dô nipaên. Di xomxo vigwe ti me xumac ti obêc hibû he la yuu di vông vevac vômha ge od he ob dô nivihha lêm. ²⁶Di Seten obêc tii lie di hibuma sea ge od xêkizêc wê he vông ge ob ngiduma xôn tibêna? ²⁷Di a obêc tii vimwo nipaên vêl ya xêkizêc wê Bielsebul vông ge od xam lime mi tii vimwo nipaên vêl ya xêkizêc wê letya vông ge? Xam lime i yaxên kiyang wê xam nêl lec a ge. ²⁸Lêc a obêc tii vimwo nipaên vêl ya xêkizêc wê Anutu Myakilôhông Ngibua vông ge od xam xovô bê Anutu buc val pyap vô xam.

²⁹“Xomxo xêkizêc ti obêc dô vac ben xumac lôma ge od tibii yôdac ti ob la vac xumac lôma di la vun i susu tibêna? Lêc obêc ku xomxo xêkizêc tige xôn ya yihi ge od tiyi wê ob kô i nêl susu vihati wê dô vac xumac nilô ge mi la.

30 “Xomxo ti obêc vin a lêm ge od tiyi xocbê vông vevac vô a. Di xomxo ti obêc kituc xomxo lam vô a lêm ge od tiyi xocbê tii he moo sea ge.

31 “Om a ob nêl vô xam bê Anutu tiyi wê ob kitya nipaên vihati hixôn kiyang wê xomxo so vya vô i ge vêl. Lêc xomxo ti obêc so vya vô Myakilôhô Ngibua ge od o tiyi wê Anutu ob kitya i nêl nipaên tige vêl ge lêm. 32 Di xomxo ti obêc nêl kiyang nipaên lec a, Xomxo Nu, ge od Anutu ob kitya i nêl nipaên vêl. Lêc xomxo ti obêc nêl kiyang nipaên lec Myakilôhô Ngibua ge od Anutu ob kitya i nêl nipaên vêl lêm. Nipaên wê i vông ge, Anutu obêc hôm xôn mi i yêp dia di i la tyip vô buc timuên.

Xax nôn nivîha yuu nipaên

(Luk 6:43-45)

33 “Xax obêc nivîha ge od nôn obêc nivîha, di xax obêc nipaên ge od nôn obêc nipaên. Om xomxo obêc yê xax nôn wê vuac lec yatôv ge od ob xovô bê xax tige nivîha, me xovô nêbê nipaên. 34 Xam myel nue xam! Xam xomxo nipaên, om xam ob nêl kiyang nivîha tibêna? Ên kiyang wê pup vac xam nilôm ge, ge wê xam myam nêl seac. 35 Xomxo nivîha ge, nivîha yêp vac nilô om mi vông môp nivîha. Di xomxo nipaên ge, nipaên yêp vac nilô om mi vông môp nipaên.

36 “A ob nêl vô xam bê vô buc timuên wê Anutu obêc yaxên xomxo vihati nêl kiyang ge od ob yaxên kiyang vaxvax wê xomxo nêl ge vihati. 37 Wê ông myam obêc nêl kiyang nivîha ge od Anutu ob yê ông nêb ông xomxo nivîha. Di ông myam obêc nêl kiyang nipaên ge od Anutu ob yê ông nêb ông xomxo nipaên.”

Xomxo nêb he ob yê do levac

(Mak 8:11-12; Luk 11:29-32)

38 Nang dêc xomxo wê xovô Moses xolac gee hixôn he Palisi ya nêl vô Yesu ên nêbê, “Xolac kehe, xe nêb ông vông do levac ti ên xe xê.” 39 Lêc Yesu nêl vô he ên nêbê, “Xam gwêbaga, xam ge xomxo nipaên wê xam o vông i vin lêm ge, om xam nêb xam ob wê do levac ti. Lêc a ob vông do levac ti mi xam wê lêm. Ên do levac tived wê a ob hilung vô xam ge wê plopete Jona vông ilage. 40 Ên ilage Jona dô vac pis mabu yocên ti nilô tiyi bucên yon di vidiiên yon. Om a, Xomxo Nu, a obêc la xêp vac kibun nilô tiyi bucên yon di vidiiên yon. 41 Om buc timuên wê Anutu obêc yaxên xomxo nêl kiyang ge od tibii Niniva obêc kidi lec di nêl xam gwêbaga nêl nipaên kitong, ên ilage tibii Niniva ngô kiyang wê Jona nêl vô he ge di pilepac he, lêc gwêbaga a dô hixôn xam di a nginoo Jona vêl, lêc xam o pilepac xam lêm. 42 Om buc timuên wê Anutu obêc yaxên xomxo nêl kiyang ge od vêx levac wê tu tibii Siba nêl kwin ilage obêc kidi lec hixôn xam wê xam dô gwêbaga di nêl xam nêl nipaên kitong. Ên vêx tige kidi vac vigwe kehe tevabanê ên nêb ob lam ên lam ngô

kiyang wê king Solomon nêl piyôp nivihâ ge. Lêcom gwêbaga, a lam dô hixôn xam di a nginoo Solomon vêl, lêc xam o ngô a vyag lêm.

Vimwo nipaên lax dô vac xomxo nang

(Luk 11:24-26)

⁴³“Vimwo nipaên ti obêc lop mi la vêl ên xomxo ti ge od ob la vilee vac vigwe myadongên mi la myag vigwe wê ob la dô seac vêl vac ge. Lêc yêvôên vigwe ti obêc ma ge ⁴⁴od ob nêl bêga bê, ‘A ob lax mi la dô vac bog wê a sea di lam ge i tii vac nang.’ Mêd vimwo nipaên tige obêc lax mi la vô xomxo ti wê dô vac lêc sea mi la ge, di ob lax yê wê xomxo tyo pityep di vunac vô pyap lêc dô pileva ge. ⁴⁵Om obêc lax mi la kô vimwo nipaên vigê vilu di sec yuu wê heche va nipaên luu i vêl ge, di kô he mi lam di he xôn la dô vac xomxo tige nilô. Om xomxo tige dô vac nipaên nôn nginoo viwen tax vêl. Om xam xomxo nipaên gwêbaga, xam ob tulec nipaên tiyi bêge.”

Yesu tae lie

(Mak 3:31-35; Luk 8:19-21)

⁴⁶Yesu gên nêl kiyang vô xomxo mi dô vac xumac lôma, mêdec tae lie val le xumac kehe ên nêb ob keac vô i. ⁴⁷Om xomxo ti nêl vô Yesu ên nêbê, “Tame lime val le xumac kehe ên nêb ob nêl kiyang vô ông.” ⁴⁸Lêc Yesu nêl vô xomxo tyo ên nêbê, “A tag letya? Di a lige letyae?” ⁴⁹Mêd hilung vigê la vô nue ngivihî di nêl ên nêbê, “A tage lige wê he dô ga. ⁵⁰Ên xomxo wê ngô Mag Anutu lag puunê kiyang di vông i vô nôn lec ge, he tu a tage lige vêx yuu vux.”

Kiyang pilepacên lec xomxo ti wê liloo vê vac yuac

(Mak 4:1-9; Luk 8:4-8)

13 ¹Vô buc tige Yesu sea xumac nilô di lop mi la vixun di la dô kibun vô mia luaên ninya. ²Mêdec xomxo tibeac hiwocên kituc lam vô i, om Yesu la lec dipac ti di la dô lec, di xomxo kidu levac tige le vô mia luaên ninya. ³Mêd Yesu nêl kiyang tibeac, lêc nêl tiyi xocbê kiyang pilepacên ge vôhe. Om nêl kiyang pilepacên ti vô he bêga ên nêbê, “Xomxo ti la ên nêb ob la liloo susu vê vac yuac. ⁴Om liloo i la lê, lêc vê ya tô vac môp, om menac lam ya. ⁵Di ya tô lec kibun nipwo tya wê dô lec ngidax kisii ge, om tyip lutibed, ⁶lêc ngilôhò la tulec ngidax ên kibun nipwo tya, om hiyôv ya i vilôvac di i yib. ⁷Di vê mangwe tô mi la dô vac hivu kehe, lêc tyip hixôn hivu, om hivu hivun i yib. ⁸Di ya tô mi la dô vac kibun nivihâ, om tyip di vuac nôn nivihâ. Mêgem ya vuac nôn 100 di ya vuac nôn 60 di ya vuac nôn 30. ⁹Xomxo ti ninya obêc yêp ge od i ngô kiyang tiga.”

Yesu nêl kiyang pilepacên lec kehe va?

(Mak 4:10-12; Luk 8:9-10)

¹⁰Om nue ngivihî lam kinêg vô Yesu ên nêbê, “Bêna lêc ông nêl kiyang pilepacên vô he?” ¹¹Mêgem Yesu luu he vya bêga ên nêbê, “Kiyang wê ob

nêl Anutu ben kehe kitong ge yêp xôpacên, lêc Anutu hilung vô xam om xam xovô, lêc Anutu o hilung vô tibii baba lêm. ¹²Ên xomxo ti obêc xovô xolac ge od Anutu obêc kitiv xovôên levac lec hixôn ên i xovô i luu vêl. Lêc xomxo ti obêc xovô xolac lêm ge od Anutu ob vô i nêl xovôên nipwo tya ge vêl ên i. ¹³Om a nêl kiyang pilepacên vô he, ên he manôn yê lê, lêc xocbê he manôn o yê lêm, di he ngô lê, lêc xocbê he ninya o ngô lêm, mêgem he o xovô kehe lêm. ¹⁴Om he vông kiyang wê plopete Aisaia nêl ilage vô nôn lec. Ilage Aisaia nêl bêga ên nêbê,

‘Xam obêc ngô kiyang lê, lêc xam piyôp obêc xovô kehe lêm, di xam mamnôn obêc yê lê, lêc xam ob xovô lêm. ¹⁵Ên xam nilôm xêkizêc, di ninyam vô kitu, di mamnôn toc, ên xam nêb xam ob wê lêm, di xam nêb xam ob ngô kiyang ti lêm, di xam nêb xam ob xovô kehe lêm, di xam nêb xam ob pilepac nilôm i lôm vô a ên a vông xam vô nimviha lec lêm.’

¹⁶Asaia nêl bêge ilage, lêc xam xêmyaa i vô nivaha, ên xam mamnôn yê a, di xam ninyam ngô a kiyang. ¹⁷A nêl vixôhilôg nôn vô xam bê plopete hixôn xomxo nivaha wê dô ilage, he tibeac nêb he ob yê tiyi xocbê xam wê gwêbaga, lêc he yêên ma, di he nêb he ob ngô kiyang tiyi xocbê xam ngô gwêbaga, lêc he ngôên ma.

Yesu nêl kiyang lec xomxo wê liloo vê ge kehe kitong
(*Mak 4:13-20; Luk 8:11-15*)

¹⁸“Xam ngô lê, ên a ob nêl kiyang pilepacên lec xomxo wê liloo vê ge kehe kitong vô xam. ¹⁹Vê wê tô vac môp ge, ge tiyi xocbê xomxo wê ngô kiyang lec Anutu ben lê, lêc xovôên ma ge, om Seten lam vô vêl ên he nilô. ²⁰Di vê wê tô vac kibun nipwo tya wê dô lec ngidax kisii ge, ge tiyi xocbê xomxo wê ngô xolac di vông i vin lutibed mi xêyaa vô nivaha, ²¹lêc he tiyi xocbê ngec wê ngilôhô ma ge, om he dô nipwo tya, lêc he obêc tulec viyin me xomxo obêc vông myavinê vô he ên wê he vông i vin xolac ge od he sea vông vinên wê he vông ge lutibed. ²²Di vê wê tô vac hivu kehe ge, ge tiyi xocbê xomxo wê ngô xolac mi dô, lêc he nilô vô valval ên susu kibun ga yuu mone, om môp tige hivun xolac xôn, di nôn ma. ²³Di vê wê tô vac kibun nivaha ge, ge tiyi xocbê xomxo wê ngô xolac mi xovô kehe ge, om he vuac nôn nivaha tiyi xocbê 100 di ya tiyi 60 di ya tiyi 30.”

Kiyang pilepacên lec nita nipaên wê tyip vac yuac ge

²⁴Yesu nêl kiyang pilepacên ngwe vô he bêga ên nêbê, “Anutu ben kehe tiyi xocbê xomxo ti wê la liloo ngec vê vac i yuac ge. ²⁵Mêd vô bucên wê yêp ge xomxo nipaên ngwe val liloo vê nipaên la hixôn vac yuac di lax mi la. ²⁶Mêdec buc ya lam la vêl di ngec nivaha tyip mi vô nôn, di nita nipaên tyip hixôn. ²⁷Om xomxo levac tige nue yuac val kinêg vô i ên nêbê, ‘Xomxo levac, ông liloo vê nivaha vac yuac wê ông vông ge, lêc bêna lêc nita nipaên tige tyip hixônê?’

28 “Om xomxo levac tige nêl lax vô he ên nêbê, ‘Xomxo nipaên ti vông tige.’ Om nue yuac kinêg vô i ên nêbê, ‘Ti yi wê xe ob la xuac nita nipaên tige vêl ge, me?’ 29 Lêc xomxo levac nêl vô he ên nêbê, ‘Ge o ti yi lêm, ên xam obêc xuac nita nipaên ge od xam ob xuac ngec nivîha hixôn. 30 Om xam vông yuu xôn i le di i loc tyip lec buc wê il ob la kô nôn ge lê. Mêd obêc buc tige od a ob nêl vô he wê ob la kô nôn ge bê he i loc pul nita nipaên vêl mi titup i loc bun ti di nêx i loc vac ngwax, di pul nôn nivîha mi kô mi loc tung vac xumac wê nôn nivîha dô vac ge.’ ”

Kiyang pilepacên lec vixôô nôn yuu yis
(*Mak 4:30-34; Luk 13:18-21*)

31 Yesu nêl kiyang pilepacên ti vô he bêga ên nêbê, “Anutu ben kehe ti yi xocbê vixôô nôn wê xomxo ti kô mi la nêx vac yuac ge. 32 Vixôô nôn ge nipwopwo, lêc obêc tyip mi vô levac di luu susu yaya vêl di la tu xax, di menac viyang viyang lam vông liwihi lec ngen mi dô lec di ya nôn.”

33 Nang dèc Yesu nêl kiyang pilepacên ngwe bêga ên nêbê, “Anutu ben kehe ti yi xocbê yis nipwo tya wê vêx ti pilepac hixôn plaua, om vông plaua dung mi vô levac.”

34 Yesu nêl kiyang tige vihati vô xomxo kidu levac, lêc o nêl kiyang kehe yêp seac vô he lêm. Nge, nêl kiyang pilepacên pileva vô he.

35 Mègem kiyang wê plopete nêl ilage vô nôn lec. Plopete nêl bêga ên nêbê,

“A ob nêl kiyang pilepacên vô he.

Di kiyang wê yêp xôpacên vô buc wê Anutu tung lag yuu kibun di i val tyip gwêbaga hixôn ge, a ob nêl kiyang tige kehe kitong i yêp seac.”

Yesu nêl kiyang pilepacên wê nêl lec nita nipaên ge kehe kitong

36 Yesu sea xomxo kidu levac tige di la dô vac xumac lôma. Mêd nue ngivihi val nêl vô i ên nêbê, “Kiyang pilepacên lec nita nipaên wê tyip vac yuac ge, ông nêl kehe kitong vô xe ên xe xovô.”

37 Om Yesu nêl vô he ên nêbê, “Xomxo levac ti wê liloo vê nivîha vac yuac ge, ge a, Xomxo Nu, 38 di yuac tyo ge ti yi kibun, di vê nivîha ge ti yi Anutu nue, di nita nipaên ge ti yi Seten nue, 39 di tibii nipaên ti wê liloo vê nipaên vac yuac ge ti yi Seten, di buc wê xomxo kô nôn lec ge ti yi buc myahîpu, di xomxo yuac wê pul nôn ge ti yi angela. 40 Di wê he pul nita nipaên vêl mi si lec ngwax ge, ti yi xocbê yuac wê he obêc vông vô buc myahîpu ge. 41 Om vô buc myahîpu tige a, Xomxo Nu, a ob vông a nuge angela he i loc vac vigwe vihati wê a vông ge ên he i loc kituc xomxo nipaên wê didii xomxo la vac môp nipaên ge hixôn he wê mi vông môp nipaên ge vihati, 42 di nêx he i loc vac ngwax levac. Vac ngwax tige he obêc byag di nivu obêc kic lecma. 43 Mêd vô buc tige xomxo nivîha obêc

linac xêseac tiyi xocbê hiyôv ge vac Mag ben. Xam ninyam obêc yêp ge od xam ngô kiyang tiga.

Yesu nêl kiyang pilepacên lec mone levac wê yêp vac yuac ge

44 “Anutu ben kehe tiyi xocbê mone levac wê yêp vac kibun nilô, lêc xomxo ti la tulec lê, lêc vun i dô vac kibun nilô i tii vac. Xomxo tige xêyaa vô nivîha, om la vông susu vihati wê i vông gee mi tibii kisuu i ma, di kô mone mi la kisuu kibun tige ya.

Yesu nêl kiyang pilepacên lec komkom nivihaviha

45 “Kiyang pilepacên ngwe bêga nêbê Anutu ben kehe tiyi xocbê xomxo ti wê vông yuac lec myagên komkom nivihaviha nêb ob kisuu. 46 Yê komkom nivîha ti wê mone levac ge, om la vông i susu mi tibii kisuu i ma, di kô mone mi lax kisuu komkom tyo ya.

Yesu nêl kiyang pilepacên lec leac

47 “Kiyang pilepacên ti bêga ên nêbê Anutu ben kehe tiyi xocbê leac wê xomxo nêx la vac gwec ge di pis toto la dô vac leac nilô, 48 di i pup lec, om he pul i lôm gwec ninya di la dô kibun di vinoo pis wê nivîha ge di tung la vac dêg, di pis wê nipaên ge he nêx la. 49 Om tiyi xocbê buc timuên wê kibun ob tiyôd vac ge, od angela ob vông yuac tibêge, ên he obêc val vô xomxo nipaên vêl vac xomxo nivîha mahigun, 50 di nêx he la vac ngwax mahelac. Vac ngwax tige he obêc byag mabu di nivu obêc kic lecma.”

Kiyang pilepacên lec susu paha yuu tikwê

51 Yesu kinêg vô nue ngivihi ên nêbê, “Xam xovô kiyang pilepacên wê a nêl ge vihati kehe pyap, me?” Lêc he nêl ên nêbê, “Xe xovô.” 52 Om Yesu nêl vô he ên nêbê, “Om xomxo ti wê xovô xolac tikwê ge obêc ngô xolac paha wê a nêl lec Anutu ben kisiinê ge mi vông i vin ge od tiyi xocbê xomxo tyo la vac xumac lôma di la kô susu paha yuu tikwê vac susu wê i vông ge nilô di vông vô xomxo ên nêb i ngidu he xôn.”

Xomxo Nasalet vô nimi vô Yesu

(Mak 6:1-6; Luk 4:16-30)

53 Yesu nêl kiyang pilepacên tige pyap dêc sea vigwe tige, 54 di lax mi la Nasalet wê ben kehe ge, di la nêl xolac vô he Nasalet vac he xumac lîlo, lêc he yetac mabu lê, lêcom he o vông i vin xolac wê i nêl ge lêm, om he nêl voma ên nêbê, “Xomxo tiga kô xovôên nivîha hixôn do levac vô letya? 55 Xomxo tiga kamundac nu, di ta Malia, di lie Jems yuu Josep di Saimon hixôn Judas, 56 di lie vêx ge, he vihati dô hixôn il. Xomxo tiga xomxo kibun, lêc kô xovôên yuu xêkizêc ga gê na?” 57 Om he vô nimi vô

i. Om Yesu nêl vô he ên nêbê, “Vac vîgwe vîyang vîyang ge, tibii ob kô plopete lec, dom plopete tyo tae mae lie hixôn xomxo vac ici va ben kehe ob kô i lec lêm.” ⁵⁸Om Yesu o vông do tibeac vac ben kehe lêm, ên xomxo Nasalet o vông i vin i lêm.

Jon Lipacên yib

(Mak 6:14-29; Luk 3:19-20; Luk 9:7-9)

14 ¹Vô buc tige hizap levac Helot ngô kiyang wê xomxo mi nêl lec Yesu ge, ²om nêl vô nue yuac ên nêbê, “Xomxo tige Jon Lipacên wê yib ge, lêc kidi lec mavaha om vông do levac ya xêkizêc wê i vông ge.”

³⁻⁴Helot nêl bêge, ên ilage Helot kô li Pilip vinê Helodias, om Jon nêl vô Helot vô buc tibeac ên nêbê, “Môp wê ông ii lim tuc vinê ge tiyiên ma.” Mêgem Helodias kunac Jon di nêl vô Helot, om Helot vông tibii la hôm Jon xôn di tung i la vac xumac kalabuhu. ⁵Di Helot nêb ob hi Jon i yib, lêc xona ên xomxo tibeac, ên he yê Jon tiyi xocbê plopete ti.

⁶Mêdec Helot buc wê ta kô i lec ge, om Helot myêl vizid levac di tyuc xomxo tibeac lam. He lam dô di Helodias nu vêx lam yoo vac he mahigun mi he yê di Helot xêyaa vô nivaha. ⁷Mêd Helot titô vigê la kisii di hilu kiyang vô vêx tige ên nêbê, “A nêl hixôn nôn bêga bê ông obêc kítaa susu ti vô a ge od a obêc vông vô ông.” ⁸Mêd Helodias nêl kiyang xêkizêc vô nu vêx tige tax, om nu tyo nêl vô Helot ên nêbê, “A nêb ông kiku Jon Lipacên kwa i tip di tung bazub lec dipac ti mi vông vô a.”

⁹Nêl bêge, om Helot nilô vô vîyin, lêc xo i lax lec kiyang wê hilu pyap di xomxo tibeac dô mi ngô hixôn ge, om nêb ob vông i tiyi kiyang wê nêl vô vêx tige. ¹⁰Om vông xomxo ti la vô Jon vac xumac kalabuhu mi la kiku Jon kwa tip, ¹¹di tung bazub lec dipac ti di kô mi lax vông vô Helodias nu vêx tige di i kô mi la vông vô ta. ¹²Mêd Jon nue ngivihî lam kô Jon nôn mi la yev, di la nêl kitong vô Yesu.

Yesu vet xomxo 5,000

(Mak 6:31-44; Luk 9:10-17; Jon 6:1-13)

¹³Yesu ngô wê Jon yib ge, om sea vîgwe tige di la lec dipac ti mi la vîgwe mahigun pileva wê xomxo ti do vacên ma ge. Lêc xomxo tibeac ngô wê Yesu la ge, om sea ben di la vô Yesu vixa. ¹⁴Yesu mila lop vêl ên dipac di yê ma la xomxo tibeac wê val dô kidu kidu ge, om xo vîgwe pîsiv ên he, di vông he wê yidac gee vô nivaha lec.

¹⁵Hîyôv hoo la, mêd nue ngivihî lam nêl vô Yesu ên nêbê, “Vîgwe ga, vîgwe mahigun pileva ti, di hîyôv hoo la gwêba, om ông vông xomxo i loc vac vîgwe nipwopwo vîhati ên loc kisuu xen yaên wê he ob ya ge.” ¹⁶Lêc Yesu nêl vô he ên nêbê, “He loc ên vatya? Xacxam va vông yaên mi he i ya.” ¹⁷Om he nêl vô i ên nêbê, “Xe som yaên o tibeac lêm. Nge, blet vigê vilu di beac yuubed wê dô.” ¹⁸Mêd Yesu nêl vô he ên nêbê, “Xam kô mi lam vô a.”

¹⁹Yesu nêl om xomxo kidu levac tigege tô mi dô lec hisinac. Pyap dêc Yesu hêm blet vigê vilu ge di beac yuubed ge di yê ma la kisii di kitaa lec blet hixôn beac, mêd hibû blet di vông vô nue ngivihî, di he kô mi la titang vô xomxo tigege. ²⁰Mêd he vihati ya i den he pyap, mêdec nue ngivihî la kituc myapipu wê dô gee mi la su vac sepac vigê yuu di tô mi la yuu mi i pup lec. ²¹Di xomxo wê dô mi ya gee, he vux vaci tiyi xocbê 5,000, lêc vêx yuu nipwopwo wê dô hixôn ge, he o kitong hixôn lêm.

Yesu la lec mia luaên kisii
(Mak 6:45-52; Jon 6:16-21)

²²Yesu nêl vô nue ngivihî nêb he i lec dipac mi le mug mi loc vilunê. Om he loc mi la, di Yesu dô ên nêb ob vông xomxo kidu levac tige he i loc vêl lê. ²³He la vêl, mêdêc Yesu loc mi la lec kitôn ti ên nêb ob la kitaa. Mêd vigwe buc di Yesu vaci gên dô lec kitôn tige. ²⁴Lêc dipac wê nue ngivihî dô lec ge mila le vac mia luaên mahigun di lea levac hêm dipac xôn di vông i vô pilepac pilepac. ²⁵Vigwe kê pitoc vac vô kwabo lec wê ob vô xêseaceac ge, mêdec Yesu la lec mia kisii di mila vô nue ngivihî. ²⁶He yê ma lam Yesu wê lam lec mia kisii mi val ge, om he xona mabu di nêl ên nêbê, “Ge vimwo nipaên ti.” Om he yetac di iac. ²⁷Lêc lutibed Yesu nêl ên nêbê, “Xam xêmyaa viyin i ma, ên ga a, om xam xonaên i ma.”

²⁸Mêd Pita nêl vô i ên nêbê, “Apumtau, obêc ông ge od ông nêl ên a loc lec mia kisii mi loc vô ông.” ²⁹Om Yesu nêl ên nêbê, “Lamê.” Om Pita lop vêl ên dipac di la lec mia kisii mi la vô Yesu. ³⁰Lêc yê

lea levac om xona, di hoo la vac mia, om iac di nêl ên nêbê, “Apumtau, hêm a lec.”

³¹Om lutibed Yesu titô vigê di hêm Pita xôn di nêl vô i ên nêbê, “Vông vinên wê ông vông ge nipwo tya. Bêna lêc ông nilôm yuuê?” ³²Mêdêc yuu lec lax lec dipac, di lea tip la. ³³Di he wê dô lec dipac gee yev vixa kitu vô Yesu di nêl vô i ên nêbê, “Vixôhilôg nôn, Anutu nu ông.”

Yesu vông xomxo tibeac vô nivihî lec gê Genesalet
(Mak 6:53-56)

³⁴Yesu he nue ngivihî la mia luaên vilu ganê mi la lop mi la vac vigwe Genesalet. ³⁵Xomxo tigege xovô ên nêb Yesu, om he vông dic la vac vigwe nipwopwo vihati ên nêb he i kô xomxo yidac vihati mi lam. ³⁶Di he kitaa i ên nêb he ob hêm lec ngakwi wê i vông ge myahîpu ên yidac i ma ên he, om he wê hêm vigê lec gee vihati vô nivihî lec.

Anutu xolac nginoo xomxo nêl kiyang vêl
(Mak 7:1-13)

15 ¹He Palisi hixôn xomxo wê xovô Moses xolac gee lam gê Jerusalem di val vô Yesu di nêl ên nêbê, ²“Bêna lêc ông nume ngivihî sea môp wê

buge vông ge di ya hixôn vigê ningeacê? Ên he obêc ya ge od he o lipac vigê lêm, léc xe mô ge, xe mi timu vô buge vông môt di lipac vigêm.”

³Lêc Yesu nêl lax vô he ên nêbê, “Bêna léc xam timu vô bume vông môt di pwoon Anutu kiyang vacê? ⁴Ên Anutu kiyang ngwe nêl bêga ên nêbê, ‘Xam hôm tame mame lê lec di ngô he kiyang.’ Di kiyang ngwe nêl bêga ên nêbê, ‘Xomxo ti obêc nêl kiyang nipaên lec ta yuu ma ge od xomxo i hi i yib.’ ⁵Anutu kiyang nêl bêge, léc xam mi nêl ên xam nêbê xomxo ti obêc nêl vô ta yuu ma ên nêbê, ‘Susu wê a ob ngidu muu xôn ya ge dô, lêcom a ob vông daa vô Anutu, om muu nêl ob ma.’ Xomxo obêc nêl bêge ge od xam nêbê ge tiyi di xam o hôm tame mame lê lec lêm. ⁶Lêc môt tige tiyi xocbê xam la vô bume vông môt di kitya Anutu kiyang vêl. ⁷Xam xomxo kityooên wê xam viyum nipaên vac nivaha ge. Kiyang wê plopete Aisaia kivuu ilage nêl nôn lec xam bêga nêbê, ⁸‘Xomxo tigeê pîmil a ya mya pileva, léc he nilô le teva ên a. ⁹He mi nêl kiyang wê xomxo vaci xovô ge, léc he nêl ên nêbê he nêl Anutu kiyang, om he yev vixa kitu vô a pisiv.’”

Susu wê ob vông xomxo vô nipaên ge

(Mak 7:14-23)

¹⁰Yesu keac xomxo kidu levac lam vô i di nêl vô he ên nêbê, “Xam ngô kiyang wê a ob nêl ge di xovô nivaha. ¹¹Susu wê ob la vac xomxo mya ge o tiyi wê ob vông xomxo vô nipaên ge lêm. Nge, susu wê lam vac xomxo mya ge wê ob vông he vô nipaên.”

¹²Yesu nue ngivihî val nêl vô i ên nêbê, “Ông ngô wê he Palisi xêyaa vô myavinê lec kiyang wê ông nêl ge, me?” ¹³Om Yesu nêl vô he ên nêbê, “Susu vihati wê Mag lag puunê yevên ma ge i obêc pul hixôn ngilôhê. ¹⁴Om xam vông he Palisi i dô, ên he nêb he ob didii xomxo la vac môt, léc he manôn toc. Di xomxo ma tocên ngwe obêc didii xomxo ma tocên ngwe ge od yuu xôn ob la tô vac madia.”

¹⁵Pita nêl vô i ên nêbê, “Ông nêl kiyang pilepacên tige kehe kitong vô xe ên xe ngô.” ¹⁶Om Yesu nêl vô he ên nêbê, “Xam êno gên lungên kiyang tige, me? ¹⁷Susu vihati wê xomxo ob tung vac mya di ya ge ob la dô vac xêyaa, di lop mi la vêl. Lêc mêd xam lungên tige, me? ¹⁸Lêc susu vihati wê yêp vac xomxo nilô di lôm tyip vac mya ge wê vông xomxo vô nipaên. ¹⁹Ên susu wê lam vac xomxo nilô ge bêga nêbê, xovôên nipaên, hi xomxo yib, vông môt iimaên vô nipaên, môt yôdac vêx yuu vux, vun xomxo susu, nêl kiyang kityooên, di nêl kiyang nipaên lec xomxo. ²⁰Môt nipaên tigeê wê vông xomxo vô nipaên. Lêc xomxo ti obêc sea bue vông môt di ya ya vigê ningeac ge od ob vông i vô nipaên lêm.”

Kenan vêx ti vông i vin Yesu

(Mak 7:24-30)

²¹Yesu sea vigwe tige mi la vigwe levac wê vigwe Taia yuu Saidon yêp vac ge. ²²Di Kenan vêx ti wê dô vac vigwe tige lam vô Yesu di keac levac

ên nêbê, “O Apumtau, Devit nu ông, ông xo vigwe pisiv ên a, ên vimwo nipaên ti dô vac a nug vêx nilô di vông i dô vac viyin mabu.” ²³ Yesu ngô lêc o nêl kiyang ti lax vô i lêm. Mêd nue ngivihi val kitaa i ên nêbê, “Vêx tyo vô byag byag di mi timu vô il vixad ga, om ông nêl ên i lôc.”

²⁴ Om Yesu nêl vô vêx tyo ên nêbê, “Anutu vông a lam vô Islele vaci wê tiyi xocbê bwoc sipsip wê lung sea ge.” ²⁵ Lêc vêx tige lam yev vixa kitu vô i di nêl ên nêbê, “Apumtau, ngidu a xôn.” ²⁶ Lêc Yesu nêl vô i ên nêbê, “Ga o tiyi wê il ob vô nipwo xen yaên vêl ên he di nêx i loc vô noo ge lêm.”^a ²⁷ Om vêx tyo nêl ên nêbê, “Apumtau, ông nêl kiyang nôn. Lêcom noo mi ya myapipu wê xomxo vông i tô mi la vac pêt ngibi ge.” ²⁸ Om Yesu nêl vô i ên nêbê, “O vêx, ông vông i vin xêkizêc ta, om kiyang wê ông kitaa vô a ge ob vô nôn lec vô ông.” Yesu nêl bêge, di vô hiyôv manôn tibeac tige vêx tyo nu vô nivihalec.

Yesu vông xomxo yidac tibeac vô nivihalec

²⁹ Mêdec Yesu sea vigwe tige di la vô mia luaên Galili ninya, di la lec kitôn di la dô kibun. ³⁰ Mêdec xomxo kidu kidu val vô i, di he kô lie vixa nipaên, di manôn tocên, di vixa gecên, di kwa maên hixôn yidac toto ge mi lam lii he vô Yesu vixa, om Yesu vông he vihati vô nivihalec. ³¹ Mêgem xomxo kidu levac tige yê di yetac mabu ên wê xomxo kwa maên keac di xomxo vixa gecên ge vixa vô bôbac lec, di he wê vixa nipaên ge vô nivihalec di la, di wê manôn tocên ge manôn seac di he yê vigwe. Om he hi vixa pec ên Islele vông Anutu.

Yesu vet xomxo 4,000

(Mak 8:1-10)

³² Yesu keac ên nêbê nue ngivihi lam vô i di nêl vô he ên nêbê, “A xo vigwe pisiv ên xomxo kidu levac tigae ên he lam dô hixôn a tiyi buc yon di he xen yaên ma. Di a xêgyaa o vin lec wê a ob vông he loc vip ge lêm, ên vip ob vông he vigê yuu vixa ma gê môp.” ³³ Om nue ngivihi nêl vô i ên nêbê, “Vigwe ga vigwe mahigun pileva wê xomxo ti dô vacên ma ge, om il obêc kô yaên tibeac gê na ên vet xomxo tigae ya?” ³⁴ Lêc Yesu luu he vya ên nêbê, “Xam blet vaba dô?” Di he nêl ên nêbê, “Xe blet vigê vilu di sec yuu hixôn beac nipwo yuutya dô.”

³⁵ Om Yesu nêl vô xomxo kidu levac tigeê ên nêbê, “Xam tô mi dô lec kibun.” ³⁶ Mêd hôm blet vigê vilu di sec yuu hixôn beac gee di kitaa lec, mêd hibû di vông vô nue ngivihi, di nue ngivihi titang vô xomxo tigeê vihati. ³⁷ Om he vihati ya i den he, di myapipu wê dô ge he su vac sepat

^a **15:26** Kiyang wê Yesu nêl lec nipwo yuu noo ge, ge kiyang pilepacên wê nêl lec he Yuda hixôn tibii ba. ên he Yuda yê tibii wê o Yuda lêm ge nipaên, nêb he tiyi xocbê noo. Om nipwo tige tixuu lec he Yuda, di noo tixuu lec tibii ba wê o Yuda lêm ge.

vigê vilu di sec yuu mi i pup lec. ³⁸Xomxo wê dô mi ya gee, he vux vaci tiyi xochê 4,000, lêc vêx hixôn nue gee he o kitong hixôn lêm. ³⁹Pyap dêc Yesu vông xomxo kidu kidu lax vac ben ben, di i va la lec dipac mi la vigwe Magadan.

Palisi yuu Sadyusi nêb ob yê do levac

(Mak 8:11-13; Luk 12:54-56)

16 ¹He Palisi yuu Sadyusi val vô Yesu ên nêb ob yaxên i, om nêl vô Yesu ên nêb i vông do lag puunê ti ên he ob yê. ²Lêc Yesu nêl vô he ên nêbê, “Hiyôv hoo la di vigwe buc di guva tum lec lag ge wê xam nêbê hiyôv ob linac. ³Vigwe obêc vidii lêc maviyob ge od xam nêbê lun ob val. Xam wê susu lec lag di xovô nivîha, lêc xam o tiyi wê xam ob wê do levac wê nêl buc gwêbaga kitong mi xovô kehe ge lêm. ⁴Xam gwêbaga, xam ge xomxo nipaên wê xam o vông i vin lêm ge, om xam nêb xam ob wê do levac ti. Lêc a ob vông do levac ti mi xam wê lêm. Ên do levac tîbed wê a ob hilung vô xam ge wê Jona vông ilage.” Yesu nêl bêge, pyap dêc sea he di la.

Kiyang pilepacên lec yis wê he Palisi yuu Sadyusi vông ge

(Mak 8:14-21)

⁵Yesu he nue ngivîhi la mia luaên vilu ganê, lêc he o xovô mi kô blet ya hixôn lêm. ⁶Mêd Yesu nêl vô he ên nêbê, “Xam xona nêb ên yis wê he Palisi yuu Sadyusi vông ge.” ⁷Om nue ngivîhi nêl vôma ên nêbê, “Yesu nêl kiyang tibêge ên wê il o kô blet ti lêm ge.” ⁸Lêc Yesu xovô kiyang wê he nêl vôma ge, om nêl vô he ên nêbê, “Xam nêb vông vinên ge nipwo tya. Bêna lêc xam nêl vôma ên xam nêbê xam xom blet ma? ⁹Xam gên o xovô lêm, me? Xam mêd lungên blet vigê vilu wê xomxo 5,000 ya ge, me? Xam su myapîpu vac sepac vaba mi i pupê? ¹⁰Di xam mêd lungên blet vigê vilu di sec yuu wê xomxo 4,000 ya ge, me? Xam su myapîpu vac sepac vaba mi i pupê? ¹¹Bêna lêc xam lungênê? A o nêl kiyang lec blet lêm. Nge, a nêb xam xona nêb ên blet wê he Palisi yuu Sadyusi vông ge.” ¹²Yesu nêl bêge, om he xovô ên nêbê Yesu o nêb he i viac he nivîha ên blet wê xomxo ob ya ge lêm. Nge, nêb he i viac he nivîha ên kiyang wê he Palisi yuu Sadyusi vông ge.

Pita nêl Yesu kehe kitong

(Mak 8:27-30; Luk 9:18-21)

¹³Yesu la vigwe ti lê nêbê Sisalia Pilipai di kinêg vô nue ngivîhi en nêbê, “Tibii nêl Xomxo Nu a nêb letya?” ¹⁴Om he nêl vô i ên nêbê, “Xomxo ya nêl ên nêb ông ge Jon Lipacên, di ya nêl ên nêb ông plopete Ilaija, di ya nêl ên nêb ông ge plopete Jelemaia me plopete ba ti.” ¹⁵Mêd Yesu kinêg vô he ên nêbê, “Di xacxam va nêl a ên xam nêb a letya?”

¹⁶Om Saimon Pita nêl lax vô i ên nêbê, “Ông Kilisi, Anutu maviha nu ông.”

¹⁷Om Yesu nêl vô Pita ên nêbê, “Jona nu Saimon, ông xêmyaa i vô nivaha, ên xomxo kibun ga ti o nêl kiyang tige kehe kitong vô ông lêm. Nge, a Mag wê dô lag puunê ge wê nêl kitong vô ông. ¹⁸Om a nêl vô ông bê ông lêm Pita, kehe nêbê ngidax. Om a ob lax xomxo vông vinên i loc lec ngidax kisii. Di xêkizêc wê Seten vông ge o tiyi wê ob pwoo he pec ge lêm. ¹⁹A ob vông ki Anutu ben lag puunê vô ông. Di kiyang yuu môp wê ông obêc kitya vêl gê kibun ga ge od Anutu êno ob kitya vêl gê kisii ganê. Lêc kiyang yuu môp wê ông obêc hôm xôn mi i yêp gê kibun ga ge od Anutu êno ob hôm xôn mi i yêp gê kisii ganê.” ²⁰Om Yesu le vac nue ngivihî xôn nêb he i o nêl vô xomxo bê i Kilisi lêm.

Yesu nêl ên nêbê ob yib di kidi lec

(Mak 8:31–9:1; Luk 9:22-27)

²¹Vô buc tige Yesu nêl i kiyang taxlee vô nue ngivihî ên nêbê ob la Jelusalem, di Yuda levac hixôn xomxo levac wê mi si daa gee di he wê xovô Moses xolac gee he ob vông myavinê levac vô i di hi i yib, di buc yon ob lam la vêl di i ob kidi lec maviha tii vac nang.

²²Om Pita kô Yesu mi yuu la dô viyonên, di nêl xêkizêc vô Yesu ên nêbê, “Apumtau, Anutu i le vac kiyang tige xôn. Ên viyin tibêge i o léc tulec ông lêm.” ²³Lêc Yesu pilepac i di vô nimi vô Pita, di nêl vô Pita ên nêbê, “Seten, ông loc vêl! Ên ông le vac a xôn. Ông o nêl i tiyi Anutu piyôp lêm. Nge, ông nêl i tiyi piyôp wê xomxo kibun ga vông ge.”

²⁴Mêdêc Yesu nêl vô nue ngivihî ên nêbê, “Xomxo ti obêc nêb timu vô a vixag ge od i vông i vô nipwo lec di kilê xax pola wê i vông ge di timu vô a vixag. ²⁵Ên xomxo ti obêc viac ninivi ên nêb i dô maviha ge od obêc yib. Lêc xomxo ti obêc sea ninivi lec a lêg ge od ob dô maviha luta. ²⁶Ên xomxo ti obêc vilu vô susu kibun ga vihati tu i xe, lêc sea môp wê ob dô maviha ya ge od ob vô nivaha vô i bêna? Xomxo ob vông vatya êdêc i kinu i dô maviha ya? ²⁷Ên a, Xomxo Nu, a obêc lop mi lôc hixôn a nuge angela di lam hixôn xêseac wê Mag vông ge, di a ob vông myaviwen vô xomxo toto i tiyi nipaên yuu nivaha wê he vông ge. ²⁸Lêc a nêl nôn vô xam bê xomxo wê le ga, he ya yibên obêc ma di obêc yê wê Xomxo Nu ob lam tu king ge lê, dêc yib timuên.”

Yesu ninivi pikwê bangwe

(Mak 9:2-13; Luk 9:28-36)

17 ¹Buc vigê vilu di sec ti lam la vêl, mêd Yesu kô Pita di Jems yuu li Jon di he la lec kitôn dia ti, mi heche va la dô. ²Om yon yê wê Yesu ninivi pikwê mi vông bangwe, di manôn linac xocbê hiyôv, di ngakwi xêseac di vô hixelac hixelac. ³Mêdec yon yê wê Moses yuu Ilajja val keac hixôn Yesu ge. ⁴Om Pita nêl

vô Yesu ên nêbê, “Apumtau, ga nivihã wê il dô ga, om ông obêc tyuc lec ge od a ob lox xumac yon, ti vô ông, di ngwe vô Moses di ti vô Ilaija.”

⁵Pita gên nêl kiyang tibêge, mêdêc viyobtoc wê xêseac ge ti lam hivun he xôn, di vya ti lam vac viyobtoc tige nilô di nêl ên nêbê, “Ge a nug wê a xêgyaa vin lec i di a xê i nivihã ge om xam ngô kiyang wê i vông ge.”

⁶Nue ngivihã yon ge ngô vya tige mêdêc yon yev vixa kitu di kipôm manôn lec kibun, di yon xona mabu. ⁷Lêc Yesu lam vyax vigê lec yon di nêl ên nêbê, “Kidi lec, di xonaên i ma.” ⁸Om yon vêl manôn lec kisii, di yê Yesu vaci le di yuu xôa ma.

⁹He gên lop lec kitôn tige di Yesu nêl xêkizêc vô yon ên nêbê, “Mon o léc nêl kiyang wê mon wê di ngô ge kitong vô xomxo ti lêm. Nge, i léc loc tyip lec wê a, Xomxo Nu, a obêc kidi vac yibên ge lê.” ¹⁰Mêd yon kinêg vô i ên nêbê, “Bêna léc xomxo wê xovô Moses xolac gee nêl ên nêbê Ilaija obêc val tax di Kilisi wê Anutu vinoo i ge obêc val timuên?” ¹¹Mêdêc Yesu nêl ên nêbê, “Vixôhilôg, Ilaija ob vena ên titô môp vihãti i yêp nivihã i tii vac. ¹²Lêc a nêl vô mon bê Ilaija lam pyap, léc xomxo lungên i, di he vông nipaên vô i tiyi xovôên wê he vông ge. Om a, Xomxo Nu, a êno obêc tulec myavinê tiyi bêge.” ¹³Yesu nêl bêge, om nue ngivihã xovô ên nêbê kiyang wê Yesu nêl lec Ilaija ge, nêl lec Jon Lipacên.

Yesu tii vimwo nipaên vêl ên xomxo nipwo ti

(Mak 9:14-29; Luk 9:37-42)

¹⁴Mêdêc he lop kitôn tige mi la vô xomxo kidu levac ti, léc xomxo ti val yev vixa kitu vô Yesu di nêl vô i ên nêbê, ¹⁵“Xomxo levac, ông xo vigwe pisiv ên a nug vux, ên vông yidac mavên mi dô vac viyin mabu, ên mi vixog mi la vac ngwax di la vac mia tiyi buc tibeac. ¹⁶Om a kô mi lam vô nume ngivihã ên a nêb he i vông i vô nivihã lec lê, léc he tiyiên ma.”

¹⁷Om Yesu nêl ên nêbê, “Xam gwêbaga, xam ge xomxo nipaên wê xam o vông i vin lêm ge. Om a ob dô hixôn xam di i miloc vô buc tina lê? Di a ob kilê viyin wê xam vông ge di i miloc tina lê? Loc kô nipwo tige mi lam vô a.” ¹⁸Om ma la kô nu tyo mi lam vô Yesu, di Yesu piping vimwo nipaên la vêl ên nu di i vô nivihã lec lutibed.

¹⁹Om timuên ge, Yesu nue ngivihã vaci la kinêg vô i ên nêbê, “Bêna léc xe mô o tiyi wê xe ob tii vimwo nipaên tige vêl lêmê?” ²⁰Om Yesu nêl vô he ên nêbê, “Xam tiyiên ma ên vông vinên wê xam vông ge tiyiên ma. A nêl vixôhilôg nôn bê xam nêm vông vinên obêc nipwo tya tiyi xocbê vixô nôn ge od xam ob nêl vô kitôn tiga bê, ‘Ông pul mi loc le ganê,’ di kitôn tiga obêc pul i mi la. Xam obêc vông i vin ge od xam obêc tiyi wê xam ob vông yuac vihãti. ²¹[Môp kítaaên yuu ngibua yaên ge tiyi wê ob tii vimwo nipaên tibêge vêl ên xomxo, di môp ngwe o tiyi lêm.]”

Yesu nêl kiyang vông yuu lec wê obêc yib ge

(Mak 9:30-32; Luk 9:43-45)

²²Yesu he nue ngivihã miãa vigwe Galili, di Yesu nêl vô he ên nêbê, “Xomxo ob vông a, Xomxo Nu, la vac tibii vigê, ²³di he ob hi a xib, léc

buc yon obêc lam la vêl ge od a obêc kidi lec magviha tii vac nang.” Yesu nêl bêge om nue ngivihi nilô vô viyin mabu.

Yesu vông mone takis xumac ngibua

²⁴He val vigwe Kapaneam, mêd xomxo wê mi kô mone takis xumac ngibua ge^b lam vô Pita di kinêg vô i ên nêbê, “Xam nêm xolac kehe mi vông mone takis xumac ngibua ge hixôn, me?” ²⁵Om Pita lee yuu ên nêbê, “Xe nêm xolac kehe mi vông.” Pyap dêc Pita lax mi la ben mi la vac xumac lôma, di lutibed Yesu nêl vô i ên nêbê, “Saimon, ông nêbê va? Xomxo levac kibun ga, he mi kô mone takis vô letyae? He mi kô vô he nue, me he mi kô vô tibii ba?” ²⁶Mêd Pita nêl ên nêbê, “He mi kô mone takis vô tibii ba.” Om Yesu nêl ên nêbê, “Om heche va nue ge ob dô nên di ob tung mone takis lêm. ²⁷Di a ga, Anutu nu a, om yuac ti o yêp vô a wê a ob vông mone takis ên Anutu xumac ngibua ge lêm. Lêc ge o nivihia wê il ob vông he wê mi kô mone takis xumac ngibua ge kunac il ge lêm. Om ông loc gwec di loc pul pis ya huk. Di pis taxlee wê ông ob pul ge, ông sux mya di ông ob tulec mone wê dô vac mya ge, di kô mi loc vông vô he wê mi kô mone xumac ngibua ge di loc tung u nêd.”

Letya obêc tu levac vac Anutu ben?

(Mak 9:33-37,42-48; Luk 9:46-48; Luk 17:1-2)

18 ¹Vô buc tige Yesu nue ngivihi val nêl vô i ên nêbê, “Letya ob tu levac vac Anutu ben kisiinê luu he ba vêlê?”

²Om Yesu keac nipwo ti lam vô he di lax i la le vac he mahigun, ³di nêl vô nue ngivihi ên nêbê, “A ob nêl vixôhilôg nôn vô xam bê xam obêc pilepac xam mi vô nipwo lec tiyi xocbê xomxo nipwo tiga lêm ge od xam ob la dô vac Anutu ben lag puunê lêm. ⁴Lêc xomxo ti obêc pilepac i mi vô nipwo lec tiyi xocbê nipwo tiga ge od ge wê ob tu levac vac Anutu ben lag puunê luu he ba vêl.

⁵“Xomxo ti obêc kô nipwo tibêga lec ên wê vông i vin a lêg ge od tiyi xocbê kô a lec êno. ⁶Lêc xomxo ti obêc didii nipwo tigae wê vông i vin a ge ti mi la vac nipaên ge od ge tiyi wê tibii ob nux ngidax levac lec i kwa di nêx i la vac gwec madia wê vô mapitoc ta ge.

⁷“Xomxo kibun ga wê didii xomxo mi la vac nipaên ge, myaviwen nipaên ob tulec he vihati. Vixôhilôg, nipaên viyang viyang ge ob yaxên il, lêc xomxo ngwe obêc didii xomxo ngwe mi la vac nipaên ge od i xona nên, ên obêc tulec myaviwen nipaên.

⁸“Di ông vigêm vilu me vixam vilu obêc didii ông mi la vac nipaên ge od ông kitov mi nêx i loc vêl, di ông dô ya vigêm vilubed me vixam

^b 17:24 Xomxo Yuda mi vông mone takis vô xomxo wê viac Anutu xumac ngibua ge tiyi klismas vihati, tiyi xocbê il mi vông mone baset gwêbaga ge. Mone takis tige he kituc ên nêb i viac Anutu xumac ngibua.

vilubed, êdêc loc dô mamviha vac Anutu ben. Ên ông vigêm yuu xôn me vixam yuu xôn obêc dô, lêc didii ông mi la vac nipaên ge od Anutu obêc nêx ông la vac ngwax wê ditum luta di yibên ma ge. ⁹Di mamnôn vilu obêc didii ông mi la vac nipaên ge od ông pisupac vêl mi nêx i loc, di ông dô ya mamnôn vilubed, êdêc loc dô mamviha vac Anutu ben. Ên mamnôn yuu xôn obêc dô, lêc didii ông mi la vac nipaên ge od Anutu obêc nêx ông la vac ngwax vac vigwe nipaên.

Kiyang pilepacên lec bwoc sipsip

(Luk 15:3-7)

¹⁰“Xam viac xam di le i lêc yê nume nipwo tigae i tiyi xocbê susu pileva ge lêm, ên a nêl vô xam bê vac vigwe lag puunê he nêl angela mi le vô Mag Anutu lag puunê manôn tiyi buc vihati. ¹¹[A, Xomxo Nu, a lam ên a nêb a ob myag he wê xôa ma ge mi kô mi lôm.]

¹²“Xam xo ên xam nêbê va? Xomxo ti obêc viac bwoc sipsip 100 lêc ti xôa obêc ma ge od xomxo tige ob vô va? Obêc sea sipsip 99 gee he ob le lec kitôn, di ob la myag ti wê xôa ma ge. ¹³Di obêc la yêvô ge od a nêl nôn bê xomxo tyo ob pimil sipsip tige luu 99 wê le ge vêl. ¹⁴Mêgem Mag Anutu wê dô lag puunê ge nêb nue nipwo tigae ti xôa ob ma lêm.

Yesu nêl kiyang lec lim ti wê vông nipaên ge

¹⁵“Ông lim ti obêc vông nipaên ti vô ông ge od ôcông va loc vô i di muu dô di ông nêl i nêl nipaên kitong vô i. Di obêc ngô ông kiyang ge od tiyi xocbê ông kô i mi lôm vac xam mahigun. ¹⁶Lêc ngôên ông kiyang obêc ma ge od ông kô xomxo yuu me yon di xam loc vô lim tige ên he i ngiduma xôn di yaxên kiyang wê muu ob nêl ge. ¹⁷Lêc lim tige ngôên xam obêc ma ge od xam loc nêl i nêl nipaên kitong vô konglegesen. Lêc ngôên konglegesen kiyang obêc ma ge od xam wê i tiyi xocbê tibii madiluhu me tibii nipaên ge.

¹⁸“A nêl vixôhilôg nôn vô xam bê kiyang yuu môp wê xam obêc kitya vêl gê kibun ga ge od Anutu êno ob kitya vêl gê kisii ganê. Di kiyang yuu môp wê xam obêc hôm xôn mi i yêp gê kibun ga ge od Anutu êno ob hôm xôn mi i yêp gê kisii ganê.

¹⁹“A ob nêl ti hixôn vô xam bê xomxo yuu gê kibun ga, yuu nilô obêc yêp tibed ên susu ti wê yuu nêb yuu ob kítâa vô Anutu ge od a Mag wê dô lag puunê ge ob vông i vô nôn lec vô yuu. ²⁰Ên xomxo yuu me yon obêc kitucma lec a lêg ge od a obêc dô vac he mahigun.”

Kiyang pilepacên lec xomxo yuac wê o kitya myaviwen vêl lêm ge

²¹Mêdêc Pita val vô Yesu di kinêg vô i ên nêbê, “Apumtau, lige ti obêc vông nipaên vô a ge od a ob kitya i nêl nipaên vêl i tiyi buc vaba? Buc vigê vilu di sec yuu obêc tiyi, me?”

²²Lêc Yesu nêl vô i ên nêbê, “Maê. A nêl vô ông bê buc vigê vilu di sec yuu ge o tiyi lêm. Nge, ông kitya i nêl nipaên vêl i tiyi buc vihati.

²³“Om Anutu ben kehe tiyi xocbê xomxo levac ti wê nêb ob kô mone vac i mone wê vông vô nue yuac ge. ²⁴Mêgem taxlee ge he kô nu yuac ti mi la le vô xomxo levac tige manôn. Nu yuac tige kô mone 10 milion vô xomxo levac tyo ilage, ²⁵lêc o tiyi wê ob vông mone vac ge lêm. Om xomxo levac tige nêl ên nêbê he i vông nu yuac tyo hixôn vinê nue di he susu vihati ên tibii i kisuu di he i vông mone tige vihati vac. ²⁶Lêc nu yuac tige yev vixa kitu vô xomxo levac tyo di kitaa i ên nêbê, ‘Xomxo levac, ông hôm a nêg kiyang xôn mi i yêp lê di vông buc ya vô a ên a obêc vông mone vihati vac ông mone.’ ²⁷Om xomxo levac tige xo vigwe pisiv ên nu yuac tyo om piwelac i vêl di hi kiyang tyo yib di vông i la.

²⁸“Nang dêc nu yuac tyo lop mi la di la tulec lie ti wê vông yuac hixôn i ge. Ilage li tige kô mone 100 vô i. Om nu yuac tyo hôm i xôn lec kwa di nêl vô i ên nêbê, ‘Ông vông mone vac a mone vihati.’ ²⁹Om li tige yev vixa kitu vô i di kitaa i ên nêbê, ‘Ông hôm a nêg kiyang xôn mi i yêp lê di vông buc ya vô a ên a obêc vông mone vihati vac ông mone.’ ³⁰Lêc xomxo tyo ngôên ma, di tung li tige la dô vac kalabuhu ên nêb i loc dô mi i loc tyip lec buc wê ob vông mone vihati vac i xe ge.

³¹“Mêd xomxo ya wê vông yuac hixôn i ge yê, om he nilô vô nipaên, di he la vô xomxo levac tige di nêl kiyang vihati kitong vô i. ³²Mêd xomxo levac tige tyuc nu yuac tyo lôm vô i, di nêl vô i ên nêbê, ‘Ông xomxo yuac nipaên. Ông kitaa a, om a kitya ông nêl myaviwen vihati vêl, ³³di a xo vigwe pisiv ên ông, lêc bêna lêc ông o xo vigwe pisiv ên lim tige lêmê?’ ³⁴Mêd xomxo levac xêyaa vô myavinê om vông nu yuac tyo la vac tibii wê viac xumac kalabuhu ge vigê ên nêb he i vông myavinê vô i di i loc tyip vô buc wê ob vông mone vihati vac i xe ge.” ³⁵Yesu nêl kiyang pilepacên tige pyap di nêl hixôn ên nêbê, “Xam obêc kitya lime nêl nipaên vêl hixôn nilôm yadiluhu lêm ge od Mag kisiinê ob vông vô xam vihati tiyi xocbê xomxo levac vông vô nu yuac tige.”

Môp wê vông môp iimaên vô nipaên ge

(Mak 10:1-12; Luk 16:18)

19 ¹Yesu nêl kiyang tige vihati pyap di sea vigwe Galili di la vac vigwe levac Judia wê yêp mia Jodan sox laên. ²Di xomxo kidu levac la vô i vixa, om Yesu vông he wê yidac ge vô nivîha lec vac vigwe tige.

³Dêc he Palisi lam vô Yesu ên nêb ob yaxên i, om kinêg vô i ên nêbê, “Xomxo ti obêc sea vinê ên yucyuu va kiyang nipwo tya wê yêp vac yuu mahigun ge od obêc tiyi, me?”

⁴Om Yesu nêl lax vô he ên nêbê, “Xam mêd o kitong kiyang wê yêp vac xolac ge lêmê? Kiyang tige nêl bêga ên nêbê vô buc taxlee ilage Anutu wê

tung susu vihati gee tung xomxo vêx yuu xôn vux, ⁵di nêl ên nêbê, ‘Môp yêp bêga, vux ob sea ta yuu ma di la dô hixôn vinê di yuu tu nôn tibed.’

⁶Anutu nêl bêge om yuu ob dô tiyi xocbê xomxo yuu ge lêm. Nge, yuu ob tu nôn tibed. Mêgem môp wê Anutu vông xomxo yuu tu nôn tibed ge, xomxo ti i o lêc tax i tip lêm.”

⁷Mêd he Palisi nêl vô i ên nêbê, “Om bêna lêc Moses nêl ên nêbê xomxo ti obêc nêb ob sea vinê ge od i kivuu kipihac wê nêbê yuu ob seama ge di vông vô vinê lê, lêc yuu i sea ma?”

⁸Mêlêc Yesu nêl vô he ên nêbê, “Xam nilôm xêkizêc ta, om Moses lee yuu ên nêbê tiyi wê xam ob sea vinême ge. Lêc mugên ilage môp tibêge o yêp lêm. ⁹Om a nêl vô xam bê vux ti vinê obêc vông môp yôdac vô vux ngwe lêm, lêc liya sea vinê di la ii vêx paha ngwe ge od vux tige vông môp yôdac.”

¹⁰Om Yesu nue ngivihi nêl vô i ên nêbê, “Om môp wê Anutu vông vô vux yuu vinê obêc yêp bêge ge od ge nivîha wê vux ob ob dô gilon di o ii vêx lêm.”

¹¹Lêc Yesu nêl vô he ên nêbê, “Xomxo vihati o tiyi wê ob la vô kiyang tibêge lêm. Nge, xomxo titi wê Anutu vông xêkizêc vô he ge wê he ob vông bêge di ob ii vêx lêm. ¹²Ên xomxo viyang viyang ge, titi o tiyi wê ob ii vêx ge lêm. Ên he ya, tae kô he tiyiên ma om he o tiyi wê he ob ii vêx ge lêm. Di he ya, tibii vêl he om he o tiyi wê he ob kô vêx ge lêm. Di he ya, he vông he nilô la vô Anutu xolac yuu ben, om he ngibua he ên nêb he ob ii vêx lêm. Om xomxo ti tiyi wê obêc ngô kiyang tige ge od i ngô.”

Yesu kítaa lec nue nipwopwo

(Mak 10:13-16; Luk 18:15-17)

¹³Mêd xomxo kô nue nipwopwo mi lam vô Yesu ên nêb i vyax vigê lec he di kítaa lec he, lêc nue ngivihi piping he nêb he loc vôn Yesu i ma, ¹⁴lêc Yesu nêl vô he ên nêbê, “Vông nipwopwo i lam vô a di le vac xônên i ma, ên xomxo tibêgee tu vigwe lag puunê kehe.” ¹⁵Om Yesu vyax vigê lec he, pyap di loc mi la vigwe ngwe.

Xomxo ngivihi ti wê susu tibeac

(Mak 10:17-31; Luk 18:18-30)

¹⁶Xomxo ngivihi ti val vô Yesu di kinêg vô i ên nêbê, “Xolac kehe, a obêc vông môp nivîha tina êdêc dô magviha luta lêc luta?” ¹⁷Mêd Yesu nêl vô i ên nêbê, “Bêna lêc ông kinêg a lec môp wê nivîha ge? Anutu tibed ge wê nivîha, om ông obêc nêb la dô mamviha ge od ông viac xolac vihati.” ¹⁸Om xomxo ngivihi tige nêl vô i ên nêbê, “Xolac tina?” Om Yesu nêl ên nêbê, “Xolac wê nêl ên nêbê le i lêc hi xomxo i yib lêm. Le i lêc vông môp yôdac vêx yuu vux lêm. Le i lêc vun xomxo ngwe susu lêm. Le i lêc nêl kiyang kityooên lec xomxo ngwe lêm. ¹⁹Loc vac tam yuu mam

kwa ngibi. Di xêmyaa i vin lec xomxo vihati i tiyi xocbê ông xêmyaa vin lec ôcông va ge.”

²⁰Mêd xomxo ngivih i tyo nêl vô i ên nêbê, “A viac xolac vihati gee pyap. Om môp tina gên yêp wê a ob vông hixôn ge?” ²¹Lêc Yesu nêl vô i ên nêbê, “Ông obêc nêb ông ob tu xomxo wê nivih a lee ge od ông lôc vông ông susu vihati mi tibii i kisuu di vông mone vô xomxo wê nêl susu maên ge êdêc kô nôn nivih a gê lag puunê. Om ông lôc vông bêge di lôm timu vô a vixag.” ²²Xomxo ngivih i tyo ngô kiyang tige di nilô vô viyin mabu ên i susu tibeac, om sea Yesu di la.

²³Mêd Yesu nêl vô nue ngivih i ên nêbê, “A nêl vixôhilôg vô xam bê xomxo wê susu tibeac ge obêc nêb la vac Anutu ben ge od obêc vông yuac levac vô he. ²⁴A ob nêl kiyang ti vô xam i tii vac hixôn bê bwoc kamel ti obêc nêb la vac yin kitu tocên ge od obêc yuac levac, mêlêc xomxo wê susu tibeac ge obêc nêb la vac Anutu ben ge od obêc tu yuac levac vô i luu vêl.”

²⁵Yesu nue ngivih i ngô kiyang tige di yetac mabu yocên di kinêg i ên nêbê, “Obêc tibêge ge od letya tiyi wê obêc la dô maviha vac Anutu ben ge.” ²⁶Lêc Yesu manôn la vô he di i nêl vô he ên nêbê, “Xomxo mô o tiyi lêm, di Anutu môci tiyi wê ob vông môp vihati.” ²⁷Mêd Pita nêl vô i ên nêbê, “Wê lê. Xe ga, xe sea susu wê xe vông ge vihati dô di lam timu vô ông vixam. Om xe obêc kô nôn vatya vô buc timuênê?”

²⁸Mêd Yesu nêl vô he ên nêbê, “A nêl vixôhilôg nôn vô xam bê vô buc timuên wê susu vihati obêc vô paha lec ge od a, Xomxo Nu, a ob kô lêg levac mi dô lec sia king. Di xam wê xam timu vô a vixag gee, xam êno obêc dô lec sia king vigê yuu di tô mi la yuu, di yaxên lime Islel wê xam hipu vigê yuu di tô mi la yuu ge nêl kiyang. ²⁹Di xomxo vihati wê sea ben hixôn tae mae lie di nue di sea yuac yaên wê he vông ge hixôn ên nêb ob vông a lêg i vô levac ge od Anutu ob vông nôn nivih a 100 100 hiwocên vô he di ob vông he dô maviha luta léc luta. ³⁰Lêc xomxo mugên tibeac obêc lax timu, di xomxo timuên obêc lam la mug.”

Kiyang pilepacên lec xomxo yuac

20 ¹Yesu nêl ên nêbê, “Anutu ben kehe tiyi xocbê xomxo levac ti wê tu yuac wain kehe ge. Om pitoc yang ge la ên nêb ob la myag xomxo wê ob la vông yuac wain wê i vông ge. ²Mêdêc la tulec he di nêl vô he ên nêbê obêc vông mone kehe titi vô he tiyi buc titi. Om he lee yuu di i vông he la vac yuac. ³Hiyôv tyip lam 9 klok vidiiên, lêc xomxo tyo mîla yê wê xomxo ya le vida vida lec wetôv ge, ⁴om nêl vô he ên nêbê, ‘Xam loc vông yuac wain di a ob vông mone nivih a vô xam.’ Om he la.

⁵“Hiyôv lam tyip vidii pipumên di xomxo tyo lax yê he ya hixôn, di vông he la vac yuac. Di hiyôv manôn yon hucên i vông tibêge. ⁶Nang dêc vô 5 klok hucên xomxo tyo la yê he ya wê le vida vida ge. Om nêl vô he

ên nêbê, 'Bêna lêc xam dile vaxvax di yuac ma di vîgwe hucê?' ⁷Om he nêl vô i ên nêbê, 'Xomxo ti o vông yuac vô xe lêm.' Om nêl vô he ên nêbê, 'Xam êno loc yuac wain.'

⁸"Pyap dêc vîgwe buc, mêdêc xomxo levac tyo wê vông yuac wain ge nêl vô xomxo ti wê viac nue yuac ge ên nêbê, 'Ông tyuc a nuge yuac vihati i lam di vông mone vô he. Taxlee ge ông vông mone vô he wê val vông yuac timuên ge di i miloc vô he wê val vông yuac tax ge.'

⁹"Mêd he wê val vông yuac vô 5 klok hucên ge lam tax di he vihati kô mone kehe titi tiyima. ¹⁰Pyap dêc he wê val vông yuac vô pitoc ge lam, di he xo ên he nêb mêd he ob kô mone nginoo he wê val vông yuac hucên ge vêl. Lêc he êno kô mone kehe titi. ¹¹He kô mone pyap di kunac xomxo levac tige wê i yuac wain ge, ¹²di nêl vô i ên nêbê, 'Xomxo tigae wê val vông yuac hucên ge he vông yuac tiyi hiyôv manôn tived, lêc ông vông mone vô he tiyi xocbê ông vông vô xe ge, lêc xe vông yuac pitoc yang di vîgwe buc lec mi hiyôv ya xe nimnivi vô myavinê.'

¹³"Lêc xomxo tyo nêl vô he ên nêbê, 'Xam lige, a o vông ti so vô xam lêm. Xam lee yuu ên xam nêb a vông mone kehe titi vô xam titi. ¹⁴Om xam kô nêm mone mi loc, ên a nêb a ob vông mone vô he wê lam timuên ge i tiyi xocbê a vông vô xam ge. ¹⁵Ge aca mone om a obêc vông tiyi xocbê a xovô ge od tiyiên obêc ma, me? Xam ob wê a nipaên lec a vîgêg yuac, me?'"

¹⁶Yesu nêl kiyang pilepacên tige pyap di nêl ên nêbê, "Om he timuên obêc lam la mug, di he mugên ge ob lax timu."

Yesu nêl kiyang vông lu yon lec wê ob yib di kidi lec ge
(*Mak 10:32-34; Luk 18:31-33*)

¹⁷Yesu he nue ngivihî loc mi la ên nêb ob la Jerusalem, om he mila môp ti di Yesu kô nue ngivihî vigê yuu di tô mi la yuu mi he la dô vîyonên di nêl vô he ên nêbê, ¹⁸"Xam ngô lê. Il ob la Jerusalem, di xomxo ob vông Xomxo Nu la vac he levac wê mi si daa gee hixôn xomxo wê xovô Moses xolac gee vigê di he ob vông kot vô a di hilu kiyang wê ob hi a xib ge xôn, ¹⁹di he ob vông a la vac tibii wê o Yuda lêm ge vigê, mêd tibii tigege ob so vya vô a, di pisa a ya yihi, di tul a lec xax, di buc yon ob lam la vêl di a obêc kidi lec magviha."

Jems yuu Jon nêb yuu ob tu levac
(*Mak 10:35-45*)

²⁰Vô buc tige Sebedi nu yuu, Jems yuu Jon, hixôn ta, yon lam vô Yesu, di ta yev vixa kitu vô i di nêl ên nêbê ob kitaa susu ti vô i. ²¹Om Yesu nêl vô i ên nêbê, "Ông ob kitaa vatya vô a?" Mêd vêx tyo nêl vô i ên nêbê, "Ông lee yuu ên a nug yuu, yuu i kô lê levac vô buc wê ông ob tu levac ge, di ngwe i dô vô ông vigêm hiyôv di ngwe i dô vô ông vigêm kêd."

²²Lêc Yesu nêl ên nêbê, “Kiyang wê mon kitaa vô a ge, mon o xovô kehe lêm. Viyin wê a ob kilê ge, muu tiyi wê muu ob kilê hixôn, me?” Lêc yuu nêl vô i ên nêbê, “Xii tiyi pyap.” ²³Mêd Yesu nêl vô yuu ên nêbê, “Vixôhilôg, muu ob kilê viyin. Lêc xomxo wê ob kô lê levac mi dô vô a vigêg hiyov di dô vô a vigêg kêd ge, a o tu kehe lêm. Ên vigwe yuu ge, Mag Anutu vaci viac di vinoo he wê ob kô lê levac ge.”

²⁴Mêdêc Yesu nue ngivihî vigê yuu ngô kiyang wê Sebedi nu yuu nêl ge om he xêyaa vô myavinê ên kiyang wê yuu nêl ge. ²⁵Lêc Yesu keac he lam di nêl vô he ên nêbê, “Xam xovô ên xam nêbê tibii levac vac vigwe ya viac lie ya kiyang xêkizêc, di tibii levac ya yong he di nêl kiyang xonaên ên nêb lie i timu vô. ²⁶Di xam ga, xam o lêc vông môt bêge lêm. Nge, xam ti obêc nêb tu xam nêl levac ge od i tu xam nêl xomxo yuac, ²⁷di xam ti obêc nêb tu mugên wê xam vông ge od i tu xomxo wê ob vông yuac vidaaên vô xam ge, ²⁸i tiyi xocbê a, Xomxo Nu, a o lam ên a nêb xomxo i vông yuac vô a lêm. Nge, a lam ên a nêb a ob vông yuac di ngidu xomxo xôn, di a ob xib, ên vô xomxo tibeac vêl ên he nêl nipaên.”

Yesu vông xomxo ma tocên yuu yê vigwe tii vac

(Mak 10:46-52; Luk 18:35-43)

²⁹Yesu he nue ngivihî kidi gê Jeliko ên nêb ob la, di xomxo kidu kidu timu vô he vixa. ³⁰Lêc xomxo matocên yuu dô vô môt ninya, mêd ngô wê Yesu val ge om tyuc vya levac ên nêbê, “Devit nu, xo vigwe pisiv ên xii.” ³¹Lêc xomxo tibeac higac vô yuu ên nêbê, “Muu dô kiyang maên.” Lêc yuu tyuc vya levac tii vac ên nêbê, “Xomxo levac, ông Devit nu, xo vigwe pisiv ên xii.”

³²Mêd Yesu le kizêc di keac yuu lam vô i di kinêg vô yuu ên nêbê, “Muu nêb a vông bêna vô muuê?” ³³Om yuu nêl vô i ên nêbê, “Xomxo levac, vông xii mamnôn i seac.” ³⁴Mêd Yesu xo vigwe pisiv ên yuu di vyax vigê lec yuu manôn, di lutibed yuu manôn seac di yuu yê vigwe, om yuu timu vô Yesu vixa mi he la.

Yesu la Jerusalem tiyi xocbê king

(Mak 11:1-11; Luk 19:28-40; Jon 12:12-19)

21 ¹Yesu he nue ngivihî mila kwabo vô Jerusalem. Mêd he val vigwe Betpasi wê yêp kwabo vô kitôn Oliv ge. Mêdêc Yesu nêb ob vông nue ngivihî yuu i loc, ²om nêl vô yuu ên nêbê, “Muu loc vigwe tiganê, di muu obêc mila ge od lutibed muu ob wê mam la bwoc donki ti wê xomxo ku xôn mi i le vac môt hixôn nu ge. Om muu piwelac yihi vêl ên yuu di didii yuu mi lam vô a. ³Lêc xomxo ti obêc nêl kiyang ti vô muu lec wê muu kô donki ge od muu nêl vô i bêga bê, ‘Xomxo levac nêb ob kô mi vông yuac lec.’ Muu obêc nêl bêge ge od lutibed xomxo tige ob tyuc lec di vông donki tige vô muu.”

⁴Yesu nêl bêge ên nêb kiyang wê plopete nêl ilage i vô nôn lec. Kiyang tige bêga nêbê,

⁵“Xam nêl vô xomxo Saion bêga bê, ‘Xam wê lê. King wê xam vông ge val vô xam gwêbaga. Xomxo tige xomxo malehe, di i dô lec bwoc donki. Xomxo tyo dô lec bwoc donki nu ti mi val.’”

⁶Nue ngiwihi yuu la vông i tiyi xocbê Yesu nêl vô yuu ge. ⁷Om yuu didii bwoc donki ta hixôn nu mi lôm vô Yesu, di yuu vax yuu ngakwi lec donki kisii di Yesu dô lec. ⁸Mêd xomxo tibeac vax he nivimihi lec môp di he ya hup xax lihi mi vax i tup vô môp wê Yesu ob xoc vô ge tiyi xocbê môp wê xomxo mi kô xomxo levac lec ge. ⁹Di xomxo kidu levac wê la mug di kidu levac wê timu vô Yesu vixa gee, he vihati tyuc vya levac ên nêbê,

“Il ob pimil Devit nu. Il ob hi vixad i pec ên xomxo ti wê tu Apumtau manôn mi val ge. Il ob pimil Anutu lê i vô levac di i loc yêp kisii.”

¹⁰He tyuc bêge, di Yesu mila Jelusalem, di xomxo Jelusalem vihati vô nididun levac di nêl voma ên nêbê, “Xomxo tiga letya?” ¹¹Om xomxo kidu levac wê lam hixôn Yesu ge nêl lax vô he ên nêbê, “Xomxo tiga Yesu, plopete ti wê lam gê Nasalet vac vigwe levac Galili ge.”

Yesu tii xomxo wê vông vitevac vac Anutu xumac ngibua ge la vêl
(*Mak 11:15-19; Luk 19:45-48; Jon 2:13-22*)

¹²Mêdêc Yesu la vac Anutu xumac ngibua nilô di la tii tibii vihati wê divông vitevac lec susu vac xumac ngibua nilô gee lop mi lam la vêl, di tibii wê vông mone luuma gee, Yesu vông he nêb tevol kipê sea, di xomxo wê vông menac nêb tibii i kisuu ên tu xocbê daa ge, Yesu kipê he nêb sia sea, ¹³di nêl vô he ên nêbê, “Xolac nêl bêga ên nêbê, ‘A xumac tiga, xumac kitaa vacên.’ Xolac nêl bêge, léc xam vông a xumac vô nipaên tiyi xocbê xumac wê tibii yôdac xôpac vac ge.”

¹⁴Yesu dô vac Anutu xumac ngibua nilô di xomxo matocên hixôn xomxo vixa pecên val vô i di i vông he vô niviha lec. ¹⁵Lêc xomxo levac wê mi si daa gee hixôn he wê xovô Moses xolac gee, he yê do levac wê Yesu vông ge di ngô kiyang wê nue nipwo tyuc bêga ên nêbê, “Il ob pimil Devit nu.” Om xomxo levac tige ni nyag ¹⁶di nêl vô Yesu ên nêbê, “Kiyang wê nipwopwo nêl ge, ông ngô, me?” Lêc Yesu nêl vô he ên nêbê, “Ge a ngô, léc kiyang wê yêp vac xolac ge, mêd xam o kitong lêmê? Kiyang nêl bêga ên nêbê,

‘Nume nipwo di he wê gên lul ge, ông nêl kiyang pimilên vac he mya om he pimil ông.’”

¹⁷Yesu nêl kiyang tige vô he pyap di loc mi la yêp gê Betani.

Yesu nêl vya lôl higuc di i mupac
(*Mak 11:12-14,20-24*)

¹⁸Yesu he nue ngiwihi yêp di kidi mi la pitoc ên nêb ob la Jelusalem, léc mila môp ti di vip den Yesu. ¹⁹Mêd Yesu yê ma la higuc wê le vô môp

ninya ge, om la kwabo nêb ob ya nôn, lêc nôn ti o yux lec lêm. Nge, yatôv hixôn lihi pileva le. Om Yesu nêl vô xax tyo ên nêbê, “Ông obêc vuac nôn ti i tii vac lêm.” Om lutibed xax tige mupac.

²⁰Nue ngivihi yê di yetac di kinêg vô Yesu ên nêbê, “Bêna lêc higuc tiganê mupac lutibedê?” ²¹Om Yesu nêl lax vô he ên nêbê, “Xam obêc kitaa susu ti vô Anutu hixôn vông vinên ge od Anutu ob vông vô xam. Om a nêl vixôhilôg nôn vô xam bêga bê xam obêc vông i vin hixôn nilôm tibed ge od xam obêc nêl kiyang tiyi xocbê a nêl lec higuc ge di obêc vô nôn lec. Lêc xam ob vông yuac tibed mô lêm. Nge, xam obêc nêl vô kitôn tiganê bê, ‘Ông pul mi loc vac gwec’ ge od ob la tiyi xocbê xam nêl ge. ²²Ên xam obêc kitaa susu ti vô Anutu hixôn vông vinên ge od Anutu ob vông vô xam.”

He Islel kinêg Yesu ên nêbê, “Ông kô xêkizêc vô letya?”

(Mak 11:27-33; Luk 20:1-8)

²³Yesu la vac Anutu xumac ngibua nilô, di la nêl xolac vô xomxo. Mêd xomxo levac wê mi si daa gee hixôn he Islel levac ya val kinêg vô i ên nêbê, “Ông kô xêkizêc vô letya lêc lam vông yuac tigae, di ông tu letya manônê?” ²⁴Om Yesu nêl lax vô he ên nêbê, “A êno ob kinêg kiyang ti vô xam, di xam obêc nêl kitong ge od a êno ob nêl xomxo ti wê vông xêkizêc vô a ge kitong vô xam. ²⁵Om a ob kinêg vô xam bê mia lipacên wê Jon vông ge kehe yêp vô letya? Kehe lam vô Anutu lag puunê me xomxo kibun ga vông?”

Om he ngaênma di nêl vôma ên nêbê, “Il ob nêbê va? Ên il obêc nêl bê Anutu lag puunê vông ge od Yesu ob nêl vô il bêga bê, ‘Bêna lêc xam o vông i vin kiyang wê Jon nêl ge lêmê?’ ²⁶Lêc il obêc nêl bê xomxo kibun ga vông ge od il ob xona ên xomxo vihati, ên he vông i vin ên he nêbê Jon ge plopete nôn.” ²⁷Om he nêl vô Yesu ên nêbê, “Xe o xovô mia lipacên wê Jon vông ge kehe lêm.” Mêd Yesu nêl vô he ên nêbê, “Om a êno ob nêl xomxo ti wê vông xêkizêc vô a ge kitong vô xam lêm.

Yesu nêl kiyang pilepacên lec xomxo ti nu yuu

²⁸“Xam xo ên xam nêbê va? Xomxo ti nu yuu dô, om ma la nêl vô nu tuc ên nêbê, ‘Tuc, gwêbaga ông loc vông yuac wain wê a vông ge.’ ²⁹Lêc nu tuc nêl lax vô ma ên nêbê, ‘A ob la lêm.’ Nu tuc nêl bêge di timuên lêc pilepac nilô di la vông yuac wê ma nêl ge. ³⁰Nang dêc ma la vô nu môn di nêl vô i tiyi xocbê nêl vô nu tuc ge. Mêd nu môn nêl i lax vô ma ên nêbê, ‘Mag, a ob la.’ Lêc kityoo di o la vông yuac lêm. ³¹Om nu yuu ngwe na wê ngô ma kiyangê?” Om xomxo daa siên hixôn he Islel levac nêl vô Yesu ên nêbê, “Nu tuc.” Mêd Yesu nêl vô he ên nêbê, “A nêl vixôhilôg nôn vô xam bê tibii nipaên wê kô takis gee hixôn vêx yôdac gee, he ob mug ên xam mi la vac Anutu ben lag puunê. ³²Ên Jon Lipacên lam hilung

môp bôbac vô xam, léc xam o vông i vin kiyang wê i nêl ge lêm. Léc tibii nipaên wê kô mone takis gee hixôn vêx yôdac gee, he vông i vin, di xam xovô wê he vông i vin ge, léc xam o pilepac xam mi vông i vin lêm.

Yesu nêl kiyang pilepacên lec xomxo nipaên wê viac yuac wain ge
(*Mak 12:1-12; Luk 20:9-19*)

³³“Xam ngô kiyang pilepacên ngwe. Xomxo ti bin yuac levac wê i vông ge di xin wain vac di ku xenac kisuu lec, di yev lôva ti wê xomxo ob gig wain nôn vac ge di lox xumac wê xomxo ob dô vac di yê yuac xôn ge. Om vông yuac tige vac tibii ya vigê ên nêb he i viac. Pyap dêc xomxo tyo la dô vac vigwe teva ngwe. ³⁴Di buc wê wain nôn huu ge vô kwabo lec, om vông nue yuac ya la vô tibii wê viac yuac wain gee ên nêb he i loc yul wain nôn wê huu ge di kô mi lôm vô i. ³⁵Om he la, léc tibii wê viac yuac ge hôm he xôn di tax ti ninivi sea di hi ngwe yib di nêx ti ya ngidax. ³⁶Nang dêc timuên xomxo levac tyo vông nue yuac ya la nang. He tibeac nginoo he wê la tax ge vêl, léc tibii wê viac yuac gee vông nipaên vô he tiyi xocbê he vông vô xomxo yuac wê la tax ge.

³⁷“Mêdêc timuên xomxo levac tyo vông nu tuc la vô he, ên xo vac nilô bêga ên nêbê, ‘Ga aca va nug om he ob yê i xocbê xomxo levac di ngô kiyang wê ob nêl vô he ge.’ ³⁸Léc tibii wê viac yuac gee yê nu tuc wê mila ge, om nêl voma ên nêbê, ‘Xomxo tige wê ma ob nêl i lê lec yuac wain ga. Om il ob hi i yib ên yuac wain ga i tu il xe.’ ³⁹Om he hôm i xôn di kô mi la ninyawehe di la hi i yib. ⁴⁰Om xomxo levac tige obêc val ge od ob vông bêna vô tibii tige wê viac i yuac gee?”

⁴¹Om xomxo daa siên hixôn he Islel levac nêl vô Yesu ên nêbê, “Xomxo levac tige ob vông myavinê levac vô he di hi he yib, di ob vông yuac wain tige vac tibii ba vigê ên he i viac, di he ob vông wain nôn vô xomxo levac tyo vô buc wê he obêc yul nôn ge.”

⁴²Mêd Yesu nêl vô he ên nêbê, “Kiyang wê yêp vac xolac ge, xam mêd o kitong lêm, me? Ên kiyang nêl bêga ên nêbê,
‘Ngidax ti wê xomxo xumac loxên yê nêbê tiyiên ma ge, ge wê tu ngidax xêkizêc wê ob hôm xumac xôn ge. Apumtau vaci vông bêge, di xe xê tiyi xocbê susu nivaha.’

⁴³Xolac nêl bêge, om a ob nêl vô xam bê Anutu ob vô kiyang yuu yuac wê i vông ge vêl ên xam Yuda di ob vông vac tibii ba vigê, di he ob vông i vô nôn lec. ⁴⁴[Xomxo ti obêc mwoc mi hi i lec ngidax tige ge od ob hi i len vô pipu sea, di ngidax tige obêc tô mi hi xomxo ti ge od ob hi i pital sea.]”

⁴⁵He levac wê mi si daa gee hixôn he Palisi ngô kiyang pilepacên tige di xovô ên nêbê Yesu nêl kiyang lec he. ⁴⁶Om he nêb he ob hôm Yesu xôn, léc he xona ên xomxo tibeac, ên he tibeac yê Yesu tiyi xocbê plopete ti.

Kiyang pilepacên lec vizid levac

(Luk 14:16-24)

22 ¹Nang dêc Yesu nêl kiyang pilepacên ngwe vô he bêga ên nêbê, ²“Anutu ben kehe tiyi xocbê môt wê xomxo levac ti vông. Xomxo tige nu vux ti nêb ob kô vêx om ma nêb ob myêl vizid levac. ³Mêd vông kiyang la vô tibii ya tax ên nêb ob myêl vizid levac ti. Om vô buc wê obêc myêl yaên ge od vông nue yuac la nêl vô tibii tige nêb he i lam vac yaên levac. Lêc tibii tige nêb ob lam lêm. ⁴Om xomxo levac tige vông nue yuac ya la tii vac di nêl vô he ên nêbê, ‘Xam lôc vô he wê a nêb he i lam vac vizid ge, di nêl kitong vô he bê a viac a pyap, di a hi bwoc kau di bwoc nipwo levac levac hixôn di viac yaên vihati pyap, om he i lam ya vizid a vông, ên a nug ob kô vêx.’

⁵“Mêgem nue yuac tige la nêl kiyang vô tibii, lêc he ni ma lec kiyang nêb ob ngô lêm. Om he la vaxvax, ti la yuac yaên di ti la yuac mone, ⁶di he ya hêm xomxo levac nue yuac xôn mi vông he vô nipaên di hi he yib. ⁷Om xomxo levac tige xêyaa vô myavinê, om vông nue vevac la vô he wê hi i nue yuac yib ge, di nue vevac hi he yib di nyuu he nêl xumac, di ngwax ya he ben ma vêl.

⁸“Mêd xomxo levac tyo nêl vô nue yuac ên nêbê, ‘A myêl vizid levac pyap mi i dô, lêc xomxo wê a tyuc he ên a nêb he i lam ya ge o tiyi wê ob ya ge lêm. ⁹Mêgem xam loc vac môt levac vihati, di xomxo wê xam ob tulec ge, xam kô vihati mi lam vac vizid wê a vông ge.’ ¹⁰Om nue yuac la le vac môt vihati di la kituc xomxo nivaha yuu xôn nipaên wê he tulec ge di kô he vihati mi la vac vigwe wê he ob ya vizid vac ge. Om he la pup lec xomxo levac tyo ben.

¹¹“He val dô, mêdêc xomxo levac tyo la vac xumac nilô ên nêb ob yê he, lêc yê xomxo ti wê o vinyum ngakwi vizid ya yaên ge lêm. ¹²Om xomxo levac nêl vô i ên nêbê, ‘Lig, bêna lêc ông o vinyum ngakwi vizid ya yaên lêm, lêc lam dô hixônê?’ Lêc xomxo tyo o xovô kiyang ti wê ob nêl lax vô i ge lêm. ¹³Om xomxo levac tyo nêl vô nue yuac ên nêbê, ‘Xam ku xomxo tige vixa yuu vigê xôn di nêx i loc vac vigwe mapitoc. Vac vigwe tige xomxo ob byag levac di nivu kic lecma.’” ¹⁴Yesu nêl kiyang pilepacên tige pyap di nêl ên nêbê, “Anutu tyuc xomxo tibeac lê, lêc ob vinoo nôn titi.”

Xomxo kinêg Yesu lec mone wê he tung takis vô Sisa ge

(Mak 12:13-17; Luk 20:20-26)

¹⁵Mêdêc he Palisi la kitucma di keac lec kiyang wê nêb ob kinêg vô Yesu ên i nêl kiyang ti i so. ¹⁶Om Palisi vông he nue ngivihi hixôn Helot nue ngivihi la vô Yesu di he nêl vô i ên nêbê, “Xolac kehe, xe xovô ên xe nêbê ông wê ông mi nêl kiyang hixôn nôn, di ông tixuu xomxo ya môt wê Anutu

vông ge di ông o kityoo lêm, di ông o xona ên xomxo ti lêm, ên ông wê xomxo vihati tiyima. ¹⁷Om ông nêl vô xe bê ông xovô bêna? Il Yuda obêc vông takis vô king Sisa wê tibii ba ge od ob pwoos Moses xolac vac, me?”

¹⁸Lêc Yesu xovô kiyang nipaên wê yêp vac he nilô ge om nêl vô he ên nêbê, “Xam tibii kityooên, bêna lêc xam nêb xam ob yaxên a? ¹⁹Xam kô mone takis tyo mi lam a xê.” Om he vông mone ti vô i. ²⁰Di Yesu kinêg vô he ên nêbê, “Letya kinu yuu lê wê yêp lec mone tiga?” ²¹Lêc he nêl ên he nêbê, “Sisa kinu yuu lê wê yêp lec mone tiga.” Om Yesu nêl vô he ên nêbê, “Om susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu.”

²²He ngô kiyang wê Yesu nêl ge di yetac mabu, di sea i di la.

He Sadyusi kinêg Yesu lec wê xomxo ob kidi lec vac yibên ge

(Mak 12:18-27; Luk 20:27-40)

²³Vô buc tyo xomxo Sadyusi ya val vô Yesu. He Sadyusi ge, he mi nêl ên he nêbê xomxo yibên ob kidi lec mi dô maviha lêm. Om he val kinêg vô Yesu ên nêbê, ²⁴“Xolac kehe, Moses xolac nêl bêga ên nêbê, ‘Xomxo ti obêc yib di nu ma ge od xomxo tyo li ngwe ob ii vêxôv tige ên yuu i kô nue di nue i tu susu wê ma yibên vông ge kehe.’ Moses xolac nêl bêge. ²⁵Om ilage vux vigê vilu di sec yuu wê ta yuu ma tived ge dô vac xe mahigun. Mêdêc li tuc kô vêx ti lêc yib di nu ma, om li môn kô vêx tyo nang. ²⁶Lêc li môn yib di nu ma om li gwaa kô vêx tige tii vac nang, lêc yib di nu ma, di lie timuên vihati kô vêx tige di i mila vô li timuên tyo hixôn, lêc nu ma di he vihati yib. ²⁷Di timuên lêc vêx tyo yib. ²⁸Ông nêl ên ông nêbê xomxo ob kidi lec maviha vac yibên, om xe nêb xe ob kinêg ông bê buc wê xomxo yibên obêc kidi lec ge od vêx tige ob tu vux tina vinê? Ên vux vigê vilu di sec yuu ii vêx tived lec buc wê he dô maviha ge.”

²⁹Lêc Yesu nêl i lax vô he ên nêbê, “Xam o xovô kiyang wê yêp vac xolac ge lêm di xam o xovô xêkizêc wê Anutu vông ge lêm, om xam nêl kiyang so. ³⁰Ên buc wê xomxo yibên ob kidi lec ge, he ob iima lêm. Nge, he ob dô tiyi xocbê angela lag puunê. ³¹Di kiyang lec wê xomxo yibên ob kidi lec maviha ge, xam mêd o kitong kiyang wê Anutu nêl vô xam ge lêm, me? Ên Anutu nêl bêga ên nêbê, ³²‘Eblaham Anutu a, di Aisak Anutu a, di Jekop Anutu a.’ Anutu nêl bêge, lêc yon yib tax dêc Anutu nêl kiyang tige timuên om kiyang tige nêl kitong ên nêbê Anutu o tu xomxo yibên nên Anutu lêm. Nge, tu xomxo maviha nên Anutu.”

³³Xomxo kidu levac tige ngô di yetac mabu ên kiyang wê Yesu nêl ge.

Xolac nôn tived wê nginoo xolac baba vêl ge

(Mak 12:28-31; Luk 10:25-28)

³⁴He Palisi ngô wê Yesu kiyang vông he Sadyusi dô kiyang maên ge om he kitucma mi la vô Yesu. ³⁵Di he wê tu Moses xolac kehe gee ti nêb ob

yaxên Yesu om kinêg vô i ên nêbê, ³⁶“Xolac kehe, xolac wê Anutu nêl vô Moses ge, tina wê nginoo vêl ge?”

³⁷Om Yesu nêl vô i ên nêbê, “Xolac ti wê nginoo vêl ge bêga nêbê ông xêmyaa i vin lec ông Apumtau Anutu di ông vông nilôm yuu kinum di piyôp i loc yadiluhu vô Anutu. ³⁸Xolac tived tiga wê yêp mugên di nginoo baba vêl. ³⁹Di xolac ngwe wê vông yuu ge tiyi xocbê ngwe wê yêp mugên ge nêl bêga ên nêbê ông xêmyaa i vin lec xomxo vihati i tiyi xocbê ông xêmyaa vin lec ôcông va ge. ⁴⁰Xolac yuu ga tu kiyang wê Moses he plopete nêl ilage vihati kehe.”

Yesu kinêg he Palisi lec lê Kilisi

(Mak 12:35-37; Luk 20:41-44)

⁴¹He Palisi kitucma mi la dô hixôn Yesu, om Yesu kinêg vô he bêga ên nêbê, ⁴²“Xam xo bêna lec xomxo levac wê lê Kilisi ge? Xam xo ên xam nêbê letya nu i?” Om he Palisi nêl vô Yesu ên nêbê, “Ge Devit nu ti.”

⁴³Mêd Yesu nêl vô he ên nêbê, “Obêc Devit bue timuên ti ge od bêna lêc Myakilôhò Ngibua vông Devit nêl kiyang lec Kilisi ên nêbê Apumtau? Ên Devit nêl bêga nêbê,

⁴⁴‘Apumtau Anutu nêl vô a lig Apumtau ên nêbê, “Ông lôm dô vô a vigêg hiyôv di a ob vông tibii wê vông vevac vô ông gee, he i loc dô vac ông kwa ngibi.”’

⁴⁵Devit nêl bêge, om Devit obêc nêl lec Kilisi ên nêbê Apumtau ge od bêna lêc xam nêbê Kilisi ge Devit bue ti?” ⁴⁶He ngô kiyang wê Yesu nêl ge, lêc ti o tiyi wê ob luu kiyang ti lax vô i ge lêm. Om vô buc tige he xona ên i om he o kinêg kiyang ti vô i tii vac lêm.

Môp wê he Palisi hixôn he wê xovô Moses xolac gee mi vông

(Mak 12:38-39; Luk 11:43,46; Luk 20:45-46)

23 ¹Nang dêc Yesu nêl vô xomxo kidu levac hixôn i nue ngivihi ên nêbê, ²“He wê xovô Moses xolac gee hixôn he Palisi, he le vac Moses nipilêhê di vông Moses xolac vô xam, ³om kiyang vihati wê he nêl vô xam ge, xam ngô di timu vô. Lêc le i lêc vông môp tiyi xocbê he vông ge lêm. Ên he tixuu xam ya kiyang nivaha, lêc he o timu vô kiyang wê he mi nêl ge lêm. ⁴Ên he vông viyin vô xam tiyi xocbê he titup susu viyin di lii lec xam kidiac ên nêb xam kilê ge, lêc he o hôm nipwo ti vac vigê hixôn lêm. ⁵Môp vihati wê he mi vông ge, he vông ên he nêb xomxo i yê di pimil he. Om he kivuu Anutu xolac lec kipihac di su vac vixec nu wê duu bwoc ninivi ge di ku yêp lec mahigê maxooên, di he duu myahilili dia la yux lec ngakwi myahipu, ⁶di he obêc la ya vizid levac me obêc la vac xumac lilo ge od he nêb he ob la dô lec sia wê xomxo levac mi dô lec ge, ⁷di he xêyaa vin lec wê he ob la vilee lec wetôv ên nêb xomxo i kô he lec, di xêyaa vin lec nêb xomxo i nêl bê he xolac kehe.

⁸“Lêcom a ob nêl vô xam bêga bê xomxo ti i o léc nêl vô xam bê xam ge xolac kehe lêm. Ên xomxo tived tu xam nêl xolac kehe, di xam vihati xam lime. ⁹Di le i léc vînoo xomxo kibun ga ti bê xam mam lêm, ên mam tived wê dô lag puunê. ¹⁰Di xomxo ti i o léc nêl vô xam bê xam xomxo levac lêm. Ên xam nêl xomxo levac tived ge Kîlisi. ¹¹Xomxo wê tu xam nêl levac ge i loc tu xam nêl tibii yuac hixôn lê, ¹²ên xomxo ti obêc kô i lec ge od Anutu ob vông i lê vô nipwo lec. Lêc xomxo ti obêc pilepac i di vô nipwo lec ge od Anutu ob vông i lê vô levac.

Yesu nêl vô he Palisi ên nêbê he nilô pital pyap
(*Mak 12:40; Luk 11:39-42,44,52; Luk 20:47*)

¹³“Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam tung vuayen lag puunê lec ên xomxo. Xacxam va ob la vac lêm, léc he wê nêb ob la vac Anutu ben ge xam le vac he xôn. ¹⁴[Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam vô vêxôv nêl susu yuu xumac vêl ên he, di buc wê xam obêc kîtaa ge od xam mi vîyum nêl nipaên vac kîtaaên dia. Om xam obêc kô myaviwen nipaên luu vêl.]

¹⁵“Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam la vac sip di la vilee vac vîgwe mi la ên xam nêb xam ob pilepac xomxo ti i tu xam nume ngîvihi. Lêc xomxo tyo obêc tu nume ngîvihi ge od xam vông i la vac nipaên levac luu wê xam vông ge vêl, om xam xôn vihati ob la vac vîgwe nipaên.

¹⁶“Xam ge mamtocên, léc xam nêb xam ob hilung môp vô xomxo, xam nilôm pital pyap. Xam mi nêl ên xam nêbê, ‘Xomxo ti obêc titô vîgê la kîsii di nêl kiyang ti di nêl Anutu xumac ngîbua lê hixôn ge od kiyang wê i nêl ge kiyang pileva. Lêc xomxo ti obêc titô vîgê la kîsii di nêl kiyang ti di nêl gol wê he lipac lec xumac ngîbua ge lê hixôn ge od xomxo tyo i vông i tiyi kiyang wê i nêl ge.’ ¹⁷Xam mi nêl bêge, léc xam ge tibii yacyac wê manôn toc ge. Susu ngwe na wê ngînoo vêlê? Gol ngînoo vêl, me Anutu xumac ngîbua wê vông gol tu ngîbua ge ngînoo vêlê? ¹⁸Xam mi nêl ên xam nêbê, ‘Xomxo ti obêc titô vîgê la kîsii di nêl kiyang ti di nêl alta lê hixôn ge od kiyang wê i nêl ge kiyang pileva. Lêc xomxo ti obêc titô vîgê la kîsii di nêl kiyang ti di nêl daa wê yêp lec alta ge lê hixôn ge od xomxo tige i vông i tiyi kiyang wê i nêl ge.’ ¹⁹Xam mi nêl bêge, léc xam ge tibii matocên. Susu ngwe na wê ngînoo vêlê? Daa ngînoo vêl, me alta wê vông daa tu ngîbua ge ngînoo vêlê? ²⁰Om a nêl vô xam bê xomxo ti obêc titô vîgê la kîsii di nêl kiyang ti di nêl alta lê hixôn ge od tiyi xocbê nêl daa wê yêp lec alta kîsii ge lê hixôn. ²¹Di xomxo ti obêc titô vîgê la kîsii di nêl kiyang ti di nêl Anutu xumac ngîbua lê hixôn ge od tiyi xocbê nêl Anutu wê dô vac xumac tige lê hixôn. ²²Di xomxo ti obêc titô vîgê la kîsii di nêl kiyang ti di nêl vîgwe lag puunê lê hixôn ge od tiyi xocbê nêl Anutu sia king lê di nêl Anutu wê dô lec sia tige lê hixôn.

²³“Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Ên xam obêc tulec lehac yuu ngec di xax ninivi nivivea ge od xam mi tung kidu vigê yuu di vông ti la tu daa vô Anutu. Lêc xam sea môp levac wê Moses xolac nêl ge xocbê môp bôbac di môp wê xam ob xo vigwe pisiv ên xomxo, di môp wê xam ob vông i vin. Om a ob nêl vô xam bê xam o lêc vông môp ngwe di sea ngwe lêm. Nge, xam vông yuu xôn tiyima. ²⁴Xam ge mamtocên, lêc xam nêb xam ob hilung môp vô xomxo. Xam mi hôm vimeac vêl ên yaên, lêc bwoc levac xam ngôn diluhu.

²⁵“Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam mi lipac nimnivi pileva tiyi xocbê xam lipac kap yuu pile nimi ge, dom xam nilôm ge, môp yôdac hixôn môp nipaên pup lec. ²⁶Xam Palisi matocên, xam lipac kap yuu pile nilô i vô nivîha lê, êdêc nimi i vô nivîha lec hixôn.

²⁷“Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam tiyi xocbê vigwe yibên wê xomxo vunac vô nivîha ge. Il xê vixun nêbê nivîha, lêc nilô ge, xomxo yibên len hixôn susu ningeac vihati ge dô vac. ²⁸Om xam êno tiyi bêge, ên xomxo mi yê xam nêbê xam xomxo nivîha, lêc xam nilôm môci, môp kityooên hixôn môp wê xam pwoô Anutu kiyang vac ge yêp vac xam nilôm.

Yesu nêl vô he Palisi ên nêbê he ob kô myaviwen nipaên
(*Luk 11:47-51; Luk 13:34-35*)

²⁹“Xam wê xam xovô Moses xolac gee hixôn xam Palisi, xam tibii kityooên, xam nilôm pital pyap. Xam mi lox xumac nivîha lec plopete wê yibên ge lôva kisii di xam vunac vô xomxo nivîha wê yibên ge lôva. ³⁰Di xam mi nêl ên xam nêbê, ‘Xe obêc dô vac buge buc ilage od xe ob timu vô môp wê he vông ge di hi plopete yib lêm.’ ³¹Xam nêl bêge, om xam nêm kiyang nêl xam kitong nêbê xomxo wê hi plopete yib ge nue xam. ³²Om xam loc vêl di loc vông môp nipaên i tiyi xocbê mame bume vông ilage! ³³Myel nipaên nue xam! Anutu obêc yaxên xam di vông xam la vac vigwe nipaên. Om xam ob pec ên myaviwen nipaên tige tibêna?

³⁴“Om a nêl vô xam bê a ob vông plopete di xomxo piyôp levac hixôn xomxo wê xovô xolac kehe gee i loc vô xam. Lêc xam ob hi he mangwe yib, di he mangwe, xam ob tul lec pola, di mangwe, xam ob pisa ya yihi vac xumac lilo wê xam vông ge, di tii he vac vigwe viyang viyang mi he la vêl. ³⁵Om xam ob kô myaviwen nipaên lec wê bume hi xomxo nivîha yib ilage. Xam bume hi Ebel wê o vông nipaên ti lêm ge yib taxlee di i val vô Belekaia nu Sekalaia wê bume hi i yib vac xumac ngîbua yuu alta mahigun ge. ³⁶Om a nêl hixôn nôn vô xam bê xam wê xam dô gwêbaga ge, xam obêc kô myaviwen nipaên lec môp soên vihati wê bume vông ilage.

³⁷“O Jelusalem, Jelusalem, xam wê xam hi plopete yib, di xam nêx he wê Anutu vông i loc vô xam ge ya ngidax mi he yib. Buc tibeac ge a keac ên a nêb xam lam vô a tiyi xocbê kokilêx ta keac nue vilu lax vac vinihi kwa ngibi ge, lêc xam nêb a vôngên i ma. ³⁸Om xam ngô lê. Anutu ob sea xam bom i yêp pileva. ³⁹Om a nêl vô xam bê xam ob wê a i tii vac nang lêm, di i loc vô buc timuên wê xam ob nêl bêga bê, ‘Il ob pimil xomxo ti wê tu Apumtau manôn mi val ge.’”

Anutu xumac ngibua ob dii vêl

(Mak 13:1-2; Luk 21:5-6)

24 ¹Yesu lop vac Anutu xumac ngibua ên nêb ob la, lêc nue ngivihi mila vô i ên nêb ob hilung xumac nivihya ya wê le hixôn xumac ngibua ge ên nêb i yê bê xumac nivihya. ²Lêc Yesu nêl vô he ên nêbê, “Gwêbaga xam wê xumac tigae vihati, lêc a nêl nôn vô xam bê obêc buc timuên ge od xumac tigae ob dii sea di ngidax ngwe ob dô lec ngwe kisii lêm.”

Viyin tibeac wê ob val timuên ge

(Mak 13:3-13; Luk 21:7-19)

³Yesu la dô lec kitôn Oliv kisii, di nue ngivihi heche val nêl vô i ên nêbê, “Xe nêb ông nêl vô xe bê kiyang wê ông nêl lec Anutu xumac ngibua ge ob vô nôn lec vô buc tina? Di do tina wê obêc val tax ên xe xê di xovô bê ông ob vena di lag yuu kibun obêc pilepac ge?”

⁴Om Yesu nêl lax vô he ên nêbê, “Xam viac xam nivihya êdêc xomxo i o lêc kityoo xam lêm. ⁵Ên xomxo tibeac ob val nêl a lêg lec he lê nêbê he Kilisi, om he ob kityoo xomxo tibeac. ⁶Di xam obêc ngô vevac nididun val kwabo di ngô kiyang lec vevac wê teva ge od le i lêc yetac di xona lêm. Ên vevac tige ob val tax, lêc buc myahipu gên yêp dia. ⁷Ên tibii viyang ngwe ob vông vevac vô tibii viyang ngwe, di xomxo vigwe ti ob dô kidu kidu di vông vevac vôma, di vip levac ob den xomxo vac vigwe ya, di ngayêg ob yoc vac vigwe ya, ⁸om viyin tige wê ob val taxlee, lêc viyin tibeac gên yêp wê ob val timuên hixôn.

⁹“Vô buc tige tibii ob hôm xam xôn di vông xam la vac tibii vigê di he ob vông myavinê vô xam di hi xam wib. Di tibii vac vigwe vihati yang xêyaa ob vô myavinê vô xam ên wê xam vông i vin a lêg ge. ¹⁰Di xomxo tibeac ob sea vông vinên wê he vông ge, di he ob vông lie la vac tibii vevac vigê, di he xêyaa ob vô myavinê vôma. ¹¹Di plopete kityooên tibeac obêc val kityoo xomxo tibeac. ¹²Di môp nipaên obêc vô levac, om xomxo tibeac obêc sea môp xêyaa vin lec maên. ¹³Lêc xomxo ti obêc le xêkizêc di i la tyip vô buc myahipu ge od Anutu obêc kô i mi la tung vac ben. ¹⁴Di xomxo ob nêl xolac nivihya lec Anutu ben kisiinê la vac vigwe vihati yang ên xomxo vihati i ngô. Pyap dêc buc myahipu obêc val timuên.”

Yesu nêl kiyang lec nipaên nôn wê ob val timuên ge
(Mak 13:14-23; Luk 21:20-24)

¹⁵Xam wê xam kitong kiyang tiga, xam xovô nivihia, ên Yesu nêl bêga ên nêbê, “Obêc buc timuên ge susu nipaên nôn wê ob vông vîgwe vô nipaên ge ob la le vac xumac ngibua. Ilage plopete Danyel nêl kitong lec susu nipaên tige. ¹⁶Om buc wê susu nipaên tige obêc val le seac ge od xomxo wê dô vac vîgwe Judia ge he i pec mi loc lec kitôn, ¹⁷di he wê dô lec xumac kisii ge he i o lêc lop mi lax kô he susu ti vac xumac nilô lêm. Nge, he i pec mi loc lutibed. ¹⁸Di he wê la vac yuac lôma ge he i o lôm kô vinyumên ti lêm. Nge, he i pec mi loc lutibed. ¹⁹Di xam xo vîgwe pisiv ên vêx wê nu dô vac xêyaa ge di vêx wê vông lul vô nue ge, ên vô buc tige he ob dô vac viyin levac mabu luu vêl. ²⁰Om xam kitaa vô Anutu bê xam ob pec mi la vô buc sabat yuu buc ningigooên lêm, ²¹ên vô buc tige viyin levac mabu ob val. Vô buc mugên ilage di i val gwêbaga hixôn, viyin tibêge o tulec xomxo lêm, di vô buc timuên ge viyin tibêge ob yêp i tii vac lêm. ²²Buc viyin tige obêc yêp dia ge od ob kitya xomxo vihati vêl. Lêc Anutu ob xo he wê vînoo he pyap ge, om ob kitov buc tige vô myabo.

²³“Vô buc tige xomxo ti obêc nêl vô xam bê, ‘Wê lê, Kilisi dô ga’ me obêc nêl bêga bê, ‘Kilisi dô ganê’, ge od xam o lêc vông i vin kiyang tige lêm. ²⁴Ên tibii kityooên ya ob val nêl bê he Kilisi me plopete, di he ob vông do levac toto ên nêb ob pilepac xomxo nilô i loc vô kiyang kityooên, di he nêb he ob kityoo xomxo wê Anutu vînoo pyap ge hixôn. ²⁵Xam ngô lê. Kiyang tige gên o vô nôn lec lêm, léc a nêl kitong vô xam tax.

²⁶“Om xomxo obêc nêl vô xam ên nêbê, ‘Wê lê, Kilisi dô vac vîgwe myadongên tiganê’, ge od xam o lêc loc vîgwe tiganê lêm. Di he obêc nêl vô xam ên nêbê, ‘Wê lê, Kilisi dô vac xumac nilô tiganê’, ge od xam o lêc vông i vin he kiyang lêm. ²⁷Ên a, Xomxo Nu, a obêc vena tiyi xocbê deac hixelac lutibed vac vîgwe vihati wê hiyôv tyip lam di hoo la ge, om xomxo vihati obêc yê di xovô.

²⁸“Susu yibên ti obêc yêp vac vîgwe ti ge od menac byang wê mi ya pitalên ge ob kituc la lec.

Yesu nêl kiyang lec buc wê i ob vena lec ge
(Mak 13:24-31; Luk 21:25-33)

²⁹“Viyin levac wê ob val timuên ge obêc tip la vêl. Nang dêc lutibed hiyôv yuu dentuc obêc vô mapitoc di linacên ob ma, di pitua lag puunê obêc tô sea mi lam, di susu xêkizêc lag puunê obêc vô yocycoc. ³⁰Mêd do levac wê hilung a Xomxo Nu ge obêc val yêp seac vac lag. Om xomxo vihati gê kibun ga, he ob yê di nilô ob vô viyin di he ob byag. Nang dêc he obêc yê a, Xomxo Nu, a dô vac viyobtoc mi lam gê kisii ganê di lam

hixôn xêkizêc yuu xêseac levac. ³¹Mêd vuac ob tyuc nididun levac, di a ob vông a nuge angela he i loc tiyi kibun myahipu vihati di loc vilu vô xomxo vihati wê Anutu vînoo he pyap ge.

³²“Xam xovô lec xax livêl. Ên livêl lihi obêc yal mima ge od xam xovô bê buc wê hiyôv ob linac ge. ³³Mêgem buc timuên wê susu tige vihati wê a nêl vô xam ga obêc val vô xam ge od xam obêc wê di xovô bê buc wê a ob vena lec ge vô kwabo lec. ³⁴A nêl vixôhilôg nôn vô xam bê xomxo wê dô gwêbaga ge, he ob yib lêm di kiyang wê a nêl vô xam ga vihati obêc vô nôn lec pyap lê. ³⁵Lag yuu kibun xôa obêc ma, di kiyang wê a vông ge, bo ti xôa obêc ma lêm. Nge, vihati obêc yêp.

Xomxo ti o xovô buc wê Yesu ob vena lec ge lêm

(Mak 13:32-37; Luk 17:26-30,34-36)

³⁶“Buc wê a ob vena lec ge, xomxo ti o xovô buc yuu hiyôv manôn tige lêm, di angela lag puunê lungên buc tige, di a, Xomxo Nu, a êno lungên. Dom Mag vaci tibed wê xovô buc tige. ³⁷Môp wê xomxo vông vô Nôa buc ilage, xomxo ob vông môp tibêge di i loc vô buc wê a, Xomxo Nu, ob vena lec ge. ³⁸Vô buc ilage wê mia gên o hivun kibun xôn lêm ge, xomxo dô mi ya di num di iima, di i la tyip lec buc wê Nôa la dô vac sip nilô ge, ³⁹lêc he lungên wê mia ob hivun kibun xôn ge, di lutibed mia butac di hivun he vihati yib mima vêl. Om buc wê a, Xomxo Nu, ob vena lec ge ob tiyi lec bêge. ⁴⁰Vô buc tige xomxo yuu ob la vac yuac yaên di Anutu ob kô ngwe di sea ngwe dô xel. ⁴¹Di vêx yuu ob divông yebac, lêc Anutu ob kô ngwe di sea ngwe dô xel. ⁴²Mêgem xam dô di viac xam, ên xam o xovô buc wê xam Apumtau ob vena lec ge lêm. ⁴³Xam xovô bê xomxo ti wê i xumac ge obêc xovô hiyôv manôn wê tibii yôdac ob val vô bucên ge od xomxo tyo ob dô bin ben ên nêb tibii yôdac i o dii xumac di vun i susu lêm. ⁴⁴Om xam êno, xam viac xam, ên a, Xomxo Nu, a obêc vena lec buc wê xam xo ên xam nêbê a vena lecên ob ma ge.

Yesu nêl kiyang pilepacên lec xomxo yuac nivîha yuu nîpacên

(Luk 12:42-46)

⁴⁵“Xomxo yuac letya dô wê viac i yuac nivîha hixôn piyôp nivîha ge? Xomxo levac wê viac nu yuac tige vînoo i ên nêb i viac lie yuac vihati di vông yaên vô he tiyi buc vihati. ⁴⁶Om xomxo levac tyo obêc vena lêc yê wê nu yuac tige viac yuac nivîha ge od ob vông xêyaa nivîha vô nu yuac tyo. ⁴⁷A nêl vixôhilôg vô xam bê xomxo levac tyo ob vông susu vihati wê i vông ge vac nu yuac tige vigê ên nêb i viac. ⁴⁸Lêc xomxo levac obêc la di nu yuac tyo obêc xo bêga nêbê, ‘Xomxo levac tyo ob vena lutibed lêm.’ ⁴⁹Nêl bêge om hi lie yuac, di ya di num hixôn tibii wê num mi vô mavmav ge. ⁵⁰Obêc vông bêge ge od xomxo levac ob vena lec buc hixôn hiyôv manôn ti wê nu yuac tige xo ên nêb ob vena lec lêm ge. ⁵¹Om

xomxo levac obêc hi i vô nipaên di vông i la dô vac vîgwe nipaên hixôn xomxo kityooên. Vac vîgwe tige xomxo obêc byag di kic nivu lecma.”

Kiyang pilepacên lec vêxwo vîgê yuu

25 ¹Yesu nêl vô nue ngivihî ên nêbê, “Buc wê a ob vena lec ge od xomxo wê nêb ob la vac Anutu ben kisii ganê ge he ob tiyi xocbê vêxwo vîgê yuu wê kô he lam mi la le vac môp ên nêb ob bin xomxo levac ti wê ob val ge. ²Vêxwo vîgê vilu wê piyôp maên, di he vîgê vilu wê piyôp nivihî. ³Om vêxwo vîgê vilu wê piyôp maên ge kô he lam, lêc he o kô wel hixôn lêm. ⁴Di vêx vîgê vilu wê piyôp nivihî ge kô he lam di kô wel hixôn vac butol titi. ⁵He vihati dô bin xomxo levac tyo, lêc valên ma, mêd he manôn yêp om he yêp.

⁶“Mêdêc vô vivuaên mahigun xomxo ti tyuc vya levac ên nêbê, ‘Xomxo levac tyo val. Om xam loc tulec xomxo tyo vac môp ên kô i mi lam.’ ⁷Mêdêc vêx vihati kidi lec di viac he lam, ⁸di he wê piyôp nivihî ge too wel vac he lam, di he wê piyôp maên ge nêl vô he wê piyôp nivihî ge ên nêbê, ‘Xam vông xe nêl wel ya ên xe too vac xe lam.’ ⁹Lêc he wê piyôp nivihî ge nêl i lax vô he ên nêbê, ‘Ma. Wel ga o tiyi il xôn vihati lêm. Om xam loc kisuu nêl.’ ¹⁰Mêdêc he wê piyôp maên ge loc mi la myag wel ên nêb ob kisuu nêl. Mêd xomxo levac tyo val, om vêx wê viac he pyap ge la hixôn i mi he la vac xumac nilô di la ya vizid levac, di vuayen tung lec.

¹¹“Lêc vêxwo vîgê vilu wê piyôp maên ge vena timuên di vena tyuc ên nêbê, ‘Xomxo levac, xomxo levac, ông tax vuayen ên xe.’ ¹²Lêc xomxo levac tige nêl i lax vô he ên nêbê, ‘A nêl nôn vô xam bêa lungên xam.’ ” ¹³Yesu nêl kiyang pilepacên tige pyap dêc nêl vô nue ngivihî ên nêbê, “Om xam dô di viac xam, ên xam o xovô buc yuu hiyôv manôn wê a obêc vena lec ge lêm.

Yesu nêl kiyang pilepacên lec xomxo yuac wê kô mone ge

(Luk 19:11-27)

¹⁴“Om buc wê a ob vena lec ge tiyi xocbê xomxo levac ti wê nêb ob la vîgwe tevabanê ge. Om nêl nue yuac lam vô i di vông susu vihati wê i vông ge la vac he vîgê ên nêb he i viac. ¹⁵Xomxo levac tyo xovô yuac yuu xovôên wê nue yuac toto vông ge, om titang mone vô he tiyi bêge. Om vông K5,000 vô nu yuac ti, di vông K2,000 vô ngwe di vông K1,000 vô ti ên nêb yon i vông yuac lec mone tige. Pyap dêc loc mi la. ¹⁶Mêdêc nu yuac ti wê kô K5,000 ge la vông yuac lec mone tige, om kô K5,000 lôm kituc lec. ¹⁷Di nu yuac ti wê kô K2,000 ge la vông yuac lec mone tige, om kô K2,000 lôm kituc lec. ¹⁸Di ti wê kô K1,000 ge la yev lôva mi lii mone la yêp vac di hivun xôn.

¹⁹“Mêd buc dia lam la vêl, di xomxo levac vena di tyuc nue yuac lam vô i ên nêb ob ngô kiyang lec yuac wê yon vông lec mone wê i vông

vô yon ge. ²⁰Mêd nu yuac ti wê kô K5,000 ge kô mone vihati mi lam le vô xomxo levac tyo manôn di nêl vô i ên nêbê, ‘Xomxo levac, ông vông K5,000 vô a, di a vông yuac lec, om a kô K5,000 hixôn.’ ²¹Mêd xomxo levac tige nêl vô i ên nêbê, ‘Ông xomxo yuac nivihã, ên ông vô ninyamlehe vô a di vông yuac nivihã. Ông viac susu wê nipwo ge nivihã om a ob vông susu tibeac vac ông vigêm ên ông viac. Om ông xêmyaa i nivihã di ông lam dô hixôn a.’

²²“Nang dêc nu yuac ti wê kô K2,000 ge lam le vô xomxo levac tyo manôn di nêl vô i ên nêbê, ‘Xomxo levac, ông vông K2,000 vô a, di a vông yuac lec, om a kô K2,000 hixôn.’ ²³Om xomxo levac tige nêl vô i ên nêbê, ‘Ông xomxo yuac nivihã, ên ông vô ninyamlehe vô a di vông yuac nivihã. Ông viac susu wê nipwo ge nivihã, om a ob vông susu tibeac vac ông vigêm ên ông viac. Om ông xêmyaa i nivihã di ông lam dô hixôn a.’

²⁴“Mêdêc nu yuac ti wê kô K1,000 ge lam le vô xomxo levac tyo manôn di nêl vô i ên nêbê, ‘Xomxo levac, a xovô ên a nêbê ông xomxo wê ông mi keac myam pilihi. Di yuac wê xomxo ti yev vê vac ge, ông la kô nôn vac, di xomxo wê vông yuac ge od ông la kô nôn vac di kô ya sola hixôn. ²⁵Om a xona ên ông di a kô K1,000 wê ông vông vô a ge mi la yev lôva mi lii vac di hivun xôn. Om ông hôm ông mone.’

²⁶“Lêc xomxo levac tige nêl lax vô i ên nêbê, ‘Ông xomxo yuac nipaên wê ông vô nim maên. Ông nêl ên ông nêbê a la kô nôn vac yuac wê xomxo yev vê vac ge, di xomxo wê vông yuac ge od a la kô nôn vac di kô ya sola hixôn. ²⁷Ông nêl bêge, lêc bêna lêc ông o kô mone a vông mi la lii vac xumac beng lêmê? Ên ông obêc vông bêge ge od buc wê a ob vena lec ge od a ob kô K1,000 wê a vông vô ông ge di kô ya wê solaên ge hixôn.’ ²⁸Xomxo levac tyo nêl bêge, nang dêc nêl vô nue yuac ya bêga nêbê, ‘Xam vô K1,000 vêl ên xomxo yuac tige di vông vô a nug yuac ngwe wê kô K5,000 pyap ge ên i kituc lec. ²⁹Ên xomxo ti xovôên nivihã obêc dô vô i ge od a obêc vông mangwe hixôn. Di xomxo ti xovôên nivihã obêc ma ge od a obêc vô xovôên wê i vông ge vêl ên i. ³⁰Om xam hôm xomxo yuac nipaên tige xôn di nêx i loc vac vigwe mapitoc. Vac vigwe tige xomxo obêc byag di kic nivu lecma.’

Yesu nêl kiyang lec buc wê ob yaxên xomxo vihati lec ge

³¹“Obêc buc timuên ge Xomxo Nu ob lop mi lôm hixôn xêseac wê i vông ge di angela vihati ob lam hixôn i, di ob dô lec sia king di yaxên xomxo nên kiyang. ³²Vô buc tige xomxo vihati yang ob kituc lam le vô i manôn, di i ob vông he le kidu yuu tiji xocbê xomxo wê viac bwoc sipsip yuu memek ge od vînoo bwoc sipsip le kidu ngwe di memek le kidu ngwe. ³³Om ob vông bwoc sipsip le vô vigê hiyôv di ob vông memek le vô vigê kêd. ³⁴Mêd xomxo levac tige ob nêl vô he wê dô vô vigê hiyôv ge bêga nêbê, ‘Mag Anutu vông vizid nivihã vô xam, om xam lam dô vac

vigwe niviha wê Anutu nêl xam lêm lec ge. Vô buc mugên ilage wê Anutu tung lag yuu kibun taxlee ge, od viac vigwe tige pyap ên nêb ob vông vô xam. ³⁵Ên ilage vip den a om xam vông yaên mi a xa, di a nêb a ob num mia om xam vông mia ningigooên vô a mi a num, di a lam xocbê xomxo vitevac ge vô xam lêc xam viac a niviha, ³⁶di ngakwi ma ên a, om xam vông a nêg ngakwi, di yidac vông a om xam vev ngwax vô a niviha, di a la dô vac xumac kalabuhu di xam lam wê a.'

³⁷"Om xomxo niviha ob nêl lax vô ên nêbê, 'Apumtau, vô buc tina wê vip den ông om xe vông yaên mi ông wa? Di vô buc tina wê ông nêb ông ob num mia om xe vông mia mi ông numê? ³⁸Di vô buc tina wê ông lam xocbê xomxo vitevac ge vô xe om xe viac ông niviha? Di vô buc tina wê ngakwi ma ên ông om xe vông ông nêb ngakwi? ³⁹Di vô buc tina wê yidac vông ông mi xe vev ngwax vô ông di viac ông niviha ge, di vô buc tina wê ông la dô vac xumac kalabuhu om xe loc xê ôngê?'

⁴⁰"Mêdêc xomxo levac tige ob nêl vô he bêga ên nêbê, 'A nêl vixôhilôg nôb vô xam bê xam ngidu a lige wê lê nipwo ge xôn ya susu tibêgee, om tiyi xocbê xam ngidu a xôn.'

⁴¹"Pyap dêc obêc nêl vô he wê dô vô vigê kêd gee bêga nêbê, 'Xam gee wê xam ob kô myaviwen nipaên. Xam pec vêl ên a magnôn mi loc vac ngwax wê yibên obêc ma ge. Anutu viac ngwax tige pyap vô Seten he nue yuac. ⁴²Ên ilage vip den a lêc xam o vông yaên mi a xa lêm, di a nêb a ob num mia lêc xam o vông mia mi a num lêm, ⁴³di a lam xocbê xomxo vitevac ge vô xam lêc xam o viac a niviha lêm, di ngakwi ma ên a lêc xam o vông ngakwi vô a lêm, di yidac vông a, di a la dô vac xumac kalabuhu lêc xam o lam wê a lêm.'

⁴⁴"Mêd xomxo nipaên ob kinêg vô i ên nêbê, 'Apumtau, vô buc tina wê vip den ông, di ông nêb ông ob num mia, di ông lam xocbê xomxo vitevac ge, di ngakwi ma ên ông, di yidac vông ông, di ông la dô vac xumac kalabuhu, lêc xe o ngidu ông xôn lêmê?'

⁴⁵"Om xomxo levac tyo obêc nêl i lax vô he bêga ên nêbê, 'A nêl vixôhilôg nôb vô xam bê xam o ngidu xomxo wê lê nipwo ge xôn ya susu tibêgee lêm, om tiyi xocbê xam o ngidu a xôn lêm.' ⁴⁶Xomxo levac obêc nêl bêge, di he wê nipaên ge obêc la yaxên myavinê levac luta lêc luta. Lêc xomxo wê niviha ge obêc la dô maviha luta lêc luta."

He Yuda levac hilu kiyang ên nêb ob hi Yesu i yib

(Mak 14:1-2; Luk 22:1-2; Jon 11:45-53)

26 ¹Yesu nêl kiyang tige vîhati pyap dêc nêl vô nue ngivihî ên nêbê, ²"Xam xovô bê buc yuu ob lam la vêl, nang dêc obêc buc Pasova, di xomxo obêc vông Xomxo Nu la vac tibii vigê ên he i hi i yib lec xax pola."

³Mêdêc xomxo levac wê mi si daa gee hixôn he Yuda levac levac gee la kitucma vac Kaiapas ben. Kaiapas ge xomxo daa siên nêb levac. ⁴He keac

vôma di myag môp wê nêb ob hôm Yesu xôn xôpacên di hi i yib ge. ⁵Lêc he nêl vôma ên nêbê, “Il ob hôm Yesu xôn lec buc ngîbua wê il mi xovô buc Isip ilage lêm, ên xomxo tibeac lam dô hixôn om obêc yê wê il hôm Yesu xôn ge od ob yê nipaên di nididun levac obêc tyip.”

Vêx ti too mia nivêva nivîha lec Yesu bazub

(Mak 14:3-9; Jon 12:1-8)

⁶Yesu la vigwe Betani di la dô vac Saimon ben. Saimon ge xomxo ti wê kityax mahizihizi ya ninivi ilage lêc gwêbaga vô nivîha lec. ⁷Yesu dô mi ya hixôn i di vêx ti kô butol nivîha wê mia nivêva nivîha le vac ge ti mi lam vô i. Mia tige mone levac, lêc vêx tige too lec Yesu bazub. ⁸Lêc Yesu nue ngîvihi yê di xêyaa vô nipaên di nêl vôma ên nêbê, “Bêna lêc vêx tige too mia tige sea? ⁹Mia tige tiyi wê il ob vông mi tibii i kisuu lec mone levac di il ob vông mone vô he wê nêl susu maên ge lê, lêc vêx tige too sea.”

¹⁰Yesu xovô kiyang wê he nêl vôma ge, om nêl vô he ên nêbê, “Bêna lêc xam vông viyin vô vêx tige? Môp wê vêx vông vô a ge nivîha. ¹¹Ên xomxo wê nêl susu maên ge ob dô hixôn xam luta. Lêc a ga, a ob dô xuhu dia hixôn xam lêm. ¹²Vêx tige too mia nivêva lec a ên nêb ob viac a nignivi tax ên xomxo obêc yev a vac lôva. ¹³A nêl hixôn nôl vô xam bêga bê vac vigwe vihati wê xomxo obêc la nêl xolac tiga vac ge od xomxo ob nêl môp wê vêx tige vông ge kitong hixôn ên xomxo vihati i ngô di xovô.”

Judas nêb ob vông Yesu vac xomxo levac vigê

(Mak 14:10-11; Luk 22:3-6)

¹⁴Yesu nue ngîvihi wê vigê yuu di tô mi la yuu ge ti lê nêbê Judas Iskaliot la vô xomxo levac wê mi si daa gee, ¹⁵di kinêg ên nêbê, “A obêc vông Yesu vac xam vigêm ge od xam ob vông vatya vô a?” Om he vông mone silva kehe ti di vigê yuu vô i. ¹⁶Om vô buc tige Judas myag môp wê ob vông Yesu vac he vigê ge.

Yesu he nue ngîvihi ya yaên vô buc Pasova

(Mak 14:12-21; Luk 22:7-14,21-23; Jon 13:21-30)

¹⁷Buc tige buc ngîbua wê he Yuda ob ya blet wê yis maên ge ên nêb ob xovô buc Isip ilage. Om vô buc ngîbua taxlee ge Yesu nue ngîvihi val kinêg vô i ên nêbê, “Ông nêb xe la viac yaên wê il ob xa lec buc Pasova ge vac xumac tina?” ¹⁸Lêc Yesu nêl vô he ên nêbê, “Xam loc vac vigwe Jelusalem di loc nêl vô xomxo tige bêga bê, ‘Xolac kehe nêl bêga ên nêbê, A nêg buc vô kwabo lec, om a hixôn nuge ngîvihi, xe ob xa yaên vac ông bom vô buc Pasova wê il mi xovô buc Isip ilage.’” ¹⁹Yesu nêl bêge, om nue ngîvihi la vông i tiyi wê i nêl ge di la viac yaên wê he ob ya ge.

²⁰Mêdêc hiyôv hoo la, di Yesu he nue ngivihi vigê yuu di tô mi la yuu, he dô mi ya, ²¹mêdêc Yesu nêl vô he ên nêbê, “A nêl vixôhilôg nô n bêga bê xam ti ob nêl a kitong di vông a la vac tibii vigê.” ²²Om he nilô vô viyin di he toto kinêg vô Yesu ên nêbê, “Apumtau, obêc a, me?” ²³Lêc Yesu nêl lax vô he ên nêbê, “Xomxo ti wê xii xôn vigêm obêc la vac dipac nilô ge wê ob nêl a kitong di vông a vac tibii vigê. ²⁴Vixôhilôg, a Xomxo Nu, a ob xib tiyi xocbê xolac nêl lec a ilage. Lêc xomxo ti wê ob nêl a kitong di vông a la vac tibii vigê ge obêc kô myaviwen nipaên lec. Ta obêc kô i ilage lêm ge od obêc vô nivihã vô i, ên obêc tulec myaviwen nipaên lêm!” ²⁵Mêdêc Judas wê ob nêl i kitong ge kinêg ên nêbê, “Xolac kehe, obêc a, me?” Om Yesu nêl lax vô i ên nêbê, “Ông nêl i tiyi.”

Yesu vông môp paha wê pasa ge vô nue ngivihi
(*Mak 14:22-26; Luk 22:15-20; 1 Kolin 11:23-25*)

²⁶Yesu he nue ngivihi dô mi ya, mêdêc Yesu hêm blet ti di kitaa lec, mêdêc hibu di vông vô he di nêl ên nêbê, “Xam hêm mi wa. Ga a nignivi.” ²⁷Nang dêc hêm kap wê mia wain le vac ge, di kitaa lec, di vông vô he di nêl ên nêbê, “Xam vihati hêm mi num, ²⁸ên ga a hi wê ob vông kiyang wê Anutu hilu ilage vô nô n lec. Om a obêc kipyax a hi sea ên i kitya xomxo tibeac nê nipaên vêl. ²⁹A nêl vô xam bêga bê a obêc num mia wain ti i tii vac lêm di i la tyip vô buc wê a ob num wain paha hixôn xam vac Mag Anutu ben ge.”

³⁰Pyap dêc he vông lilo ti di la vixun di la lec kitôn Oliv.

Yesu nêl ên nêbê Pita ob yax i vun
(*Mak 14:27-31; Luk 22:31-34; Jon 13:36-38*)

³¹Mêdêc Yesu nêl vô nue ngivihi ên nêbê, “Vô bucên tiga xam vihati ob pec ên viyin wê ob val tulec a ge. Ên kiyang yêp vac xolac bêga nêbê, ‘A ob hi xomxo ti wê viac bwoc sipsip ge om sipsip obêc pec di moo sea.’ ³²Xolac nêl bêge, lêc a nêl vô xam bêga bê a obêc kidi lec magviha di mug la Galili di xam obêc timu.” ³³Om Pita nêl vô Yesu ên nêbê, “He vihati obêc sea ông ge od he ob sea, lêc a mô ti, a ob sea ông lêm.” ³⁴Lêc Yesu nêl vô i ên nêbê, “A nêl vixôhilôg nô n vô ông bê vô bucên tiga ông obêc yax a vun lu yon tax di kokilêx obêc divô vya timuên.” ³⁵Lêc Pita nêl vô i ên nêbê, “Tibii obêc hi a xib hixôn ông ge od pyap, lêc a ob yax ông vun lêm.” Di nue ngivihi vihati nêl tiyi xocbê Pita nêl ge.

Yesu la kitaa gê Getsemani
(*Mak 14:32-42; Luk 22:39-46*)

³⁶Yesu he nue ngivihi loc mi la vigwe ti lê nêbê Getsemani, di Yesu nêl vô nue ngivihi ên nêbê, “Xam dô ga ên a ob la ganê ên la kitaa.” ³⁷Mêd Yesu kô Pita hixôn Sebedi nu yuu mi he la, lêc Yesu nilô vô viyin mabu

ên xovô viyin levac wê ob tulec i ge. ³⁸Om nêl vô yon ên nêbê, “A nilôg vô viyin levac tiyi xocbê a ob xib ge. Om mon dô ga di dô mamviha hixôn a.” ³⁹Mêd Yesu la teva tya, di la kipôm manôn vac kibun di kitaa ên nêbê, “Mag, obêc tiyi ge od viyin levac tige i o lêc tulec a lêm. Lêc a nêb ông o lêc vông i tiyi kiyang wê a nêl ga lêm. Nge, ông vông i tiyi xovôên wê ông vông ge.”

⁴⁰Pyap dêc Yesu milax vô nue ngivihi yon di yê wê yon yêp ge, om nêl vô Pita ên nêbê, “Bêna lêc mon wêpê? Mon o tiyi

wê mon ob dô mamviha hixôn a buc myabo tya ge lêmê? ⁴¹Mon dô mamviha di kitaa êdêc viyin ti i o lêc yaxên mon di pwoo mon pec lêm. Ên nilôm nêb ob vông yuac lê, lêc nimmivi vô viyin.”

⁴²Nang dêc Yesu la teva tya nang di la kitaa lu ngwe tii vac bêga ên nêbê, “Mag, ông obêc nêb viyin levac tiga i tulec a ge od pyap. A ob vông i tiyi xocbê ông nêl ge.” ⁴³Pyap dêc vena yê wê yon manôn yêp om yon yêp ge. ⁴⁴Om Yesu sea yon di lax mi la kitaa lu ti wê vông yon ge, di lax kitaa tiyi xocbê la kitaa taxlee ge.

⁴⁵Pyap dêc Yesu vena vô yon di nêl vô yon ên nêbê, “Bêna lec mon diwêp seac vêlê? Mon wê lê, hiyôv manôn ga wê xomxo ob vông a, Xomxo Nu, vac tibii nipaên vigê. ⁴⁶Om mon kidi lec ên il ob la. Wê! Xomxo ti wê ob vông a la vac tibii vigê ge val le kwabo.”

Judas Iskaliot vông Yesu la vac Yuda levac vigê

(Mak 14:43-50; Luk 22:47-53; Jon 18:3-12)

⁴⁷Yesu gên nêl kiyang tibêge, di Judas Iskaliot wê Yesu nue ngivihi ti ge val. Di xomxo kidu levac wê hôm yipac yuu xax gee val hixôn, ên xomxo levac wê mi si daa gee hixôn he Yuda levac levac vông he lam hixôn Judas. ⁴⁸Om Judas wê nêb ob vông Yesu vac tibii vigê ge nêl kiyang vô he tax ên nêbê, “Xomxo ti wê a ob nga i lia ge, ge xomxo tyo tige mê. Om xam hôm i xôn.” ⁴⁹Nêl bêge, mêdêc lutibed val vô Yesu di nêl vô i ên nêbê, “Bucên xolac keheê” di nga i lia. ⁵⁰Mêd Yesu nêl vô i ên nêbê, “Lig, môt wê ông lam ên nêb ông ob vông ge, ông vông lutibed.” Mêd xomxo kidu levac lam hôm Yesu xôn pilihi.

⁵¹Lêc xomxo wê dô hixôn Yesu ge ti tul yipac vêl ên bwoc ninivi di sap xomxo levac wê mi si daa ge nue yuac ti ninya lihi vilu la vêl. ⁵²Lêc Yesu nêl vô i ên nêbê, “Hoo yipac i lôc vac bwoc ninivi. Ên he wê vông vevac mi hi xomxo ge, vevac obêc tulec he mi hi he yib. ⁵³Lêc mêd ông xo ên ông nêb a tiyiên ma wê a obêc kitaa vô Mag di i vông angela tibeac hiwocên luu xomxo vevac kidu levac vigê yuu di tô mi la yuu vêl ge lam lutibed vô a ên he i lam ngidu a xôn. ⁵⁴Lêc a obêc vông bêge ge od kiyang wê yêp vac xolac ge obêc vô nôn lec tibêna? Ên xolac nêl ên nêbê viyin levac obêc tulec a.”

⁵⁵Mêd Yesu nêl vô xomxo kidu levac tige bêga ên nêbê, “Xam kô yipac yuu xax di val vô a tiyi xocbê xam lam vô tibii yôdac ti. Lêc tiyi buc

vihati a mi dô hixôn xam vac Anutu xumac ngibua di a nêl xolac vô xam, lêc xam o hôm a xôn lêm. ⁵⁶Lêc môp wê xam vông vô a gwêbaga ge vông xolac wê plopete kivuu ilage vô nôn lec.” Yesu nêl kiyang tige pyap di nue ngivihî pec mi moo sea.

Yuda levac levac vông kot vô Yesu

(Mak 14:53-65; Luk 22:54-55,63-71; Jon 18:13-14,19-24)

⁵⁷Mêd he wê hôm Yesu xôn gee didii i mi la vac Kaiapas ben. Kaiapas ge xomxo daa siên nêl levac. Xomxo levac wê xovô Moses xolac ge hixôn he Yuda levac levac, he la kitucma mi dô tax. ⁵⁸Mêdêc Pita timu vô Yesu vixa mi la, lêc le la teva teva, om mila vac xenac nilô wê Kaiapas ben yêp vac ge mi la dô hixôn Kaiapas nue yuac wê viac vigwe ge ên nêb ob yê bê xomxo ob vông bêna vô Yesu.

⁵⁹Mêd xomxo levac wê mi si daa gee hixôn he kaunsil vihati, he myag tibii wê ob vô nilô vô Yesu ge, ên he nêb he ob hi i yib. ⁶⁰Mêd tibii tibeac val so kiyang lec Yesu, lêc he Yuda levac levac gee o tulec kiyang ti tiyi wê ob hi Yesu lec ge lêm. Nang dêc timuên ge xomxo yuu val ⁶¹nêl ên nêbê, “Xomxo tige nêl bêga nêbê, ‘A tiyi wê a ob dii Anutu xumac ngibua tiga vêl di lox vac i tiyi buc yon.’ ”

⁶²Om xomxo daa siên nêl levac tige kidi lec di nêl vô Yesu ên nêbê, “Ông ob nêl kiyang ti lax vô he, me? Ông xovô kiyang nipaên wê he nêl lec ông ge kehe, me?” ⁶³Lêc Yesu keacên ma. Mêdêc xomxo levac tige nêl vô i ên nêbê, “A nêl vô ông lec Anutu maviha lê bê ông nêl ông kitong vô xe bê ông Kilisi wê Anutu nu ge, me?”

⁶⁴Om Yesu nêl vô i ên nêbê, “Ông nêl i tiyi. Lêc a nêl vô xam bêga bê obêc buc timuên ge od xam ob wê a, Xomxo Nu, a obêc la dô vô Anutu xêkizêc kehe vigê hiyôv, di dô vac viyobtoc lag puunê di lam.”

⁶⁵Mêd xomxo daa siên nêl levac tige xêyaa vô myavinê, om lêx ici va ngakwi di nêl ên nêbê, “Xomxo tige so vya vô Anutu ên nêbê Anutu nu i. Om il ob nêl xomxo ya i lam nêl kiyang ti lec i i tii vac lêm. Ên ici va so vya vô Anutu mi xam ngô pyap. ⁶⁶Om xam nêb il ob vô bêna vô i?” Mêdêc he vihati nêl lax vô i ên nêbê, “Xomxo tige nêl nipaên tiyi wê il ob hi i yib lec ge.”

⁶⁷Mêd he pisuv myaluc la vac Yesu manôn, di he ya lun vigê di hi i, di ya pitap i manôn ya vigê, ⁶⁸di nêl vô i ên nêbê, “Ông nêl ên ông nêbê ông Kilisi, om nêl xomxo ti wê hi ông ge lê mi xe ngô.”

Pita yax Yesu vun

(Mak 14:66-72; Luk 22:56-62; Jon 18:15-18,25-27)

⁶⁹Pita dô vixun vac xenac nilô wê Kaiapas ben yêp vac ge, lêc dô kibun, mêd vêx yuac ti val nêl vô i ên nêbê, “Ông ga wê ông mi dô hixôn Yesu wê ben Galili ge ti mêê.” ⁷⁰Lêc Pita yax Yesu vun vô he vihati manôn di nêl ên nêbê, “A lungên kiyang wê ông nêl ge kehe.”

⁷¹Nang dêc Pita kidi mi la dô xenac kehe kwabo vô vuayen, di vêx yuac ngwe yê di nêl vô tibii wê dile kwabo ge ên nêbê, “Xomxo tige wê mi dô hixôn Yesu Nasalet.” ⁷²Lêc Pita yax Yesu vun tii vac nang ên nêbê, “A nêl vixôhilôg nô n bê a o xovô xomxo tige lêm.” ⁷³He dô mahigun dia tya di tibii ya val nêl vô Pita ên nêbê, “Vixôhilôg, xe xovô ên xe nêbê ông ge Yesu nue ngivihî ti, ên ông mi keac vac tibii Galili vya om nêl kitong ên nêbê ông ge ông xomxo Galili ti tiyi xocbê Yesu ge.” ⁷⁴Lêc Pita nêl ên nêbê, “A obêc nêl kiyang nô n lêm ge od Anutu i vông myaviwen nipaên vô a. Om a nêl vixôhilôg bê a o xovô xomxo tige lêm.” Pita nêl kiyang tige mi tiyô di kokilêx hi vya. ⁷⁵Mêd Pita xovô kiyang wê Yesu nêl vô i bêga nêbê, “Ông obêc yax a vun lu yon tax di kokilêx obêc hi vya timuên.” Pita xovô kiyang tige om lop mi la xenac kehe di la byag levac.

He kô Yesu mi la vô Pailat

(Mak 15:1; Luk 23:1-2; Jon 18:28-32)

27 ¹Vigwe vidii, di xomxo levac wê mi si daa gee hixôn he Yuda levac levac, he vihati kitucma di keac lec kiyang wê ob hi Yesu i yib lec ge. ²Om he ku Yesu xôn di kô mi la vông vac gavman levac Pailat vigê.

Judas Iskaliot yib

(Sinale 1:18-19)

³Judas Iskaliot wê vông Yesu vac tibii vigê ge yê wê he nêb he ob hi Yesu i yib ge. Om nilô vô viyin ên môt nipaên wê i vông ge, om kô mone silva kehe ti di vigê yuu mi la ên nêb ob tung i lax dô vô xomxo levac wê mi si daa gee hixôn he Yuda levac levac. ⁴Om la nêl vô he ên nêbê, “A nêg nipaên, ên a vông xomxo ti wê nipaên ti o yêp vô i lêm ge loc vac xam vigêm di xam ob hi i yib.” Lêc he nêl vô i ên nêbê, “Xe kiyang ti o yêp vô xe lêm. Nge, ge yêp vô ôcông va.” ⁵Mêd Judas nêx mone silva tige la lec kibun vac Anutu xumac ngibua nilô di lop mi la di la ku kwa di yib.

⁶Mêd xomxo levac wê mi si daa gee la hôm mone silva tige mi kô, di nêl voma ên nêbê, “Mone tiga wê hi xomxo yib ge, om o tiyi wê il ob tung hixôn mone daa ge lêm.” ⁷Om he keac voma di hilu kiyang ên nêb ob kô mone mi la kisuu kibun vô tibii wê pitii dêg ge ên nêb kibun tige i tu vigwe yibên wê he ob yev tibii vigwe teva vac ge. ⁸Mêgem he nêl kibun tige lê nêbê kibun wê xomxo hi kipyax lec ge, di lê tige yêp gwêbaga hixôn. ⁹Om kiyang wê plopete Jelemaia nêl ilage vô nô n lec. Jelemaia nêl bêga ên nêbê,

“He kô mone silva kehe ti di vigê yuu tige. He Islel nêl ên nêbê mone tige wê he kisuu xomxo ti ya. ¹⁰He kô mone tige mi la kisuu kibun vô tibii wê pitii dêg ge tiyi xocbê Apumtau nêl vô a ge.”

Pailat kinêg kiyang vô Yesu

(Mak 15:2-5; Luk 23:3-5; Jon 18:33-38)

¹¹He vông Yesu la le vô gavman levac Pailat manôn, di gavman levac tige kinêg vô i ên nêbê, “Ông ge king wê he Yuda vông ge, me?” Om Yesu lee yuu ên nêbê, “Ông nêl i tiyi.” ¹²Di xomxo levac wê mi si daa gee hixôn he Yuda levac levac vô nilô vô Yesu, lêc Yesu o nêl kiyang ti lax vô he lêm. ¹³Mêdêc Pailat nêl vô i ên nêbê, “Ông ngô kiyang tibeac wê he vô nilô vô ông ge, me?” ¹⁴Lêc Yesu o keac ti lec kiyang nipaên wê he nêl lec i ge lêm. Om gavman levac tige xo kiyang tibeac lec Yesu.

Yesu le vô Pailat manôn

(Mak 15:6-15; Luk 23:13-25; Jon 18:39–19:16)

¹⁵Tiyi klismas vihati vô buc ngibua wê he Yuda mi xovô buc Isip ilage, he Yuda mi nêl xomxo kalabuhu ti lê vô Pailat di Pailat piwelac i vêl di vông i la. ¹⁶Di vô buc tige xomxo nipaên ti lê nêbê Jisas Balabas dô vac xumac kalabuhu. Xomxo tibeac xovô i ên nêbê xomxo nipaên. ¹⁷Xomxo Yuda tibeac hiwocên kitucma vô Pailat, di Pailat kinêg ên nêbê, “Xam nêb a piwelac xomxo yuu ga ngwe na i loc vô xamê? Xam nêb a piwelac Balabas me a piwelac Yesu wê he mi nêl lê nêbê Kilisi ge?” ¹⁸Pailat xovô ên nêbê he Yuda levac yê Yesu nipaên, om vông i lam vac i vigê. ¹⁹Pailat dô lec sia wê mi dô lec di mi ngô xomxo kiyang ge, mêdêc vinê vông kiyang lam vô i bêga nêbê, “Ông o léc vông xomxo nivihã tige i vô nipaên lêm, ên gwêbaga a xê vivia bucên ti lec i om vông a nilôg vô viyin.”

²⁰Xomxo levac wê mi si daa gee hixôn he Yuda levac levac gee, he nêl kiyang la vac xomxo tibeac nilô di he hôm xôn nêbê he ob tyuc bê Pailat i piwelac Balabas vêl di hi Yesu i yib. ²¹Pailat kinêg vô he tii vac nang ên nêbê, “Xam nêb a piwelac xomxo yuu ga ngwe na vêl di vông i lôc vô xamê?” Lêc he nêl ên nêbê, “Balabas.” ²²Om Pailat kinêg vô he ên nêbê, “Om Yesu wê he mi nêl lê nêbê Kilisi ge, a ob vông bêna vô i?” Lêc he vihati nêl ên nêbê, “Tul i lec xax pola!” ²³Lêc Pailat kinêg ên nêbê, “Il ob hi i yib lec kehe tina?” Lêc he tyuc levac ên nêbê “Tul i lec xax pola!”

²⁴Pailat xovô wê he ngôên i kiyang obêc ma ge, di yaxên wê he obêc vông vevac vô i ge, om hôm mia di lipac vigê vac mia vô he vihati manôn, di nêl vô he ên nêbê, “Xomxo tiga hi obêc kipyax sea ge od myaviwen obêc yêp vô a lêm. Nge, obêc yêp vô xaxam va.” ²⁵Mêd he vihati nêl lax vô i ên nêbê, “Myaviwen tige i lam vô xe di i yêp vô xe nuge hixôn!” ²⁶Om Pailat piwelac Balabas vêl di vông i la, di nêl om he pisa Yesu ya yihi. Pyap dêc Pailat vông i la vac nue vevac vigê ên nêb he i tul i lec xax.

Tibii vevac so vya vô Yesu
(Mak 15:16-20; Jon 19:2-3)

²⁷Mêd gayman levac Pailat nue vevac kô Yesu mi la vac Pailat ben, di he keac lie vevac kidu levac lam. ²⁸Mêd he lam kwax Yesu ngakwi vêl ên i, di kô ngakwi hi ti tiyi xocbê king mi vinyum ge mi la vinyum lec Yesu, ²⁹di he buu kipomac yin mi tung lec i bazub xocbê kilung ge, di vông duvac ti vac i vigê hiyôv ên nêb i kô. Mêd he yev vixa kitu vô di pimil i pisiv di nêl vô iên nêbê, “O king wê Yuda vông ge, ông dô nimviha.” ³⁰Mêd he pisuv myaluc lec i, di vô duvac vêl di hi i bazub ya. ³¹He so vya vô i pyap, di kwax ngakwi hi vêl di vinyum Yesu vaci ngakwi lec i, mêdêc kô i mi la ên nêb ob la tul i lec xax.

He tul Yesu la yux lec xax
(Mak 15:21-32; Luk 23:26-43; Jon 19:17-27)

³²Di he mila môp ti, lêc mila tulec tibii Sailini ti lê nêbê Saimon, mêdêc he kidu i nêb i kilê xax pola wê he ob hi Yesu lec ge.

³³Mêd he mila vigwe ti lê nêbê Golgota. Lê tige kehe bêga nêbê bazub len. ³⁴Mêdêc he pilepac kining kilin hixôn wain di vông vô Yesu ên nêb i num, om Yesu tep mi yaxên lê, lêc nêbê i numên ob ma. ³⁵Mêd he tul i lec pola. Pyap dêc he nêb he ob titang Yesu ngakwi vôma, om he tide mi yê di titang i tiyi. ³⁶Di he dô kibun di dô bin i. ³⁷Di he kivuu kiyang wê he nêl lec i ge di la tul vô i bazub kisii ên nêbê, “XOMXO TIGA YESU, KING WÊ HE YUDA VÔNG GE.”

³⁸Mêd he hi tibii yôdac yuu lec xax hixôn, ngwe le vô vigê hiyôv di ngwe le vô vigê kêd. ³⁹Mêd xomxo wê vilee mi la di lôm ge tipi niba di so vya vô Yesu ⁴⁰ên nêbê, “Ông wê ông nêb ông ob dii Anutu xumac ngibua vêl di lox vac i tiyi buc yon ge, ông ngidu ôcông va xôn. Ông obêc Anutu nu ge od ông lop mi lam vêl ên xax.” ⁴¹Mêd xomxo levac wê mi si daa gee hixôn he wê xovô Moses xolac gee di he Yuda levac levac, he êno so vya vô Yesu di nêl vôma ên nêbê, ⁴²“Xomxo tige ngidu xomxo tibeac xôn, lêc o tiyi wê ob ngidu ici va xôn ge lêm. Xomxo tige obêc Islel nêb king ge od i lop vêl ên xax ên il xê di vông i vin i. ⁴³Xomxo tige nêbê i Anutu nu, di i vông i vin ên nêbê Anutu ob ngidu i xôn. Om Anutu xêyaa obêc vin lec i ge od i vô i vêl ên myavinê wê tulec i ge.” ⁴⁴He nêl bêge, di tibii yôdac yuu wê he tul lec xax hixôn Yesu ge, yuu so vya vô Yesu hixôn.

Yesu yib
(Mak 15:33-41; Luk 23:44-49; Jon 19:28-30)

⁴⁵Hiyôv tyip kitôn mêd vigwe vihati vô mapitoc di i mila vô hiyôv manôn yon wê hucên ge. ⁴⁶Vô kwabo lec hiyôv manôn yon, Yesu tyuc vya levac ên nêbê, “Eli, eli, lama sabaktani?” Kiyang tige kehe bêga nêbê,

“A Anutu, a Anutu, bêna léc ông sea a?” ⁴⁷Mêdêc xomxo wê le kwabo vô Yesu ge ngô kiyang wê i nêl ge, om he ya so ên he nêbê, “Xomxo tige kiyag vya lec Ilaija.” ⁴⁸Mêd lutibed he ti tup mi la kô mia myamilumac di too mia kilin vac di kilax vac ngising di hôm i la kisii vô Yesu mya ên nêb i num. ⁴⁹Lêc he ya nêl vô i ên nêbê, “Dô tya lê, ên il ob dô mi yaxên bê Ilaija ob val ngidu i xôn, me?” ⁵⁰Lêc Yesu tyuc vya levac tii vac di vông myakilôhò la di yib.

⁵¹Mêd lutibed nivimihi levac ti wê yux vac Anutu xumac ngibua ge lêx la yuu vac kisii di la tô vô myahipu, di ngiyêg yoc, di ngidax levac hibua sea, ⁵²di lôva mya tax, di xomxo vông vinên wê yib ilage, he tibeac kidi lec hixôn ninivi ⁵³di lam vac lôva mi la, di buc timuên wê Yesu kidi lec ge he la hilung he vô xomxo tibeac vac vigwe ngibua Jelusalem.

⁵⁴Yesu yib, di tibii levac wê viac nue vevac 100 ge ti hixôn nue vevac ya dô bin Yesu wê yux lec xax ge, di he yê wê ngiyêg vông kibun yoc di tixuu tixuu mangwe val hixôn, om he xona mabu di nêl ên nêbê, “Vixôhilôg nôh, xomxo tige Anutu nu.”

⁵⁵Vêx tibeac le teva di yê ma la Yesu. Vô buc wê Yesu dô Galili ge vêx tige mi timu vô i vixa di viac i mi he la Jelusalem. ⁵⁶He ti Malia wê ben Makdala ge, di ngwe Jems yuu Josep ta Malia, di ti Sebedi nu yuu ta.

Josep lii Yesu ninivi vac lôva wê he kiden vac ngidax ge
(*Mak 15:42-47; Luk 23:50-55; Jon 19:38-42*)

⁵⁷Vigwe huc, di xomxo Alimatia ti lê nêbê Josep wê vông i vin Yesu ge val. Josep ge xomxo wê i susu tibeac ge. ⁵⁸Josep la vô Pailat di la kitaa Yesu ninivi nêb ob kô mi la lii vac lôva. Om Pailat tyuc lec di he vông Yesu ninivi vô Josep. ⁵⁹Mêd Josep kô Yesu ninivi mi la lii vac nivimihi kwem paha yang ti ⁶⁰mi la lii i la vac lôva paha wê i vông wê ici va kiden vac ngidax ge. Pyap dêc vixog ngidax levac ti la le vac lôva mya xôn, di i loc mi la. ⁶¹Malia Makdala yuu Malia ngwe, yuu dô kwabo vô lôva di yuu yê.

Tibii vevac viac lôva

⁶²Buc wê he Yuda mi viac yaên wê he ob ya lec buc sabat ge lam la vêl, di titige xomxo levac wê me si daa gee hixôn he Palisi, he la kitucma vô Pailat, ⁶³di nêl vô i ên nêbê, “Xomxo levac, xe xovô kiyang wê xomxo kityooên tige nêl vô buc wê gên dô maviha ge. Xomxo tyo nêl bêga ên nêbê, ‘Buc yon obêc lam la vêl lê, léc a obêc kidi lec magviha.’ ⁶⁴Nêl bêge, om ông nêl ên nume vevac he i viac lôva xêkizêc ta i tiyi buc yon, ên Yesu nue ngiyihi ob lam kô ninivi mi la vun di kityoo il ên nêbê Yesu kidi lec maviha vac yibên. He obêc vông bêge ge od kiyang kityooên wê he ob nêl ge obêc luu kiyang kityooên wê Yesu nêl ge vêl.” ⁶⁵Mêdêc Pailat nêl vô he ên nêbê, “Xam kô nume yuac mi loc pitii ngidax mya xôn

ên i vô xêkizêc i tiyi xocbê xacxam va xovô ge.”⁶⁶ Om he mîla pitii lôva mya xôn di vông vîbuên xêkizêc ta di xomxo le bin.

Yesu kidi lec vac yibên

(Mak 16:1-10; Luk 24:1-10; Jon 20:1-18)

28 ¹Buc sabat lam la vêl di da pitoc yang, dêc Malia Makdala yuu Malia ngwe, yuu la ên nêb ob la yê lôva. ²Mêdêc lutibed ngiyêg mabu yoc, ên Apumtau nu angela ti lop mi lam gê lag puunê di lam vixog ngidax la vêl ên lôva mya, di la dô lec ngidax tige kisii. ³Angela tige manôn xêseac tiyi xocbê deac hixelac ge, di ngakwi tiyi xocbê viyobtoc kwem. ⁴Om xomxo wê viac lôva gee yê di xona mabu di yetac di tilii sea mi la yêp kibun tiyi xocbê xomxo yibên.

⁵Lêc angela tige nêl vô vêx yuu ên nêbê, “Muu xona ên i ma, ên a xovô wê muu myag Yesu wê he hi lec xax ge. ⁶Lêc o dô ga lêm, ên kidi lec maviha tiyi xocbê kiyang wê i nêl ge. Muu lam wê vigwe wê yêp lec ge. ⁷Om muu lôc lutibed di lôc nêl kitong vô nue ngivihi bêga bê Yesu kidi lec maviha vac yibên, di ob mug mi la Galili di xam ob mîla wê i gê tiganê. Kiyang ga a nêl vô muu pyap.”

⁸Yuu xona mabu, lêc yuu xêyaa vô nivîha, di yuu sea lôva lutibed di tup mi la ên nêb ob la nêl kiyang tige kitong vô Yesu nue ngivihi. ⁹Yuu lax mi la, lêc Yesu mîla vô yuu vac môp di nêl vidiiên vô yuu. Om yuu val le kwabo vô Yesu di vyax vigê lec Yesu vixa di pimil i. ¹⁰Mêdêc Yesu nêl vô yuu ên nêbê, “Muu xona ên i ma. Muu loc nêl kiyang vô a lige bê he i loc Galili, ên he obêc yê a gê ganê.”

Tibii vevac wê le bia ge nêl kiyang kityooên

¹¹Om vêx yuu ge gên loc môp, lêc tibii vevac wê viac lôva gee ya la Jelusalem di la nêl kiyang tige vihati kitong vô xomxo levac wê mi si daa gee. ¹²Om xomxo levac tige la kitucma hixôn he Yuda levac, di he keac lec kiyang tige. Om vông mone levac vô tibii vevac wê viac lôva ge, ¹³di nêl vô he ên nêbê, “Xam loc nêl vô xomxo bê, ‘Vô bucên xe xêp di Yesu nue ngivihi lam kô ninivi mi la vun.’ ¹⁴Xam loc nêl bêge, lêc gavman levac obêc ngô kiyang tige di kunac xam ge od xe ob vông i ma i tô ya kiyang malehe mangwe di ob kunac xam lêm.” ¹⁵Om tibii vevac tige kô mone mi la nêl kiyang kityooên tiyi xocbê Yuda levac nêl vô he ge. Om kiyang kityooên tige la nêx lec Yuda ben vihati mi yêp, di yêp gwêbaga hixôn.

Yesu vông yuac vac nue ngivihi vigê

(Mak 16:14-18; Luk 24:36-49; Jon 20:19-23)

¹⁶Yesu nue ngivihi vigê yuu di ti tô mi la ge, he loc mi la vigwe Galili mi la lec kitôn ti wê Yesu nêl ên nêbê he i lêc loc dô lec ge. ¹⁷Om he mîla

tyip, di yê Yesu om he yev vixa kitu vô i, léc he ya nilô vông yuu yuu.
¹⁸Mêdêc Yesu lam kwabo vô he di lam nêl vô he ên nêbê, “Anutu vông xêkizêc lag yuu kibun vihati vô a pyap. ¹⁹Om a nêl vô xam bê xam loc vac vigwe vihati yang di loc nêl a xolac kitong vô xomxo vihati ên he i vông i vin di tu a nuge. Di xam loc lipac he lec Mag Anutu hixôn nu tuc di Myakilôhông Ngibua yon lê. ²⁰Di xam tixuu he ya kiyang vihati wê a nêl vô xam ge ên he i timu vô. Xam ngô lê. A obêc dô hixôn xam i tiyi buc vihati di i loc tyip lec buc wê lag yuu kibun myahipu obêc tiyô vac ge.”

MAK

Yesu Kilisi xolac wê Mak kivuu ge

Jon Lipacên nêl Yesu kitong

(Matyu 3:1-12; Luk 3:1-9,15-17; Jon 1:19-28)

1 ¹Kiyang tiga, xolac nivihã wê nêl Yesu Kilisi wê Anutu nu ge kitong. ²Xolac tiga, plopet Aisaia nêl kitong mugên ilage, om Anutu vya wê Aisaia kivuu ge yêp bêga nêbê,
“Ngô lê. A ob vông xomxo ti i kô a kiyang mi loc mug ông nê môm, ên i viac môm wê ông obêc mila vac ge. ³Om xomxo tige obêc tyuc vya vac vîgwe mahîgun pileva bêga nêbê, ‘Xam viac Apumtau môm wê ob lam vac ge di vông i môm i yêp bôbac.’”

⁴Kiyang nêl bêge, mêgem Jon Lipacên la vac vîgwe mahîgun pileva di la nêl xolac vô xomxo ên nêbê he i pilepac he di lipac mia êdêc Anutu i kitya he nêl nipaên vêl. ⁵Om xomxo Jelusalem hixôn xomxo vac vîgwe levac Judia vihati la vô Jon di nêl he nêl nipaên kitong vô i, om he la le vac mia Jodan di Jon lipac he.

⁶Jon vinyum ngakwi wê he duu bwoc kamel nivîluhu ge di vêx let wê bwoc ninivi ge, di yaên wê mi ya ge, hiveac hixôn vinoluc. ⁷Mêd Jon nêl xolac vô

xomxo bêga ên nêbê, “Xomxo ti obêc val timuên, lêc xêkizêc wê i vông ge luu xêkizêc wê a vông ge vêl, di a o nigvihã tiyi wê a ob piwelac yihi vêl ên su wê i vông ge lêm. ⁸A ga, a lipac xam ya mia pileva, lêc xomxo tige obêc lipac xam ya Myakilôhô Ngîbua.”

Jon lipac Yesu

(Matyu 3:13-17; Luk 3:21-22)

⁹Vô buc tigeê Yesu sea ben Nasalet wê yêp vac vîgwe levac Galili ge di la vô Jon Lipacên di Jon lipac i vac mia Jodan. ¹⁰Lipac i pyap di Yesu lec

mi lôm kehe, léc lutibed Yesu yê wê lag puunê tax di Myakilôhô Ngibua tu tucluu manôn di lam yêp lec i kisii. ¹¹Mêd vya ti lam hixôn gê lag puunê ên nêbê, “Ông a nug wê a xêgyaa vin lec ông di a xê ông nivihage.”

Seten yaxên Yesu
(*Matyu 4:1-11; Luk 4:1-13*)

¹²Mêd lutibed Myakilôhô Ngibua vông Yesu la vac vîgwe mahigun pileva wê xomxo ti dô vacên ma ge, ¹³di Yesu la dô tiyi xocbê buc kehe yuu di Seten yaxên i. Vîgwe tige, bwoc mavihô dô hixôn, léc angela lam viac Yesu.

Yesu nêl xolac taxlee gê Galili
(*Matyu 4:12-17; Luk 4:14-15*)

¹⁴Tibii tung Jon Lipacên la dô vac xumac kalabuhu, pyap dêc Yesu la vac vîgwe levac Galili di la nêl Anutu xolac vô xomxo ên nêbê, ¹⁵“Gwêbaga buc wê Anutu nêl ge ob vô nôn lec, di vîgwe kisiinê nu vô kwabo lec. Om xam pilepac xam di vông i vin xolac.”

Yesu tyuc xomxo yuudiyuu la vô i
(*Matyu 4:18-22; Luk 5:1-11*)

¹⁶Yesu mila vô mia luaên Galili ninya léc yê wê Saimon yuu li Andlu nêx leac vac mia luaên tige nêb ob hi pis, ên yuu ge, yuu mi vông yuac mone lec pis hiên. ¹⁷Om Yesu nêl vô yuu ên nêbê, “Muu lam timu vô a vixag, ên a ob vông muu didii xomxo mi lam vô a i tiyi xocbê muu didii pis vac leac ge.” ¹⁸Om lutibed yuu sea leac dô xel di la hixôn Yesu.

¹⁹Mêd yon sea vîgwe ge di la teva tya, léc mila yê Sebedi nu yuu, Jems yuu Jon wê yuu dô lec dipac di duu yuu leac wê tip sea ge xôn. ²⁰Mêd Yesu keac yuu lam om yuu sea ma Sebedi hixôn nue yuac he dô lec dipac di yuu la hixôn Yesu.

Yesu tii vimwo nipaên vêl ên xomxo ti
(*Luk 4:31-37*)

²¹He la dô vac vîgwe Kapaneam, dêc buc wê sabat ge od Yesu la vac he xumac lîlo di la nêl xolac vô xomxo. ²²Mêd xomxo tige yetac ên kiyang wê Yesu nêl vô he ge, ên Yesu o tixuu he tiyi xocbê xomxo wê xovô Moses xolac ge lêm. Nge, Yesu nêl kiyang hixôn xêkizêc.

²³Xomxo ti wê vimwo nipaên dô vac nilô ge dô hixôn he vac xumac lîlo tige, om keac vya levac ên nêbê, ²⁴“Yesu Nasalet, ông lam ên ông nêb ông ob vông bêna vô xe? Ông nêb ông ob kitya xe vêl, me? A xovô ông ên a nêbê ông ge xomxo ngibua wê Anutu vông ông lam ge.” ²⁵Lêc Yesu nêl kiyang xêkizêc la vô i ên nêbê, “Keacên i ma, di lam loc vêl ên xomxo

tige.”²⁶ Mêgem vimwo nipaên tige vô kitiv kitiv xomxo tige di tyuc vya levac di sea i di la. ²⁷ Mêd xomxo wê dô mi yê gee yetac mabu di nêl voma ên nêbê, “Xomxo tige va nêl kiyang bêna? Tige kiyang paha ti. Ên i nêl kiyang hixôn xêkizêc vô vimwo nipaên tiyi xocbê xomxo levac ge, om vimwo nipaên ngô i vya di vông i tiyi wê nêl ge.”²⁸ Di lutibed xomxo nêl Yesu lê vô levac vac vigwe Galili vihati.

Yesu vông Saimon Pita yen vêxta vô nivîha lec
(*Matyu 8:14-15; Luk 4:38-39*)

²⁹ He sea xumac lilo di lop mi la vixun, di Jems yuu Jon, yuu la hixôn di he xôn la vac Saimon yuu Andlu ben. ³⁰ Lêc Saimon yen vêxta vông yidac ngwax tum mi diyêp lec pêt, om he nêl kitong vô Yesu. ³¹ Om Yesu la le kwabo vô i di hôm lec i vigê di vông i le kisii, di yidac tige tip la di i vô nivîha lec, mêd la myêl yaên mi vet he ya.

Yesu vông xomxo yidac tibeac vô nivîha lec
(*Matyu 8:16-17; Luk 4:40-41*)

³² Hiyôv hoo la di vigwe ob buc mêd xomxo tibeac kô xomxo yidac hixôn xomxo wê vimwo nipaên dô vac he gee mi la vô Yesu. ³³ Om xomxo vihati wê dô vac vigwe tige la kitucma mi le kwabo vô xumac tige vuayen. ³⁴ Mêd Yesu vông xomxo wê tulec yidac toto gee tibeac vô nivîha lec di tii vimwo nipaên vêl ên xomxo tibeac. Lêc vimwo nipaên xovô Yesu om Yesu vibu he nêb he i o lêc nêl i kitong vô xomxo lêm.

Yesu vông yuac mi vilee vac vigwe Galili
(*Luk 4:42-44*)

³⁵ Vô pitoc yang Yesu kidi lec di sea vigwe tige di la vac vigwe mahigun pileva wê xomxo dô vacên ma ge, di la kitaa. ³⁶ Lêc Saimon he lie myag i la, ³⁷ dêc mila yêvô om nêl vô i ên nêbê, “Xomxo tibeac dimyag ông.” ³⁸ Lêc Yesu nêl vô he ên nêbê, “Maê. Il ob la vac vigwe yaya wê yêp kwabo ge ên a nêl xolac vô he hixôn. Ên yuac ga wê a lam ên a nêb a ob vông ge.” ³⁹ Mêgem Yesu la vigwe Galili vihati di la nêl xolac vac Yuda xumac lilo toto ge di tii vimwo nipaên vêl ên xomxo.

Yesu vông xomxo wê kityax mahizihizi ge ti vô nivîha lec
(*Matyu 8:1-4; Luk 5:12-16*)

⁴⁰ Xomxo wê kityax mahizihizi ge ti la yev vixa kitu vô Yesu di kitaa i ên nêbê, “Ông obêc nêb a vô nigviha lec ge od ông tiyi wê ông ob vông a nignivi i vô nivîha lec.” ⁴¹ Mêdêc Yesu xo vigwe pisiv ên i om vyax vigê lec di nêl vô ên nêbê, “A nêb ông vô nimviha lec.” ⁴² Yesu nêl di yidac tige tip la lutibed di i ninivi vô nivîha lec. ⁴³ Mêd Yesu nêl kiyang xêkizêc vô i ên nêbê, “Ông kidi lec mi loc, ⁴⁴ di ông o lêc nêl nimmivi wê vô nivîha

lec ge kitong vô xomxo ti lêm. Di ông loc hilung nimnivi mô vô xomxo wê mi si daa vô Anutu ge di vông daa i tiyi môp wê Moses xolac nêl ge, ên xomxo vihati i yê di xovô bê ông nimnivi vô nivihalec om ông vông daa.”⁴⁵ Yesu nêl bêge lê, lêc xomxo tige la nêl kiyang kitong vac vigwe viyang viyang, mêgem Yesu o tiyi wê ob la hilung i seac vac vigwe levac tiyi xochê ilage lêm, om la dô vac vigwe mahigun pileva, lêc xomxo vac vigwe viyang viyang ge kituc la vô i.

Yesu vông xomxo ti wê vixa vô xêlehe ge vô nivihalec
(*Matyu 9:1-8; Luk 5:17-26*)

2¹Buc mangwe la vêl lêc Yesu lax mi la ben Kapaneam, di xomxo ngô wê i lax dô vac ben ge,² om xomxo tibeac la pup lec i ben di le vac vuayen hixôn, om môp ti o yêp lêm. Mêd Yesu nêl xolac vô he,³ lêc xomxo yuudiyuu ken li ti wê len vô xêlehe ge mi lam, ên nêb ob kô i mi la vô Yesu.⁴ Lêc xomxo pup lec vigwe om môp ti o yêp wê he ob kô i mi la vô Yesu ge lêm, om he lec xumac mi la kisii mi la dii xumac mya ti wê Yesu le ge vêl di vông

xomxo tyo lop mi la hixôn pêt di la yêp vô Yesu manôn.⁵ Mêd Yesu yê wê he vông i vin ge om nêl vô xomxo tyo ên nêbê, “Nug, a kitya ông nêp nipaên vêl pyap.”

⁶Mêlêc xomxo wê xovô Moses xolac gee ya dô hixôn om ngô kiyang wê Yesu nêl ge di xo vac nilô bêga nêbê,⁷ “Bêna lêc xomxo tige nêl kiyang tibêge? Ge so vya vô Anutu, ên xomxo ti o tiyi wê ob kitya xomxo nêp nipaên vêl ge lêm. Nge, Anutu vaci tibeac tiyi wê ob kitya xomxo nêp nipaên vêl.”⁸ Lêc Yesu xovô kiyang wê he xo vac nilô ge, om nêl vô he ên nêbê, “Bêna lêc xam xo kiyang tibêge vac nilômê?”⁹ Xam ngô lê. Kiyang tina wê obêc vô viyin maên ge? Kiyang wê nêbê, ‘A kitya ông nêp nipaên vêl’ ge, me kiyang wê nêbê, ‘Ông kidi lec di kô ông pêt lec di loc?’¹⁰ Mêlêc a nêb a ob vông xovôên vô xam bê a, Xomxo Nu, a xêkizêc tiyi wê a ob kitya xomxo nêp nipaên vêl gê kibun ga, om xam wê.” Om Yesu nêl vô xomxo ti wê len vô xêlehe ge ên nêbê,¹¹ “A nêl vô ông bê ông kidi lec di hôm ông guhu lec di loc bom.”¹² Di lutibeac xomxo tige kidi lec vac he mahigun di hôm i guhu lec di loc mi la. Mêgem xomxo gee vihati yê di yetac mabu di pimil Anutu di nêl ên nêbê, “Xe o xê susu bêga ti ila lêm.”

Yesu keac Livai la hixôn i
(*Matyu 9:9-13; Luk 5:27-32*)

¹³Yesu lax mi la mia luaên Galili tii vac mêd xomxo tibeac la vô i, di i nêl xolac vô he.¹⁴ Pyap di Yesu loc mi la lêc mîla yê Livai wê Alpias nu ge, wê xeedô vac xumac wê he mi kô mone takis vô tibii vac ge, om Yesu la nêl vô i ên nêbê, “Lam timu vô a vixag.” Mêgem Livai kidi lec di la hixôn Yesu mi yuu la.

¹⁵Mêd Yesu hixôn i nue ngivihi la ya hixôn Livai vac i ben, lêc tibii wê mi kô mone takis ge hixôn xomxo nipaên, he tibeac la ya hixôn he, ên xomxo tibêgee tibeac mi timu vô Yesu. ¹⁶Lêc Palisi wê xovô Moses xolac ge he ya yê wê Yesu diya hixôn tibii nipaên yuu tibii wê mi kô takis gee, om nêl vô Yesu nue ngivihi ên nêbê, “Bêna lêc Yesu la ya hixôn tibii wê mi kô mone takis ge hixôn tibii nipaênê?” ¹⁷Mêd Yesu ngô wê he nêl ge, om nêl vô he ên nêbê, “Xomxo nivihia obêc la vô docta lêm. Nge, tibii yidac ge wê obêc la vô docta. Om xam xovô bêga bê a o lam ên xomxo nivihia lêm. Nge, a lam ên tibii nipaên, ên a nêb a ob tyuc he lam vô a.”

Kiyang lec môt wê xomxo ngibua yaên ge
(*Matyu 9:14-17; Luk 5:33-39*)

¹⁸Buc ti Jon Lipacên nue ngivihi hixôn Palisi he ngibua yaên tiyi môt wê he Yuda mi vông ge, om xomxo mangwe la nêl vô Yesu ên nêbê, “Jon Lipacên nue ngivihi hixôn Palisi ge, he mi ngibua yaên, lêc bêna lêc nume ngivihi o ngibua yaên lêmê?” ¹⁹Lêc Yesu nêl vô he ên nêbê, “Tibii viyang ti lie ti obêc ii vêx ti lêc gên dô hixôn he ge od he obêc ngibua yaên, me? Ma vêl. Ên li tige gên dô hixôn he, om he ob dô hixôn xêyaa nivihia di ob ngibua yaên lêm. ²⁰Lêc obêc buc timuên wê tibii ob kô li tige vêl ên he ge od ge wê he ob ngibua yaên.”

Kiyang pilepacên lec môt tikwê hixôn môt paha

²¹Yesu nêl ên nêbê, “Xomxo ti nên ngakwi obêc tip ge od obêc kiping ngakwi paha myahipu ti vêl mi la duu lec tikwê lêm. Ên obêc vông bêge ge od myahipu paha tige obêc titê tikwê lêx di tocên obêc vô levac. ²²Di xomxo ti obêc too wain paha vac bwoc ninivi tikwê lêm. Ên obêc too vac ge od wain obêc vuac di tax ninivi tikwê tip di wain too la. Om wain paha ge, xomxo i too vac bwoc ninivi paha.”

Yesu nêl kiyang lec môt wê vibuên yuac lec sabat ge
(*Matyu 12:1-8; Luk 6:1-5*)

²³Vô buc sabat ti Yesu he nue ngivihi la vô môt wê la vac yuac yaên ge ti, mêd he mîla lê, lêc nue ngivihi le yul wit nôn wê tiyi xocbê pidi nôn ge di ya. ²⁴Lêc Palisi ya yê di nêl vô Yesu ên nêbê, “Wê lê, gwêbaga buc sabat wê Moses xolac vibu nêb il ob vông yuac ti lec lêm ge, lêc bêna lêc nume ngivihi vông yuac lec?”

²⁵Lêc Yesu nêl vô he ên nêbê, “Môt wê bug Devit vông ilage, xam kitong, me xam lungên? Môt bêga nêbê Devit he lie dô, lêc vip den he. ²⁶Vô buc tige Abiata tu xomxo daa siên nêb levac mi dô vac Anutu xumac ngibua, om Devit la vac xumac ngibua tige di la hôm blet ti wê he tung vô Anutu manôn ge. Blet tige xomxo pileva o tiyi wê ob ya ge lêm. Nge, xomxo wê mi si daa vô Anutu gee, heche va ob ya. Lêc Devit kô mi lax ya

dêc vông mi lie ya hixôn. Lêc Devit môp ge tiyi, ên Abiata vaci vông vô Devit mi i ya.”

²⁷Om Yesu nêl vô he ên nêbê, “Om xam xovô bê xe êno o vông i so lêm, ên Anutu o tung xomxo ên nêb he i ngidu buc sabat xôn lêm. Nge, vông buc sabat ên nêb i ngidu xomxo xôn. ²⁸Om a, Xomxo Nu, a tu buc sabat kehe hixôn.”

Yesu vông xomxo wê vigê vô nipaên ge ti vô nivihalec vô buc sabat
(*Matyu 12:9-14; Luk 6:6-11*)

3 ¹Yesu la vac Yuda xumac lilo lu ngwe tii vac, lêc xomxo wê vigê vilu vô xêlehe ge ti dô hixôn he vac xumac tige. ²Di xomxo wê xeedô gee yê Yesu xôn ên nêb ob yê bêc Yesu obêc vông xomxo tige vô nivihalec vô sabat ge, od he ob vông kot vô Yesu. ³Mêd Yesu nêl vô xomxo vigê nipaên tige ên nêbê, “Kidi lec mi le vac mahigun.” ⁴Om Yesu nêl vô he vihati ên nêbê, “Xolac wê il Yuda vông ge, nêb il vông bêna lec sabatê? Nêb il vông nivihalec, me nêb il vông nipaên? Il ob vông xomxo vô nivihalec, me il ob hi he i yib lec sabat?” Lêc he dô kiyang maên di o nêl kiyang ti lax vô Yesu lêm. ⁵Om Yesu yê he vihati manôn di xêyaa vô myavinê vô he, di nilô vô viyin ên wê he nilô xêkizêc ta di he o vông i vin lêm ge, om nêl vô xomxo vigê nipaên tige ên nêbê, “Titô vigêm.” Mêgem xomxo tyo titô vigê lêc vigê vô nivihalec. ⁶Mêd lutibed he Palisi kidi mi la, di la kitucma hixôn Helot nue di he xôn myag môp wê nêb ob hi Yesu i yib lec ge.

Xomxo tibeac la vô Yesu vac mia luaên Galili

⁷Yesu he nue ngivihalec mi la mia luaên Galili di xomxo tibeac timu vô Yesu vixa. ⁸Xomxo tige lam gê vigwe Galili yuu Judia, di lam gê Jelusalem, di lam gê Idumia, di lam gê mia Jodan vilu ganê di lam gê vigwe Taia yuu Saidon, ên he ngô yuac wê Yesu vông ge om nêb ob lam ên lam yê. ⁹Om Yesu nêl vô nue ngivihalec ên nêbê, “Xomxo tibeac hiwocên val dô om obêc hivun a xôn, om xam loc viac dipac ti, êdêc a sox la dô lec.” ¹⁰Yesu nêl bêge, ên vông xomxo yidac tibeac vô nivihalec, om he wê yidac ge le i vivac i ên nêb he ob vyax vigê lec i ên he i vô nivihalec. ¹¹Di vimwo nipaên wê dô vac xomxo ge yê Yesu om yev vixa kitu vô di tyuc vya levac ên nêbê, “Ông ge Anutu nu.” ¹²Lêc Yesu vibu he nêb he i o léc nêl i kitong vô xomxo lêm.

Yesu vinoo nue ngivihalec yuu di tô mi la yuu
(*Matyu 10:1-4; Luk 6:12-16*)

¹³Yesu la lec kitôn ti, mêd keac xomxo ya nêb he i loc vô i. Om he la vô i, ¹⁴di Yesu vinoo he vigê yuu di tô mi la yuu ên nêb he i dô hixôn i, dêc obêc vông he la nêl xolac, ¹⁵di ob vông xêkizêc vô he i tiyi wê he ob tii

vimwo nipaên vêl ên xomxo ge. ¹⁶Om he lê bêga, Saimon, wê Yesu nêl i lê ngwe nêbê Pita, ¹⁷di Jems yuu Jon wê yuu ma Sebedi ge lêc Yesu nêl yuu xôn lê ngwe bêga nêbê Boanesis. Lê tige kehe bêga nêbê deac tugên, ên yuu ge wê mi higac vô xomxo ge, ¹⁸di Andlu yuu Pilip di Batolomyu, di Matyu yuu Tomas, di Jems wê ma Alpias ge, di Tadias yuu Saimon Selot, ¹⁹di Judas Iskaliot wê obêc hilung Yesu vô tibii vevac timuên ge.

Xomxo nêl nêbê Yesu vông yuac ya xêkizêc wê Seten vông ge
(*Matyu 12:24-32; Luk 11:14-23; Luk 12:10*)

²⁰Yesu lax mi la vac ben xumac lôma, mêd xomxo tibeac la kitucma hixôn i om hiyôv manôn wê Yesu he nue ngivihî ob ya yaên lec ge ma. ²¹Mêd Yesu lie ngô kiyang tige om val ên nêb ob lam kô Yesu, ên xomxo ya nêl ên nêbê Yesu vô mavmav.

²²Di xomxo wê xovô Moses xolac ge wê he lam gê Jelusalem ge, he nêl ên nêbê, “Bielsebul wê tu vimwo nipaên nên levac ge dô vac Yesu nilô, om Yesu tii vimwo nipaên vêl ên xomxo ya xêkizêc wê Bielsebul vông ge.” ²³Om Yesu keac xomxo vihati val kwabo vô i di i nêl kiyang pilepacên ya vô he bêga nêbê, “Bêna lêc Seten ob tii Seten vaci vêl? ²⁴Xomxo viyang ti obêc hibuma la yuu di vông vevac vôma ge od he ob dô nivîha lêm. ²⁵Di xomxo wê xumac tived ge obêc hibuma la yuu di vông vevac vôma ge od he obêc dô nivîha lêm. Nge, xêkizêc wê he vông ge ob tô mi la. ²⁶Om kiyang wê xam nêl ge obêc kiyang nôn ge od obêc tiyi xocbê Seten vaci vông vevac vô Seten di hibuma sea, lêc obêc bêge ge od xêkizêc wê Seten vông ge obêc tip vac.

²⁷“Xomxo xêkizêc ti obêc dô vac i ben xumac lôma ge od xomxo ti o tiyi wê ob la vun i susu ge lêm. Lêc obêc ku xomxo tige xôn pilihi ya yihi ge od tiyi wê tibii ob la vac i ben xumac lôma di la vun i nêl susu vihati ge.

²⁸“A nêl hixôn nôn vô xam bê xomxo ti obêc vông môp nipaên, me obêc nêl kiyang nipaên ge od Anutu tiyi wê ob kitya nipaên tige vêl ge. ²⁹Lêc xomxo ti obêc nêl kiyang nipaên lec Myakilôhông Ngibua ge od o tiyi wê Anutu ob kitya i nêl nipaên tige vêl ge lêm. Nge, nipaên tige ob yêp vô xomxo tige luta lêc luta.” ³⁰Yesu nêl kiyang tige vô he ên wê he nêl ên he nêbê vimwo nipaên dô vac i nilô ge.

Yesu tae lie
(*Matyu 12:46-50; Luk 8:19-21*)

³¹Yesu tae lie val le vixun, di vông kiyang la vô Yesu ên nêb i lam vô he. ³²Om xomxo wê dô ngivina Yesu gee nêl vô i ên nêbê, “Tame lime val le vixun ên nêb ob yê ông.” ³³Lêc Yesu nêl lax vô he ên nêbê, “Xomxo letya wê a tage lige ge?” ³⁴Mêd Yesu yê ma la xomxo wê dô i ngivina i ge di nêl ên nêbê, “Wê lê, ga a tage lige. ³⁵Ên xomxo wê timu vô Anutu kiyang ge, ge wê tu a tage lige ge.”

Kiyang pilepacên lec xomxo ti liloo vê vac yuac
(Matyu 13:1-9; Luk 8:4-8)

4 ¹Yesu lax mi la mia luaên Galili di lax nêl xolac vô xomxo vô mia ninya. Lêc xomxo tibeac hiwocên, om Yesu lec la lec dipac ti mi dô lec, di du mi la mahigun di nêl xolac vô xomxo wê dô kehe ge. ²Yesu nêl kiyang pilepacên tibeac vô xomxo om nêl ti vô xomxo tigeê bêga nêbê, ³“Xam ngô lê. Xomxo ti la ên nêb ob la liloo susu vê vac yuac. ⁴Om liloo i la lê, lêc vê mangwe tô mi la dô vac môp om menac lam ya. ⁵Di ya tô lec kibun nipwo tya wê dô lec ngidax kisii ge om tyip lutibed, ⁶lêc ngilôhò la tulec ngidax om buc wê hiyôv linac ge od ya i vilôvac di i yib. ⁷Di vê mangwe tô mi la dô vac hivu kehe lêc tyip hixôn hivu di hivu hivun xôn om o vuac nôn nivihâ lêm. ⁸Di vê mangwe tô mi la dô vac kibun nivihâ om tyip di vuac nôn nivihâ. Mêgem ya vuac nôn 30 di ya vuac 60 di ya 100.” ⁹Yesu nêl bêge vô he di nêl hixôn ên nêbê, “Xomxo ti ninya obêc yêp ge od i ngô di xovô.”

Yesu nêl kiyang lec kiyang pilepacên
(Matyu 13:10-17; Luk 8:9-10)

¹⁰Dêc timuên Yesu vaci la dô viyonên, di nue ngivihi hixôn xomxo wê mi dô hixôn i gee, he mila vô i di la kinêg kiyang pilepacên kehe ên nêb i nêl kitong vô he. ¹¹Om Yesu nêl vô he ên nêbê, “Kiyang wê nêl lec Anutu môp yuu ben ge yêp xôpacên lê, lêc Anutu nêb ob hilung vô xam ên xam xovô. Di xomxo baba ge ngô kiyang tiyi xocbê kiyang pilepacên pileva. ¹²Om ‘he ob yê lê, lêc ob yêvô nôn ti lêm, di he ob ngô kiyang lê, lêc he ob xovô kehe lêm, om he o tiyi wê he ob pilepac he ên Anutu i kitya he nên nipaên vêl ge lêm.’ ”

Yesu nêl kiyang pilepacên kehe kitong
(Matyu 13:18-23; Luk 8:11-15)

¹³Yesu nêl vô he ên nêbê, “Xam obêc lungên kiyang pilepacên tige kehe ge od xam ob xovô kiyang pilepacên vihati ge kehe tibêna? ¹⁴Kehe bêga nêbê vê wê xomxo tige la liloo ge tiyi xocbê Anutu xolac. ¹⁵Di vê wê tô vac môp ge, tiyi xocbê xomxo wê ngô Anutu kiyang lê, lêc lutibed Seten lam vô vêl ên he nilô. ¹⁶Di vê wê tô mi la dô lec kibun nipwo tya wê dô lec ngidax kisii ge, ge tiyi xocbê xomxo wê ngô xolac di vông i vin lutibed hixôn xêyaa nivihâ, ¹⁷lêc he tiyi xocbê nêc wê ngilôhò maên ge, om he dô nipwo tya lêc xomxo obêc vông viyin vô he ên wê he vông i vin xolac ge od he sea vông vinên lutibed. ¹⁸Di vê wê tô mi la dô vac hivu kehe ge, ge tiyi xocbê xomxo wê ngô xolac mi dô lê, ¹⁹lêc he vông nilô la vô susu yuu môp kibun ga di he xêyaa vin lec wê he nêb ob kô susu tibeac hixôn mone ge, om môp tige hivun xolac xôn di he o vô nôn nivihâ lêm. ²⁰Lêc

vê wê tô mi la dô vac kibun nivihâ ge, ge tiyi xocbê xomxo wê ngô xolac di vông i vin di vuac nôn tibeac, om vê ya vuac nôn 30 di he ya vuac 60 di ya vuac 100.”

Kiyang pilepacên lec lam

(Luk 8:16-18)

²¹Yesu nêl ên nêbê, “Xomxo ti obêc byêx ngwax vac lam ge od ob lax i la vac dêg, me lax i la le vac pêt ngibi, me? Ma, ob lax i le lec tevol kisii ên i linac vac vîgwe. ²²Susu wê dô xôpacên ge vihati obêc val dô seac timuên, di kiyang wê yêp xôpacên ge obêc val yêp vac xêseac. ²³Xam ninyam obêc yêp ge od xam ngô di xovô.”

²⁴Di Yesu nêl ên nêbê, “Kiyang wê xam ngô ge, xam vyac xovô nivihâ lê. Ên môp wê xam vông vô xomxo ge Anutu obêc vông i tiyi wê xam vông vô he ge vô xam, di Anutu vaci obêc vông mangwe i luu wê xam vông vô lime ge vêl vô xam hixôn. ²⁵Ên xomxo obêc xovô xolac mi hôm pilihî ge od Anutu obêc kipyax tibeac lec hixôn vô i. Lêc xomxo obêc hôm xolac pilihî lêm ge, od nipwo tya wê yêp vac i nîlô ge, Anutu obêc vô vêl.”

Kiyang pilepacên lec vê wê tyip ge

²⁶Yesu nêl ên nêbê, “Anutu ben kehe ge tiyi xocbê xomxo ti wê la liloo vê vê vac yuac ge, ²⁷lêc lax dô di buc ya la vêl lêc milax yê wê vê tyip mi vô levac ge, lêc o xovô kehe lêm. ²⁸Ên kibun vaci vông yuac lec, om vê tyip mi vô lihi lec di vuac nôn, ²⁹di buc wê nôn huu ge od xomxo tyo la ên nêb ob la yul nôn.”

Kiyang pilepacên lec vixôô nôn

(Matyu 13:31-32,34-35; Luk 13:18-19)

³⁰Yesu nêl ên nêbê, “Anutu ben kehe ge tiyi vatya? Di il ob nêl kiyang pilepacên tibêna wê ob tiyi môp tige? ³¹Ge tiyi xocbê vixôô nôn wê nipwo lee tya i luu nôn baba vêl ge, ³²lêc xomxo obêc xin ge od obêc tyip mi vô levac luu susu baba vêl di obêc sux ngen lec di menac lam vông liwihi lec mi dô vac hinyena.”

³³Yesu obêc nêl xolac vô xomxo ge od mi nêl kiyang pilepacên tibêge tibeac vô he tiyi wê he ob xovô ge. ³⁴Lêc o nêl kiyang kehe yêp seac vô he hixôn lêm. Nge, nêl kiyang pilepacên pileva, di timuên wê he nue ngivihî vaci dô ge od Yesu nêl kiyang pilepacên kehe kitong vô he.

Yesu nêl di viyiiên levac tip la

(Matyu 8:23-27; Luk 8:22-25)

³⁵Vô buc tived tige vîgwe huc om Yesu nêl vô nue ngivihî ên nêbê, “Il ob la mia luaên vilu ganê.” ³⁶Mêgem he sea xomxo tigege dô di he lec

dipac ti wê Yesu dô lec ge di he xôn loc mi la, di dipac ya la hixôn. ³⁷He mila mahigun lê, lêc lea viyiên mabu ti val om mia kipyax la vac dipac nilô di la pup lec. ³⁸Lêc Yesu la dô lec dipac viwen timuên di kiluu bazub lec kiluuen ti di yêp, om nue ngivihi la tipi vô di nêl vô ên nêbê, “Xolac kehe, vô kwabo lec wê il ob xib ge, lêc mêd ông o xovô il lêm, me?” ³⁹Mêd Yesu kidi lec di nêl vô lea yuu mia ên nêb lea i tip loc di mia i yêp kizêc, om lea tip la di mia yêp tipiên ma. ⁴⁰Mêd Yesu nêl vô nue ngivihi ên nêbê, “Bêna lêc xam xona? Vông vinên wê xam vông ge tyo nôn tina?” ⁴¹Om he yetac mabu di nêl vôma ên nêbê, “Xomxo tiga letya lêc lea yuu mia vô ninya lehe vô i?”

Yesu tii vimwo nipaên vêl ên xomxo ti

(Matyu 8:28-34; Luk 8:26-39)

5 ¹Yesu he nue ngivihi loc mi la tibii Gelasa ben wê yêp mia luaên vilu ganê ge. ²He mila lop vêl ên dipac lêc xomxo wê vimwo nipaên dô vac i nilô ge ti lam vac vigwe yibên di lam vô Yesu. ³Vuxtige ben wê mi dô vac ge, mi dô vac vigwe yibên, di xomxo ti o tiyi wê ob ku i xôn ge lêm. ⁴Ên buc tibeac ge xomxo ku i vigê yuu vixa xôn ya sen lê, lêc xomxo tyo tax sen tip sea, di xomxo ti o tiyi wê ob hôm i xôn ge lêm, ên xêkizêc wê xomxo tige vông ge luu xêkizêc wê he vông ge vêl. ⁵Vô vidiiên yuu bucên vihati ge xomxo tige mi vilee mi la vac vigwe yibên di la lec kitôn di mi iac di gôl ninivi sea ya ngidax.

⁶Xomxo tige yê wê Yesu val le teva ge om tup mi la vô di la yev vixa kitu vô. ⁷⁻⁸Lêc Yesu nêl vô i ên nêbê, “Vimwo nipaên, ông lam loc vêl ên xomxo tige.” Mêgem xomxo tyo iac mabu di nêl ên nêbê, “Yesu, ông ge Anutu lag puunê nu ông, lêc ông ob vô vatya vô a? A le vô Anutu manôn di a kitaa ông bê ông o lêc vông a vô nipaên lêm.” ⁹Mêd Yesu kinêg vô i ên nêbê, “Ông lêm le?” Di i nêl ên nêbê, “A lêg kehe bêga nêbê kidu levac, ên xe ga, xe tibeac.” ¹⁰Mêd i kitaa Yesu tii vac vac ên nêb i o lêc tii vimwo nipaên i loc vêl ên vigwe tige lêm.

¹¹Bwoc kidu levac vông zuac mi le lec kitôn, ¹²om vimwo nipaên tigeê kitaa Yesu ên nêbê, “Ông vông xe la dô vac bwoc tiganêe.” ¹³Mêd Yesu tyuc lec om vimwo nipaên tigeê lam la vêl ên xomxo tige di la dô vac bwoc tyoe nilô, mêd bwoc tigeê tup mi la vac vigwe madia di la tô vac mia luaên di num mia mi yib. Bwoc tigeê tibeac hiwocên tiyi xocbê 2,000 lêc he yib mima vêl.

¹⁴Mêd xomxo wê mi viac bwoc tigeê ge pec mi la, di mila nêl kiyang tige kitong vô tibii vac vigwe levac hixôn vigwe nipwo viyang viyang ge. Om xomxo tibeac la ên nêb ob la yê han, ¹⁵om he val vô Yesu lêc val yê xomxo ti wê vimwo nipaên dô vac ilage, lêc vimwo sea i di i piyôp vô nivaha lec di i vinyum nivimihi lec di xeedô hixôn Yesu, om he yê di xona ên. ¹⁶Di xomxo wê dô mi yê wê Yesu tii vimwo nipaên vêl ên xomxo

tige, nêl kitong vô tibii wê val gee di nêl lec bwoc hixôn. ¹⁷Om tibii tige vihati kitaa Yesu ên nêb i loc vêl ên he ben.

¹⁸Mêgem Yesu lec dipac ên nêb ob lax mi la, lêc xomxo ti wê Yesu tii vimwo nipaên vêl ên i ge, lam kitaa Yesu ên nêb ob la hixôn i, ¹⁹lêc Yesu nêl vô ên nêbê, “Ông la hixônên a ob ma, di ông lôc bom ên lôc nêl do levac wê Apumtau vông vô ông ge kitong vô lime di nêl lec wê Apumtau xo vigwe pisiv ên ông ge hixôn.” ²⁰Mêgem xomxo tyo lax mi la ben di la nêl kiyang wê Yesu vông i vô nivîha lec ge kitong vô xomxo vac vigwe levac Dekapolis vihati, om xomxo tigege ngô kiyang wê i nêl ge di yetac mabu.

Jailas nu vêx, di vêx yidac ngwe, yuu kiyang
(*Matyu 9:18-26; Luk 8:40-56*)

²¹Yesu la lec dipac mi lax mi la mia luaên vilu ganê, mi la dô vô mia ninya di xomxo tibeac kitucma mi la vô i. ²²Mêd xomxo levac wê mi viac Yuda xumac lilo ge ti lê nêbê Jailas yê wê Yesu val ge, om lam yev vixa kitu vô ²³di kitaa vô i ên nêbê, “A nug vêx vông yidac mabu ti di vô kwabo lec wê ob yib ge. Om a nêb ông lam vyax vigêm lec ên yidac i ma di i vô nivîha lec.” ²⁴Om Yesu la hixôn Jailas mi yuu la, lêc xomxo tibeac lam hivun Yesu xôn di he xôn la.

²⁵Mêd vêx ti dô vac he mahigun, lêc vêx tige, yidac kwatuacên vông i tiyi klismas 12, lêc yidac tige o ma lêm, ²⁶di i kô myavinê tibeac vô docta di sea i mone la mîma vêl, lêc yidac tige o tiyôô ên i lêm. Nge, yidac tige vô levac di dô xuhu dia. ²⁷Mêd vêx tyo ngô kiyang wê xomxo mi nêl lec Yesu ge om la vac xomxo tigege mahigun di la le vô Yesu nîmi di vyax vigê lec Yesu vinyumên. ²⁸Vông bête ên xo ên nêbê, “A obêc vyax vigê lec Yesu vinyumên ge od a obêc vô nigvîha lec.” ²⁹Om lutibed yidac tyo tip la di vêx tyo yaxên wê yidac tyo ma ên i ge. ³⁰Mêd Yesu yaxên wê xêkizêc wê i vông ge ya sea i, om pilepac i vac xomxo tigege mahigun di kinêg ên nêbê, “Letya hôm vigê lec vinyumên wê a vông ge?” ³¹Lêc nue ngivîhi nêl vô i ên nêbê, “Xomxo tibeac le i ngivîna ông xôn, lêc bêna lêc ông kinêg ên ông nêbê letya vyax vigê lec ôngê?” ³²Lêc Yesu yê i vivac vô he vihati ên nêb ob yê xomxo ti wê vyax vigê lec i ge, ³³mêd vêx tige xovô wê xêkizêc wê Yesu vông ge la vông i vô nivîha lec ge om xona di la hixôn ni yetacên di la yev vixa kitu vô Yesu di nêl i kiyang kitong vihati vô Yesu. ³⁴Mêd Yesu nêl vô i ên nêbê, “Nuge, vông vinên wê ông vông ge vông ông vô nivîha lec, om ông lôc hixôn xemyaa nivîha, ên yidac wê ông vông ge tip la gwêba pyap.”

³⁵Yesu gên nêl kiyang, dêc xomxo vac Jailas ben val nêl vô Jailas ên nêbê, “Num vêx yib gwêba, om le i lêc vông yuac levac vô xolac kehe lêm.” ³⁶Yesu ngô kiyang wê he nêl ge lêc o vông i vin lêm, om nêl vô Jailas ên nêbê, “Xonaên i ma di ông vông i vin.” ³⁷Mêd Yesu nêl ên nêbê

xomxo vihati i dô om he dô di Yesu kô Jems yuu li Jon di Pita mi he la. ³⁸He mila vô kwabo lec Jailas ben léc Yesu ngô wê xomxo byag di vô nididun tibeac ge, ³⁹om la xumac lôma di la nêl vô he ên nêbê, “Bêna léc xam byag di vô nididun tibeac? Vêx tige o yib ti. Nge, ici va yêp.” ⁴⁰Mêd he nap lec kiyang wê Yesu nêl ge. Om Yesu vông he vihati la vixun, di kô vêx tyo ta yuu ma hixôn nue ngivihi yon di he la vac xumac nilô ti wê vêx tyo diyêp vac ge. ⁴¹Mêd Yesu la hôm lec vêx tyo vigê di nêl vô i ên nêbê, “Talita kumi.” Kiyang tige kehe bêga nêbê, “Vêx, a nêl bê ông kidi lec.” ⁴²Om lutibed vêx tyo kidi lec mi vilee. Vêx tige, klismas wê i vông ge tiyi xocbê 12. Di he wê he dô mi yê gee yetac mabu. ⁴³Lêc Yesu nêl kiyang xêkizêc vô he ên nêbê, “Xam o léc nêl ga kitong vô xomxo ti lêm.” Di nêl vô he ên nêbê, “Xam vông yaên vô vêx tyo ên i ya.”

Xomxo Nasalet vô nîmi vô Yesu

(Matyu 13:53-58; Luk 4:16-30)

6 ¹Yesu sea vigwe tige di lax mi la Nasalet wê i ben kehe ge, dêc nue ngivihi la hixôn. ²He dô di buc sabat ge od Yesu la vac xumac lilo di la nêl xolac vô xomxo. Om xomxo tibeac ngô i kiyang di yetac mabu di nêl ên nêbê, “Xomxo tige kô kiyang yuu piyôp vô letya léc mi vông do levac tibêgee? ³I ge xomxo wê xumac loxên ge ti, wê Malia nu ge, om i lie Jems yuu Josis di Judas yuu Saimon. Di lie vêx dô hixôn il ga.” He nêl bêge di he nilô vô viyin di he yê Yesu nipaên. ⁴Mêd Yesu nêl vô he ên nêbê, “Vac vigwe viyang viyang ge, xomxo ob kô plopet lec, dom plopet tyo tae mae lie hixôn xomxo vac i ben vigwe kehe obêc kô i lê lec lêm.” ⁵Om Yesu o tiyi wê ob vông do tibeac vac ben Nasalet ge lêm, di i vyax vigê lec xomxo yidac titi di vông he vô nivihalec. ⁶Mêd Yesu yê wê lie Nasalet o vông i vin i lêm ge, om xo bêga nêbê, “Bêna léc he o vông i vin a lêmê?” Mêgem Yesu sea Nasalet di loc mi la vilee vac vigwe toto di la nêl xolac vô tibii.

Yesu vông yuac vô nue ngivihi

(Matyu 10:5-15; Luk 9:1-6)

⁷Yesu keac nue ngivihi vigê yuu di tô mi la yuu la vô i, di vông he yuu yuu loc mi la, di vông xêkizêc wê i vông ge vô he ên nêbê he i loc tii vimwo nipaên vêl ên xomxo, ⁸di nêl vô he ên nêbê, “Xam hôm pitoa vac vigêm di loc, di xam o léc kô susu ya hixôn lêm, xocbê yaên yuu vixec di mone hixôn lêm. ⁹Xam su su lec vixam, di xam vinyum vinyumên tibed lec, di xam o léc kô vinyumên nge hixôn lêm. ¹⁰Di xam obêc la vac vigwe ti mi la dô vac xumac ti ge od xam dô vac xumac tige tibed i tiyi buc wê xam ob dô ge. Pyap dêc xam sea vigwe tige di loc bangwe. ¹¹Lêc xam obêc mila vac vigwe ti di xomxo viyang tige o hôm xam lec nivihalec lêm di o ngô kiyang wê xam nêl ge lêm ge od xam liloo vijuva vêl ên

vixam pitehe ên i nêl he nêl nipaên kitong vô he di loc.”¹² Om Yesu nue ngivihî loc mi la, di la nêl xolac vô xomxo ên nêbê he i pilepac he,¹³ di he tii vimwo nipaên vêl ên xomxo tibeac, di xomxo yidac tibeac ge, he lipac wel lec he di vông he vô nivîha lec.

Jon Lipacên yib

(*Matyu 14:1-12; Luk 3:19-20; Luk 9:7-9*)

¹⁴Hizap levac Helot ngô kiyang wê tibii mi nêl lec Yesu ge, ên xomxo nêl Yesu kitong la vô levac vac vîgwe tibeac, om he ya nêl ên he nêbê Yesu ge Jon Lipacên wê yib ge, kidi lec nang om vông do levac ya xêkizêc wê i vông ge. ¹⁵Lêc xomxo ya nêl ên he nêbê ge plopet Ilaija, di ya nêl ên nêbê Yesu ge plopet tiyi xocbê plopet wê dô ilage ti. ¹⁶Mêd Helot ngô kiyang wê he mi nêl ge di nêl ên nêbê, “Ge Jon Lipacên wê a kitov i kwa tip mi i yib ilage lêc kidi lec maviha vac yibên.”

¹⁷⁻¹⁸Kiyang wê Helot hi Jon yib ilage bêga nêbê ilage Helot kô li Pilip vinê Helodias om Jon Lipacên la nêl vô Helot ên nêbê, “Môp wê ông kô lim tuc vinê ge tiyiên ma.” Mêgem Helodias kunac Jon di nêl vô Helot om Helot vông tibii la hôm Jon xôn di tung i la dô vac xumac kalabuhu. ¹⁹Mêd Helodias xêyaa vô myavinê mabu vô Jon di nêl nêb ob hi Jon yib, lêc tiyiên ma, ²⁰ên Helot xovô nêbê Jon ge xomxo nivîha di i ngîbua, om Helot xona ên Jon di viac i nivîha ên nêb Helodias i o lêc vông i vô nipaên lêm. Mêd Helot obêc ngô kiyang wê Jon mi nêl ge, od vông i nilô vô himena himena, lêc Helot xêyaa vin lec kiyang wê Jon mi nêl ge om nêb ob ngô.

²¹Mêd Helodias myag môp wê ob hi Jon i yib lec ge, om Helot buc wê ta kô i lec ge Helot myêl vizid levac di tyuc gavman levac hixôn tibii vevac wê levac ge di xomxo Galili levac vihati gee lam. ²²He dô mi ya lêc Helodias nu vêx lam yoo vô he, di Helot hixôn xomxo wê lam ya hixôn i ge vihati xêyaa vin lec i, om Helot nêl vô vêx tyo ên nêbê, “Ông obêc nêb kô susu ti ge od ông nêl kitong vô a di a ob vông vô ông.” ²³Om Helot hilu kiyang xôn vô i di nêl ên nêbê, “A nêl hixôn nôn vô ông bêga bê ông obêc kitaa susu ti vô a ge, od a ob vông vô ông. Om ông obêc kitaa a ên ông nêbê a vông kibun wê a vông ge viwen i tu ông lêm i lec ge od a ob vông i tiyi wê ông nêl ge.”

²⁴Mêd vêx tyo lax mi la kinêg vô ta ên nêbê, “Tag, ông nêb a kitaa susu vatya?” Om ta nêl vô ên nêbê, “Ông lôc nêl bê ông ob kô Jon Lipacên bazub.” ²⁵Mêd vêx tyo ngô kiyang wê ta nêl ge om tup mi lax vô Helot di lax nêl vô ên nêbê, “A nêb ông tung Jon Lipacên bazub lec pile ti mi vông vô a lutibed.” ²⁶Helot ngô kiyang wê vêx tyo nêl ge di nilô vô viyin mabu, lêc xovô kiyang wê hilu xôn di xomxo tibeac dô mi ngô hixôn ge, om nêb ob pwoo kiyang wê nêl vô vêx tyo ge vac lêm. ²⁷Mêgem Helot vông tibii vevac ti la ên nêb i loc kô Jon bazub, om tibii tyo la vac xumac

kalabuhu di la kitov Jon kwa tip, ²⁸di tung bazub lec pile di kô mi lax vông vô Helodias nu vêx tige di i kô mi la vông vô ta.

²⁹Mêd Jon nue ngivihî ngô wê i yib ge om he val kô Jon nôn mi la yev.

Yesu vet xomxo 5,000

(Matyu 14:13-21; Luk 9:10-17; Jon 6:1-13)

³⁰Nue ngivihî wê Yesu vông he la ge vena nêl kiyang wê he la nêl ge hixôn yuac wê he la vông ge kitong vô Yesu. ³¹Lêc xomxo tibeac la di lôm vô Yesu he nue ngivihî om hiyôv manôn wê he ob dô seac vêl di ya yaên ge ma. Mêgem Yesu nêl vô he ên nêbê, “Xam lam ên il ob la vac vigwe wê mahigun pileva di xomxo ti dôên ma ge ên xam loc dô seac vêl.” ³²Om Yesu he nue ngivihî, heche va la lec dipac di mila vac vigwe wê xomxo ti o dô vac ge lêm.

³³Lêc xomxo tibeac yê wê he la ge di xovô he om xomxo vac vigwe buhu toto ge tup mi la ên nêb he ob la vac vigwe ti wê Yesu he nue ngivihî obêc mila vac ge. Om he mug la tax, ³⁴dêc Yesu he nue mila timuên, mêd he lop vêl ên dipac di Yesu yê wê xomxo tibeac val dô ge om xo vigwe pisiv ên he, ên he dô tiyi xocbê bwoc sipsip wê ma ti o viac he ge lêm om Yesu nêl kiyang tibeac vô he.

³⁵Mêd hiyôv hoo la di vigwe huc om nue ngivihî la nêl vô Yesu ên nêbê, “Vigwe ga, vigwe mahigun pileva ti di hiyôv hoo la gwêba, ³⁶om ông vông xomxo i loc vac vigwe viyang viyang ên loc kisuu xen yaên wê ob ya ge.” ³⁷Lêc Yesu nêl vô he ên nêbê, “Xacxam va vông yaên vô he ên he i ya.” Lêc he nêl vô i ên nêbê, “Obêc bêna? Ông nêb xe la kisuu blet lec mone yul yuu mi lôm vông vô he ên he i ya, me?” ³⁸Mêd Yesu kinêg lax vô he ên nêbê, “Blet vaba dô? Xam loc wê lê.” Om he lax yê di vena nêl ên nêbê, “Blet vigê vilu di beac nôn yuubed dô.”

³⁹Om Yesu nêl vô he ên nêbê, “Xam tô mi dô kibun lec hisinac di xam dô kidu kidu.” ⁴⁰Om he tô mi dô kidu kidu lêc ya dô tiyi xocbê 100 di ya dô tiyi xocbê 50. ⁴¹Mêd Yesu hêm blet vigê vilu ge hixôn beac yuu ge di lax ma la lag kisiinê di kitaa lec blet yuu beac, mêd hibû blet di vông vô nue ngivihî ên nêb he i titang vô xomxo tige. Nang dêc hibû beac di vông vô nue nêb he i titang vô xomxo tige hixôn mi he ya. ⁴²Om xomxo vihati ya i den he, ⁴³lêc blet yuu beac wê gên dô ge nue ngivihî su vac sepac vigê yuu di tô mi la yuu mi i pup lec. ⁴⁴Xomxo wê dô mi ya gee, he vux tiyi xocbê 5,000 ge.

Yesu la lec mia luaên kisii

(Matyu 14:22-33; Jon 6:16-21)

⁴⁵Yesu nêl vô nue ngivihî nêb he i lec dipac di loc mug mi loc vigwe Betsaida wê yêp mia luaên vilu ganê. Om he loc mi la di Yesu dô ên nêb ob vông xomxo tige i lôc ben vêl lê. ⁴⁶He la vêl mêd Yesu loc mi la lec

kitôn ên nêb ob la kitaa. ⁴⁷Mêd vigwe buc di dipac wê nue ngivihi dô lec ge mila le vac mia luaên mahigun, di Yesu vaci gên dô vô mia luaên ninya, ⁴⁸di yê wê lea levac hôm dipac xôn hixôn nue ngivihi om he vông yuac levac lec hisooên mia lêc dipac o vyac la lêm, di vô kwabo lec wê vigwe ob vidii ge mêd Yesu lam lec mia kisii di val vô nue ngivihi di vông xocbê ob luu he vêl mi la ge. ⁴⁹Lêc nue ngivihi vihati yê wê Yesu lam lec mia kisii mi val ge om he so ên he nêb mêd xomxo wê yibên ge ti kinu val vô he, om he iac ⁵⁰di xona mabu. Lêc lutibed Yesu nêl vô he ên nêbê, “Xam xonaên i ma di xam xêmyaa i vô nivaha, ên ga a.” ⁵¹Mêd Yesu lec la lec dipac hixôn he di lea tip la. Lêc nue ngivihi yetac mabu, ⁵²ên he o xovô môt wê Yesu vông blet vô tibeac vihevage lêm, ên he nilô yen xêkizêc om he vyac xovôên ma.

Yesu vông xomxo tibeac vô nivaha lec gê Genesalet
(*Matyu 14:34-36*)

⁵³Mêd Yesu he nue ngivihi la lec dipac la mia luaên vilu ganê di la vac vigwe Genesalet, di ku dipac xôn mi i yêp ⁵⁴di he lop mi la, lêc lutibed xomxo vac vigwe tige xovô Yesu, ⁵⁵om he tup mi la vac vigwe tige vihati di la ken lie wê yidac ge lec pêt mi la vac vigwe wê Yesu la dô vac ge. ⁵⁶Om Yesu ob la vac vigwe levac ti me nipwo ti me vigwe mahigun ti ge od xomxo ken lie yidac mi la lii lec wetôv di kitaa Yesu nêb he ob hôm lec vinyumên wê i vông ge myahipu ên yidac i ma ên he, om he wê hôm vigê lec vinyumên wê Yesu vông ge he vihati vô nivaha lec.

Anutu xolac nginoo xomxo vông xolac vêl
(*Matyu 15:1-9*)

7 ¹He Palisi hixôn xomxo wê xovô Moses xolac ge wê he ben Jerusalem ge, he ya kitucma mi la vô Yesu, ²lêc yê wê Yesu nue ngivihi ya yaên lêc he o lipac vigê tiyi xocbê môt wê he Yuda mi vông ge lêm. Om he nêl ên he nêbê he ya ya vigê ningeac. ³Ên he Palisi hixôn Yuda vihati, he mi timu vô môt wê bue ilage vông ge bêga nêbê xomxo obêc lipac vigê tiyi xocbê môt wê bue mi vông ge pyap di ya yaên timuên. Lêc lipacên obêc ma ge od ob ya yaên lêm. ⁴Di he ob la kisuu yaên vac maket ge od ob vena lipac pyap lêc ya timuên. Di he mi timu vô môt wê bue vông ge tibeac hixôn, xocbê môt wê ob lipac kap yuu pile hixôn dêg ge. ⁵He vông môt bêge om Palisi hixôn xomxo wê xovô Moses xolac gee nêl vô Yesu ên nêbê, “Bêna lêc ông nume sea môt wê buge vông ge di ya hixôn vigê ningeacê?” ⁶Lêc Yesu nêl vô he ên nêbê, “Kiyang wê plopet Aisaia kivuu ilage nêl nôl lec xam xomxo kityooên di i yêp bêga nêbê,

‘Xomxo tige pîmil a ya mya pileva, lêc he nilô le teva ên a. ⁷He mi nêl kiyang wê xomxo vaci xovô ge, lêc he nêl ên he nêbê he nêl Anutu kiyang, om he yev vixa kitu vô a pisiv.’

⁸Om a nêl vô xam bêga bê xam sea Anutu xolac la yêp xel di la timu vô môp wê xomxo vaci mi vông ge.”

⁹Di Yesu nêl hixôn vô he ên nêbê, “Tyac xam so ên xam nêb môp wê xam sea Anutu xolac di la timu vô bume môp ge ob vô nivihha vô xamê? ¹⁰Ên xolac wê Moses nêl ge bêga nêbê, ‘Xam hôm tame mame lê lec di ngô he kiyang’, di kiyang ngwe nêl ên nêbê, ‘Xomxo ti obêc nêl kiyang nipaên lec ta yuu ma ge od xomxo i hi i yib.’ ¹¹Anutu xolac nêl bêge, lêc xam mi nêl ên xam nêbê xomxo ti nêl susu wê ob ngidu ta yuu ma xôn ya ge obêc dô, lêc xomxo tige obêc nêl vô yuu ên nêbê, ‘Susu tige a nêl pyap ên a nêb a ob vông vô Anutu, om muu nêb ob ma.’ ¹²Om môp tige tiyi xocbê xam le vac môp wê xomxo tige ob ngidu ta yuu ma xôn ge. ¹³Om môp wê xam timu vô bume vông xolac mi hôm xôn mi i yêp ge tiyi xocbê xam kitya Anutu xolac vêl. Lêc xam mi vông môp tibêge tibeac hixôn.”

Susu wê ob vông xomxo vô nipaên

(Matyu 15:10-20)

¹⁴Yesu keac xomxo lam vô i di nêl vô he vihathi ên nêbê, “Xam vihathi ngô kiyang wê a ob nêl ge di xovô lê. ¹⁵Susu wê ob la vac xomxo nilô ge o tiyi wê ob vông he vô nipaên ge lêm. Lêc susu wê yêp vac xomxo nilô di lop mi lam seac ge wê ob vông he vô nipaên. ¹⁶[Xam ninyam obêc yêp ge od xam ngô nêb di xovô.]”

¹⁷Mêd Yesu sea xomxo tigege di la xumac lôma, lêc nue ngivihhi la kinêg kiyang pilepacên tige kehe vô i. ¹⁸Om Yesu nêl vô he ên nêbê, “Ên xam êno, xam lungên kiyang tige kehe? Susu wê xomxo ob ya mi i la vac he nilô ge o tiyi wê ob vông he vô nipaên ge lêm, lêc mêd xam lungên tige? ¹⁹Susu yaên ob vông xomxo vô nipaên lêm, ên ob la vac he piyôp yuu xovôên hixôn lêm. Nge, ob la dô vac xêyaa di lop mi la vêl.” Yesu kiyang tige nêl ên nêbê susu yaên vihathi nivihha tiyi wê xomxo ob ya ge. ²⁰Di Yesu nêl vô he ên nêbê, “Kiyang wê yêp vac xomxo nilô lêc lop mi lam vixun ge wê ob vông he vô nipaên. ²¹Ên kiyang nipaên wê yêp vac xomxo nilô lêc lam le seac ge bêga nêbê xovôên nipaên, môp yôdac vêx yuu vux, vunên xomxo susu yôdac, hiên xomxo yib, ²²vông môp iimaên vô nipaên, môp madoên, môp nipaên yaya, nêl kiyang kityooên, vông môp vaxvax, yê xomxo nipaên, nêl kiyang nipaên lec xomxo, yong he, di vông môp vaxvax tiyi xocbê piyôp nivihha ti o yêp vô he lêm. ²³Môp nipaên tigege wê mi yêp vac xomxo nilô, om obêc lop mi lam vixun ge od ob vông xomxo vô nipaên.”

Pinisia vêx ti vông i vin Yesu

(Matyu 15:21-28)

²⁴Yesu sea vigwe tige di loc mi la vigwe ti wê yêp kwabo vô Taia ge, mêd la dô vac xumac ti ên nêb ob dô di xomxo yêên i i ma, lêc o tiyi wê

ob dô xôpacên ge lêm. ²⁵⁻²⁶Mêd vêx ti wê vimwo nipaên dô vac i nu vêx ge ngô wê Yesu lam dô vac xumac tige. Vêx tige o vêx Yuda lêm. Nge, i tibii Pinisia ti wê i ben vigwe kehe Silia ge. Lêc la vô Yesu di la yev vixa kitu vô di kitaa i ên nêbê i tii vimwo nipaên vêl ên nu vêx.

²⁷Lêc Yesu nêl vô i ên nêbê, “Il ob vông yaên vô nipwo mi he ya vêl lê, ên o tiyi wê il ob kô nipwo xen yaên mi nêx i loc vô noo ge lêm.”^a ²⁸Lêc vêx tyo nêl ên nêbê, “Xomxo levac, ông nêl kiyang nôn. Lêcom myapipu wê tô mi la dô vac tevol kwa ngibi ge, noo ya.” ²⁹Om Yesu nêl vô i ên nêbê, “Kiyang wê ông nêl ge niviha, om ông lôc bom, ên vimwo nipaên sea num gwêba di i vô niviha lec.” ³⁰Mêgem vêx tyo lax mi la ben di yê wê nu tyo diyêp lec pêt ge di xovô nêbê vimwo nipaên sea i di la.

Yesu vông xomxo wê yac di ninya vô kitu ge ti vô niviha lec

³¹Yesu sea vigwe Taia ên nêb ob la mia luaên Galili, om la Saidon di la Dekapolis di mila mia luaên Galili. ³²Lêc xomxo kô vux ti wê ninya vô kitu di vyac keacên ma ge mi la vô Yesu, di kitaa Yesu nêb Yesu i vyax vigê lec xomxo tige ên i vô niviha lec. ³³Om Yesu kô xomxo tige mi yuu la le vionên mêd Yesu kitiv vigê liyih la vac xomxo tyo ninya vilu vilu, mêd pisuv myaluc lec vigê di kitiv lec xomxo tyo get. ³⁴Mêd Yesu lax ma la lag kisii di vê myakilôhô xêkizêc di nêl vô xomxo tyo ên nêbê, “Epata.” Kiyang tige kehe bêga nêbê, “Ninyam i toc di ông ngô vigwe.” ³⁵Mêgem xomxo tige ninya toc di i ngô kiyang di get vô vinyin maên di i keac niviha. ³⁶Lêc Yesu vîbu xomxo tige xêkizêc ta ên nêb he i o lêc nêl tige kitong vô xomxo ya lêm. Yesu nêl kiyang tige tii vac vac vô he, lêc he o ngô lêm di he la nêl kiyang tige vô levac vô xomxo mi he ngô hixôn, ³⁷om he yetac mabu di nêl ên nêbê, “Môp wê i vông ge vihati niviha, di ici va tiyi wê ob vông xomxo ninya kitu, he ninya i toc ên he i ngô kiyang, di vông xomxo wê yac ge he i keac niviha.”

Yesu vet xomxo 4,000

(Matyu 15:32-39)

8 ¹Vô buc ti nang xomxo tibeac kitucma vô Yesu mi dô hixôn i, lêc he xen yaên wê he ob ya ge ma, om Yesu nêl nue ngivih lam di nêl vô he ên nêbê, ²“A xo vigwe pisiv ên xomxo tigae, ên he lam dô hixôn a tiyi buc yon di he xen yaên wê he ob ya ge ma, ³om he obêc dô vip dêc a vông he lax mi la ge od vip ob vông he vigê yuu vixa ma vac môp, ên he ya lam vac vigwe teva.” ⁴Lêc nue ngivih nêl vô i ên nêbê, “Om il ob la kô yaên gê na ên vông vô xomxo tigae mi he i ya? Ên vigwe ga, vigwe

^a 7:27 Kiyang wê Yesu nêl lec nipwo yuu noo ge, ge kiyang pilepacên wê nêl lec he Yuda hixôn tibii ba. ên he Yuda yê tibii wê o Yuda lêm ge nipaên, nêb he tiyi xocbê noo. Om nipwo tige tixuu lec he Yuda, di noo tixuu lec tibii ba wê o Yuda lêm ge.

myadongên.”⁵ Om Yesu kinêg vô he ên nêbê, “Xam blet vaba dô?” Di he nêl ên nêbê, “Xe blet vigê vilu di sec yuu dô.”

⁶ Om Yesu nêl vô xomxo tigeê vihati ên nêbê he i tô mi dô kibun, mêd hêm blet vigê vilu di sec yuu ge di kitaa lec mêd hibû di vông vô nue ngivihi ên nêbê he i titang vô xomxo, om nue ngivihi kô mi la titang vô he vihati. ⁷ Di beac nipwo ya dô om Yesu kitaa lec di vông vô nue ngivihi ên nêbê he i loc titang vô xomxo tigeê ên he i ya hixôn. ⁸ Mêd xomxo tigeê ya i tiyi he di myapîpu dô om he tung vac sepac vigê vilu di sec yuu mi i pup lec. ⁹ Xomxo tigeê tiyi xocbê 4,000 ge. Pyap di Yesu vông he lax mi la ben, ¹⁰ di lutibed Yesu he nue ngivihi loc mi la lec dipac di la vigwe Dalmanuta.

Palisi nêb ob yê do levac

(Matyu 16:1-4)

¹¹ Palisi ya val vô Yesu, ên nêb ob yaxên i, om la nga ên kiyang wê Yesu nêl ge di nêl nêb Yesu i vông do lag puunê ti hixôn ên he ob yê. ¹² Om Yesu nilô vô viyin di i nêl ên nêbê, “Bêna lêc xomxo gwêbaga nêl nêb he ob yê do levacê? A nêl hixôn nôn vô xam bêga bê xomxo wê dô gwêbaga ob yê do levac ti lêm.” ¹³ Mêd Yesu sea he di la lec dipac di loc mi la mia luaên Galili vilu ganê.

Yesu nêl kiyang pilepacên lec yis

(Matyu 16:5-12)

¹⁴ Yesu nue ngivihi la hixôn lêc he o xovô mi kô xen blet ti hixôn lêm, di blet nôn tibed yêp vac dipac. ¹⁵ Mêd Yesu nêl kiyang xêkizêc vô he ên nêbê, “Xam xona nêb ên yis wê he Palisi hixôn Helot vông ge.” ¹⁶ Mêd Yesu nue ngivihi nêl vôma, ên he so ên he nêb mêd Yesu nêl kiyang tige lec he xen blet wê ma ge. ¹⁷ Lêc Yesu xovô kiyang wê he nêl vôma ge om nêl vô he ên nêbê, “Bêna lêc xam nêl ên xam nêbê xam xom blet ma? Mêd xam gên o xovô lêmê? Xam nilôm xêkizêc ên vatya? ¹⁸ Xam mamnôn yêp lêc mêd xam o wê lêm? Di xam ninyam yêp lêc mêd xam o ngô kiyang lêm? Di yuac wê a vông vac xam mahigun ge, xam mêd lungên? ¹⁹ Om buc wê a hibû blet vigê vilu di vet xomxo 5,000 ya ge, od xam su myapîpu vac sepac vaba?” Om he nêl ên nêbê, “Sepac vigê yuu di tô mi la yuu.” ²⁰ Mêd Yesu nêl nang ên nêbê, “Di buc wê a hibû blet vigê vilu di sec yuu di vet xomxo 4,000 ya ge od xam su myapîpu vac sepac vaba?” Mêd he nêl ên nêbê, “Sepac vigê vilu di sec yuu.” ²¹ Om Yesu nêl vô he ên nêbê, “Xam gên o xovô tige lêmê?”

Yesu vông xomxo manôn tocên ti vô nivihia lec gê Betsaida

²² He mila vigwe Betsaida mêd xomxo kô vux wê manôn toc ge ti mi la vô Yesu di la kitaa Yesu nêb i vyax vigê lec i ên manôn i seac. ²³ Om

Yesu la hòm lec xomxo tige vigê di didii i mi yuu la ninyawehe, mêd Yesu pisuv myaluc lec xomxo tyo manôn di vyax vigê lec di kinêg ên nêbê, “Ông mamnôn seac mi ông wê susu ya?” ²⁴Mêd xomxo tyo yê ma la di nêl vô Yesu ên nêbê, “A xê xomxo lê, léc a xê he tiyi xocbê xax wê vô videba videba mi lam ge di a o xêvô he nôl lêm.” ²⁵Mêd Yesu vyax vigê lec xomxo tyo manôn tii vac mêd xomxo tyo yê vigwe xêkizêc di manôn vô nivihha lec om i yê vigwe vihati yêp seac. ²⁶Mêd Yesu nêl vô i ên nêbê, “Ông lôc vac bom bôbac di ông o léc loc vigwe Betsaida lêm.”

Pita nêl Yesu kitong nêb i Kilisi

(Matyu 16:13-20; Luk 9:18-21)

²⁷Yesu he nue ngivihhi loc mi la, nêb ob la vigwe Sisalia Pilipai om he mila môp ti, léc Yesu kinêg vô nue ngivihhi ên nêbê, “Xomxo mi nêb a letya?” ²⁸Om he nêl vô i ên nêbê, “Xomxo ya nêbê ông ge Jon Lipacên, di ya nêbê ông plopet Ilaija, di ya nêbê ông plopete ti.” ²⁹Om Yesu kinêg vô he ên nêbê, “Di xacxam va nêb a letya?” Mêd Pita nêl ên nêbê, “Ông Kilisi ti wê Anutu vông ông lam ên nêb ông lam ngidu xomxo xôn ge.” ³⁰Mêgem Yesu vibu he nêb he i o léc nêl i kitong vô xomxo lêm.

Yesu nêl myavinê wê ob tulec i ge kitong

(Matyu 16:21-28; Luk 9:22-27)

³¹Yesu nêl kiyang vô nue ngivihhi ên nêbê, “A, Xomxo Nu, a obêc kô myavinê levac mabu, di Yuda levac hixôn xomxo levac wê mi si daa vô Anutu gee di xomxo wê xovô Moses xolac gee, he obêc vô nimi vô a di hi a xib, di buc yon obêc lam la vêl di a obêc kidi lec magviha i tii vac.” ³²Yesu nêl kiyang tige seac vô he om Pita kô Yesu mi yuu la dô vïyonên, mêd Pita nêl xêkizêc vô Yesu ên nêb i nêlên kiyang tibêge i ma. ³³Léc Yesu pilepac manôn lax vô nue ngivihhi di nêl xêkizêc vô Pita ên nêbê, “Seten, ông loc vêl. Ên xovôên wê ông vông ge o tiyi xocbê xovôên wê Anutu vông ge lêm. Nge, xovôên wê ông vông ge tiyi xocbê xovôên wê xomxo kibun ga vông ge.”

³⁴Yesu keac nue ngivihhi hixôn xomxo tibeac ên nêb he i loc vô i, om nêl vô he ên nêbê, “Xomxo ti obêc nêb timu vô a vixag ge od i vông i vô nipwo lec di kilê vïyin i tiyi xocbê kilê xax pola ge di timu vô a vixag. ³⁵Ên xomxo ti obêc nêb viac ninivi ên vïyin yuu yibên ge od maviha wê i vông ge xôa obêc ma, léc xomxo ti obêc sea ninivi lec a lêg yuu xolac ge od ob dô maviha. ³⁶Ên xomxo ti obêc kituc susu kibun ga vihati tu ixe, léc obêc sea môp wê ob dô maviha ya ge od ob vô nivihha vô i tibêna? ³⁷Di xomxo obêc vông vatya ên kisuu maviha wê ob dô ya ge? ³⁸Xomxo gwêbaga sea Anutu di la vac môp nipaên, om xomxo ti vac he mahigun obêc vô nimi vô a hixôn a kiyang ge od a, Xomxo Nu, a êno obêc vô nimig vô i lec buc wê a obêc lop mi lôm hixôn angela ngibua di lam hixôn xêseac wê Mag vông ge.”

9 ¹Mêd Yesu nêl vô he ên nêbê, “A nêl hixôn nô n vô xam bêga bê xam wê xam le ga, xam ya obêc dô mamviha di wê xolac wê Anutu ben kisiinê ge obêc val hixôn xêkizêc.”

Yesu ninivi pikwê
(*Matyu 17:1-13; Luk 9:28-36*)

²Buc vigê vilu di sec ti lam la vêl mêd Yesu kô Pita yuu Jems yon Jon di he la lec kitôn dia ti, di heche va la dô, lêc yon yê wê Yesu ninivi pikwê mi vô bangwe, ³di i ngakwi vô kwem vivea lecên luu ngakwi kibun ga wê xomxo lipac i vô kwem ge vêl. ⁴Mêd yon yê wê Moses yuu Ilaija val keac hixôn Yesu ge. ⁵Om Pita nêl vô Yesu ên nêbê, “Xolac kehe, ga nivaha wê il dô ga, om xen ob lox xumac yon, ti vô ông, di ngwe vô Moses di ti vô Ilaija.” ⁶Pita nêl bêge pileva, ên yon xona mabu om Pita o xovô kiyang wê ob nêl ge lêm. ⁷Mêd vîyobtoc ti lam hivun he xôn, di vya ti lam vac vîyobtoc di nêl ên nêbê, “Ge a nug wê a xêgyaa vin lec i ge om xam ngô i vya.” ⁸Lêc lutibed yon yê ma la wê Yesu vaci le di yuu xôa ma ge.

⁹He sea vigwe kitôn di lax mi la, lêc Yesu vibu yon ên nêbê, “Mon o lêc nêl wê mon wê ge kitong vô xomxo ti lêm di i loc vô buc wê a, Xomxo Nu, a obêc kidi lec vac yibên ge lê.” ¹⁰Om yon hôm kiyang tige xôn mi i yêp vô yon, lêc bo ti wê Yesu nêl ên nêb ob kidi lec vac yibên ge, yon ngô lê, lêc yon o xovô kehe lêm om yon keac lec.

¹¹Mêd yon kinêg vô Yesu ên nêbê, “Xomxo wê xovô Moses xolac gee mi nêl ên he nêbê Ilaija obêc val tax di Kilisi obêc val timuên, om he nêl tibêge ên va?” ¹²Om Yesu nêl vô yon ên nêbê, “Vixôhilôg, Ilaija ge wê ob val mug ên vông môp yuu kiyang i vô nivaha lec lê. Lêc bêna lêc kiyang yêp vac xolac hixôn bêga nêbê Xomxo Nu obêc kô myavinê mabu di xomxo obêc yê i nipaên di vô nîmi vô i hixôn? ¹³A nêl vô xam bê Ilaija val pyap, lêc xomxo vông môp nipaên vô i tiyi xovôên wê he vông ge, tiyi xocbê kiyang wê plopete kivuu lec i mi i yêp vac kipihac ge.”

Yesu tii vimwo nipaên vêl ên xomxo ti
(*Matyu 17:14-21; Luk 9:37-43*)

¹⁴Yesu hixôn nue ngivihi yon ge milax vô nue vihati, lêc yê wê xomxo tibeac kitucma mi lam dô hixôn nue ngivihi ge, di xomxo wê xovô Moses xolac gee val dô hixôn di he hixôn Yesu nue ngivihi kinêgma lec kiyang. ¹⁵Mêd xomxo vihati gee yê Yesu di yetac mabu om tup mi la vô i di la nêl vidiiên vô i. ¹⁶Mêd Yesu kinêg vô nue ngivihi ên nêbê, “Xam dikeac lec kiyang vatya?” ¹⁷Mêd xomxo ti kidi vac he mahîgun di nêl ên nêbê, “Xolac kehe, a kô a nug vux tiga mi lam vô ông, ên vimwo nipaên dô vac i nilô om vông i dô yac di keacên ma, ¹⁸di buc wê vimwo nipaên tyo ob vông yuac vac i nilô ge od hôm i xôn di nêx i lec kibun di mya ngîmong lam vac mya

di i kic nivu lecma, di ninivi vô xêkizêc lec. Om a kitaa nume ngivihi ên a nêb he i tii vimwo nipaên tige i loc vêl lê, lêc he tiyiên ma.”

¹⁹Mêd Yesu nêl vô he vihati ên nêbê, “Xam vêx yuu vux gwêbaga, vông vinên wê xam vông ge nôn ma. Om a ob dô hixôn xam di i miloc vô buc tina lê, lêc xam vông i vinê? Di a ob kilê viyin wê xam vông ge di i miloc buc tina lê? Loc kô num tige mi lam.” ²⁰Om he la kô nu tige mi lam vô i, lêc vimwo nipaên wê dô vac nu tyo nilô ge yê Yesu om lutibed vông yuac makikun vac nu tyo nilô di nêx i lec kibun di vông i vô liyil liyil di mya ngimong lam vac mya.

²¹Mêd Yesu kinêg vô nu tige ma ên nêbê, “Vimwo nipaên tige dô vac num tige tiyi klismas vaba?” Lêc xomxo tyo nêl vô Yesu ên nêbê, “Vô buc wê i gên nipwo. ²²Om buc tibeac vimwo nipaên nêx i la vac ngwax di nêx i la vac mia ên nêb ob hi i yib. Om a kitaa ông bê ông obêc tiyi ge od ông xo vigwe pisiv ên xii di ngidu i xôn.” ²³Lêc Yesu nêl vô i ên nêbê, “Ông nêl ên ông nêbê mêd a obêc tiyi? Lêc a nêl vô ông bê xomxo ti obêc vông i vin ge od tiyi wê ob vông môp vihati ge.” ²⁴Mêd lutibed xomxo tige nêl ên nêbê, “A vông i vin, lêc a o vông i vin xêkizêc lêm, om ông ngidu vông vinên wê a vông ge xôn.” ²⁵Yesu yê wê xomxo tibeac val dô di dival valên om nêl kiyang xêkizêc vô vimwo nipaên ên nêbê, “Ông vimwo nipaên wê ông vông xomxo tiga ninya vô kitu di keacên ma ge, a nêl vô ông bê ông lam lop mi loc vixun vêl ên nu tiga, di ông o lêc lôc mi loc vac i nilô i tii vac lêm.” ²⁶Mêd vimwo nipaên iac mabu di hi nu tyo lec kibun sea, di sea i di lam la vêl. Mêd nu tyo yêp tiyiên ma tiyi xocbê xomxo yibên om xomxo tibeac so ên nêb mêd nu tyo yib. ²⁷Lêc Yesu la hôm lec i vigê di vông i le kisii.

²⁸Pyap dêc Yesu lax mi la xumac lôma di lax dô hixôn nue ngivihi lêc nue kinêg vô i ên nêbê, “Bêna lê lêc xe mô o tiyi wê xe ob tii vimwo nipaên tige vêl lêmê?” ²⁹Lêc Yesu nêl vô he ên nêbê, “Kitaaên tibed ge wê ob tii vimwo nipaên tibêge vêl, di môp baba ge ti o tiyi lêm.”

Yesu nêl kiyang vông lu yuu lec myavinê wê ob kô ge
(*Matyu 17:22-23; Luk 9:43-45*)

³⁰Yesu he nue ngivihi sea vigwe tige di loc mi la vac vigwe Galili, lêc Yesu nêb xomxo i o lêc xovô vigwe wê he ob la vac ge lêm, ³¹ên Yesu nêb ob nêl kiyang vô nue ngivihi vaci, om tixuu he ya kiyang bêga nêbê, “Xomxo ob vông Xomxo Nu la vac tibii vigê di he ob hi i yib, lêc buc yon obêc lam la vêl ge od obêc kidi lec mavîha tii vac nang.” ³²Yesu nêl bêge lêc nue ngivihi lungên kiyang tige kehe di xona om he o kinêg kiyang tyo kehe vô Yesu lêm.

Letya ob tu levac?
(*Matyu 18:1-5; Luk 9:46-48*)

³³He mila Kapaneam di la dô vac xumac lôma, lêc Yesu kinêg vô nue ngivihi ên nêbê, “Xam nêl kiyang vatya voma vac môpê?” ³⁴Lêc he dô

xôa maên, ên buc wê he lam vô môt ge od he ngaênma ên nêb mêd letya obêc tu he nêb mugênê? ³⁵Om Yesu tô mi dô di keac nue ngivihi vigê yuu di tô mi la yuu lam vô i di nêl vô he ên nêbê, “Xomxo ti obêc nêb tu mugên ge od i loc le timuên di vông yuac wê ob ngidu lie vihati xôn ge.”

³⁶Mêd Yesu la kô nipwo ti mi lam vac he mahigun, dêc kiva nipwo tyo lec di nêl vô nue ngivihi ên nêbê, ³⁷“Xomxo ti obêc hêm nipwo tibêga lec ên wê vông i vin a lêg ge od ge tiyi xocbê

hôm a lec êno, di xomxo ti wê hêm a lec ge od o tiyi xocbê hêm aca va lec lêm. Nge, hêm xomxo ti wê vông a lam ge lec hixôn êno.”

Xomxo wê o vông vevac vô il lêm ge, tiyi xocbê il nidpîpu

(Luk 9:49-50)

³⁸Jon nêl vô Yesu ên nêbê, “Xolac kehe, xe xê xomxo ti tii vimwo nipaên vêl ên xomxo lec ông lêm, om xe vibu i ên xe nêb i vôngên tibêge i ma, ên xomxo tige o mi dô hixôn xe mi timu vô ông lêm.” ³⁹Lêc Yesu nêl ên nêbê, “Xam o lêc vibu i lêm, ên xomxo ti obêc vông do levac lec a lêg ge od o tiyi wê ob nêl kiyang nipaên lec a decdec ge lêm. ⁴⁰Ên xomxo wê o vông vevac vô il lêm ge, ge tiyi xocbê il nidpîpu wê ob ngidu il xôn ge. ⁴¹A nêl hixôn nôb vô xam bê xomxo ti obêc vông mia numên vô xam ên wê xam vông i vin Kilisi ge od xomxo tige obêc kô nôb nivîha lec timuên.

Môt wê ob vông xomxo vô nipaên

(Matyu 18:6-9; Luk 17:1-2)

⁴²“Xomxo ti obêc vông nipwo tige ti sea vông vinên wê i vông ge di la vac môt nipaên ge od xomxo i nux ngidax lec i kwa di nêx i loc vac gwec madia. ⁴³Di ông vigêm vilu obêc didii ông mi la vac nipaên ge od ông kitov vêl di dô ya vigêm vilubed êdêc loc dô mamviha vac Anutu ben. Ên ông vigêm yuu xôn obêc dô ge od ob nêx ông la vac vigwe nipaên wê ngwax tum xuhu dia di ob yib lêm ge. ⁴⁴[Vac vigwe nipaên tige, myel vêê wê yibên obêc ma ge ob nga xomxo, di ngwax ditum hixôn di yibên ma.] ⁴⁵Di ông vixam vilu obêc didii ông mi la vac môt nipaên ge od ông kitov vêl di dô ya vixam vilubed êdêc loc dô mamviha vac Anutu ben. Ên ông vixam yuu xôn obêc dô ge od ob nêx ông la vac vigwe nipaên. ⁴⁶[Vac vigwe nipaên tige, myel vêê wê yibên obêc ma ge ob nga xomxo, di ngwax ditum hixôn di yibên ma.] ⁴⁷Di ông mamnôn vilu obêc vông ông la vac môt nipaên ge od ông pisupac vêl di dô ya mamnôn vilubed êdêc loc dô vac Anutu ben, ên mamnôn yuu xôn obêc dô ge od ob nêx ông la vac vigwe nipaên. ⁴⁸Vac vigwe nipaên tige, myel vêê wê yibên obêc ma ge ob nga xomxo, di ngwax ditum hixôn di yibên ma.

⁴⁹“Ngwax obêc la lec xomxo vihati tiyi xocbê xomxo hilee sol lec yaên ge. ⁵⁰Sol ge nivîha, lêc sol obêc vô nyen maên ge od il obêc vô vatya vô ên i vô nyen i tii vac nangê? Sol i dô vac xam, di xam dô hixôn lime di xemyaa i vin lec he.”

Yesu nêl kiyang lec môp wê vông ii maên vô nipaên ge
(*Matyu 19:1-12; Luk 16:18*)

10 ¹Yesu sea vîgwe tige di la vac vîgwe levac Judia di la vac vîgwe ti wê yêp mia Jodan vilu ganê. Mêd xomxo tibeac val kitucma vô Yesu om Yesu nêl xolac vô he tiyi môp wê mi vông ila ila ge.

²Mêd Palisi ya val, nêb ob yaxên i om kinêg nêbê, “Môp wê xomxo ob sea vinê ge, xolac nêb môp tibêge tiyi, me tiyiên ma?” ³Lêc Yesu kinêg lax vô he ên nêbê, “Xolac wê Moses vông ge nêbê va vô xamê?” ⁴Om he nêl ên nêbê, “Moses nêl ên nêbê xomxo ti obêc nêb sea vinê ge od ob kivuu kipihac wê nêbê yuu ob seama ge di vông vô vinê lê dêc yuu seama.” ⁵Lêc Yesu nêl vô he ên nêbê, “Moses kivuu xolac tige vô xam ên wê xam nilôm yen xêkizêc ta ge. ⁶Ên buc mugên ilage wê Anutu tung lag yuu kibun ge, od Anutu tung xomxo vêx yuu xôn vux. ⁷Mêgem môp yêp bêga nêbê vux ob sea ta yuu ma di la dô hixôn vinê, ⁸di yuu ob tiyi xocbê nôn tived. Om yuu ob dô tiyi xocbê nôn yuu ge lêm. Nge, yuu ob dô i tiyi xocbê nôn tived. ⁹Mêgem môp wê Anutu vông yuu tu nôn tived ge, xomxo i o léc tax i tip lêm.”

¹⁰He lax xumac lôma léc nue ngivihi kinêg kiyang tige vô Yesu tii vac nang. ¹¹Om Yesu nêl vô he ên nêbê, “Vux ti obêc sea vinê di la kô vêx paha ngwe ge od ge vông môp yôdac vêx yuu vux. ¹²Di vêx ti obêc sea liya di la kô vux paha ngwe ge od vêx tige vông môp yôdac vêx yuu vux.”

Yesu kitaa lec nue nipipwo
(*Matyu 19:13-15; Luk 18:15-17*)

¹³Xomxo kô nue nipipwo mi la vô Yesu, ên nêb i vyax vigê lec he di kitaa lec he, léc Yesu nue ngivihi kunac he nêb he loc vônê Yesu i ma. ¹⁴Lêc Yesu yê môp wê nue ngivihi vông ge di xêyaa vô myavinê om nêl vô he ên nêbê, “Vông nipipwo i lam vô a di le vac xônên i ma, ên xomxo tibêgee wê tu kehe ên vîgwe kisiinê. ¹⁵A nêl hixôn nôn vô xam bêga bê xomxo ti obêc vông i vin Anutu xolac mi la vac i kwa ngibi tiyi xocbê nipipwo tigae lêm ge od o tiyi wê ob la dô vac Anutu ben ge lêm.” ¹⁶Mêd Yesu kiva nipipwo tige di vyax vigê lec he di kitaa lec he.

Xomxo wê susu tibeac gee
(*Matyu 19:16-30; Luk 18:18-30*)

¹⁷Yesu loc mi la vô môp mi la, di xomxo ti tup mi la vô i vac môp, di la yev vixa kitu vô di kinêg ên nêbê, “Xolac kehe nivîha, a obêc vông bêna êdêc dô magvîha luta léc luta?” ¹⁸Lêc Yesu nêl vô i ên nêbê, “Bêna léc ông nêl nivîha lec a? Xomxo nivîha ti o dô lêm. Anutu vaci nôn tived wê nivîha. ¹⁹Ông xovô Moses xolac pyap wê nêl ên nêbê, ‘Ông o léc hi xomxo i yib lêm. Ông o léc vông yôdac vêx yuu vux lêm. Ông o léc vun xomxo

ngwe susu lêm. Ông o léc nêl kiyang kityooên lec xomxo ti lêm. Ông o léc kityoo xomxo di vô he susu vêl lêm. Ông loc vac tam yuu mam vya kwa ngibi.’” ²⁰Om xomxo tyo nêl vô Yesu ên nêbê, “Xolac kehe, buc wê a gên nipwo di i val tyip gwêbaga, a viac xolac gee vihati mi vông i vô nôn lec.” ²¹Mêd Yesu yê i manôn di xêyaa vin lec i, mêd nêl vô i ên nêbê, “Môp ti gên yêp wê ông ob vông hixôn ge. Ông loc vông susu wê ông vông ge vihati mi tibii i kisuu, di ông vông mone vô xomxo wê nêl susu maên ge, ên ông obêc vông bêge ge od ông obêc kô susu nôn nivaha gê kisii ganê. Ông loc vông bêge di lôm timu vô a vixag.” ²²Xomxo tyo ngô kiyang tige di nilô vô viyin levac ên i susu tibeac. Om sea Yesu di la.

²³Mêd Yesu manôn yê nue ngivihi di nêl vô he ên nêbê, “Xomxo wê susu tibeac ge obêc nêb la vac Anutu ben ge od obêc vông yuac levac vô he.” ²⁴Yesu nue ngivihi ngô kiyang tige di yetac mabu. Lêc Yesu nêl tii vac vô he ên nêbê, “Xam nuge, xomxo obêc nêb la vac Anutu ben ge od yuac levac. ²⁵Bwoc kamel obêc la vac yin kitu tocên ge, od obêc yuac levac, di

xomxo wê susu tibeac ge obêc nêb la vac Anutu ben ge od obêc yuac levac luu vêl.” ²⁶Om Yesu nue ngivihi yetac mabu yocên di nêl vô i ên nêbê, “Obêc tibêge ge od letya tiyi wê obêc la dô maviha vac Anutu ben ge?” ²⁷Lêc Yesu yê manôn la bôbac vô he di nêl ên nêbê, “Xomxo vaci o tiyi lêm, dom Anutu vaci ge od tiyi pyap. Ên môp vihati yang ge, Anutu tiyi wê ob vông ge.”

²⁸Mêd Pita nêl vô Yesu ên nêbê, “Om wê lê. Xe ga, xe sea susu wê xe vông ge vihati dô di lam timu vô ông vixam.” ²⁹Mêd Yesu nêl ên nêbê, “A nêl hixôn nôn vô xam bêga bê xomxo ti obêc sea ben hixôn tae mae lie di nue hixôn yuac yaên wê i vông ge ên wê nêb ob vông a lêg yuu xolac i vô levac ge, ³⁰od xomxo tige obêc kô xumac hixôn yuac yaên tibeac di tae mae lie di nue tibeac gê kibun ga, léc tibii obêc vông myavinê vô i hixôn, di buc timuên ge od obêc la dô maviha luta léc luta. ³¹Lêc xomxo mugên tibeac obêc lax mi la timu, di xomxo timuên tibeac obêc lam la mug.”

Yesu nêl kiyang vông lu yon lec myavinê wê ob kô ge
(*Matyu 20:17-19; Luk 18:31-34*)

³²Yesu he nue ngivihi loc mi la ên nêb ob la Jelusalem. Om he mila vac môp, léc Yesu la mug di nue ngivihi hixôn xomxo ya he timu vô i vixa. Mêd nue ngivihi xo kiyang tibeac, di xomxo wê la hixôn gee, he xona. Mêgem Yesu kô nue ngivihi vigê yuu di tô mi la yuu mi he la dô viyonên di Yesu nêl viyin wê ob tulec i ge kitong vô he, ³³om nêl ên nêbê, “Xam ngô lê. Il ob la Jelusalem, di xomxo ob vông Xomxo Nu vac xomxo levac wê mi si daa gee hixôn xomxo wê xovô Moses xolac gee vigê, di he ob vông kot vô i di hilu kiyang wê ob hi i yib ge xôn di vông i la vac tibii wê o Yuda lêm gee vigê, ³⁴mêd tibii tige ob so vya vô i di pisuv mya lec

di pisa ya yihi di hi i yib, di buc yon obêc lam la vêl ge od obêc kidi lec maviha nang.”

Jems yuu Jon nêb yuu ob tu levac
(*Matyu 20:20-28*)

³⁵Sebedi nu yuu Jems yuu Jon la vô Yesu di nêl vô ên nêbê, “Xolac kehe, xii ob kitaa susu ti vô ông, ên ông vông vô xii.” ³⁶Om Yesu nêl vô yuu ên nêbê, “Om muu nêb a vông bêna vô muuê?” ³⁷Mêd yuu nêl vô i ên nêbê, “Buc wê ông ob dô vac xêseac ge, od xii nêb ông vông lê levac vô xii di xii ngwe ob dô vô ông vigêm vilu hiyôv di ngwe ob dô vô vigêm vilu kêd.” ³⁸Lêc Yesu nêl vô yuu ên nêbê, “Susu wê muu kitaa vô a ge muu o xovô kehe lêm. Di kap wê a ob num vac ge, muu tiyi wê muu ob num vac hixôn, me? Di mia lipacên wê a ob lipac ge, muu tiyi wê muu ob lipac hixôn, me? Ên myavinê levac hixôn viyin obêc hivun a xôn.” ³⁹Mêd yuu nêl vô Yesu ên nêbê, “Xii tiyi pyap.” Lêc Yesu nêl vô yuu ên nêbê, “Vixôhilôg, myavinê wê a ob kilê ge, muu ob kilê hixôn. Di viyin wê a ob tulec ge, obêc tulec muu êno hixôn. ⁴⁰Lêc xomxo wê ob kô lê levac mi dô vô a vigêg hiyôv di dô vô a vigêg kêd ge, a o tiyi wê a ob nêl ge lêm. Ên Anutu vaci ob nêl xomxo wê i viac vigwe pyap vô he ge.”

⁴¹Yesu nue ngivihi vigê yuu ngô kiyang wê Jems yuu Jon nêl ge om he xêyaa vô myavinê vô yuu. ⁴²Om Yesu keac he vihati la vô i di nêl vô he ên nêbê, “Xam xovô ên xam nêbê xomxo wê tu tibii baba nêl levac ge, he mi yong he ên lê levac wê he kô ge, di he mi nêl kiyang xêkizêc vô lie ên nêb he i loc vac kiyang wê he nêl ge kwa ngibi. ⁴³Di xacxam va, xam o lêc vông môp tibêge lêm. Xam ti obêc nêb tu xam nêl levac ge, od i tu xam nêl xomxo yuac. ⁴⁴Di xam ti obêc nêb tu xam nêl mugên ge od i kô lê vidaaên di vông yuac vô lie vihati. ⁴⁵Ên a, Xomxo Nu, a o lam ên a nêb xomxo i vông yuac vô a lêm. Nge, a lam ên a nêb a ob vông yuac vô xomxo ên ngidu he xôn, di a ob xib ên vô xomxo tibeac vêl ên he nêl nipaên.”

Yesu vông xomxo ma tocên ti vô nivihia lec
(*Matyu 20:29-34; Luk 18:35-43*)

⁴⁶Yesu he nue ngivihi hixôn xomxo tibeac ge, he val Jeliko, nang dêc sea Jeliko di la nang. Lêc xomxo matocên ti lê nêbê Batimias wê ma Timias ge dô vô môp ninya, ên mi dô di mi kitaa mone vô tibii wê lam vô môp ge. ⁴⁷Lêc ngô wê Yesu Nasalet val ge, om tyuc vya levac bêga nêbê, “Yesu, Devit nu, ông xo vigwe pisiv ên a.” ⁴⁸Mêd xomxo tibeac higac di nêl ên nêbê, “Ông vyam i ma.” Lêc Batimias ngôên he ma di tyuc vya levac tii vac vac ên nêbê, “Devit nu, ông xo vigwe pisiv ên a.” ⁴⁹Mêgem Yesu val le di nêl ên nêbê, “Xam keac i lam.” Om he la nêl vô Batimias ên nêbê, “Ông xêmyaa i vô nivihia di ông kidi lec mi lam, ên Yesu nêl nêb

ông loc vô i.”⁵⁰ Om Batimias kwax i kol siot vêl di kidi lec lutibed di la vô Yesu.⁵¹ Mêd Yesu kinêg vô i ên nêbê, “Ông nêb a vông bêna vô ôngê?” Lêc xomxo ma tocên tige nêl vô i ên nêbê, “Xomxo levac, a nêb ông vông a magnôn i seac.”⁵² Mêd Yesu nêl vô i ên nêbê, “Om ông lôc, ên vông vinên wê ông vông ge vông ông vô nimviha lec.” Om lutibed xomxo tyo manôn seac di i yê vîgwe mêd la hixôn Yesu mi he la.

Yesu la vac vîgwe Jelusalem tiyi xocbê xomxo levac ge
(*Matyu 21:1-11; Luk 19:28-40; Jon 12:12-19*)

11 ¹ Yesu he nue ngivihî loc mi la ên nêb ob la Jelusalem. He la vac vîgwe Betpasi yuu Betani wê yêp kwabo vô kitôn Oliv ge. Vîgwe yuu ge yêp kwabo vô Jelusalem. Om Yesu vông nue ngivihî yuu la, ² di nêl vô yuu ên nêbê, “Muu loc vac vîgwe ti wê yêp vilu ganê. Wê muu obêc mîla ge od muu ob wê donki wê gên ligên ge ti wê xomxo vô yihî lec kwa di i dile ge. Donki tige xomxo ti gên o dô lec îla lêm. Om muu piwelac yihî vêl ên di didii i mî lam. ³ Lêc xomxo ti obêc kinêg muu ên nêbê, ‘Muu ob piwelac yihî tige vêl ên va?’ ge od muu nêl vô bê ‘Apumtau nêb ob kô mî vông yuac lec di obêc vông i lôm lutibed.’”

⁴ Yesu nêl bêge vô yuu di yuu loc mî la, di mîla yê bwoc donki ti wê xomxo ku xôn di ku lec xumac ti vuayen di i dile kwabo vac môt ge, mêd yuu piwelac yihî vêl, ⁵ lêc xomxo wê dile ge nêl vô yuu ên nêbê, “Bêna lêc muu dipiwelac yihî vêl ên donki tige?” ⁶ Om yuu nêl i tiyi kiyang wê Yesu nêl vô yuu ge, mêd xomxo tige tyuc lec, ⁷ om yuu didii donki tige mî lax vô Yesu, mêd yuu vax yuu ngakwi lec kisii dêc Yesu dô lec. ⁸ Mêd xomxo tibeac vax he nivimihî lec môt di he ya kô xax lihi wê he la kô vac yuac ge mî vax vac môt wê Yesu ob xoc vô ge. Môt tige wê he mî kô xomxo levac lec ge. ⁹ Mêgem he wê la mug hixôn he wê timu vô Yesu gee, he vihati tyuc ên nêbê,

“Il ob pimil Anutu. Di il ob hi vixad i pec ên xomxo ti wê tu Apumtau manôn mî val ge.

¹⁰ Il ob hi vixad ên il nêd king wê val gwêbaga, ên ob viac il tiyi xocbê bug Devit viac il ilage. Il ob vông Anutu lê i vô levac di i yêp kisii.”

¹¹ Mêd Yesu mîla Jelusalem di la vîlee vac Anutu xumac ngîbua mî la yê susu vihati ge pyap, mêd hiyôv hoo la di vîgwe ob buc, om Yesu hixôn nue ngivihî vîgê yuu di tô mî la yuu, he lax mî la vîgwe Betani.

Yesu nêl vya lôc hîguc nêb i vuac nôn lêm
(*Matyu 21:18-19*)

¹² Vîgwe vidiiên titige Yesu he nue ngivihî sea Betani di la, lêc vip den Yesu. ¹³ Om Yesu yê ma la hîguc ti wê le teva ge di lihi levac om la kwabo ên nêb ob yê bêc nôn ya yux lec ge od ob ya. Om la yê, lêc lihi pileva di

nôn ti o yux lec lêm, ên buc wê nônon ob yux lec ge gên yêp. ¹⁴Om Yesu nêl kiyang xêkizêc lec hîguc ên nêbê, “Tiyi buc vihati yang ge ông ob vuac nônon ti i tii vac lêm.” Yesu nêl bêge di nue ngîvihi ngô hixôn.

Yesu tii tibii wê vông vitevac vac Anutu xumac ngîbua gee la vêl
(*Matyu 21:12-17; Luk 19:45-48; Jon 2:13-22*)

¹⁵He mila Jelusalem mêd Yesu la vac Anutu xumac ngîbua di la tii xomxo wê divông vitevac gee la vêl, di xomxo wê vông mone luuma gee, Yesu kîpyax he nênon tevol sea, di xomxo wê vông vitevac lec menac gee, Yesu kîpyax he nênon sia sea, ¹⁶di Yesu vîbu xomxo nêb he i o lêc kilê he susu mi loc vac xumac ngîbua lêm. ¹⁷Mêd

Yesu nêl vô he ên nêbê, “Anutu vya yêp vac xolac bêga nêbê, ‘Xumac wê a vông ge, xomxo vac vîgwe vihati gee, he ob kitaa vac.’ Xolac nêl bêge, lêc xam vông i tu xocbê xumac wê tibii yôdac ob xôpac vac ge.”

¹⁸Mêd xomxo levac wê mi si daa gee hixôn he wê xovô Moses xolac gee ngô kiyang tige om myag môp wê ob hi Yesu yib lec ge, lêc he xona ên Yesu ên wê xomxo vihati yetac ên kiyang wê Yesu nêl ge. ¹⁹Yesu he nue ngîvihi dô di vîgwe buc om he sea Jelusalem di lax mi la Betani.

Kitaaên wê xomxo vông vinên vông ge ob vô nônon lec
(*Matyu 21:20-22*)

²⁰Vîgwe vidiên titige, he lax mi la Jelusalem lêc yê wê hîguc tige lihi yal vêl di mupac vac kitôn di i la tô kehe. ²¹Mêd Pita xovô kiyang wê Yesu nêl vihevage om nêl vô i ên nêbê, “Xolac kehe, wê lê. Xax ti wê ông nêl vyam lôc vihevage, tyo mupac.” ²²Lêc Yesu nêl vô he ên nêbê, “Xam vông i vin Anutu. ²³A nêl hixôn nônon vô xam bêga bê xomxo ti obêc nêl vô kitôn tige bê i pul vêl mi loc vac gwec, di xomxo tige nilô ob vông yuu lêm, nge, obêc vông i vin xêkizêc ên nêbê kiyang wê i nêl ge ob vô nônon lec ge od ob vô nônon lec. ²⁴Om a nêl vô xam bêga bê xam obêc nêb kitaa susu ti vô Anutu ge od xam vông i vin xêkizêc bê xam obêc kô susu tige, ên xam obêc vông bêge ge od xam obêc kô i tiyi wê xam kitaa ge.

²⁵“Di buc wê xam ob kitaa vô Anutu ge od lime ti nênon soên obêc yêp vô xam ge od xam kitya nîpaên tige vêl lê, êdêc Mag wê dô lag puunê ge i kitya xam nênon nîpaên vêl hixôn. ²⁶[Lêc xam obêc kitya lim tige nênon nîpaên vêl lêm ge od Mag wê dô kisiinê ge obêc kitya xam nênon nîpaên vêl êno lêm.]”

Xomxo kinêg xêkizêc wê Yesu vông ge kehe
(*Matyu 21:23-27; Luk 20:1-8*)

²⁷Yesu he nue ngîvihi milax Jelusalem tii vac, mêd Yesu la vîlee vac Anutu xumac ngîbua lêc xomxo levac wê mi si daa gee hixôn xomxo wê xovô Moses xolac gee hixôn he Yuda levac levac, he val vô Yesu, ²⁸di

val kinêg vô i ên nêbê, “Letya vông ông lam ên nêb ông lam vông môt tibêge? Ông tu letya manôn di vông môt tibêge?” ²⁹Lêc Yesu luu he vya di nêl lax vô he ên nêbê, “A êno ob kinêg kiyang ti vô xam, di xam obêc nêl kitong ge od a ob nêl xomxo ti wê vông a lam ge kitong vô xam. ³⁰Om a ob kinêg xam bêga bê môt wê Jon Lipacên lipac xomxo ge, môt tige kehe yêp vô letya? Ge yêp vô Anutu lag kisiinê, me yêp vô xomxo kibun ga? Xam nêl kehe kitong vô a.”

³¹Om he ngaênma di nêl voma ên nêbê, “Il obêc nêb va? Ên il obêc nêl bê Anutu lag kisiinê vông Jon lam ge od Yesu obêc nêl vô il bê, ‘Bêna lêc xam o vông i vin kiyang wê Jon nêl ge lêmê?’ ³²Lêc il obêc nêl bê xomxo kibun ga vông Jon la lipac xomxo ge od tiyiên ob ma.” He nêl bêge, ên he xona ên xomxo, ên xomxo vihati vông i vin ên he nêbê Jon ge plopet nôn. ³³Mêgem he nêl vô Yesu ên nêbê, “Xe o xovô lêm.” Mêd Yesu nêl vô he ên nêbê, “Om a êno ob nêl xomxo ti wê vông xêkizêc vô a ge kitong vô xam lêm.”

Kiyang pilepacên lec xomxo nipaên wê viac yuac ge

(Matyu 21:33-46; Luk 20:9-19)

12 ¹Mêd Yesu nêl kiyang pilepacên ti vô xomxo bêga ên nêbê, “Xomxo ti xin wain vac yuac di ku xenac kisuu lec di yev lôva ti wê xomxo ob gig xax nôn vac ge di lox xumac wê xomxo ob dô vac di viac yuac ge. Mêd xomxo tige nêb ob la dô vac vîgwe teva ngwe, om vông yuac tige vac xomxo ya vîgê ên nêb he i viac. Pyap di xomxo tige la dô teva ngwe, ²di buc wê wain huu ge om vông nue yuac ti lax mi la vô xomxo wê viac yuac wain ge ên nêb i loc kô wain nôn ya. ³Xomxo tyo mila, lêc xomxo wê vông yuac lec wain ge hôm i xôn di hi i di vông i lax mi la pileva. ⁴Nang dêc xomxo ti wê i yuac ge vông nue yuac ngwe la vô he nang, lêc he hi i lec bazub di vô vya nipaên vô i di vông i lax mi la nêb. ⁵Mêd xomxo levac vông nu yuac ti wê vông yon ge la nang, lêc xomxo tige hi i yib. Mêd xomxo tyo vông nue yuac toto la lêc he hi he ya vô nipaên di hi he ya yib. ⁶Mêd xomxo tibed dô hixôn xomxo levac tige. Ge i nu tuc wê i xêyaa vin lec i ge om buc ti lêc xomxo levac tyo vông nu tuc la vô xomxo wê viac i yuac ge, ên nêl ên nêbê, ‘Ga aca va nug om he ob kô i lec nivîha di la vac kiyang wê i vông ge kwa ngibi.’ ⁷Lêc xomxo wê viac yuac tige nêl voma ên nêbê, ‘Xomxo tige wê obêc tu yuac kehe om il ob hi i yib êdêc yuac ga i tu il xe.’ ⁸Om he hôm i xôn di hi i yib, di nêx i nôn la yêp vô yuac nînya.

⁹“Om xomxo ti wê i yuac ge ob vô vatya? Ge ob la hi xomxo tige yib di vông i yuac vô xomxo baba mi he viac nang.

¹⁰“Kiyang wê yêp vac Anutu xolac ge xam mêd o kitong lêm? Ên kiyang yêp bêga nêbê,

‘Ngîdax ti wê xomxo xumac loxên yê lêc nêbê tiyiên ma ge, ge wê tu ngîdax xêkizêc wê ob hôm xumac xôn ge. ¹¹Apumtau vaci vông tige om xe xê tiyi xocbê susu nivîha yang ge.’”

¹²Xomxo levac wê mi si daa gee hixôn xomxo wê xovô Moses xolac gee, he xovô ên he nêbê Yesu nêl kiyang pilepacên tige lec he, om he nêb he ob hôm Yesu xôn, lêc he xona ên xomxo tibeac, om he sea Yesu di la.

Xomxo kinêg Yesu lec mone wê ob tung vô Sisa ge
(*Matyu 22:15-22; Luk 20:20-26*)

¹³He vông Palisi ya hixôn Helot nue ya la vô Yesu ên nêb ob kityoo Yesu ên vông i nêl kiyang ya i so. ¹⁴Om he val nêl vô i ên nêbê, “Xolac kehe, xe xovô ên xe nêbê ông ge wê ông nêl kiyang hixôn nôn di ông o xona ên xomxo ti lêm, ên ông wê xomxo vihati tiyima, om ông mi nêl kiyang nôn di ông tixuu xomxo vihati ya kiyang wê Anutu vông ge. Om xe nêb xe ob kinêg vô ông bê tiyi wê il Yuda ob vông mone takis vô king Sisa ge, me il vôngên ob ma?”

¹⁵Lêc Yesu xovô kiyang kityooên wê yêp vac he nilô ge om nêl vô he ên nêbê, “Bêna lêc xam nêb xam ob yaxên a? Xam kô mone ti mi lam ên a xê.” ¹⁶Om he kô mone ti mi lam, di Yesu kinêg vô he ên nêbê, “Letya kinu yuu lê wê yêp lec mone tiga?” Om he nêl ên nêbê, “Sisa kinu yuu lê.” ¹⁷Mêgem Yesu nêl vô he ên nêbê, “Om susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu.” Mêd xomxo tigege ngô kiyang wê Yesu nêl ge di yetac mabu.

He kinêg vô Yesu lec môp wê xomxo ob kidi lec vac yibên ge
(*Matyu 22:23-33; Luk 20:27-40*)

¹⁸Xomxo Sadyusi ya val vô Yesu. He Sadyusi ge, he vông i vin ên he nêbê xomxo ob kidi lec vac yibên lêm. Om he la nêl vô Yesu ên nêbê, ¹⁹“Xolac kehe, Moses xolac nêl bêga vô il ên nêbê xomxo ti obêc kô vêx ti lêc nu ma di liya yib di vinê dô ge od vux tyo li timuên ob ii vêx tyo nang di vông nue, êdêc nue i tu susu wê ma yibên vông ge kehe. Moses xolac nêl bêge, ²⁰om wê vux vigê vilu di sec yuu ob dô lec ta yuu ma tived, dêc li tuc obêc kô vêx ti lêc yib di nu ma ge, ²¹od li môn ob ii vêx tige i tii vac nang, lêc wê obêc yib di nu ma ge od li gwaa ob ii nang, lêc wê li gwaa obêc yib ge ²²od lie timuên vihati ob timu vô môp tived ge dêc ii vêx tige, lêc wê vihati obêc yib di nue ma, dêc vêx tyo obêc yib timuên. ²³Om xe nêb xe ob kinêg vô ông bê buc wê xomxo yibên obêc kidi lec ge od vêx tige obêc tu vux tina vinê? Ên vux vigê vilu di sec yuu, he xôn ii vêx tived lec buc wê he dô maviha ge.”

²⁴Lêc Yesu nêl vô he ên nêbê, “Xam nêl i so di kehe bêga nêbê xam o xovô kiyang wê yêp vac xolac ge lêm, di xam o xovô xêkizêc wê Anutu vông ge lêm. ²⁵Ên buc wê xomxo obêc kidi lec maviha vac yibên ge, vêx yuu vux ob iima vô buc tige lêm. Nge, he ob dô tiyi xocbê angela lag puunê ge.

²⁶“Di kiyang lec môp wê xomxo yibên ob kidi lec maviha ge, xam mêd lungên kiyang bo ti wê Moses kivuu lec xax wê ngwax ditum lec ge? Vac

kiyang tige Moses kivuu Anutu vya wê nêl vô i ge mi i yêp vac kipihac xolac bêga nêbê, 'A ga, Anutu wê Eblaham yuu Aisak yon Jekop mi kita a vô a.' ²⁷Om kiyang tige nêl kitong ên nêbê Anutu o tu xomxo yibên nêl Anutu lêm. Nge, Anutu tu xomxo maviha nêl Anutu. Om kiyang wê xam nêl ên xam nêbê xomxo ob kidi lec vac yibên lêm ge, xam nêl i so."

Xolac yuu wê nginoo xolac baba vêl ge
(*Matyu 22:34-40; Luk 10:25-28*)

²⁸Xomxo wê xovô Moses xolac ge ti val ngô wê he ngaênma lec kiyang ge di ngô wê Yesu luu he kiyang ya kiyang nivihâ ge, om kinêg vô Yesu ên nêbê, "Xolac wê Anutu nêl vô Moses ge, tina wê nginoo xolac baba vêl ge? ²⁹Om Yesu nêl vô i ên nêbê, "Xolac ti wê yêp tax di nginoo baba vêl ge bêga nêbê, 'Xam xomxo Islel, xam ngô lê. Il Apumtau Anutu, i Apumtau tived. ³⁰Ông xêmyaa i vin lec ông Apumtau Anutu di ông vông nilôm yen yuu piyôp di xêkizêc hixôn kinum i loc diluhu vô Anutu.' ³¹Di xolac ti wê vông yuu ge yêp bêga nêbê, 'Ông xêmyaa i vin lec xomxo baba i tiyi xocbê ông xêmyaa vin lec ôcông va ge.' Xolac baba ti o nginoo xolac yuu ge vêl lêm."

³²Mêd xomxo tige nêl vô Yesu ên nêbê, "Xolac kehe, ông nêl ge nivihâ. Ông nêl kiyang nôn ên ông nêbê Anutu ge tived di ngwe o dô hixôn i lêm. ³³Om il xêdyaa ob vin lec i di il ob vông nilôd yuu piyôp hixôn xêkizêc vihâti i loc diluhu vô Anutu, di il xêdyaa ob vin lec xomxo baba tiyi xocbê il xêdyaa vin lec icil va ge, ên il obêc vông bêge ge od ob nivihâ luu daa wê xomxo mi si lec ngwax hixôn daa baba ya vêl."

³⁴Mêd Yesu ngô wê xomxo tige nêl kiyang hixôn piyôp nivihâ ge om nêl vô i ên nêbê, "Ông o dô teva ên Anutu ben kisiinê lêm." Mêd xomxo vihâti xona ên wê ob kinêg kiyang ya vô Yesu nang ge.

Yesu kinêg lê Kilisi vô he
(*Matyu 22:41-46; Luk 20:41-44*)

³⁵Yesu la nêl xolac vô xomxo vac Anutu xumac ngibua di nêl bo ti hixôn bêga nêbê, "Bêna lêc xomxo wê xovô Moses xolac ge nêl ên he nêbê Kilisi wê Anutu nêb ob vông i lam ge, ge Devit nu? ³⁶Ên Myakilôhô Ngibua vông xovôên vô Devit om Devit vaci kivuu kiyang bêga nêbê,

'Apumtau Anutu nêl vô a Apumtau ên nêbê, Ông dô vô a vigêg hiyôv di a obêc vông tibii wê vông vevac vô ông ge he i dô vac ông kwa ngibi.'

³⁷Om kiyang tige, Devit vaci nêl lec Kilisi ên nêbê i Apumtau. Om bêna lêc xomxo nêl ên nêbê Kilisi ge Devit bue timuên ti?" Mêd xomxo tibeac nêb ob ngô kiyang wê Yesu mi nêl ge.

Yesu nêl xomxo wê xovô Moses xolac gee nêl nipaên kitong
(*Matyu 23:1-36; Luk 11:37-54; Luk 20:45-47*)

³⁸Yesu nêl kiyang vô xomxo bêga ên nêbê, “Xam xona nêl ên xomxo wê xovô Moses xolac gee, ên he xêyaa vin lec môt wê he ob vinyum ngakwi dia di la vilee lec wetôv, ên he nêb xomxo i yê he di kô he lec, ³⁹di he obêc la vac xumac lilo, me he ob la ya vizid levac ge, od he nêb he ob dô lec sia nivîha wê xomxo levac mi dô lec ge. ⁴⁰Lêc he mi vô xomxo vêxôv nêl susu yuu xumac vêl ên he, di buc wê he ob kitaa ge od he viyum nêl nipaên vac kitaaên dia. Om he ob kô myaviwen levac mabu luu vêl.”

Vêxôv ti vông daa vô Anutu ge
(*Luk 21:1-4*)

⁴¹Yesu dô kwabo vô kilong wê xomxo mi tung mone daa vac ge di yê wê xomxo tibeac lam tung mone vac ge. Mêd xomxo wê mone levac gee he lam tung mone levac vac kilong, ⁴²mêd vêxôv wê nêl mone ma ge ti val tung mone hi yuu tya vac kilong. ⁴³Mêd Yesu keac nue ngivîhi lam vô i di nêl vô he ên nêbê, “A ob nêl hixôn nôl vô xam bê mone hi nôl yuu tya wê vêxôv tiga lam tung vac kilong ge nginoo mone wê xomxo baba lam tung ge vêl. ⁴⁴Ên he mone levac dô, lêc he lam tung viwen di he xe levac dô, di vêxôv tiga, i nêl mone ma lêc lam tung mone yuu tya wê i vông ge la vac kilong, di ti o dô wê ob kisuu xen yaên lec mi ya ge lêm.”

Yesu nêl lec viyin wê ob val timuên ge
(*Matyu 24:1-14; Luk 21:5-19*)

13 ¹Yesu lop vac Anutu xumac ngîbua ên nêb ob la, lêc nue ngivîhi ti nêl vô i ên nêbê, “Xolac kehe, xumac tigae, nivîha yang di tibii lox ya ngidax nivîhaviha.” ²Lêc Yesu nêl vô i ên nêbê, “Xumac levac wê xam diwê ga, a nêl vô xam bê obêc buc timuên ge od ngidax tigae, ngwe ob dô lec ngwe kisii lêm. Ên tibii ob dii di nêx sea.”

³Mêd Yesu la dô lec kitôn Oliv wê yuu xôn Anutu xumac ngîbua le tiyima ge, lêc Pita yuu Jems di Jon yuu Andlu mîla vô Yesu di heche va dô, di he kinêg vô Yesu ên nêbê, ⁴“Xe nêb ông nêl vô xe bê kiyang wê ông nêl lec xumac ngîbua ge obêc vô nôl lec yelacna? Di do tina wê obêc val vô xe tax ên xe xê di xovô bê kiyang tige obêc vô nôl lecê?”

⁵Mêgem Yesu nêl vô he ên nêbê, “Xam viac xam nivîha êdêc xomxo i o lêc kityoo xam lêm. ⁶Ên xomxo tibeac obêc val nêl a lêg di nêl bêga nêbê he Kilisi om obêc kityoo xomxo tibeac.

⁷“Di xam obêc ngô kiyang wê nêbê vevac tyip vac viğwe ya mi xomxo hima ge od le i lêc yetac di xona lêm. Ên vevac tige obêc val, lêc ge o buc myahîpu tyo lêm. Nge, buc tyo gên yêp. ⁸Ên tibii viyang ngwe ob

vông vevac vô viyang ngwe, di tibii viyang viyang ob dô kidu kidu di vông vevac vômâ, di ngayêg ob yoc vac vigwe ya di vip ob den xomxo vac vigwe ya. Om viyin tigege wê ob val taxlee vô xomxo léc viyin tibeac gên yêp wê ob val timuên.

⁹“Xacxam va viac xam nivîha, ên xomxo obêc hôm xam xôn di vông xam la le kot vô kaunsil manôn, di he ob hi xam vac xumac lilo nilô, di he ob vông xam la le vô king hixôn gavman levac manôn mi he vông kot vô xam ên wê xam vông i vin a ge, om xam ob nêl a xolac kitong vô he. ¹⁰Ên xomxo vihati ob ngô xolac pyap lê, dêc buc myahîpu ob val timuên. ¹¹Mêd buc wê he obêc hôm xam xôn di vông xam la vac kot ge od le i léc xona di nêl bê ‘Xe ob nêl kiyang bêna vô he?’ lêm. Buc wê xam ob la le vô he manôn ge od xam nêl i tiyi kiyang wê Myakilôhō Ngibua ob vông vô xam vô buc tige, ên kiyang wê xam ob nêl ge obêc tiyi xocbê xacxam va kiyang ge lêm. Nge, ge kiyang wê Myakilôhō Ngibua vông vô xam ge. ¹²Vô buc tige xomxo ya obêc vông heche va lie la vac tibii vigê ên nêb tibii i hi he yib, di mae obêc vông heche va nue vô tibii bêge êno, di nue obêc yê tae mae nipaên di vông he vac tibii vigê di tibii obêc hi he yib. ¹³Mêd xomxo vihati obêc yê xam nipaên ên wê xam vông i vin a lêg ge. Di xomxo ti obêc le xêkizêc vac vông vinên di i la tyip vô buc myahîpu ge od Anutu obêc vông i la dô vac i ben.

Nipaên nôn obêc val timuên
(*Matyu 24:15-28; Luk 21:20-24*)

¹⁴“Obêc buc timuên ge, susu nipaên nôn wê ob vông vigwe vô nipaên ge obêc la le vac vigwe ngibua ti wê xomxo vibu nêbê susu nivîha pileva ob le vac ge. (Xam wê xam kitong kiyang tiga, xam xovô kiyang tiga kehe lê.) Di buc wê susu tige obêc val le seac ge od xomxo wê dô vac vigweJudia ge, he i pec mi loc lec vigwe kitôn, ¹⁵om he wê dô lec xumac kisii ge he i o léc lop mi lax kô susu ti vac xumac nilô lêm, ¹⁶di he wê dô vac yuac lôma ge he i o léc pop mi lax kô vinyumên ti hixôn lêm. ¹⁷Di vêx wê nu dô vac xêyaa hixôn vêx wê vông lul vô nue ge, he ob dô vac viyin levac vô buc tige. ¹⁸Mêgem xam kîtaa vô Anutu bê viyin tige i o léc val vô buc wê lun yuu ningigooên ge lêm, ¹⁹ên viyin wê ob val vô buc tige obêc levac mabu yocên luu viyin baba vihati vêl. Ên buc mugên ilage wê Anutu tung susu vihati ge di i val vô buc gwêbaga, hixôn buc wê ob val timuên ge, viyin tulec xomxo, léc o tiyi xocbê viyin wê a nêl ga lêm. ²⁰Viyin tige obêc levac mabu, léc Anutu obêc xovô xomxo wê i vînoo pyap nêb he tu ixê ge om ob tax buc tige tip myabo. Ên buc obêc yêp dia ge od viyin tige obêc kitya xomxo vihati vêl.

²¹“Vô buc tige xomxo ti obêc nêl vô xam ên nêbê, ‘Xam wê lê. Kîlisi dô ga,’ me obêc nêl bêga nêbê, ‘Kîlisi dô ganê’ ge od xam o léc vông i vin lêm. ²²Ên xomxo kityooên ya obêc val nêbê he Kîlisi me he plopete, di he ob vông

do levac hixôn do toto wê xomxo ob yetac ên ge di pilepac xomxo nilô la vô kiyang kityooên wê he nêl ge, om obêc tiyi ge od obêc kityoo xomxo wê Anutu vînoo he pyap ge ya hixôn. ²³Mêgem xam xona ên xam di viac xam nivihâ, ên kiyang wê ob vô nôn lec timuên ge a nêl vihati kitong yêp seac vô xam.

Buc wê Xomxo Nu ob vena ge
(*Matyu 24:29-31; Luk 21:25-28*)

²⁴“Viyin levac tige obêc tip la vêl, nang dêc hiyôv yuu dentuc ob vô mapitoc di linacên obêc ma, ²⁵di pitua lag puunê obêc tô sea mi lam, di susu xêkizêc wê kisii ganê ge ob vô yocycoc mi la di lôm. ²⁶Mêd vô buc tige xomxo ob yê Xomxo Nu ob lam vac viyobtoc hixôn xêseac yuu xêkizêc levac di lam. ²⁷Mêd a ob vông angela loc vac viğwe vihati di i loc tiyi kibun yuu lag myahipu di loc vilu vô xomxo wê Anutu vînoo he pyap ge vihati.

Kiyang pilepacên lec xax wê mi pwoc ge
(*Matyu 24:32-35; Luk 21:29-33*)

²⁸“Xam xovô kiyang lec xuc. Ên xuc obêc val ge od xam xovô ên xam nêbê buc wê susu ob vô nôn nivihâ lec ge val. ²⁹Mêgem xam obêc wê susu wê a nêl vô xam ga obêc vô nôn lec ge od xam obêc xovô bêga bê buc wê a obêc lop mi lôm ge vô kwabo lec. ³⁰A nêl hixôn nôn vô xam bê xomxo wê dô gwêbaga ge obêc dô di kiyang wê a nêl ga vihati obêc vô nôn lec vêl lê. ³¹Lag yuu kibun xôa obêc ma, di a kiyang ti xôa obêc ma hixôn lêm. Nge, vihati obêc yêp.

Xomxo ti o xovô buc wê Yesu obêc vena lec ge lêm
(*Matyu 24:36-44*)

³²“Buc ti wê kiyang tige ob vô nôn lec ge, xomxo ti o xovô buc tige lêm, di angela wê dô lag puunê ge êno o xovô buc tige lêm, di Anutu nu a, a êno lungên, di Mag vaci tived wê xovô buc tige. ³³Om xam viac xam di bin buc wê Xomxo Nu ob vena lec ge, ên buc tige xam o xovô lêm.

³⁴“Ge tiyi xocbê xomxo ti sea ben ên nêb ob la dô viğwe bangwe, om vông vuac wê i vông ge vac nue toto viğê ên nêb he i viac, di nêl vô xomxo ti wê mi viac vuayen ge nêb i dô di yaxên buc wê ob vena lec ge. ³⁵Mêgem xam êno, xam dô mi yaxên buc, ên xam o xovô buc wê xomxo levac tyo ob vena lec ge lêm, om mêd obêc vena vô bucên me vivuaên mahigun, me wê kokilêx ob vô vya ge me viğwe vidiiên, ge xam lungên. ³⁶Om xam dô mi yaxên, ên gec léc xam diwêp di i vena lutibed. ³⁷Om kiyang ga, a nêl vô xam di a nêl vô xomxo vihati hixôn bêga ên a nêbê xam dô di yaxên buc tige.”

Xomxo levac wê Yuda gee nêb ob hi Yesu i yib
(*Matyu 26:1-5; Luk 22:1-2; Jon 11:45-53*)

14 ¹Buc yuu obêc lam la vêl ge od xomxo Yuda ob myêl levac di ya blet xêkizêc wê yis maên ge ên nêb ob xovô buc Pasova. Mêd

xomxo levac wê mi si daa gee hixôn xomxo wê xovô Moses xolac gee, he myag môp wê nêb ob hôm Yesu xôn xôpacên di hi i yib ge. ²Lêc he nêl ên he nêbê, “Il ob hôm i xôn lec buc levac Pasova lêm, ên xomxo obêc yê il nipaên di vông vevac vô il.”

Vêx ti too mia nivivea lec Yesu bazub

(Matyu 26:6-13; Jon 12:1-8)

³Yesu la vîgwe Betani di la dô vac Saimon ben. Saimon ge wê kityax mahizihizi ya ninivi ilage, lêc gwêbaga vô nivîha lec. Mêd Yesu dô mi ya hixôn i, di vêx ti kô butol nivîha wê mia nivivea nivîha le vac ge ti mi lam vô i. Mia tige mone levac. Mêd vêx tige tax butol mya di too mia nivivea tige lec Yesu bazub. ⁴Lêc xomxo wê dô ge, he ya yê môp tige tiyiên ma di nêl voma ên nêbê, “Bêna lêc vêx tige too mia tige sea? ⁵Mia tige tiyi wê il ob vông mi tibii i kisuu lec mone yul yon di il ob vông mone vô tibii wê nêl susu maên gee lê, lêc vêx tige too sea.” Om he xêyaa vô nipaên di he kunac vêx tige. ⁶Lêc Yesu nêl ên nêbê, “Bêna lêc xam vông viyin vô vêx tige? Xam vông i dô. Ên môp wê i vông vô a ge, nivîha. ⁷Ên xomxo wê nêl susu maên gee ob dô hixôn xam luta, om xam obêc nêb vông môp nivîha vô he ge, od buc tibeac yêp tiyi wê xam ob vông ge. Lêc a ga, a ob dô hixôn xam buc dia lêm. ⁸Vêx tige vông môp tiyi xocbê yêp vô i ge, ên a gên o xib lêm, lêc i lam lipac mia nivivea lec a, om tiyi xocbê viac a nignivi wê xomxo ob yev a vac lôva ge. ⁹A nêl hixôn nôn vô xam bêga bê vac vîgwe vihati wê xomxo ob la nêl xolac vac ge, xomxo ob nêl vêx tiga kitong hixôn, om xomxo vihati ob xovô môp nivîha wê i vông ge.”

Judas nêb ob vông Yesu vac xomxo levac vîgê

(Matyu 26:14-16; Luk 22:3-6)

¹⁰Judas Iskaliot ge Yesu nu ngivîhi ti, lêc la vô xomxo levac wê mi si daa gee, ên nêb ob vông Yesu i loc vac he vîgê. ¹¹Mêd he ngô kiyang wê Judas nêl ge di nilô vô nivîha, om he hilu kiyang xôn nêb ob vông mone ya vô Judas. Mêd Judas myag môp wê ob vông Yesu vac he vîgê ge.

Yesu ya bwoc sipsip hixôn nue ngivîhi

(Matyu 26:17-25; Luk 22:7-14,21-23; Jon 13:21-30)

¹²Buc wê xomxo Yuda ob ya blet wê yis maên ge val, om buc taxlee ge wê he ob hi bwoc sipsip mi ya ên xovô buc Pasova ge, om Yesu nue ngivîhi kinêg vô i ên nêbê, “Xe ob la viac xumac nilô tina wê il ob xa yaên vac lec buc Pasova ge?” ¹³Om Yesu vông nue ngivîhi yuu la di nêl vô yuu ên nêbê, “Muu loc vac vîgwe Jelusalem, di muu obêc mîla vô xomxo vux ti wê kilê mia vac dêg ge, od muu loc vô i vîxa, ¹⁴di obêc la vac xumac lôma ge od muu nêl vô xomxo ti wê i xumac ge bêga bê,

‘Xolac kehe nêb xii lam kinêg vô ông bê xumac nilô tina wê i hixôn nue ngivihi ob ya yaên vac lec buc Pasova ge?’ ¹⁵Muu obêc kinêg bêge vô i ge od obêc hilung xumac nilô levac ti wê yêp kisii ge vô muu, di susu wê il ob xa lec di dô lec ge le vac xumac tige pyap, om muu viac yaên wê il ob xa ge vac xumac nilô tige.” ¹⁶Yesu nêl bêge vô yuu om yuu loc mi la Jelusalem, di mila yê tiyi xocbê Yesu nêl ge, mêgem yuu la viac yaên wê he ob ya ge.

¹⁷Hiyôv hoo la di vigwe ob buc, om Yesu hixôn nue ngivihi vigê yuu di tô mi la yuu mila, ¹⁸mêd he la dô mi ya, lêc Yesu nêl ên nêbê, “A nêl hixôn nôv vô xam bêga bê xam wê il xa yaên hixônma ge ti obêc nêl a kitong vô xomxo levac levac.” ¹⁹Kiyang tige vông he nilô vô viyin om he toto kinêg lax vô Yesu ên nêbê, “Mêd a yuubê, me?” ²⁰Mêd Yesu nêl vô he ên nêbê, “Xam vigê yuu di tô mi la yuu ge, ti obêc nêl a kitong. Ge xomxo ti wê xii xôn vigêm ob la vac dipac nilô ge. ²¹Vixôhilôg, Xomxo Nu ob yib tiyi xocbê xolac nêl ilage, lêc xomxo ti wê ob vông Xomxo Nu la vac tibii vigê ge, obêc kô myaviwen nipaên lec timuên. Om xomxo tige yubacên obêc ma ilage ge od obêc nivîha.”

Yesu vông pasa vô nue ngivihi

(Matyu 26:26-30; Luk 22:15-20; 1 Kolin 11:23-25)

²²He diya, dêc Yesu hôm blet ti di kitaa lec mêd hibû di vông vô he di nêl ên nêbê, “Hôm mi wa. Ga a nignivi.” ²³Nang dêc hôm kap wê wain le vac ge di kitaa lec mêd vông vô he di he toto num vac. ²⁴Mêd Yesu nêl vô he ên nêbê, “Ga a hi wê a ob kipyax sea ên a nêb i ngidu xomxo tibeac xôn, om ob vông kiyang wê Anutu hilu pyap ge i vô nôv lec. ²⁵A nêl hixôn nôv vô xam bê a obêc num mia wain i tii vac nang lêm di i loc tyip vô buc wê a ob num wain paha vac Anutu ben ge.”

²⁶He vông lilo ti pyap di loc mi la lec kitôn Oliv.

Yesu nêl ên nêb Pita obêc yax i vun

(Matyu 26:31-35; Luk 22:31-34; Jon 13:36-38)

²⁷Yesu nêl vô he ên nêbê, “Xam vihati nilôm obêc vô viyin di xam ob sea a, i tiyi xocbê kiyang wê yêp vac xolac bêga nêbê, ‘A ob hi xomxo ti wê viac bwoc sipsip ge, om sipsip vihati obêc pec di moo sea.’ ²⁸Xolac nêl bêge, di a nêl vô xam bêga bê a obêc kidi lec magviha di mug la Galili di xam obêc timu.” ²⁹Mêd Pita nêl vô Yesu ên nêbê, “Xomxo vihati obêc nêb sea ông ge od he ob sea, di a mô ge, a ob sea ông lêm.” ³⁰Lêc Yesu nêl vô i ên nêbê, “A nêl hixôn nôv vô ông bê vô bucên tiga kokilêx obêc hi vya lu yuu lêm di ông obêc yax a vun lu yon.” ³¹Lêc Pita luu Yesu vya di nêl kiyang xêkizêc lax vô ên nêbê, “Ma vêl. A ob yax ông vun lêm. Di tibii obêc hi a xib hixôn ông ge od pyap, lêc a ob yax ông vun lêm.” Di nue ngivihi vihati nêl tiyi xocbê Pita nêl ge.

Yesu la kitaa gê Getsemani
(*Matyu 26:36-46; Luk 22:39-46*)

³²Yesu he nue ngivihi loc mi la viḡwe ti lê nêbê Getsemani, mêd Yesu nêl vô nue ên nêbê, “Xam dô ga ên a ob la kitaa.” ³³Om Yesu kô Pita yuu Jems hixôn Jon di he la, lêc Yesu nilô vô viyin mabu, ³⁴om nêl vô yon ên nêbê, “A nilôḡ vô viyin levac tiyi xocbê a ob xib ge. Om mon dô di wê môp xôn di le i yêp lêm.” ³⁵Mêd Yesu la teva tya di la kipôm manôn vac kibun di kitaa ên nêb obêc tiyi ge od viyin tige i o lêc tulec i lêm. ³⁶Om kitaa bêga nêbê, “O mag, ôḡḡ tiyi wê ôḡḡ ob vông môp vihati ge, om a nêb ôḡḡ vô viyin tige vêl ên a, lêc ôḡḡ o lêc vông i tiyi wê a nêb ôḡḡ vông ge lêm. Nge, ôḡḡ vông i tiyi xovôên wê ôḡḡ vông ge.”

³⁷Pyap di Yesu lax mi la vô nue ngivihi yon, lêc yê wê yon yêp nilô ma ge om nêl vô Pita ên nêbê, “Saimon, bêna lêc ôḡḡ wêpê? Ôḡḡ o tiyi wê ôḡḡ ob dô mamviha tya lê ge, me?” ³⁸Om mon kidi lec mi kitaa, êdêc susu nipaên i o lêc yaxên mon lêm. Ên nilôm nêb ob vông yuac lê, lêc nimnivi vô viyin.”

³⁹Mêd Yesu lax mi la nang di la kitaa tii vac, lêc kitaa tiyi xocbê la kitaa lu ngwe tax ge. ⁴⁰Pyap di lax mi la vô yon tii vac, lêc yê wê yon manôn yêp om yon yêp ge. Om Yesu tîpi vô yon lêc yon o xovô kiyang ti wê ob nêl vô Yesu ge lêm.

⁴¹Mêd Yesu la kitaa di vena lu ti wê vông yon ge, lêc yon yêp nilô ma om Yesu nêl vô yon ên nêbê, “Bêna lêc mon diwêp wêpênê? Ge pyap, ên buc wê xomxo ob vông Xomxo Nu la vac tibii nipaên viḡê ge val vô kwabo lec. ⁴²Om mon kidi lec ên il ob la. Mon wê, xomxo ti wê ob vông a la vac tibii viḡê ge val le ge.”

Xomxo Yuda hôm Yesu xôn di Yesu nue ngivihi pec sea
(*Matyu 26:47-56; Luk 22:47-53; Jon 18:3-12*)

⁴³Yesu gên nêl kiyang tige di lutibed Judas wê nu ngivihi ti ge val. Di xomxo tibeac wê hôm yipac yuu viḡo ge val hixôn. Xomxo tige, xomxo levac wê mi si daa gee hixôn xomxo wê xovô Moses xolac gee di Yuda levac levac ge, he vông he lam. ⁴⁴Judas nêl kiyang ti vô xomxo tige pyap ên nêbê, “Xomxo ti wê a obêc nga lia ge, od xam xovô bê ge xomxo tyo mê. Om xam hôm i xôn di wê i xôn di kô mi loc.”

⁴⁵Mêd Judas val di la kwabo vô Yesu di nêl vô i ên nêbê, “Xolac kehe” mêd nga i lia. ⁴⁶Om xomxo tige yê di la hôm Yesu xôn.

⁴⁷Mêd xomxo ti wê le kwabo ge hôm i yipac di sev xomxo daa siên nêl levac nu yuac ti ninya lihi vilu la vêl. ⁴⁸Mêd Yesu nêl vô xomxo wê hôm i xôn gee ên nêbê, “Xam xo ên xam nêbê a tibii yôdac ti om xam kilê yipac hixôn viḡo di lam hôm a xônê? ⁴⁹Tiyi buc vihati a mi dô hixôn xam vac Anutu xumac ngibua di a mi nêl xolac vô xam, lêc xam o hôm a xôn lêm.

Om gwêbaga, kiyang wê yêp vac xolac ge ob vô nôn lec.”⁵⁰ Mêd Yesu nue ngivihi vihati sea i di pec mi la.

⁵¹Xomxo ngivihi ti wê duc nivimihi yêp yaên kwem ti ge mila vô Yesu vixa, om tibii nêb ob hôm i xôn, ⁵²lêc ngivihi tyo pec mi la, di nivimihi tô mi yêp di i pec mi la xêtuac.

Yesu la le vô xomxo levac manôn

(*Matyu 26:57-68; Luk 22:54-55,63-71; Jon 18:13-14,19-24*)

⁵³Mêd he didii Yesu mi la vô xomxo ti wê tu xomxo daa siên nêb levac ge, mêd xomxo levac wê mi si daa gee hixôn xomxo wê xovô Moses xolac gee di xomxo levac levac gee, he vihati kitucma mi lam. ⁵⁴Mêd Pita timu vô Yesu vixa mi la, lêc le lam teva tya om mila vô xomxo daa siên nêb levac ben wetôv di mila nyuu ngwax hixôn xêhipue.

⁵⁵Mêd xomxo levac wê mi si daa gee hixôn xomxo kaunsil vihati kitucma mi dô, mêd he keac xomxo ya lam ên nêb he i lam nêl kiyang wê Yesu mi vông vô he ge kitong, ên he nêb he ob tulec kiyang soên wê Yesu mi nêl ge ên hi i yib lec. Lêc he o tulec kiyang ti lêm, ⁵⁶ên xomxo tibeac vô nilô vô Yesu, lêc he nêl kiyang kityooên di kiyang wê he vông ge o tiyima lêm. ⁵⁷Om he ya le kisii di nêl kiyang kityooên bêga lec Yesu ên nêbê, ⁵⁸“Xe ngô wê xomxo tige nêl ên nêbê, ‘A ob dii xumac ngibua ti wê xomxo lox ya vigê ge vêl, di buc yon obêc lam la vêl ge od a ob lox vac, lêc a vigê ob lox lêm.’ ” ⁵⁹Lêc xomxo wê nêl kiyang tige, vihati o nêl kiyang tiyima lêm.

⁶⁰Mêd xomxo daa siên nêb levac tige kidi mi la le vac he mahigun di kinêg vô Yesu ên nêbê, “Xomxo nêl kiyang nipaên lec ông, om ông ob nêl kiyang ti lax vô he, me?” ⁶¹Lêc Yesu le mya pilih di o nêl

kiyang ti lax vô he lêm. Om xomxo levac tige kinêg vô i tii vac ên nêbê, “Anutu wê il mi pimil ge, ông Kilisi wê i nu ge, me?” ⁶²Om Yesu nêl ên nêbê, “A Kilisi, Anutu nu. Di xam ob wê a Xomxo Nu, a ob la dô vô Anutu, xêkizêc kehe, vigê hiyôv, di a ob vena vac viyobtoc kisii ganê.” ⁶³Mêd xomxo levac tige nilô vô nipaên om lêx ici va ngakwi di nêl ên nêbê, “Om il ob keac xomxo ya mi he i lam nêl kiyang hixôn i tii vac lêm. ⁶⁴Ên ici va so vya vô Anutu mi xam ngô pyap. Om xam nêb il vông bêna vô i?” Mêd he vihati nêl ên nêbê, “Yesu vông nipaên om il ob hi i yib.”

⁶⁵Mêd xomxo ya pisuv myaluc lec Yesu mêd viyum i manôn xôn ya nivimihi di hi i di nêl vô ên nêbê, “Nêl xomxo ti wê hi ông ge lê kitong.” Mêd xêhipu wê viac Anutu xumac ngibua ge kô i mi la di la hi ya vigê.

Pita yax Yesu vun

(*Matyu 26:69-75; Luk 22:56-62; Jon 18:15-18,25-27*)

⁶⁶Pita gên le kibun lec wetôv mêd vêx ti wê vông yuac vô xomxo daa siên nêb levac ge val, ⁶⁷lêc yê wê Pita dinyuu ngwax mi dô ge om yê i

manôn di nêl vô i ên nêbê, “Ông ge wê ông mi dô hixôn Yesu Nasalet ge.” ⁶⁸Lêc Pita nêl ên nêbê, “A lungên, di a o xovô kiyang wê ông nêl ge lêm.” Mêd Pita titêc vêl ên he mi la le vô vuayen ninya [di kokilêx hi vya taxlee.] ⁶⁹Mêd vêx yuac tige yê Pita tii vac nang om nêl vô xomxo wê dô kwabo ge ên nêbê, “Xomxo tige wê mi dô hixôn Yesu he nue.” ⁷⁰Lêc Pita yax Yesu vun nang di nêb i lungên.

Mêd he dô myabo tya nang mêd xomxo wê dô ge nêl vô Pita ên nêbê, “Vixôhilôg, xe xovô ên xe nêbê ông ge Yesu nu ngivihî ti, ên ông ge xomxo Galili ti.” ⁷¹Lêc Pita nêl kiyang xêkizêc ên nêbê, “A le vô Anutu manôn di a nêl hixôn nôn bêga bê a o xovô xomxo ti wê xam nêl ge lêm.” ⁷²Mêd lutibed kokilêx hi vya tii vac nang. Om Pita xovô kiyang wê Yesu nêl vô i bêga nêbê, “Kokilêx obêc vô vya lu yuu lêm di ông obêc yax a vun lu yon.” Pita xovô kiyang tige om byag levac.

Yesu la le vô gavman levac Pailat manôn

(*Matyu 27:1-2,11-14; Luk 23:1-5; Jon 18:28-38*)

15 ¹Vô pitoc yang xomxo levac wê mi si daa gee di xomxo wê xovô Moses xolac gee di Yuda levac levac hixôn kaunsil baba, he xôn kitucma di keac lec kiyang pyap mêd ku Yesu xôn di kô i mi la vô hizap levac Pailat. ²Mêd Pailat kinêg vô i ên nêbê, “Ông ge king wê Yuda vông ge, me?” Lêc Yesu nêl vô i ên nêbê, “Ông nêl i tiyi.” ³Mêd xomxo levac wê mi si daa gee, he so vya tibeac lec Yesu, ⁴om Pailat kinêg vô Yesu ên nêbê, “Ông tiyi wê ông ob nêl kiyang ti lax vô he ge, me? Ngô lê. He nêl kiyang tibeac lec ông.” ⁵Lêc Yesu o nêl kiyang ti lax vô i lêm, om Pailat yetac di xo kiyang tibeac.

Pailat tyuc lec nêb he i hi Yesu lec xax

(*Matyu 27:15-26; Luk 23:13-25; Jon 18:39-19:16*)

⁶Môp wê Pailat mi vông ge yêp bêga nêbê buc wê xomxo Yuda ob myêl vizid Pasova ge od he mi nêl xomxo wê dô vac kalabuhu ge ti lê vô Pailat di Pailat piwelac i di vông i lam vô he. ⁷Vô buc tige xomxo ti lê nêbê Balabas dô vac xumac kalabuhu. Balabas hixôn xomxo ya, he vông vevac vô gavman Lom di hi xomxo ya yib om tibii vông he la dô vac kalabuhu. ⁸Mêd xomxo Yuda tibeac la vô Pailat di nêl vô Pailat nêb i piwelac xomxo ti vêl i tiyi xocbê môp wê Pailat mi vông ilage. ⁹Om Pailat kinêg vô he ên nêbê, “Om xam nêb a piwelac xomxo ti wê xam Yuda nêm king ge, me?” ¹⁰Pailat nêl bêge, ên xovô nêbê xomxo levac wê mi si daa gee vaci vông Yesu lam vô i ên wê he xêyaa vô myavinê vô Yesu ge. ¹¹Lêc xomxo levac wê mi si daa gee nêl kiyang tibeac vô xomxo Yuda ên nêb he i nêl vô Pailat bê i piwelac Balabas vêl. Om he nêl bêge vô Pailat. ¹²Om Pailat kinêg vô he nang ên nêbê, “Om xomxo ti wê xam nêl lê nêbê Yuda nên king ge, a ob vông bêna vô i?” ¹³Mêd he tyuc vya levac la vô Pailat ên

nêbê, “Hi i lec xax pola.” ¹⁴Lêc Pailat nêl vô he ên nêbê, “Om il ob hi i ên vatya? Xomxo tyo vông nipaên tina?” Lêc he tyuc vya levac tii vac vac ên nêbê, “Hi i lec xax.” ¹⁵Pailat nêb ob vông he xêyaa vô nivihã, om piwelac Balabas lax vô he mêd kô Yesu mi la hi i ya yihi, pyap dêc vông i la vac tibii vevac vigê ên nêb he i kô mi loc hi lec xax.

Tibii vevac so vya vô Yesu
(*Matyu 27:27-31; Jon 19:2-3*)

¹⁶Mêd tibii vevac kô Yesu mi la vac gavman levac ben di keac lie vevac vihati lam. ¹⁷Mêd he kô ngakwi hi tiyi xocbê king mi vinyum ge mi la vinyum lec Yesu dêc buu kipomac yin mi tung lec i bazub xocbê kilung ge. ¹⁸Mêd he pimil Yesu pisiv di nêl ên nêbê, “Ông king wê Yuda vông ge, ông dô nimviha.” ¹⁹Mêd he hi Yesu bazub ya duvac di pisuv myaluc lec di yev vixa kitu vô i tiyi xocbê pimil i pisiv ge. ²⁰He so vya vô i pyap, mêd kwax ngakwi hi tige vêl di vinyum ici va ngakwi lec i nang, mêd kô i mi la ên nêb ob la hi i lec xax.

He hi Yesu lec xax pola
(*Matyu 27:32-44; Luk 23:26-43; Jon 19:17-27*)

²¹He kô Yesu mi la vô môp dêc he yê xomxo ti wê dilam ên nêb ob la vigwe levac ge. Xomxo tyo lê nêbê Saimon wê Aleksanda yuu Lupas ma ge di i ben Sailini. Om he kidu i nêb i kilê xax pola wê he ob hi Yesu lec ge.

²²Mêd he kô Yesu mi la vigwe ti lê nêbê Golgota. Lê tige kehe bêga nêbê bazub len. ²³Mêd xomxo ya nêb ob vông mia wain wê he pilepac malasin hixôn ge vô Yesu ên i num, lêc Yesu nêbê numên ob ma. ²⁴Mêd tibii vevac hi Yesu lec xax pola, mêd he nêb he ob titang Yesu ngakwi voma om he tide mi yê dêc titang i tiyi.

²⁵He hi Yesu lec xax vô pitoc, tiyi xocbê hiyôv manôn 9. ²⁶Mêd kiyang wê ob nêl xomxo nêl nipaên kitong ge, he kivuu i yêp kisii om kiyang wê he kivuu lec Yesu ge, he kivuu bêga nêbê, “XOMXO TIGA, KING WÊ HE YUDA VÔNG GE.” ²⁷Mêd he hi tibii wê mi vun xomxo susu ge yuu lec xax hixôn Yesu, om ngwe yux lec xax vô Yesu vigê vilu hiyôv di ngwe yux vô vigê kêd. ²⁸[Om kiyang wê plopet kivuu ilage vô nôl lec. Kiyang yêp bêga nêbê, “He nêl i lê hixôn xomxo nipaên.”]

²⁹Mêd xomxo wê lam la ge tipi niba vô Yesu di so vya vô bêga nêbê, “Ông tige wê ông nêb ông ob dii Anutu xumac ngibua vêl di lox vac i tiyi buc yon mê? ³⁰Om ông ngidu ôcông va xôn di lop vêl ên xax.” ³¹Mêd xomxo levac wê mi si daa gee ya hixôn xomxo wê xovô Moses xolac gee he êno so vya vô Yesu di nêl voma ên nêbê, “Xomxo tige ngidu xomxo ya xôn, lêc o tiyi wê ob ngidu ici va xôn ge lêm. ³²Om xomxo ti wê nêbê i Kilisi wê Islel vông king ge, i lop vêl ên xax ên il xê di vông i vin.” Mêd

tibii yuu wê diyux hixôn Yesu ge, yuu êno nêl kiyang nipaên lec Yesu hixôn.

Yesu yib

(Matyu 27:45-56; Luk 23:44-49; Jon 19:28-30)

³³Hiyôv yev kitôn pux mêd vigwe ge vihati vô mapitoc ta di i la vô hiyôv manôn yon wê hucên ge. ³⁴Mêd hiyôv manôn yon ge, Yesu tyuc vya levac ên nêbê, “Eloi, eloi, lama sabaktani?” Kiyang tige kehe bêga nêbê, “Mag Anutu, mag Anutu, bêna léc ông sea a?” ³⁵Mêd xomxo wê le kwabo vô Yesu ge ngô kiyang wê i nêl ge, om he ya nêl ên nêbê, “Ngô lê, tige kiyag vya lec Ilaija.” ³⁶Mêd xomxo ti tup mi la kô mia myamilumac di tinyum vac mia kilin di kilax vac ngising di hôm la kisii vô Yesu mya nêb i tep, di nêl ên nêbê, “Om il ob dô mi yaxên bêc Ilaija obêc val vông i lop vêl ên xax, me?” ³⁷Mêd Yesu tyuc vya levac di yib.

³⁸Mêd nivimihi levac ti wê yux vac Anutu xumac ngibua ge lêx vac kisii di lam tô vô myahipu. ³⁹Mêd tibii levac ti wê viac tibii vevac vihati ge le vô Yesu manôn di yê wê yib ge om nêl ên nêbê, “Vixôhilôg, xomxo tige Anutu nu.”

⁴⁰Di vêx ya le teva léc yê ma la Yesu. Vêx tige, Malia wê ben Makdala ge hixôn Malia wê Jems timuên yuu Josis ta ge, di Salomi. ⁴¹Vô buc wê Yesu dô Galili ge od vêx tige mi timu vô i vixa di viac i ya yaên. Di buc wê Yesu la Jelusalem ge, vêx tibeac ya la hixôn om he xôn dô mi yê wê Yesu yib ge.

He lii Yesu vac lôva

(Matyu 27:57-61; Luk 23:50-55; Jon 19:38-42)

⁴²Buc tige, buc wê he Yuda ob viac he ge, ên titige obêc buc sabat. Mêd vigwe huc, ⁴³om Josep wê ben Alimatia ge la vô Pailat. Josep ge kaunsil ti om mi dô vac kitucmaên hixôn Yuda levac levac di xomxo yê i nêb i xomxo nivihati. Josep dô bin buc wê Anutu nu ob lam tu king gê kibun ga. Mêd Josep xonaên ma di loc mi la vô Pailat di la kitaa i ên nêb i vôngYesu ninivi vô i ên i ob la lii vac lôva. ⁴⁴Mêd Pailat yetac ên wê Josep nêl nêbê Yesu yib ge om keac tibii vevac levac tige lam di kinêg vô i ên nêbê, “Yesu yib gwêba, me?” ⁴⁵Mêd tibii levac tyo nêl ên nêbê, “Yesu yib gwêba.” Om Pailat tyuc lec nêb Josep i kô Yesu ninivi mi loc lii vac lôva. ⁴⁶Mêd Josep la kisuu nivimihi kwem ti mêd la kwax Yesu vêl ên xax di vîyum vac nivimihi tige di kô mi la lii vac lôva wê he kiden vac ngidax ge ti. Pyap dêc vixog ngidax levac ti la le vac lôva mya xôn. ⁴⁷Mêd Malia wê ben Makdala ge hixôn Malia wê Josis ta ge, yuu la hixôn om yê vigwe wê Josep la lii Yesu yêp vac ge.

Yesu kidi lec vac yibên

(Matyu 28:1-8; Luk 24:1-12; Jon 20:1-10)

16 ¹Buc sabat la vêl mêd Malia wê ben Makdala ge hixôn Malia wê Jems ta ge di Salomi, yon kisuu wel hixôn susu nivivea ya ên nêb

ob la lipac lec Yesu ninivi. ²Mêd da pitoc yang ge yon kidi mi la, ên nêb ob la vac lôva. ³Lêc yon kinêg vôma ên nêbê, “Letya obêc vixog ngidax vêl ên lôva mya ên xonê?” ⁴Yon nêl bêge ên wê ngidax tige mabu yocên ge. Mêd yon yê ma la lêc yê wê ngidax vixog mi la vêl ên lôva mya ge. ⁵Om yon la vac lôva nilô lêc yê xomxo ngivihi ti wê vinyum ngakwi kwem dia ge dô vô yon vigê hiyôv, om yon yetac mabu. ⁶Lêc xomxo tyo nêl vô yon ên nêbê, “Mon yetacên i ma. Ên mon myag Yesu Nasalet ti wê tibii hi lec xax ge. Lêc o dô ga lêm, ên kidi lec maviha vac yibên. Mon wê vigwe wê yêp lec ga pileva. ⁷Om mon lôc, di lôc nêl vô Pita hixôn Yesu nue ngivihi baba ge bêga bê Yesu ob mug la Galili di xam obêc mila wê i gê Galili tiyi xocbê nêl vô xam ilage.”

⁸Mêd vêx yon ngô kiyang wê i nêl ge di yon kinu la di yon yetac, om yon lop mi la vixun di pec mi la, di yon o nêl kiyang kitong vô xomxo ti lêm, ên yon xona mabu.

Malia wê ben Makdala ge yê Yesu

(Matyu 28:9-10; Jon 20:11-18)

⁹[Da pitoc yang ge wê Yesu kidi lec vac yibên ge od hilung i vô Malia wê ben Makdala ge taxlee. Malia ge wê Yesu tii vimwo nipaên vigê vilu di sec yuu vêl ên i ilage. ¹⁰Om Malia la vô xomxo wê mi dô hixôn Yesu ilage ên nêb ob nêl kiyang tige kitong vô he. He dô hixôn nilô viyin di byag mi dô, ¹¹lêc Malia la nêl vô he ên nêbê, “Yesu kidi lec vac yibên om hilung i vô a mi a xê i.” He ngô kiyang tige lê, lêc he o vông i vin lêm.

Yesu mila vô nue ngivihi yuu vac môp

(Luk 24:13-35)

¹²Nang dêc Yesu nue ngivihi yuu sea Jelusalem di la vô môp, lêc Yesu ninivi pilepac bangwe di i val vô yuu. ¹³Om yuu lax mi la nêl kitong vô nue ngivihi baba, lêc he o vông i vin kiyang wê yuu nêl ge lêm.

Yesu vông yuac sinale vô nue ngivihi

(Matyu 28:16-20; Luk 24:36-49; Jon 20:19-23)

¹⁴Nang dêc Yesu nue ngivihi vigê yuu di ti tô mi la ge dô di ya yaên, lêc Yesu mila vô he mêd nêl kiyang xêkizêc vô he ên wê he nilô xêkizêc di he o vông i vin lêm ge, ên xomxo wê yê Yesu vô buc wê kidi lec maviha ge nêl kitong vô he lê, lêc he o vông i vin lêm. ¹⁵Mêd Yesu nêl vô he ên nêbê, “Xam loc vac vigwe vihati di loc nêl xolac vô xomxo vihati yang. ¹⁶Di xomxo ti obêc vông i vin di lipac mia ge od Anutu obêc kitya i nêl nipaên vêl di ob dô maviha luta. Lêc xomxo ti obêc vông i vin lêm ge od ob tulec myaviwen nipaên wê ob kitya i vêl ge. ¹⁷Om xomxo wê vông i vin ge ob vông do levac hixôn bêga bê he ob nêl a lêg di tii vimwo nipaên vêl, di he ob keac xomxo ba vya, ¹⁸di he obêc hôm myel nipaên me he ob

num mia kilin wê ob hi xomxo yib ge od susu tigeê ob vông he vô nipaên lêm, di he obêc vyax vigê lec xomxo yidac ge od yidac ob tip la.”

Yesu lec mi lax vô ma Anutu
(*Luk 24:50-53; Sinale 1:9-11*)

¹⁹Apumtau Yesu nêl kiyang vô nue ngivihî pyap, dêc Anutu kô i mi la lag puunê di i la dô vô ma Anutu vigê hiyôv. ²⁰Mêd nue ngivihî loc mi la nêl xolac vac vigwe vihati, di Apumtau ngidu he xôn om he vông do tibeac viyang viyang, om do wê he mi vông ge nêl kitong nêbê he nêl kiyang nôn.]

LUK

Yesu Kilisi xolac wê Luk kivuu ge

Kiyang tyo kehe

1 ¹⁻²Xe levac Tiopilas, ông xovô pyap bê ilage kiyang val le seac vac xe mahigun mi xomxo mangwe yê vô buc taxlee, om he nêl xolac wê he yê ge kitong vô xe. Nang dèc xomxo tibeac mangwe nêb he ob kituc kiyang ge vihati mi kivuu vac kipihac, om he toto kivuu kiyang tiyi wê xomxo taxlee nêl di i val vô il ga hixôn. ³Om a êno nêb a ob kivuu kiyang ge vac kipihac mi vông i loc vô ông, ên buc tibeac a kinêg mi xovô kiyang ge vihati kehe. Om a kivuu vihati bôbac yuu nivîha vac kipihac, ⁴ên a nêb ông kitong mi xovô bê xolac wê xomxo nêl mi ông ngô ge, nôn vixôhilôg.

Angela nêl Jon kitong vô ma Sekalaia

⁵Vô buc wê Helot tu king mi viac vigwe Judia ge, xomxo ti dô lê nêbê Sekalaia di vinê lê nêbê Ilisabet. Sekalaia ge xomxo wê mi si daa vô Anutu ge ti, vac kidu ti wê lê nêbê Abaisa ge, di vinê kehe vac Elon. ⁶Mêd yuu ge, Anutu yê manôn nivîha lec yuu, nêb yuu xomxo nivîha lee, ên yuu timu vô Apumtau kiyang yuu xolac vihati di o vông ti so lêm. ⁷Lêc yuu nu ma, ên Ilisabet o kô nipwo ti lêm, di yuu liya vô kipwoc yuu vêxta.

⁸Sekalaia he lie daa siên la vông yuac vac Anutu xumac ngîbua, ên ge he nêl buc wê ob vông yuac lec ge, om Sekalaia la si daa vô Anutu. ⁹Môp wê he mi vông ge, he mi tide ên nêb i nêl kitong vô he bê he tina ob la vac xumac ngîbua nilô ên la si daa nivîvea nivîha vô Apumtau. Om he tide, lêc nêb Sekalaia, om Sekalaia la vac xumac ngîbua nilô, ¹⁰di xomxo tibeac kitaa vô Anutu mi dô vixun, di Sekalaia si daa nivîvea nivîha vô Anutu. ¹¹Mêd Apumtau angela ti val le vô alta wê si daa lec ge vô vigê

hiyôv, ¹²di Sekalaia yê mi yetac ên di xona ên. ¹³Lêc angela tige nêl vô i ên nêbê, “Sekalaia, xonaên i ma, ên Anutu ngô kitaaên wê ông kitaa ge pyap. Om vinêm Ilisabet obêc kô num vux ti di ông ob nêl lê nêbê Jon. ¹⁴Mêd ông obêc pîmil di ông nilôm obêc vô nivîha, di buc wê num tige obêc yubac ge od obêc vông xomxo tibeac xêyaa vô nivîha. ¹⁵Ên num tyo, Anutu obêc yê nêb i tu xomxo levac, di i o lêc num mia wain yuu mia xêkizêc lêm. Buc wê obêc gên dô vac ta xêyaa ge od Myakilôhê Ngîbua obêc hivun i xôn pyap, ¹⁶di timuên ge od obêc pilepac xomxo Islel tibeac nilô lax vô he Apumtau Anutu. ¹⁷Xomxo tige ob kô xovôên yuu xêkizêc i tiyi xocbê Ilaija kô ge di i mug Apumtau môt, om obêc pilepac mae nilô lax vô nue, di obêc pilepac he wê pwoo kiyang vac ge nilô di he i loc kô xovôên yuu piyôp nivîha wê xomxo vông vinên vông ge. Om môt ge wê ob viac xomxo nilô pyap, êdêc he i dô hixôn nilô nivîha di Apumtau i val.”

¹⁸Angela nêl pyap, mêd Sekalaia kinêg vô i ên nêbê, “Kiyang wê ông nêl ge ob vô nôn lec bêna? Ên xii vô kipwoc yuu vêxta ga mê.”

¹⁹Mêd angela nêl vô i ên nêbê, “A ga Gebliel wê a mi le vô Anutu manôn ge, lêc Anutu vông a lam ên nêb a lam nêl kiyang nivîha tiga vô ông. ²⁰Om kiyang wê a nêl ga obêc vô nôn lec vô buc wê Anutu nêl ge. Lêcom ông o vông i vin kiyang tyo lêm, om ông ngô lê. Ông obêc dô tiyi xocbê yac ge di keacên ob ma, di i miloc vô buc wê kiyang obêc vô nôn lec ge lê.”

²¹Xomxo wê kitucma mi dô vixun ge dô bin Sekalaia, di kinêg vôma ên nêbê, “Sekalaia la vô va, lêc la dô gwêba ta vac xumac nilô?” ²²He dô dêc Sekalaia lop mi lôm, lêc keacên ma vô he, ên mya viyin, om he xovô nêbê mêd yê vatya ti vac xumac ngîbua nilô. Lêc Sekalaia hilung kiyang ya vigê vô he, ên mya viyin. ²³Mêd buc wê Sekalaia yuac daa siên ge tiyôô, om lax ben viyangtôv.

²⁴Mêd lax dô ben di vinê Ilisabet, nu tuc dô vac xêyaa di i mi dô vac xumac lôma tiyi dentuc vigê vilu, di nêl ên nêbê, ²⁵“Anutu xo vigwe pisiv ên a ên wê a mi le top di nipwo ma ge, om vông nivîha vô a mi vô a nig yocên vêl.”

Angela Gebliel nêl Yesu kitong vô Malia

²⁶Ilisabet nu dô vac xêyaa tiyi dentuc vigê vilu di sec ti, lêc Anutu vông angela Gebliel la vac vigwe Nasalet vac vigwe levac Galili, ²⁷di i la vô vêxwo ti lê Malia. Malia ge, tae mae nêl i lê lec Josep ên nêb yuu i iima, lêc yuu gên dô teva. Josep ge, kehe vac king Devit. ²⁸Mêd Gebliel la nêl vô Malia ên nêbê, “Ông wê Anutu yê ông nivîha ge, kiyang malehe i hivun ông xôn, ên Apumtau dô hixôn ông.”

²⁹Malia ngô kiyang tyo, lêc vông i nilô vô viyin levac, di i xo ên nêbê, “Kiyang malehe ga, kehe bêna?”

³⁰Mêd Gebliel nêl vô i ên nêbê, “Malia, xonaên i ma, ên Anutu yê ông nivihâ. ³¹Om ngô lê. Ông obêc vivi num vux ti dêc obêc yubac ge, di ông nêl lê bê Yesu. ³²Num tyo ob tu xomxo levac di xomxo ob nêl i lê nêbê Anutu lag puunê nu, di Apumtau Anutu obêc vông i tu king mi viac xomxo tîyi xocbê bu Devit ilage, ³³om obêc tu xomxo Islel wê Jekop nue bue gee nêl king mi viac he luta lêc luta, di i lê king obêc tîyôlêm.”

³⁴Mêlêc Malia kinêg vô angela tyo ên nêbê, “Kiyang ga obêc vô nôn lec bêna? Ên a gên o kô vux ti lêm.”

³⁵Mêd angela luu i vya ên nêbê, “Myakilôhò Ngîbua obêc lam vô ông, di xêkizêc wê Anutu lag puunê vông ge obêc lam hivun ông xôn, om nipwo ti wê ông obêc kô ge, xomxo ob nêb i ngîbua di i Anutu nu.

³⁶“Ngô lê. Gônâ Ilisabet wê vô vêxta di mi le top di nu ma ge, gwêbaga vivi nu vux ti, lêc gên dô di dentuc vigê vilu di sec ti lam la vêl, om obêc kô nu tige. ³⁷Ên kiyang yuu yuac ti o vô viyin vô Anutu lêm. Nge, Anutu tîyi wê ob vông susu vihati vô nôn lec ge.”

³⁸Om Malia nêl vô angela ên nêbê, “Apumtau nu yuac a, om kiyang wê ông nêl vô a ge i vô nôn lec.” Pyap dêc angela sea i di lax.

Malia la yê Ilisabet

³⁹Vac buc tige mahîgun ti, Malia kidi di tup la vac vigwe kitôn ti wê yêp vac vigwe Judia ge, ⁴⁰di la vac Ilisabet yuu Sekalaia ben xumac lôma di la pul Ilisabet vigê di nêl kiyang malehe vô i. ⁴¹Mêd Ilisabet ngô Malia vya di nu wê dô vac i xêyaa ge yetac di ngigax i, mêd Myakilôhò Ngîbua lam hivun Ilisabet xôn, ⁴²di i nêl vya levac vô Malia ên nêbê, “Anutu vông vizid nivihâ vô ông luu vêx baba ge vêl. Di num wê ông ob kô ge, vizid nivihâ wê Anutu vông ge obêc hivun i xôn. ⁴³A ga bêna lê, lêc a Apumtau ta val vô a? ⁴⁴Om ngô lê. A ninyag gên ngô ông vyam wê ông val nêl vô a ge, lêc a nug wê dô vac a xêgyaa ga yetac mi ngigax i di pimil. ⁴⁵Ông vông i vin pyap om ông hi vixam i pec, ên kiyang wê Anutu nêl vô ông ge obêc vô nôn lec timuên.” Ilisabet nêl bêge.

Malia kiyang pimilên

⁴⁶Malia nêl ên nêbê,

“A nilôg pimil Apumtau lê, ⁴⁷di a kinug hi vixa ên Anutu wê ngidu a xôn ge. ⁴⁸Ên a ga Anutu nu yuac pileva, lêc Anutu xêyaa vin lec a, om gwêbaga di timuên ge, xomxo vihati obêc nêl a lêg la bê Anutu vông vizid nivihâ vô a, ⁴⁹ên Anutu xêkizêc kehe vông do levac tige vô a, di i lê ngîbua. ⁵⁰Anutu xêyaa vin lec xomxo wê la vac i kwa ngîbi ge, om môp bêge wê ob yêp vô xomxo tibeac tibeac vihati di i loc vô myahîpu. ⁵¹Anutu vigê vông yuac xêkizêc, om tii xomxo wê nilô yong he ge moo sea mi la. ⁵²Di Anutu vô xêkizêc vêl ên xomxo levac wê kô lê king ge, di hôm xomxo pileva lê lec. ⁵³Mêd

xomxo susu maên wê vip den he ge, Anutu vông susu nivihã vô he, ði xomxo wê susu tibeac ge Anutu vông he la nêñ ya vigê pileva. 54-55 Anutu ngidu nue yuac Islele xôn, êñ xovô kiyang wê nêñ pyap vô buge ilage êñ nêbê i xêyaa ob vin lec Eblaham he nue bue timuên ði i loc tiyi buc myahipu.” Malia nêñ bêge.

56 Malia dô hixôn Ilisabet tiyi dentuc yon dêc lax mi la ben.

Ilisabet kô nu tuc Jon

57 Buc wê Ilisabet nu ob yubac ge, om nu tyo yubac lêc nu tuc. 58 Mêd Ilisabet ngidêe lie hixôn xomxo vac ben viyangtôv ge ngô wê Apumtau vông nivihã vô i ge, om he la pimil Anutu hixôn Ilisabet.

59 Buc vigê vilu ði sec yon la vêl, lêc he kituc la nêb ob gôl nu tyo ninivi ði nêñ i lê. Om he nêb he ob nêñ lê lec ma Sekalaia vaci, 60 lêc ta nêñ êñ nêbê, “Maê! Il ob nêñ i lê bê Jon.” 61 Lêc he nêñ vô i êñ nêbê, “Letya lê tige? Lime ngidême ti lê o bêge lêm.” 62 Om he vô hilung hilung ya vigê kinêgên vô ma Sekalaia êñ nêb i nêñ bê he ob nêñ nu tyo lê bêna. 63 Mêd Sekalaia vông he la kô taple nipwo ti ði i kivuu lê lec êñ nêbê “Jon”. Mêd he yê ði yetac êñ. 64 Mêd lutibed Sekalaia kwa tyip ði get vô xêlehe ði i keac, mêgem pimil Anutu. 65 Om xomxo wê dô vac vigwe tige xona, ði kiyang tige la vac vigwe kitôn Judia vihati, 66 om xomxo vihati wê ngô kiyang tige xo kiyang tibeac vac nilô ði nêñ êñ nêbê, “Nipwo tige obêc dô bêna timuênê?” He nêñ bêge, êñ he xovô êñ nêb xêkizêc wê Anutu vông ge ngidu i xôn.

Sekalaia pimil Anutu

67 Myakilôhê Ngibua hivun Sekalaia xôn ði i nêñ kiyang tiyi xocbê plopete ti bêga êñ nêbê,

68 “Il ob pimil Apumtau wê tu il Islele nêd Anutu ge, êñ i ge wê lam ngidu il wê il tu i nue ge xôn ði vô il vêl êñ nipaên, 69 om vông xomxo xêkizêc ti kidi vac kehe Devit wê i nu yuac ge, êñ nêb i ngidu il xôn ði vông il dô vac nivihã, 70 i tiyi xocbê Anutu nêñ vô i plopete ngibua ilage mi he nêñ kitong ge. 71 Kiyang tige, Anutu nêñ nêb ob vô il vêl êñ tibii vevac wê ob hi il gee yuu tibii wê xêyaa vô myavinê vô il gee. 72 Om Anutu xo vigwe pisiv êñ il buge mi ngidu he xôn, ði xovô i kiyang wê zôo i tu ngibua ilage. 73-74 Kiyang tige wê Anutu hilu vô il bug Eblaham ilage, om ob vô nôn lec vô il bêga bê Anutu ob vô il vêl êñ xomxo vevac wê nêb ob kitya il vêl ge, êñ nêb il vông i yuac mi dô vac, ði xonaên i ma, 75 ði il le ngibua yuu nivihã vô Anutu manôn ði vông i yuac i tiyi buc vihati wê il dô kibun ga ge.

76 Ông nipwo tige, timuên xomxo ob nêñ bê ông plopet wê Anutu kisii ganê vông ge, êñ ông ob mug Apumtau ði titô i nêñ môp i vô

bôbac, ⁷⁷di ông ob nêl kitong vô xomxo wê tu Anutu nue ge ên he i xovô bê Anutu ob kitya he nêl nipaên vêl di vông he i dô vac nivîha. ⁷⁸Il Anutu ob vông bêge ên wê xêyaa vin lec il ge, om ob vông xomxo ti wê xêseac lag puunê ge i lam vô il, ⁷⁹ên i lam linac lec xomxo wê dô vac mapitoc ta di he xona ên yibên ge. Om obêc didii il di il la timu vô kiyang malehe.” Sekalaia nêl bêge.

⁸⁰Om nipwo tige lig mi vô levac di i piyôp xovô kiyang nivîha, di i la dô vac vigwe mahigun pileva wê xomxo dô vacên ma ge di i mila vô buc wê lam hilung i vô xomxo Islel ge.

Malia kô nu tuc Yesu

(Matyu 1:18-25)

2 ¹Vô buc tige King Sisa Ogastas vông kiyang ti la vô xomxo vac vigwe vihati ên nêb he vihati i loc ên tibii i kivuu he lê. ²Buc tige, ge wê he kivuu xomxo vihati lê taxlee, di Sailinias tu gavman levac mi viac vigwe Silia vac buc tige mi dô. ³Om xomxo toto lax ben ben ên nêb tibii i kivuu he lê. ⁴Josep ge, kehe vac king Devit, mêd kidi vac Nasalet vac vigwe levac Galili mi la, di mila vac vigwe levac Judia di la bu Devit ben luta lê nêbê Betlehem. ⁵Om Josep yuu xôn vinê Malia la Betlehem ên nêb gavman i kivuu yuu lê. Malia ge, nu dô vac i xêyaa, ⁶mêd yuu gên dô Betlehem di buc vô kwabo lec wê Malia nu ob yubac ge. ⁷Lêc xomxo pup lec xumac wê vitevac nêl ge vihati, om yuu la dô vac bulmakau ben, mêdec nu tyo yubac lêc nu tuc, mêd Malia viyum vac nivîmihi di la lii i yêp vac bulmakau dipac wê mi ya vac ge.

Angela nêl Yesu kitong vô xomxo wê viac bwoc sipsip ge

⁸Vac vigwe tige xomxo wê viac bwoc sipsip gee dô vô vigwe ninya di viac he bwoc sipsip vô bucên mi dô. ⁹Mêd Apumtau angela ti val vô he, di xêseac wê

Apumtau vông ge lam linac lec he, om he yê di xona mabu. ¹⁰Lêc angela tyo nêl vô he ên nêbê, “Xonaên i ma. Di xam ngô lê. A ob nêl kiyang nivîha ti vô xam, di kiyang tyo wê ob vông xomxo vihati xêyaa vô nivîha yang. ¹¹Om a ob nêl vô xam bêga bê vô buc gwêbaga vac vigwe wê king Devit mi dô vac ilage, nu ti yubac. Ge xam nêl xomxo wê ob vô xam vêl ên nipaên. Ge Apumtau Kîlisi. ¹²Om do wê xam ob xovô i lec ge bêga bê xam obêc wê nipwo tyo wê ta viyum vac nivîmihi di i diyêp vac bulmakau dipac wê mi ya vac ge.”

¹³Angela nêl bêge vô he, di lutibed angela lag puunê tibeac hiwocên val le hixôn angela tyo di pimil Anutu ên nêbê, ¹⁴“Anutu lê i vô levac gê lag puunê, di kiyang malehe i lam kibun ga vô xomxo wê Anutu yê nivîha ge.”

Xomxo bwoc viacên la yê Yesu

¹⁵Angela tige sea he di lax mi la lag puunê, mêd xomxo bwoc viacên tige nêl voma ên nêbê, “Xam kidi lec ên il ob la Betlehem ên la xê

kiyang ti wê Apumtau vông vô angela mi he val nêl vô il ge nôh.”¹⁶ Om he kidi lec di tup lutibed di mila yê wê Josep yuu Malia xeedô di nu tuc diyêp vac bwoc dipac wê mi ya vac ge.¹⁷ He yê pyap di nêl kiyang lec nipwo tyo tiyi wê angela nêl kitong vô he ge.¹⁸ Mêd xomxo vihati wê ngô kiyang wê xomxo bwoc viacên tigeê nêl ge ngô di yetac ên di xo kiyang tibeac lec.¹⁹ Mêlêc Malia ngô kiyang di viac i yêp vac nilô di xovô i tiyi buc vihati.²⁰ Mêd xomxo bwoc viacên tigeê lax mi la, di lax pimil Anutu di hi vixa pec ên kiyang vihati wê he ngô di yê nôh tiyi kiyang wê angela nêl vô he ge.

He nêl Yesu lê

²¹Buc vigê vilu di sec yon la vêl, om he gôl nipwo tige ninivi di nêl i lê ên nêb Yesu. Lê tige wê Yesu gên o lam la vac Malia nilô lêm di angela nêl tax vô Malia.

Simion yuu Ana yê Yesu vac Anutu xumac ngibua

²²Buc wê Malia yuu nu tuc ob la lipac ningeac vêl i tiyi kiyang wê yêp vac Moses xolac ge, om Josep yuu Malia kô Yesu mi la vac xumac ngibua Jelusalem, ên nêb ob vông i loc vô Apumtau,²³ i tiyi Apumtau kiyang wê yêp vac kîpihac xolac bêga ên nêbê vêx ti obêc kô nu tuc taxlee ge od he ob vông i loc tu Anutu xe ngibua.²⁴ Di yuu nêb yuu ob vông daa hixôn i tiyi Apumtau kiyang wê nêl ên nêbê yuu i léc kô dea yuu me tucluu nu yuu mi loc si daa vô i ge.

²⁵Xomxo ti dô Jelusalem lê nêbê Simion. Simion ge, xomxo vông vinên nôh wê mi kitaa vô Anutu di dô bin xomxo ti wê ob lam vô viyin vêl ên Islel ge, di Myakilôhô Ngibua hivun Simion xôn.²⁶ Ilage Myakilôhô Ngibua nêl kitong vô i ên nêb i ob yib lutibed lêm. Nge, nêb ob dô mi yê Kilisi wê Apumtau ob vông i lam ge lec manôn lê, léc yib timuên.²⁷ Mêd Myakilôhô Ngibua kidu Simion nêb i loc vac Anutu xumac ngibua, om Simion la dô, dêc Yesu ta yuu ma kô i mi la vac xumac ngibua ên nêb ob vông i tiyi môp wê Moses xolac nêl ge.²⁸ Mêgem Simion yê di hóm Yesu mi kiva lec, di pimil Anutu ya vya tibêga ên nêbê,

²⁹“O Apumtau, gwêbaga a nêb ông kô ông num yuac a mi loc vô ông hixôn nilôg nivihia, i tiyi kiyang wê ông nêl vô a ilage,³⁰ ên gwêbaga a magnôn yê xomxo ti wê ông vông i lam ên ông nêb i vô xe vêl ên nipaên ge.³¹ Ge ông viac pyap mi vông i lam le seac vô xomxo manôn ên ông nêb vihati i yê,³² ên i ge xêseac wê ob linac lec tibii madiluhu ên he i xovô ông, di i wê ob vông nume Islel lê i vô levac.”

³³Yesu ta yuu ma yetac ên kiyang wê Simion nêl lec i ge,³⁴ mêd Simion kitaa lec yon, di nêl vô ta Malia ên nêbê, “Ngô lê. Num tiga wê obêc vông xomxo Islel tibeac tô mi la, di obêc hóm xomxo tibeac lec mi he le nivihia.

Num tyo tiyi do wê ob hilung Anutu môp vô xomxo ge, léc xomxo tibeac obêc so vya vô i, ³⁵om xomxo nêb kiyang wê xo vac nilô ge obêc lam le seac. Di ôcông va nilôm, viyin obêc kitiv ông xocbê yii kitiv ông di la vac ông nilôm ge.” Simion vya bêge.

³⁶Plopete vêx ti dô lê nêbê Ana. Ana ge, ma Panyuel di kehe Asa. Léc kô vux ti di yuu dô klismas vigê vilu di sec yuu, ³⁷léc liya yib om tu vêxôv mi dô di vô vêxta di i klismas 84. Mêd Ana mi dô vac Anutu xumac ngibua di mi ngibua yaên di mi kitaa vô Anutu tiyi lec bucên yuu vidiiên vihati. ³⁸Léc buc tya ge Ana val yê Yesu yon ta yuu ma, om pimil Anutu di lax nêl Yesu kitong vô xomxo vihati wê dô bin buc wê Anutu ob vô Jelusalem vêl ên viyin ge.

Josep yuu Malia yon Yesu lax mi la Nasalet

³⁹Josep yuu Malia vông môp vihati tiyi xocbê Anutu xolac nêl ge. Pyap mêd yon nu tuc lax mi la ben Nasalet vac vigwe levac Galili. ⁴⁰Yon dô dêc nu tuc lig levac di vô xêkizêc lec hixôn piyôp levac, di Anutu vizid hivun i xôn.

Yesu dô vac xumac ngibua Jelusalem

⁴¹Yesu ta yuu ma mi la Jelusalem tiyi klismas vihati, ên nêb ob la yê buc Pasova ên xovô buc wê he sea Isip ilage. ⁴²Mêd Yesu klismas vigê yuu di tô mi la yuu, om yon ta yuu ma la Jelusalem ên nêb ob la yê buc Pasova tyo nang. ⁴³Buc Pasova vihati pyap, di he nêb ob lax ben, léc Yesu dô Jelusalem di ta yuu ma lungên i. ⁴⁴Yuu xo ên yuu nêb mêd Yesu la hixôn lie ya mi he la, om vidiiên tige yuu myag i di kinêg i vô lie hixôn nipipu wê he xôn la ge, ⁴⁵léc yuu o yêvô lêm, om yuu lax mi la Jelusalem mi lax myag i. ⁴⁶Yuu myag i tiyi buc yon, léc la yêvô i vac Anutu xumac ngibua nilô wê xeedô hixôn Yuda levac levac wê kitucma ge, di ngô he kiyang di le kinêg kiyang kehe vô he. ⁴⁷Mêd xomxo wê ngô Yesu kiyang ge yetac ên i kiyang yuu piyôp nivîha wê luu he vya ge. ⁴⁸Mêd Yesu ta yuu ma val yê di yetac ên i, om ta nêl vô i ên nêbê, “Tuce, ông vông bêna vô xii ga lê, léc ông vông

xii mam myag ông yoo mi xulac hixôn nilôm viyin mabu?” ⁴⁹Mêd Yesu nêl i lax vô yuu ên nêbê, “Muu myag a ên va? Muu o xovô bê a ob dô vac Mag xumac ga lêmê?” ⁵⁰Léc yuu o xovô Yesu kiyang ge kehe lêm.

⁵¹Mêd Yesu kidi mi la hixôn yuu di yon lax mi la ben Nasalet. Yon milax dô Nasalet ge od Yesu vô ninya lehe vô ta yuu ma kiyang tiyi buc vihati, mêgem ta Malia xovô kiyang tige vihati yêp vac nilô tiyi buc vihati. ⁵²Yesu lig hixôn piyôp nivîha, om Anutu hixôn xomxo vihati xêyaa vin lec i.

Jon Lipacên nêl xolac vô xomxo

(*Matyu 3:1-12; Mak 1:2-8; Jon 1:19-28*)

3 ¹Vô buc tige Taibilias Sisa tu king mi viac xomxo vac klismas vigê yuu di vixa vilu (15) mi dô, di xomxo ya tu gavman levac di viac

vigwe ya ya, he lê bêga, Pontias Pailat viac vigwe levac Judia di Helot viac vigwe levac Galili di li Pilip viac vigwe yuu lê Itulia yuu Tlakonaitis, di Laisenias viac vigwe Abilini. ²Di Anas yuu Kaiapas tu xomxo wê mi si daa gee nê n bazub mi dô. Vô buc tige Anutu kiyang la vô Jon wê Sekalaia nu ge vac vigwe mahigun pileva. ³Om Jon kidi mi la mia Jodan di la vac vigwe viyang viyang di la nêl xolac vô xomxo ên nêbê he i pilepac he di lipac mia êdêc Anutu i kitya he nê n nipaên vêl. ⁴Om kiyang wê plopete Aisaia kivuu ilage mi i yêp ge vô nôn lec bêga ên nêbê,

“Xomxo ti tyuc vya levac vac vigwe mahigun pileva ên nêbê, ‘Xam viac Apumtau môp wê obêc lam vac ge di vông i vô bôbac. ⁵Om xam hivun vigwe madia xôn ên i vô bôbac, di den kitôn levac yuu nipwo vihati vêl mi vông i vô nivihã, di titô môp nigecên i vô bôbac lec, di hôm ngidax wê dô vac môp ge vêl ên môp i vô nivihã lec, ⁶ên xomxo vihati i yê Anutu môp wê ob vô xomxo vêl ên nipaên ge.’”

⁷Xomxo tibeac la vô Jon ên nêb i lipac he, lêc Jon nêl vô he ên nêbê, “Myel nipaên nue xam. Letya nêl vô xam ên nêbê xam ob pec ên Anutu xêyaa myavinê wê ob tulec xam ge? ⁸Xam pilepac xam di vông môp nivihã ên i nêl xam kitong bê xam pilepac xam pyap. Di le i lêc yong xam di nêl bê xam bum Eblaham lêm. A ob nêl vô xam bê Anutu tiyi wê ob vông ngidax tigae i tu Eblaham nue bue ge. ⁹Xam tiyi xocbê xax wê xomxo hôm kov ên nêb ob vuv vêl ge, ên kov vô manôn mi yêp vô xax kehe. Ên xax wê o vuac nôn nivihã lêm ge, xomxo ob vuv vêl di nêx i loc vac ngwax.”

¹⁰Jon nêl bêge vô he, om he vihati kinêg vô i ên nêbê, “Om xe ob vông bêna?” ¹¹Om Jon nêl vô he ên nêbê, “Xomxo ti, siot yuu obêc dô ge, od i vông ngwe vô xomxo ngwe wê nê n siot ma ge. Di xam ti yaên obêc dô vô xam ge od ông vông bêge vô xomxo wê xen yaên ma ge êno mêge.” ¹²Mêd xomxo wê mi kô takis gee, ya val vô Jon ên nêb i lipac he, om kinêg vô i ên nêbê, “Xolac kehe, xe ob vông bêna?” ¹³Mêd Jon nêl vô he ên nêbê, “Mone takis wê xam mi kô ge, xam kô i tiyi wê gavman nêl ge, di le i lêc kô i nginoo loc lêm.” ¹⁴Di tibii vevac ya kinêg vô Jon ên nêbê, “Di xe gae obêc vông bêna?” Lêc Jon nêl vô he ên nêbê, “Xam o lêc hi xomxo vax vax mi vun he mone lêm. Di le i lêc vông kot kityooên vô xomxo lec he mone lêm. Nge, xam kô mone lec yuac wê xam vông ge di i pyap.”

¹⁵Xomxo tigege dô bin Kilisi wê ob val ge om he ngô Jon kiyang wê nêl ge di nilô vô hinyoma hinyoma dêc he kinêg vôma ên nêbê, “Mêd ga Kilisi tyo mê, me?” ¹⁶Lêc Jon nêl vô he ên nêbê, “A lipac xam ya mia pileva, di timuên xomxo ngwe obêc val, lêc i xêkizêc luu xêkizêc wê a vông ge vêl, di a o nigvihã tiyi wê a ob piwelac yihi vêl ên su wê i vông ge lêm. Ên obêc val lipac xam ya Myakilôhô Ngibua yuu ngwax. ¹⁷I vigê

vinoo vô ngec nôn wê nêb ob tung vac xumac wê nôn nivihâ ob dô vac ge, di ninivi pileva ge wê obêc nêx i la vac ngwax wê mi tum luta ge ên ngwax i ya vêl.”

¹⁸Mêd Jon nêl kiyang tibeac hixôn ên nêb i vông xovôên vô he, di nêl Anutu xolac vô he vihâti.

Helot tung Jon vac xumac kalabuhu

¹⁹Jon kunac gavman levac Helot wê viac vîgwe Galili ge, ên Helot kô li tuc vinê Helodias di vông môp nipaên tibeac hixôn. ²⁰Lêc Helot vông nipaên levac ti hixôn wê vông Jon vac kalabuhu.

Jon lipac Yesu

(Matyu 3:13-17; Mak 1:9-11)

²¹Buc wê xomxo lipac mia ge od Yesu lipac mia hixôn. Lipac mia pyap di lôm kitaa, dêc vîgwe kisii ganê tax, ²²di Myakilôhô Ngibua tu xocbê tuclu u manôn di lam dô lec Yesu. Mêd vya ti lam gê lag puunê ên nêbê, “Ông a nug wê a xêgyaa vin lec ông di a xê ông nivihâ ge.”

Yesu bue tivae lê

(Matyu 1:1-17)

²³Yesu klismas 30, di i nêl xolac vô xomxo taxlee. Di xomxo mi nêl Yesu nêb i Josep nu. Di Josep mae bue tivae he lê bêgae:

Josep ma Hilai, ²⁴di Hilai ma Matat, di Matat ma Livai, di Livai ma Melkai, di Melkai ma Janai, di Janai ma Josep,

²⁵di Josep ma Matataias, di Matataias ma Emos, di Emos ma Neam, di Neam ma Eslai, di Eslai ma Nagai,

²⁶di Nagai ma Meat, di Meat ma Matataias, di Matataias ma Semen, di Semen ma Josek, di Josek ma Joda,

²⁷di Joda ma Joanan, di Joanan ma Lesa, di Lesa ma Selababel, di Selababel ma Sialtiel, di Sialtiel ma Nelai,

²⁸di Nelai ma Melkai, di Melkai ma Edai, di Edai ma Kosam, di Kosam ma Elmadam, di Elmadam ma El,

²⁹di El ma Josua, di Josua ma Eliesa, di Eliesa ma Jolim, di Jolim ma Matat, di Matat ma Livai,

³⁰di Livai ma Simion, di Simion ma Yuda, di Yuda ma Josep, di Josep ma Jonam, di Jonam ma Elaiakim,

³¹di Elaiakim ma Melia, di Melia ma Mena, di Mena ma Matata, di Matata ma Netan, di Netan ma Devit,

³²di Devit ma Jesi, di Jesi ma Obet, di Obet ma Boas, di Boas ma Salmon, di Salmon ma Nason,

³³di Nason ma Aminadap, di Aminadap ma Atmin, di Atmin ma Anai, di Anai ma Heslon, di Heslon ma Peles, di Peles ma Yuda,

34 di Yuda ma Jekop, di Jekop ma Aisak, di Aisak ma Eblaham, di Eblaham ma Tila, di Tila ma Neho,
 35 di Neho ma Selak, di Selak ma Leu, di Leu ma Pelek, di Pelek ma Ebe, di Ebe ma Sela,
 36 di Sela ma Kenan, di Kenan ma Apaksat, di Apaksat ma Siem, di Siem ma Nôa, di Nôa ma Lamek,
 37 di Lamek ma Metusala, di Metusala ma Inok, di Inok ma Jalet, di Jalet ma Mahalalel, di Mahalalel ma Kenan,
 38 di Kenan ma Inos, di Inos ma Set, di Set ma Adam, di Adam kehe Anutu.

Seten yaxên Yesu
(Matyu 4:1-11; Mak 1:12-13)

4 ¹Myakilôhô Ngibua hivun Yesu xôn mêd i sea mia Jodan di lax mi la. Lêc Myakilôhô Ngibua didii i mi la vac vigwe mahigun pileva wê xomxo dô vacên ma ge. ²Mêd Yesu la dô buc kehe yuu di Seten yaxên i.

Yesu yaên ti ma di buc tibeac tige la vêl om vip den i. ³Mêgem Seten nêl vô Yesu ên nêbê, “Ông obêc Anutu nu nôn ge od ông nêl ên ngidax tiga i tu yaên ti ên ông wa.” ⁴Lêc Yesu nêl vô i ên nêbê, “Xolac nêl bêga ên nêbê, ‘Susu yaên vaci o tiyi wê xomxo ob dô maviha ya ge lêm.’ ”

⁵Mêd Seten didii Yesu mi yuu lec mi la lec kitôn kisii mêd Seten hilung vigwe wê yêp kibun ga ge vihati vô Yesu lutibed, ⁶di nêl vô i ên nêbê, “A ob vông vigwe gee vihati hixôn xêkizêc yuu lê levac wê he vông ge vô ông. Ên susu vihati ge tu axe pyap, om a obêc nêb vông vô xomxo ti ge od a ob vông. ⁷Mêgem ông obêc yev vixam kitu vô a di pimil a ge od vihati obêc tu ông xe.” ⁸Lêc Yesu nêl vô i ên nêbê, “Xolac nêl bêga nêbê, ‘Ông yev vixam kitu vô ông Apumtau Anutu tibed, di vông yuac wê ici va vông ge.’ ”

⁹Mêd Seten didii Yesu mi yuu la Jelusalem, di i mila lax Yesu la lec Anutu xumac ngibua myahipu kisii, di nêl vô i ên nêbê, “Ông obêc Anutu nu nôn ge od ông sox loc kibun. ¹⁰Ên xolac nêl bêga ên nêbê,

‘Anutu obêc vông i angela lam viac ông, ¹¹om he obêc hôm ông kisii ya vigê, êdêc ông o lèc vinux vixam lec ngidax lêm.’ ”

¹²Lêc Yesu nêl vô i ên nêbê, “Xolac nêl bêga ên nêbê, ‘Ông o lèc yaxên Apumtau ông Anutu lêm.’ ”

¹³Seten yaxên Yesu ya môp vihati ge pyap, dêc sea i di la, ên nêb ob la dô di buc ngwe nang lê.

Yesu vông yuac xolac taxlee gê Galili
(Matyu 4:12-17; Mak 1:14-15)

¹⁴Xêkizêc wê Myakilôhô Ngibua vông ge hivun Yesu xôn di i lax mi la Galili, di xomxo nêl i kitong vac vigwe gee vihati mi i la tiyi vigwe

myahipu. ¹⁵Mêd Yesu la nêl Anutu xolac vac he xumac lilo vihati om xomxo pimil di vông i lê vô levac.

Xomxo Nasalet vô nîmi vô Yesu
(*Matyu 13:53-58; Mak 6:1-6*)

¹⁶Yesu milax Nasalet vac ben wê i nipwo di i dô vac léc lig mi vô levac vac ge. Yesu lax dô, di buc sabat ge od la vac xumac lilo tiyi môp wê mi vông ge, mêd kidi lec ên nêb ob kitong xolac vô he, ¹⁷om he vông kipihac wê plopete Aisaia kiyang yêp vac ge vô i, mi i tidii léc yêvô kiyang ti wê yêp bêga ên nêbê,

¹⁸“Myakilôhô Ngibua wê Apumtau vông ge lam lec a, ên Anutu vinoo a ên nêb a nêl i xolac kitong vô xomxo wê nêl susu maên gee. Om vông a lam ên nêb a vô viyin vêl ên xomxo wê dô vac kalabuhu ge, di vông xomxo wê manôn toc ge manôn i seac, di vông a lam ên nêb a vô viyin levac wê hivun xomxo xôn ge vêl. ¹⁹Di nêb a nêl Apumtau buc wê ob vông vizid nivîha vô xomxo ge kitong.”

²⁰Yesu kitong pyap, mêd vilun kipihac xôn di vông i lax vô xomxo ti wê viac xumac lilo ge di tô mi dô ên nêb ob nêl kiyang vô he, om xomxo vihati wê dô vac xumac tige manôn la vô i tibed.

²¹Mêd Yesu nêl vô he ên nêbê, “Xolac ti wê a kitong mi xam ngô ga, vô nôn lec gwêbaga.” ²²Mêd he pimil Yesu di yetac ên kiyang nivîha wê Yesu nêl ge di nêl vôma ên nêbê, “Ga bêna? Xomxo tiga Josep nu mê?”

²³Mêd Yesu nêl vô he ên nêbê, “Vixôhilôg, xam obêc nêl kiyang pilepacên bêga vô a bê, ‘Docta, ông vông ôcông va nimnivi i vô nivîha lec lê. Ên yuac yuu do wê ông la vông vac vigwe Kapaneam mi xe ngô ge, xe nêb ông vông vac il bed ga êno bêge lê.’ Xam obêc nêl bêge vô a lê, ²⁴lêc a ob nêl hixôn nôn vô xam bê plopete ti obêc nêl kiyang vac ici va ben ge, od lie ob vông i vin i kiyang lêm. ²⁵I tiyi xocbê môp wê bume tivame vông vô plopet Ilaija ilage. Vô buc tige lun valên ma tiyi kliskas yon di dentuc vigê vilu di sec ti, om vip mabu yêp vac vigwe Islel vihati. Di vêxôv tibeac dô Islel wê he xen yaên ma ge, ²⁶lêc Anutu o vông Ilaija la vô vêxôv ti vac ici ben Islel ên nêb i loc ngidu i xôn lêm. Nge, vông i la vigwe Salepat vac tibii Saidon ben ên nêb i loc vô vêxôv Saidontige ên i ngidu i xôn. ²⁷Nang dêc buc wê plopete Ilaisa dô ge, od xomxo wê kityax mahizihizi ge tibeac dô vac vigwe Islel, léc Ilaisa o vông he ti vô nivîha lec lêm. Nge, la vac tibii Silia ben di la vông Neman tibed vô nivîha lec.”

²⁸Yesu nêl bêge, mêd he wê dô vac xumac lilo mi ngô i kiyang ge, he xêyaa vô myavinê mabu vô i, ²⁹om he kidi lec di kô i mi la ninyawehe. Vigwe tige yêp lec kitôn ti om he kô Yesu mi la vigwe ninya wê madia ge, ên nêb ob tiyot i loc vac madia. ³⁰Lêc Yesu la vac he mahigun di loc mi la.

Yesu tii vimwo nipaên vêl ên xomxo ti
(*Mak 1:21-28*)

³¹Yesu loc mi la Kapaneam vac vigwe levac Galili, di buc sabat ge od nêl xolac vô he vac he xumac lilo. ³²Mêgem he yetac ên kiyang wê Yesu nêl ge, ên Yesu nêl kiyang hixôn xêkizêc. ³³Vac xumac lilo tige xomxo wê vimwo nipaên dô vac nîlô ge ti dô hixôn, om keac vya levac ên nêbê, ³⁴“Yesu Nasalet, ông lam ên ông nêb ông ob vông bêna vô xe? Ông nêb ông ob kitya xe vêlê? Ên a xovô ông ên a nêbê ông ge xomxo ngîbua wê Anutu vông ông lam ge.”

³⁵Lêc Yesu keac xêkizêc ên nêbê, “Ông keacên i ma, di lop mi loc vêl ên xomxo tige.” Mêgem vimwo nipaên tige vô makikun vac xomxo tige mêd hivip i di vixog i la vac xomxo tibeac mahigun, dêc sea i di la vêl, lêc o vông xomxo tyo ninivi vô nipaên lêm. ³⁶Mêd xomxo tibeac tige yê di yetac mabu di nêl vôma ên nêbê, “Xomxo tige va nêl kiyang bêna, lêc nêl kiyang hixôn xêkizêc vô vimwo nipaên tiyi xocbê i xomxo levac ge om vimwo nipaên ngô di pec mi la vêl.” ³⁷Mêgem xomxo vông Yesu lê vô levac vac vigwe buhu toto ge di i la tiyi myahipu.

Yesu vông Saimon Pita yen vêxta vô nivîha lec
(*Matyu 8:14-15; Mak 1:29-31*)

³⁸Yesu kidi vac xumac lilo di la vac Saimon Pita ben. Lêc Saimon yen vêxta vông yidac levac ngwax tum, om he nêb Yesu i loc vông i vô nivîha lec. ³⁹Om Yesu la le kwabo vô i di pîping i yidac ên nêbê, “Loc vêl.” Om yidac tip la lutibed di vêx tyo vô nivîha lec mi kidi lec, di vông yebac vô he xen yaên hixôn.

Yesu vông xomxo yidac tibeac vô nivîha lec
(*Matyu 8:16-17; Mak 1:32-34*)

⁴⁰Hiyôv hoo la, dêc xomxo tibeac kô lie wê yidac kehe toto ge mi la vô Yesu, om Yesu vyax vigê lec he toto di vông he vô nivîha lec. ⁴¹Di xomxo tibeac wê vimwo nipaên dô vac he ge, vimwo nipaên tige lop mi la vêl ên he di tyuc vya levac ên nêbê, “Ông ge Anutu nu.” Lêc Yesu keac levac lec he nêbê, “Xam keacên i ma,” ên he xovô pyap ên nêbê Yesu ge Kilisi ti wê Anutu vông i lam ge.

Yesu la nêl xolac vac vigwe ya
(*Mak 1:35-39*)

⁴²Vigwe vidiiên pitoc yang tya ge, Yesu kidi mi sea vigwe tige di la vac vigwe mahigun pileva wê xomxo maên ge. Lêc xomxo myag i, lêc mila vô i om nêl i xôn nêb i dô hixôn he di seaên he i ma. ⁴³Lêc Yesu nêl vô he ên nêbê, “Mêlêc a ob la nêl Anutu ben kehe kitong vô xomxo vac vigwe baba

hixôn. Ên yuac ga wê Anutu vông a lam ên nêb a vông ge.” ⁴⁴Om Yesu la nêl xolac vac Yuda xumac lilo viyang viyang ge vihati.

Yesu nêl dêc Saimon Pita hi pis tibeac
(*Matyu 4:18-22; Mak 1:16-20*)

5 ¹Buc ti Yesu mila le vô mia luaên Genesalet ninya, di xomxo tibeac la dô di hivun i xôn, ên nêb ob ngô Anutu xolac wê Yesu ob nêl ge. ²Mêlêc Yesu yê dipac yuu wê yêp vô mia ninya ge, lêc xomxo wê mi kô dipac ge dô lecên ma, ên he la dilipac he leac wê mi hi pis vac ge. ³Mêd Yesu lec la lec dipac ngwe wê Saimon vông ge di nêl vô Saimon ên nêbê, “Vông dipac i du mi loc mahigun tya.” Om he vông i du mi la mahigun di Yesu dô lec dipac di nêl xolac vô xomxo wê dô kehe ge.

⁴Yesu nêl xolac pyap, dêc nêl vô Saimon ên nêbê, “Vông dipac i loc vac gwec madia di tung leac i loc vac mia ên hi lilii.” ⁵Lêc Saimon luu i vya ên nêbê, “Xolac kehe, vihevage buc xuhu dia tiga xe vông yuac levac lec lilii myagên, vivuatitôv di vigwe vidii lec, lêc xe o hi ti lêm. Lêc ga mô ông nêl om a ob lax tung leac i loc vac mia.” ⁶Om he tung leac la, lêc lilii tibeac vac leac mi i pup lec xocbê ob tax i tip ge, ⁷om he tyuc lie dipac ngwe ên nêb he i lam kô lilii hixôn he. Om he lam di he tung lilii vac dipac yuu xôn mi i pup lec tiyi xocbê ob vông dipac tô mi la vac mia nilô ge. ⁸Mêd Saimon Pita yê di la yev vixa kitu vô Yesu di nêl ên nêbê, “Apumtau, loc vêl ên a, ên a ga tibii nigpaên.” ⁹Saimon nêl bêge, ên i hixôn lie wê dô hixôn i ge yetac mabu ên wê Yesu nêl di he hi lilii tibeac ge. ¹⁰Di Sebedi nu Jems yuu Jon wê yuu mi vông yuac lilii hixôn Saimon ge, yuu yê di yetac ên êno. Mêd Yesu nêl vô Saimon ên nêbê, “Xonaên i ma. Ên timuên ge od ông obêc vông yuac bêga bê ông obêc kituc xomxo i lam vô a.” ¹¹Mêd he soo mia mi la le kehe, pyap dêc susu vihati ge dô di he la timu vô Yesu.

Yesu vông xomxo wê kityax mahizihizi ge ti vô nivihha lec
(*Matyu 8:1-4; Mak 1:40-45*)

¹²Yesu la dô vac vigwe ti, lêc xomxo wê kityax mahizihizi dô lec i ninivi ma vêl ge ti yê Yesu om lam yev vixa kitu vô i di kitaa i ên nêbê, “Xomxo levac, ông obêc nêb vông a nignivi i vô nivihha lec ge od ông tiyi wê ông ob vông i vô nôn lec ge.” ¹³Mêgem Yesu titô vigê la vyax lec i di nêl ên nêbê, “A nêb ông vô nimvihha lec.” Yesu nêl di kityax mahizihizi tige wax la vêl di i ninivi vô nivihha lec lutibed. ¹⁴Mêgem Yesu nêl kiyang xêkizêc vô i ên nêbê, “Ông o lêc nêl kitong vô xomxo ti lêm. Di loc hilung nimnivi mô vô xomxo wê mi si daa vô Anutu ge di vông daa i tiyi Moses xolac wê nêl ge, ên xomxo vihati i yê di xovô bê ông nimnivi vô nivihha lec.” ¹⁵Yesu nêl bêge lê, lêc xomxo nêl i lê vô levac la vac vigwe viyang viyang ge, om xomxo tibeac mi kituc la vô i, ên nêb ob ngô kiyang wê i

nêl ge, di he nêb i vông he ninivi yidac i vô nivihha lec. ¹⁶Lêc buc ya Yesu le sea he di la vac vigwe mahigun pileva di la kitaa.

Yesu vông xomxo ti wê vixa len vô xêlehe ge vô nivihha lec
(*Matyu 9:1-8; Mak 2:1-12*)

¹⁷Buc ti Yesu nêl xolac vô xomxo tibeac, lêc Palisi yuu xomxo wê xovô Moses xolac gee lam vac vigwe Jelusalem di Galili yuu Judia vihati mi lam dô hixôn. Di xêkizêc wê Apumtau Anutu vông ge lam hivun Yesu xôn ên nêb i vông yidac i vô nivihha lec ya. ¹⁸Mêd xomxo ya ken xomxo ti wê len vô xêlehe ge lec pêt di mila, ên nêb ob vông i loc vô Yesu manôn ên i vông i vô nivihha lec. Lêc Yesu dô vac xumac nilô, ¹⁹di xomxo tibeac pup lec, om môp ti o yêp wê he ob kô i mi la vô Yesu ge lêm. Om he lec xumac mi la kisii mi la dii xumac mya ti di vông xomxo tyo tô mi la hixôn pêt vac tibii tibeac mahigun di la yêp vô Yesu manôn. ²⁰Mêd Yesu yê wê he vông i vin ge om nêl vô xomxo tyo ên nêbê, “Lig, a kitya ông nêm nipaên vêl pyap.”

²¹Mêlêc xomxo wê xovô Moses xolac gee yuu Palisi gee ngô di nêl voma ên nêbê, “Xomxo tige letya lêc so vya vô Anutu? Ên xomxo ti o tiyi wê ob kitya xomxo nêl nipaên vêl ge lêm. Nge, Anutu vaci tived ge wê ob kitya vêl ge.” ²²Mêd Yesu xovô kiyang wê he nêl vac nilô ge om nêl vô he ên nêbê, “Bêna lêc xam xo kiyang bêge vac nilômê? ²³Xam xovô lê. Kiyang ngwe na wê obêc vô viyin maên ge? Kiyang wê nêbê, ‘A kitya ông nêm nipaên vêl’ ge, me kiyang wê nêbê, ‘Ông kidi lec mi loc’ ge? ²⁴Mêlêc a nêb a ob vông xovôên vô xam bê a, Xomxo Nu, a xêkizêc tiyi wê a ob kitya xomxo nêl nipaên vêl gê kibun ga, om xam lêc wê.” Mêdêc Yesu nêl vô xomxo tyo wê len vô xêlehe ge ên nêbê, “A nêl vô ông bê ông kidi lec mi hôm ông guhu lec di lôc bom.” ²⁵Mêdec lutibed xomxo tyo kidi lec vac he mahigun di hôm

i guhu lec di la ben hixôn nilô pimilên. ²⁶Mêgem xomxo gee vihati yê di yetac mabu, di he pimil Anutu hixôn nilô yetacên di nêl voma ên nêbê, “Gwêbaga il xê mad lec do nivihha viyonên ti.”

Yesu keac Livai la hixôn i
(*Matyu 9:9-13; Mak 2:13-17*)

²⁷Yesu la, lêc mila yê xomxo ti lê nêbê Livai wê xeedô vac xumac wê he mi kô mone takis vô tibii vac ge, om Yesu la nêl vô i ên nêbê, “Kidi mi lam hixôn a.” ²⁸Mêgem Livai kidi lec di sea i yuac yuu susu vihati dô xel di la timu vô Yesu vixa mi he la.

²⁹Mêd Livai myêl vizid levac vô Yesu vac ben, di xomxo wê mi kô takis gee hixôn xomxo yaya la dô hixôn yuu mi he ya. ³⁰Lêc he Palisi hixôn he lie wê xovô Moses xolac gee yê tiyiên ma, om nêl vô Yesu nue ngivihhi ên nêbê, “Bêna lêc xam la wa di num hixôn tibii wê mi kô mone takis

gee yuu tibii nipaênê?” ³¹Mêd Yesu ngô wê he nêl bêge, om nêl vô he ên nêbê, “Xomxo nivîha obêc la vô docta lêm. Nge, tibii yidac ge wê obêc la vô docta. ³²Om a ob nêl vô xam bê a o lam ên a nêb a ob tyuc xomxo nivîha lêm. Nge, a lam ên tibii nipaên, ên a nêb he i pilepac he.”

Kiyang lec môp tikwê yuu paha
(*Matyu 9:14-17; Mak 2:18-22*)

³³Mêd he nêl vô Yesu ên nêbê, “Jon nue ngivîhi mi ngîbua yaên di mi kitaa tiyi buc vihati, di Palisi nue ngivîhi mi vông bêge êno. Mêd ông va ge, nume ngivîhi mi ya di mi num di o ngîbua lêm.” ³⁴Mêlêc Yesu nêl vô he ên nêbê, “Buc ti wê tibii viyang ti lie ti obêc ii vêx ti lêc gên dô hixôn he ge, od he obêc ngîbua yaên, me? Maê. ³⁵Lêc obêc buc timuên wê tibii ob kô li tige vêl ên he ge, od ge wê he obêc dô hixôn viyin di ngîbua yaên.”

³⁶Mêd Yesu nêl kiyang pilepacên ti vô he bêga ên nêbê, “Xomxo ti nên ngakwi obêc tip ge, od obêc kiping ngakwi paha myahîpu ti vêl mi la duu lec tikwê lêm. Ên obêc vông bêge ge od obêc vông ngakwi paha vô nipaên, di myahîpu paha tige obêc la tiyi ngakwi tikwê lêm. ³⁷Di kiyang ngwe, xomxo ti obêc too mia wain paha vac bwoc ninivi tikwê lêm. Ên obêc too vac ge od wain obêc vuac di tax ninivi tikwê tip di wain too la. ³⁸Om wain paha ge, xomxo i too vac bwoc ninivi paha. ³⁹Di xomxo wê num wain tikwê ge obêc nêb num wain paha nang lêm, ên he nêl ên he nêbê wain tikwê nyen nivîha luu vêl.”

Yesu nêl kiyang lec môp sabat
(*Matyu 12:1-8; Mak 2:23-28*)

6 ¹Vô buc sabat ti, Yesu he nue ngivîhi la vô môp wê la vac yuac yaên ge ti. Mêd he mila lê, lêc nue ngivîhi le yul wit nôn wê tiyi xocbê pidi nôn ge di hilii ninivi la vêl di ya nôn. ²Lêc Palisi ya yê di nêl vô he ên nêbê, “Gwêbaga buc sabat wê Moses xolac ngîbua nêb il ob vông yuac ti lec lêm ge, lêc bêna lêc xam vông yuac lecê?” ³Lêc Yesu luu he vya bêga ên nêbê, “Môp wê bug Devit vông ilage, xam kitong, me xam lungên? Ên Devit he lie dô lê, lêc vip den he, ⁴om Devit la vac Anutu xumac ngîbua di la hôm blet ti wê he tung vô Anutu manôn ge. Blet tige, xomxo pileva o tiyi wê ob ya ge lêm. Nge, xomxo wê mi si daa vô Anutu ge, heche va ob ya. Lêc Devit kô mi lax ya dêc vông mi lie ya hixôn. Lêc Devit o vông i so lêm, ên xomxo wê mi si daa ge vaci vông mi i ya.” ⁵Di Yesu nêl hixôn vô he ên nêbê, “Om xam xovô bê a, Xomxo Nu, a tu buc sabat kehe hixôn.”

Yesu vông xomxo wê vigê nipaên ge ti vô nivîha lec vô buc sabat
(*Matyu 12:9-14; Mak 3:1-6*)

⁶Mêd sabat timuên ngwe Yesu la vac Yuda xumac lîlo mi la nêl xolac vô he. Lêc yê xomxo wê vigê hiyôv len yuu kilôhô xêlehe ge ti dô hixôn he.

7Lêc Yuda wê xovô Moses xolac gee hixôn he Palisi dô di yê Yesu xôn ên nêb ob yê bêc obêc vông xomxo tige vô nivihha lec vô sabbat ge od he ob vông kiyang vô i. 8Lêc Yesu xovô he nilô ge om nêl vô xomxo vigê nipaên tige ên nêbê, “Kidi mi lam le mahigun tinê.” Mêgem xomxo tyo kidi lec mi la le vac he mahigun. 9Om Yesu nêl vô he vihati ên nêbê, “A ob kinêg vô xam bê xolac wê il Yuda vông ge, nêb il vông bêna lec sabbatê? Nêb il vông nivihha me nêb il vông nipaên? Om il ob vông xomxo i vô nivihha, me il ob vông he i vô nipaên xel lec sabbat?” 10Mêd Yesu vô yê yê he vihati di nêl vô xomxo vigê nipaên tige ên nêbê, “Titô vigêm.” Mêd xomxo tyo titô vigê, lêc vigê vô nivihha lec. 11Om xomxo wê xovô Moses xolac gee yuu Palisi, he xêyaa vô myavinê mabu di he nêl voma ên nêbê, “Om il ob vông bêna vô Yesu?”

Yesu vînoo aposolo vigê yuu di tô mi la yuu

(Matyu 10:1-4; Mak 3:13-19)

12Vô buc tige Yesu la lec kitôn ti ên nêb ob la kitaa vô Anutu, om bucên tige yadiluhu Yesu kitaa vivuatitôv mi dô di vigwe vidii lec. 13Vigwe vidii mêd Yesu tyuc nue ngivihhi vihati lam vô i mêd vînoo he vigê yuu di tô mi la yuu wê ob kô lê aposolo ge. 14Om he lê bêga, Saimon, wê Yesu nêl lê ngwe nêbê Pita, di Pita li Andlu, di Jems yuu Jon, di Pilip yuu Batolomyu, 15di Matyu yuu Tomas, di Jems ngwe wê ma Alpias ge, di Saimon Selot, 16di Judas wê ma Jems ge di Judas Iskaliot wê obêc hilung Yesu vô tibii vevac timuên ge.

Yesu vông xomxo tibeac vô nivihha lec

(Matyu 4:23-25)

17Pyap dêc Yesu he nue ngivihhi sea kitôn tyo di lop mi lôm tô lec vigwe hibuhu ngwe. Di xomxo wê mi timu vô Yesu gee hixôn xomxo Judia vigwe nipwopwo hixôn vigwe levac Jelusalem, di Taia yuu Saidon wê yêp kwabo vô gwec ninya ge, he tibeac val kitucma mi dô, 18ên he nêb he ob ngô Yesu kiyang, di he wê yidac ge nêb Yesu i vông he ninivi i vô nivihha lec. Di xomxo wê vimwo nipaên vông he vô nipaên ge, Yesu tii vimwo vêl ên he di vông he vô nivihha lec. 19Mêgem xomxo gee vihati nêb obêc hóm lec Yesu ninivi, ên he yê wê xêkizêc wê Yesu vông ge la vông xomxo tibeac vô nivihha lec ge.

Kiyang xêyaa nivihha yuu kiyang viyin

(Matyu 5:1-12)

20Mêd Yesu yê ma la nue ngivihhi di nêl vô he ên nêbê, “Xam wê xam xo ên xam nêbê xam o nivihha lêm ge, xam xêmyaa i nivihha, ên xam tu Anutu nue pyap.

21“Xam wê vip den xam ge, xam xêmyaa i nivihha, ên timuên ge od xam obêc wa i den xam.

“Di xam wê xam nilôm viyin di xam byag gwêbaga ge, xam nilôm i vô nivihā, ên xam obêc nap hixôn xêmyaa nivihā timuên. ²²Buc wê xomxo obêc yê xam nipaên ên wê xam vông i vin Xomxo Nu ge di obêc tii xam di nêl kiyang nipaên lec xam di so vya vô xam ên nêb xam tibii nipaên ge od xam nilôm i nivihā. ²³Om buc wê he obêc vông bêge vô xam ge od xam pimil di xêmyaa i vô nivihā lee, ên nôn nivihā wê xam obêc kô ge yêp vac Anutu ben lag puunê. Môp bêge wê he bue vông vô plopete ilage êno.

²⁴“Dom xam wê mone levac yuu susu tibeac ge, xam xona nêb, ên xam kô susu nivihā mi dô hixôn xêmyaa nivihā pyap, om xam obêc kô nivihā ti timuên nang lêm.

²⁵“Di xam wê xam wa i den ge, xam xona nêb, ên vip obêc den xam timuên.

“Di xam wê xam nap mi dô gwêbaga, xam xona nêb, ên xam obêc byag di dô hixôn nilôm viyin timuên.

²⁶“Om xomxo viyang viyang obêc pimil xam ge, od xam xona nêb, ên he bue vông bêge vô plopete kityooên ilage êno mêngê.”

II xêdyaa i vin lec xomxo wê vông vevac vô il ge

(*Matyu 5:38-48*)

²⁷Yesu nêl vô he ên nêbê, “A ob nêl vô xam wê xam ngô a kiyang ga bêga bê xam xêmyaa i vin lec xomxo wê vông vevac vô xam ge, di xam vông nivihā vô xomxo wê he xêyaa vô nipaên vô xam ge. ²⁸Di xam kitaa lec xomxo wê nêl vya vô xam ge, di xam kitaa vô Anutu bê i vông nivihā vô xomxo wê so vya vô xam ge. ²⁹Xomxo ti obêc pitap ông lia vilu ge od ông vông viluo hixôn vô i, di xomxo ti obêc kô ông saket ge od ông o léc kol siot lêm. Nge, ông vông vô i hixôn. ³⁰Di xomxo ti obêc kitaa susu ti vô ông ge od ông vông vô i, di xomxo ti obêc kô ông nêb susu ti mi la ge od le i léc kidu bê i vông i lôm vô ông lêm. ³¹Môp nivihā wê xam nêb xomxo i vông vô xam ge, od xam vông nivihā vô he êno bêge.

³²“Ên xam xêmyaa obêc vin lec xomxo wê xêyaa vin lec xam ge vaci di xêmyaa o vin lec xomxo baba hixôn lêm ge od xam ob kô pimilên nivihā lec môp tibêge tibêna? Ên tibii nipaên xêyaa vin lec xomxo wê xêyaa vin lec he ge êno. ³³Di xam obêc vông nivihā vô xomxo wê vông nivihā vô xam ge vaci ge od xam ob kô pimilên nivihā lec môp tibêge tibêna? Ên tibii nipaên êno mi vông môp tibêge. ³⁴Di xam obêc vông susu pileva vô xomxo léc xam nêb he i vông myaviwen vac ge od xam ob kô pimilên nivihā lec môp tibêge tibêna? Ên tibii nipaên mi vông susu pileva vô xomxo nêb he i vông myaviwen vac êno mêngê. ³⁵Om a ob nêl vô xam bê xam xêmyaa i vin lec xomxo wê vông vevac vô xam ge di vông nivihā vô he, di xam vông susu vô xomxo di le i léc xo bê he i vông myaviwen vac vô xam lêm. Xam obêc vông bêge ge od xam ob kô nôn nivihā luu vêl

timuên di xam ob tu Anutu lag puunê nue. Ên Anutu ge wê vông niviha vô tibii nipaên wê o mi pimil i lêm ge. ³⁶Mêgem xam êno xo vigwe pisiv ên xomxo di vông niviha vô he i tiyi xocbê Mag Anutu xo vigwe pisiv ên il ge.”

Kiyang wê ob yaxên xomxo ge
(*Matyu 7:1-5*)

³⁷Yesu nêl vô he ên nêbê, “Xam o lêc yaxên xomxo nêl kiyang lêm, êdêc Anutu i yaxên xam nêl kiyang êno lêm. Di xam o lêc nêl vyam nipaên lec xomxo bê he i kê myaviwen nipaên lêm, êdêc Anutu i nêl vya nipaên lec xam lêm. Di xam piwelac kiyang nipaên wê xomxo vông ge vêl êdêc Anutu i piwelac vêl ên xam êno. ³⁸Om xam vông susu vô xomxo lê, êdêc Anutu i vông vô xam êno. Ên Anutu obêc vông tibeac vô xam tiyi xocbê ob vông vac xam sepac mi i pup lec dêc kitiv i tô mi la, dêc kipyax ya lec hixôn mi i pup lec di kipyax sea ge. Ên môp wê xam vông vô xomxo ge od Anutu obêc vông i tiyi wê xam vông vô he ge vô xam.”

³⁹Mêgem Yesu nêl kiyang pilepacên ti vô he bêga ên nêbê, “Xomxo manôn tocên ngwe o tiyi wê ob didii xomxo ma tocên ngwe ge lêm. Ên ge od yuu xôn ob la tô madia. ⁴⁰Di nipwo xumac xulacên ti ob luu ma wê tixuu he ge vêl lêm. Lêc he obêc kê xovôên niviha vac xumac kipihac mi la tiyôd lec myahipu ge od he obêc tiyi xocbê ma wê tixuu he ge.

⁴¹“Om ông ge, bêna lêc ông wê xax mavigen wê le vac lim manôn ge di lungên levac mabu ngwe wê le vac ôcông va mamnôn ge? ⁴²Bêna lêc ông ob nêl vô lim bê, ‘Lige, a ob vông xax mavigen wê le vac ông mamnôn ge vêl,’ dom dilungên levac ngwe wê le vac ôcông va mamnôn ge? Ông xomxo kityooên, ông pul xax levac wê le vac ôcông va mamnôn ge vêl tax di mamnôn i seac niviha lê, êdêc pul nipwo tya wê le vac lim manôn ge vêl.”

Kiyang pilepacên lec xax nôl niviha yuu nipaên
(*Matyu 7:16-20; Matyu 12:33-35*)

⁴³Yesu nêl nang ên nêbê, “Xax niviha ti obêc vuac nôl nipaên lêm, di xax nipaên obêc vuac nôl niviha lêm. ⁴⁴Xax vihati ge il ob xovô lec nôl toto. Ên xomxo ob yul hîguc nôl lec hizap yatôv lêm, di xomxo ob yul viyodac nôl lec kipomac yatôv lêm. ⁴⁵Di il xomxo tiyi lec bêge. Ên xomxo wê piyôp niviha yêp vac he nilô ge od ob vông môp niviha, di xomxo wê nipaên yêp vac he nilô ge od mi vông môp nipaên. Ên kiyang yuu xovôên wê pup vac xomxo nilô ge, xomxo mya nêl i lam seac.

Kiyang pilepacên lec xumac yuu
(*Matyu 7:24-27*)

⁴⁶“Bêna lêc xam nêl a ên xam nêbê, ‘Apumtau, apumtau,’ lêc xam o vông a vyag wê a nêl vô xam ge vô nôl lec lêmê? ⁴⁷Xomxo wê lam vô a

mì lam ngô a kiyang di vông a vyag vô nôn lec ge, a ob nêl he kitong vô xam. ⁴⁸He tiyi xocbê xomxo ti nêb ob lox xumac om yev lôva madia ta dêc hoo teac vac dêc tung ngidax la nêb ngidax i hôm teac xôn, dêc lox xumac lec, lêc lun val om mia butac mabu, lêc xumac tige o kipê lêm, ên xomxo tige lox i xumac xêkizêc ta. ⁴⁹Lêc xomxo wê ngô a kiyang lê, lêc o vông i vô nôn lec lêm ge, ge tiyi xocbê xomxo ti lox xumac lec kibun pileva di o yev hipu la vac kibun lêm, om mia butac mì val mabu ge od dii i nêb xumac sea.”

Yesu vông Lom tibii vevac ti nu yuac ti vô nivihalec
(*Matyu 8:5-13*)

7 ¹Yesu nêl kiyang vihati mì xomxo ngô, pyap di i loc mì la vîgwe Kapaneam. ²Mêd Lom tibii vevac levac ti dô vac vîgwe tige, lêc i nu yuac ti vông yidac levac tiyi wê ob yib ge. Tibii vevac tyo xêyaa vin lec nu yuac tige, ³lêc ngô wê Yesu val vîgwe tige, om vông Yuda levac ya la vô Yesu ên nêb he i loc nêl vô Yesu ên i lam vông nu yuac tyo i vô nivihalec. ⁴Om he mila vô Yesu dêc mila kitaa i xêkizêc ên nêbê, “Vô ninyam lehe vô tibii vevac tiganê vya, ên i ge xomxo nivihalec, ⁵wê xêyaa vin lec il Yuda di i lox il xumac lilo ge.”

⁶Mêd Yesu ngô he vya di la hixôn he mì he la, mêd he mila kwabo vô tibii vevac tyo ben, lêc tibii tyo vông lie ya lam nêl i vya vô Yesu bêga ên nêbê, “Xomxo levac, a xomxo nigpaên, om ông o tiyi wê ông ob vac lam vac a bog xumac lôma ge lêm, ⁷om a xovô ên a nêb a ob loc le vô ông mamnôn lêm. Lêc a nêb ông le teva di vyam pileva i nêl, ên a nug i vô nivihalec. ⁸A xovô bêge, ên a ga êno wê a la vac xomxo levac vilu kwa ngibi, di a nuge vevac ge wê la vac a kwa ngibi. Om a obêc nêl vô he ti bê i loc ge od ob la, di a obêc nêl vô ti bê i lam ge od ob lam, di a obêc nêl vô a nug yuac ti bê i vông yuac tige ge od ob vông. Om a xovô ên a nêbê ông ge xomxo xêkizêc om ông obêc le teva di nêl ge od a nug ge ob vô nivihalec.”

⁹Yesu ngô kiyang wê xomxo tige nêl hixôn vông vinên ge om yetac ên di pop manôn lax vô xomxo tibeac wê ditimu vô i vixa ge di nêl vô he ên nêbê, “Xame, a ob nêl vô xam bê a o xê Islel ti vông i vin xêkizêc tiyi xocbê tibii tiga vông ge lêm.” ¹⁰Om xomxo wê tibii levac tige vông he la ge lax mì la tibii levac tyo ben, lêc milax yê wê nu yuac tyo vô nivihalec ge.

Yesu tipi vô vêxôv ti nu kidi lec mavihalec

¹¹Nang dêc buc ti lêc Yesu la vîgwe Nen, di nue ngivihalec hixôn xomxo tibeac hiwocên la hixôn. ¹²Mêd Yesu mila kwabo vô vuayen wê ob la vac vîyangtôv ge, lêc xomxo ken xomxo yibên ti mì val ên nêb ob kô mì la yev. Vêx vêxôv ti nu tived tige, om xomxo vîyang tige tibeac lam hixôn

i. ¹³Mêd Apumtau Yesu yê vêx tige di xo vigwe pisiv ên i om nêl vô i ên nêbê, “Byagên i ma.” ¹⁴Mêd la vyax vigê lec pêt wê yibên yêp lec ge di xomxo wê ken ge le, dêc Yesu nêl vô yibên tyo ên nêbê, “Nug, a nêl vô ông bê ông kidi lec.” ¹⁵Om yibên tyo kidi lec mi dô di keac vô he, dêc Yesu vông i lax vô ta. ¹⁶Mêgem xomxo tigege yê di xona mabu, di pimil Anutu ên nêbê, “Il nêd plopete levac ti kidi vac il mahigun ga mê.” Di he ya nêbê, “Gwêbaga Anutu val le seac vô il madnôn ên nêb ob hôm il wê il tu ixê ge lec.” ¹⁷Mêd xomxo nêl Yesu lê kitong mi i vô levac mi la vac vigwe Judia vihati di la vac vigwe ninya ninya hixôn.

Jon Lipacên vông nue ngivihi la kinêg Yesu kehe
(*Matyu 11:2-19*)

¹⁸Mêd Jon Lipacên nue ngivihi lax mi la nêl Yesu do levac wê vông ge kitong vô Jon, ¹⁹om Jon keac nue ngivihi yuu lam vô i di nêl vô yuu nêbê yuu i loc vô Apumtau Yesu ên loc kinêg vô i bê, “Xomxo ti wê plopete ilage nêl ên nêb obêc val ge, ông xomxo tyo tiga mê, me xe ob dô bin xomxo ngwe?” ²⁰Mêgem yuu mila vô Yesu di la nêl vô i ên nêbê, “Jon Lipacên vông xii lam ên nêb xii lam kinêg ông bê xomxo ti wê plopete ilage nêl ên nêb obêc val ge, ông xomxo tyo tiga mê, me xe ob dô bin xomxo ngwe lê?”

²¹Vô buc tya ge Yesu dô di vông xomxo yidac kehe toto tibeac vô nivîha lec di tii vimwo nipaên vêl ên xomxo tibeac, di vông xomxo wê manôn tocên ge, manôn seac. ²²Mêgem Yesu nêl vô yuu ên nêbê, “Muu lôc mi loc di nêl môt wê muu ngô yuu wê ge kitong vô Jon bê xomxo manôn tocên, manôn seac, di xomxo vixa nipaên, vixa vô nivîha lec mi he la nivîha, di xomxo wê kityax mahizihizi ge, kityax yôv di he vô nivîha lec, di xomxo wê ninya vô kitu ge, ngô kiyang, di xomxo yibên kidi lec maviha tii vac nang, di xomxo wê nêl susu maên gee ngô xolac nivîha. ²³Xomxo wê nilô o vông yuu lec a lêm ge wê obêc dô hixôn xêyaa nivîha.”

²⁴Jon nue ngivihi yuu ge lax mi la vêl, dêc Yesu nêl Jon kehe kitong vô xomxo tigege ên nêbê, “Ilage wê xam la vô Jon vac vigwe mahigun pileva ge, xam nêb xam ob la wê va? Xam nêb xam ob la ên la wê duvac wê lea kilê i la di i hivip lec nang ge, me? ²⁵Xam la ên xam nêb xam ob la wê vatya? Xam nêb xam ob la wê xomxo wê vinyum ngakwi nivîhaviha ge ti, me? Lêc xomxo wê vinyum ngakwi paha wê nivîha ge wê mi dô vac king ben. ²⁶Xam la ên xam nêb xam ob la wê plopete ti? Vixôhilôg, a nêl vô xam bê i plopete ti, lêc luu plopete vihati vêl. ²⁷Ên Anutu nêl Jon kitong mi i yêp vac kipihac xolac bêga ên nêbê,

‘Ngô lê, a ob vông xomxo ti i kô a kiyang mi loc mug ông nêl môt, ên i viac môt wê ông obêc mila vac ge.’

²⁸Anutu kiyang bêge, di a ob nêl vô xam bê Jon ge xomxo levac luu xomxo kibun ga vihati vêl. Vixôhilôg, lêcom xomxo vihati wê vô nipwo lec vac Anutu ben ge obêc luu Jon vêl.”

²⁹Mêd xomxo wê mi kô takis gee hixôn xomxo vihati, he ngô Yesu kiyang tige di vô ninya lehe vô ên nêbê Anutu môp ge nivihia, ên ilage he pilepac he di Jon lipac he. ³⁰Lêc Palisi yuu xomxo wê xovô Moses xolac gee, he vô nimi vô Anutu môp nivihia wê hilung vô he ge, om he nêb Jon i o lêc lipac he lêm.

³¹Mêd Yesu nêl nang ên nêbê, “Xomxo buc gwêbaga, he va bêna? A ob tixuu he môp lec kiyang ti. ³²He tiyi xocbê nue nipwo wê dô lec wetôv di tyucma ên nêbê, ‘Xame, xe hi vyang lêc xam o yoo lêm, nang di xe vông tilôt lê, lêc xam o byag lêm.’ He môp tiyi xocbê môp wê xam nêl vô xii Jon ge, ³³ên Jon Lipacên val, lêc mi ngibua yaên di numên wain ma, lêcom xam nêl ên xam nêbê vimwo nipaên dô vac i nilô. ³⁴Nang dêc a, Xomxo Nu, a val lêc a mi xa di num vô, di a o ngibua ti lêm, lêc xam nêl ên xam nêbê, ‘Wê lê. Xomxo tige va mi ya levac di mi num wain levac mi vô mavmav, di mi dô hixôn xomxo wê mi kô takis lêc mi vun mangwe ge yuu tibii nipaên.’ ³⁵Xam mi nêl bêge, lêcom a ob nêl vô xam bê xomxo wê timu vô piyôp nivihia di kô xovôên vô Anutu ge, he nêl ên nêbê xovôên wê Anutu vông ge nôn vixôhilôg.”

Vêx nipaên ti lipac wel nivivea lec Yesu vixa

³⁶Palisi ti lê nêbê Saimon nêl vô Yesu ên nêb i loc vac i ben ên yuu ob ya. Om Yesu la vac i ben di yuu dô di ya. ³⁷Mêd vêx nipaên ti wê mi dô vac vigwe tige ngô wê Yesu la dô vac Palisi tyo ben di la ya hixôn i ge, om kô butol nivihia ti wê wel nivivea le vac ge di la vac Palisi tyo ben, ³⁸di la le kwabo vô Yesu vixa di byag mi dô, di maluc yuc lec Yesu vixa pitehe. Om vêx tyo kitya maluc ya bazub lihi, di hiwaa Yesu vixa pitehe di lipac wel nivivea tyo lec Yesu vixa.

³⁹Mêd Palisi ti wê nêl Yesu lam vac i ben tige yê môp wê vêx tyo vông ge, om xo bêga ên nêbê, “Xomxo tige obêc plopete ti vixôhilôg ge od obêc xovô vêx tige wê lam hôm vigê lec i ge di obêc xovô i môp wê mi vông ge bê i vêx nipaên ti.”

⁴⁰Mêd Yesu nêl vô Palisi tyo ên nêbê, “Saimon, a ob nêl kiyang ti vô ông.” Mêd Saimon nêl lax vô ên nêbê, “Om ông nêl kiyang ti wê ông ob nêl ge.” ⁴¹Om Yesu nêl ên nêbê, “Xomxo yuu la kô mone vô xomxo ti, ngwe kô mone yul ti (K100) di ngwe kô mone kipihac ti (K10). Om yuu xôn myaviwen yêp vô xomxo tige. ⁴²Lêcom yuu xôn o tiyi wê yuu ob lax hi myaviwen vêl ge lêm, om xomxo tyo vaci hi yuu myaviwen vêl. Om a ob kinêg vô ông bê xomxo yuu ge, ngwe na xêyaa ob vin lec xomxo tyo luu vêlê?” ⁴³Mêd Saimon nêl ên nêbê, “Mêd obêc ngwe wê i myaviwen levac ge.” Mêd Yesu nêl vô i ên nêbê, “Ông nêl lec bôbac.”

⁴⁴Mêd Yesu pilepac i vô vêx tige di nêl vô Saimon ên nêbê, “Om wê vêx tiga. A lam dô vac ông bom ga lê, lêc ông o timu vô môp wê il Yuda mi vông ge lêm di vông mia ên a lipac vixag vac lêm. Dom vêx tiga lipac

a vixag ya maluc di kitya vël ya bazub lihi. ⁴⁵Di buc wê a lam vac ông bom ga ge, od ông o pul a vigêg di hôm a lec nivihâ lêm. Dom vêx tige val lê, léc hôm a lec nivihâ di le hiwaa a vixag. ⁴⁶Di ông o lipac wel lec a bagzub lêm. Dom vêx tiga val lipac wel nivivea lec a vixag. ⁴⁷Om a ob nêl vô ông bê vêx tiga xêyaa vin lec a luu vël om nêl i kitong ên nêbê i nêl nipaên tibeac lê, léc Anutu kitya vihati vël om i xêyaa vin lec a luu vël. Léc xomxo ngwe wê Anutu kitya i nêl nipaên yuutyabed vël ge od xêyaa obêc vin lec Anutu nipwo tya.” ⁴⁸Mêd Yesu nêl vô vêx tyo ên nêbê, “A nêl vô ông bê a kitya ông nêl nipaên vël pyap.” ⁴⁹Mêd xomxo wê dô mi ya hixôn Yesu gee xo bêga ên nêbê, “Xomxo tige letya léc kitya xomxo nêl nipaên vêlê?” ⁵⁰Mêd Yesu nêl vô vêx tyo ên nêbê, “Vông vinên wê ông vông ge, ge wê kitya ông nêl nipaên vël di vông ông vô nimvihâ lec. Om ông lôc hixôn xêyaa nivihâ.”

Vêx wê mi la hixôn Yesu gee

8 ¹Nang dêc Yesu he nue ngivihî vigê yuu di tô mi la yuu tup vac vigwe levac yuu nipwo toto, di Yesu nêl Anutu ben kehe kitong vô xomxo. ²Mêd vêx ya mi la hixôn Yesu he nue ngivihî ên nêb ob viac he. Vêx tige wê ilage Yesu tii vimwo nipaên vêl ên mangwe di vông he mangwe yidac kehe toto ge vô nivihâ lec. Om he lê bêga, Malia Makdala ti wê Yesu tii vimwo nipaên vigê vilu di sec yuu la vêl ên i ge, ³di Joana wê liya Susa mi viac King Helot xumac ge, di ti lê Susana, di vêx tibeac yaya hixôn. Om vêx tige wê viac Yesu he nue ngivihî ya he mone di ngidu he xôn ên yuac wê he vông ge.

Kiyang pilepacên lec xomxo ti wê liloo vê vac yuac ge (Matyu 13:1-9; Mak 4:1-9)

⁴Om buc ti léc xomxo tibeac vac vigwe toto toto ge kituc la vô Yesu, mêgem Yesu nêl kiyang pilepacên ti vô he bêga ên nêbê, ⁵“Xomxo ti kidi mi la ên nêb ob la liloo ngec vê vac yuac. Om liloo i la lê, léc vê mangwe tô vac môp om xomxo kê di menac lam ya. ⁶Di ya tô lec ngidax wê kibun nipwo tya dô lec ge, om tyip lutibed léc kibun niluc ma om hiyôv ya i vilôvac di i yib. ⁷Di mangwe tô mi la dô vac hivu kehe om hivu tyip hixôn di hi i yib. ⁸Di mangwe tô mi la dô vac kibun nivihâ om tyip nivihâ di vuac nôn nivihâ 100 100 tiyi kehe toto ge.” Yesu nêl bêge vô he dêc nêl ên nêbê, “Xomxo ti ninya obêc yêp ge od i ngô di xovô.”

Yesu nêl kiyang pilepacên kehe kitong (Matyu 13:10-23; Mak 4:10-20)

⁹Mêd Yesu nue ngivihî kinêg kiyang pilepacên tige kehe vô Yesu. ¹⁰Om Yesu nêl vô he ên nêbê, “Kiyang lec Anutu môp yuu ben ge yêp xôpacên lê, léc Anutu nêb ob hilung kehe vô xam ên xam xovô. Di xomxo baba ge

ngô kiyang tiyi xocbê kiyang pilepacên pileva, om he yê lê, léc yêvôên nôn ti ma, di he ngô kiyang lê, léc xovôên kehe ma.

¹¹“Kiyang pilepacên tyo kehe bêga nêbê vê ge Anutu kiyang. ¹²Di vê wê tô vac môp ge, ge tiyi xocbê xomxo ngô Anutu kiyang lê, léc lutibed Seten lam vô vêl ên he nilô, ên nêb he i o léc vông i vin Anutu di i vô he vêl ên nipaên lêm. ¹³Di vê wê tô mi la dô lec ngidax wê kibun nipwo tya dô lec ge, ge tiyi xocbê xomxo ngô xolac di vông i vin lutibed hixôn xêyaa nivihha tax tyaa, léc he tiyi xocbê ngec wê ngilôhô maên ge, ên he vông i vin nipwo tya léc Seten yaxên he ge od he sea vông vinên lutibed. ¹⁴Di vê wê tô mi la dô vac hivu kehe ge, ge tiyi xocbê xomxo ngô xolac mi dô lê, léc he nilô xovô susu nivihaviha kibun ga yuu mone hixôn viyin ya wê ob tulec he ge om hivun xolac xôn di nôn ma. ¹⁵Di vê wê tô mi la dô vac kibun nivihha ge, ge tiyi xocbê xomxo wê ngô xolac mi xovô di hôm pilihhi hixôn nilô yuu xovôên nivihha, om he le xêkizêc ta di vô nôn tibeac.

Kiyang pilepacên lec lam

(Mak 4:21-25)

¹⁶“Xomxo ti obêc byêx ngwax vac lam ge od ob lax dêg lec me vun vac pêt ngibi lêm. Nge, ob yu i yux seac ên xomxo wê ob lam vac xumac nilô ge, he i lam yê xêseac. ¹⁷Ên kiyang vihati wê yêp xôpacên ge obêc lam le seac, di kiyang vihati wê yêp vac nilô ge obêc hivelac lec mi nôn lam le seac.

¹⁸“Mêgem kiyang wê xam ngô ge, xam vyac xovô nivihha lê. Ên xomxo wê xovô kiyang mi hôm pilihhi ge od Anutu obêc kipyax tibeac lec hixôn vô i. Léc xomxo wê o xovô kiyang mi hôm pilihhi lêm ge od nipwo tya wê dô vô i ge, Anutu obêc vô vêl.”

Yesu tae lie

(Matyu 12:46-50; Mak 3:31-35)

¹⁹Yesu tae lie val ên nêb ob la vô Yesu, léc tiyiên ma ên tibii tibeac kitucma om kisuu Yesu lec. ²⁰Om xomxo ya nêl vô Yesu ên nêbê, “Tame lime val le vixun ên nêb ob yê ông.” ²¹Léc Yesu nêl vô he ên nêbê, “Xomxo wê ngô Anutu xolac di vông i vô nôn lec ge, ge wê tu a tage lige ge.”

Yesu nêl om lea viyiiên tip la

(Matyu 8:23-27; Mak 4:35-41)

²²Buc ti lê léc Yesu he nue ngivihi lec dipac ti di Yesu nêl vô he ên nêbê, “Il ob la mia luaên vilu ganê.” ²³Om he la lê, léc Yesu yêp mêd lea viyiiên mabu ti val om vông mia vuac mabu tiyi wê ob pup lec dipac di kipyax he la vac mia ge. ²⁴Om nue ngivihi la tipi vô Yesu di nêl ên nêbê, “Xomxo levac, il ob la xib ga.” Om Yesu

kidi lec di pipping lea yuu mia vuacên di i tip la di mia vô malehe lec. ²⁵Mêgem Yesu nêl vô nue ngivihi ên nêbê, “Xam vông vinên tyo nôn tina?” Mêgem he xona di yetac mabu di nêl vôma ên nêbê, “Xomxo tiga letya léc nêl vya lec lea yuu mia di i vô ninya lehe vô i di tip la lutibedê?”

Yesu tii vimwo nipaên vêl ên xomxo ti
(*Matyu 8:28-34; Mak 5:1-20*)

²⁶Yesu he nue ngivihi loc mi la tibii Gegesa ben wê yêp mia luaên vilu ganê ge di Galili ge yêp mia vilu. ²⁷He mila lop vêl ên dipac di xomxo ti vac vigwe tige val vô Yesu. Vux tige vimwo nipaên dô vac i nilô mi vông i piyôp vô yacyac om buc mahigun dia tige o mi vinyum vinyumên ti lêm, di sea ben viyangtôv yuu xumac wê ob yêp vac ge di la mi yêp vac vigwe wê xomxo yev yibên vac ge. ²⁸⁻²⁹Om xomxo mi ku i vigê yuu vixa xôn ya sen di yê i xôn mi dô lê, léc buc tibeac vimwo nipaên ngigax i xêkizêc di tax sen tip sea di kô i mi la vac vigwe myadongên. Mêd xomxo tyo yê Yesu di la yev vixa vô i, di Yesu pipping vimwo nipaên nêb i loc vêl ên xomxo tyo. Om xomxo tyo iac mabu di nêl ên nêbê, “Yesu, ông ge Anutu lag puunê nu ông, lêcom ông ob vô va vô a? A kitaa ông bê ông o léc vông a vô nipaên lêm.”

³⁰Mêd Yesu kinêg vô i ên nêbê, “Ông lêm le?” Léc tyo nêl ên nêbê, “A lêg kehe nêbê kidu levac.” Nêl lê bêge, ên vimwo nipaên tibeac dô vac i nilô. ³¹Mêd vimwo nipaên tigeê kitaa Yesu ên nêbê, “Ông o léc tii xe la vac Seten ben nipaên lêm.”

³²Bwoc kidu levac diya mi le lec kitôn tige, om vimwo nipaên tigeê kitaa Yesu ên nêb i vông he la dô vac. Om Yesu tyuc lec, ³³di vimwo nipaên tigeê lam la vêl ên xomxo tyo di la dô vac bwoc tyoe nilô, mêd bwoc tyoe tup mi la di la vac vigwe madia di la tô vac mia luaên di num mia mi yib mima vêl.

³⁴Mêd xomxo wê mi viac bwoc tyoe ge yê wê bwoc la yib mima vêl ge, om pec mi la, di mila nêl kitong vô tibii vac vigwe levac hixôn vigwe nipwo viyang viyang ge. ³⁵Om tibii wê ngô kiyang ge la ên nêb ob la yê han, mêgem he mila vô Yesu léc yê wê xomxo ti wê vimwo nipaên dô vac i ge, vimwo nipaên lop mi la vêl di i dô hixôn piyôp nivihâ di vinyum ngakwi lec di xeedô kwabo vô Yesu di ngô Yesu kiyang. Om he yê tige di xona mabu. ³⁶Mêgem xomxo wê dô mi yê wê Yesu tii vimwo nipaên vêl ên xomxo tige mi vông i vô nivihâ lec ge, nêl i tyi wê he yê ge kitong vô tibii wê val gee hixôn. ³⁷Om tibii Gegesa vihâti kitaa Yesu ên nêb i loc vêl ên he ben. He nêl bêge ên he xona mabu, mêgem Yesu lec dipac ên nêb ob lax mi la. ³⁸Léc xomxo ti wê Yesu tii vimwo nipaên vêl ên i ge, lam kitaa Yesu ên nêb ob la hixôn, léc Yesu vông i lax mi la ben di nêl vô i ên nêbê, ³⁹“Ông lôc mi loc bom di loc nêl do levac wê Anutu vông vô ông ge kitong vô xomxo vihâti.” Mêgem xomxo tyo lax mi la ben di la nêl kiyang wê Yesu vông i vô nivihâ lec ge kitong vô xomxo vihâti.

Jailas nu vêx, di vêx yidac ngwe, yuu kiyang
(*Matyu 9:18-26; Mak 5:21-43*)

⁴⁰Yesu lax mi la mia luaên vilu Galili ge nang, léc xomxo tibeac dibin i mi xeedô, om he xêyaa vô nivihâ ên wê Yesu vena ge. ⁴¹Mêd xomxo levac ti lê nêbê Jailas val vô Yesu. Jailas ge wê tu levac di mi viac lie Yuda hixôn xumac lilo ge, léc lam yev vixa kitu vô Yesu di kitaa i ên nêbê i loc vac i ben, ⁴²ên nu byac vông yidac levac ti mi vô kwabo lec wê ob yib ge. Nu byac tige tibeac di i klismas 12.

Om Yesu la hixôn Jailas mi yuu la, léc xomxo tibeac lam vuac lec Yesu. ⁴³Mêd vêx ti dô vac he mahigun, léc vêx tige, yidac kwatuacên vông i tiyi klismas 12, léc o ma lêm, di vêx tyo vông i mone la mima vô docta lê, léc ti o tiyi wê ob vông i vô nivihâ lec ge lêm. ⁴⁴Mêgem vêx tyo val le vô Yesu nimi di vyax vigê lec Yesu ngakwi myahipu mêgem lutibed hi tyo kwep lec. ⁴⁵Mêd Yesu nêl ên nêbê, “Letya vyax vigê lec a?” Léc xomxo vihati nêl lax ên nêbê, “Maê, xe ga maê.” Mêgem Pita nêl ên nêbê, “Xolac kehe, xomxo tibeac le i ngivina ông di vigwe tocên ma, om letya yêvô ti wê vyax vigê lec ông ge?” ⁴⁶Léc Yesu nêl lax ên nêbê, “Ti vyax vigê lec a, om a yaxên léc xêkizêc la vêl ên a.” ⁴⁷Mêgem vêx tige xovô nêbê o tiyi wê ob yax i vun ge lêm, om la hixôn ni yetacên mi la yev vixa vô Yesu di nêl i kehe wê vyax vigê lec Yesu ge kitong di nêl lec wê i yidac ma lutibed ge kitong hixôn, di xomxo tige vihati yê hixôn. ⁴⁸Mêgem Yesu nêl vô i ên nêbê, “Nuge, vông vinên wê ông vông ge, ge wê vông ông vô nimvihâ lec. Om ông lôc hixôn nilôm nivihâ.”

⁴⁹Yesu gên dinêl kiyang mi dô, di xomxo ti vac Jailas ben val nêl vô Jailas ên nêbê, “Num byac yib gwêba, mêgem le i léc vông yuac levac vô xolac kehe mi i lam lêm.” ⁵⁰Mêd Yesu ngô kiyang tige di nêl vô Jailas ên nêbê, “Le nilô i vô viyin lêm. Nge, ông vông i vin mô, ên num ge ob vô nivihâ lec.” ⁵¹Mêgem Yesu mila Jailas ben léc nêl vô xomxo vihati ên nêbê he i dô vixun, dèc kô Pita yuu Jon di Jems di nu tige ta yuu ma hixôn di he la vac xumac lôma. ⁵²Mêd xomxo vihati byag mi vông tilôt ên vêx tyo mi dô, léc Yesu nêl vô he ên nêbê, “Byagên i ma, ên vêx ge o yib lêm. Nge, ici va yêp.” ⁵³Léc xomxo tige nap lec Yesu kiyang ên he xovô ên he nêbê vêx ge yib vêl. ⁵⁴Mêléc Yesu la hôm lec vêx tyo vigê di nêl vya levac ên nêbê,

“Byac, kidi lec.” ⁵⁵Mêgem vêx tyo myakilôhô lax mi la vac ninivi di i kidi lec lutibed mi dô, di Yesu nêl ên nêbê, “Xam vông yaên ti mi i ya.” ⁵⁶Mêd vêx tyo ta yuu ma yetac mabu ên wê nu kidi lec ge, léc Yesu nêl vô yuu ên nêbê, “Muu o léc nêl ga kitong vô xomxo ti lêm.”

Yesu vông yuac vô nue ngivihî
(*Matyu 10:5-15; Mak 6:7-13*)

9 ¹Yesu tyuc nue ngivihî vigê yuu di tô mi la yuu la vô i di vông xêkizêc wê i vông ge vô he ên nêbê he i loc tii vimwo nipaên vêl ên

xomxo di vông xomxo yidac i vô nivihalec. ²Mêd Yesu vông he la ên nêb he i loc nêl Anutu ben yuu môp kitong vô xomxo i tiyi vigwe vihati di vông he wê yidac gee i vô nivihalec. ³Mêd nêl vô he ên nêbê, “Xam o léc kô susu ya hixôn léc loc vô môp lêm, xocbê pitoa yuu vixec di yaên yuu mone di vinyumên yuu lêm. Nge, xam loc ya vigêm pileva di vinyumên tived. ⁴Di xam obêc mila vac vigwe ti mi la dô vac xumac ti ge od xam dô vac xumac tige tived i tiyi buc wê xam ob dô ge. Pyap dêc xam sea vigwe tige di loc bangwe. ⁵Lêc xam obêc mila vac vigwe ti lêc xomxo viyang tige o hôm xam lec nivihalec ge od xam liloo vijuva vêl ên vixam ên i nêl he nêl nipaên kitong vô he di loc.” ⁶Om Yesu nue ngivihi la vac vigwe viyang viyang ge di la nêl xolac vac vigwe toto ge di vông xomxo yidac vô nivihalec.

Helot ngô kiyang lec Yesu
(*Matyu 14:1-2; Mak 6:14-16*)

⁷Hizap levac Helot ngô kiyang wê xomxo mi nêl lec Yesu ge léc vông i nilô vô juda juda, ên xomxo ya nêl ên nêbê Yesu ge Jon Lipacên wê yib ge léc kidi lec nang, ⁸di xomxo ya nêl ên nêbê ge plopete Ilaija wê dô ilage om vena nang, di he ya nêl ên nêbê ge plopete ilage ti kidi lec vac yibên. ⁹Mêd Helot nêl ên nêbê, “Jon Lipacên ge wê a kitov i kwa ilage, lêcom xomxo letya tiganê léc tibii dinêl kiyang tibêge lec i?” Om Helot myag ên nêl ob yê Yesu.

Yesu vet xomxo 5,000
(*Matyu 14:13-21; Mak 6:30-44; Jon 6:1-13*)

¹⁰Mêd nue ngivihi wê Yesu vông he la yuac ge vena nêl he yuac kitong vô Yesu. Om Yesu kô heche va dêc sea xomxo baba dô di he la vac vigwe ti lê nêbê Betsaida. ¹¹Lêc xomxo ngô wê he la ge om timu vô Yesu he nue ngivihi vixa dêc mila vô he, mêd Yesu xêyaa vô nivihalec ên wê he mila ge, om nêl Anutu ben yuu môp kitong vô he di vông he wê yidac ge vô nivihalec. ¹²He dô di vigwe huc om nue ngivihi vigê yuu di tô mi la yuu la nêl vô Yesu ên nêbê, “Vông xomxo tigae i loc, ên he i loc vac vigwe viyang viyang ge ên loc kisuu yaên di loc yêp, ên vigwe ga, vigwe myadongên.” ¹³Lêc Yesu nêl vô he ên nêbê, “Xacxam va ob vông yaên vô he mi he i ya.” Lêc he nêl lax vô Yesu ên nêbê, “Xe xom yaên ga o tibeac lêm, blet vigê vilu di beac yuutyabed. Lêcom ông nêb xe la kisuu yaên vô xomxo tibeac tigae, me?” ¹⁴He nêl bêge ên xomxo tige tibeac hiwocên mêgem vux vaci, he 5,000.

Mêgem Yesu nêl vô nue ngivihi ên nêbê, “Xam vông he i loc dô kidu kidu i tiyi xomxo kehe yuu di vigê yuu (50).” ¹⁵Om he vông tibii la dô i tiyi wê Yesu nêl ge. ¹⁶Mêgem Yesu hôm blet vigê vilu ge hixôn beac yuu ge di lax ma la lag kisiinê dêc kitaa lec blet yuu beac di hibû mi vông vô

nue ngivihi ên nêb he i kô mi loc titang vô xomxo tyoe. ¹⁷Mêd xomxo vihati ya i den he dêc nue ngivihi la kituc myapipu wê gên dô ge mi su vac sepac vigê yuu di tô mi la yuu mi i pup lec.

Pita nêl Yesu kitong nêb i Kilisi
(*Matyu 16:13-28; Mak 8:27-9:1*)

¹⁸Buc ti Yesu he nue ngivihi la dô vac vigwe ti, mêd Yesu vaci kitaa vô ma Anutu mi dô. Pyap dêc kinêg vô nue ngivihi ên nêbê, “Xomxo mi nêb a letya?” ¹⁹Mêd he nêl lax vô i ên nêbê, “Ya nêbê ông ge Jon Lipacên, di ya nêbê ông Ilaija, di ya nêb ông plopete ilage ti lêc ông kidi lec vac yibên mi dô gwêbaga.” ²⁰Mêd Yesu nêl vô he ên nêbê, “Di xacxam va nêb a letya?” Mêlêc Pita nêl ên nêbê, “Ông ge Kilisi wê Anutu vông ông lam ge.” ²¹Mêd Yesu nêl kiyang xêkizêc vô he nêbê he i o lêc nêl i kitong vô xomxo ti lêm, ²²di nêl vô he ên nêbê, “A, Xomxo Nu, a obêc kô myavinê levac mabu, di he Yuda levac levac hixôn xomxo levac wê mi si daa vô Anutu gee hixôn he wê xovô Moses xolac gee, he obêc vô nimi vô a di hi a xib, di buc yon obêc la vêl lêc a obêc kidi lec magviha i tii vac nang.”

²³Mêd Yesu nêl vô he vihati ên nêbê, “Xomxo ti obêc nêb timu vô a kiyang ge od i vông i vô nipwo lec i tiyi buc vihati di kilê viyin i tiyi xobê kilê xax pola ge mi timu vô a vixag. ²⁴Ên xomxo ti obêc viac ici va ninivi nivihâ ên nêb ob dô maviha ge od kinu hixôn ninivi obêc yib. Lêc xomxo ti obêc sea ninivi lec a lêg ge od obêc dô maviha luta. ²⁵Ên xomxo ti obêc kituc susu kibun ga vihati tu ixê, lêc ici va obêc yib mi la vac nipaên ge od obêc vô nivihâ vô i tibêna? ²⁶Ên xomxo ti obêc vô nimi vô a hixôn a xolac ge od a, Xomxo Nu, a êno obêc vô nimig vô i lec buc wê a obêc lop mi lôm hixôn xêseac wê Mag Anutu yuu angela ngibua vông ge. ²⁷Lêc a ob nêl hixôn nôn vô xam bê xam wê xam le ga, xam ya ob dô mi wê wê Anutu nu ob lam tu king ge lê dêc wib timuên.”

Yesu ninivi pilepac
(*Matyu 17:1-13; Mak 9:2-13*)

²⁸Yesu nêl kiyang tige pyap dêc da ti la vêl mêd kô Pita yuu Jon yon Jems mi he la lec kitôn ti ên Yesu nêb ob la kitaa. ²⁹Om Yesu kitaa mi dô, lêc ninivi pilepac mi vô bangwe di i ngakwi vô makwem ta di tee lec vigwe. ³⁰⁻³¹Mêd lutibed xomxo yuu lam hixôn xêseac mi lam le hixôn Yesu di yon keac. Ge Moses yuu Ilaija, om yuu nêl lec môp wê Yesu ob la vông gê Jerusalem di nêl lec wê ob sea kibun ga ge.

³²Pita yon li yuu manôn vô yêp yêp lê, lêc yon manôn seac di yon yê xêseac wê Yesu vông ge di yê xomxo yuu wê le hixôn i ge. ³³Pyap mêd xomxo yuu ge nêl vô Yesu ên nêb yuu ob la, lêc Pita nêl vô Yesu ên nêbê, “Xolac kehe, ga nivihâ wê il dô ga, om xen ob lox xumac yon, ông nêb ti, di Moses nêb ti di Ilaija nêb ti.” Pita lungên kiyang wê ob nêl ge om nêl kiyang bêge pileva.

³⁴Pita gên nêl kiyang tige dêc viyobtoc ti lam hivun he xôn om yon xona. ³⁵Mêd vya ti lam vac viyobtoc di nêl ên nêbê, “Ge a nug wê a vinoo i ge om xam ngô i vya.” ³⁶Vya nêl pyap mêd yon yê wê Yesu tibeac xeele ge. Mêd vô buc tige yon o nêl kiyang wê yon yê ge kitong vô xomxo ti lêm.

Yesu tii vimwo nipaên vêl ên xomxo ti
(*Matyu 17:14-21; Mak 9:14-29*)

³⁷Vigwe vidiên titige he sea kitôn di lax mi la, lêc mila vô xomxo tibeac wê dival vô môp ge, ³⁸mêd xomxo ti vac he mahigun tyuc vya levac ên nêbê, “Xolac kehe, a kitaa ông bê ông wê a nug vux tiga lê, ên a nug nô n tibeac ga mê. ³⁹Lêc buc tibeac vimwo nipaên ti hôm i xôn di vông i iac mabu di vô pwoo pwoo i mi hi i lec kibun di mya ngimong lam, om vông i vô nipaên di o sea i lutibed lêm. ⁴⁰Om a kitaa nume ngivihi ên a nêb he i tii vimwo nipaên tiga i loc vêl lêc he tiiyên ma.”

⁴¹Mêgem Yesu nêl vô he ên nêbê, “Xam gwêbaga, xam nê mông vông vinên ma. Xam nilôm gên nipaên. Om a ob dô hixôn xam di i miloc na lê lêc xam vông i vinê? Di a ob kilê viyin wê xam vông ge di i miloc na lê? Om kô num tyo mi lamê.” ⁴²Mêd nu tige gên kidi mi lam lêc vimwo nipaên tige hôm i di nêx i la hi i sea lec kibun. Mêgem Yesu lec ni vô vimwo nipaên tige mi tii i la vêl di vông nipwo tyo vô nivihha lec di vông i lax vô ma. ⁴³Om xomxo tige vihati yê di yetac mabu ên xêkizêc levac wê Anutu vông ge.

Yesu nêl kiyang vông lu yuu lec wê obêc yib ge
(*Matyu 17:22-23; Mak 9:30-32*)

Xomxo yetac mabu ên môp wê Yesu vông ge, dêc Yesu nêl vô nue ngivihi ên nêbê, ⁴⁴“Xam vyac vô ninyam vô kiyang wê a ob nêl ga bê xomxo obêc vông Xomxo Nu la vac tibii vigê.” ⁴⁵Lêc nue ngivihi lungên kiyang tyo kehe, ên kehe yêp xôpacên om he vyac xovôên ma. Lêc he xona ên nêb ob kinêg kiyang tyo kehe vô Yesu lêm.

Letya ob tu levac?
(*Matyu 18:1-5; Mak 9:33-40*)

⁴⁶Yesu nue ngivihi ngaênma ên nêb letya ob tu he nê n levac? ⁴⁷Lêc Yesu xovô he nilô wê he nêl ge om la kô nipwo ti mi lam lax i le pikeb i, ⁴⁸di nêl vô he ên nêbê, “Xomxo ti obêc hôm nipwo bêga lec ên wê vông i vin a lêg ge od ge tiiy xocbê hôm a lec ge. Di xomxo ti obêc hôm a lec ge od ge tiiy xocbê hôm xomxo ti wê vông a lam ge lec hixôn. Ên xomxo wê dô nipwo vac xam mahigun ge, ge wê ob tu xam nê m levac.”

⁴⁹Mêd Jon nêl vô Yesu ên nêbê, “Xolac kehe, xe xê xomxo ti tii vimwo nipaên vêl ên xomxo lec ông lêm, om xe vibu i nêb i vôngên tibêge i ma,

ên o mi dô hixôn xe mi timu vô ông lêm.”⁵⁰ Lêc Yesu nêl vô i ên nêbê, “Xam o lêc vîbu i lêm. Ên xomxo wê o vông vevac vô xam lêm ge, ge xam nêl wê ob ngîdu xam xôn ge.”

Tibii Samelia o hôm Yesu lec lêm

⁵¹Buc vô kwabo lec wê Yesu ob lax mi la lag puunê ge, mêd Yesu nêb ob la Jelusalem, ⁵²om vông xomxo ya le mug la. Mêd he mîla vac tibii Samelia ben, ên he nêb he ob la yê vîgwe ti wê Yesu ob la dô vac ge, ⁵³lêc tibii viyang tige xovô nêbê Yesu ge xomxo Yuda ti wê nêb ob la Jelusalem ge, om he vîbu nêbê Yesu loc vacên he ben i ma. ⁵⁴Mêd nue ngivîhi Jems yuu Jon yê môp wê he vông ge om nêl vô Yesu ên nêbê, “Apumtau, ông nêb xii nêl di ngwax i lam gê kisii ganê ên ya tibii tigae i ma vêl, me?” ⁵⁵Mêlêc Yesu pilepac i di kunac yuu ên kiyang wê yuu nêl ge. ⁵⁶Pyap dêc he la vîgwe bangwe.

Xomxo wê nêb ob timu vô Yesu ge (Matyu 8:19-22)

⁵⁷He mîla vô môp lê, lêc xomxo ti val nêl vô Yesu ên nêbê, “Vîgwe wê ông ob la vac ge, a ob loc hixôn ông.” ⁵⁸Lêc Yesu nêl vô i ên nêbê, “Le i lêc nêl decdec bê ông ob lam hixôn a lêm. Ên lilii mi yêp vac yen, di menac vông liwîhi lec xax mi yêp lec, lêc a, Xomxo Nu, a bog wê a ob xêp vac ge ti yêpên ma.”

⁵⁹Yesu nêl vô xomxo ngwe ên nêbê, “Lam hixôn a.” Lêc xomxo tige nêl ên nêbê, “Xomxo levac, a ob loc hixôn ông lê, lêc ông vông a lax dô di yev mag vêl lê.” ⁶⁰Lêc Yesu luu i vya di nêl ên nêbê, “Xomxo yibên i yev yibên, di ông loc nêl Anutu ben yuu môp kitong vô xomxo.”

⁶¹Xomxo ngwe nêl vô Yesu ên nêbê, “Xomxo levac, a ob loc hixôn ông lê, lêc ông vông a lax bog mi lax nêl kitong vô lige lê.” ⁶²Lêc Yesu nêl vô i ên nêbê, “Xomxo ti obêc nêb i obêc vông Anutu yuac ge od i o lêc yê manôn i loc nînya nînya lêm, ên ge od o tiyî wê ob tu Anutu nu mi vông i yuac ge lêm.”

Yesu vông xomxo kehe yon di vîgê yuu (70) la vac yuac

10 ¹Nang dêc Yesu vînoo xomxo kehe yon di vîgê yuu (70) hixôn mi vông he yuu yuu la vac vîgwe titi, ên nêb he i mug mi loc vac vîgwe vîhati wê Yesu obêc mîla vac ge. ²Mêd nêl vô he ên nêbê, “Yaên wê dô vac yuac ge vô nôn tibeac pyap lê, lêc xomxo ti wê ob kô nôn tyo gee yuutyabed, om xam kitaa vô yuac tyo kehe bê i vông xomxo i loc vông yuac ên kituc ixê nôn.

³“Om xam locê. Lêc xam xovô bê a ob vông xam loc xochê bwoc sipsip nue wê la vac noo vîmen mahîgun ge. ⁴Om xam o lêc kô mone yuu vîxêc di su hixôn lêm, di xam o lêc keac tôv vô xomxo ti vac môp lêm. ⁵Xam

obêc la vac xumac ti ge od xam nêl kiyang tax bêga bê, 'Kiyang malehe i lam lec xomxo wê dô vac xumac tiga.' ⁶Mêd xomxo kiyang malehe obêc dô vac xumac tige ge od kiyang malehe wê xam kitaa lec he ge ob yêp lec he. Lêc obêc ma ge od kiyang malehe obêc lôm vô xacxam va tii vac nang. ⁷Mêd xumac wê xam obêc dô vac ge, xam dô vac xumac tige tibe, di le i lêc dô tul tul vac xumac tibeac lêm. Nge, xam dô tige mi wa di num wê xomxo ob vông vô xam ge, ên xomxo wê ob vông yuac ge obêc kô nôn lec yuac wê he vông ge.

⁸"Om xam obêc la vac vigwe ti lêc xomxo hôm xam lec ge od xam wa yaên wê he vông vô xam ge, ⁹di xam vông he viyang tige wê yidac vông ge i vô nivaha lec, di xam nêl vô he bêga bê, 'Anutu nu kisiinê val pyap vô xam.'

¹⁰"Lêc xam obêc mila vac vigwe ti lêc xomxo o hôm xam lec lêm ge od xam lôc mi loc le vac môp, di nêl vô he bêga bê, ¹¹'Xam bom vijuva wê pitii lec xe vixam ge, xe ob liloo i lôc mi loc yêp vô xam. Mêlêc xam xovô bêga bê Anutu nu kisiinê val kwabo pyap.' Xam nêl bêge vô he. ¹²Om a ob nêl vô xam bê obêc buc timuên wê Anutu ob yaxên xomxo ge, od xomxo viyang tige obêc kô viyin levac luu viyin wê tibii Sodom ob kô ge vêl."

Viyin lec xomxo wê o vông i vin lêm ge
(*Matyu 11:20-24*)

¹³Yesu nêl ên nêbê, "Xam tibii Kolasin, xam xona nêl ên viyin wê xam obêc kô ge. Di xam tibii Betsaida, xam êno xona nêl. Ên do levac wê a vông vac xam bom ge, xomxo ti obêc vông bêge vac tibii Taia yuu Saidon ben ilage ge od tibii Taia yuu Saidon obêc pilepac he di lipac viwev lec he di dô hixôn nilô viyin ên wê he xovô nêl nipaên ge. ¹⁴Lêc xam o pilepac xam lêm, om buc timuên wê Anutu obêc yaxên xomxo ge, od xam obêc kô myaviwen nipaên i luu wê tibii Taia yuu Saidon ob kô ge vêl. ¹⁵Di xam tibii Kapaneam, xam xo ên xam nêl xam ob kô lêm levac mi la dô vac Anutu ben lag puunê? Ma vêl, xam ob la vac vigwe nipaên."

¹⁶Mêgem Yesu nêl vô nue ngivihî ên nêbê, "Xomxo ti obêc ngô xam vyam ge od tiyi xocbê ngô a vyag. Lêc xomxo obêc vô ninya kitu vô xam vyam ge od tiyi xocbê he vô ninya kitu vô a vyag, di xomxo wê vô ninya kitu vô a vyag ge tiyi xocbê he vô ninya kitu vô xomxo ti wê vông a lam ge vya hixôn."

Xomxo kehe yon di vigê yuu (70) vena vô Yesu

¹⁷Xomxo kehe yon di vigê yuu wê Yesu vông he la yuac gee vena hixôn xêyaa nivaha di nêl vô Yesu ên nêbê, "Apumtau, xe nêl ông lêm ge od vimwo nipaên vô ninya lehe vô mi la vac xe vyam kwa ngibi." ¹⁸Lêc Yesu nêl vô he ên nêbê, "A xê Seten tô gê kisii ganê mi lam xocbê deac hixelac

ge. ¹⁹Om xam ngô lê. A vông xêkizêc vô xam pyap, om xam tiyi wê xam obêc kê myel yuu kipyêc, di xam obêc pwoo xêkizêc wê Seten vông ge i pec, di susu ti o tiyi wê ob vông xam vô nipaên ge lêm. ²⁰Vixôhilôg, lêc xam o lêc pimil xam bê vimwo nipaên la vac xam kwa ngibi lêm. Nge, xam pimil Anutu ên wê kivuu xam lêm yêp lag puunê ge.”

Yesu pimil ma Anutu hixôn xêyaa nivaha
(*Matyu 11:25-27; Matyu 13:16-17*)

²¹Vô buc tige Myakilôhô Ngibua vông Yesu xêyaa vô nivaha di i kitaa vô ma Anutu bêga ên nêbê, “Mag Apumtau, ông lag yuu kibun kehe ông, om a hi vixag pec ên ông, ên ông o vông kiyang tige vô xomxo wê piyôp levac yuu xovôên nivaha ge lêm. Nge, ông hilung vô xomxo wê lê nipwo ge. Mag, ông vông ya xovôên wê ôcông va vông ge.”

²²Pyap dêc Yesu nêl ên nêbê, “Mag vông susu ge vihati vô a. Mêlêc xomxo ti o xovô nu a lêm. Nge, Mag vaci xovô. Di xomxo ti o xovô Mag lêm. Nge, nu aca va wê a xovô, di xomxo wê a nêb a ob hilung Mag vô he ge, he ob xovô Mag.”

²³Mêd Yesu pilepac i vô nue ngivihi di nêl vô heche va ên nêbê, “Xam xêmyaa i vô nivaha ên wê xam wê môp wê a vông ge. ²⁴Ên a ob nêl vô xam bê plopete yuu king wê dô ilage, he tibeac nêb ob yê i tiyi xocbê xam wê ge lê, lêc he yêên ma. Di he tibeac nêb ob ngô kiyang xocbê wê xam ngô ge lê, lêc he ngôên ma.”

Kiyang pilepacên lec tibii Samelia ti

²⁵Buc ti lêc xomxo wê xovô Moses xolac ge ti kidi lec di nêl kiyang vô Yesu ên nêb ob yaxên i, om nêl bêga ên nêbê, “Xolac kehe, a obêc vông bêna êdêc dô magviha luta lêc luta?” ²⁶Lêc Yesu nêl lax vô i ên nêbê, “Kiyang wê yêp vac Moses xolac ge, ông kitong lêc nêbê va?” ²⁷Mêgem xomxo tyo nêl ên nêbê, “Xolac nêl bêga ên nêbê, ‘Ông xêmyaa i vin lec ông Apumtau Anutu di ông vông nilôm yuu kinum di xêkizêc yuu piyôp i loc diluhu vô Anutu, di ông xêmyaa i vin lec xomxo baba i tiyi xocbê ông xêmyaa vin lec ôcông va ge.’” ²⁸Mêgem Yesu nêl ên nêbê, “Ông nêl ge nivaha pyap, om ông obêc vông bêge ge od ông obêc dô mamviha luta lêc luta.”

²⁹Lêc xomxo tige nêb ob viac i nivaha om kinêg vô Yesu ên nêbê, “Kiyang wê nêl ên nêbê il xêdyaa i vin lec xomxo baba ge, ge nêl lec xomxo nae?”

³⁰Om Yesu nêl kiyang pilepacên ti vô i bêga ên nêbê, “Xomxo ti kidi gê Jerusalem ên nêb ob la Jeliko, om la vô môp mi la, lêc tibii yôdac wê mi vun xomxo susu ge hi i vô nipaên di lêx i nên ngakwi sea di kô i susu vihati mi la, dêc xomxo tyo la yêp vac môp di vô kwabo lec wê ob yib ge. ³¹Lêc vô buc tige xomxo wê mi si daa vô Anutu ge ti mila vô môp tige

mi la yê lê, léc sea i yêp di luu vêl mi la. ³²Nang dèc xomxo Livai wê mi vông yuac vac Anutu xumac ngibua ge ti mila vô môt tige mi la yê lê, léc sea i yêp di luu vêl mi la.

³³“Mêd tibii Samelia ti mila vô môt tige om val yê xomxo tyo wê yêp ge, léc xo vîgwe pisiv ên i, ³⁴om la kwabo vô dèc vông malasin wel yuu wain vac xomxo tyo kityax wê tibii vevac hi ge, mi vîyum xôn, dèc tung i la lec i bwoc donki mêd kô mi

la vac xumac wê xomxo kisuu di yêp vac ge ti di viac i. ³⁵Vîgwe vidiiên mêd tibii Samelia tige vông mone kehe ti vô xomxo ti wê viac xumac tige di nêl vô i ên nêbê, ‘Ông viac xomxo tiga nivîha ya mone wê a vông ga, dèc ông obêc vông luu vêl ge od a obêc vena vông vac ông xe wê ông viac xomxo tiga ya ge.’”

³⁶Yesu nêl bêge dèc kinêg vô xomxo xolac kehe tige ên nêbê, “Om ông xo ên ông nêb xomxo yon ge, tina xêyaa vin lec xomxo ti wê tibii yôdac hi ge?” ³⁷Lêc xomxo tyo nêl lax ên nêbê, “Xomxo ti wê xo vîgwe pisiv ên i ge.” Om Yesu nêl vô i ên nêbê, “Om ông lôc, di loc vông môt i tiyi bêge.”

Mata yuu li Malia

³⁸Mêd Yesu he nue ngivîhi la léc mila vac vîgwe ti wê vêx ti dô vac lê nêbê Mata. Om Mata kô Yesu mi la vac i ben. ³⁹Lêc Mata li vêx ngwe dô lê nêbê Malia, om Malia la dô hixôn Apumtau Yesu mi ngô i kiyang. ⁴⁰Lêc Mata vông yuac levaclec yebac mi vô vîlee vîlee mi vông nilô vô vîyin om la nêl vô Yesu ên nêbê, “Apumtau, nii Malia sea a mi vông aca tibed vông yuac lec yaên ga. Lêcom mêd ông wê ge nivîha? Ông nêl ên i lam vông yuac hixôn a.” ⁴¹Lêc Apumtau nêl vô i ên nêbê, “Mata, Mata, ông vông nilôm la vô susu vîyang vîyang ge om vông ông nilôm vô vîyin lec. ⁴²Mêlêc môt tibed wê ông sea ge. Ge môt nivîha wê Malia vông ge, om il obêc vô vêl ên i nang lêm.”

Yesu nêl môt kitaaên kitong vô nue ngivîhi

(*Matyu 6:9-15; Matyu 7:7-11*)

11 ¹Buc ti Yesu la kitaa vac vîgwe ti, pyap dèc nue ngivîhi ti nêl vô i ên nêbê, “Apumtau, xe nêb ông nêl môt kitaaên kitong vô xe i tiyi xochê Jon Lipacên nêl vô nue ge.” ²Mêgem Yesu nêl vô he ên nêbê, “Xam obêc kitaa ge od xam kitaa bêga bê,
 ‘Mag, ông lêm i lam tu ngibua. Ông lam tu Apumtau i tiyi vîgwe vîhati. ³Ông vông yaên vô xe i tiyi buc vîhati. ⁴Xe nêm myaviwen wê yêp vô xe ge ông kitya vêl, xochê xe kitya nêm nipaên vêl vômâ ge. Ông o léc didii xe mi loc vac kiyang wê ob yaxên xe ge lêm.’”
⁵Mêd Yesu nêl vô he ên nêbê, “Xam ti obêc la vô ngidêm ti vô vivuaên mahigun di nêl vô i ên nêbê, ‘Ngidêg, a val ga vô ông ên a nêbê ông

vông blet yon vô a, ⁶ên a ngidêg ngwe val vô vigwe bucên tya ga vô a, lêcom yaên wê a ob vông vô i ge ma.' ⁷Lêc ngidêm dô vac xumac nilô di nêl bêga vô ông ên nêbê, 'Ga vivuaên mahigun di a tung xumac lec pyap di xe nuge xêp ga mê, om o tiyi wê a ob kidi lec mi vông yaên ti vô ông ge lêm. Mêgem ông lôcê.' ⁸Om a ob nêl vô xam bê ngidêm obêc kidi lec mi lam vông yaên vô ông ge od ob vông vô ông ên wê i ngidê ông ge lêm. Nge, obêc vông vô ông ên wê ông kitaa i nginong ge. ⁹Om a ob nêl vô xam bê xam kitaa susu ya vô Anutu ên Anutu i vông vô xam, di xam myag susu êdêc wêvô, di xam kituu vuayen ên Anutu i tax vuayen ên xam. ¹⁰Ên xomxo vihati wê kitaa vô Anutu ge obêc kô nôn tiyi wê he kitaa ge, di xomxo vihati wê myag susu ge obêc yêvô, di xomxo vihati wê kituu vuayen ge od Anutu obêc tax vuayen ên he.

¹¹"Xame, xam nume ti obêc kitaa xam nêb ob ya pis ge od xam obêc vông myel vô, me? ¹²Me nume ti obêc kitaa xam ên nêb xam vông kokilêx nulen vô i ge od xam obêc vông kipyêc vô, me? Maê. ¹³Xam ga xomxo kibun nimpâên, lêc xam mi vông susu nivihaviha vô nume, om xam xovô bêga bê il Mag Anutu lag puunê nêb ob vông susu nivihaviha luu vêl vô il om ob vông Myakilôhô Ngibua vô xomxo wê kitaa i ge."

Xomxo nêl ên nêbê Yesu vông yuac ya xêkizêc wê Seten vông ge
(*Matyu 12:22-30; Mak 3:20-27*)

¹⁴Yesu tii vimwo nipaên ti vêl ên xomxo ti. Vimwo tyo vông xomxo tige dô yac di keacên ma, om buc wê Yesu tii vimwo tyo la vêl ge od xomxo tyo keac, di xomxo wê yê gee yetac mabu. ¹⁵Lêc xomxo ya nêl ên nêbê, "Bielsebul wê tu vimwo nipaên nêl levac ge vông xêkizêc vô Yesu, om Yesu tii vimwo nipaên vêl ya xêkizêc wê Bielsebul vông ge." ¹⁶Di xomxo ya nêb ob yaxên Yesu, om nêl vô i ên nêbê, "Xe nêb ông vông do levac ti mi xe xê ên i nêl kitong bê ông kô xêkizêc vô Anutu lag puunê." ¹⁷Lêc Yesu xovô kiyang wê yêp vac he nilô ge om nêl vô he ên nêbê, "Xomxo viyang ti obêc hibuma sea mi hima ge od ob dô nivihava nang lêm. Me xomxo xumac ti obêc hibuma sea mi hima ge od obêc vông he vô nipaên. ¹⁸Bêge mêgem Seten he lie obêc hibuma sea mi hima ge od xêkizêc wê he vông ge ob yêp nivihava tibêna? Ge he ob dô nipaên. A nêl bêge ên wê xam nêl ên xam nêbê a tii vimwo nipaên la vêl ên xomxo ya xêkizêc wê Bielsebul vông ge. ¹⁹Lêc a ob kinêg vô xam bê a obêc tii vimwo nipaên vêl ya xêkizêc wê Bielsebul vông ge od letya wê vông xêkizêc vô lime lêc he tii vimwo nipaên vêl ya ge? Ge lime vaci ob yaxên kiyang wê xam nêl ge lê. ²⁰Lêc Anutu vaci obêc vông xêkizêc vô a di a tii vimwo nipaên la vêl ge od xam xovô bêga bê Anutu lam tu levac vac xam mahigun pyap.

²¹"Xomxo xêkizêc ti obêc hêm susu vevac vac vigê di dô bin i xumac ge od susu wê i vông ge ob dô nivihava. ²²Lêc xomxo ngwe wê xêkizêc luu vêl ge obêc val vông vevac vô i di nginoo vêl ge od ob vô susu vevac wê

xomxo tige xo nêb ob ngidu i xôn ge vêl, dèc kô susu wê xomxo tige vông ge vihati mi la titang vaxvax vô lie ya.

²³“Om a ob nêl bêga bê xomxo ti obêc dô hixôn a mi ngidu a xôn lêm ge od ge tiyi xocbê vông vevac vô a. Di xomxo wê o vilu vô xomxo hixôn a lêm ge od ge tiyi xocbê tii he moo sea ge.

Vimwo nipaên vena i tii vac nang

(Matyu 12:43-45)

²⁴“Vimwo nipaên ti obêc lam la vêl ên xomxo ti ge od ob la vilee vac vigwe myadongên mi la myag vigwe ti wê ob la dô seac vêl vac ge. Lêc yêvôên vigwe ti obêc ma ge od ob nêl bêga bê, ‘A ob lax mi la dô vac bog wê a sea di lam ge i tii vac nang.’ ²⁵Om vimwo tige obêc lax mi la vô xomxo ti wê i dô vac ilage mi lax yê wê pityep mi viac nivaha ge, ²⁶od obêc la kô vimwo nipaên wê nêl nipaên luu i vêl ge vigê vilu di sec yuu, lêc he xôn lax dô vac xomxo tige, di vông i vô nipaên levac luu viwen tax ge vêl.”

Môp wê xomxo ob dô hixôn xêyaa nivaha ge

²⁷Yesu nêl kiyang tige vô xomxo tibeac, lêc vêx ti tyuc vya levac vac he mahigun ên nêbê, “Ông tam ti wê kô ông mi vông lul vô ông ge, i dô hixôn xêyaa nivaha.” ²⁸Lêc Yesu nêl ên nêbê, “Bêge mêlêc a nêl bê xomxo wê ngô Anutu kiyang mi viac ge wê ob dô hixôn xêyaa nivaha.”

Xomxo nêb he ob yê do levac

(Matyu 12:38-42; Mak 8:12)

²⁹Xomxo tibeac lam kitucma mi dô, mêgem Yesu nêl vô he ên nêbê, “Xomxo gwêbaga, xomxo nipaên nôn. He nêb he ob yê do levac lê, lêc a ob nêl bê he ob yê do tibeac lêm. Nge, do tibed wê he ob yê ge, tiyi xocbê wê Jona vông ilage. ³⁰Ên môp wê Jona la dô vac lilii gwec nilô tiyi buc yon ge, ge Anutu hilung vô tibii Niniva tiyi xocbê do levac ge. Bêge mêgem a, Xomxo Nu, a obêc tu do levac bêge vô xomxo gwêbaga êno.

³¹“Om obêc buc timuên wê Anutu obêc titô xomxo ge, od vêx levac wê tu tibii Siba nêl kwin vac buc ilage ge obêc kidi lec hixôn xam wê xam dô gwêbaga di nêl xam nêl nipaên kitong. Ên vêx tige kidi vac kibun myahipu di lam ên nêb ob lam ngô kiyang wê King Solomon nêl hixôn piyôp nivaha ge. Di gwêbaga a wê a luu Solomon vêl ge a lam dô hixôn xam lê, lêc xam o ngô a vyag lêm. ³²Om obêc buc timuên wê Anutu obêc titô xomxo ge, od tibii Niniva êno obêc kidi lec hixôn xam wê xam dô gwêbaga di nêl xam nêl nipaên, ên ilage tibii Niniva ngô kiyang wê Jona nêl vô he ge di pilepac he, di gwêbaga a wê a luu Jona vêl ge a lam dô hixôn xam, lêc xam o pilepac xam lêm.

Kiyang pilepacên lec lam
(*Matyu 5:15; Matyu 6:22-23*)

³³“Xomxo ti obêc byêx ngwax vac lam ge od ob vun vac pêt ngibi me lax dêg lec xôn lêm. Nge, ob lax i le lec tevol kisii ên xomxo wê ob lam vac xumac nilô ge i lam yê xêseac. ³⁴Xam mamnôn tiyi xocbê lam wê linac lec nimnivi ge, om mamnôn obêc dô nivihha ge od obêc vông nimnivi vihati dô vac xêseac, lêc xam obêc vông mamnôn vô nipaên ge od nimnivi vihati obêc mapitoc. ³⁵Om xam viac xam êdêc xêseac wê dô vac xam ge i o lêc vô mapitoc lêm. ³⁶Ên nimnivi vihati obêc dô vac xêseac di mapitoc ma ge od nimnivi obêc xêseac nivihha xocbê lam xêseac linac lec ông ge.”

Môp nipaên wê he Palisi hixôn xomxo wê xovô Moses xolac gee vông ge
(*Matyu 23:1-36; Mak 12:38-40; Luk 20:45-47*)

³⁷Yesu nêl kiyang tige pyap dêc Palisi ti val nêl vô Yesu nêb i loc ya hixôn i, om Yesu la vac Palisi tyo ben mi la dô hixôn i mi ya. ³⁸Lêc Palisi tyo yê wê Yesu diya ge lê, lêc o lipac vigê tax tiyi xocbê môp wê he Palisi mi vông ge lêm, om yetac mabu. ³⁹Lêc Yesu nêl vô i ên nêbê, “Xam Palisi ge, xam mi lipac nimnivi pileva tiyi xocbê xam lipac kap yuu pile nimi ge, dom xam nilôm ge, môp yôdac yuu nipaên pup lec. ⁴⁰Xam tibii piyôp maên. Anutu ti wê tung il nidnivi ge o tung il nilôd hixôn lêmê? ⁴¹Om a ob nêl vô xam bê xam vông susu wê dô vac pile yuu kap nilô ge vô xomxo wê nêl susu maên ge ên i loc ngidu he xôn. Xam obêc vông bêge ge od xam nêl môp vihati obêc vô paha lec.

⁴²“Om xam Palisi ge, xam xona nêl ên viyin wê ob val vô xam ge. Ên xam nêb xam ob timu vô Moses xolac vihati, om xam obêc tulec susu xocbê lehac yuu ngec nipwopwo ge od xam mi tung kidu vigê yuu lêc mi vông kidu ti la tu daa vô Anutu. Xam mi vông bêge lê, lêc xam sea môp bôbac yuu môp xêyaa vin lecên Anutu. Om a ob nêl bê xam o lêc vông môp ngwe vô nivihha di sea ngwe lêm. Nge, xam vông yuu xôn i vô nivihha.

⁴³“Xam Palisi, xam xona nêl ên viyin wê obêc tulec xam ge. Ên buc wê xam la vac xumac lilo ge, od xam yong xam ên xam nêb xam ob dô lec sia nivihha vô xomxo manôn, di buc wê xam la vilee lec wetôv ge od xam nêb xomxo vihati i pimil xam ya vya nivihha.

⁴⁴“Mêgem xam xona nêl ên viyin wê obêc tulec xam ge. Ên xam nilôm tiyi xocbê lôva wê le vac kibun nilô mi xomxo len yêp vac ge, mêlêc xomxo tibeac lungên di xoc vô kisii mi la om vông he vô nipaên.”

⁴⁵Mêgem xomxo wê xovô Moses xolac ge ti nêl vô Yesu ên nêbê, “Xolac kehe, kiyang wê ông nêl ge, ge ông nêl nipaên lec xe hixôn.” ⁴⁶Lêcom Yesu nêl vô he ên nêbê, “Xam wê xam xovô Moses xolac ge, xam xona nêl ên viyin wê obêc tulec xam ge. Ên xam nêl kiyang tibeac vô xomxo

ên xam nêb he i timu vô, om xam lii viyin levac lec he, lêc xam vigêm o kilê viyin tige hixôn he lu ya lêm.

47“Om xam xona nêb ên viyin wê obêc tulec xam ge. Ên mame bume tivame, he hi plopete yib, lêc gwêbaga xam divunac vô lôva wê plopete yêp vac ge. 48Om môp tibêge nêl xam kitong ên nêbê xam xêmyaa vô nivîha ên môp wê bume vông ilage, ên bume hi plopete yib, lêc gwêbaga xam vunac vô lôva wê plopete yêp vac ge.

49“Mêgem Anutu wê xovôen kehe ge nêl bêga ên nêbê, ‘A ob vông plopete yuu sinale i loc vô he lê, lêc he obêc vông viyin vô he dêc hi he ya yib.’ 50Om xomxo wê dô gwêbaga, he ob kô myaviwen nipaên lec wê he hi plopete yib ge. Ge nêl lec plopete vihati yang, he wê dô vô buc taxlee ilage wê Anutu tung lag yuu kibun ge di i val tyip lec buc gwêbaga hixôn. 51Kiyang tige lec Ebel wê taxlee ge di i val tyip lec plopete Sekalaia ti wê bume hi i yib vac xumac ngîbua yuu alta mahîgun ge. Vixôhilôg, a ob nêl hixôn nôb vô xam bê xomxo gwêbaga ob kô myaviwen nipaên lec môp gee vihati.

52“Om xam wê xam xovô Moses xolac ge, xam xona nêb ên viyin wê xam ob kô ge. Ên môp wê xomxo ob ngô xolac kehe ge, xam le vac xôn, ên xacxam va lungên xolac kehe om xam le vac môp xôn ên xomxo wê nêb ob ngô mi xovô ge.”

53Yesu nêl pyap dêc sea Palisi tyo ben di loc mi la, dêc he wê xovô Moses xolac gee hixôn he Palisi yê Yesu nipaên om he le kinêg kiyang viyang viyang vô i 54ên nêb ob yaxên bêc obêc nêl kiyang ti so ge od ob vông i loc vac kot.

Xona nêb ên kiyang kityooên (*Matyu 10:26-27*)

12 1Vô buc tige xomxo tibeac hiwocên la kitucma vô Yesu, om he la pup lec vigwe xocbê ob dô lecma vîxa hixôn, dêc Yesu nêl vô nue ngîvîhi tax ên nêbê, “Xam viac xam ên môp nipaên wê Palisi mi vông ge, ên he mi viyum kiyang nipaên vac kiyang nivîha, om môp tige tiyi xocbê yis wê ob vông blet vuac mi vô levac ge. 2Ên kiyang vihati wê yêp xôpacên ge obêc lam le seac, di kiyang vihati wê yêp vac xomxo nilô ge obêc hivêlac lec di xomxo vihati xovô. 3Om kiyang vihati wê xam nêl vô bucên ge od xomxo obêc ngô vô vidiiên, di kiyang vihati wê xam kimuna voma vac xumac lôma ge od obêc nêl i vô levac lec wetôv.

Xomxo i xona ên Anutu tibed (*Matyu 10:28-31*)

4“Xam lige, a ob nêl vô xam bê xam o lêc xona ên xomxo wê ob hi xam nimnivi yib ge lêm, ên he o tiyi wê obêc vông viyin yaya vô xam hixôn timuên ge lêm. 5Lêc a ob nêl xomxo ti wê xam ob xona ên ge kitong vô

xam bê Anutu tived wê obêc hi xomxo yib, dèc obêc timuên ge xêkizêc wê i vông ob nêx xomxo la vac vigwe nipaên. Om a nêl vô xam bê xam xona ên i tived.

⁶“Xam xovô ên xam nêbê xomxo ti obêc kisuu menac nipwo vigê vilu ge od obêc kisuu ya mone nipwo tiyi xocbê mone hi yuubed ge. Bêge mêlêc Anutu o lungên menac nipwopwo gee lêm. Nge, xovô gee vihati. ⁷Di Anutu o lungên xam êno lêm. Nge, kitong xam bamzub lihi vihati pyap. Om xam xonaên i ma, ên Anutu xêyaa vin lec xam ngînoo menac vihati vêl.

II ob nêl Yesu kitong vô xomxo
(*Matyu 10:19-20,32-33; Matyu 12:32*)

⁸“A ob nêl vô xam bê xomxo ti obêc nêl a kitong vô xomxo ge od a, Xomxo Nu, a ob nêl i kitong vô Anutu nue angela. ⁹Lêc xomxo ti obêc yax a vun vô xomxo manôn ge od a obêc yax i vun vô Anutu nue angela manôn êno bêge.

¹⁰“Xomxo ti obêc so vya vô a, Xomxo Nu ge od tiyi wê Anutu obêc kitya nipaên tige vêl ge. Lêc xomxo ti obêc so vya vô Myakilôhông Ngibua ge od o tiyi wê Anutu ob kitya i nên nipaên tige vêl ge lêm.

¹¹“Mêd buc wê xomxo obêc kô xam mi la vô xomxo levac vac xumac lilo me gavman ti me xomxo levac ti ge od xam o lêc xona di xo bêga bê ‘Xe ob luu he vya ya kiyang tina, di xe ob nêl kiyang bêna vô he?’ Le i lêc xo kiyang tibêge lêm. ¹²Ên obêc hiyôv manôn myabo tya ge od Myakilôhông Ngibua ob hilung kiyang wê xam ob nêl ge vô xam.”

Kiyang pilepacên lec xomxo wê mone tibeac ge ti

¹³Xomxo ti vac xomxo tibeac mahigun nêl vô Yesu ên nêbê, “Xolac kehe, ông nêl vô a lig ngwe ge bê i vông susu wê mag vigê ge viwen vô a.”

¹⁴Lêc Yesu nêl vô i ên nêbê, “Letya vinoo a nêb a titô xam nêm kiyang mi vông byed vô xam susu? Ge yêp vô xacxam va.” ¹⁵Mêgem Yesu nêl vô he vihati ên nêbê, “Xam xona nêm ên mamdoên vô susu viyang viyang ge, ên susu tibeac wê xomxo vông ge o tiyi wê ob vông he dô maviha ge lêm.”

¹⁶Mêgem Yesu nêl kiyang pilepacên ti vô he bêga ên nêbê, “Xomxo wê susu levac ge ti dô, lêc yuac wê i vông ge vô nôn tibeac, ¹⁷om xo bêga ên nêbê, ‘A ob vông bêna? Ên xumac wê a ob kituc susu vihati nôn vac ge tiyiên ma.’ ¹⁸Om nêl bêga ên nêbê, ‘A ob vông môp bêga bê a ob dii xumac wê a kituc susu nôn vac ge mi lox xumac levac levac pileva ên kituc yaên nôn yuu susu vihati wê a vông ge i loc dô vac. ¹⁹Pyap dèc a ob xo bêga bê a kituc susu tibeac di obêc dô tiyi klismas tibeac om a ob dô seac vêl mi xa di num hixôn xêgyaa nivîha.’ ²⁰Mêlêc Anutu nêl vô i ên nêbê, ‘Ông xomxo piyôp maên. Bucên hig ge ông obêc wib, om susu tibeac wê ông kituc ge obêc tu letya xe?’ ”

²¹Mêgem Yesu nêl ên nêbê, “Kiyang tige tiyi xocbê xomxo ti kituc susu tibeac tu ici va xe léc o xovô Anutu lêm om Anutu yê i tiyi xocbê xomxo pileva ti.”

Il ob vông il nilôm i vô viyin lêm
(*Matyu 6:25-34*)

²²Yesu nêl vô nue ngivihî ên nêbê, “Bêge mêgem a ob nêl vô xam bê xam o léc vông nilôm i vô viyin lec yaên wê xam ob wa ge yuu ngakwi wê xam ob vinyum ge lêm, ²³ên môt wê il ob dô madviha ya ge luu susu yaên vêl, di il nidnivi luu ngakwi vêl.

²⁴“Om xam xovô menac lê. Ên menac o xin vê vac yuac lêm, di he o kô yaên nôn vac yuac lêm, di he nên xumac wê ob kituc yaên vac ge ti o le lêm. Mêlêc Anutu vet he tiyi buc vihati. Di Anutu xêyaa vin lec xomxo nginoo menac gee vêl om ob viac xam nivîha. ²⁵Xame, xam ti obêc xo kiyang tibeac nêb xam ob dô mamviha ge od tiyi wê xam ob tul lec buc wê ob dô maviha ge i loc dia, me? ²⁶Ma vêl, xam o tiyi wê xam ob vông bêge ge lêm. Om bêna léc xam xo kiyang tibeac lec susu ninivi xen?

²⁷“Di xam xovô nita wê vuac maviya ge. Maviya o duu nivimihî lêm, di he o vông yuac ti lec ngakwi lêm, léc a ob nêl vô xam bê vunac vunac wê he vông ge luu vunac vunac nivîha wê King Solomon vông ge vêl. ²⁸Nita wê vuac maviya mi le vac yuac gwêba di obêc titige pisaên vêl ge od ob nêx i la vac ngwax, léc Anutu vunac vô he nivîha. Mêgem xam xovô bêga bê Anutu ob viac xam nivîha luu nita maviya vêl. Léc vông vinên wê xam vông ge o xêkizêc lêm. ²⁹Om xam o léc vông nilôm i loc vô susu yaên yuu numên lêm, me xam o léc vông nilôm i vô viyin lec lêm. ³⁰Ên tibii madiluhu ge wê vông nilô la vô susu ninivi xen ge, dom Mag Anutu xovô susu wê ma vô xam ge. ³¹Mêgem xam vông nilôm i loc vô Anutu xolac yuu ben tived lê, ge od Anutu obêc vông susu bêge vô xam hixôn.

Kiyang lec susu nivîha lag puunê
(*Matyu 6:19-21*)

³²“Xam kidu nipwo tya ga, xam xona ên i ma. Ên Mag Anutu xovô pyap nêb xam ob tu xomxo levac hixôn i vac i ben lag puunê. ³³Om xam vông susu wê xam vông ge mi tibii i kisuu, dêc xam vông mone vô tibii wê nên susu maên ge ên i vô nivîha vô he. Dêc xam kituc susu nivîhaviha i loc yêp lag puunê i tiyi xocbê mone yêp vac kilong nivîha ge. Ên susu wê yêp lag puunê ge, tibii yôdac ti obêc vun lêm, di gwaakivac yuu susu nipipaa ti obêc vông i vô nipaên lêm. ³⁴Ên vigwe wê susu nivîhaviha wê xam vông ge la dô vac ge, xam ob vông nilôm la vô vigwe tige.

Nue yuac i le maviha

³⁵“Xam viac xam dêc xam vêx let lec di byêx ngwax vac lam, ³⁶di xam dô i tiyi xocbê tibii yuac wê dô bin xomxo levac wê ob vena vac vizid ge,

ên xomxo tyo obêc vena hi vigê lec vuayen ge od he i tax xumac lutibed. ³⁷Om xomxo levac tyo obêc vena yê wê nue yuac dô maviha di yêpên ma ge od ob hi vixa pec ên he. A ob nêl hixôn nôn vô xam bê xomxo levac tyo obêc vên nivimihi tiyi wê nue yuac mi vinyum ge di vông he dô kidu ti dêc ici va obêc titang yaên vô he. ³⁸Di xomxo levac tyo obêc vena vô vivuaên mahigun me obêc vô kwabo lec wê kokilêx ob vô vya ge, lêc nue yuac obêc dô di yêpên ma ge od ob hi vixa ên he.

³⁹“Xam xovô lê. Xomxo ti wê i xumac ge obêc xovô buc wê tibii yôdac ob val lec ge od ob dô maviha mi bin i xumac êdêc tibii i o lêc loc vac i ben nilô mi vun i susu lêm. ⁴⁰Om xam êno viac xam mi dô bin buc wê a Xomxo Nu obêc vena lec ge, ên buc wê xam obêc xovô lêm ge wê a obêc vena lec ge.”

Kiyang pilepacên lec nue yuac nivihâ yuu nipaên
(*Matyu 24:45-51*)

⁴¹Pita kinêg vô Yesu ên nêbê, “Apumtau, ông nêl kiyang pilepacên ga vô xecxe va, me ông nêl vô xomxo vihâti?” ⁴²Lêc Yesu nêl ên nêbê, “Xomxo yuac letya wê viac yuac hixôn piyôp nivihâ ge? Xomxo levac obêc vînoo i ên nêb i viac lie yuac vihâti di vông yaên vô he i tiyi buc vihâti. ⁴³Om xomxo levac tyo obêc vena yê wê nu yuac tige viac yuac wê i vông ge nivihâ ge od ob hi vixa ên i. ⁴⁴A ob nêl hixôn nôn vô xam bê xomxo levac tige obêc vông nu yuac tyo tu levac mi viac susu wê i vông ge vihâti. ⁴⁵Lêc nu yuac tige obêc xo bêga vac nilô bê, ‘Tibii levac la dô ilatikwê di o vena lutibed lêm’, om loc hi lie yuac vên yuu vux, di ya di num levac di mav ge ⁴⁶od xomxo levac obêc vena lec buc wê nu yuac tige lungên di o dô bin i lec ge lêm, om xomxo levac obêc vông myaviwen vô i di vông i la dô hixôn tibii wê o vông i vin lêm ge.

⁴⁷“Tibii yuac ti obêc xovô môt wê i tibii levac vông vô i ge lêc o viac mi vông i vô nôn lec lêm ge od levac tyo obêc pisa i vô nipaên. ⁴⁸Lêc tibii yuac ti obêc lungên môt wê i tibii levac nêb i vông ge, dêc vông ti so tiyi wê ob kô myaviwen nipaên lec ge od tibii tyo obêc vông myaviwen nipwo tya vô di hiên i luu vêlên ob ma. Ên xomxo wê kô susu tibeac vô Anutu ge, ge wê Anutu nêb i vông myaviwen tibeac vac. Di xomxo obêc vông susu tibeac vô xomxo ti ên nêb i vông yuac ya ge od he obêc nêl nêbê, ‘Ông vông susu vô xe i luu vêl vac.’”

Yesu yuac obêc hibû xomxo la yuu
(*Matyu 10:34-36*)

⁴⁹Yesu nêl bêga ên nêbê, “A lam ên a nêb a ob lii ngwax i yêp kibun ga, om a nilôg xo ên a nêbê i tum lutibed. ⁵⁰Mêlêc viyin ti vô kwabo lec wê a ob kilê ge, lêc gên o val lêm, om a ob dô hixôn nilôg viyin levac di i miloc vô buc wê viyin tyo obêc lam la vêl ge lê. ⁵¹Xam xo ên xam nêb

a lam ên a nêb a ob vông kiyang malehe i yêp gê kibun ga, me? Ma vêl, a lam ên a nêb xomxo i hibû he sea lec a. ⁵²Om gwêbaga di obêc buc timuên hixôn ge od obêc môt bêga bê xomxo vigê vilu vac xumac ti obêc hibuma sea lec a lêg, lêc yuu dô kidu ngwe di yon dô kidu ngwe. ⁵³Om he obêc hibuma, di ma yuu nu vux ob yêma nipaên, di ta yuu nu vêx ob yêma nipaên, di vêxta yuu yen vêx ob yêma nipaên.”

Môt wê il ob xovô susu wê ob val timuên ge
(*Matyu 16:2-3*)

⁵⁴Pyap dêc Yesu nêl vô xomxo gee vihati ên nêbê, “Xam obêc wê mapitoc ti le vac viyobtoc ge od xam mi nêl ên xam nêbê lun ob val, dêc vixôhilôg, lun val tiyi xocbê xam nêl ge. ⁵⁵Di buc wê lea ob val ge od xam nêl ên xam nêbê hiyôv ob linac nivaha, dêc vixôhilôg, hiyôv linac i tiyi wê xam nêl ge. ⁵⁶Lêcom xam tibii kityooên, ên xam wê susu wê dô vac lag ge lê, lêc xovô nivaha, di bêna lêc xam dilungên môt wê Anutu vông gwêbaga vô xam mamnôn ge?”

Il ob titô nêd kiyang
(*Matyu 5:25-26*)

⁵⁷Yesu nêl ên nêbê, “Bêna lêc xam o vyac xovô môt nivaha mô lê? ⁵⁸Xomxo ti obêc kô ông mi muu la kiyang ge od muu hi kiyang i yib lutibed vac môt wê muu gên loc ge, êdêc i o lêc vông ông loc le vô hizap manôn dêc hizap i vông ông loc vô xêhipu mi xêhipu i vông ông loc kalabuhu lêm. ⁵⁹A ob nêl vô ông bê ông ob la dô vac kalabuhu di hi myaviwen vihati i ma vêl lê.”

Xomxo wê o pilepac he lêm ge obêc yib

13 ¹Vô buc tige xomxo ya val vô Yesu mi val nêl xomxo Galili kitong vô i. Ge nêl lec he Galili ti wê he dihi bwoc sipsip ên he nêb ob si i tu daa vô Anutu lê, lêc gavman levac Pailat vông nue lam hi he di kipyax he hi sea hixôn bwoc hi. ²Mêgem Yesu nêl vô he ên nêbê, “Xam xo ên xam nêbê Galili tige, he vông nipaên luu lie Galili vêl om he yib lec he nêb nipaên. ³Lêcom a ob nêl vô xam bê he o yib lec ngwe bêge lêm. Lêcom xam xovô bê xam obêc pilepac xam lêm ge od xam obêc wib bêge êno. ⁴Di xomxo Jerusalem vigê yuu di vixa vilu di sec yon (18) wê xumac vixa dia kipê mi hi he yib gê Siloam ge, xam xo ên xam nêbê he vông nipaên luu lie Jerusalem baba vêl om he yib lec he nêb nipaên. ⁵Lêcom a ob nêl vô xam bê he o yib lec kehe bêge lêm. Lêcom xam xovô bê xam obêc pilepac xam lêm ge od xam obêc wib bêge êno mê.”

Kiyang pilepacên lec xax ti wê nôn ma ge

⁶Yesu nêl kiyang pilepacên ti vô he ên nêbê, “Xax kwacsung ti le vac xomxo ti yuac om xomxo tyo la yê ên nêb ob la yul nôn, lêc nôn ma,

7om nêl vô xomxo ti wê mi viac i yuac ge ên nêbê, ‘Ngô lê. A lam ga tiyi kliskas yon ên a nêb a ob yul kwacsung tiga nôn lê, lêc nôn ti o yux lec lêm. Om ông vuv vêl ên i o vô kibun hizi vêl vaxvax lêm.’⁸ Lêc xomxo viacên tige nêl vô i ên nêbê, ‘Vông i le kliskas ngwe ga hixôn di a den kibun yuu kô bwoc yaa mi tung vac kehe mi xê lê.’⁹ Di kliskas ngwe timuên u ob xê lê, lêc vuac ge od i le, lêc vuacên ma ge od ông nêl di a vuv vêl.’ ”

Yesu vông vêx ti vô nivaha lec vô buc sabat

¹⁰ Vô buc sabat ti Yesu nêl xolac vô xomxo vac xumac lilo ti. ¹¹ Lêc vêx ti dô hixôn he, di vimwo nipaên dô vac i nilô di vông yidac vô i tiyi kliskas vigê yuu di vixa vilu di sec yon (18). Om vêx tyo nimi kizêc len gec om o tiyi wê ob le bôbac ge lêm. ¹² Lêc Yesu yê vêx tyo om keac i lam di nêl vô i ên nêbê, “Vêx, a vông ông yidac la vêl.” ¹³ Mêgem vyax vigê lec i di lutibed vêx tyo le bôbac di pimil Anutu.

¹⁴ Lêc xomxo levac ti wê viac xumac lilo ge ni nyag vô Yesu ên wê vông vêx tige vô nivaha lec vô buc sabat ge, om nêl vô xomxo tibeac gee ên nêbê, “Buc vigê vilu di sec ti yêp wê il ob vông yuac lec ge om xam ti obêc vông yidac ge od xam lam lec buc yuac ên xomxo i vông xam vô nimvaha lec, di xam o lêc lam lec buc sabat lêm.” ¹⁵ Lêc Apumtau Yesu luu i vya ên nêbê, “Xam tibii kityooên, ên xam mi la vac bwoc ben di la piwelac xam kau yuu donki lec buc sabat di didii he mi la vô mia ên xam nêb he i num. ¹⁶ Lêc vêx tiga Eblaham bue ti, lêc Seten ku i xôn tiyi kliskas vigê yuu di vixa vilu di sec yon (18), om a piwelac viyin tige vêl ên i lec buc sabat. Lêc mêd xam wê ên xam nêb môp tibêge o nivaha lêm?” ¹⁷ Yesu nêl bêge om xomxo wê yê i nipaên ge ni yoc ên he, di xomxo vihati gee he xêyaa vô nivaha ên do levac vihati wê Yesu vông ge.

Kiyang pilepacên lec vixô yuu yis (Matyu 13:31-33; Mak 4:30-32)

¹⁸ Yesu nêl ên nêbê, “Anutu ben kehe ge tiyi vatya? A ob tixuu lec kiyang ti. ¹⁹ Ge tiyi xocbê vixô nôn nulen wê nipwo lee tya, lêc xomxo ti kô mi la nêx vac yuac mêd nôn tyo tyip mi vô levac di menac viyang viyang lam vông liwihi lec ngen mi dô lec.”

²⁰ Nang dêc Yesu nêl ên nêbê, “Anutu ben kehe ge, a ob tixuu lec va? ²¹ Ge tiyi xocbê yis nipwo tya wê vêx ti pilepac hixôn plaua levac om vông plaua vuac mi vô levac ge.”

Kiyang lec môp wê xomxo ob la vac Anutu ben ge (Matyu 7:13-14,21-23)

²² Yesu la ên nêb ob la Jerusalem, lêc la vac vigwe levac yuu nipwo toto mi la nêl xolac vô xomxo. ²³ Lêc xomxo ti kinêg i ên nêbê, “Apumtau,

xomxo wê Anutu obêc kô he mi he la dô maviha ge, obêc yuu tya, me?” Om Yesu nêl vô he ên nêbê, ²⁴“Xam vông yuac xêkizêc êdêc vac loc vac vuayen nipwo. Ên xomxo tibeac obêc xo ên nêb he ob la vac vuayen nipwo tige lê, lêc tiyiên ma wê he ob la vac ge. ²⁵Ên xomxo wê i xumac ge obêc kidi mi lam tung xumac lec, om xam ob le vixun di kituu vuayen di nêl bêga bê, ‘Apumtau, tax vuayen ên xe.’ Lêc obêc nêl vô xam bêga bê, ‘Xam lam gê na? Xam ge a lungên xam.’ ²⁶Lêc xam obêc luu i vya bêga bê, ‘Xe ga wê il mi xa mi mi dô, di ông mi nêl xolac vô xe vac xe bom ge.’ ²⁷Lêc obêc nêl vô xam bêga bê, ‘Xam ge a lungên xam. Xam ge tibii nipaên, om xam loc vêl ên a magnôn.’ ²⁸Om xam obêc wê bume Eblaham yuu Aisak di Jekop hixôn plopete vihati wê he la dô vac Anutu ben, dom xam ge wê Anutu obêc tii xam la dô vixun, di xam obêc byag di kic nivum lecma. ²⁹Di tibii obêc kidi vac vigwe ninya vilu vilu di viwen wê hiyôv tyip lam ge di viwen wê hiyôv hoo la ge, mi la ya di dô vac Anutu ben. ³⁰Om xam wê lê. Tibii wê xam nêb he timuên ge ya ob lam la mugên, di xomxo wê mugên ge ya obêc lôm la timuên.”

Yesu xo vigwe pisiv ên xomxo Jerusalem
(*Matyu 23:37-39*)

³¹Vô buc mahigun tige Palisi ya val nêl vô Yesu ên nêbê, “Ông sea vigwe ga di lam loc bangwe, ên Helot nêb ob hi ông wib.” ³²Lêc Yesu nêl vô he ên nêbê, “Xam loc nêl vô tibii kityooên tige bêga bê gwêbaga di titige wê a obêc tii vimwo nipaên vêl ên xomxo di vông xomxo yidac i vô nivaha lec, di duuma ge wê a obêc tiyôô yuac. ³³Lêc gwêbaga di titige di duuma ge wê a ob la, ên plopete wê xomxo hi he yib ge, he o yib vac vigwe ya lêm. Nge, he yib vac vigwe Jerusalem tibeac.

³⁴“Di xam Jerusalem, xam ge wê xam hi plopete yib, di xomxo wê Anutu vông i loc vô xam ge, od xam nêx he ya ngidax. Buc tibeac ge a vông ên a nêb a ob kituc xam lôm vô a tiyi xocbê kokilêx wê mi kituc nue lax vac vinihi ngibi ge, lêc xam nêb a vôngên i ma. ³⁵Om xam ngô lê. Anutu obêc sea xam bom i dô xel. Di a ob nêl vô xam bê xam ob wê a i tii vac nang lêm, di i miloc vô buc wê xam obêc nêl bêga bê ‘Il ob pimil xomxo ti wê tu Apumtau manôn mi val ge.’ ”

Yesu vông xomxo yidac ti vô nivaha lec

14 ¹Buc sabbat ti Yesu la vac Palisi levac ti xumac mi la ya hixôn i, lêc xomxo wê dô gee diyê i xôn. ²He dô lê, lêc xomxo wê ninivi vô vuac vuac ge ti val vô Yesu, ³om Yesu kinêg he wê xovô Moses xolac gee yuu he Palisi wê dô gee ên nêbê, “Tiyi wê il ob vông xomxo wê yidac ge i vô nivaha lec vô sabbat, me?” ⁴Lêc he o luu kiyang ti lax vô i lêm, om Yesu la hôm xomxo yidac tyo di vông i vô nivaha lec di vông i loc mi la. ⁵Mêgem Yesu nêl vô xomxo gee ên nêbê, “Xam nume ti me bwoc ti obêc

tô lôva madia lec buc sabat ge od tiyiên ma wê xam ob pul i lôm lutibed lec sabat ge, me?” ⁶Lêc he o luu kiyang ti lax vô Yesu lêm.

Xomxo i o léc yong he bê he xomxo levac lêm

⁷Yesu yê xomxo wê lam ya vac Palisi tyo ben ge, léc yê wê he ya yong he nêb he ob dô lec sia nivîha wê xomxo levac mi dô lec gee, om Yesu nêl kiyang pilepacên ti vô he ên nêbê, ⁸“Xomxo ti obêc nêl ông la vac vizid ti ge od ông o léc yong ông mi loc dô lec sia nivîha wê xomxo levac ob dô lec ge lêm. Ên xomxo levac ngwe obêc val ge ⁹od xomxo ti wê myêl vizid tige obêc nêl vô ông bê, ‘Kidi lec mi loc dô ganê di vông sia vô xomxo levac tige mi i dô lec,’ di ông nim obêc yoc ên wê ông la dô timuên.

¹⁰“Om xomxo ti obêc nêl ông la vac vizid ti ge od ông loc dô timuên ti lê, léc xomxo ti wê myêl vizid tige obêc nêl vô ông ên nêbê, ‘Ngidêg, lam dô lec sia nivîha ga’ od ông obêc tu xomxo levac ti vô xomxo gee manôn. ¹¹Ên xomxo ti obêc yong i nêb i xomxo levac ge od Anutu obêc yê i xocbê xomxo pileva, léc xomxo ti obêc vông i vô nipwo ge od Anutu obêc pimil i di vông i lê vô levac.”

¹²Pyap dêc Yesu nêl vô Palisi ti wê myêl vizid tige ên nêbê, “Ông obêc myêl vizid ge od ông o léc nêl tame mame lime ngidême, me xomxo wê susu tibeac ge i lam lêm, ên he ge wê he obêc myêl vizid nang mi vông myaviwen vac vô ông. ¹³Nge, ông obêc myêl vizid ge od ông tyuc xomxo wê nêc susu maên hixôn he wê o xêkizêc lêm di he wê vixa nipaên hixôn he wê ma tocên gee i lam. ¹⁴Xomxo tigege o tiyi wê ob vông myaviwen vac vô ông ge lêm, léc Anutu ob vông myaviwen nivîha vô ông vô buc timuên wê xomxo nivîha ob kidi lec vac yibên ge om ông ob dô hixôn xêmyaa nivîha.”

Kiyang pilepacên lec vizid

(Matyu 22:1-10)

¹⁵He gên ya mi dô vac Palisi tyo ben, léc xomxo ti vac he mahigun ngô kiyang wê Yesu nêl lec vizid ge om nêl vô Yesu ên nêbê, “Xomxo wê ob la ya mi dô vac Anutu ben lag puunê ge obêc dô hixôn xêyaa nivîha.” ¹⁶Lêc Yesu nêl kiyang pilepacên vô i bêga ên nêbê, “Xomxo ti nêb ob myêl vizid levac ti om vông kiyang la vô xomxo tibeac ên nêb he i lam ya. ¹⁷Om buc wê ob ya yaên ge od vông nu yuac ti la nêl vô xomxo wê ob lam vac vizid ge ên nêbê, ‘Yaên noc pyap, om xam lam ên lam wa.’

¹⁸“Lêc he toto nêl lax vô i ên nêbê he laên ob ma. Om ti nêl vô i ên nêbê, ‘A kisuu kibun ti, om a ob la xê, om ông lôc nêl vô tibii levac bê o tiyi wê a ob loc ge lêm.’ ¹⁹Di ti nêl vô i ên nêbê, ‘A kisuu bwoc kau vigê yuu om a ob la tixuu mi xê bêc obêc vông yuac nivîha, om ông lôc nêl vô xomxo levac bê o tiyi wê a ob loc ge lêm.’ ²⁰Di ti nêl ên nêbê, ‘A kô vêx paha ti om a locên ob ma.’

21 “Mêgem nu yuac tyo lax mi la nêl kitong vô i xomxo levac, mêd xomxo levac tyo ngô di xêyaa vô myavinê di i nêl vô nu yuac tyo ên nêbê, ‘Ông loc tup vô môp levac yuu nipwo vihati vac vîgwe levac ga di tyuc xomxo wê nêl susu maên hixôn he wê o xêkizêc lêm ge di he wê vixa nipaên hixôn he wê manôn tocên gee vihati i lam.’ 22 Om nu tyo la vông i tîyi dêc lôm nêl vô i ên nêbê, ‘A vông i tîyi wê ông nêl ge lê, lêc vîgwe gên o pup lec lêm.’

23 “Mêgem xomxo levac tyo nêl vô i ên nêbê, ‘Om ông loc vô môp nipwopwo wê la vac yuac ge vihati di loc kidu xomxo vihati ên he i lam pup lec a xumac. 24 Lêc a nêl vô ông bê xomxo wê a tyuc he taxlee lêc he o lam lêm ge, ti ob ya vizid wê a vông ge hixôn lêm.’ ”

Kiyang lec xomxo wê nêb ob timu vô Yesu ge

(Matyu 10:37-38)

25 Xomxo tibeac hiwocên timu vô Yesu vixa mi he la, lêc Yesu pop i di nêl vô he ên nêbê, 26 “Xomxo ti obêc nêb timu vô a xolac, lêc vông nilô lax vô tae mae lie di vinêe nue di ici va, di o vông nilô la diluhu vô a lêm ge od o tîyi wê ob tu a nug ge lêm. 27 Di xomxo wê o kilê viyin lec tîyi xocbê kilê xax pola ge mi timu vô a lêm ge, ge o tîyi wê ob tu a nug ge lêm.

28 “Om xam ngô lê. Xam ti obêc xo ên xam nêb xam ob lox xumac vixa dia ti ge od i dô mi xovô bê mone dô i tîyi wê ob lox xumac tige ya di i pyap ge, me? 29 Obêc xovô bêge tax lêm ge od obêc yev teac vac pyap, lêc o tîyi wê ob lox xumac tige pyap ge lêm, di xomxo vihati ob yê di so vya vô ông 30 di nêl bêga nêbê, ‘Xomxo tige nêb ob lox xumac lê, lêc o lox i pyap lêm.’

31 “Di kiyang ngwe, king ti wê nue vevac 10,000 ge nêb ob la vông vevac vô king ngwe wê nue vevac 20,000 ge od i dô mi xovô bêga bê xêkizêc wê nue vông ge tîyi wê obêc nginoo king ngwe wê nue 20,000 ge vêl ge, me he tîyiên ma. 32 Lêc obêc xovô bê tîyiên ma ge od king ngwe ge i gên dô teva di i vông xomxo mangwe i loc ên he i viac kiyang bê vevac obêc ma.

33 “Kiyang bêge, mêgem xam xovô bê xam ti obêc vô nimim vô susu wê i vông ge vihati lêm ge od o tîyi wê ob tu a nug ge lêm.

Kiyang pilepacên lec sol

(Matyu 5:13; Mak 9:50)

34 “Sol ge niviha, lêc obêc vô nyen maên ge od il obêc vông bêna vô ên i vô nyen i tii vac nangê? 35 Ên sol wê nyen maên ge o niviha tîyi wê il ob vông yuac ya ge lêm, om il ob nêx i la xel. Xam ninyam obêc yêp ge od xam ngô di xovô.”

Kiyang pilepacên lec bwoc sipsip ti

(Matyu 18:12-14)

15 ¹Tibii nipaên wê mi kô takis gee hixôn tibii nipaên yaya, he tibeac la vô Yesu ên nêb ob ngô i vya. ²Lêc he Palisi yuu xomxo

wê xovô Moses xolac gee yê di vô mya nipaên vô di nêl ên nêbê, “Xomxo tya ganê kô tibii nipaên lec di ya mi dô hixôn he.”

³Mêgem Yesu nêl kiyang pilepacên ti vô he ên nêbê, ⁴“Xam ti obêc viac bwoc sipsip 100 lêc ti xôa obêc ma ge od obêc sea sipsip 99 gee i le di lax myag ti wê xôa ma ge. ⁵Di obêc yêvô ge od obêc kilê lec kidiac di lax mi la ben hixôn xêyaa nivihã, ⁶di lax nêl lie hixôn nipipu ya lam di nêl vô he ên nêbê, ‘Xam lam ên il xôn ob dô hixôn xêdyaa nivihã di pimil a bwoc, ên a bwoc ga xôa ma lê, lêc a la xêvô mi kô mi vena nang.’ ⁷Kiyang bêge mêgem a ob nêl vô xam bê xomxo wê vông nipaên ge ti obêc pilepac i ge od he wê dô kisii ganê obêc hi vixa ên i, nginoo xomxo 99 wê he nêb he vô nivihã lec pyap om he ob pilepac he lêm ge.”

Kiyang pilepacên lec mone wê xôa ma ge

⁸Yesu nêl ên nêbê, “Vêx ti mone vigê yuu, lêc ti xôa ma om byêx ngwax vac lam di pityep xumac nilô di myag. ⁹Myag lêc yêvô om nêl lie hixôn nipipu ya lam di nêl vô he ên nêbê, ‘Xam xêmyaa i vô nivihã hixôn a, ên a mone xôa ma, lêc a xêvô i tii vac nang.’ ¹⁰Kiyang bêge om a ob nêl vô xam bê xomxo wê vông nipaên ge ti obêc pilepac i ge od Anutu nue angela obêc hi vixa ên i tiyi xocbê vêx tige hi vixa ên mone wê yêvô ge.”

Kiyang pilepacên lec nu ngivihi ti wê sea ma di la ge

¹¹Yesu nêl vô he ên nêbê, “Xomxo ti do, di i nu tuc yuu nu môn. ¹²Lêc nu môn nêl vô ma ên nêbê, ‘Mag, kibun yuu mone wê ông nêl a lêg lec ge, a ob kô vihati.’ Om ma vông byed vô susu vô yuu, om nu tuc kô wiwen di nu môn kô wiwen. ¹³He o dô buc xuhu dia lêm. Nge, dô nipwo tya, lêc nu môn viduba i susu hixôn mone wê ma vông vô i ge vihati di loc mi la vigwe teva ti, di la nêx mone la sea lec môp nipaên. ¹⁴I nêl mone ma vêl, di vip mabu yêp vac vigwe tige di susu ma ên i. ¹⁵Om la vông yuac vô tibii viyang tige ti, lêc tibii tyo vông i la bwoc ben ên nêb i loc viac i bwoc. ¹⁶Mêlêc vip den i mabu om xo ên nêb ob ya xax nôl wê bwoc mi ya ge ên i den i, lêc xomxo ti o vông yaên ti vô i mi i ya lêm.

¹⁷“Mêd i piyôp vô nivihã di i xovô nang, om xo ên nêbê, ‘Nue yuac wê mag vông ge, yaên tibeac dô vô he, dom a va ga, vip obêc den a xib mê. ¹⁸Mêgem a ob kidi mi lax mi la vô mag, mi lax nêl vô bê, ‘Mag, a vông i so vô Anutu di vông i so vô ông hixôn, ¹⁹di a o nigvihã tiyi wê ông ob nêl bê ông num a ge lêm. Om ông vông a tu ông num yuac ti.’”

²⁰“Nêl kiyang bêge pyap, mêd kidi mi la ên nêb ob lax mi la vô ma, lêc gên mîla teva di ma yê ma la wê nu môn val ge, om xo vigwe pisiv ên di tup mi la di mîla kiva xôn. ²¹Mêd nu môn nêl vô ma ên nêbê, ‘Mag, a vông i so vô Anutu di vông i so vô ông hixôn, om a o nigvihã tiyi wê ông ob nêl bê ông num a ge lêm.’ ²²Ma ngô lê, lêc nêl vô nue yuac ên nêbê, ‘Xam loc kô ngakwi dia nivihã ti mi lam vinyum lec môn. Di xam kô ling

ti mi lam su lec i vigê di kô su mi lam su lec i vixa xôn. ²³Di loc kô bwoc kau nu wê gên ligên nivihâ ge ti mi lam hi, ên il ob xa hixôn xêdyaa nivihâ, ²⁴ên a nug tiga xocbê la yib ila lê, lêc gwêbaga dô mavihâ, di xôa ma ila lê, lêc gwêbaga il xêvô i nang.’ Om he myêl vizid mi ya di dô hixôn xêyaa nivihâ.

²⁵“Di nu tuc la dô vac yuac di val vô kwabo vô xumac lêc val ngô wê he yoo ge, ²⁶om keac nu yuac ti lam di kinêg vô i ên nêbê, ‘Xam vô va?’ ²⁷Lêc nu yuac tige nêl ên nêbê, ‘Lim môn val gwêba, om mam hi bwoc kau nu wê gên ligên nivihâ ge ti mi myêl vô lim môn ên wê la dô lê, lêc vena nivihâ vô i ge.’ ²⁸Li tuc ngô lêc xêyaa vô myavinê om nêb ob la vô ma yuu li môn vac xumac lôma lêm. Om ma lop mi lam vixun di lam viac kiyang vô nu tuc. ²⁹Lêc nu tuc nêl lax vô ma ên nêbê, ‘A ga wê a vông yuac levac vô ông tiyi klismas tibeac di a o pwoo ông vyam ti vac lêm, lêc ông o nêl a lêg lec bwoc vimek nu ti ên xe lige myêl mi xa di dô hixôn xêmyaa nivihâ lêm. ³⁰Di num môn ge wê kô ông mone mi la vông i la lec vêx yôdac lê, lêc gwêbaga vena om ông hi bwoc levac wê lig nivihâ ge ti vô i.’

³¹“Mêd ma nêl vô nu tuc ên nêbê, ‘Tuc, u mi dô ga luta, om susu wê a vông ge vihati tu ông xe. ³²Di gwêbaga il vihati ob dô hixôn xêdyaa nivihâ ên wê lim môn vena ge, ên xôa ma ila om il xê xocbê la yib ge, lêc la dô mavihâ om vena gwêbaga di il xê i manôn nang.’ ”

Kiyang pilepacên lec tibii yuac nipaên ti

16 ¹Nang dêc Yesu nêl vô nue ngivihî ên nêbê, “Xomxo susu tibeac ti dô, di nu yuac ti viac i susu, lêc xomxo ya la nêl kitong vô xomxo levac tyo ên nêbê, ‘Num ti wê bin ông yuac ge mi vông ông susu yuu mone la vax vax.’ ²Om xomxo levac tige keac nu yuac tyo lam di kinêg vô i ên nêbê, ‘Ông vông bêna lêc a ngô xocbê kiyang yêp vô ôngê? Ông loc kivuu a susu wê ông viac ge vihati lec kipihac ti dêc vông i lam ên a xê, ên ông ob viac a yuac i tii vac lêm.’

³“Om nu yuac tyo xo bêga ên nêbê, ‘Om a ob vông bêna? Ên xomxo levac obêc tii a vêl ên i yuac gwêbaga, lêc xêkizêc wê a vông ge tiyiên ma wê a ob kiden kibun ge, di a nig yoc ên wê a ob kitaa susu vaxvax vô xomxo ya ge. ⁴Lêcom ga a xovô môm wê a ob vông ge ti, êdêc buc wê xomxo levac obêc tii a vêl ên i yuac ge od xomxo ya i kô a mi loc vac ben di viac a.’ ⁵Om môm wê xovô ge bêga ên nêbê keac tibii wê i xomxo levac myaviwen yêp vô ge he toto lam, dêc kinêg ti wê val taxlee ge ên nêbê, ‘Ông kô susu vaba vô xomxo levac lêc myaviwen gên yêpê?’ ⁶Om xomxo tyo nêl vô i ên nêbê, ‘Ge a kô wel vac dlam 100.’ Om nu yuac tyo nêl vô i ên nêbê, ‘Hôm kipihac wê ông myaviwen yêp lec ge di kivuu ông myaviwen i tô mi loc xocbê dlam wel 50.’ ⁷Nang dêc xomxo ngwe val om nu yuac tyo kinêg i ên nêbê, ‘Ông myaviwen vaba yêpê?’ Lêc xomxo

tyo nêl ên nêbê, 'Pidi yul 100.' Om nu yuac tyo nêl vô i ên nêbê, 'Hôm kipihac ga di kivuu ông myaviwen bê pidi yul 80.'

⁸"Om xomxo levac tyo yê môt nipaên wê nu yuac tige vông ge, lêc pimil nu yuac tige ên wê vông môt hixôn piyôp nivihã ge. Ên xomxo wê vông nilô la vô susu kibun ga ge, he kô piyôp levac lec môt yuu yuac kibun ga luu xomxo wê dô vac xêseac ge vêl.

⁹"Om a ob nêl vô xam bê xam ngidu xomxo xôn ya mone yuu susu kibun ga ên he xêyaa i vô nivihã vô xam, di buc timuên wê xam vigêm obêc sea mone ge od Anutu i kô xam mi xam loc dô vac i ben luta lêc luta.

¹⁰"Xomxo ti obêc viac yuac nipwopwo wê xomxo nêb i vông ge nivihã ge od obêc viac yuac levac nivihã êno bêge, lêc xomxo ti obêc viac yuac nipwopwo nivihã lêm ge od obêc viac yuac levac êno nivihã lêm. ¹¹Mone yuu susu kibun ga, ge susu pileva, lêc xam obêc viac nivihã lêm ge od letya obêc vông vizid wê nôñ nivihã ge ti vac xam vigêmê? ¹²Di xam obêc viac xomxo ngwe susu nivihã lêm ge od letya ob vông susu vô xam ên nêb i tu xam nêmê?

¹³"Xomxo ti o tiyi wê ob vông yuac vô xomxo levac yuu ge lêm, ên xêyaa obêc vin lec ngwe di ob yê ngwe nipaên, me obêc vông nilô la vô ngwe di vô nimi vô ngwe. Om o tiyi wê xam ob vông nilôm i loc vô Anutu yuu xôn mone ge lêm."

Yesu kiyang lec môt yaya

¹⁴Palisi ngô kiyang wê Yesu nêl ge lêc vô mya nipipaa vô, ên he xêyaa vin lec mone luu vêl. ¹⁵Om Yesu nêl vô he ên nêbê, "Xam ge wê xam yong xam ên xam nêbê xomxo i yê xam nêbê xam nivihã, lêc Anutu xovô xam nilôm nêb nipaên, ên môt wê xomxo yê nêb nivihã ge, ge wê Anutu yê ên nêb juda juda nipaên.

¹⁶"Moses xolac hixôn plopete kiyang yêp di i val tyip vô buc wê Jon lipac xomxo ge, di vô buc wê Jon vông ge di i val gwêbaga, a nêl xolac paha wê Anutu ben ge vô xomxo, mêgem xomxo tibeac nilô kidu he nêb he ob tu Anutu nue mi la dô vac i ben. ¹⁷Lag yuu kibun obêc la xôa ma, lêc Moses xolac bo ti obêc la xôa ma hixôn lêm.

¹⁸"Xomxo ti obêc sea vinê di la kô vêx bangwe ge od ge vông yôdac vêx yuu vux, di xomxo ti obêc kô vêx ti wê liya sea i di la ge od ge vông môt yôdac vêx yuu vux."

Xomxo wê susu tibeac ge ti yuu Lasalas

¹⁹Nang dêc Yesu nêl ên nêbê, "Xomxo susu tibeac ti dô dêc vinyum ngakwi nivihãviha di ya yaên nivihãviha tiyi buc vihati. ²⁰⁻²¹Dêc xomxo susu maên ge ti dô lêngêbê Lasalas, lêc mi yêp vô xomxo susu tibeac tyo vuayen, ên nêb ob ya yaên myapipu wê tô mi la vac tevol kwa ngibi ge, lêc kityax dô lec Lasalas ninivi vihati om noo lam mi tep lec.

22 “Yuu mi dô di buc ti lê, lêc Lasalas yib di angela lam kô i mi la tung i hixôn Eblaham vac Anutu ben lag puunê. Nang dêc xomxo susu tibeac tyo yib nang mi lie yev, 23 di i la dô vac vigwe nipaên di kô myavinê levac mi dô, dêc yê ma la kisii lêc yê Eblaham wê dô tevabanê di Lasalas dô hixôn i ge. 24 Mêgem tyuc vya levac ên nêbê, ‘Mag Eblaham, ông xo vigwe pisiv ên a, di vông Lasalas i lam tinyum vigê liyihi vac mia di kô mi lam kitiv lec a get ên i vô ningigooên vô a, ên ngwax ya a nignivi vô myavinê levac.’

25 “Lêc Eblaham nêl vô i ên nêbê, ‘Nuge, ông xovô lê. Ên buc wê ông dô kibun ge, od ông dô vac nivaha hixôn susu nivaha, di Lasalas dô vac nipaên nô, lêc gwêbaga Lasalas dô vac nivaha yuu malehe di ông va dô vac nipaên yuu myavinê. 26 Di kiyang ti yêp bêga nêbê vun madia ti yêp kisuu xe di xam lec, om xomxo ti obêc nêb kidi vac ga di loc vô xam ge od tiyiên ob ma, di ngwe obêc nêb kidi vac xam mi lam vô xe ge od tiyiên ob ma.’

27 “Mêd xomxo susu tibeac tyo nêl ên nêbê, ‘Mag Eblaham, a kitaa ông bê ông vông Lasalas i lôc mi loc mag ben, 28 ên a lige vux vigê vilu dô, om a nêb i loc nêl vô he bê he i sea môp nipaên êdêc he i o lêc lam kô myavinê nipaên hixôn a lêm.’

29 “Lêc Eblaham nêl vô i ên nêbê, ‘Kiyang wê Moses he plopete kivuu ge yêp pyap, om he i ngô.’ 30 Lêc xomxo tyo nêl ên nêbê, ‘Mag, ge tiyiên ma, lêc xomxo ti obêc kidi lec vac yibên mi la nêl kiyang vô he ge od he obêc pilepac he.’ 31 Lêc Eblaham nêl ên nêbê, ‘He ob ngô Moses he plopete kiyang mi vông i vin lêm ge od xomxo ti obêc kidi lec vac yibên mi lax ge od he obêc vông i vin xomxo tige vya êno lêm.’ ”

Môp wê ob vông xomxo vô nipaên ge
(*Matyu 18:6-7,21-22; Mak 9:42*)

17 1 Yesu nêl vô nue ngivihi ên nêbê, “Môp nipaên toto yêp wê ob vông xomxo vô nipaên ge, lêc xomxo ti wê didii xomxo vac nipaên ge obêc kô myaviwen levac lec. 2 Xomxo tibêge, xomxo ob nux ngidax viyin lec i kwa di nêx i la vac gwec madia ge od nivaha, êdêc i o lêc vông xomxo wê xovôên ma ge ti i vô nipaên lêm. 3 Om xam viac xam nivaha. Di lime ti obêc vông i so ge od ông nêl i nên soên vô i, di obêc pilepac i ge od ông kitya i nên nipaên vêl. 4 Di lim tyo obêc vông i so vô ông lu vigê vilu di sec yuu lec buc ti, di lam vô ông lu vigê vilu di sec yuu lêc nêl ên nêbê, ‘A vông i so vô ông’ ge od ông kitya i nên nipaên tige vihati vêl.”

Môp vông vinên

5 Apumtau Yesu nue ngivihi nêl vô i ên nêbê, “Xe nêb ông vông xe nêm vông vinên i vô levac.” 6 Lêc Apumtau nêl vô he ên nêbê, “Xam nêm vông

vinên obêc nipwo tya tiyi xocbê vixôô nôn nulen ge od xam tiyi wê xam ob nêl vô xax levac tige bê, ‘Ông pul ông vêl ên kibun di loc ên loc yev ông vac gwec’ ge od obêc vô ninya lehe vô xam.”

Môp wê nue yuac ob vông ge

⁷Yesu nêl ên nêbê, “Xam nume yuac ti obêc sap kibun me viac bwoc di vena ge od ông ob nêl bêna vô i? Ông ob nêl vô bê, ‘Ông lam tô mi dô kibun mi wa yaên?’ ⁸Ông ob nêl tibêge lêm. Nge, ông ob nêl vô bê, ‘Ông viac ông di myêl yaên mi duu, di kô mi lam ên a ob xa di num tax, dèc ông wa di num timuên.’ ⁹Di num yuac tige obêc nêl bêna vô ông? Ôbêc nêl bê ông pimil i ên wê vông yuac wê ông nêl ge, me? Ob nêl tibêge lêm, ên ge i yuac wê mi vông ge. ¹⁰Om xam êno, xam obêc vông yuac vihati tiyi xocbê Anutu nêl vô xam ge od xam o lèc nêl bê Anutu i pimil xam lêm. Nge, xam nêl bêga bê, ‘Xe tibii yuac pileva. Xe o tiyi wê xe ob nêl bê Anutu i pimil xe ge lêm. Ên yuac wê xe vông ge, Anutu vông vac xe vigêm om xe vông.’”

Yesu vông xomxo kityax mahizihizi vigê yuu vô nivihalec

¹¹Yesu la ên nêb ob la Jelusalem, lèc la vac Samelia yuu Galili ben yôg, ¹²mi la vac vigwe ti, lèc xomxo kityax mahizihizi vigê yuu yê i, lèc le teva ¹³di tyuc vya levac ên nêbê, “Apumtau Yesu, xo vigwe pisiv ên xe.” ¹⁴Om Yesu yê he di nêl vô he ên nêbê, “Xam loc ên loc hilung nimnivi vô xomxo wê mi dô vac xumac ngibua ge lê ên he i yê bê xam nimnivi vô nivihalec.” Om he dila vô môp lèc he ninivi vô nivihalec. ¹⁵Om he yê wê ninivi vô nivihalec ge, lèc he ti pop mi lax mi la vô Yesu di pimil Anutu ya vya levac, ¹⁶di yev vixa kitu vac di kipôm manôn vô Yesu vixa kwa ngibi di pimil i ên wê vông i vô nivihalec ge. Xomxo tige tibii Samelia ti. ¹⁷Mêd Yesu nêl ên nêbê, “A vông xomxo vigê yuu vô nivihalec lê, lèc he vigê vilu di sec yuudiyuu la na? ¹⁸Tibii tived ga wê vena pimil Anutu ge, dom he baba wê Yuda ge ti o vena lêm.” ¹⁹Mêd Yesu nêl vô tibii Samelia tyo ên nêbê, “Kidi lec mi lôc bom, ên vông vinên wê ông vông ge wê vông vông nimnivi vô nivihalec.”

Yesu buc wê ob lop mi lôm ge

(Matyu 24:23-28,37-41)

²⁰Palisi ya val kinêg vô Yesu ên nêbê, “Buc wê Anutu obêc lam tu king mi xomxo la vac i kwa ngibi ge obêc yelacna?” Lèc Yesu nêl ên nêbê, “Xam ob wê do ti lê lèc xovô bê Anutu buc wê ob tu king ge val ge lêm. ²¹Di xomxo tiyiên ma wê ob yê mi nêl bê, ‘Wê, tyo val ga’ me ‘Tyo dô ganê’. Xam ngô lê. Anutu lam tu king vac xam mahigun pyap.”

²²Mêd Yesu nêl vô nue ngivihi ên nêbê, “Obêc buc timuên ge od xam obêc zid bê Xomxo Nu buc i vena lutibed ên xam wê, lêcom xam wêen

ob ma. ²³Di xomxo ya obêc nêl vô xam bê, ‘Wê, tyo dô ganê,’ me ‘Tyo val ga.’ Lêc xam o lêc loc vô he vixa lêm. ²⁴Ên buc wê Xomxo Nu obêc vena ge od obêc vena tiyi xocbê deac hixelac lutibed di xêseac linac la vac vigwe vihati ge. ²⁵Mêlêc Xomxo Nu obêc kô myavinê levac tax di xomxo wê dô gwêbaga obêc vô nimi vô i.

²⁶“Lêc buc timuên wê Xomxo Nu obêc vena ge od xomxo obêc dô i tiyi xocbê xomxo dô vô Nôa buc ilage di Xomxo Nu ob vena. ²⁷Ên xomxo ilage ya di num di iima mi dô, di i mila tyip lec buc wê Nôa la dô vac sip nilô ge lê, lêc lutibed mia butac mabu di lam hi xomxo vihati yib mima vêl.

²⁸“Di Lot buc bêge êno, ên xomxo ya di num di kisuu susu vôma di vông yuac lec yaên di lox xumac mi dô, ²⁹lêc buc wê Lot kidi gê Sodom mi la ge od ngwax yuu ngidax myavinê tô gê lag puunê tiyi xocbê lun val ge mi lam hi xomxo gee yib mima vêl. ³⁰Om buc wê Xomxo Nu obêc vena le seac ge od xomxo obêc dô mi vông bêge êno.

³¹“Obêc buc tige lêc xomxo ti dô lec xumac kisii ge od i o lêc lop mi lax kô i susu vac xumac lôma lêm, me xomxo ti obêc la dô vac yuac ge od i o lêc lax mi la ben lêm. Nge, susu i dô di xomxo i loc nêl mô. ³²Xam xovô Lot vinê wê tu ngidax mi le vac môp ge. ³³Ên xomxo ti obêc nêb viac ninivi ên viyin yuu yibên ge od maviha wê i vông ge obêc yib. Lêc xomxo ti obêc sea i ninivi lec a lêg ge od obêc dô maviha yuu nihiha.

³⁴“A ob nêl vô xam bê obêc buc tige xomxo yuu ob diyêp lec pêt ti vô bucên, lêc Anutu obêc kô ngwe di sea ngwe dô. ³⁵Di vêx yuu obêc divông yuac ti mi dô, lêc Anutu obêc kô ngwe di sea ngwe dô. ³⁶[Di vux yuu obêc dô vac yuac ti lê, lêc Anutu obêc kô ngwe di sea ngwe.]”

³⁷Mêd nue ngivihi kinêg vô Yesu ên nêbê, “Apumtau, kiyang tige obêc vô nôn lec gê na?” Lêc Yesu nêl vô he ên nêbê, “Xam xovô bê susu wê yib mi pital ge obêc yêp vac vigwe ti ge od menac byang kitucma di la lec vigwe tige.”

Kiyang pilepacên lec vêxôv ti yuu hizap nipaên ti

18 ¹Mêd Yesu nêl kiyang pilepacên ti vô nue ngivihi, ên nêb ob vông xovôên vô he bê he i kitaa i tiyi buc vihati di ni ma lecên i ma.

²Om nêl kiyang pilepacên bêga vô he ên nêbê, “Hizap ti dô vac vigwe ti, lêc o xona ên Anutu lêm di yê xomxo vihati tiyi xocbê susu vidaaên ge.

³Di vêxôv ti dô vac vigwe tige, lêc la mi kitaa hizap tige tiyi buc vihati ên nêbê, ‘Tibii ti nêb ob vông kiyang vô a, om a nêb ông ngidu a xôn ên a nêg kiyang.’ ⁴Lêc hizap o vông i vin i vya lutibed lêm, di buc tibeac la vêl lê, lêc hizap tyo xo bêga ên nêbê, ‘A o xona ên Anutu lêm, di a o xona ên xomxo ti lêm. Nge, a xê he tiyi susu vidaaên. ⁵Lêcom vêxôv tige môci lam mi kitaa a nginong om a obêc ngidu i xôn ên i kiyang, ên i o lêc lam nginong nginong mi vông a nig i ma lêm.’”

⁶Mêd Apumtau Yesu nêl vô nue ngivihi ên nêbê, “Xam xovô kiyang wê hizap nipaên tige nêl ge lê. ⁷Om xam xo ên xam nêbê va? Xomxo wê Anutu vinoa he pyap nêb he tu ixê ge, he obêc kiyag vya lec Anutu tiyi bucên yuu vidiiên vihati ge od Anutu obêc ngô he vya lêmê? Di obêc ngidu he xôn lutibed lêmê? ⁸A ob nêl vô xam bê Anutu obêc ngô he vya di ngidu he xôn lutibed. Lêc a ob kinêg vô xam bê buc wê Xomxo Nu obêc lop mi lôm ge od obêc yê bê xomxo vông i vin, me o vông i vin lêm?”

Kiyang pilepacên lec Palisi ti yuu tibii takis kôên ngwe

⁹Yesu nêl kiyang pilepacên tiga vô xomxo ya wê nêb he tibii vông vinên nivihã di yê xomxo baba ên nêb he xomxo vidaaên ge, om nêl bêga vô he ên nêbê, ¹⁰“Xomxo yuu la vac Anutu xumac ngibua ên nêb ob la kitaa, Palisi ngwe di tibii takis kôên ngwe. ¹¹Om Palisi tyo la le di kitaa vac nilô bêga ên nêbê, ‘O Anutu, a pimil ông ên wê a o nipaên tiyi xocbê xomxo baba ge lêm, ên he mi vông môp yôdac susu yuu yôdac vêx yuu vux di môp nipaên yaya. Di a o nipaên tiyi xocbê tibii takis kôên ganê lêm. ¹²Ên a ga wê a mi ngibua yaên lec buc yuu yuu tiyi da vihati, di a mone yuu susu wê a mi kô ge a mi tung vigê yuu yuu, om a mi vông kidu ti vô ông.’ ¹³Di tibii takis kôên ngweo mila le teva, di o lax ma la kisiinê xocbê môp wê xomxo baba mi vông ge lêm. Nge, xovô nêb i tibii nipaên om kituu pikopac di kitaa bêga ên nêbê, ‘O Anutu, ông xo vigwe pisiv ên a di kitya a nêg nipaên vêl, ên a ga tibii nigpaên.’”

¹⁴Om Yesu nêl ên nêbê, “A nêl vô xam bê tibii takis kôên ge Anutu kitya i nên nipaên vêl di yê i nivihã di i lax mi la ben, di Palisi ge Anutu o yê nivihã lêm. Ên xomxo wê ob yong ici va ge, ge wê Anutu obêc vông i vô nipwo lec, di xomxo wê vông ici vô nipwo lec ge, ge wê Anutu ob pimil i di vông i lê vô levac.”

Yesu kitaa lec nipwo

(Matyu 19:13-15; Mak 10:13-16)

¹⁵Xomxo kô nue nipwo mi la vô Yesu, ên nêb i vyax vigê lec he di kitaa lec he, lêc Yesu nue ngivihi yê di vô myã nipaên vô he. ¹⁶Lêc Yesu keac nipwo lam di nêl ên nêbê, “Vông nipwo i lam vô a di xam o le vac he xôn lêm, ên xomxo tibêge wê ob la dô vac Anutu ben ge. ¹⁷A nêl hixôn nôn vô xam bê xomxo ti obêc vông i vin Anutu mi la vac i kwa ngibi tiyi xocbê nipwo mi la vac tae mae kwa ngibi lêm ge od o tiyi wê obêc la dô vac Anutu ben ge lêm.”

Xomxo wê susu yuu mone levac ge

(Matyu 19:16-30; Mak 10:17-31)

¹⁸Xomxo levac ti kinêg vô Yesu ên nêbê, “Xolac kehe nivihã, a obêc vông bêna êdêc dô magvihã luta lêc luta?” ¹⁹Lêc Yesu nêl vô i ên nêbê,

“Bêna léc ông nêb a nivihā? Xomxo nivihā ti o dô lêm. Anutu vaci nôn tived wê nivihā. ²⁰Ông xovô xolac wê Anutu nêl vô Moses ên nêbê, Ông o léc vông môp yôdac vêx yuu vux lêm. Ông o léc hi xomxo i yib lêm. Ông o léc vun xomxo ngwe susu lêm. Ông o léc nêl kiyang kityooên lec xomxo ti lêm. Ông loc vac tam yuu mam vya kwa ngibi.” ²¹Om xomxo levac tyo nêl ên nêbê, “Buc wê a gên nipwo di i val tyip gwêbaga, a viac xolac gee vihati mi vông i vô nôn lec.” ²²Yesu ngô tige, di luu i vya ên nêbê, “Môp ti gên yêp wê ông ob vông hixôn bêga bê ông loc vông susu tibeac wê ông vông ge mi tibii i kisuu di ông vông mone vô tibii wê nêl susu maên ge, ên ông obêc kô susu nivihā gê kisii ganê. Pyap dêc ông lôm timu vô a vixag.” ²³Xomxo levac tyo ngô kiyang ge lê, léc kiyang tige vông i nilô vô viyin levac, ên wê i mone levac ge.

²⁴Om Yesu yê i di nêl ên nêbê, “Xomxo wê susu tibeac ge obêc nêb la vac Anutu ben ge od obêc viyin levac vô he. ²⁵Môp wê bwoc kamel ti obêc la vac yin kitu tocên ge, viyin levac lê, léc xomxo susu tibeac obêc nêb la vac Anutu ben ge od obêc viyin levac luu vêl.” ²⁶Mêgem xomxo wê ngô kiyang tige nêl ên nêbê, “Obêc tibêge ge od letya tiyi wê ob la dô mavihā ge?” ²⁷Lêc Yesu nêl ên nêbê, “Môp wê xomxo tiyiên ma wê ob vông ge, ge Anutu ob vông.”

²⁸Mêd Pita nêl vô Yesu ên nêbê, “Wê lê. Xe ga wê xe sea susu wê xe vông ge vihati dô di lam timu vô ông vixam.” ²⁹Lêc Yesu nêl vô he ên nêbê, “Vixôhilôg, a ob nêl vô xam bê xomxo ti obêc sea ben hixôn vinêe nue di tae mae lie lec Anutu xolac yuu ben ge ³⁰od obêc kô myaviwen nivihā luu vêl gê kibun ga, di buc timuên ge od obêc la dô mavihā luta léc luta.”

Yesu nêl kiyang vông lu yon lec myavinê wê ob kô ge
(*Matyu 20:17-19; Mak 10:32-34*)

³¹Yesu kô nue ngivihā vigê yuu di tô mi la yuu mi he la, dêc Yesu nêl vô he ên nêbê, “Xam ngô lê. Il ob la Jelusalem lê, léc kiyang vihati wê plopete kivuu lec Xomxo Nu ilage obêc vô nôn lec. ³²Om xomxo obêc vông i la vac tibii wê o Yuda lêm ge vigê, dêc tibii obêc vô mya nipaên vô i di pisuv myaluc lec, ³³di pisa i ya yihi dêc hi i yib, di buc yon obêc lam la vêl ge od ob kidi lec mavihā nang.” ³⁴Mêgem nue ngivihā ngô kiyang tyo léc he lungên, ên kiyang kehe o yêp seac vô he lêm om he vyac xovôên ma.

Yesu vông xomxo ma tocên ti vô nivihā lec
(*Matyu 20:29-34; Mak 10:46-52*)

³⁵Yesu miła kwabo vô vigwe Jeliko, léc xomxo ma tocên ti dô vô môp ninya di kitaa susu vô tibii, ³⁶léc ngô kiyang ngena ngena wê lam hixôn Yesu ge om kinêg vô xomxo ya ên nêbê, “Tibii vô nididun ên va?” ³⁷Lêc

xomxo nêl vô i ên nêbê, “Yesu Nasalet valê.” ³⁸Om xomxo ma tocên tyo tyuc ên nêbê, “Yesu, Devit nu, ông xo vigwe vô pisiv ên a.” ³⁹Lêc xomxo wê lam mug ge nêl ên nêbê, “Dô kiyang maên.” Lêc ma tocên tyo tyuc nginong nginong hixôn vya levac ên nêbê, “Ông Devit nu, xo vigwe vô pisiv ên a.” ⁴⁰Mêgem Yesu val le di nêl vô xomxo nêb he i kô xomxo ma tocên tyo mi lam vô i. Om he kô mi val di val lax i le vô Yesu manôn dêc Yesu kinêg vô i ên nêbê, ⁴¹“Ông nêb a vông bêna vô ôngê?” Om xomxo tyo nêl ên nêbê, “A nêb ông vông a magnôn i seac.” ⁴²Om Yesu nêl vô i ên nêbê, “Mamnôn i seac. Vông vinên wê ông vông ge vông ông vô nimviha lec.” ⁴³Mêgem lutibed xomxo tyo manôn seac, di i la hixôn Yesu di pimil Anutu. Di xomxo wê yê ge vihati pimil Anutu ên wê xomxo ma tocên tige manôn seac ge.

Yesu yuu Sakias kiyang

19 ¹Yesu la vac vigwe Jeliko, ²di xomxo ti lê nêbê Sakias dô vac vigwe tige. Sakias ge xomxo takis kôên nêl levac di i mone yuu susu tibeac. ³Sakias nêb ob yê Yesu om la lêc tiyiên ma, ên myabo om xomxo tibeac le vac i manôn xôn, ⁴om tup mi la mug vô môt wê Yesu ob lam vô ge di mila lec xax ti ên nêb ob la dô ên yê Yesu wê i val ge. ⁵Yesu mila vac xax kwa ngibi

wê Sakias dô lec ge di lax ma lec di nêl vô Sakias ên nêbê, “Sakias, lop lutibed ên a ob dô hixôn ông vac ông bom gwêbaga.” ⁶Mêgem Sakias lop lutibed di kô Yesu mi la vac ben hixôn xêyaa nivihia. ⁷Tibii yê wê Yesu la dô vac Sakias ben ge om he ni nyag di nêl ên nêbê, “Bêna lêc xomxo tiganê la dô vac tibii nipaên tiganê ben di la dô hixôn?” ⁸Mêlêc Sakias le vô he vihati manôn di nêl vô Apumtau Yesu ên nêbê, “Apumtau, ngô lê. Susu vihati wê a vông ge a ob vông viwen i loc vô xomxo wê nêl susu maên ge. Di a obêc kityoo xomxo ya di vô he mone vêl ila ge od a ob vông he xe vac i luu vêl, xocbê a obêc kô xomxo ti mone kehe ti ge od a obêc vông kehe yuudiyuu vô i nang.” ⁹Mêgem Yesu nêl vô i ên nêbê, “Gwêbaga Anutu kitya xam xumac tiga nêl nipaên vêl di xam tu Anutu nue, ên ông ge, ông Eblaham tivae ti êno. ¹⁰Ên a, Xomxo Nu, a lam ên xomxo wê lung la vac nipaên ge, ên a nêb a ob hêm he lec ên he i dô nivihia.”

Kiyang pilepacên lec xomxo vigê yuu wê kô mone ge (Matyu 25:14-30)

¹¹He ngô kiyang ngwe ge vêl, nang dêc Yesu nêl kiyang pilepacên ti vô he, ên he mila kwabo vô Jerusalem lêc tibii wê diloc hixôn i ge so ên nêb mêd he ob mila Jerusalem ge od Yesu ob tu Anutu manôn di tu king, om Yesu nêb he i xovô buc tige bê gên yêp teva, ¹²om nêl kiyang pilepacên bêga vô he ên nêbê, “Xomxo levac ti dô vac vigwe ti, lêc nêb ob la vac

vigwe teva ngwe ên xomxo i vông i tu king ên lôm viac vigwe wê mi dô vac ge. ¹³Om buc wê nêb ob la ge od nêl nue yuac vigê yuu ge lam vô i di vông mone kipihac yuu yuu vô he toto di nêl vô he ên nêbê, ‘Xam vông yuac lec mone tigae di i loc tyip lec buc wê a obêc vena ge.’

¹⁴“Mêd xomxo levac tyo loc mi la, lêc tibii vigwe tige xêyaa vô nipaên vô i, om vông lie ya timu vô i vixa mi la, ên nêb he i loc nêl bê, ‘Xe nêb xomxo tiga ob tu king mi viac xe lêm.’ ¹⁵Lêc xomxo tyo mila kô lê levac pyap di lax mi la vac ben wê ob viac ge. Mêd nêl nue yuac wê vông mone vô he ge lam vô i, ên nêb ob xovô mone wê he vông yuac lec ge bêc he tulec ya hixônê?

¹⁶“Om xomxo ti wê val taxlee ge nêl vô i ên nêbê, ‘Xomxo levac, ông vông mone kipihac yuu vô a, lêc a vông yuac lec om a tulec yul yuu hixôn.’ ¹⁷Om xomxo levac nêl vô xomxo tyo ên nêbê, ‘Ông ge xomxo nivihã wê ông viac a yuac nivihã ge. Ông kô mone nipwo tya lêc ông viac nivihã, om a ob vông ông tu levac di viac vigwe levac vigê yuu.’

¹⁸“Nang dêc nu yuac ngwe wê vông yuu ge val nang di nêl ên nêbê, ‘Xomxo levac, ông vông mone kipihac yuu vô a, lêc a vông yuac lec om a tulec yul ti hixôn.’ ¹⁹Om xomxo levac tyo nêl vô i ên nêbê, ‘Nivihã, om a ob vông ông tu levac di viac vigwe levac vigê vilu.’

²⁰“Nang dêc nu yuac ti wê vông yon ge val nang di nêl ên nêbê, ‘Xomxo levac, ga ông mone kipihac yuu wê ông vông vô a ge, om ông hôm ông xe. Ông mone ga a viyum vac nivimihi mi tung i dô, ²¹ên a xona ên ông, ên a xovô ên a nêbê ông ge xomxo myampilihi, ên susu wê xomxo ngwe ob tung ge od ông ob kô, di yaên wê xomxo ngwe yev he xe ge od ông la mi kô nôh.’

²²“Lêc xomxo levac nêl vô i ên nêbê, ‘Ông ge xomxo nipaên. Ên kiyang wê ông nêl ga hilung ông nêl nipaên, ên ông xovô ên ông nêbê a ga xomxo myagpilihi om susu wê xomxo ngwe tung i dô ge, a la mi kô, di yaên wê xomxo ngwe yev he xe ge od a la mi kô nôh. ²³Ông xovô bêge lê, lêc bêna lêc ông o la lii mone wê a vông ge vac xumac mone êdêc buc wê a vena ge od a kô mone wê a vông ge di kô wê dô lecên ge hixônê?’ ²⁴Mêgem xomxo levac nêl vô xomxo wê he xôn le ge ên nêbê, ‘Xam hôm mone kipihac yuu ge vêl ên xomxo tige vigê di loc vông vô xomxo ngwe wê mone yul yuu ge.’ ²⁵Lêc he nêl ên nêbê, ‘Xomxo levac, xomxo ganê mone levac tiyi yul yuu.’

²⁶“Lêc xomxo levac nêl ên nêbê, ‘A ob nêl vô xam bê xomxo wê he susu dô ge, he ob kô ya hixôn, di xomxo wê susu ma ên he di nipwo tya dô vô he ge od a ob vô vêl ên he. ²⁷Di xomxo wê xêyaa vô nipaên vô a ên nêb a o tu king lêm ge, xam loc kô he mi lam di hi he i yib lec a magnôn.’”

Yesu la Jelusalem lêc tibii pimil i tiyi xocbê king ge

(Matyu 21:1-11; Mak 11:1-11; Jon 12:12-19)

²⁸Yesu nêl bêge pyap di loc mi la ên nêb ob la Jelusalem. ²⁹Mêd mila kwabo vô vigwe yuu lê nêbê Betpasi yuu Betani wê yêp kwabo vô kitôn

Oliv ge. Mêd vông nu ngivihi yuu la, ³⁰di nêl vô yuu ên nêbê, “Muu loc vac vigwe tiganê, di muu obêc mila wê donki wê gên ligên ge ti wê tibii vô yihi lec kwa di i dile ge. Donki tige xomxo ti o dô lec ila lêm. Mêgem muu piwelac yihi vêl ên di kô mi lam. ³¹Lêc xomxo ti obêc kinêg muu bê, ‘Muu ob piwelac yihi tige vêl ên va?’ ge od muu nêl vô bê, ‘Apumtau nêb ob vông yuac lec.’ ”

³²Yuu la i tiyi wê Yesu nêl ge di mila tulec donki, ³³om yuu piwelac yihi vêl ên, lêc xomxo wê he donki ge kinêg yuu ên nêbê, “Muu piwelac ge ên va?” ³⁴Lêc yuu nêl ên nêbê, “Apumtau nêb ob vông yuac lec.”

³⁵Mêd yuu kô donki tyo mi lax vô Yesu, di he vax he ngakwi lec kisii dêc Yesu dô lec. ³⁶Yesu dô lec di la vô môt, mêd xomxo ya vax he nivimihi lec môt wê Yesu ob tup vô ge i tiyi xocbê môt wê tibii mi vông vô he king ge. ³⁷Mêd Yesu lop vô môt kitôn Oliv di mila kwabo vô Jelusalem, lêc xomxo vihati wê mi timu vô Yesu kiyang ge, he pimil Anutu hixôn xêyaa nivaha ên do levac wê Yesu vông mi he yê ge, ³⁸di he nêl levac la kisii ên nêbê,

“Il ob hi vixad i pec ên il nêd king wê tu Anutu manôn di lam ge.

Kiyang malehe yêp lag kisiinê, di Anutu wê dô lag kisiinê, il ob vông i lê i vô levac.”

³⁹He nêl bêge, lêc Palisi wê dô hixôn he ge, he ya nêl vô Yesu ên nêbê, “Xolac kehe, ông nêl vô nume bê he i dô kiyang maên.” ⁴⁰Lêc Yesu nêl ên nêbê, “A ob nêl vô xam bê he obêc dô kiyang maên ge od ngidax obêc tyuc di pimil a nang.”

Yesu byag ên tibii Jelusalem

⁴¹Mêd Yesu mila kwabo vô Jelusalem dêc yê ma la di byag, ⁴²di nêl ên nêbê, “Gwêbaga xam obêc xovô môt wê xam ob dô vac malehe ge od obêc nivaha. Lêc ga xam lungên, ên kiyang ga yêp xôpacên om xam o xovô lêm. ⁴³Xam ngô lê. Obêc buc ti lêc tibii wê yê xam nipaên ge obêc val ku xenac kisuu xam xôn di o tiyi wê xam ti ob la ge lêm. ⁴⁴Di he ob hi xam hixôn nume wê xam dô vac vigwe ga vihati vô nipaên, di ngidax wê xam lox xumac ya ge, ngwe ob dô lec ngwe kisii lêm. Kehe bêga bê xam o xovô Anutu wê lam ên nêb ob hôm xam lec ge lêm.”

Yesu tii tibii wê vông vitevac vac Anutu xumac ngibua ge vêl (*Matyu 21:12-17; Mak 11:15-19; Jon 2:13-22*)

⁴⁵Yesu la vac Anutu xumac ngibua di la tii tibii wê vông vitevac vac nilô ge la vêl, ⁴⁶di nêl vô he ên nêbê, “Xolac nêl bêga nêbê, ‘A xumac ga, xumac kitaa vacên,’ lêc xam vông i tiyi xocbê xumac wê tibii yôdac ob kitucma vac ge.”

⁴⁷Yesu mi nêl xolac vac Anutu xumac ngibua tiyi buc vihati. Mêd xomxo levac wê mi si daa gee di xomxo wê xovô Moses xolac gee hixôn

xomxo levac levac ya, he xôn nêb he ob hi Yesu i yib, ⁴⁸lêc he o tulec môp ti wê he ob hi Yesu lec ge lêm, ên xomxo tibeac vô ninya vô kiyang wê Yesu nêl ge di o sea i lêm.

Xomxo kunac Yesu ên nêbê, “Ông kô xêkizêc vô letya?”

(Matyu 21:23-27; Mak 11:27-33)

20 ¹Buc ti lêc Yesu la vac Anutu xumac ngibua di la nêl xolac vô tibii, di xomxo levac wê mi si daa vô Anutu gee di xomxo wê xovô Moses xolac gee hixôn he Yuda levac levac val vô Yesu, ²di val kunac i ên nêbê, “Ông tu letya manôn di lam vông môp tigaê? Letya nêb ông vông môp tibêgaê?” ³Lêc Yesu nêl lax vô he ên nêbê, “A êno ob kinêg kiyang ti vô xam. Om xam nêl vô a bê ⁴letya vông Jon la lipac xomxo? Ge Anutu lag kisiinê vông, me xomxo kibun ga vông?” ⁵Om he nêl vônga bêga ên nêbê, “Il obêc nêl bê Anutu lag kisiinê vông ge od Yesu obêc nêl vô il bê, ‘Lêc bêna lêc xam o vông i vin kiyang wê Jon nêl ge lêmê?’ ⁶Lêc il ob nêl bê xomxo kibun ga vông Jon la yuac tige, od xomxo obêc nêx il ya ngidax, ên he vihati vông i vin ên he nêbê Jon ge plopet wê Anutu vông i la ge ti.” ⁷Om he nêl vô Yesu ên nêbê, “Xe o xovô Jon Lipacên kehe lêm.” ⁸Mêd Yesu nêl vô he ên nêbê, “Om a êno ga, a ob nêl xomxo ti wê vông a lam ge kitong vô xam lêm.”

Kiyang pilepacên lec tibii nipaên wê viac yuac ge

(Matyu 21:33-46; Mak 12:1-12)

⁹Mêd Yesu nêl kiyang pilepacên ti vô xomxo bêga ên nêbê, “Xomxo ti xin wain vac i yuac ti, di vông vô tibii ya nêb he i viac, ên nêb ob la vigwe teva ti di la dô buc xuhu dia. ¹⁰Mêgem loc mi la dô mêd buc wê wain ob huu ge om vông nu yuac ti lax mi la vô tibii wê diviac i yuac ge ên nêbê i loc kô i wain nôn ya, om xomxo tyo mila lêc xomxo wê viacên wain ge hi i di vông i lax mi la pileva. ¹¹Nang dêc xomxo ti wê i yuac ge vông nu yuac ngwe lax vô he nang, lêc tibii yuac viacên pisa i di vô mya nipaên vô i di vông i lax mi la pileva. ¹²Nang dêc xomxo levac tige vông nu yuac ti wê vông yon ge la nang, lêc he hi i vô nipaên di nêx i la ninya. ¹³Om xomxo ti wê i yuac ge xo bêga ên nêbê, ‘A ob vô va? Ga a ob vông a nug tuc wê a xêgyaa vin lec i ge i loc vô he, ên mêd he ob yê i xocbê xomxo levac di la vac kiyang wê i vông ge kwa ngibi.’ ¹⁴Lêc xomxo wê viac i yuac ge yê wê xomxo levac tyo nu mila ge om he nêl vônga ên nêbê, ‘Xomxo ti wê ma obêc nêl i lê lec yuac ga ge val, om il ob hi i yib êdêc yuac ga i tu il xe.’ ¹⁵Om he hôm i xôn di kô mi la vô yuac ninya di hi i yib. Om a ob kinêg vô xam bê xomxo ti wê i yuac ge obêc vô va vô he? ¹⁶Ge obêc hi xomxo tige yib di vông i yuac vô xomxo baba mi he i viac nang.” Xomxo wê ngô kiyang tige nêl ên nêbê, “Le i lêc vông tibêge lêm.”

¹⁷Mêd Yesu yê he di nêl ên nêbê, “Xam nêbê môp bêge i ma, mêlêc kiyang wê plopete kivuu ilage, kehe bêna? Ên plopete ilage kivuu kiyang

mi i yêp bêga ên nêbê, 'Ngidax ti wê xomxo xumac loxên yê léc nêb tiyiên ma ge, ge wê tu ngidax xêkizêc wê ob hôm xumac xôn ge.' ¹⁸A ob nêl vô xam bê xomxo ti obêc tô mi hi i lec ngidax tige ge od ob hi i len vô pipu sea, di ngidax tige obêc tô mi hi xomxo ti ge od obêc hi i pital sea."

¹⁹Yesu nêl bêge dêc xomxo wê xovô Moses xolac gee hixôn xomxo levac wê mi si daa gee, he xovô ên he nêbê Yesu nêl kiyang pilepacên tige lec he, om he nêb he ob hôm Yesu xôn lutibed, léc he xona ên wê xomxo tibeac ge.

Xomxo nêb ob yaxên Yesu kiyang léc Yesu o nêl ti so lêm
(*Matyu 22:15-22; Mak 12:13-17*)

²⁰Mêd xomxo wê xovô Moses xolac gee hixôn xomxo levac wê mi si daa gee yê Yesu xôn di vông xomxo ya la vô i ên nêb he i yê i xôn di yaxên i kiyang bêc obêc nêl ti so ge od he ob vông i loc vac gavman vigê di vông kiyang vô. Xomxo tige kityoo nêb he xomxo nivîha, ²¹om la kinêg vô Yesu ên nêbê, "Xolac kehe, xe xovô ên xe nêbê xolac wê ông nêl vô xomxo ge, ông nêl bôbac di nivîha, di ông o xona ên xomxo ti lêm. Nge, ông mi nêl Anutu kiyang hixôn nôn vô xomxo vihati tiyima. ²²Om xe ob kinêg vô ông bê tiyi wê il Yuda ob vông mone takis vô king Sisa wê tibii madiluhu ge, me il ob vông lêm?" ²³Lêc Yesu xovô kiyang kityooên wê yêp vac he ni lô ge om nêl vô he ên nêbê, ²⁴"Xam hilung mone ti mi a xê. Letya kinu yuu lê wê yêp lec mone ga?" Om he nêl ên nêbê, "Sisa kinu yuu lê." ²⁵Mêgem Yesu nêl vô he ên nêbê, "Mêgem susu wê Sisa xe ge, xam vông i loc vô Sisa, di susu wê Anutu xe ge, xam vông i loc vô Anutu." ²⁶Mêd he o tiyi wê he ob kityoo Yesu ên i nêl kiyang ya so lec xomxo manôn ge lêm, ên he yetac ên kiyang wê Yesu nêl lax vô he ge om he dô kiyang maên.

He kinêg vô Yesu lec môp wê xomxo ob kidi lec vac yibên ge
(*Matyu 22:23-33,41-46; Mak 12:18-27,35-37*)

²⁷Xomxo Sadyusi ya val vô Yesu. He Sadyusi ge, he o vông i vin bê xomxo ob kidi lec vac yibên lêm. ²⁸Om he la nêl vô Yesu ên nêbê, "Xolac kehe, Moses xolac nêl bêga vô il ên nêbê xomxo ti obêc kô vêx ti léc nu ma di i yib di vinê gên dô ge od vux tyo lie ti ob ii vêx tyo nang êdêc vông nue, di nue i tu susu wê ma yibên vông ge kehe. Moses xolac nêl bêge. ²⁹Om wê vux vigê vilu di sec yuu ob dô lec ta yuu ma tibed, mêdêc li tuc obêc kô vêx ti léc yib di nu ma ge, ³⁰⁻³¹od li môn ob ii vêx tige i tii vac nang, léc wê obêc yib di nu ma ge od li gwaa ob ii nang, léc wê li gwaa obêc yib ge od lie timuên vihati ob timu vô môp tibed ge di ii vêx tige, léc wê vihati obêc yib di nue ma, ³²dêc vêx tyo obêc yib timuên ge. ³³Xam nêl ên xam nêbê xomxo obêc kidi lec vac yibên om xe nêb xe ob kinêg vô ông bê buc wê xomxo yibên obêc kidi lec ge, od vêx tige obêc tu

vux tina vinê? Ên vux vigê vilu di sec yuu, he xôn ii vêx tige lec buc wê he dô maviha ge.”

³⁴Mêgem Yesu nêl vô he ên nêbê, “Xomxo wê dô gwêbaga ge, he iima. ³⁵Lêc xomxo wê Anutu nêb he nivihha tiyi wê ob kidi lec vac yibên di la dô maviha timuên ge, he ob iima vô buc timuên lêm. ³⁶Ên he obêc yib i tii vac nang lêm. Nge, he ob dô tiyi xocbê angela ge, ên he kidi lec vac yibên di he tu Anutu nue.

³⁷“Moses kiyang nêl kitong êno ên nêbê xomxo yibên obêc kidi lec i tii vac nang. Ge yêp seac vac kiyang wê Moses kivuu lec xax wê ngwax ditum lec ge bêga ên nêbê, ‘Apumtau Anutu ge Eblaham yuu Aisak yon Jekop Anutu wê yon mi kitaa vô ge.’ ³⁸Yon yib tax dêc Moses kivuu kiyang tige timuên, lêc Moses kivuu i tiyi xocbê yon xeedô ge. Om il ob xovô bê Anutu o tu xomxo yibên nêl Anutu lêm. Nge, Anutu tu xomxo maviha nêl Anutu, ên xomxo wê maviha hixôn he wê yibên ge, Anutu yê he vihati xocbê he dô maviha ge.”

³⁹Yesu nêl bêge dêc xomxo wê xovô Moses xolac gee, he ya nêl ên nêbê, “Xolac kehe, ông nêl ge bôbac la tiyi.” ⁴⁰He nêl bêge, ên he xona om he nêb he ob kinêg kiyang i tii vac vô Yesu lêm.

⁴¹Lêc Yesu nêl vô he ên nêbê, “Bêna lêc xomxo ya nêl ên nêbê Kilisi wê Anutu nêb ob vông i lam ge, ge Devit nu? ⁴²Ên Devit vaci kivuu vac kipihac Sam bêga ên nêbê,

‘Apumtau Anutu nêl vô a Apumtau ên nêbê, Ông dô vô a vigêg hiyôv, ⁴³di a obêc vông tibii wê vông vevac vô ông ge he i dô vac ông vigêm vilu kwa ngibi.’

⁴⁴Devit nêl ên nêbê Kilisi ge Apumtau, om bêna lêc xomxo nêl ên nêbê Kilisi ge Devit bue timuên ti?”

Xomxo wê xovô Moses xolac gee nêl nipaên
(*Maty 23:1-36; Mak 12:38-40; Luk 11:37-54*)

⁴⁵Xomxo tibeac dô om he ngô kiyang wê Yesu nêl vô nue ngivihi bêga ên nêbê, ⁴⁶“Xam viac xam ên môp nipaên wê xomxo wê xovô Moses xolac gee mi vông ge. Ên he xêyaa vin lec môp wê he ob vinyum ngakwi dia nivihha di la vilee vac maket ên he nêb xomxo i yê he di pimil he ya kiyang malehe, di he obêc la vac xumac lilo, me he ob la ya vizid levac ge od he nêb he ob dô lec sia nivihha wê xomxo levac mi dô lec ge. ⁴⁷Lêc he ge wê he mi vô xomxo vêxôn nêl susu yuu xumac vêl ge, di buc wê he ob kitaa ge od he mi viyum nêl nipaên vac kitaaên dia. Om myaviwen nipaên wê he ob kô ge obêc levac mabu yocên luu vêl.”

Vêxôn wê vông daa vô Anutu ge
(*Mak 12:41-44*)

21 ¹Yesu dô di yê wê tibii wê mone levac gee lam tung mone vac kilong wê tibii mi tung mone daa vac ge. ²Mêd yê wê vêxôn

wê mone ma ge ti val tung mone hi yuu tya vac kilong tyo. ³Mêgem Yesu nêl ên nêbê, “A ob nêl hixôn nô n vò xam bê mone yuutyabed wê vêxôv tiganê tung vac kilong ge nginoo daa wê xomxo baba tung ge vêl. ⁴Ên he mone tibeac dô lê, lêc he vông nipwo tya di he xe levac dô, dom vêx tiganê ge i nêl mone ma di hi yuu tya, lêc vông vihati tu daa, di ti o dô wê ob kisuu xen yaên lec ge lêm.”

Yesu nêl lec viyin wê ob val timuên ge
(*Matyu 24:1-14; Mak 13:1-13*)

⁵Xomxo ya nêl kiyang lec Anutu xumac ngibua ên nêbê, “Xumac tiga, tibii lox ya ngidax nivihaviha di vunac vô ya susu nivihaviha.” Lêc Yesu nêl vô he ên nêbê, ⁶“Susu wê xam wê ga, obêc buc timuên ge od ngidax tiga ob dii sea, di ngwe ob dô lec ngwe kisi lêm.”

⁷Mêd he kinêg vô Yesu ên nêbê, “Xolac kehe, kiyang tige obêc vô nô n lec yelacna? Di do vatya obêc val tax ên xe xê di xovô bê susu tige ob vô nô n lecê?”

⁸Mêgem Yesu nêl ên nêbê, “Xam viac xam niviha êdêc tibii i o lêc kityoo xam lêm. Ên xomxo tibeac obêc val kityoo xam di nêl a lêg di nêl bê he Kilisi, di nêl bê buc vô kwabo lec. Lêc xam o lêc vông i vin he vya di timu vô he lêm. ⁹Di xam obêc ngô kiyang wê nêbê vevac tyip vac vîgwe ya mi xomxo hima ge, od le i lêc yetac di xona lêm. Ên vevac tige obêc val tax, lêc buc myahîpu gên yêp dia.”

¹⁰Nang dêc Yesu nêl vô he ên nêbê, “Vô buc tige tibii viyang ngwe ob vông vevac vô viyang ngwe, di tibii viyang viyang ob dô kidu kidu di vông vevac voma. ¹¹Vac vîgwe viyang viyang ge ngiyêg ob yoc levac di vip levac ob den xomxo di yidac levac ob vông he. Di do levac ya ob lam gê lag kisiinê di vông xomxo xona mabu.

¹²“Vô buc wê susu tige valên gên ma ge, od tibii obêc hòm xam xôn di vông viyin levac vô xam, di vông kiyang vô xam vac xumac lilo wê Yuda vông ge di tung xam la vac kalabuhu. He ob nêb vông a lêg i vô nipaên, mêgem he obêc kô xam mi la di vông xam le vô king yuu gavman levac manôn di vông kiyang vô xam. ¹³Lêc buc tige wê xam ob nêl a xolac kitong vô he, ¹⁴om le i lêc xo kiyang wê xam ob nêl lax vô he ge lêm. ¹⁵Ên a obêc vông xam piyôp yêp seac di xam nêl kiyang niviha, om he wê nêb ob vông vevac vô xam ge, he o tiyi wê he ob pwoo kiyang wê a nêl vô xam ge vac lêm.

¹⁶“Mêd xacxam va tame mame lime ngidême hixôn xam nimpîpu, heche va obêc vông xam vac tibii vevac vîgê di he obêc hi xam ya wib. ¹⁷Di xomxo vihati xêyaa obêc vô nipaên nô n vô xam ên wê xam vông i vin a lêg ge. ¹⁸Lêc xam obêc dô nimviha di bamzub lihi ti tya obêc pul vêl lêm. ¹⁹Om xam le xêkizêc êdêc dô mamviha timuên.

Yesu nêl kiyang lec wê Jelusalem obêc vô nipaên ge
(*Matyu 24:15-21; Mak 13:14-19*)

²⁰“Buc wê tibii vevac obêc lam buu vîgwe Jelusalem xôn ge od xam xovô bê buc wê vîgwe ob vô nipaên ge vô kwabo lec. ²¹Om buc tige,

xomxo wê dô vac vîgwe Judia ge, he i pec mi loc lec vîgwe kitôn, di he wê dô vac vîgwe Jelusalem ge, he i pec mi loc vêl, di he wê dô Jelusalem ninya ge, he i o lêc dilôc vac vîgwe Jelusalem lêm. ²²Ên buc tige wê Anutu ob vông myaviwen nipaên vô xomxo Yuda i tiyi kiyang wê plopete kivuu ilage, om kiyang gee vihati obêc vô nôn lec. ²³Om vêx wê nu dô vac xêyaa hixôn vêx wê divông lul vô nue vô buc tige, he ob dô vac viyin levac. Ên xomxo kibun ga ob dô vac viyin levac di xêyaa myavinê wê Anutu vông ge ob tulec he Yuda vihati. ²⁴Mêd tibii ob hi he ya yib ya yipac di ku he ya xôn di kô he mi la vac tibii ba ben di he la dô di vông yuac kalabuhu. Di tibii wê o Yuda lêm ge ob vông vîgwe Jelusalem vô nipaên di heche va ob tu kehe di viac i tiyi buc wê Anutu nêl ge.

Buc wê Xomxo Nu ob vena ge
(*Matyu 24:29-31; Mak 13:24-27*)

²⁵“Mêd do toto ob val vac hiyôv yuu dentuc di pitua gê lag kisiinê, di xomxo kibun ga vihati nilô ob vô viyin levac di he ob xona ên mia gwec wê vuac di vô didun levac ge. ²⁶Di pitua yuu susu wê lag ge ob yetac di sea vîgwe wê le lec ge di la, om xomxo ob yê di xovô susu nipaên wê ob val kibun ge om he ob xona mabu di vixog mi la kibun. ²⁷⁻²⁸Mêd buc wê susu tigege obêc val ge, od xam nilôm i vô viyin maên di xam wê mam i loc kisii, ên buc wê Anutu ob vô xam vêl ên viyin yuu nipaên ge vô kwabo lec. Mêd ge wê a, Xomxo Nu, a ob lam vac viyobtoc hixôn xêkizêc yuu xêseac di lam kibun, di xomxo vihati ob yê wê a val ge.”

Kiyang pilepacên lec xax wê mi pwoc ge
(*Matyu 24:32-35; Mak 13:28-31*)

²⁹Mêd Yesu nêl kiyang pilepacên ti vô he ên nêbê, “Xam xovô xax wê ob pwoc lihi ge. ³⁰Ên xax lihi obêc pwoc lec ge od xam xovô ên xam nêbê ge buc wê hiyôv ob linac nivihâ ge. ³¹Mêgem xam xovô bêga bê môp wê xam ob xovô Anutu buc ge, tiyi bêge êno. Om xam obêc wê do tigege wê val ge od xam xovô bê buc wê Anutu ob tu king di vông xomxo vihati la vac i kwa ngibi ge vô kwabo lec.

³²“A nêl hixôn nôn vô xam bêga bê xomxo wê dô gwêbaga ge obêc dô di kiyang tigege vihati obêc vô nôn lec lê. ³³Lag yuu kibun xôa obêc ma, lêc kiyang wê a vông ge, bo ti obêc la xôa ma lêm.

Yesu nêl vô nue ngivihi ên nêb he i viac he

³⁴“Xam viac xam nivihâ, di le i lêc num mi vô mavmav lêm, di xam o lêc xo kiyang tibeac lec susu wê nimnivi xe ge di nilôm i vô viyin lec lêm, ên xam obêc viac xam nivihâ lêm ge od Xomxo Nu obêc lop mi lôm lutibed ge od xam ob lungên, tiyi xocbê pulac wê lilii lungên om mila mô, lêc vac ge. ³⁵Ên buc tige obêc val vô xomxo wê dô lec kibun ga vihati

yang. ³⁶Om xam viac xam i tiyi buc vihati, di xam kitaa vô Anutu bê i vông xêkizêc vô xam i tiyi wê xam ob le xêkizêc di kilê viyin wê ob tulec xam ge êdêc le nivaha vô Xomxo Nu manôn wê obêc vena ge.”

³⁷Mêd Yesu la mi nêl xolac vac Anutu xumac ngibua tiyi vidiiên vihati, di bucên ge mi sea Jelusalem di la mi yêp lec kitôn Oliv. ³⁸Mêdêc pitoc yang ge xomxo tibeac mi kidi mi la vac Anutu xumac ngibua ên nêb ob la ngô Yesu kiyang wê nêl ge.

Judas nêb ob vông Yesu vac xomxo levac vigê
(*Matyu 26:1-5,14-16; Mak 14:1-2,10-11; Jon 11:45-53*)

22 ¹Buc wê tibii Yuda ob myêl levac di ya blet xêkizêc wê yis maên ge ên xovô buc Pasova ge vô kwabo lec. ²Mêd xomxo levac wê mi si daa gee hixôn xomxo wê xovô Moses xolac gee he nêb he ob hi Yesu i yib, lêc he xona ên xomxo tibeac, om he myag môp wê he ob hôm i xôn ge.

³Judas Iskaliot ge Yesu nue ngivihî ti lê, lêc Seten la vac i nilô. ⁴Om Judas loc mi la vô xomxo levac wê mi si daa gee hixôn xêhipu levac wê mi viac Anutu xumac ngibua gee, di he keac lec môp wê Judas ob vông Yesu vac he vigê ge. ⁵Om xomxo levac tige nilô vô nivaha di he nêb wê Judas ob vông Yesu vac he vigê ge od he ob vông mone vô i. ⁶Mêgem Judas tyuc lec, mêd myag môp wê ob hôm Yesu xôn ge, lêc xovô wê xomxo tibeac mi dô hixôn Yesu ge om dô bin buc wê Yesu vaci obêc dô tamaên di xomxo ma ge lê.

Pita yuu Jon viac vizid wê he ob ya ge
(*Matyu 26:17-25; Mak 14:12-21; Jon 13:21-30*)

⁷Buc wê tibii Yuda ob ya blet xêkizêc di hi bwoc sipsip mi ya ên xovô buc Pasova ge, ⁸om Yesu nêl vô Pita yuu Jon ên nêbê, “Ga buc Pasova om muu loc myêl vizid ên il ob xa.” ⁹Om yuu kinêg vô i ên nêbê, “Ông nêb xii la myêl vac xumac tina?”

¹⁰Mêgem Yesu nêl vô yuu ên nêbê, “Muu ngô lê. Muu loc vac vigwe Jelusalem di muu obêc wê wê xomxo ti dikilê mia mi la ge, od muu timu vô xomxo tige vixa di loc vac xumac wê xomxo tyo ob la vac ge, ¹¹di nêl vô xomxo ti wê i xumac ge bê, ‘Xolac kehe nêb xii lam kinêg vô ông bê xumac nilô tina wê i hixôn nue ngivihî ob ya vizid vac ge?’ ¹²Muu obêc kinêg bêge vô i ge od obêc hilung xumac nilô levac ti wê yêp kisii ge vô muu. Susu wê il ob dô lec ge le vac xumac tige pyap, om muu loc myêl vizid wê il ob xa ge vac.” ¹³Mêgem Pita yuu Jon loc mi la, di mîla yê i tiyi wê Yesu nêl ge, mêgem yuu la myêl yaên wê he ob ya ge.

Yesu vông pasa vô nue ngivihî
(*Matyu 26:26-30; Mak 14:22-26; 1 Kolin 11:23-25*)

¹⁴Buc wê he ob ya vizid ge om Yesu hixôn nue ngivihî, he xôn dô di ya. ¹⁵Mêd Yesu nêl vô he ên nêbê, “A xovô ên a nêbê a obêc kô myavinê

levac om a nilôg kidu a ên a nêb a ob xa vizid tiga hixôn xam tax lê dêc kô myavinê timuên. ¹⁶A nêl vô xam bêga bê a ob xa vizid tiga i tii vac lêm di i loc tyip vô buc wê vizid tiga obêc vô nôn lec vac Anutu ben.”

¹⁷Mêd Yesu hóm kap ti di kitaa vô Anutu di nêl vô he ên nêbê, “Xam hóm di titang vôma. ¹⁸A ob nêl vô xam bê a obêc num wain bêga i tii vac lêm di i miloc vô buc wê a ob num mia vac Anutu ben ge.” ¹⁹Nang dêc Yesu hóm blet ti di kitaa lec mêd hibû di vông vô he titi di nêl ên nêbê, “Ga a nignivi wê a vông ên a nêb i ngidu xam xôn ge. Xam timu vô môm bêga di xovô a.” ²⁰He ya pyap mêd Yesu vông bêge vô kap wain êno, di nêl ên nêbê, “Mia wain ga a hi wê a ob kipyax sea ên xam ge. Mêgem kiyang paha wê Anutu hilu ge, a obêc vông i vô nôn lec ya a hi.

²¹“Xam wê lê. Xomxo ti wê ob vông a vac tibii vevac vigê ge xeedô di ya hixôn a lec tevol tiga. ²²A, Xomxo Nu, a ob xib i tiyi xocbê kiyang wê Anutu nêl pyap ge lê, léc xomxo ti wê ob vông a la vac he vigê ge obêc kô myaviwen levac lec timuên.” ²³Yesu nêl bêge pyap, mêd nue ngivihi nêl vôma ên nêbê, “Om il tina wê il obêc vông môm tibêge?”

Yesu nue ngivihi ngaênma ên nêb he tina obêc tu levac i luu he baba vêl

²⁴Mêd Yesu nue ngivihi ngaênma ên nêb mêd he tina obêc tu levac i luu he baba vêl. ²⁵Lêc Yesu nêl vô he ên nêbê, “King kibun ga môm wê nêb tibii viyang viyang ge i loc vac he kwa ngibi, di tibii wê tu levac ge nêb xomxo wê pileva ge i pimil he ên yuac wê he vông ge. ²⁶Lêc xam o léc timu vô môm bêge lêm. Nge, xam wê xam kô lêm levac ge, xam dô i tiyi xomxo wê lê maên ge, di xam wê xam tu levac ge, xam dô i tiyi xocbê xomxo wê mi vông yuac vô xam ge. ²⁷A ob kinêg xam bê xomxo ngwe na wê levac ge? Ge xomxo ngwe wê dô di ya ge, me i nu yuac ngwe wê myêl i xen yaên di kô mi lam ge? Ge xam xovô ên xam nêbê ge xomxo ngwe wê dô mi ya ge. Lêc a ga, a lam dô hixôn xam tiyi xocbê xam num yuac ti.

²⁸“Viyin tibeac tulec a, léc xam o sea a lêm. Nge, xam kilê viyin hixôn a. ²⁹Mag Anutu nêb a tu king di kô lêg levac, om a ob vông xam tu king di kô lêm levac hixôn a êno bêge, ³⁰om buc wê a ob tu king ge od xam ob dô hixôn a di il xôn ob xa di num, di xam obêc dô lec sia king di yaxên lime Islel wê xam hipu vigê yuu di tô mi la yuu ge nêl kiyang.”

Yesu nêl ên nêb Pita obêc yax i vun

(Maty 26:31-35; Mak 14:27-31; Jon 13:36-38)

³¹Yesu nêl vô Saimon Pita ên nêbê, “Saimon, ngô lê. Seten nêl ên nêbê ob yaxên xam, om Anutu tyuc lec ên nêb i yaxên. ³²Lêc a kitaa vô Anutu lec ông ên a nêbê ông o léc sea vông vinên lêm. Di buc wê ông ob pilepac ông mi lax vô Anutu ge od ông ngidu lime nêl vông vinên xôn.”

³³Lêc Pita nêl vô i ên nêbê, “Apumtau, a obêc loc hixôn ông. Wê tibii ob vông ông la vac kalabuhu me hi ông wib ge, od a ob kô myavinê hixôn

ông.”³⁴ Lêc Yesu nêl vô i ên nêbê, “Pita, a ob nêl vô ông bê vô bucên tya ga kokilêx vôên vya obêc gên ma di ông ob yax a vun lu yon bê ông lungên a.”

Kiyang lec susu wê ob ngidu xomxo xôn ge

³⁵ Yesu nêl vô nue ngivihî ên nêbê, “Buc ilage wê a vông xam la vac yuac ge od a nêb xam kôên vixec yuu mone di su i ma. Om a ob kinêg vô xam bê susu ya mi ma ên xam vô buc ya, me?” Lêc he nêl ên nêbê, “Maê, susu ti o ma ên xe buc ti lêm.”³⁶ Mêd Yesu nêl ên nêbê, “Dom gwêbaga, xomxo ob viac xam lêm, om xam vixec mone obêc dô ge, od xam kô hixôn mi loc. Di vixec êno bêge. Di xam ti yipac obêc ma ge od xam vông nêm kolsiot ên tibii i kisuu di xam kô mone mi loc kisuu yipac lec.”³⁷ A nêl bêga vô xam, ên viyin obêc val i tiyi kiyang wê yêp vac xolac bêga ên nêbê, ‘Xomxo nêl nêb i ge tibii nipaên.’ Om a ob nêl vô xam bê kiyang tiga obêc vô nôñ lec vô a, ên kiyang vihati wê he kivuu lec a ilage obêc vô nôñ lec.”³⁸ Om he nêl vô Yesu ên nêbê, “Apumtau, wê. Yipac yuu yêp ga.” Mêd Yesu nêl ên nêbê, “Ge pyap.”

Yesu la kitaa gê Getsemani

(Matyu 26:36-46; Mak 14:32-42)

³⁹ Pyap dêc Yesu sea Jelusalem di la lec kitôn Oliv tiyi xocbê mi vông ge, mêd nue ngivihî timu vô i vixa mi he la.⁴⁰ Mêd he mila vigwe tige om Yesu nêl vô he ên nêbê, “Xam dô di kitaa êdêc viyin wê ob yaxên xam ge i o léc vông xam tô lêm.”⁴¹ Mêd Yesu sea he di la teva tya tiyi xocbê xomxo ti ob nêx ngidax la tô ge, dêc la yev vixa kitu vac di kitaa bêga ên nêbê,⁴² “O Mag, ông obêc tyuc lec ge od ông vô viyin tiga vêl ên a. Lêc ông o léc vông i tiyi wê a nêb ông vông ge lêm. Nge, ông vông i tiyi wê ôcông va xovô ge.”

⁴³ [Mêd angela ti lam gê kisiinê di lam ngidu i xôn.⁴⁴ Yesu nilô vô viyin levac di i kitaa xêkizêc di nivinê tyip tiyi xocbê hi ge di yuc la kibun.]

⁴⁵ Yesu kitaa pyap di kidi mi lax vô nue ngivihî, léc yê wê he nilô vô viyin levac om he yêp.⁴⁶ Mêgem Yesu nêl vô he ên nêbê, “Bêna léc xam diwêpê? Xam kidi lec di kitaa êdêc viyin wê ob yaxên xam ge i o léc vông xam tô lêm.”

Judas vông Yesu la vac Yuda levac vigê

(Matyu 26:47-56; Mak 14:43-50; Jon 18:3-11)

⁴⁷ Yesu gên dinêl kiyang tige di xomxo tibeac val mi lam. Judas wê Yesu nue ngivihî vigê yuu di tô mi la yuu ge ti kô tibii mi he lam, dêc Judas val le hixôn Yesu ên nêb ob nga lia,⁴⁸ léc Yesu nêl vô i

ên nêbê, “Judas, bêna léc ông nga Xomxo Nu lia ên ông nêb tibii i lam hôm i xôn?”

⁴⁹Yesu nue ngivihi yê wê tibii tige nêb ob hôm i xôn ge om he kinêg vô i ên nêbê, “Apumtau, ông nêb xe hi he ya yipac, me?” ⁵⁰Lêc lutibed nu ngivihi ti hôm yipac di sap xomxo levac wê mi si daa ge nu yuac ti ninya lihi vilu hiyôv vêl. ⁵¹Lêc Yesu nêl ên nêbê, “Môp bêge i ma.” Mêd vyax vigê lec xomxo tige ninya di i vô nivihha lec.

⁵²Mêd xomxo wê lam ên nêb ob lam hôm Yesu xôn ge, ge he xomxo levac wê mi si daa gee di xêhipu levac wê mi viac Anutu xumac ngibua gee, hixôn he Yuda levac levac ya, om Yesu nêl vô he ên nêbê, “Xam xo ên xam nêbê a tibii yôdac ti om xam lam hixôn yipac yuu vîgo? ⁵³Ilage a mi dô hixôn xam vac Anutu xumac ngibua tiyi buc vihati, lêc xam o hôm a xôn lêm. Lêc gwêbaga buc wê xam vông, om xêkizêc wê mapitoc vông ge vô levac.”

Pita yax Yesu vun nêbê i lungên

(Matyu 26:57-58,69-75; Mak 14:53-54,66-72; Jon 18:12-18,25-27)

⁵⁴He hôm Yesu xôn di kô i mi la vô xomxo ti wê tu xomxo daa siên nêb levac ge om he mila vac xomxo levac tyo ben, di Pita timu vô he vixa lêc le lam teva teva. ⁵⁵Mêd xomxo wê dô vac xomxo levac tige ben ge vev ngwax lec wetôv di nyuu mi dô, di Pita la dô hixôn he. ⁵⁶Mêdêc vêx yuac ti yê Pita wê xeedô di ngwax linac lec ge om yê i kizêc dêc nêl ên nêbê, “Xomxo tya ga wê mi dô hixôn Yesu ge.” ⁵⁷Lêc Pita nêl ên nêbê, “A lungên xomxo tige.” ⁵⁸He dô nipwo tya, nang dêc xomxo ngwe yê Pita nang di nêl vô i ên nêbê, “Ông wê ông mi dô hixôn Yesu he nue.” Lêc Pita nêl ên nêbê, “Maê, o a lêmê.”

⁵⁹Hiyôv manôn ti la vêl, nang dêc xomxo ti nêl xêkizêc nang ên nêbê, “Vixôhilôg, xomxo tiga wê mi dô hixôn Yesu, ên yuu xôn tibii Galili yuu.” ⁶⁰Lêc Pita nêl ên nêbê, “A lungên kiyang wê ông nêl ge.” Pita gên o nêl kiyang tiyôd lêm, di kokilêx hi vya lutibed. ⁶¹Mêd Apumtau Yesu pilepac i di yê Pita, om Pita xovô kiyang wê Yesu nêl vô i ên nêbê, “Vô bucên tiga kokilêx vôn vya obêc gên ma di ông obêc yax a vun lu yon di nêl bê ông lungên a.” ⁶²Pita xovô wê i vông i so ge om sea vigwe tige di la byag levac.

Yesu la le vô tibii Yuda levac levac manôn

(Matyu 26:59-68; Mak 14:55-65; Jon 18:19-24)

⁶³Mêd xomxo wê hôm Yesu xôn ge keac nipaên lec di hi, ⁶⁴di ku i manôn vac nivimihi di nêl vô i ên nêbê, “Ông nêl bê letya hi ôngê.”

⁶⁵Mêd he nêl kiyang nipaên tibêge tibeac lec i.

⁶⁶Vigwe vidii mêd he Yuda levac levac nêb ob kitucma, om xomxo levac wê mi si daa gee di xomxo wê xovô Moses xolac gee hixôn he levac levac ge mangwe, he kitucma mi dô, mêd tibii kô Yesu mi la lax vô he manôn. Mêd he kinêg vô Yesu ên nêbê, ⁶⁷“Nêl vô xe bê ông ge Kilisi ti wê

Anutu nêb ob vông i lam ge, me?” Lêc Yesu nêl vô he ên nêbê, “A obêc nêl kitong vô xam ge od xam ob vông i vin a vyag lêm, ⁶⁸di a obêc kinêg kiyang vô xam ge od xam ob luu a vyag lêm. Nge, xam ob dô kiyang maên. ⁶⁹Viwen wê timuên ge, a, Xomxo Nu, a ob dô vô Anutu wê xêkizêc kehe ge vigê hiyôv.”

⁷⁰Mêd he vihati kinêg ên nêbê, “Ông ge Anutu nu mê?” Mêd Yesu nêl ên nêbê, “Xam nêl i tiyi, ên a ga Anutu nu.” ⁷¹Mêd he nêl vôma ên nêbê, “Pyap om il ob kinêg kiyang ya hixôn lêm. Ên ici va nêl i kitong vac mya mi il ngô pyap.”

Yesu la le vô gavman levac Pailat manôn
(*Matyu 27:1-2,11-14; Mak 15:1-5; Jon 18:28-38*)

23 ¹Xomxo levac vihati kidi lec di kô Yesu mi la di la lax vô Pailat manôn. ²Mêd he nêl kiyang nipaên lec Yesu bêga ên nêbê, “Xecxe xê wê xomxo tiga vô pilepac pilepac vô xe di nêb xe o vông mone takis vô il nêd king Sisa lêm, di kityoo xe ên nêbê i ge Kilisi wê tu king ge.” ³Mêd Pailat kinêg vô Yesu ên nêbê, “Ông ge king wê he Yuda vông ge, me?” Mêd Yesu lee yuu ên nêbê, “Ông nêl i la tiyi.” ⁴Mêd Pailat nêl vô xomxo levac daa siên hixôn xomxo gee vihati ên nêbê, “A yaxên xomxo tiga nêl kiyang, lêc kiyang ti o yêp vô i lêm.” ⁵Lêc xomxo tige nêl kiyang xêkizêc ên nêbê, “Xomxo tige la nêl kiyang vaxvax vô xomxo vac vigwe Galili di i la vac vigwe Judia vihati di val ga hixôn.”

Yesu la le vô gavman levac Helot manôn

⁶Pailat ngô kiyang tige, di kinêg vô he ên nêbê, “Xomxo tiga, tibii Galili ti, me?” ⁷Lêc he nêl ên nêbê Yesu ben Galili wê Helot viac ge, om Pailat vông i loc mi la vô Helot, ên Helot lam dô Jerusalem vô buc tige.

⁸Yesu mila vô Helot mêd Helot yê di xêyaa vô nivihâ yang, ên ilage xomxo nêl Yesu kitong vô i om Helot nêb ob yê Yesu di nêb i vông do ti ên i ob yê. ⁹Mêgem Helot kinêg kiyang tibeac vô Yesu, lêc Yesu o nêl kiyang ti lax vô i lêm.

¹⁰Mêd xomxo levac wê mi si daa gee hixôn xomxo wê xovô Moses xolac gee le kwabo di vông kiyang xêkizêc vô Yesu, ¹¹di Helot hixôn nue vevac yê Yesu nipaên di so vya vô i mêd kô ngakwi nivihâ ti di lam vinyum lec Yesu. Pyap dêc vông i lax mi la vô Pailat nang. ¹²Ilage Helot yuu Pailat mi yêma nipaên, lêc buc tige yuu xêyaa vin lecma di yuu keac nivihâ vôma nang.

Pailat tyuc lec nêb tibii i hi Yesu lec xax pola
(*Matyu 27:15-26; Mak 15:6-15; Jon 18:39-19:16*)

¹³Pailat tyuc xomxo levac wê mi si daa gee hixôn xomxo levac levac di tibii tibeac kituc la vô i, ¹⁴mêd nêl vô he ên nêbê, “Xam kô xomxo tige

mi lam vô a ên xam nêb mi nêl kiyang vaxvax vô xomxo om vông he yê gavman nipaên, om a kinêg kiyang vô i lec xam mamnôn, lêc a o tulec kiyang xocbê xam nêl ge ti vô i lêm. ¹⁵Di Helot êno o tulec kiyang ti lêm, om vông i lôm vô il nang. Xam ngô lê, xomxo tiga o vông ti so tiyi wê il ob hi i yib lec ge lêm. ¹⁶Om a ob pisa i ya yihi di vông i lôc ben.”

¹⁷[Môp wê he Yuda vông ge yêp bêga nêbê buc wê he ob myêl vizid Pasova ge od he mi nêl xomxo wê dô vac kalabuhu ge ti lê vô gavman levac, di gavman levac ob piwelac i vêl.] ¹⁸He môp bêge, mêgem xomxo tibeac tyuc vya levac ên nêbê, “Hi xomxo tiga i yib di vông Balabas i lôm vô xe.” ¹⁹Ilage Balabas hixôn xomxo tibeac vông vevac vô gavman Lom vac vigwe tige di hi xomxo ya yib om he vông i la dô vac kalabuhu. ²⁰Pailat nêb ob piwelac Yesu om nêl bêge vô xomxo tibeac tige nang, ²¹lêc he tyuc vya levac nang ên nêbê, “Hi i yib lec xax pola. Hi i yib lec xax pola.” ²²Mêgem Pailat nêl kiyang ti wê vông yon ge vô he ên nêbê, “Ên xomxo tiga vông nipaên vatya? A o tulec i nêl nipaên ti tiyi wê il ob hi i yib lec ge lêm. Om a ob pisa i ya yihi di vông i lôc nêl.” ²³Lêc he tyuc vya levac nginong ên nêbê, “Hi i lec xax”, om he vya hi Pailat vya tô, ²⁴mêd Pailat timu vô he vya, ²⁵om Balabas wê vông vevac vô gavman di hi xomxo yib ge, Pailat nêb he i piwelac i vêl i tiyi wê he nêl ge, di vông Yesu la vac he vigê ên nêb he i vông i tiyi wê he xovô ge.

He hi Yesu lec xax pola

(Matyu 27:32-44; Mak 15:21-32; Jon 19:17-27)

²⁶He kô Yesu mi la vô môp, dêc he yê xomxo ti wê dilam ên nêb ob la Jelusalem ge. Xomxo tyo lê nêbê Saimon di i ben Sailini. Om he hôm i xôn di vông i kilê xax pola wê he ob hi Yesu lec ge di timu vô Yesu vixa.

²⁷Yesu mug mêd xomxo tibeac ditimu vô i vixa, di vêx ya byag di vông tilôt lec i. ²⁸Om Yesu pilepac i di nêl vô he ên nêbê, “Xam vêx Jelusalem, le i lêc byag ên a lêm. Nge, xaxxam va byag ên xam hixôn nume. ²⁹Ên obêc buc timuên ge od tibii ob val vông viyin vô xam, om xam ob nêl bêga bê, ‘Vêx wê le pileva di kôên nu ma ge, me vêx wê o vông lul vô nu lêm ge, he ob dô viyin maên tya.’ ³⁰Mêd vô buc tige xomxo ob nêl vô kitôn bê, ‘Pul mi lam hi xe.’ Di ob nêl vô kitôn nipwo bêga bê, ‘Lam hivun xe xôn.’ ³¹Gwêbaga he vông viyin vô a tiyi xocbê ob vuv xax paha ge. Di xam ge tiyi xocbê xax mupacên om he ob vông bêna vô xam timuên?”

³²Mêd he kô tibii nipaên yuu hixôn, wê ob hi yuu yib hixôn Yesu. ³³Mêd he mi la vac vigwe ti lê nêbê bazub len, mêd he hi Yesu hixôn tibii nipaên yuu ge lec xax pola vac vigwe tige. Yesu yux vac mahigun di tibii nipaên yuuo yux vilu vilu. ³⁴Mêd Yesu nêl ên nêbê, “Mag, ông kitya tibii gae nêl nipaên vêl, ên he lungên om he vông.” Mêd tibii vevac tige nêb ob titang Yesu ngakwi voma om he tide mi yê dêc titang i tiyi. ³⁵Mêd xomxo tibeac dô di yê, mêd Yuda levac levac nêl nipaên lec Yesu ên nêbê,

“Xomxo tige ngidu xomxo ya xôn ilage, om obêc Kilisi wê Anutu vinoo i nôn ge od i ngidu ici va xôn êno.”

³⁶Mêd tibii vevac êno nêl nipaên lec Yesu, di he kô mia wain wê kilin ge mi la le kwabo vô Yesu nêb ob vông mi i num, ³⁷di nêl vô i ên nêbê, “Ông obêc xomxo Yuda nêl king ge od ông ngidu ôcông va xôn.” ³⁸Mêd kiyang ti yêp lec kisii vô Yesu bazub ên nêbê, “XOMXO TIGA, KING WÊ HE YUDA VÔNG GE.”

³⁹Tibii nipaên wê yux lec xax hixôn Yesu ge, ngwe nêl vya nipaên vô Yesu ên nêbê, “Ông Kilisi mê? Od ông ngidu ôcông va xôn di ngidu xii xôn êno.” ⁴⁰Lêc ngwe kunac di nêl ên nêbê, “Ông o xona ên Anutu lêmê? Xon xôn kô myaviwen nipaên tiyima lê, ⁴¹lêc u kô nipaên tiyi môm nipaên wê u vông ge, om ge la tiyi, dom xomxo tiga o vông nipaên ti lêm.” ⁴²Mêd nêl vô Yesu ên nêbê, “Yesu, buc wê ông ob tu king hixôn xêkizêc ge od ông xo a.” ⁴³Mêd Yesu nêl vô i ên nêbê, “A ob nêl hixôn nôn vô ông bê gwêbaga ông ob la dô hixôn a gê paladis.”

Yesu yib

(*Matyu 27:45-56; Mak 15:33-41; Jon 19:28-30*)

⁴⁴Hiyôv tyip kitôn mêd hiyôv linacên ma di vigwe vihati vô mapitoc ta di i la vô hiyôv manôn yon wê hucên ge. ⁴⁵Mêd nivimihi levac ti wê yux vac Anutu xumac ngibua ge lêx la yuu vac mahigun.

⁴⁶Mêd Yesu tyuc vya levac ên nêbê, “O Mag, a kinug i loc vac ông vigêm.” Nêl bêge pyap mêd yib.

⁴⁷Mêd tibii levac wê viac nue vevac ge yê susu tige di pimil Anutu di nêl ên nêbê, “Vixôhilôg, xomxo tiga nivihia di nipaên ti o yêp vô i lêm.”

⁴⁸Mêd xomxo wê val ên nêb ob yê ge, he tibeac le di yê wê Yesu yib ge, pyap dêc he lax mi la ben, lêc he nilô vô viyin om he kituu pikopac di la.

⁴⁹Di xomxo wê Yesu lie gee hixôn vêx wê sea Galili di mi timu vô Yesu vixa gee, he xôn le teva tya di yê susu vihati yang wê tibii vông vô Yesu ge.

He lii Yesu vac lôva

(*Matyu 27:57-61; Mak 15:42-47; Jon 19:38-42*)

⁵⁰⁻⁵¹Xomxo ti dô lê nêbê Josep di i ben Alimatia wê yêp vac vigwe Yuda ge. Josep ge Yuda levac ti wê tu kaunsil di mi dô vac kitucmaên hixôn Yuda levac levac, lêc o tyuc lec kiyang wê kaunsile hilu lec Yesu ge hixôn lêm. Ên Josep ge xomxo nivihia ti wê dô bin buc wê Anutu nu ob lam tu king gê kibun ga. ⁵²Mêd Josep la vô Pailat di la kitaa Pailat ên nêb ob kô Yesu ninivi mi la yev. ⁵³Mêgem Pailat tyuc lec di Josep la kwax Yesu vêl ên xax di la viyum vac nivimihi kwem ti di la lii vac lôva wê he yev vac ngidax ge ti. Lôva tige, he o lii xomxo ti vac ila lêm. Nge, gên paha. ⁵⁴Buc tige, ge buc wê he Yuda ob viac he, ên vigwe obêc huc ge od he buc sabat wê ngibua ge myahipu ob val.

⁵⁵Mêgem vêx wê sea ben Galili di mi timu vô Yesu gee, he timu vô Josep vixa di la yê wê he lii Yesu ninivi vac lôva ge. ⁵⁶Pyap di he lax mi la ben di lax viac wel hixôn susu wê nivivea ge. Pyap dec buc sabat, om he dô seac vêl tiyi môp wê Moses xolac nêl ge.

Yesu kidi lec vac yibên

(*Matyu 28:1-10; Mak 16:1-8; Jon 20:1-10*)

24 ¹Sabat la vêl di da pitoc yang ge vêx tigege kô susu nivivea wê he viac pyap ge mi la. He mila vô lôva wê he lii Yesu vac ge, ²lêc yê ngidax wê tibii lax i le vac vuayen xôn ge vixog la vêl, ³om he vac la vac lôva nilô lêc he o yêvô Apumtau Yesu ninivi lêm. ⁴Mêgem he xo kiyang tibeac tibeac, lêc lutibed vux yuu wê vinyum ngakwi kwem wê teeên ge val le kwabo vô he. ⁵Mêd vêx tigege yê di xona mabu di kilong kibun, lêc xomxo yuu ge nêl vô he ên nêbê, “Bêna lêc xam myag xomxo maviha tige vac xomxo yibên benê? Xomxo tige yêpên ga ma, di i kidi lec maviha mi la. ⁶Xam xovô i lôc vô kiyang wê Yesu nêl vô xam di xam gên dô Galili ge wê i nêl bêga ên nêbê, ⁷‘He obêc vông Xomxo Nu la vac tibii nipaên vigê di he hi i yib, di buc ti wê vông yon ge od obêc kidi lec i tii vac nang i tiyi kiyang wê Anutu nêl pyap ge.’”

⁸Mêgem vêx tigege xovô kiyang wê Yesu nêl ilage nang, ⁹om he sea lôva di lax mi la nêl kiyang tigege vihati kitong vô nue ngivihi vigê yuu di tô mi la ti ge hixôn xomxo yaya. ¹⁰Vêx wê nêl kiyang tige vô nue ngivihi ge, Malia Makdala yuu Joana yon Malia wê Jems ta ge di vêx yaya. ¹¹Lêc nue ngivihi ngô kiyang tige tiyi xocbê kiyang kityooên, om he o vông i vin lêm. ¹²Mêgem Pita kidi lec di tup mi la vô lôva, di mila kilong lôva nilô mi yê, lêc yê wê nivimihi ti wê he viyum Yesu vac ge diyêp pileva, mêgem lax mi la hixôn nilô viyin, ên lungên tige kehe.

Xomxo yuu yê Yesu lec môp

(*Mak 16:12-13*)

¹³Vô buc tige, xomxo wê mi dô hixôn Yesu ge yuu la vô môp ên nêb ob la vigwe ti lê nêbê Emeas. Môp wê ob sea Jerusalem di la Emeas ge tiyi xocbê 11 kilomita. ¹⁴Yuu dila vô môp di keac lec byed wê tibii vông vô Yesu ge. ¹⁵Yuu dikeac, lêc Yesu val vô yuu di yon xôn dila vô môp. ¹⁶Yuu manôn yê Yesu lê, lêc yuu o xovô bê ge Yesu lêm.

¹⁷Mêd Yesu kinêg vô yuu ên nêbê, “Muu dikeac lec vatya di tup vô môpê?” Mêgem yuu le di nilô vô viyin di manôn vô nipaên. ¹⁸Mêd ngwe wê lê nêbê Kliopas ge nêl vô Yesu ên nêbê, “Tibii vac vigwe viyang viyang ge la Jerusalem om he vihati yê di ngô susu wê val vac buc mahigun tiga, dom mêd ông tibed wê ông dilungên?” ¹⁹Mêd Yesu kinêg vô yuu ên nêbê, “Muu nêl lec susu vatya?” Om yuu nêl vô i ên nêbê, “Xii dinêl kiyang lec Yesu Nasalet. Yesu ge plopete ti wê vông yuac xêkizêc di

nêl kiyang hixôn xêkizêc, di Anutu hixôn xomxo vihati yê i nivihâ. ²⁰Lêc xomxo levac wê mi si daa gee hixôn

Yuda levac wê mi viac il gee, he vông i la vô gavman levac di gavman levac tyuc lec nêb i yib om he hi i yib lec xax pola. ²¹Ilage xe vông i vin ên xe nêbê Yesu ge xomxo wê ob vô Islel vêl ên nipaên ge, lêc mad xomxo tyo yib. Di kiyang bo ti hixôn bêga bê xomxo tyo yib nyop, om ga buc wê vông yon ge. ²²Mêd gwêbaga vêx wê xe xôn mi dô ge vông xe yetac mabu, ên he kidi pitoc yang mi la yê lôva ti wê he lii Yesu vac ge, ²³lêc he o tulec Yesu lêm, om he vena nêl vô xe ên nêbê, ‘Xe xê angela ya di he nêl vô xe ên nêbê Yesu kidi lec maviha nang.’ ²⁴Om xomxo wê xe xeedô gee ya kidi di loc mi la yê lôva nang, lêc mila yê tiyi xocbê vêx tige nêl ge, di he o tulec Yesu lêm.”

²⁵Mêd Yesu nêl vô yuu ên nêbê, “Muu piyôp maên. Bêna lêc muu gên o vông i vin kiyang wê plopete nêl ilage lêmê? ²⁶Ên kiyang yêp bêga nêbê Kilisi wê Anutu nêb ob vông i lam ge obêc kô myavinê, pyap dêc obêc la dô vac xêseac di kô lê levac, lêc mêd muu o xovô tige lêm?” ²⁷Yesu nêl bêge pyap, nang dêc nêl Moses xolac di nêl plopete kiyang ge vihati kehe kitong hixôn vô yuu, ên nêbê kiyang gee vihati nêl lec i.

²⁸Mêd yon mila kwabo vô vigwe wê yuu ob la ge, lêc Yesu vông xocbê ob luu yuu vêl di loc mi la ge, ²⁹om yuu nêl xôn ên nêbê, “Ông dô hixôn xiiê, ên hiyôv hoo la gwêba om vigwe ob buc.” Om Yesu la hixôn yuu di yon la dô vac yuu ben. ³⁰Mêd yon dô ên nêb ob ya yaên, dêc Yesu hôm blet di kitaa lec di hibû di vông vô yuu. ³¹Mêd yuu yê di xovô nêbê ge Yesu, lêc lutibed Yesu xôa ma di yuu o yê i tii vac nang lêm. ³²Di yuu nêl voma ên nêbê, “Buc wê Yesu keac hixôn u vac môp di nêl xolac kehe vô u ge od kiyang tige tipi vô u nilôd di vông u xêdyaa vô nivihâ.”

³³Mêgem lutibed yuu kidi lec di lax mi la Jêlusalem vô nue ngîvihi vigê yuu di tô mi la ti hixôn lie ya wê he kitucma mi dô ge, ³⁴mêd he nêl vô yuu ên nêbê, “Vixôhilôg, Apumtau Yesu kidi lec. Ge hilung i vô Saimon Pita gwêba.” ³⁵Mêd yuu nêl kitong vô he lec wê Yesu dila hixôn yuu vô môp ge, di nêl wê Yesu hibû blet di kitaa lec om yuu xovô i.

Yesu hilung i vô nue ngîvihi

(*Matyu 28:16-20; Mak 16:14-18; Jon 20:19-23*)

³⁶Yuu gên dinêl kiyang tige, di Yesu val le vac he mahigun di nêl vô he ên nêbê, “Kiyang malehe i hivun xam xôn.” ³⁷He ngô kiyang tige om he yetac di xona mabu, ên he xo ên he nêbê ge xomxo yibên ti kinu. ³⁸Lêc Yesu nêl vô he ên nêbê, “Bêna lêc xam nilôm vô viyin di xam xo kiyang tibeacê? ³⁹Xam wê a vigêg yuu vixag ga di xovô bê ga a, di xam vyax vigêm lec a nignivi mi yaxên, ên xomxo yibên kinu ge od len yuu liyôhô o xocbê a ga lêm.” ⁴⁰[Yesu nêl bêge pyap di hilung vigê yuu vixa vô he.] ⁴¹He yê bêge di nilô vô nivihâ, lêc he gên o vông i vin lêm. Nge, he nilô

vô tibeac. Om Yesu nêb he i xovô bê i o xomxo yibên kinu lêm, om kinêg vô he ên nêbê, “Yaên ya dô vô xamê?” ⁴²Mêgem he vông beac wê he si lec ngwax ge ti vô i, ⁴³mêd i hôm di ya vô he manôn.

⁴⁴Nang dêc Yesu nêl vô he ên nêbê, “Ilage wê a gên dô hixôn xam ge, od a nêl kiyang bêga vô xam ên a nêbê kiyang wê xomxo kivuu lec a mi i yêp vac Moses xolac yuu plopete kiyang di yêp vac kipihac Sam ge, ge vihati obêc vô nôn lec.” ⁴⁵Ge Yesu nêl i kitong vô he om he piyôp xovô kiyang vihati wê yêp vac xolac ge, ⁴⁶di i nêl vô he ên nêbê, “Kiyang yêp bêga nêbê Kîlisi wê Anutu nêb ob vông i lam ge obêc kô myavinê di yib, di buc ti wê vông yon ge od obêc kidi lec maviha vac yibên nang, ⁴⁷di kiyang yêp hixôn bêga nêbê xomxo i loc nêl xolac lec Kîlisi lê vac vigwe vihati bêga bê xomxo i pilepac he êdêc Anutu i kitya he nên nipaên vêl. Xam vông yuac tige gê Jelusalem tax, ⁴⁸di xam ob nêl kiyang wê xam wê di ngô ge vihati kitong. ⁴⁹Xam ngô lê. Myakilôhô Ngibua wê Mag nêl nêb ob vông i lam ge, a obêc vông i lam vô xam, om xam dô Jelusalem di i loc vô buc wê Anutu ob vông xêkizêc wê kisii ganê i lam hivun xam xôn lê.”

Yesu lec mi lax vô Anutu
(*Mak 16:19-20; Sinale 1:9-12*)

⁵⁰Mêd Yesu kô he di he sea Jelusalem mi la Betani, mêd Yesu vông vigê la kisii di kitaa lec he. ⁵¹Yesu kitaa mi le, di he yê wê Anutu kô i di i lec mi la kisii ge. ⁵²Mêd he lax hixôn xêyaa nivaha mi la Jelusalem, ⁵³mêd tiyi buc vihati ge he la pimil Anutu vac xumac ngibua.

JON

Yesu Kilisi xolac nivihā wê Jon kivuu ge

Kiyang nôn lam tu xomxo gê kibun

1 ¹Ilage vô buc taxlee ge, kiyang tyo dô. Kiyang tyo dô hixôn Anutu, di ici va Anutu. ²Vô buc mugên ilage i dô hixôn Anutu, ³di Anutu nêl di xomxo tyo tung susu vihati, di susu ti o lam môp bangwe lêm. Nge, xomxo tyo tung susu vihati. ⁴Di ici va ge maviha kehe, di maviha wê i vông ge linac vô xomxo mi he dô vac xêseac. ⁵Xêseac wê i vông ge linac vac mapitoc, di mapitoc o tiyi wê ob hivun xêseac tige xôn ge lêm.

⁶Anutu vông xomxo ti lam lê nêbê

Jon. ⁷Jon lam nêl xêseac kehe kitong vô xomxo ên nêb he vihati i ngô kiyang wê i nêl ge di vông i vin. ⁸Ici va ge o xêseac tyo lêm. Nge, lam ên nêb ob nêl xêseac tige kitong vô xomxo.

⁹Xêseac tige lop mi lam kibun ga, di i xêseac nôn wê ob linac lec xomxo vihati ge. ¹⁰Ici va tung susu kibun ga di ici va lam dô kibun, léc xomxo kibun ga, he o xovô i lêm. ¹¹La vac ben vigwe kehe lê, léc lie o kô i lec nivihā lêm. ¹²Léc xomxo wê kô i lec nivihā di vông i vin ge, od vông he tu Anutu nue. ¹³Môp wê he tu Anutu nue ge o tiyi xochê môp wê xomxo kibun ga kô nue ge lêm, di kehe o yêp vac xovôên wê xomxo vông ge lêm. Nge, Anutu vaci vông he tu i nue.

¹⁴Kiyang lam tu xomxo gê kibun ga di i dô vac xe mahigun, om xe xê xêseac wê i vông ge. Xêseac tige Anutu vông vô nu tuc tived, di xêyaa vin lecên yuu kiyang nôn hivun i xôn. ¹⁵Jon nêl xomxo tige kitong di keac vya levac ên nêbê, “Xomxo tyo tiga, wê a nêl kiyang lec ilage ên a nêbê xomxo ngwe wê ob val timuên ge luu a vêl, ên buc wê a gên ma ge, xomxo tiga dô tax.”

¹⁶Ici va tu vizid viyang viyang ge kehe om vông vizid tibeac vô il luu vêl. ¹⁷Ilage Anutu nêl xolac vô Moses mi i nêl vô xomxo, léc xêyaa vin

lecên hixôn kiyang nôn, Yesu Kilisi vaci kô mi lam. ¹⁸Xomxo ti o yê Anutu lec manôn lêm. Nu tuc tibed wê dô hixôn Ma Anutu ge wê lam nêl Anutu kehe kitong vô il.

Jon Lipacên nêl i kehe kitong vô xomxo

(Matyu 3:1-12; Mak 1:2-8; Luk 3:2-18)

¹⁹Yuda levac wê dô Jelusalem ge vông xomxo wê mi si daa gee hixôn xomxo Livai ya la vô Jon di he la kinêg vô i ên nêbê, “Ông ge letya?” ²⁰Om Jon nêl i kehe kitong yêp seac vô he di o yax vun lêm, om nêl i kitong ên nêbê i o Kilisi ti wê he dô bin ge lêm. ²¹Om he kinêg ên nêbê, “Om ông letya? Ông tiyi xocbê plopet Ilaija, me?” Lêc Jon nêl vô he ên nêbê, “A o Ilaija lêm.” Om he kinêg nang ên nêbê, “Ông ge plopet ti wê xe mi dô bin ge, me?” Lêc Jon nêl ên nêbê, “A o plopet tige lêm.” ²²Om he kinêg tii vac ên nêbê, “Ông ge letya? Xe obêc milax nêl kiyang tibêna vô xomxo wê vông xe lam ge? Om ông nêl ông kehe kitong vô xe.” ²³Om Jon nêl vô he tiyi xocbê kiyang wê plopet Aisaia kivuu ilage bêga nêbê, “A ga xomxo ti wê tyuc vya levac vac vigwe mahigun pileva ên nêbê, ‘Xam viac Apumtau môt wê ob lam vac ge i yêp niviha.’”

²⁴Xomxo tige, tibii Palisi vông he

lam, ²⁵mêd he kinêg vô Jon ên nêbê, “Ông nêl ên ông nêbê ông o Kilisi lêm, di nêl ên ông nêbê ông o Ilaija lêm, di nêl ên ông nêbê ông o plopet tige lêm, lêc bêna lêc ông lipac xomxo ya mia?” ²⁶Om Jon nêl ên nêbê, “A lipac xomxo ya mia pileva, di xomxo ti val le vac xam mahigun lêc xam o xovô lêm. ²⁷A lam tax di xomxo tige obêc val timuên, lêc a o nigviha tiyi wê aob piwelac yihi vêl ên su wê i vông ge lêm.” ²⁸Jon nêl kiyang tige gê Betani wê yêp mia Jodan kehe vilu ganê. Vigwe tige wê Jon mi lipac xomxo vac ge.

Yesu ge bwoc sipsip nu wê Anutu vông i lam ge

²⁹Titige Jon yê wê Yesu val ge om nêl ên nêbê, “Xam wê lê, ge bwoc sipsip nu wê Anutu vông i lam kibun ên nêb i lam yib di kitya xomxo nêl nipaên vêl ge. ³⁰Ge xomxo wê a nêl kiyang lec ilage ên a nêbê, ‘A lam tax di xomxo ti wê ob val timuên ge luu a vêl, ên buc wê a gên ma ge, xomxo tige dô tax.’ ³¹A gên o xê xomxo tige lêm, lêc a lam lipac xomxo ya mia, ên a nêb a ob nêl xomxo tige kitong vô xomxo Islel.”

³²Nang dêc Jon nêl kitong bêga ên nêbê, “A xê wê Myakilôhô Ngibua lam gê kisii ganê tiyi xocbê menac tucluu di lam yêp lec Yesu kisii. ³³A gên o xovô i lêm, lêc Anutu wê vông a lam lipac xomxo ya mia ge nêl vô a tax ên nêbê, ‘Ông obêc wê Myakilôhô Ngibua lop mi lam dô lec xomxo ti ge od ông xovô bê xomxo tige wê ob lipac xomxo ya Myakilôhô Ngibua.’ ³⁴A xê wê kiyang tige vô nôn lec ge om a nêl kitong bê xomxo tige, Anutu nu.”

Yesu keac xomxo yuudiyuu timu vô i vixa

³⁵Vigwe vidiên titige Jon le hixôn i nue ngivihî yuu, ³⁶lêc yê wê Yesu val ge, om nêl ên nêbê, “Wê lê, ge bwoc sipsip nu wê Anutu vông ge.” ³⁷Nu ngivihî yuu ge ngô wê Jon nêl ge om la timu vô Yesu mi he la. ³⁸Mêd Yesu pilepac i di yê wê yuu la vô i vixa ge om kinêg vô yuu ên nêbê, “Muu lam ên vatya?” Lêc yuu nêl ên nêbê, “Labai, ông dô vac xumac tina?” Labai ge, kehe bêga nêbê xolac kehe. ³⁹Om Yesu nêl vô yuu ên nêbê, “Muu lam wê lê.” Om yuu la hixôn Yesu mi la yê xumac wê Yesu yêp vac ge. Ge hiyôv manôn yuudiyuu wê hucên ge om yuu dô hixôn Yesu di vigwe buc.

⁴⁰Xomxo yuu wê ngô Jon vya di la hixôn Yesu ge, ngwe Andlu wê Saimon Pita li ge, ⁴¹om Andlu la vô li Saimon di nêl vô ên nêbê, “Xe xê Mesaia.” Mesaia ge, lê ngwe nêbê Kilisi di kehe bêga nêbê xomxo ti wê Anutu vông i lam ge. ⁴²Mêd Andlu kô Saimon mi yuu la vô Yesu, mêd Yesu yê Saimon di nêl vô ên nêbê, “Ông ge Saimon wê Jon nu ge, lêc a ob nêl ông lêm bê Sipas.” Lê Sipas ge, Glik vya nêl bêga nêbê Pita, di kehe bêga nêbê ngidax.

⁴³Vigwe vidiên titige Yesu nêb ob la vigwe levac Galili om mîla vô Pilip di nêl vô ên nêbê, “Lam timu vô a.” ⁴⁴Pilip yon Andlu yuu Pita, yon ben kehe Betsaida. ⁴⁵Mêd Pilip la myag Nataniel mi yêvô di nêl vô ên nêbê, “Xomxo ti wê Moses kivuu kiyang lec mi i yêp vac kipihac xolac di plopete kivuu kiyang lec hixôn ge, xe tulec i. Ge Yesu wê ma Josep vac vigwe Nasalet.” ⁴⁶Lêc Nataniel nêl ên nêbê, “Nôn nivîha ti ob val tyip vac vigwe Nasalet lêm.” Lêc Pilip nêl vô i ên nêbê, “Lam loc wê lê.” ⁴⁷Mêd Yesu yê wê Nataniel val vô i ge, om nêl lec i ên nêbê, “Wê, ge xomxo Islel nivîha ti, wê kiyang kityooên ti o yêp vac i nilô ge lêm.” ⁴⁸Mêd Nataniel nêl vô Yesu ên nêbê, “Ông xovô a gê na?” Om Yesu nêl vô i ên nêbê, “Buc wê Pilip gên o keac ông lam lêm ge, ông le vac hîguc kehe di a xovô ông pyap.” ⁴⁹Om Nataniel nêl ên nêbê, “Xolac kehe, ông ge Anutu nu. Ông tu xe Islel nêm xomxo levac.” ⁵⁰Mêd Yesu nêl vô i ên nêbê, “Ông vông i vin ên wê a nêl vô ông ên a nêbê a xê ông le vac hîguc kehe ge. Lêc timuên ông obêc wê susu ya obêc luu tiga vêl.” ⁵¹Mêd Yesu nêl hixôn ên nêbê, “A nêl hixôn nôn vô xam bê timuên xam obêc wê, lêc lag puunê obêc tax di angela wê Anutu vông ge ob lec mi la kisii di lop mi lôm vô Xomxo Nu.”

Yesu pilepac mia i tiyi xocbê wain gê Kena

2 ¹Buc yuu la vêl di buc wê vông yon ge xomxo vux ti ii vêx vac vigwe Kena wê yêp vac vigwe levac Galili ge, di Yesu ta la dô hixôn. ²Di he tyuc Yesu he nue ngivihî ên nêb he i lam dô hixôn. ³Mêd xomxo num wain ma vêl, om Yesu ta la nêl vô Yesu ên nêbê, “He xen wain ma.” ⁴Lêc Yesu nêl vô i ên nêbê, “Tag, le i nêl vô a lêm. Ge yêp vô a, ên buc wê a

vông ge gên yêp.”⁵ Mêd ta nêl vô nue yuac vihati ên nêbê, “Xam vông i tiyi kiyang wê Yesu ob nêl vô xam ge.”

⁶ Dêg ngidax vigê vilu di sec ti le, wê he mi lipac vigê hixôn susu ya vac tiyi môp wê Yuda mi vông ge. Dêg tige levac mabu om dêg toto ge tiyi xochê ob kilê mia vac dêg nipwo kehe ti, me kehe ti di vigê yuu mi too vac lêc i pup lec. ⁷ Mêd Yesu nêl vô nue yuac tigeê ên nêbê, “Xam loc kilê mia di lam too vac dêg tigae di i pup lec.” Om he la kilê mia mi lam too vac dêg tigeê vihati mi i pup lec. ⁸ Mêd Yesu nêl vô he ên nêbê, “Xam ka mia vac dêg nipwo di kô mi loc vô xomxo levac ti wê viac yaên ge.” Om he ka di kô mi la vô xomxo levac tyo. ⁹ Mia tige pilepac wain pyap mêd xomxo levac wê viac yaên ge num lê lêc o xovô kehe lêm. Nue yuac wê ka wain tige, he xovô, lêc xomxo levac wê viac yaên ge lungên, om keac xomxo ti wê ii vêx ge lam ¹⁰ di nêl vô i ên nêbê, “Tibii vihati mi vông wain nyen vô xomxo tax mi he num. Di he obêc num levac ge od ob kô wain wê nyen maên ge mi vông vô he timuên. Di ông va lax wain nyen le, lêc divông i lam timuên tya ga.”

¹¹ Do levac tige Yesu vông gê Kena wê yêp vac vigwe levac Galili ge. Ge do taxlee wê Yesu vông ge, om hilung xêseac yuu xêkizêc wê i vông ge di nue ngivihi yê di vông i vin. ¹² Pyap dêc Yesu he tae lie hixôn nue ngivihi he xôn la Kapaneam di la dô buc ya.

Yesu tii xomxo wê vông vitevac vac Anutu xumac ngibua ge la vêl
(*Matyu 21:12-13; Mak 11:15-17; Luk 19:45-46*)

¹³ Buc levac Pasova wê he Yuda ob xovô buc Isip ilage vô kwabo lec, om Yesu la Jelusalem ¹⁴ di la vac Anutu xumac ngibua nilô, lêc yê wê xomxo ya kô bwoc kau yuu sipsip di menac mi lam tung ên nêb tibii i kisuu di vông i tu daa ge, di yê wê xomxo ya dô di vông mone luuma ge. ¹⁵ Om Yesu hôm yihi viiên di tii xomxo tigeê hixôn bwoc kau yuu bwoc sipsip la vêl ên xumac ngibua, di kipyax mone wê he vông i luuma ge hixôn tevol la sea, ¹⁶ di nêl vô he wê vông vitevac lec menac ge ên nêbê, “Xam kô xam susu gee mi loc vêl, di le i lêc vông Mag xumac i tu xochê vigwe maket lêm.” ¹⁷ Mêd Yesu nue ngivihi xovô lec kiyang ti wê yêp vac kipihac xolac bêga ên nêbê, “A vông yuac xêkizêc ta ên a nêb ông xumac i yêp nivîha.”

¹⁸ He Yuda yê môp wê Yesu vông ge om la nêl vô i ên nêbê, “Ông vông tibêge om ông ob vông do tina ên i nêl ông kitong vô xe?” ¹⁹ Yesu nêl vô he ên nêbê, “Xam obêc dii xumac ngibua tiga vêl ge od a ob lox vac i tiyi buc yon.” ²⁰ Om he kinêg vô Yesu ên nêbê, “Xumac ngibua tiga, xomxo vông yuac lec tiyi xochê kliskas kehe yuu di vigê vilu di sec ti (46), lêc ông nêl ên ông nêbê ông ob lox xumac tige vac i tiyi buc yon bed mê?” ²¹ Lêc xumac ngibua wê Yesu nêl lec ge, ge nêl lec ici va ninivi, ²² om buc timuên wê Anutu tipî vô Yesu kidi lec vac yibên ge, Yesu nue ngivihi

xovô lec kiyang wê Yesu nêl lec xumac ngibua ge, om he vông i vin ên he nêbê kiyang wê Yesu nêl ge hixôn kiyang wê yêp vac xolac ge, ge kiyang nôn vixôhilôg.

Yesu xovô xomxo vihati nilô

²³Yesu dô Jelusalem vô buc Pasova wê he ob xovô buc Isip ilage, di xomxo tibeac yê do levac wê i vông ge om he vông i vin. ²⁴Lêc Yesu o vô ninya lehe vô he mi la vac kiyang wê he nêl ge kwa ngibi lêm, ²⁵ên xovô he vihati pyap, di o kinêg xomxo ngwe kehe vô xomxo ngwe lêm. Ên ici va xovô xomxo vihati nilô la tiyi pyap.

Yesu keac hixôn Nikodimas

3 ¹Xomxo ti dô lê nêbê Nikodimas. Nikodimas ge Palisi ti di i xomxo levac wê he Yuda vông ge. ²Lêc la vô Yesu vô bucên di nêl vô i ên nêbê, “Ông gexolac kehe, di xe xovô ên xe nêbê Anutu vông ông lam. Ên do levac wê ông mi vông ge Anutu obêc dô hixôn ông lêm ge od ông obêc vông do levac tibêge lêm.”

³Mêd Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec lêm ge od ob tu Anutu nu mi la dô vac i ben lêm.” ⁴Lêc Nikodimas nêl vô i ên nêbê, “Xomxo wê vô levac pyap ge ob vô paha lec tibêna? Obêc lax vac ta nilô di yubac i tii vac, me?”

⁵Lêc Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec ya mia hixôn Myakilôhô Ngibua lêm ge od ob tu Anutu nu mi la dô vac i ben lêm. ⁶Xomxo kibun ga kô nue kibun ga, dom Myakilôhô Ngibua obêc vông xomxo vô paha lec ge, od vông he tu Anutu nue. ⁷Kiyang wê a nêl ên a nêbê xam vô paha lec ge, le i lêc yetac ên kiyang tige lêm. ⁸Lea la vac vigwe viyang viyang ge, lêc il ngô nididun pileva di kehe, il o xovô wê lam ge lêm, di ob loc tina ge, il lungên. Di môt wê Myakilôhô Ngibua vông xomxo vô paha lec ge tiyi bêge.”

⁹Mêd Nikodimas luu i vya di kinêg ên nêbê, “Kiyang tige obêc vô nôn lec tibêna?”

¹⁰Lêc Yesu nêl vô i ên nêbê, “Ông mi tixuu lime Islel ya xolac, lêc bêna lêc ông lungên kiyang tige kehe? ¹¹A nêl hixôn nôn vô ông bê xe nêl kiyang wê xe xovô ge di xe nêl kitong lec susu wê xe mamnôn yê ge, lêc xam o vông i vin kiyang wê xe nêl ge lêm. ¹²A nêl kiyang tixuuên lec susu kibun ga, lêc xam o vông i vin lêm. Om a obêc nêl kiyang lec susu kisii ganê ge od xam ob xovô tibêna? ¹³Xomxo ti o lec mi la lag puunê lêm. Xomxo Nu tibed wê lop mi lam gê lag puunê ge wê ob lec mi lax lag puunê tii vac nang. ¹⁴Ilage Moses tul myel kinu lec xax vac vigwe mahigun

pileva. Om Xomxo Nu, tibii obêc tul lec xax tiyi bêge êno, ¹⁵di xomxo vihati wê vông i vin i ge, he ob dô maviha luta lêc luta.”

¹⁶Anutu xo vīgwe pisiv ên xomxo kibun ga vihati luu vêl om vông nu tuc tived lam, ên nêb xomxo obêc vông i vin i ge od he obêc yib mi la vac nipaên lêm. Nge, he ob dô maviha luta lêc luta. ¹⁷Ên Anutu o vông nu tuc lam kibun ên nêb i lam vông myaviwen nipaên vô xomxo lêm. Nge, vông i lam ên nêb i lam hôm he lec. ¹⁸Xomxo wê vông i vin Anutu nu ge kiyang ti o yêp vô he lêm. Lêc xomxo wê o vông i vin lêm ge he hilu nêb kiyang wê he ob yib mi la vac nipaên timuên ge, ên he o vông i vin Anutu nu tuc nôn tived ge lêm. ¹⁹Myaviwen wê xomxo ob kô ge, kehe bêga nêbê Yesu kô xêseac mi lam kibun ga lê, lêc xomxo xêyaa vin lec mapitoc di he xona ên xêseac, ên môt wê he vông ge nipaên. ²⁰Xomxo vihati wê vông môt nipaên ge, he xona ên xêseac nêb he ob la vac lêm, ên he nêb xêseac ob hilung nipaên wê he vông ge lam le seac. ²¹Di xomxo vihati wê vông môt bôbac ge he lam le vac xêseac, ên nêb xêseac i nêl he kitong bê he vông yuac ya xêkizêc wê Anutu vông ge.

Jon Lipacên nêl Yesu kehe kitong

²²Pyap dêc Yesu he nue ngivihi la vīgwe levac Judia di la dô di lipac xomxo ya. ²³Jon êno lipac xomxo gê Inon wê yêp kwabo vô Selim ge, ên mia levac yêp vac vīgwe tige om xomxo la vô Jon di Jon lipac he, ²⁴ên Helot gên o tung Jon la vac kalabuhu lêm.

²⁵Jon nue ngivihi hixôn Yuda ti ngaênma lec môt wê mia lipacên ge. ²⁶Om Jon nue ngivihi la vô Jon di nêl vô i ên nêbê, “Xolac kehe, xomxo ti wê dô hixôn ông ilage vô mia Jodan vilu ganê di ông nêl i kitong ge, xomxo vihati la vô xomxo tyo di i lipac he. Bêna lêc tyo vông tibêge?” ²⁷Mêd Jon nêl lax vô he ên nêbê, “Anutu lag puunê obêc vông nôn ti vô xomxo ti lêm ge od o tiyi wê ob kô nôn ti ge lêm. ²⁸Xacxam va ngô kiyang wê a nêl vô xam ilage ên a nêbê, ‘A o Kilisi ti wê il dô bin ge lêm, lêc Anutu vông a lam mug Kilisi môt.’ ²⁹Xomxo ti obêc ii vêx ge od vêx tige ob tu ici va vinê, lêc li ngwe obêc dô di ngô li ngwe wê ob kô vêx tige vya ge od xêyaa obêc vô nivaha. Om gwêbaga, a tiyi xocbê lig ngwe ge, ên a xêgyaa vô nivaha yang ên Yesu. ³⁰Om Yesu lê i vô levac di a lêg i vô nipwo lec.”

³¹Xomxo ti wê lam gê lag puunê ge luu xomxo vihati vêl. Ên xomxo kibun ga, kehe yêp gê kibun om ob nêl kiyang lec susu kibun ga. Dom xomxo ti wê lam gê lag puunê ge nginoo susu vihati vêl. ³²Xomxo tige nêl kiyang lec susu wê yê di ngô pyap ge, lêc xomxo ti o ngô di vông i vin kiyang wê nêl ge lêm. ³³Lêc xomxo wê ngô di vông i vin kiyang wê i nêl ge, vông vinên wê he vông ge nêl kitong nêbê Anutu ge xomxo kiyang nôn. ³⁴Xomxo ti wê Anutu vông i lam ge, nêl Anutu kiyang, ên Anutu vông Myakilôhô Ngibua hivun i xôn. ³⁵Ma Anutu xêyaa vin lec nu tuc, om vông susu vihati vac i vīgê. ³⁶Xomxo ti obêc vông i vin Anutu nu ge od ob dô maviha luta lêc luta, lêc xomxo ti obêc hingoo nu tuc vya ge, od

ob dô maviha luta lêm, ên xêyaa myavinê wê Anutu vông ge hivun i xôn pyap.

Yesu keac vô Samelia vêx ti

4 ¹He Palisi ngô kiyang wê nêb Yesu kô xomxo tibeac di lipac he luu wê Jon lipac ge vêl. ²Yesu o lipac xomxo ti lêm. Nge, nue ngivihi môci lipac xomxo. ³Mêd Yesu ngô wê he Palisi ngô kiyang tige, om sea vigwe levac Judia ên nêb ob lax mi la Galili, ⁴mêd la vô môm Samelia, ⁵di mila vigwe ti lê nêbê Saika wê yêp vac vigwe levac Samelia ge. Vigwe tige yêp kwabo vô kibun ti wê Jekop vông vô nu Josep ilage. ⁶Lôva ti wê Jekop yev ilage mi mia lua vac ge yêp vac vigwe tige om xomxo lam mi kilê. Yesu mila, léc ni ma vêl lec môm dia wê lam ge om mila dô kwabo vô mia tige. Ge tiji xocbê hiyôv tyip kitôn.

⁷⁻⁸Yesu vaci mila dô di nue ngivihi la mug mi la ên nêb ob la kisuu yaên, di Samelia vêx ti val ên nêb ob kilê mia om Yesu nêl vô i ên nêbê, “Kilê mia mi lam ên a ob num.” ⁹Lêc vêx tyo nêl vô i ên nêbê, “Ông vux Yuda di a vêx Samelia. Bêna léc ông kitaa mia vô a?” Nêl bêge, ên Yuda yuu Samelia o mi keac voma lêm. ¹⁰Mêd Yesu nêl vô i ên nêbê, “Ông obêc xovô vizid wê Anutu vông ge di ông obêc xovô xomxo ti wê nêl vô ông ên nêbê ông vông mia mi i num ge od ông obêc kitaa mia vô i di i vông mia maviha vô ông.” ¹¹Lêc vêx tyo nêl vô i ên nêbê, “Xomxo levac, ông nêbê dêg ma, di mia tô mi lax ngibi ganê, om ông ob kilê mia maviha tige gê na? ¹²Bug Jekop vông lôva tiga vô xe, di i hixôn nue di i bwoc, he xôn mi num vac, léc mêd ông luu Jekop vêlê?” ¹³Lêc Yesu nêl vô vêx Samelia tyo ên nêbê, “Xomxo vihati wê num mia tiga, he ob xo mia tii vac. ¹⁴Lêc xomxo ti obêc num mia wê a vông ge od ob xo mia bê ob num i tii vac lêm. Ma vêl. Ên mia wê a ob vông vô i ge obêc pituv vac i nilô di vông i dô maviha luta léc luta.” ¹⁵Om vêx tyo nêl vô i ên nêbê, “Xomxo levac, ông vông mia tige vô a mi a num êdêc a xoên mia tiga i ma di a lam kilêên tii vacên i ma.”

¹⁶Yesu nêl vô i ên nêbê, “Loc keac liyam di muu xôn lôm.” ¹⁷Lêc vêx tige nêl ên nêbê, “A liyag ma.” Mêd Yesu nêl vô i ên nêbê, “Ông nêl vixôhilôg ên ông nêbê ông liyam ma. ¹⁸Ên ilage ông kô vux vigê vilu léc sea he di vux wê dô hixôn ông gwêbaga ge, o ông liyam lêm. Om kiyang wê ông nêl ge, ông nêl nôb.” ¹⁹Mêd vêx tyo nêl vô i ên nêbê, “Xomxo levac, ga a xovô ên a nêbê ông plopete ti. ²⁰Xe buge lam mi kitaa vô Anutu lec kitôn tiga, lêcom xam Yuda nêl ên xam nêbê vigwe wê il ob kitaa vô Anutu ge, vigwe Jelusalem tibeac.”

²¹Mêd Yesu nêl vô i ên nêbê, “Vêx, ông vông i vin kiyang wê a ob nêl ga bê timuên ge xam obêc kitaa vô Mag lec kitôn tiga lêm, di xam ob kitaa gê Jelusalem êno lêm. ²²Xam Samelia mi kitaa lê, léc xam lungên xomxo wê xam mi kitaa vô i ge. Di xe Yuda, Anutu wê xe mi kitaa vô ge,

xe xovô pyap, ên xomxo ti wê ob vô xomxo vêl ên nipaên ge lam vac xe Yuda. ²³Buc ti obêc val, om gwêbaga buc tyo val pyap, om xomxo wê ob kitaa nôn ge, Myakilôhô Ngibua ob ngidu he xôn di he ob kitaa vô Mag hixôn kiyang nôn. Ên xomxo tibêgee wê Anutu xêyaa vin lec nêb he i kitaa vô i. ²⁴Anutu ge Myakilôhô, om xomxo obêc nêb kitaa vô i ge od Myakilôhô Ngibua i ngidu he xôn di he i kitaa hixôn kiyang nôn.” ²⁵Mêd vêx tyo nêl vô Yesu ên nêbê, “A xovô ên a nêbê Mesaia ti wê Anutu vinoo ge wê he nêl lê nêbê Kilisi ge obêc val. Di obêc val ge od ob nêl kiyang vihati kehe kitong vô il.” ²⁶Yesu nêl vô i ên nêbê, “A tyo ga mê, wê a dinêl kiyang vô ông ga.”

²⁷Yesu nêl kiyang tige, di nue ngivihi vena yê wê Yesu dikeac hixôn vêx tige di he yetac ên. Lêc he ti o nêl vô i lêm bê “Ông ob kô vatya? Di ông keac vô vêx tige ên va?” ²⁸Mêd vêx tige sea dêg le di lax mi la viyangtôv di lax nêl vô xomxo tibeac ên nêbê, ²⁹“Xam lam loc wê xomxo ti wê nêl kiyang a vông ilage vihati kitong. Ganê mêd Kilisi ti wê il dô bin ge yuubê?” ³⁰Om he sea ben di lam vô Yesu.

³¹He gên dilam di Yesu nue ngivihi nêl vô Yesu ên nêbê, “Xolac kehe, wa yaên lê.” ³²Lêc Yesu nêl vô he ên nêbê, “Yaên wê a vông ge dô, lêcom xam lungên.” ³³Om nue ngivihi kinêg vôma ên nêbê, “Mêd xomxo ti vông yaên vô i?” ³⁴Lêc Yesu nêl vô he ên nêbê, “Yaên wê ob den a ge bêga bê a ob vông kiyang yuu yuac wê xomxo ti wê vông a lam ge nêb a vông ge i loc pyap lê. ³⁵Xam nêl ên xam nêbê dentuc yuudiyuu obêc lam la vêl di xam ob la kô yaên nôn vac yuac. Lêc a ob nêl vô xam bê xam vêl mamnôn lec mi wê yuac, ên xomxo viac he pyap tiyi wê xam ob la nêl xolac vô he ge, tiyi xocbê susu vô nôn vac yuac ge. ³⁶Xomxo wê ob la kô nôn vac yuac ge ob kô nôn nivaha lec yuac wê he vông ge di ob kituc nôn tige la dô nivaha luta lêc luta. Om xomxo wê xin vê ge hixôn xomxo wê kô nôn ge, yuu xôn xêyaa vô nivaha. ³⁷Om kiyang wê nêl ên nêbê xomxo ngwe ob xin vê di ngwe ob la kô nôn ge, kiyang nôn. ³⁸A vông xam la ên a nêb xam kô nôn vac yuac wê xam o vông ilage lêm ge. Yuac wê xomxo mugên vông pyap ge, xam ob la kô nôn vac.”

³⁹Tibii Samelia wê dô vac viğwe tige, he tibeac vông i vin Yesu ên wê vêx tige nêl ên nêbê, “Yesu nêl kiyang wê a vông ilage vihati kitong.” ⁴⁰Mêd tibii Samelia la vô Yesu di la kitaa i nêb i dô hixôn he, om Yesu dô hixôn he tiyi buc yuu, ⁴¹di xomxo tibeac hiwocên ngô kiyang wê Yesu nêl ge om he vông i vin. ⁴²Mêd he nêl vô vêx tyo ên nêbê, “Xe o vông i vin lec ông vyam wê ông nêl ge lêm. Nge, xecxe va ngô i vya om xe xovô ên xe nêbê xomxo ti wê ob hôm xomxo kibun ga vihati lec ge, xomxo tyo tiga vixôhîlôg nôn.”

Yesu vông xomxo levac ti nu vô nivaha lec

⁴³Yesu dô vac viğwe tige buc yuu dêc sea di la Galili. ⁴⁴Yesu vaci nêl ila ên nêbê plopete ti lie vac ici va ben ob kô i lec nivaha lêm. ⁴⁵Mêd Yesu

mila Galili, di tibii Galili hôm i lec nivihia, ên he êno la yê buc ngibua gê Jelusalem om he yê môp vihati wê Yesu vông vô buc tige.

⁴⁶Mêd Yesu lax mi la Kena wê yêp vac vigwe levac Galili ge. Kena ge vigwe wê Yesu pilepac mia tu wain vac ilage. King nu hizap ti dô vac vigwe Kapaneam, léc nu vux ti, yidac vông. ⁴⁷Mêd xomxo levac tyo ngô wê Yesu sea Judia di lam dô Galili ge, om la vô Yesu di la kitaa i ên nêb i loc Kapaneam ên loc vông i nu i vô nivihia lec, ên nu vô kwabo lec wê ob yib ge. ⁴⁸Lêc Yesu nêl vô xomxo levac tyo ên nêbê, “Xam wêên do levac obêc ma ge od xam nêb xam ob vông i vin lêm.” ⁴⁹Mêd xomxo tyo nêl vô i ên nêbê, “Xomxo levac, lam lutibed ên a nug obêc yib.” ⁵⁰Mêgem Yesu nêl vô i ên nêbê, “Ông lôc, ên ông num obêc vô nivihia lec.” Mêd xomxo tyo vông i vin kiyang wê Yesu nêl ge di lax. ⁵¹Mila môp mahigun ti di nue yuac ya val nêl vô i ên nêbê, “Num vô nivihia lec.” ⁵²Mêd xomxo tyo kinêg vô he ên nêbê, “Yidac sea i lec hiyôv manôn tina?” Om he nêl ên nêbê, “Vihevage wê hiyôv kilê ge num ninivi vô ningigooên lec.” ⁵³Mêd ma xovô nêbê hiyôv manôn tige wê Yesu nêl vô i nêbê nu vô nivihia lec ge. Mêgem xomxo tige he vinê nue vihati vông i vin. ⁵⁴Buc wê Yesu sea Judia di lax mi la Galili ge od vông do tiga wê vông yuu ge vac vigwe Galili.

Yesu vông xomxo ti vô nivihia lec vac mia luaên Betesda

5 ¹Buc ya lam la vêl mêd buc levac wê Yuda vông ge ti vô kwabo lec om Yesu la Jelusalem. ²Jelusalem ge, mia luaên ti yêp kwabo vô bwoc sipsip vuayen. Mia luaên tige, Hiblu vya nêbê Betesda, di xumac nipwo vigê vilu le vô mia luaên tige ninya. ³Xomxo yidac tibeac yêp vac xumac tige, ya manôn toc, di ya vixa vô nipaên di ya len vô xêlehe. [Xomxo tige dô bin buc wê mia obêc vô mahilevac ge, ⁴ên buc ya Apumtau vông angela ti lam la vac mia nilô di vông mia vô mahilevac, di xomxo yidac ti obêc la vac mia wê vô mahilevac ge tax ge, od ninivi obêc vô nivihia lec.]

⁵Vux ti yêp vac xumac tige, léc yidac vông i tiyi klismas kehe ti di vigê yuu di vixa vilu di sec yon (38). ⁶Mêd Yesu yê xomxo tige wê diyêp ge di xovô nêbê yidac vông i tiyi klismas tibeac, om kinêg vô i ên nêbê, “Ông nêb ông nimnivi i vô nivihia lec, me?”

⁷Mêd xomxo tyo nêl vô i ên nêbê, “Xomxo levac, vô buc wê mia vô mahilevac ge od a lige wê ob vông a la vac mia ge ti o dô lêm, om a nêb a ob la vac mia lê, léc xomxo le luu a vêl di la vac mia tax.” ⁸Om Yesu nêl vô xomxo tyo ên nêbê, “Kidi lec mi kô ông guhu lec di loc.” ⁹Mêd lutibed xomxo tyo ninivi vô nivihia lec di i kô i guhu lec di la.

Buc tige, buc wê sabat ge, ¹⁰om he Yuda nêl vô xomxo ti wê Yesu vông i vô nivihia lec ge ên nêbê, “Gwêbaga buc sabat, di kiyang yêp bêga nêbê ông ob kilê guhu lec sabat lêm.” ¹¹Lêc xomxo tyo nêl vô he ên nêbê,

“Xomxo ti wê vông a vô nigviha lec ge nêl vô a ên nêbê, ‘Hôm ông guhu lec di loc.’ ” ¹²Om he kinêg vô i ên nêbê, “Xomxo letya wê nêl vô ông ên nêbê ông hôm guhu lec di loc ge?” ¹³Lêc xomxo tyo lungên, ên xomxo tibeac dô vac vigwe tige di Yesu loc mi la vac he mahigun di la.

¹⁴Nang di buc ngwe lêc Yesu mila tulec xomxo tyo vac Anutu xumac ngibua om nêl vô ên nêbê, “Wê lê. Ông nimnivi vô nivihha lec. Om le i lêc vông nipaên ti i tii vac lêm, ên viyin levac mabu obêc val vô ông i luu ilage vêl.” ¹⁵Mêd xomxo tige lax mi la vô he Yuda di nêl ên nêbê, “Xomxo ti wê vông a vô nigviha lec ge Yesu.”

¹⁶Mêgem he Yuda nêb ob vông viyin vô Yesu ên wê vông môt tige lec buc sabat ge. ¹⁷Lêc Yesu nêl vô he ên nêbê, “Mag vông yuac lec buc vihati, di a êno vông yuac bêge.” ¹⁸Mêgem he Yuda yê Yesu xôn ên nêb ob hi i yib, ên wê vông sabat vô nipaên ge, lêc o sabat kiyang tibeac lêm. Nge, Yesu nêl ên nêbê “Anutu ge a mag”, om Yuda yê i tiyi xocbê yong i nêb yuu xôn Anutu tiyima.

Yesu nêl kiyang lec yuac wê ob vông ge

¹⁹Mêgem Yesu nêl vô he Yuda ên nêbê, “A nêl vixôhilôg nôn vô xam bê a Anutu nu, a o tiyi wê a ob vông môt i tiyi xovôên wê aca va vông ge lêm. Nge, môt wê a vông ge a vông vihati tiyi môt wê Mag vông mi a xê ge. Môt wê Mag vông ge, a êno ob vông i tiyi. ²⁰Ên Ma xêyaa vin lec nu tuc om hilung môt vihati wê i vông ge vô i, lêc do levac wê luu môt tige vêl ge, Ma obêc hilung vô nu di i vông om xam obêc yetac mabu ên do wê i vông ge. ²¹Mag vông xomxo kidi lec vac yibên di vông he dô maviha, di nu tuc obêc vông xomxo wê vînoo he ge i dô maviha bêge êno. ²²Di Mag ob yaxên xomxo ti nêl kiyang lêm. Nge, vô vac nu tuc vigê ên nêb i yaxên xomxo vihati nêl kiyang. ²³Ma vông bêge ên nêb xomxo vihati i pimil nu tuc lê i tiyi xocbê he pimil Ma lê ge. Xomxo ti obêc pimil nu lêm ge od tiyi xocbê o pimil Ma wê vông i lam ge lê lêm.

²⁴“A nêl hixôn nôn vô xam bê xomxo wê ngô a kiyang di vông i vin xomxo ti wê vông a lam ge, xomxo tige ob dô maviha luta lêc luta, di he ob tulec myaviwen nipaên ti lêm, ên Anutu xovô pyap nêb ob vô he vêl ên yibên di vông he dô maviha luta lêc luta.

²⁵“A nêl hixôn nôn vô xam bê buc ti obêc val om val gwêba pyap, mêgem xomxo wê dô vac môt mayibên ge he ob ngô Anutu nu vya, di he wê ngô ge ob dô maviha. ²⁶Mag ge maviha kehe, om vông maviha wê i vông ge vô nu tuc. ²⁷Ma vînoo nu tuc pyap ên nêb i yaxên xomxo vihati nêl kiyang, ên i Xomxo Nu. ²⁸Xam o lêc yetac di nga vigêm ên kiyang tiga lêm. Ên buc ti obêc val, di tibii vihati wê yêp vac lôva ge obêc ngô i vya ²⁹di kidi mi lam, om he wê vông môt nivihha ge obêc kidi lec mi dô maviha, di he wê vông nipaên ge obêc kidi lec di kô myaviwen nipaên.”

Yesu nêl i kitong nêb i Anutu nu

³⁰“A o tiyi wê a ob vông môt ti ya xovôên wê aca va vông ge lêm. Nge, a yaxên xomxo nêl kiyang tiyi xocbê kiyang wê a ngô vô Mag ge. Di a

yaxên xomxo nêl kiyang ya môp bôbac, ên a o timu vô piyôp wê a vông ge lêm. Nge, xomxo ti wê vông a lam ge, a timu vô kiyang wê i vông ge.

³¹“Aca va obêc nêl a kehe kitong ge od obêc tiyi lêm. ³²Lêc xomxo ti wê nêl a kehe kitong ge dô, di a xovô ên a nêbê kiyang wê xomxo tige nêl lec a ge kiyang nôn.

³³“Xam Yuda, xam vông xomxo la vô Jon ilage, di Jon nêl kiyang nôn kehe kitong. ³⁴A o xo ên a nêb xomxo kibun ga i nêl a kehe kitong lêm. Lêc a nêb Anutu i vô xam vêl om a nêl kiyang tiga kitong vô xam. ³⁵Jon ge tiyi xocbê ngwax wê linac xêseac vô xam ge, om xam xêmyaa vô nivîha di xam dô vac xêseac wê i vông ge myabo tya. ³⁶Di gwêbaga a lam vông yuac om yuac tige nêl a kehe kitong luu kiyang wê Jon nêl ge vêl. Ên a lam vông yuac wê Mag nêb a vông ge, om yuac tige nêl a kehe kitong nêbê Mag vông a lam. ³⁷Di Mag wê vông a lam ge, nêl a kehe kitong hixôn. Xam o ngô i vya lêm di xam o wê i nôn lêm, ³⁸di kiyang wê i vông ge o yêp vac xam nilôm lêm, ên Mag vông a lam, lêc xam o vông i vin a lêm. ³⁹Kiyang wê yêp vac kipihac xolac ge, xam mi kitong ên xam xo ên xam nêbê maviha kehe luta yêp vac kiyang tige. Di xolac tige wê nêl a kehe kitong, ⁴⁰lêc xam nêb xam ob lam vô a êdêc dô mamviha lêm.

⁴¹“A o lam ên a nêb xomxo i vông lê levac vô a lêm. ⁴²Lêc a xovô ên a nêbê xam xêmyaa o vin lec Anutu lêm. ⁴³A tu Mag manôn mi lam vô xam, lêc xam o kô a lec nivîha lêm. Di xomxo ti obêc lam vô xam lec ici va lê ge od xam kô i lec nivîha. ⁴⁴Xam kô lêm levac vô lime vaci, di lê levac wê Anutu tibed ob vông vô xomxo ge, xam nêb xam ob kô lêm. Om xam obêc vông i vin tibêna? ⁴⁵Xam o lec xo bê a ob vông kiyang vô xam vô Anutu manôn lêm. Xomxo wê ob vông kiyang vô xam ge, Moses ti wê xam vông i vin ên xam nêbê obêc ngidu xam xôn ge. ⁴⁶Xam obêc vông i vin kiyang wê Moses vông ge od xam obêc vông i vin kiyang wê a vông ge hixôn, ên Moses ge wê kivuu kiyang lec a. ⁴⁷Lêc xam o vông i vin kiyang wê Moses kivuu ge lêm, om xam obêc vông i vin kiyang wê a nêl ge tibêna?”

Yesu vet xomxo 5,000

(*Matyu 14:13-21; Mak 6:30-44; Luk 9:10-17*)

6 ¹Yesu nêl kiyang tige vêl di tô mi sox la mia Galili vilu ganê. Mia tige lê ngwe nêbê Taibilias. ²Mêd xomxo tibeac hiwocên timu vô Yesu vixa mi la, ên he yê do levac wê Yesu vông xomxo yidac vô nivîha lec ge. ³Mêd Yesu he nue ngivîhi lec kitôn ti mi la dô lec. ⁴Mêd buc ngibua wê Yuda ob yê Pasova ên xovô buc wê he sea Isip ilage vô kwabo lec. ⁵Lêc Yesu yê xomxo tibeac val om nêl vô Pilip ên nêbê, “Il ob kisuu blet gê na mi vet xomxo tigae ya?” ⁶Yesu xovô môp wê nêb ob vông ge pyap, lêc nêl kiyang tige vô Pilip ên nêb ob yaxên i.

⁷Mêd Pilip nêl vô i ên nêbê, “Il obêc kisuu blet lec mone yul yuu (K200) mi vông nipwo tyatya vô he ge od yaên tige obêc tiyi he vîhati lêm.” ⁸Mêd nue ngivîhi ngwe lê nêbê Andlu, wê Saimon Pita li ge

nêl ên nêbê, ⁹“A xê xomxo nipwo ti wê kô blet vigê vilu di beac yuu, lêc yaên tige o tiyi xomxo tibeac tigae lêm.” ¹⁰Mêd Yesu nêl ên nêbê, “Xam vông xomxo vihati i tô mi dô kibun lê.” Vigwe tige hisinac nivihia dô om he dô kibun lec. Xomxo tigeac tibeac hiwocên om vux vaci tiyi xocbê 5,000.

¹¹He dô kibun pyap mêd Yesu hôm blet tige di kitaa lec mêd titang vô xomxo vihati. Nang dêc vông bêge vô beac hixôn, mêd xomxo vihati ya di i den he. ¹²He ya pyap, mêd Yesu nêl vô nue ngivihî ên nêbê, “Xam vilu myapîpu wê he ya di i dô gee mi tung i dô kidu ti, ên ti i o loc dô sea lêm.” ¹³Mêgem he kituc myapîpu wê xomxo ya di i dô gee mi su vac sepac vigê yuu di tô mi la yuu mi i pup lec.

¹⁴Xomxo tigeac yê do levac wê Yesu vông ge om nêl ên nêbê, “Plopet ti wê he nêb ob lam kibun ge, tyo tiga vixôhilôg nôn.” ¹⁵Mêd Yesu xovô wê he nêb he ob hôm i xôn di vông i tu he nêl king ge, om sea he di ici va lax mi la lec kitôn.

Yesu la lec mia luaên kisii
(*Matyu 14:22-33; Mak 6:45-52*)

¹⁶Vigwe huc di Yesu nue ngivihî lop mi la mia luaên ninya, ¹⁷di lec la lec dipac ti di la, ên nêb ob lax mi la Kapaneam wê yêp mia luaên vilu ganê. Di vigwe buc lêc Yesu o mila vô he decdec lêm. ¹⁸Mêd lea levac ti val om vông mia vô mahilevac xocbê ob kipyax he vac, ¹⁹om he hisoo mia mi la mahigun dia tya tiyi xocbê 5 kilomita ge, lêc he yê wê Yesu lam lec mia kisii mi val kwabo vô dipac ge om he xonamabu. ²⁰Lêc Yesu nêl vô he ên nêbê, “Ga a, om xam xona ên i ma.” ²¹Mêd he nêl vô Yesu ên nêb i lec lam lec dipac, di lutibed dipac mila le kehe vô vigwe ti wê he nêb he ob la ge.

Xomxo tibeac myag Yesu

²²Vigwe vidiiên titige, xomxo tibeac gên dô vô mia luaên ninya vilu ganê di dô bin Yesu, ên he xovô ên he nêbê dipac tibed sea vigwe tige vihevage di la, di Yesu nue ngivihî heche va la lec dipac tige di Yesu o la hixôn he lêm. ²³Mêd dipac mangwe lam gê vigwe Taibilias di lam le vô vigwe ti wê Apumtau Yesu kitaa lec blet mi xomxo ya vihevage. ²⁴Mêd xomxo tigeac yê lêc Yesu he nue ngivihî o dô lêm om he la lec dipac ti di la ên nêb ob la myag Yesu gê Kapaneam.

Yesu ge yaên wê ob vông xomxo dô mavihia

²⁵Xomxo tigeac mila yêvô Yesu gê mia luaên vilu ganê di kinêg vô i ên nêbê, “Xolac kehe, ông lam ga yelacna?” ²⁶Lêc Yesu nêl vô he ên nêbê, “A nêl hixôn nôn vô xam bê xam myag a, lêc xam o xovô do levac wê a vông ge lêc lam myag a lêm. Nge, xam xovô blet wê xam wa i den xam ge om

xam lam myag a. ²⁷Le i léc vông yuac levac ên yaên wê ob vô nipaên ge lêm. Nge, xam vông yuac lec yaên wê xam ob kô di dô mamviha luta ya ge. Yaên tige, a, Xomxo Nu, a obêc vông vô xam, ên Mag Anutu vînoo a pyap ên nêb a vông i yuac.”

²⁸Om he nêl vô i ên nêbê, “Xe ob vông Anutu yuac ga tibêna?” ²⁹Om Yesu luu he vya bêga nêbê, “Yuac wê Anutu vông ge bêga bê xam vông i vin xomxo ti wê Anutu vông i lam ge.”

³⁰⁻³¹Mêd he kinêg vô i ên nêbê, “Om ông ob vông do levac tina ên xe xê di vông i vinê? Ên buge ilage ya yaên mana vac vîgwe mahigun pileva, tiyi xocbê kiyang wê yêp vac xolac bêga nêbê, ‘Ici va vông yaên lag puunê vô he mi he ya.’ Om ông ob vông do levac tibêge, me?” ³²Lêc Yesu nêl vô he ên nêbê, “A nêl vixôhilôg nôn vô xam bê Moses o vông yaên lag puunê vô xam lêm. Nge, Mag vaci wê vông yaên nôn lag puunê vô xam ge.

³³Yaên wê Anutu vông ge, lam gê lag puunê di lam vông xomxo kibun ga dô maviha.” ³⁴Om he nêl vô i ên nêbê, “Xomxo levac, ông vông yaên tige vô xe i tiyi buc vihati ên va.”

³⁵Om Yesu nêl vô he ên nêbê, “Aca va ga, a yaên wê ob vông xomxo dô maviha ge. Xomxo ti obêc lam vô a ge od vip obêc den i tii vac nang lêm, di xomxo ti obêc vông i vin a ge od obêc xo mia ti i tii vac lêm.

³⁶A nêl gwêba vô xam ên a nêbê xam wê a pyap lê, léc xam o vông i vin lêm. ³⁷Xomxo wê Anutu vînoo nêb he i tu axe ge, vihati obêc lam vô a, di xomxo ti obêc val vô a ge, od a obêc tii i lêm. ³⁸Ên a o lop mi lam gê lag puunê ên a nêb a ob vông i tiyi xovôen wê aca va vông ge lêm. Nge, a lam ên a nêb a ob timu vô kiyang wê xomxo ti wê vông a lam ge nêl ge. ³⁹Xomxo ti wê vông a lam ge nêb a o léc sea xomxo wê i vînoo nêb he i tu axe ge ti i dô xel lêm. Nge, nêb a léc tipî vô he vihati i kidi lec vô buc timuên. ⁴⁰Ên Mag nêl kiyang yêp bêga nêbê xomxo wê yê nu tuc di vông i vin ge, he vihati obêc dô maviha luta léc luta, di a obêc tipî vô he kidi lec vô buc timuên.”

⁴¹Mêd he Yuda ngô kiyang wê Yesu nêl ên nêbê, “Aca va yaên wê a lop mi lam gê lag puunê,” om he kunac i di nêl kiyang ni nyagên lec i ⁴²di nêl ên nêbê, “Xomxo tige Yesu wê Josep nu ge, di ta yuu ma il xovô. Bêna léc nêl ên nêbê i lam gê lag puunê?”

⁴³Lêc Yesu nêl vô he ên nêbê, “Le i léc ngaênma lec a lêm. ⁴⁴Ên xomxo ti o tiyi wê ici va ob lam timu vô a ge lêm. Mag wê vông a lam ge obêc didii xomxo ti ge od obêc lam timu vô a, di a obêc tipî vô i kidi lec vô buc timuên. ⁴⁵Kiyang yêp vac kipihac wê plopete kivuu ilage bêga nêbê, ‘Anutu ob tixuu xomxo vihati.’ Om xomxo vihati wê ngô Mag kiyang di kô xovôen vô i ge ob lam vô a. ⁴⁶Ên xomxo ti o yê Mag lec manôn lêm. Nge, a wê a lam vô Anutu ge a tibed wê a xê i. ⁴⁷A nêl hixôn nôn vô xam bê xomxo wê vông i vin ge obêc dô maviha luta léc luta. ⁴⁸A ga, yaên wê ob vông xomxo dô maviha luta. ⁴⁹Bume ilage wê ya yaên mana vac vîgwe

mahigun pileva ilage, he ya léc yib. ⁵⁰Léc yaên wê lam gê lag puunê ge, xomxo ti obêc ya ge od ob yib lêm. ⁵¹A ga yaên maviha wê a lop mi lam gê lag puunê. Om xomxo ti obêc ya yaên tiga ge od ob dô maviha luta léc luta. Yaên wê a ob vông vô i ge, aca va liyôhô wê a ob vông, ên xomxo kibun ga i dô maviha.”

⁵²Mêgem Yuda ngaênma lec kiyang tige di nêl vông ên nêbê, “Xomxo tige obêc vông i liyôhô mi il xa tibêna?”

⁵³Om Yesu nêl vô he ên nêbê, “A nêl hixôn nôn vô xam bêga bê xam obêc wa a, Xomxo Nu, liyôhô di num a hi lêm ge od xam ob dô mamviha lêm. ⁵⁴Xomxo wê ya a liyôhô di num a hi ge, he ob dô maviha luta léc luta, di a obêc tipi vô he kidi lec maviha vô buc timuên. ⁵⁵Ên a liyôhô tu yaên nôn, di a hi tu mia numên nôn. ⁵⁶Xomxo wê ya a liyôhô di num a hi ge, he ob dô vac a nilôg di a ob dô vac he nilô. ⁵⁷Mag maviha vông a lam, di a dô magviha ya xêkizêc wê Mag vông ge. Om xomxo ti obêc ya a ge, od ob dô maviha ya xêkizêc wê a vông ge. ⁵⁸Tiga, yaên wê lam gê lag puunê ge, léc o tiyi xocbê yaên wê bume ya ila ila léc yib ge lêm. Nge, yaên tiga wê xomxo obêc ya ge od ob dô maviha luta léc luta.” ⁵⁹Yesu nêl kiyang tige vô xomxo vac Yuda xumac lilo gê Kapaneam.

Yesu ge kiyang maviha dôên kehe

⁶⁰Xomxo wê mi la hixôn Yesu gee he tibeac ngô kiyang tige wê Yesu nêl ge, om he nêl ên nêbê, “Kiyang tiga viyin levac, om letya tiyi wê ob ngô ge?” ⁶¹Yesu xovô wê he nêl kiyang tibeac tibeac lec tige om nêl vô he ên nêbê, “Kiyang tige juda xam, me? ⁶²Xam obêc wê Xomxo Nu lax mi la vac vigwe ti wê dô vac ilage ge od xam obêc xo bêna? ⁶³Myakilôhô Ngibua tibed wê ob vông xomxo dô maviha, di xêkizêc wê xomxo vông ge ti o tiyi lêm. Kiyang wê a nêl vô xam ga ge, a nêl lec Myakilôhô Ngibua wê ob vông xomxo dô maviha ge. ⁶⁴Léc xam ya o vông i vin lêm.” Yesu nêl bêge, ên ilage Yesu xovô xomxo wê vông vinên obêc ma ge, di xovô xomxo tya wê ob vông i vac tibii vevac vigê ge pyap. ⁶⁵Mêd Yesu nêl ên nêbê, “Kiyang yêp bêge, om a nêl gwêba vô xam ên a nêbê xomxo ti o tiyi wê ici va ob lam timu vô a ge lêm. Mag obêc vông xêkizêc vô i ge od obêc lam vô a.”

⁶⁶Yesu nêl kiyang tige pyap mêd xomxo wê mi dô hixôn i ge tibeac sea i di o dô hixôn i tii vac nang lêm. ⁶⁷Om Yesu kinêg vô nue ngivihi vigê yuu di tô mi la yuu ên nêbê, “Di xacxam va ob sea a êno di la mê?” ⁶⁸Léc Saimon Pita nêl vô i ên nêbê, “Apumtau, xe ob la vô letya? Ên kiyang wê ông vông ge wê ob vông xomxo dô maviha luta léc luta. ⁶⁹Om xe vông i vin di xovô ên xe nêbê ông ge xomxo ngibua wê Anutu vông ông lam ge.”

⁷⁰Mêd Yesu nêl vô he ên nêbê, “A vinoo xam vigê yuu di tô mi la yuu, lêcom xam ti tu Seten xe.” ⁷¹Yesu nêl kiyang tige lec Judas wê Saimon Iskaliot nu ge. Ên Judas ge he vigê yuu di tô mi la yuu ge ti, wê ob nêl Yesu kitong vô tibii vevac ge.

Yesu lie o vông i vin i lêm

7 ¹Pyap dêc Yesu la vilee vac vigwe levac Galili. Ên he Yuda wê dô Judia ge nêb ob hi Yesu i yib om Yesu nêb ob la vilee vac vigwe Judia lêm. ²Mêd Yuda buc ngibua ti wê he nêb ob xovô buc wê xumac sel ge vô kwabo lec, ³om Yesu lie so vya vô i ên nêbê, “Sea vigwe ga di loc Judia, ên nume i yê yuac wê ông mi vông ge hixôn. ⁴Ên xomxo ti obêc nêb xomxo i xovô i ge od ob vông yuac xôpacên lêm. Om yuac wê ông mi vông ge, ông loc vông vô he manôn ên he tibeac i yê di xovô.” ⁵He ge Yesu lie, lêc he o vông i vin i lêm om he nêl kiyang tibêge. ⁶Mêd Yesu nêl vô he ên nêbê, “A buc gên o vô kwabo lec lêm, dom xam ge, xam tiyi wê xam ob la tiyi buc vihati ge. ⁷Xomxo kibun ga xêyaa ob vô myavinê vô xam lêm. Lêc he xêyaa vô myavinê vô a ên wê a nêl he nêl nipaên kitong ge. ⁸Om xaxam va loc wê buc ngibua tige, ên a ob loc hixôn xam lêm, ên buc wê a vông ge gên o vô kwabo lec lêm.” ⁹Yesu nêl kiyang bêge vô he di dô Galili.

Yesu la yê buc levac gê Jerusalem

¹⁰Yesu lie la mug mi la yê buc levac, di Yesu vaci timu vô he vixa. Lêc o la seac vô xomxo manôn lêm. Nge, xôpac ên he mi la. ¹¹Lêc he Yuda myag Yesu vô buc tige om he kinêg ên nêbê, “Xomxo tyo dô tina?” ¹²Xomxo wê dô gee he keac kiyang tibeac lec Yesu, om he ya nêl ên nêbê, “Ge xomxo nivihia ti,” di he ya nêl ên nêbê, “O xomxo nivihia lêm, ên mi kityoo xomxo.” ¹³Lêc xomxo ti o nêl kiyang tige seac mi xomxo tibeac ngô lêm, ên he xona ên Yuda levac.

¹⁴Mila vô buc levac tige mahigun di Yesu la vac Anutu xumac ngibua di la nêl xolac vô xomxo. ¹⁵He Yuda levac wê dô gee ngô Yesu kiyang di yetac mabu om nêl ên nêbê, “Xomxo tige xovô xolac tige tibêna? Ên xomxo ti o tixuu i lêm.” ¹⁶Lêc Yesu luu he vya ên nêbê, “Kiyang wê a nêl ga, o a kiyang lêm. Nge, xomxo ti wê vông a lam ge, i kiyang. ¹⁷Xomxo ti obêc xovô nêb ob timu vô kiyang wê Anutu vông ge od ob xovô kiyang wê a nêl ga kehe bê a nêl Anutu kiyang me a nêl aca va kiyang. ¹⁸Ên xomxo ti obêc nêl ici va kiyang ge od xovô nêb ob vông ici va lê i vô levac. Lêc xomxo ti obêc vông xomxo ti wê vông i lam ge lê i vô levac ge od i xomxo kiyang nôn di kiyang kityooên ti o yêp vac i nilô lêm.

¹⁹“Moses vông xolac vô xam ilage, lêc xam ti o timu vô xolac vihati lêm. Bêna lêc xam nêb xam ob hi a xibê?” ²⁰Mêd xomxo tige nêl vô i ên nêbê, “Letya nêb ob hi ôngê? Mêd vimwo nipaên ti dô vac ông nilôm om ông nêl kiyang tibêge.” ²¹Lêc Yesu nêl vô he ên nêbê, “Xam nga vigêm ên do levac tibeac wê a vông lec sabbat mi xam wê ge. ²²Om xam ngô lê. Moses nêl vô bume ilage ên nêb he i gôl nue vux ninivi. Vixôhilôg, môp tige kehe o yêp vô Moses lêm. Nge, yêp vô tivame vaci. Lêc xam mi gôl

nume ninivi lec sabat. ²³Xam nêb xam ob timu vô Moses xolac om xam mi gôl nume ninivi lec sabat. Bêna lêc xam kunac a ên wê a vông xomxo ti ninivi vô nivihâ lec vô sabat ge? ²⁴Le i lêc yaxên xomxo nêb kiyang vaxvax lêm. Nge, xam hivip kiyang kehe lec di titô i yêp bôbac.”

Xomxo kinêg nêb ob xovô Yesu kehe

²⁵Xomxo Jelusalem ya kinêg ên nêbê, “Xomxo ti wê he Yuda levac nêb ob hi i yib ge, tyo tiganê, me? ²⁶Wê lê. Xomxo tyo nêl kiyang seac vac xomxo mahigun lê, lêc xomxo levac o nêl kiyang ti vô i lêm. Mêd he xo ên he nêb ge Kilisi tyo, me? ²⁷Lêc xomxo tyo, il xovô i ben kehe, di Kilisi wê ob val ge, il ob xovô ben kehe wê ob val vac ge lêm.”

²⁸Om Yesu nêl xolac vac Anutu xumac ngibua di keac levac hixôn ên nêbê, “Xam nêb xam xovô a, di xam xovô a bog kehe hixôn, me? Ên a o lam ya xovôên wê a vông ge lêm. Xomxo ti wê vông a lam ge, i xomxo kiyang nôn. Xam ge xam lungên i, ²⁹di a ga, a xovô i pyap, ên a dô hixôn i di i vông a lam.” ³⁰Mêgem xomxo tigege nêb ob hôm Yesu xôn, lêc Yesu buc gên o vô kwabo lec lêm, om xomxo ti o tiyi wê ob hôm vigê lec i ge lêm. ³¹Lêcom xomxo tibeac vông i vin nêbê Yesu ge Kilisi om he nêl ên nêbê, “Il nêd Kilisi obêc val ge od ob vông do levac luu do levac wê Yesu vông ge vêl lêm. Om Yesu ge Kilisi tyo mê.”

He vông xêhipu la vô Yesu ên nêb he i loc hôm i xôn

³²He Palisi ngô wê xomxo nêl kiyang tibêge lec Yesu ge, om xomxo levac wê mi si daa gee hixôn he Palisi, he vông xêhipu ya la vô Yesu ên nêb he i loc hôm Yesu xôn. ³³Lêc Yesu nêl vô he ên nêbê, “A ob dô hixôn xam myabo tya, di a obêc lax mi la vô xomxo ti wê vông a lam ge. ³⁴Xam obêc myag a, lêc xam wêvôên a obêc ma, di vigwe wê a ob la dô vac ge, xam ti ob la vac lêm.” ³⁵Mêd he Yuda levac nêl vôma ên nêbê, “Xomxo tyo nêb ob la na, lêc il xêên obêc ma? Mêd ob la vô Yuda wê la dô Glik ben ge ên nêl xolac vô he Glik, me? ³⁶Xomxo tyo nêl ên nêbê il ob myag i, lêc il xêvôên obêc ma, di vigwe wê ob la dô vac ge, il ob la vac lêm. Om kiyang tige kehe tibêna?”

Kiyang lec mia maviha

³⁷Buc levac tigege mîla vô myahipu wê ob tiyôd vac ge di buc tige buc levac wê luu baba vêl ge, om Yesu kidi lec vac he mahigun di keac vya levac ên nêbê, “Xomxo ti obêc nêb num mia ge, od i lam vô a lê, ên a obêc vông mia mi i num. ³⁸Tiyi xocbê kiyang wê yêp vac xolac bêga nêbê, ‘Xomxo ti obêc vông i vin a ge od mia maviha obêc lam vac i nilô di lop mi la.’ ” ³⁹Yesu nêl kiyang tige lec Myakilôhô Ngibua wê ob val vô he wê vông i vin Yesu ge. Lêc buc wê Yesu nêl kiyang tige, Myakilôhô Ngibua valên gên ma, ên Yesu gên o lax mi la dô vac xêseac lag puunê lêm.

Xomxo hibû he la yuu lec Yesu

⁴⁰Xomxo ngô kiyang tige di ya nêl ên nêbê, “Xomxo tiga, plopet ti wê il dô bin ge vixôhilôg.” ⁴¹Di he ya nêl ên nêbê, “Ge Kîlisi.” Lêc he ya nêl ên nêbê, “Kîlisi ob lam gê Galili lêm.” ⁴²Ên kiyang yêp vac xolac bêga nêbê Kîlisi kehe yêp vac Devit om obêc lam gê Betlehem vac Devit ben.” ⁴³Mêgem xomxo tigeê hibû he la yuu lec Yesu, ⁴⁴di he ya nêb ob hôm i xôn, lêc xomxo ti o hôm vigê lec i lêm.

Xomxo levac wê Yuda vông ge o vông i vin Yesu lêm

⁴⁵Mêd xêhipue lax mi la vô xomxo levac wê mi si daa gee hixôn he Palisi, di he kinêg vô xêhipue ên nêbê, “Bêna lêc xam o kô i mi lamê?” ⁴⁶Lêc xêhipue nêl vô he ên nêbê, “Kiyang wê xomxo tyo mi nêl ge, xomxo ti o nêl kiyang tibêge ila lêm.” ⁴⁷Om he Palisi nêl vô he ên nêbê, “Xomxo ge kityoo xam êno. ⁴⁸Xomxo levac gae hixôn xe Palisi, xe ti o vông i vin xomxo tyo lêm. Ma vêl. ⁴⁹Di xomxo tibeac wê ngô Yesu vya ge, he o vyac xovô Moses xolac lêm, om he vô nipaên pyap.”

⁵⁰Lêc Palisi ti lê nêbê Nikodimas wê la vô Yesu ilage dô hixôn he, om nêl vô lie Palisi ên nêbê, ⁵¹“O tîyi wê il ob vông kiyang vô xomxo ti vaxvax ge lêm. Ên xolac wê il vông ge nêl ên nêbê il ob ngô xomxo nêl kiyang mi xovô môp wê i vông ge pyap tax lê.” ⁵²Lêc he so vya vô i ên nêbê, “Ông ge tibii Galili ti om ông ngidu i xônê? Ông obêc kitong xolac wê yêp vac kipihac ge od ông ob xovô bê plopet ti ob lam gê Galili lêm.” ⁵³[Pyap dêc he vihati sea di toto ge la ben.

He kô vêx yôdac ti mi la vô Yesu

8 ¹Mêd Yesu lec mi la lec kitôn Oliv, ²di vigwe vidiiên titige lax mi la vac Anutu xumac ngîbua. Mêd xomxo tibeac kituc la vô i om Yesu dô di vông xolac vô he. ³Mêd xomxo wê xovô Moses xolac gee hixôn he Palisi, he yê vêx ti wê vông yôdac ge om kô vêx tyo mi la lax vac he mahigun. ⁴Mêd he nêl vô Yesu ên nêbê, “Xolac kehe, vêx tiga vông môp yôdac mi xe xê. ⁵Moses nêl vac xolac ên nêbê vêx tibêga, xomxo ob hi ya ngidax ên i yib. Om ông ob nêl bêna lec i?” ⁶He nêl bêge, nêb ob yaxên Yesu bêc obêc nêl kiyang ti so ge od he ob vông kiyang vô i. Lêc Yesu yu kwa vac di so kibun ya vigê liyihî.

⁷Mêd he kinêg tii vac vac vô Yesu, om Yesu kidi mi le kisii di nêl vô he ên nêbê, “Xomxo ti vac xam mahigun wê xovô nêb nipaên ti o yêp vô i lêm ge od i hôm ngidax mi nêx vêx tiga ya taxlee.” ⁸Mêd Yesu yu kwa vac di so kibun tii vac. ⁹Xomxo tigeê ngô kiyang wê Yesu nêl ge di xovô nêl nipaên om ti ti le lop mi la vixun. He levac la mug di he ba lop mi timu vô he vixa, di Yesu vaci hixôn vêx tyo wê yuu xeedô. ¹⁰Mêd Yesu kidi mi le kisii di nêl vô vêx tyo ên nêbê, “Vêx, xomxo tigae la na? Ti

dô wê ob vông kiyang vô ông ge, me?” ¹¹Lêc vêx tyo nêl vô i ên nêbê, “Xomxo levac, ti dôên ma.” Om Yesu nêl vô i ên nêbê, “Om a êno, a ob vông kiyang vô ông lêm. Ông loc, di le i lêc vông nipaên ti i tii vac lêm.”]

Yesu ge xêseac wê ob linac vô xomxo gê kibun

¹²Yesu nêl vô xomxo tige tii vac ên nêbê, “A xêseac wê linac lec kibun. Xomxo ti obêc timu vô a ge, od ob la vac mapitoc lêm. Nge, ob dô vac xêseac wê ob vông i vô paha lec di vông i dô maviha ge.” ¹³Om Palisi nêl vô i ên nêbê, “Ôông va nêl ông kehe kitong om kiyang wê ông nêl ge o tiyi lêm.” ¹⁴Mêlêc Yesu nêl vô he ên nêbê, “Vixôhilôg, aca va nêl a kehe kitong, lêc kiyang wê a nêl ga, ge kiyang nô, ên a xovô vigwe kehe wê a lam vac ge, di a xovô vigwe wê a ob lax mi la vac ge. Di xam ge, xam o xovô a bog kehe wê a lam vac ge lêm, di xam o xovô vigwe ti wê a ob lax vac ge lêm. ¹⁵Xam yaxên xomxo nêl kiyang ya xovôên wê xacxam vông ge, di a ga, a o yaxên xomxo ti nêl kiyang lêm. ¹⁶Lêc a obêc nêl yaxên xomxo ti nêl kiyang ge od a ob yaxên i nêl kiyang ya môp bôbac, ên o aca va wê a ob yaxên xomxo nêl kiyang ge lêm. Nge, Mag wê vông a lam ge dô hixôn a. ¹⁷Kiyang ti yêp vac xolac wê xam vông ge bêga nêbê xomxo yuu obêc nêl kiyang tiyima lec kiyang tived ge od kiyang wê yuu nêl ge kiyang nô. ¹⁸A nêl a kehe kitong di Mag wê vông a lam ge nêl a kehe kitong hixôn.”

¹⁹Mêd he kinêg vô Yesu ên nêbê, “Mam dô gê na?” Lêc Yesu nêl vô he ên nêbê, “Xam lungên a di xam lungên Mag êno. Xam obêc xovô a ge od xam obêc xovô Mag hixôn.” ²⁰Yesu nêl xolac vô xomxo vac Anutu xumac ngibua, vac nilô ti wê he tung mone daa vac ge, om nêl kiyang tige hixôn vô he. Lêc xomxo ti o hôm i xôn lêm, ên buc wê i vông ge o vô kwabo lec lêm.

Yesu nêb ob lax kisii

²¹Nang dêc Yesu nêl tii vac vô he ên nêbê, “A ob sea xam di la, di xam obêc myag a, lêc xam obêc wib hixôn nêl nipaên, ên vigwe wê a ob la vac ge xam obêc la vac lêm.” ²²Mêgem he Yuda nêl vôma ên nêbê, “Xomxo tige nêl ên nêb il ob la vac vigwe wê ob la dô vac ge lêm. Mêd ici va obêc hi i yib, me?” ²³Mêd Yesu nêl vô he ên nêbê, “Xam ge kibun, di a ga kisii ganê. Xam xomxo kibun, di a ga, a o xomxo kibun lêm. ²⁴Kiyang bêge om a nêl vô xam gwêba ên a nêbê xam obêc wib hixôn nêl nipaên. Ên xam obêc vông i vin bê a Anutu nu lêm ge, od xam obêc wib hixôn nêl nipaên.”

²⁵Om he kinêg vô Yesu ên nêbê, “Ông letya?” Lêc Yesu nêl vô he ên nêbê, “Bêna lêc a ob nêl kiyang tii vac vac vô xamê? A ga, xomxo ti wê a nêl vô xam ilage. ²⁶A kiyang wê a ob nêl vô xam di yaxên xam ge tibeac yêp. Lêc xomxo ti wê vông a lam ge, i kiyang nô om kiyang wê a ngô vô i ge, a nêl kitong vô xomxo kibun ga.”

²⁷Kiyang wê Yesu nêl vô he ge, he o xovô bê Yesu nêl lec Ma Anutu lêm, ²⁸om Yesu nêl vô he ên nêbê, “Buc wê xam obêc hi Xomxo Nu lec xax ge od xam obêc xovô bê a Anutu nu mê, di xam obêc xovô bê yuac wê a vông ge a o vông ya xovôên wê aca vông ge lêm. Nge, a nêl kiyang tiyi kiyang wê Mag vông vô a ge. ²⁹Mag wê vông a lam ge dô hixôn a di o sea a dô tamaên lêm, ên a vông yuac wê Mag ob yê nivîha ge tiyi buc vihati.” ³⁰Yesu nêl kiyang tige om xomxo tibeac vông i vin i.

Kiyang nôn obêc piwelac il vêl ên nipaên

³¹Yesu nêl vô xomxo Yuda wê vông i vin i ge ên nêbê, “Xam obêc hôm a kiyang xôn pilihi mi dô vac ge od xam tu a nuge vông vinên nôn. ³²Xam obêc xovô kiyang nôn, di kiyang nôn obêc piwelac xam vêl di xam dô nimviha.” ³³Lêc he nêl vô Yesu ên nêbê, “Xe ga Eblaham bue, om xe o la vac xomxo ti kwa ngîbi ila mi tu he nue yuac lêm. Lêc bêna lêc ông nêl ên ông nêbê kiyang tige obêc piwelac xe vêl ên tibii levac wê viac xe ge?”

³⁴Om Yesu nêl vô he ên nêbê, “A nêl hixôn nôn vô xam bê xomxo vihati wê dô vac nipaên ge, he tu nipaên tige nue yuac pyap. ³⁵Di nue yuac ti o tiyi wê ob dô vac xumac luta ge lêm. Nge, xomxo levac nu vaci wê ob dô vac luta. ³⁶Om Anutu nu obêc piwelac xam vêl ge, od xam obêc dô nimviha nôn di nipaên ti ob pitii lec xam lêm. ³⁷A xovô ên a nêbê xam ge Eblaham bue, lêcom xam nêb xam ob hi a xib, ên kiyang wê a vông ge o yêp vac xam nilôm lêm. ³⁸Kiyang wê a nêl ge a nêl i tiyi wê a xê vô Mag ge, di xam ge, xam vông i tiyi wê xam ngô vô mam ge.”

³⁹Mêd he nêl vô Yesu ên nêbê, “Xe mag Eblaham.” Lêc Yesu nêl vô he ên nêbê, “Xam obêc Eblaham nue nôn ge od xam obêc vông môp i tiyi wê Eblaham vông ge. Lêc xam o vông môp tiyi wê Eblaham vông ge lêm. ⁴⁰A nêl kiyang nôn wê a ngô vô Anutu ge vô xam, lêc xam nêb xam ob hi a xib. Môp wê Eblaham vông ge ti o yêp bêge lêm. ⁴¹Xam vông môp tiyi xocbê mam mi vông ge.” Mêd he nêl vô Yesu ên nêbê, “Xe o tiyi xocbê nipwo wê ta kô vax di ma ma ge lêm. Xe mag Anutu tibed wê dô ge.” ⁴²Lêc Yesu nêl vô he ên nêbê, “Anutu obêc xam mam vixôhilôg nôn ge od xam xemyaa obêc vin lec a, ên a dô hixôn Anutu lêc lam. Di a o lam i tiyi xovôên wê a vông ge lêm. Nge, Anutu vông a lam. ⁴³Xam o xovô kiyang wê a nêl ga lêm, kehe bêga nêbê xam nêb xam ob ngô a vyag lêm.

⁴⁴“Xam mam ge Seten, om kiyang wê yêp vac mam nilô ge, xam nêb xam ob timu vô mi vông i vô nôn lec. Buc taxlee ilage Seten mi hi xomxo yib di o dô vac kiyang nôn lêm, ên kiyang nôn ti o yêp vac i nilô lêm. Di kiyang wê mi nêl ge, nêl i tiyi kiyang kityooên wê yêp vô i ge, ên i xomxo kityooên wê tu kiyang kityooên kehe. ⁴⁵Di a ga, a lam nêl kiyang nôn om xam nêb xam ob vông i vin kiyang wê a nêl ge lêm. ⁴⁶Xam letya tiyi wê xam ob nêl a nêg nipaên seac ge? A nêl kiyang nôn lê, lêc bêna lêc xam o vông i vin a lêmê? ⁴⁷Anutu nue ob ngô kiyang wê Anutu nêl ge. Lêc xam o Anutu nue lêm, om xam o ngô i vya lêm.”

Yesu luu Eblaham vël

⁴⁸He Yuda luu Yesu vya ên nêbê, “Xe nêl vixôhilôg nôn ên xe nêbê ông tibii Samelia wê vimwo nipaên dô vac ông nilôm ge.” ⁴⁹Lêc Yesu nêl ên nêbê, “Vimwo nipaên ti o dô vac a nilôg lêm. A vông Mag lê vô levac, lêc xam vông a lêg tô sea. ⁵⁰A o nêb a ob vông a lêg i vô levac lêm, lêc xomxo ti dô wê ob vông a lêg i vô levac, di xomxo tige wê ob yaxên xomxo nêl kiyang. ⁵¹A nêl hixôn nôn vô xam bê xomxo ti obêc timu vô kiyang wê a vông ge od xomxo tige yibên obêc ma vël.”

⁵²Mêgem Yuda tige nêl vô Yesu ên nêbê, “Om gwêbaga xe xovô ên xe nêbê vimwo nipaên ti dô vac ông nilôm. Ên Eblaham hixôn plopete ilage, he yib mi la vël, lêc ông nêl ên ông nêbê xomxo ti obêc timu vô kiyang wê ông vông ge od obêc yib gê kibun ga lêm. ⁵³Mêd ông nginoo il bug Eblaham vël, me? Ên Eblaham yib di plopete êno yib. Di ông nêb ông ob vông ông tiyi letya?”

⁵⁴Mêd Yesu nêl vô he ên nêbê, “Aca va obêc pimil a lêg ge od obêc tiyi xocbê kiyang pileva, lêc xomxo ti wê pimil a lêg ge, Mag vaci, wê xam mi nêl ên xam nêbê xam Anutu. ⁵⁵Lêc xam o xovô i lêm. Di a ga, a xovô i. A obêc nêl bê a lungên Mag ge od a obêc xomxo kityooên tiyi xocbê xam ge. Lêc a xovô i pyap om a timu vô kiyang vihati wê i vông ge.

⁵⁶“Ilage bum Eblaham xêyaa vô nivihia ên nêb ob yê buc wê a vông ge, om yê buc tige di xêyaa vô nivihia.” ⁵⁷Lêc he Yuda nêl vô Yesu ên nêbê, “Klismas wê ông vông ge gên o mila vô kehe yuu di vigê yuu (50) lêm, lêc bêna lêc ông nêb ông wê Eblahamê?” ⁵⁸Mêd Yesu nêl vô he ên nêbê, “A nêl hixôn nôn vô xam bê buc wê Eblaham gên ma ge od a dô tax.” ⁵⁹He ngô Yesu kiyang tige om he hôm ngidax ên nêb ob nêx Yesu, lêc Yesu xôpac ên he di sea Anutu xumac ngibua di la vixun.

Yesu vông xomxo ma tocên ti vô nivihia lec

9 ¹Yesu mila, lêc yê xomxo ti wê yubac hixôn ma tocên ge. ²Mêd Yesu nue ngivihii kinêg vô Yesu ên nêbê, “Xolac kehe, letya vông nipaên lêc xomxo tige yubac hixôn ma tocên? Xomxo tige vaci vông nipaên, me ta yuu ma?” ³Lêc Yesu nêl vô he ên nêbê, “Ge o ici va nêl nipaên, me ta yuu ma nêl nipaên wê vông i manôn toc ge lêm. Xomxo tige dô hixôn ma tocên ên Anutu nêb ob hilung xêkizêc wê i vông ge i yêp seac lec xomxo tige. ⁴Xomxo ti wê vông a lam ge, il ob vông yuac wê i vông ge vô vidiiên xêseac, ên mapitoc obêc val di a xib ge od xomxo ti o tiyi wê ob vông yuac ge lêm. ⁵Buc wê a dô kibun ga ge, od xêseac wê a vông ge linac vô xomxo gê kibun.” ⁶Yesu nêl bêge di pisuv myaluc lec kibun di pilepac i vô niluc di lipac vô xomxo matocên tyo manôn, ⁷di nêl vô i ên nêbê, “Loc lipac mamnôn vac mia luaên Siloam.” Lê Siloam ge kehe bêga nêbê vông i la. Om xomxo tyo la lipac manôn di manôn seac di i lax mi la ben.

⁸Mêd xomxo tige lie viyangtôv hixôn xomxo wê yê wê mi kitaa mone vô xomxo ge, he nêl vôma ên nêbê, “Xomxo ti wê mi dô di kitaa mone vô xomxo ge, ge mêd xomxo tyo tige mê, me?” ⁹Mêd he ya nêl ên nêbê, “Ge xomxo tyo tige mê.” Lêc he ya nêl ên nêbê, “Ge o xomxo tyo lêm. Ge xomxo wê yuu manôn tiyima ge ngwe.” Om xomxo tyo nêl vô he ên nêbê, “A ga mê.” ¹⁰Om he kinêg vô i ên nêbê, “Vatya vông ông mamnôn vô nivihalecê?” ¹¹Mêd xomxo tyo nêl vô he ên nêbê, “Xomxo ti lê nêbê Yesu ge pilepac myaluc hixôn kibun di lipac lec a magnôn di nêl vô a ên nêbê a la lipac magnôn vac mia luaên Siloam. Om a la lipac di a magnôn vô nivihalec di a xê vigwe.” ¹²Om he kinêg vô i ên nêbê, “Xomxo tyo dô gê na?” Lêc xomxo tyo nêl ên nêbê, “A lungên.”

¹³Mêgem he kô xomxo ma tocên tyo mi la vô he Palisi. ¹⁴Buc wê Yesu pilepac kibun vô nubuluc di vông xomxo tyo manôn vô nivihalec ge, buc sabat, ¹⁵om he Palisi kinêg vô xomxo tyo tii vac ên nêbê, “Vatya vông ông mamnôn vô nivihalecê?” Om xomxo tyo nêl vô he ên nêbê, “Xomxo tige lipac kibun nubuluc lec a magnôn di a la lipac, lêc a magnôn seac.” ¹⁶Mêd Palisi ya nêl ên nêbê, “Xomxo tige Anutu o vông i lam lêm, ên o timu vô môp wê sabat ge lêm.” Lêc he ya nêl ên nêbê, “Xomxo tige obêc xomxo nipaên ge od o tiyi wê ob vông do levac tibêge lêm.” Om he hibuma di le kidu yuu.

¹⁷Mêgem Palisi la kinêg vô xomxo tyo tii vac nang ên nêbê, “Xomxo ti wê vông mamnôn vô nivihalec ge, ông nêbê vatya lec i?” Mêd xomxo tyo nêl ên nêbê, “Ge plopete ti.”

¹⁸He Yuda o vông i vin bê xomxo tige manôn toc ila lêc vô nivihalec lêm, om he keac xomxo tyo ta yuu ma lam ¹⁹di kinêg vô yuu ên nêbê, “Muu num tiga wê muu nêb yubac hixôn ma tocên mê? Vatya vông manôn seac mi i yê vigwe?” ²⁰Om ta yuu ma nêl ên nêbê, “Xii xovô ên xii nêbê ga xii nug wê yubac hixôn ma tocên ge. ²¹Lêc môp wê manôn seac di i yê vigwe ge, xii lungên, di xii o xovô xomxo ti wê vông i manôn seac ge lêm. Xam loc kinêg vô ici va, ên vô levac pyap tiyi wê ob nêl kiyang kitong vô xam ge.”

²²Ta yuu ma nêl kiyang bêge, ên yuu xona ên he Yuda levac. Ên he Yuda hilu kiyang pyap ên nêbê xomxo ti obêc nêl Yesu kitong bê i Kilisi ge od he ob tii i vêl ên xumac lilo di i loc dô ninya. ²³He Yuda nêl bêge om xomxo tige ta yuu ma nêl ên nêbê, “Vô levac pyap om xam kinêg vô ici va.” ²⁴Om he Palisi keac xomxo ti wê manôn toc ilage lôm tii vac nang di nêl vô i ên nêbê, “Ông pimil Anutu môci lê. Ên xe xovô ên xe nêbê xomxo tige nipaên.” ²⁵Lêc xomxo tyo nêl vô he ên nêbê, “A lungên, xomxo tige nivihalec me nipaên. Di a xovô tibed bêga bê ilage a magnôn toc lêc gwêbaga a magnôn seac.”

²⁶Mêd he kinêg vô i ên nêbê, “Xomxo tige vô va vô ông lêc ông mamnôn seacê?” ²⁷Lêc xomxo tyo ni nyag vô he om nêl ên nêbê, “A nêl

vô xam lê, léc xam o ngô lêm. Bêna léc xam nêb a nêl i tii vacê? Mêd xam êno, xam nêb xam ob tu i nue hixônê?”²⁸ Mêd he nêl kiyang nipaên lec i ên nêbê, “Ông ge, ông tu xomxo tige nu ti, di xe ga, xe tu Moses nue.²⁹ Xe xovô ên xe nêbê Anutu nêl kiyang vô Moses, léc xomxo tige, xe o xovô bê lam gê na?”

³⁰Mêd xomxo tyo nêl vô he ên nêbê, “Kiyang tige obêc kehe tibêna? Ên xam nêl ên xam nêbê xam o xovô xomxo tige ben kehe lêm, léc xomxo tige vông a magnôn seac.³¹ Il xovô ên il nêbê xomxo wê vông môp nipaên ge, Anutu ob ngô he vya lêm. Léc xomxo ti obêc kitaa vô Anutu di timu vô kiyang wê i vông ge od Anutu ob ngô i vya.³² Buc taxlee ilage di i val tyip lec gwêbaga, il o ngô kiyang lec xomxo ti wê yubac hixôn ma tocên léc xomxo ngwe vông i manôn seac ge lêm.³³ Anutu obêc vông xomxo tige lam lêm ge od o tiyi wê ob vông môp tibêge lêm.”³⁴ Mêd he Palisi nêl vô xomxo tyo ên nêbê, “Tam kô ông hixôn nipaên, léc ông nêb ông ob nêl kiyang vô xe?” Mêd he tii i la ninya.

He Palisi nilô vô mapitoc

³⁵Yesu ngô wê he tii xomxo tige la ninya ge om tulec i di kinêg vô i ên nêbê, “Ông vông i vin Xomxo Nu, me?”³⁶ Léc xomxo tyo nêl ên nêbê, “Xomxo levac, Xomxo Nu ge letya? Ông nêl kitong vô a ên a vông i vin i.”³⁷ Om Yesu nêl vô i ên nêbê, “Ông wê i pyap, ên xomxo tyo, a ga wê a keac vô ông mê.”³⁸ Mêgem xomxo tyo nêl ên nêbê, “Apumtau, a vông i vin.” Mêd yev vixa kitu vô Yesu di pimil i.

³⁹Mêd Yesu nêl ên nêbê, “A lam kibun ên a nêb a ob yaxên xomxo nilô, ên xomxo wê manôn toc di he lungên a ge he manôn i seac di he wê manôn seac ge he manôn i toc.”⁴⁰ Palisi ya dô kwabo hixôn Yesu di ngô kiyang wê i nêl ge om nêl vô i ên nêbê, “Ông nêb xe êno mamnôn toc mê?”⁴¹ Mêd Yesu nêl vô he ên nêbê, “Xam mamnôn obêc toc ge od nipaên ti ob yêp vô xam lêm. Léc xam nêl ên xam nêbê xam mamnôn seac di xam xovô kiyang vihati, om nipaên levac gên yêp vô xam.”

Kiyang pilepacên lec xenac wê bwoc sipsip le vac ge

10¹ Yesu nêl ên nêbê, “A nêl hixôn nôn vô xam bê xomxo ti obêc nêb la vac xenac wê bwoc sipsip vông ge nilô, léc o la bôbac vô vuayen tyo lêm, di lec xenac vac bangwe ge od xomxo tige tiyi xocbê xomxo yôdac me tibii vevac.² Léc xomxo ti wê obêc la bôbac vac vuayen wê sipsip vông ge, ge xomxo ti wê mi viac sipsip ge,³ mêgem xomxo ti wê mi viac vuayen ge ob tax vuayen ên xomxo tige, di sipsip ob ngô xomxo tige vya wê keac mi nêl he toto lê ge om xomxo tyo ob didii he mi la xenac kehe.⁴ Di bwoc sipsip wê i vông ge ob la xenac kehe pyap ge od xomxo tige ob la mug di sipsip timu vô i vixa mi he la, ên sipsip xovô i vya pyap.⁵ Di sipsip o tiyi wê ob timu vô xomxo bangwe vixa ge lêm.

Nge, ob pec ên i, ên he o xovô i vya lêm.”⁶ Yesu nêl kiyang pilepacên tige vô he, lêc he o xovô kehe lêm.

Yesu ge wê viac bwoc sipsip nivaha ge

⁷Mêgem Yesu nêl tii vac vô he ên nêbê, “A nêl hixôn nôn vô xam bêga bê a ga, a tiyi xocbê vuayen wê bwoc sipsip vông ge. ⁸Xomxo vihati wê lam tax tax ge he tiyi xocbê xomxo yôdac hixôn tibii vevac, lêc sipsip o ngô he vya lêm. ⁹A tiyi xocbê vuayen. Xomxo ti obêc lam vô a mi la vac xenac nilô ge od ob la dô nivaha, di obêc lop mi la vixun di lôm la xenac lôma ge od ob tulec yaên. ¹⁰Tibii yôdac lam ên nêb ob vun bwoc sipsip di hi he yib di vông he vô nipaên. Di a ga, a lam ên a nêb sipsip i dô maviha di kê vizid i luu vêl.

¹¹“A ga, a xomxo wê a ob viac bwoc sipsip nivaha ge. Xomxo wê viac sipsip nivaha ge ob sea i ninivi di yib ên ngidu he xôn. ¹²Xomxo ti obêc viac sipsip nêb ob kê mone lec, lêc i o xomxo viacên nôn lêm, di sipsip o tu ixê lêm, om xomxo tige obêc yê wê noo nipaên val ge od obêc sea sipsip dô di pec mi la, di noo nipaên obêc lam nga sipsip di tii he la sea. ¹³Kehe bêga nêbê xomxo tige viac sipsip ên nêb ob kê mone lec di o xo vigwe pisiv ên sipsip lêm.

¹⁴“A ga, a xomxo wê a ob viac bwoc sipsip nivaha ge. A xovô sipsip wê a vông ge di he xovô a, ¹⁵tiyi xocbê Mag xovô a di a xovô Mag ge, om a ob xib ên ngidu sipsip xôn. ¹⁶A bwoc sipsip ya dô lê, lêc he gên o lam dô vac xenac tiga lêm. Om a ob la kê he mi lam tung hixôn, di he ob ngô a vyag, mêgem he xôn ob dô kidu tixed di xomxo tixed ob viac he. ¹⁷Mag xêyaa vin lec a di kehe bêga nêbê a ob vông a diluhu vac yibên, nang dêc a ob kidi lec magviha nang. ¹⁸Xomxo ti o tiyi wê ob hôm a xôn di hi a xib ge lêm. Nge, aca va ob vông a diluhu vac yibên. Aca va xêkizêc tiyi wê a ob vông a la vac yibên ge, nang dêc aca va xêkizêc tiyi wê a ob kidi lec ge. Kiyang tige, Mag nêl vô a ên nêb a vông i vô nôn lec.”

¹⁹He Yuda ngô Yesu kiyang tige om he hibû he mi le kidu yuu, ²⁰di he tibeac nêl ên nêbê, “Xomxo tige vimwo nipaên dô vac nilô om vông i piyôp juda. Bêna lêcom xam ngô i vya?” ²¹Lêc he ya nêl ên nêbê, “Xomxo wê vimwo nipaên dô vac he nilô ge, he ob nêl kiyang tibêge lêm. Vimwo nipaên o tiyi wê ob vông xomxo ma tocên manôn i seac ge lêm.”

He Yuda yê Yesu tiyiên ma

²²Ge buc levac wê Yuda ob xovô buc wê he tax xumac ngibua Jelusalem ge. Buc tige lea yuu ningigooên, ²³mêd Yesu la Anutu xumac ngibua di la vilee lec pêt myahipu ti wê he nêl King Solomon lê lec ge. ²⁴Mêd Yuda ya la le vivac vô Yesu di nêl vô i ên nêbê, “Ông vông xe nilôm la yuu di obêc miloc vô buc tina? Ông obêc Kîlisi ge od ông nêl ông kitong seac vô xe ên va.”

²⁵Mêd Yesu nêl vô he ên nêbê, “A nêl vô xam pyap, lêc xam o vông i vin a lêm. Yuac vihati wê a vông lec Mag lê ge, nêl a kitong seac, ²⁶lêc xam o vông i vin lêm, ên xam o tu bwoc sipsip wê a vông ge lêm. ²⁷Sipsip wê a vông ge ngô a vyag di a xovô he, di he timu vô a vixag. ²⁸A obêc vông he dô maviha luta lêc luta di he ob yib lêm, di xomxo ti ob vô he vêl ên a vigêc lêm. ²⁹Mag wê vông he vô a ge luu susu vihati vêl om xomxo ti o tiyi wê ob vô he vêl ên Mag vigê ge lêm. ³⁰Xii xôn Mag, nôn tibe.”

³¹Mêd he Yuda hóm ngidax nêb ob nêx Yesu ya. ³²Lêc Yesu nêl vô he ên nêbê, “A hilung yuac nivaha wê Mag vông ge tibeac vô xam. Om xam wê yuac tina so lêc xam nêb xam ob nêx a ya ngidaxê?” ³³Lêc he Yuda nêl vô Yesu ên nêbê, “Xe ob nêx ông ya ngidax ên yuac nivaha wê ông vông ge lêm. Nge, xe nêb xe ob nêx ông ên wê ông so vyam vô Anutu ge. Ên ông ge xomxo kibun ga ti, lêc ông nêb ông Anutu.”

³⁴Mêd Yesu luu he vya bêga ên nêbê, “Kiyang ti yêp vac xolac wê xam vông ge bêga nêbê, ‘A nêl ên a nêb xam ge Anutu.’ ³⁵Anutu nêl kiyang tige vô xomxo ilage, lêc nêb he Anutu. Di il xovô ên il nêbê xomxo ti o tiyi wê ob kitya Anutu vya vêl ge lêm. ³⁶Anutu nêb he Anutu, om bêna lêc xam nêl ên xam nêbê a so vyag vô Anutu ên wê a nêl ên a nêbê a Anutu nu ge? Ên a ga, Anutu vînoo a di vông a lam kibun.

³⁷“A vôngên Anutu yuac obêc ma ge od xam o lêc vông i vin a vyag lêm. ³⁸Lêc a mi vông yuac wê Mag vông ge, om xam obêc nêb vông i vin a vyag lêm ge od xam wê yuac wê a mi vông ge di vông i vin. Ên xam obêc vông i vin ge od xam obêc xovô bê Mag dô vac a nilôg di a dô vac Mag nilô.” ³⁹Mêd xomxo tige nêb ob hóm Yesu xôn lê, lêc Yesu vô he vigêc vêl di loc mi la.

⁴⁰Mêd Yesu lax mi la mia Jodan vilu ganê tii vac nang di la dô vac vigwe ti wê Jon lipac xomxo vac ilage. ⁴¹Mêd xomxo tibeac la vô Yesu, di nêl ên nêbê, “Jon o vông do levac ya lêm, lêc kiyang vihati wê Jon nêl lec xomxo tige, kiyang nôn.” ⁴²Mêgem xomxo tibeac vac vigwe tige, he vông i vin Yesu.

Lasalas yib

11 ¹Xomxo ti lê nêbê Lasalas vông yidac mi yêp vac ben gê Betani. Betani ge Malia yuu li Mata ben. ²Malia tige wê la too mia nivivea nivaha lec Yesu vixa di kitya ya nibaviluhu ge, lêc Malia li vux Lasalas vông yidac. ³Om li vêx yuu ge vông kiyang la vô Yesu ên nêbê, “Apumtau, xomxo ti wê ông xêmyaa vin lec i ge vông yidac levac di yêp.” ⁴Yesu ngô kiyang tige di nêl ên nêbê, “Yidac tige ob vông xomxo tige yib lêm. Nge, yidac tige vông, ên nêb ob vông Anutu lê i vô levac di ob vông Anutu nu lê i vô levac êno.”

⁵Yesu xêyaa vin lec Mata yuu li vêx di Lasalas. ⁶Yesu ngô wê yidac vông Lasalas ge, lêc dô vigwe wê dô vac ge tiyi buc yuu hixôn, ⁷nang dêc

nêl vô nue ngivihi ên nêbê, “Il ob lax mi la Judia i tii vac nang.” ⁸Lêc nue ngivihi nêl vô i ên nêbê, “Xolac kehe, nyop ge, xomxo Yuda nêb ob nêx ông ya ngidax, lêc ông nêb ông ob lax mi la vigwe tige i tii vac nangê?”

⁹Mêgem Yesu luu he vya ên nêbê, “Hiyôv manôn vigê yuu di tô mi la yuu yêp vô vidiiên ti. Om xomxo ti obêc vilee vô vidiiên ge od ob mwoc lêm, ên xêseac linac lec kibun. ¹⁰Lêc obêc la vô bucên ge od ob mwoc, ên xêseac o linac vô i lêm.”

¹¹Yesu nêl pyap, lêc nêl vô he nang ên nêbê, “Il lig Lasalas yêp, lêcom a ob la tîpi vô i kidi lec.” ¹²Om Yesu nue ngivihi nêl ên nêbê, “Apumtau, ici va obêc yêp ge od obêc vô nivihha lec nang.” ¹³Kiyang tige, Yesu nêl lec wê Lasalas yib ge, lêc he so ên he nêb mêd Yesu nêl ên nêb Lasalas vaci yêp. ¹⁴Om Yesu nêl seac vô he ên nêbê, “Lasalas yib, ¹⁵lêc a xêgyaa vô nivihha ên wê a o la dô hixôn i ge lêm, ên a xo xam ên a nêb xam vông i vin a. Om xam lam ên il ob la xê Lasalas.” ¹⁶Mêd Tomas wê ta kô yuu li ngwe ked ge, nêl vô lie ngivihi ên nêbê, “Xam lam ên il xôn la xib hixôn Yesu.”

Yesu ge kidi lecên yuu maviha dôên kehe

¹⁷Mêd Yesu loc mi la ên nêb ob la Betani, lêc ngô wê he lii Lasalas vac lôva di buc yuudiyuu la vêl ge. ¹⁸Betani yêp kwabo vô Jelusalem tiyi xocbê 3 kilomita ge, ¹⁹om xomxo Yuda tibeac lam yê Mata yuu Malia ên wê li Lasalas yib ge, ên he nêb he ob vông yuu nilô i vô viyin maên. ²⁰Mêd Mata ngô wê Yesu val ge om mila vô i vac môp, di Malia dô vac xumac.

²¹Mêd Mata nêl vô Yesu ên nêbê, “Apumtau, ông obêc dô ga ge od a lig yibên obêc ma. ²²Lêc a xovô ên a nêbê gwêbaga ông obêc kitaa susu ti vô Anutu ge od Anutu obêc vông i tiyi wê ông kitaa ge.” ²³Mêd Yesu nêl vô i ên nêbê, “Lim tuc obêc kidi lec i tii vac nang.” ²⁴Mêd Mata nêl vô i ên nêbê, “A xovô ên a nêbê obêc buc timuên wê xomxo vihati obêc kidi lec i tii vac ge od Lasalas ob kidi lec hixôn.” ²⁵Om Yesu nêl vô i ên nêbê, “Kidi lecên yuu maviha dôên kehe a. Xomxo wê vông i vin a ge he obêc yib lê, lêc obêc kidi lec maviha. ²⁶Di xomxo vihati wê dô maviha di vông i vin a ge, he yibên obêc ma. Ông vông i vin kiyang tiga, me?”

²⁷Mêgem Mata nêl vô Yesu ên nêbê, “Apumtau, a vông i vin ên a nêbê ông ge Kilisi. Di ông Anutu nu, wê Anutu nêb ob vông ông lam kibun ga ge.”

Yesu byag

²⁸Mata nêl kiyang pyap di la keac Malia lam di lum nêl vô i ên nêbê, “Xolac kehe val, lêc nêb ông loc wê i.” ²⁹Malia ngô kiyang tige mêd kidi lec lutibed di la vô Yesu. ³⁰Yesu gên o val viyangtôv lêm. Nge, gên le vac môp wê Mata mila vô i ge. ³¹Mêd he Yuda wê val ên nêb ob vông Malia

yu Mata nilô i vô nivihia ge, he dô vac xumac lôma hixôn Malia di yê wê Malia kidi lec lutibed di la ge om he timu vô i vixa mi la, ên he xo ên he nêb mêd Malia ob la byag lec lôva.

³²Malia mila vigwe wê Yesu val le ge di yê Yesu, om mila kwabo vô i di yev vixa kitu vô di nêl ên nêbê, “Apumtau, ông obêc dô ga ge od a lig yibên obêc ma.” ³³Yesu yê wê Malia he Yuda wê lam hixôn i ge byag ge, om Yesu yetac di nilô vô viyin mabu. ³⁴Mêd kinêg vô he ên nêbê, “Xam lii Lasalas loc yêp tina?” Mêd he nêl ên nêbê, “Apumtau, lam wê.”

³⁵Mêgem Yesu byag, ³⁶om Yuda tige nêl ên nêbê, “Wê, xomxo tige xêyaa vin lec Lasalas luu vêl.” ³⁷Lêc he ya nêl ên nêbê, “Xomxo tige vông xomxo ma tocên manôn seac, lêc mêd o tiyi wê ob ngidu Lasalas xôn ên yibên i ma ge lêmê?”

Yesu tipi vô Lasalas kidi lec mavihia vac yibên

³⁸Yesu nilô vô viyin levac di i mila vô lôva wê he lii Lasalas yêp vac ge. Lôva tige le vac ngidax di he lax ngidax ti le vac lôva mya xôn. ³⁹Mêd Yesu nêl ên nêbê, “Hôm ngidax tige vêl.” Lêc yibên tyo li vêx Mata nêl ên nêbê, “Apumtau, Lasalas yib mi xe yev, di buc yuudiyuu lam la vêl, om nuhu tyip.” ⁴⁰Lêc Yesu nêl vô i ên nêbê, “A nêl gwêba vô ông ên a nêbê ông obêc vông i vin ge od ông ob wê xêseac wê Anutu vông ge.” ⁴¹Mêgem he hôm ngidax tige vêl di Yesu lax ma la kisii di nêl ên nêbê, “Mag, a hi vixag pec ên wê ông ngô kitaaên wê a vông ge. ⁴²Di a xovô ên a nêbê tiyi buc vihati ông vô ninyam vô a vyag, lêc a nêl kiyang tiga ên a nêb xomxo wê val le gae, he i ngô di vông i vin bê ông vông a lam.”

⁴³Yesu nêl bêge mêd tyuc vya levac ên nêbê, “Lasalas, kidi lec mi lam.” ⁴⁴Mêgem Lasalas kidi lec di lam vixun lêc lam hixôn nivimihi wê he viyum vigê yuu vixa vac ge di nivimihi nipwo ti wê he viyum manôn vac ge hixôn, om Yesu nêl vô he ên nêbê, “Xam piwelac nivimihi vêl di vông i loc.”

Yuda levac hilu kiyang pyap ên nêb ob hi Yesu i yib

(Matyu 26:1-5; Mak 14:1-2; Luk 22:1-2)

⁴⁵Yuda wê la vô Malia ge, he yê wê Yesu tipi vô Lasalas ge, om he tibeac vông i vin Yesu. ⁴⁶Lêc he ya la vô Palisi di la nêl môp wê Yesu vông ge kitong vô he. ⁴⁷Mêgem Palisi hixôn xomxo levac wê mi si daa gee, he kitucma hixôn kaunsil vihati di nêl vôma ên nêbê, “Il ob vông bêna? Ên xomxo tyo vông do levac tibeac, ⁴⁸om il obêc dixê ya madnôn di i dô ge od obêc vông do levac ya hixôn di xomxo vihati obêc vông i vin i, di tibii Lom wê viac il ge obêc val kipê xumac ngibua wê il vông ge sea di vông il vô nipaên hixôn.”

⁴⁹Lêc he ti lê nêbê Kaiapas wê tu xomxo daa siên nêb levac lec kliskas tige nêl vô he ên nêbê, “Xam o xovô kiyang ti lêm, ⁵⁰di xam o xovô môp

wê ob vô nivihā vō xam ge lêm. Xam ngô lê. Xomxo tixed obêc yib ên xomxo vihati ge od obêc vô nivihā vō il di tibii Lom ob lam kitya il vël lêm.”⁵¹ Kaiapas o nêl kiyang tige ya xovôen wê ici va vông ge lêm. Nge, tu xomxo wê mi si daa gee nêl xomxo levac lec klismas tige om nêl kiyang bo tige seac lec Yesu wê ob yib ên he Yuda ge.⁵² Lêc ob yib ên Yuda vaci lêm. Nge, ob yib ên kituc Anutu nue vihati wê dô vac vigwe vihati ge he lam dô kidu tixed.

⁵³ Vô buc tige Yuda hilu kiyang pyap nêb ob hi Yesu i yib. ⁵⁴ Om Yesu o la vilee vac Yuda mahigun ti tii vac lêm. Nge, sea vigwe tige mi la vigwe ti lê nêbê Iplem wê yêp kwabo vô vigwe mahigun pileva ge, mêd Yesu he nue ngivihā la dô vac vigwe tige.

⁵⁵ Buc levac wê Yuda ob xovô buc Pasova Isip ilage vô kwabo lec, om xomxo tibeac vac vigwe toto ge kituc la Jelusalem tax, ên nêb ob la viac he ên buc tige. ⁵⁶ Om he myag Yesu vac Anutu xumac ngibua di nêl vōma ên nêbê, “Xam xo bêna? Xam nêb Yesu ob yê buc tiga hixôn, me?”⁵⁷ Xomxo levac wê mi si daa gee hixôn Palisi nêl kiyang pyap ên nêbê xomxo ti obêc xovô vigwe ti wê Yesu la dô vac ge od i lam nêl kitong vô he ên he ob la hōm Yesu xôn.

Malia too mia nivivea nivihā lec Yesu vixa
(*Matyu 26:6-13; Mak 14:3-9*)

12 ¹ Buc vigê vilu di sec ti gên yêp di obêc buc Pasova, di Yesu lax mi la Betani wê tipī vô Lasalas kidi lec mavihā vac yibên ge. ² Mêd he myêl yaên vô Yesu, di Mata duu yaên di Lasalas dô hixôn he wê ob ya yaên hixôn Yesu ge. ³ Mêd Malia kô mia nivivea nivihā vac butol ti. Mia tige he kisuu lec mone levac mabu. Mêd Malia kô mi la too lec Yesu vixa di kitya ya nibaviluhu. Om mia nivivea tige la pup vac xumac nilô.

⁴ Lêc Yesu nue ngivihā ti lê nêbê Judas Iskaliot wê ob vông Yesu vac tibii vevac vigê ge nêl ên nêbê, ⁵ “Bêna lêc il o vông mia tige mi tibii kisuu ya mone yul yon (K300) ên il vông vô tibii wê nêl susu maên geê?”⁶ Judas nêl bêge lêc o xo tibii wê nêl susu maên ge lêc nêl kiyang tige lêm. Ên Judas ge tibii yôdac ti lê, lêc mi viac Yesu he nue ngivihā tin wê mone mi dô vac ge om mone wê he mi tung la vac tin ge Judas mi kô ya yôdac. ⁷ Lêc Yesu nêl vô i ên nêbê, “Vông vêx tige i dô, ên vông tixuuên lec buc wê he ob lipac mia nivivea lec a nignivi di yev a ge. ⁸ Xomxo wê nêl susu maên ge ob dô hixôn xam buc dia, di a ga, a ob dô hixôn xam buc dia lêm.”

Yuda levac hilu kiyang pyap nêb ob hi Lasalas i yib

⁹ Yuda tibeac ngô wê Yesu la dô Betani ge om he lam vô i, lêc he o lam nêb he ob yê Yesu vaci lêm. Nge, he nêb ob yê Lasalas wê Yesu tipī vô i kidi lec vac yibên ge hixôn. ¹⁰ Mêgem xomxo levac wê mi si daa gee hilu

kiyang pyap ên nêb ob hi Lasalas i yib hixôn, ¹¹ên Yuda tibeac xovô wê Lasalas kidi lec vac yibên ge om sea Yuda levac di vông i vin Yesu.

Yesu la Jerusalem tiyi xocbê xomxo levac ti
(*Matyu 21:1-11; Mak 11:1-11; Luk 19:28-40*)

¹²Mêd vigwe vidiiên titige xomxo tibeac wê lam dô ên nêb ob yê buc levac ge, he ngô wê Yesu ob mila Jerusalem ge, ¹³om he la kô xax lihi di mila vô Yesu vac môp di tyuc hixôn nêbê,

“Il ob pimil Anutu di hi vixad i pec ên xomxo ti wê tu Apumtau manôn di lam ge, ên i ge tu xomxo levac wê ob viac il Islel.”

¹⁴Mêd Yesu la kô bwoc donki nu ti mi dô lec, tiyi xocbê kiyang wê yêp vac xolac bêga nêbê,

¹⁵“Xam xomxo Saion, xam xona ên i ma. Xam wê lê. Xam xomxo levac wê ob viac xam ge dô lec bwoc donki nu ti mi val.”

¹⁶Vô buc tige Yesu nue ngivihi gên lungên kiyang tige kehe, léc buc wê Yesu lax dô vac xêseac ge od he xo i lax lec kiyang tige wê yêp vac xolac ge di xovô nêbê kiyang tige vô nôn lec vô Yesu.

¹⁷Xomxo wê dô hixôn Yesu di yê wê Yesu tipi vô Lasalas kidi vac lôva mi lam ge la nêl kiyang tige kitong vô xomxo tibeac. ¹⁸Om xomxo tibeac ngô wê Yesu vông do levac tige om he mila vô Yesu vac môp. ¹⁹Mêd Palisi nêl vôma ên nêbê, “Xam wê lê. Il nêd kiyang nôn ma, ên xomxo vihati la timu vô Yesu.”

Glik ya nêb ob yê Yesu

²⁰Xomxo tibeac la Jerusalem ên nêb ob la kitaa vô Anutu lec buc ngibua tige léc Glik ya la hixôn. ²¹Om Glik tige la vô Pilip wê ben Betsaida vac vigwe levac Galili ge, di la nêl vô i ên nêbê, “Xomxo levac, xe ob xê Yesu.” ²²Om Pilip la nêl vô Andlu, di yuu la nêl vô Yesu. ²³Léc Yesu nêl vô yuu ên nêbê, “Buc wê Xomxo Nu ob kô lê levac ge vô kwabo lec pyap. ²⁴A nêl hixôn nôn vô xam bê skom nôn ti obêc la vac kibun lêm ge od ob dô ya nôn tived. Léc obêc la dô vac kibun nilô ge od ob tyip mi vô nôn tibeac. ²⁵Xomxo ti xêyaa obêc vin lec ici va ninivi ge od ninivi wê i vông ge obêc yib. Léc xomxo ti obêc vông i vin Anutu di yê ici va ninivi tiyi xocbê susu pileva gê kibun ga ge od obêc la dô maviha luta léc luta. ²⁶Xomxo ti obêc nêb vông yuac wê a vông ge od i lam timu vô a, ên vigwe wê a ob dô vac ge, a nuge yuac obêc dô hixôn a. Di xomxo ti obêc vông yuac wê a vông ge od Mag obêc vông lê levac vô i.

Yesu nêl lec wê ob yux lec xax ge

²⁷“Gwêbaga a nilôg vô viyin levac om a ob nêl bêna? A ob nêl bê ‘Mag, ông vô viyin tiga vêl ên a’? Ma vêl, a ob nêl bêge lêm. Ên a lam ên a nêb a ob kô viyin tige. ²⁸Mag, ông vông ông lêm i vô levac.” Yesu nêl bêge

mêd vya ti lam gê lag puunê ên nêbê, “A vông a lêg vô levac pyap di a ob vông i vô levac tii vac nang.” ²⁹Lêc xomxo wê le kwabo gee ngô vya tige om he ya nêl ên nêbê, “Deac tug,” di he ya nêl ên nêbê, “Angela ti keac vô i.”

³⁰Lêc Yesu luu he vya ên nêbê, “Vya tige o lam vô a ên nêb a ngô lêm. Nge, lam ên nêb xam ngô. ³¹Gwêbaga Anutu ob yaxên xomxo kibun ga nêl kiyang di ob tii Seten wê tu xomxo kibun ga nêl levac ge i la vêl. ³²Gwêbaga a gên dô kibun, lêc buc wê a obêc yux lec xax ge od a ob didii xomxo vihati lam vô a.” ³³Yesu nêl kiyang tige ên nêb ob nêl môt wê ob yib ge kehe kitong vô he.

³⁴Mêd xomxo tige luu i vya ên nêbê, “Xe ngô kiyang wê yêp vac xolac bêga nêbê Kilisi ob dô maviha luta lêc luta. Bêna lêc ông nêb Xomxo Nu ob yux lec xaxê? Xomxo Nu ge letya?” ³⁵Mêd Yesu nêl vô he ên nêbê, “Xêseac ob dô hixôn xam myabo tya. Om buc wê xêseac dô hixôn xam ge od xam loc vac xêseac, ên mapitoc i o lêc hivun xam xôn lêm. Ên xomxo ti obêc la vac mapitoc ge od ob lungên môt wê ob la vô ge. ³⁶Om xam vông i vin xêseac wê dô hixôn xam ge, êdêc tu xêseac nue.” Yesu nêl kiyang tige pyap mêd sea he di la xôpac ên he.

Yuda tibeac o vông i vin Yesu lêm

³⁷Yesu vông do levac tibeac vô xomxo manôn mi he yê, lêc he o vông i vin i lêm. ³⁸Om kiyang wê plopet Aisaia nêl ilage vô nôn lec. Kiyang tige yêp bêga nêbê,

“Apumtau, letya vông i vin kiyang wê xe nêl ge? Apumtau hilung xêkizêc wê i vông ge lê, lêc letya vông i vin? Xomxo ti o vông i vin lêm.”

³⁹Xomxo tige tiiyên ma wê ob vông i vin Yesu ge di kehe yêp vac kiyang ngwe wê Aisaia kivuu bêga nêbê,

⁴⁰“Anutu vông he manôn toc di vông he piyôp vô xêkizêc, om he manôn yêên ma di he piyôp xovôên kiyang ti ma, di he o pilepac he bê Anutu ob vông he dô nivaha lêm.”

⁴¹Aisaia yê xêseac wê Kilisi vông ge om nêl kiyang tige lec Kilisi vaci.

⁴²Mêgem Yuda levac, he tibeac vông i vin Yesu, lêc he xona ên Palisi om he o nêl vông vinên wê he vông ge kitong seac lêm, ên he xona ên wê Palisi obêc tii he vêl ên xumac lilo di vông he la dô ninya ge. ⁴³Ên Yuda tige yêyaa vin lec nêb xomxo i yê he nivaha, di he o xovô nêbê Anutu i yê he nivaha lêm.

Yesu kiyang wê ob yaxên xomxo ge

⁴⁴Yesu keac vya levac yêp seac ên nêbê, “Xomxo ti obêc vông i vin a ge od o vông i vin aca va tibeac lêm. Nge, vông i vin xomxo ti wê vông a lam ge hixôn. ⁴⁵Di xomxo wê yê a ge od yê xomxo ngwe wê vông a lam ge

hixôn. ⁴⁶A lam dô kibun ga hixôn xêseac, ên a nêb xomxo wê vông i vin a ge, he i o lêc dô vac mapitoc nang lêm. ⁴⁷Xomxo ti obêc ngô a kiyang lêc timu vôn obêc ma ge od a ob titô i lêm. Ên a o lam ên a nêb a ob yaxên xomxo nêb kiyang lêm. Nge, a lam ên a nêb a ob hôm he lec. ⁴⁸Xomxo ti obêc vô nîmi vô a di ngôên a kiyang obêc ma ge od i nêb wê ob yaxên i ge yêp, ên kiyang wê a nêl ge obêc yaxên i vô buc timuên. ⁴⁹Ên kiyang wê a nêl ge a o nêl ya xovôên wê a vông ge lêm. Nge, Mag wê vông a lam ge, ici va nêl kiyang vô a ên nêb a lam nêl seac. ⁵⁰Di a xovô ên a nêbê kiyang wê Mag nêl ge ob vông xomxo dô maviha luta lêc luta, om kiyang wê a nêl ge a nêl vihati tiyi xocbê Mag nêl vô a ge.”

Yesu lipac nue ngivihi vixa

13 ¹Buc Pasova vô kwabo lec, om Yesu xovô nêbê buc wê ob sea kibun di lax mi la vô Ma ge val vô kwabo lec pyap. Yesu xêyaa vin lec nue wê dô kibun ga tiyi buc vihati di i la tyip lec buc wê ob yib lec ge.

²Vigwe huc mêd Yesu he nue ngivihi ya yaên mi dô. Lêc Seten vông xovôên vô Judas Iskaliot wê Saimon nu ge ên nêb i nêl Yesu kitong vô tibii vevac. ³Yesu xovô nêbê Ma vông xêkizêc vô i pyap, di xovô nêbê i lam vô Anutu di obêc lax mi la vô Anutu i tii vac nang. ⁴He gên diya, lêc Yesu kidi lec di kwax nivimihi vêl di hôm taul di vêx lec, ⁵mêd too mia vac pile levac ti di la vô nue ngivihi toto di la lipac he vixa di kitya ya taul ti wê vêx lec i ge. ⁶Mêd mila vô Saimon Pita lêc Pita kinêg vô i ên nêbê, “Apumtau, ông ob lipac a vixag?” ⁷Mêd Yesu luu i vya ên nêbê, “Gwêbaga ông lungên môp wê a vông ga, lêc timuên ge ông obêc xovô.” ⁸Lêc Pita nêl vô i ên nêbê, “Tiyiên ma vêl wê ông ob lipac a vixag ge.” Mêd Yesu luu i vya ên nêbê, “A lipacên ông obêc ma ge od o tiyi wê ông ob dô hixôn a ge lêm.” ⁹Om Pita nêl vô i ên nêbê, “Apumtau, obêc bêge ge od ông ob lipac a vixag pileva lêm. Nge, ông lipac a vigêg yuu bagzub hixôn.” ¹⁰Lêc Yesu nêl vô i ên nêbê, “Xomxo wê lipac mia pyap ge ob lipac ninivi vihati tii vac lêm. Nge, ob lipac vixa pileva, ên ninivi vihati vô paha lec. Di xam ge, xam vô paha lec pyap, lêcom o xam vihati lêm.” ¹¹Yesu xovô xomxo ti wê ob vông i la vac tibii vevac vigê ge om nêl ên nêbê, “Xam vô paha lec pyap, lêcom o xam vihati lêm.”

¹²Yesu lipac he vixa pyap mêd vinyum nivimihi lec nang di lax dô di kinêg vô he ên nêbê, “Môp wê a vông vô xam gwêbaga, xam xovô kehe, me? ¹³Xam mi nêl a ên xam nêb a xolac kehe di a Apumtau, om xam nêl i la tiyi, ên a bêge mêge. ¹⁴A ga Apumtau di a xolac kehe, lêc a lipac xam vixam, om xam êno, xam lipac lime vixa. ¹⁵Gwêbaga a hilung môp vô xam ên a nêb xam vông i tiyi xocbê a vông vô xam ge. ¹⁶A nêl hixôn nôn vô xam bêga bê xomxo yuac ti ob luu i xomxo levac vêl lêm, di xomxo ti wê la nêl xomxo ngwe kiyang ge ob luu xomxo ti wê vông i la ge vêl lêm.

17Xam obêc xovô kiyang tiga mi vông i tiyi ge od xam xêmyaa obêc vô nivîha.

18“Lêc a o nêl kiyang tiga lec xam vihati lêm. Xam wê a vînoo xam mi xam tu axe ge, a xovô xam pyap. Lêc kiyang wê yêp vac xolac ge ob vô nôn lec, kiyang wê nêl bêga nêbê,

‘Xomxo ti wê ya yaên hixôn a ge kô vixa lec kisii, nêb ob kê a.’

19Kiyang tige gên o vô nôn lec lêm, lêc a nêb a ob nêl kitong vô xam tax, ên obêc vô nôn lec timuên ge od xam xovô bê a xomxo tyo. 20A nêl hixôn nôn vô xam bê xomxo ti obêc hôm xomxo wê a vông he la ge lec nivîha ge, od tiyi xocbê hôm a lec nivîha hixôn, di xomxo ti obêc hôm a lec nivîha ge od tiyi xocbê hôm xomxo ti wê vông a lam ge lec nivîha hixôn.”

Yesu nêl xomxo ti wê ob vông i vac tibii vevac vigê ge kitong
(*Matyu 26:20-25; Mak 14:17-21; Luk 22:21-23*)

21Yesu nêl kiyang tige pyap mêd nilô vô viyin mabu di i nêl kiyang seac vô he ên nêbê, “A nêl vixôhilôg nôn vô xam bêga bê xacxam ti obêc vông a vac tibii vevac vigê.” 22Lêc Yesu nue ngivîhi lungên kiyang tige kehe om yêma manôn, ên nêb mêd nêl kiyang tige lec letya? 23A, Jon wê Yesu xêyaa vin lec a luu vêl ge, a dô kwabo vô Yesu, 24om Saimon Pita nêx kwa vô a ên nêb a kinêg vô Yesu bê Yesu nêl kiyang tige lec letya? 25Om a du mi la kwabo vô Yesu di kinêg vô i ên nêbê, “Apumtau, ông nêl kiyang tige lec letya?” 26Mêd Yesu nêl vô a ên nêbê, “Xomxo ti wê a ob tinyum blet vac mia mi vông vô ge, tyo tige mê.” Mêgem Yesu hôm blet ti di tinyum vac mia di vông vô Judas wê Saimon Iskaliot nu ge.

27Judas hôm blet tige mi ya di lutibed Seten la vac i nilô, mêd Yesu nêl vô Judas ên nêbê, “Môp wê ông nêb ông ob vông ge, ông vông lutibed.” 28He wê dô lec tevol ge, ti o xovô kiyang wê Yesu nêl vô Judas ge kehe lêm. 29He xovô ên he nêbê Judas mi viac tin wê he mone mi dô vac ge om he ya xo ên he nêb Yesu mêd nêl vô Judas nêb i loc kisuu yaên wê he ob ya lec buc levac ge, me nêb i loc vông mone vô tibii wê nêl mone maên ge. 30Judas hôm blet tige mi ya vêl di lop mi la vixun lutibed di vigwe buc.

Yesu nêl xolac paha ti vô he

31Judas la pyap mêd Yesu nêl ên nêbê, “Gwêbaga xêseac wê Xomxo Nu vông ge val le seac, di Xomxo Nu vông xêseac wê Anutu vông ge val le seac hixôn. 32Di Xomxo Nu obêc hilung xêseac wê Anutu vông ge od Anutu vaci ob hilung xêseac wê Xomxo Nu vông ge lutibed. 33Xam nuge, a ob dô hixôn xam myabo tya, di xam obêc myag a, lêc kiyang wê a nêl vô he Yuda ge, a ob nêl vô xam hixôn bêga bê vigwe wê a ob la dô vac ge, xam ti o tiyi wê xam ob la vac ge lêm. 34A ob nêl xolac paha ti vô xam

bêga bê xam xêmyaa i vin lecma. A xêgyaa vin lec xam om xam xêmyaa i vin lecma i tiyi xocbê a xêgyaa vin lec xam ge. ³⁵Ên xam xêmyaa obêc vin lecma ge od xomxo vihati obêc xovô bê xam tu a nuge.”

Yesu nêl nêb Pita obêc yax i vun

(*Matyu 26:31-35; Mak 14:27-31; Luk 22:31-34*)

³⁶Mêd Saimon Pita kinêg vô Yesu ên nêbê, “Apumtau, ông ob la na?” Mêd Yesu luu i vya ên nêbê, “Vigwe wê a ob la vac ge, gwêbaga o tiyi wê ông ob timu vô a vixag ge lêm. Lêc timuên ge ông obêc timu vô a vixag.” ³⁷Om Pita nêl vô i ên nêbê, “Apumtau, bêna lêc a o tiyi wê a ob timu vô ông gwêbaga lêmê? A tiyi wê a ob xib ên ngidu ông xôn.” ³⁸Lêc Yesu nêl vô i ên nêbê, “Ông nêb ông ob wib ên ngidu a xônê? A nêl hixôn nô n vô ông bê kokilêx obêc gên vô vya lêm di ông ob yax a vun lu yon.”

Yesu ge môp wê ob la vô Anutu ge

14 ¹Yesu nêl vô he ên nêbê, “Xam nilôm i o lêc vô viyin lêm. Xam vông i vin Anutu, om xam vông i vin a hixôn. ²Xumac wê Mag vông ge, nilô tibeac yêp. Obêc ma ge od a obêc nêl kitong vô xam ilage lê. Lêc yêp vixôhilôg, om a ob lax ên lax viac xam bom wê xam obêc mila dô vac ge. ³Di a obêc viac pyap ge, od a ob lôm kô xam, ên xam loc dô hixôn a vac vigwe wê a ob dô vac ge. ⁴Di vigwe wê a ob la vac ge, xam xovô môp pyap.”

⁵Lêc Tomas nêl vô Yesu ên nêbê, “Apumtau, vigwe wê ông ob la vac ge, ge xe lungên, om xe ob xovô môp tige bêna?”

⁶Om Yesu nêl vô i ên nêbê, “A ga môp, di a kiyang nô n kehe, di a maviha dôên kehe. Om xomxo ti obêc la vô Mag vô môp bangwe lêm, ên môp wê ob la vô Mag ge a tived. ⁷Xam obêc xovô a ge od xam obêc xovô Mag hixôn, di gwêba lêc xam xovô i, ên xam wê i pyap.” ⁸Mêd Pilip nêl vô i ên nêbê, “Apumtau, ông hilung mam vô xe di obêc pyap.”

⁹Lêc Yesu nêl vô i ên nêbê, “Pilip, a dô hixôn xam buc xuhu dia, lêc xam gên lungên a? Xomxo wê yê a ge yê Mag. Bêna lêc ông nêb a hilung Mag vô xamê? ¹⁰Mêd ông gên o vông i vin bê a dô vac Mag nilô di Mag dô vac a nilôg lêm, me? Kiyang wê a nêl vô xam ge, a o nêl ya xovôên wê a vông ge lêm. Nge, Mag wê dô vac a nilôg ge, a vông yuac wê i vông ge. ¹¹Xam vông i vin bêga bê a dô vac Mag nilô di Mag dô vac a nilôg. Lêc xam obêc vông i vin kiyang tige lêm ge od xam wê yuac wê a vông ge di vông i vin.

¹²“A nêl vixôhilôg nô n vô xam bê xomxo wê vông i vin a ge ob vông do tiyi xocbê a mi vông ge, di obêc vông do levac luu wê a vông ge vêl, kehe bêga nêbê a ob lax vô Mag. ¹³Di susu vihati wê xam ob kitaa lec a lêg ge a obêc vông i vô nô n lec, ên a ob vông xêseac wê Mag vông ge i yêp seac. ¹⁴Om xam obêc kitaa susu ti lec a lêg ge od a obêc vông i vô nô n lec.

Yesu nêl nêb ob vông Myakilôhō Ngibua i lam

15 “Xam xêmyaa obêc vin lec a ge od xam obêc timu vô xolac wê a nêl ge. 16 Di a obêc kitaa vô Mag di Mag obêc vông xomxo ngwe i lam vô xam. Xomxo tige wê ob ngidu xam xôn di dô hixôn xam luta. 17 Ge Myakilôhō Ngibua wê ob nêl kiyang nôn, lêc xomxo kibun ga o tiyi wê ob kô i lec nivihā ge lêm, ên he o xovô i lêm. Lêc xam xovô i pyap, ên mi dô hixôn xam di obêc dô vac xam nilôm.

18 “A obêc sea xam dô tamaên xocbê xomxo pibua ge lêm. Nge, a obêc lôm vô xam i tii vac. 19 Buc myabo tya di xomxo kibun ga ob yê a tii vac lêm, lêc xam ge, xam obêc wê a. A dô magviha om xam êno obêc dô mamviha. 20 Obêc buc tige od xam obêc xovô bê a dô vac Mag nilô di xam dô vac a nilôg, di a dô vac xam nilôm. 21 Xomxo ti obêc ngô a kiyang di viac nivihā ge od xomxo tige xêyaa vin lec a, di xomxo ti xêyaa obêc vin lec a ge od Mag xêyaa ob vin lec i di a xêgyaa ob vin lec xomxo tige di a obêc hilung a vô i.”

22 Yesu nêl bêge mêd Judas ngwe wê o Judas Iskaliot lêm ge nêl vô Yesu ên nêbê, “Apumtau, bêna lêc ông ob hilung ông vô xe di ông ob hilung ông vô xomxo kibun ga vihati lêmê? Ge kehe bêna?” 23 Om Yesu luu i vya ên nêbê, “Xomxo ti xêyaa obêc vin lec a ge od obêc viac kiyang wê a nêl ge nivihā, di Mag xêyaa obêc vin lec xomxo tige di xii Mag ob la dô hixôn i. 24 Lêc xomxo wê xêyaa o vin lec a lêm ge ob viac a kiyang nivihā lêm. Di kiyang wê xam ngô ge, o a kiyang lêm. Nge, Mag wê vông a lam ge, i kiyang.

25 “A gên dô hixôn xam om a nêl kiyang tiga vô xam. 26 Lêc xomxo ti dô wê ob ngidu xam xôn, ge Myakilôhō Ngibua wê Mag ob vông i lam lec a lêg om obêc lam tixuu xam ya kiyang vihati, di obêc vông xam piyôp yêp seac di xam xovô kiyang vihati wê a nêl vô xam ge.

27 “A ob sea kiyang malehe i yêp vô xam, di kiyang malehe wê a vông ge, a ob vông vô xam. Kiyang malehe wê a vông ge o tiyi xocbê kiyang malehe wê xomxo kibun ga vông ge lêm. Om xam nibum i o lêc tîpi di xam xona lêm. 28 Xam ngô wê a nêl vô xam ên a nêbê, ‘A ob sea xam di la, dêc a obêc vena vô xam i tii vac.’ Xam xêmyaa obêc vin lec a ge od xam xêmyaa obêc vô nivihā ên wê a ob la vô Mag ge, ên Mag ge xomxo levac luu a vêl. 29 Kiyang ge gên o vô nôn lec lêm, lêc a nêl kitong vô xam tax, êdêc vô nôn lec timuên ge od xam vông i vin.

30 “A ob nêl kiyang tibeac ti vô xam lêm, ên Seten wê tu xomxo kibun ga nêl levac ge ob val, lêc o tiyi wê ob pwoo a pec ge lêm. 31 A nêb xomxo kibun ga vihati he i xovô bê a xêgyaa vin lec Mag, om a ob vông yuac vihati i tiyi wê Mag nêl vô a ge. Om xam kidi lec ên il ob la.

Yesu ge tu xax wain nôn

15 1 “A xax wain wê nôn ge, di Mag ge wê tu yuac kehe. 2 Om ngen wê a vông ge wê o yuac nôn lêm ge, Mag ob xoo vêl, di ngen wê

vuac ge, Mag ob yal mavigen vêl di pityep ên i vuac nô n tibeac. ³Kiyang wê a nêl vô xam ge vông xam vô paha lec pyap. ⁴Xam dô vac a nilôg di a ob dô vac xam nilôm. Ên xam obêc dô vac a nilôg lê m ge od xam ob vô nô n ti lê m, tiyi xocbê xax ngen obêc kitiv lec xax yatôv lê m ge od ob vuac nô n ti lê m.

⁵“A ga xax wain, di xam ge ngen. Om xomxo ti obêc dô vac a nilôg di a ob dô vac i nilô ge od ob vuac nô n tibeac, lêc xam obêc sea a ge od xam o tiyi wê xam ob vông yuac nivîha ti ge lê m. ⁶Xomxo ti obêc dô vac a nilôg lê m ge od obêc tiyi xocbê xax ngen wê he hup vêl di byê x i la di i la mupac di he nêx i la vac ngwax di ngwax ya vêl ge.

⁷“Xam obêc dô vac a nilôg di a kiyang obêc yêp vac xam nilôm ge od susu wê xam xêmyaa vin lec mi xam kitaa ge od ob vô nô n lec vô xam. ⁸Xam obêc vô nô n tibeac ge od ob vông Mag lê vô levac di xam tu a nuge. ⁹A xêgyaa vin lec xam tiyi xocbê Mag xêyaa vin lec a ge, om xam dô vac xêyaa vin lecên wê a vông ge nilô i tiyi buc vihati. ¹⁰Xam obêc timu vô kiyang wê a nêl ge od xam ob dô vac xêyaa vin lecên wê a vông ge nilô, tiyi xocbê a timu vô kiyang wê Mag vông ge om a dô vac xêyaa vin lecên wê i vông ge nilô. ¹¹A nêl kiyang tige vô xam ên a nêb xêyaa nivîha wê a vông ge i loc vô xam di i pup vac xam nilôm.

¹²“Xolac wê a ob nêl vô xam ge bêga bê xam xêmyaa i vin lecma i tiyi xocbê a xêgyaa vin lec xam ge. ¹³Xomxo ti obêc yib ên ngidu lie xôn ge od xêyaa vin lecên wê i vông ge levac luu vêl. ¹⁴Di xam obêc timu vô kiyang wê a nêl vô xam ge od xam tu a lige nô n. ¹⁵Ilage a nêb xam tu a nuge yuac, lêc gwêbaga a ob nêl bê xam tu a lige. Ên nue yuac o xovô môp wê he nê n xomxo levac nêb ob vông ge lê m, lêcom xam xovô a kiyang vihati pyap, ên kiyang wê a ngô vô Mag ge, a nêl vihati vô xam mi xam xovô pyap.

¹⁶“Xam o vinoo a lê m. Nge, a vinoo xam di vông yuac vô xam ên a nêb xam loc vô nô n tibeac di nô n wê xam vông ge i yêp luta. Di xam obêc kitaa susu ti vô Mag lec a lêg ge od Mag obêc vông vô xam. ¹⁷Om xolac wê a ob nêl vô xam ge bêga bê xam xêmyaa i vin lecma.

Xomxo kibun ga ob yê Yesu nue tiyiên ma

¹⁸“Xomxo kibun ga obêc yê xam nipaên ge od xam xovô bêga bê he yê a nipaên tax. ¹⁹Xam obêc tiyi xocbê tibii kibun ga ge od tibii kibun ga xêyaa obêc vin lec xam tiyi xocbê he lie xam. Lêc xam o tiyi xocbê tibii kibun ga lê m, ên a vinoo xam vac he mahigun ên a nêb xam o tu tibii kibun ga i tii vac lê m, om he xêyaa vô nipaên vô xam. ²⁰Xam xovô lec kiyang wê a nêl vô xam ên a nêbê, ‘Nu yuac ti ob nginoo xomxo levac wê i vông ge vêl lê m.’ Tibii tii a, om obêc tii xam êno. Di he obêc timu vô kiyang wê a nêl ge od obêc timu vô kiyang wê xam nêl ge hixôn. ²¹Xomxo obêc vông vaxvax vô xam ên wê xam tu axe ge, ên he o xovô xomxo ti wê vông a lam ge lê m.

22 “A obêc lam nêl xolac vô he ilage lêm ge od he nêl nipaên obêc yêp vô he lêm. Lêc a lam nêl xolac vô he, om o tiyi wê he ob yax nipaên wê he vông ge ti vun lêm. 23 Xomxo ti obêc yê a nipaên ge od tiyi xocbê yê Mag nipaên hixôn. 24 Do levac wê xomxo ti o vông ilage lêm ge, a obêc vông vac he mahigun lêm ge od he nêl nipaên obêc yêp vô he lêm. Lêc a lam vông mi he yê pyap, lêc he yê xii Mag nipaên. 25 Môt wê he vông ge vông kiyang wê yêp vac xolac wê he vông ge ti vô nôn lec. Kiyang tige yêp bêga nêbê, ‘He xêyaa vô myavinê vô a pisiv.’

26 “Lêc xomxo wê ob ngidu xam xôn ge dô hixôn Mag om a obêc vông i lam vô xam. Ge Myakilôhô Ngibua wê ob nêl kiyang nôn, om ob lam nêl a kitong vô xam. 27 Di xam êno, xam ob nêl a kitong vô xomxo, ên xam dô hixôn a ilatikwê di i val tyip gwêbaga hixôn.

16 1 “A nêl kiyang tige vô xam ên a nêb xam o lêc sea vông vinên wê xam vông ge lêm. 2 Ên tibii obêc tii xam vêl ên xumac lilo di vông xam la dô ninya, di timuên he ob hi xam wib di so nêb he vông yuac nivihia wê Anutu vông ge. 3 He ob vông môp tibêge, ên he lungên Mag di lungên a. 4 A nêl kiyang tiga vô xam, ên a nêb viyin tibêge obêc tulec xam timuên ge od xam xovô bê a nêl kiyang vô xam pyap.

Yesu nêl lec yuac wê Myakilôhô Ngibua ob vông ge

“A o nêl kiyang tibêge vô xam ilage lêm, ên a dô hixôn xam, 5 lêc gwêbaga a ob lax vô xomxo ti wê vông a lam ge. Lêc xam ti o kinêg a lêm bê ‘Ông ob la na?’, 6 ên kiyang wê a nêl vô xam gwêbaga vông xam dô hixôn nilôm viyin. 7 Lêc a nêl hixôn nôn vô xam bê a obêc la ge od ob vô nivihia vô xam, ên a laên obêc ma ge od xomxo wê ob ngidu xam xôn ge valên obêc ma. Lêc a obêc la ge od a ob vông i lam vô xam. 8 Di Myakilôhô Ngibua obêc val ge od ob nêl xomxo kibun ga nêl nipaên kitong di ob nêl môp nivihia kitong di ob nêl môp wê Anutu ob yaxên xomxo nêl kiyang ge kitong. 9 Om ob nêl xomxo nêl nipaên kitong bêga bê he o vông i vin a lêm. 10 Di ob nêl môp nivihia kitong, ên a ob lax vô Mag di xam ob wê a tii vac lêm. 11 Di ob nêl kiyang wê Anutu ob yaxên xomxo nêl kiyang ge kitong bêga bê Seten wê tu xomxo kibun ga nêl levac ge, Anutu yaxên i nêl kiyang pyap om obêc vông myaviwen vô i.

12 “A kiyang tibeac yêp wê a nêb a ob nêl vô xam ge, lêc xam o tiyi wê xam ob ngô ge lêm. 13 Lêc Myakilôhô Ngibua wê kiyang nôn kehe ge obêc val ge od obêc didii xam la vac kiyang nôn. Lêc ob nêl ya xovôên wê ici va vông ge lêm. Nge, ob nêl kiyang wê ngô ge kitong vô xam, di ob nêl kiyang yuu môp wê ob val timuên ge kitong vô xam hixôn. 14 Myakilôhô Ngibua ob vông a lêg i vô levac, ên ob kô kiyang wê a vông ge mi lam nêl kitong vô xam. 15 Kiyang vihati wê Mag vông ge tu axe pyap om a nêl vô xam bê Myakilôhô Ngibua ob kô kiyang vô a di nêl kitong vô xam.

Nilô viyin obêc pilepac di tu xêyaa nivihā

¹⁶“Buc myabo tya di xam wêên a obêc ma, di obêc buc myabo tya nang, lêc xam obêc wê a tii vac.” ¹⁷Yesu nue ngivihī ya kinêg vōma ên nêbê, “Kiyang tige kehe bēna? Ên nêl ên nêbê buc myabo tya di il xêên i obêc ma, di buc myabo tya nang lêc il obêc xê i tii vac. Di nêl ên nêb i ob la vô Ma. ¹⁸Om vya wê nêl ên nêbê buc myabo tya, ge kehe bēna? Il lungên kiyang tyo kehe.”

¹⁹Yesu xovô wê he nêb ob kinêg kiyang vô i ge, om nêl vô he ên nêbê, “Kiyang wê a nêl ên a nêbê buc myabo tya di xam wêên a obêc ma, di buc myabo tya nang lêc xam obêc wê a tii vac nang, xam dikinêgma lec kiyang tige mê? ²⁰A nêl vixôhilôg nôn vô xam bê xam obêc byag nôn, lêc tibii wê o vông i vin lêm ge ob dô hixôn xêyaa nivihā. Xam obêc dô hixôn nilôm viyin lê, lêc nilôm viyin obêc pilepac di vông xam nilôm vô nivihā. ²¹Obêc vô kwabo lec wê vêx ti nu obêc yubac ge od vêx tige dô hixôn viyin ên xovô nêbê buc wê ob yaxên myavinê ge vô kwabo lec, lêc nu obêc yubac vêl ge od ob xovô myavinê tii vac lêm. Nge, ob dô hixôn xêyaa nivihā ên wê nu tige yubac vêl ge. ²²Om gwêbaga xam dô hixôn nilôm viyin, lêc a obêc xê xam tii vac nang, om xam ob dô hixôn xêmyaa nivihā yang, di xomxo ti o tiyi wê ob vô xêyaa nivihā tige vêl ên xam ge lêm. ²³Obêc vô buc timuên ge xam obêc kinêg kiyang ti vô a i tii vac nang lêm. A nêl hixôn nôn vô xam bê xam obêc kitaa susu ti vô Mag lec a lêg ge od obêc vông vô xam. ²⁴Ilage xam o kitaa susu ti lec a lêg lêm, om xam obêc kitaa ge od xam ob kô nôn di xêmyaa obêc vô nivihā yang.

Yesu pwoo nipaên kibun ga pec

²⁵“A nêl kiyang tige vô xam tiyi xocbê kiyang pilepacên. Lêc obêc timuên ge od a ob nêl kiyang pilepacên ti i tii vac vô xam lêm. Nge, a ob nêl Mag kehe i yêp seac vô xam. ²⁶Vô buc tige xam obêc kitaa vô Anutu lec a lêg. A o nêl vô xam bê aca va ob kitaa vô Mag ên i ngidu xam xôn lêm, ²⁷ên Mag vaci xêyaa vin lec xam ên wê xam xêmyaa vin lec a di xam vông i vin ên xam nêbê a dô hixôn Mag lêc lam ge. ²⁸Ilage a dô hixôn Mag lêc a sea Mag di lam kibun, di gwêbaga a ob sea kibun di lax mi la vô Mag i tii vac.”

²⁹Mêd nue ngivihī nêl vô i ên nêbê, “Gwêbaga ông nêl kiyang yêp seac di ông o nêl kiyang pilepacên lêm. ³⁰Om gwêbaga xe xovô ên xe nêbê ông xovô kiyang vihati pyap om ông o bin di xomxo kinêg ông tax lêm. Om xe xovô ên xe nêbê ông dô hixôn Anutu lêc lam.”

³¹Mêd Yesu luu he vya ên nêbê, “Gwêbaga xam vông i vin a mê? ³²Xam ngô le. Buc vô kwabo lec pyap om tibii ob tii xam sea di xam toto ge ob la bom bom di aca va ob dô tamaên. Lêcom obêc aca va lêm, ên Mag dô hixôn a. ³³A nêl kiyang tiga vô xam ên a nêb xam dô vac a nilôg

hixôn kiyang malehe. Xam obêc tulec viyin gê kibun ga, lêc xam nilôm i nivihã, ên a pwoô nipaên kibun ga pec pyap.”

Yesu kitaa vô Anutu nêb i ngidu nue ngivihi xôn

17 ¹Yesu nêl kiyang tige pyap di manôn la kisii di i nêl ên nêbê, “Mag, buc tyo val pyap, om ông vông a lêg i vô levac, êdêc a vông ông lêm i vô levac. ²Ên ông vông xomxo vihati la vac a kwa ngibi ên ông nêb a vông he wê ông vinoô nêb he i tu axe ge vihati i dô maviha luta lêc luta. ³Di maviha luta dôên kehe bêga nêbê xomxo ob xovô ông bê ông Anutu nôn tived vixôhilôg, di ob xovô Yesu Kilisi wê ông vông i lam ge. ⁴A hilung xêseac wê ông vông ge gê kibun ga, di yuac vihati wê ông nêb a vông ge, a vông i la tiyi. ⁵Mag, ilage wê kibun gên ma ge od a dô hixôn ông vac xêseac, om gwêbaga a nêb ông vông xêseac tige vô a i tii vac nang. ⁶“A nêl ông lêm kitong vô xomxo wê ông vinoô nêb he tu axe gê kibun ga. He ge ông nume, di ông vông he vô a. He viac ông kiyang nivihã, ⁷di gwêbaga he xovô ên he nêbê kiyang vihati wê ông vông vô a ge, lam vô ông. ⁸Ên kiyang wê ông nêl vô a ge, a nêl kitong vô he mi he vông i vin. Di he xovô vixôhilôg nôn ên he nêbê a dô hixôn ông lêc lam, di he vông i vin ên he nêbê ông vông a lam.

⁹“Om a kitaa lec he. A o kitaa lec xomxo kibun ga vihati lêm. Nge, a kitaa ên xomxo wê ông vinoô nêb he i tu axe ge, ên he tu ông nume pyap. ¹⁰Xomxo vihati wê tu a nuge ge tu ông nume, di ông nume vihati tu a nuge. Di môp wê he vông ge vông a lêg vô levac. ¹¹A ob dô kibun ga i tii vac lêm. Nge, a ob loc vô ông. Dom he ge he ob dô kibun ga. Mag, ông ngibua, om ông viac he ên he i dô vac ông lêm ti wê ông vông vô a ge nilô, di he i dô tived tiyi xocbê u tived ge. ¹²Buc wê a dô hixôn he ge a viac he di he dô vac ông lêm ti wê ông vông vô a ge. A viac he nivihã om he ti ob la xôa ma lêm. Lêc xomxo tived ob kô myaviwen mi la xôa ma, ên kiyang wê yêp vac xolac ge i vô nôn lec. ¹³Gwêbaga a ob lôc vô ông, di a nêl kiyang tige gê kibun ga, ên a nêb xêyaa nivihã wê a vông ge i yêp vac he nilô.

¹⁴“A nêl ông kiyang vô he mi he vông i vin om tibii kibun ga yê he nipaên, ên xomxo vông vinên kehe o kibun ga lêm, tiyi xocbê a kehe o kibun ga lêm. ¹⁵A o kitaa ông bê ông kô he vêl ên kibun ga lêm. Nge, a kitaa ông ên a nêb ông viac he ên xomxo nipaên Seten. ¹⁶He kehe o kibun ga lêm, tiyi xocbê a kehe o kibun ga lêm. ¹⁷Ông vông he i tu ngibua ya kiyang nôn. Ên kiyang wê ông vông ge, kiyang nôn. ¹⁸Ông vông a lam dô vac xomxo kibun ga mahigun, om a vông he kô a kiyang mi la vac xomxo mahigun êno bêge. ¹⁹A vông a diluhu vô ông ên he, ên a nêb he i tu nume ngibua nôn.

²⁰“Lêc a o kitaa ên xomxo tigege vaci lêm. Nge, a kitaa ên tibii wê ob ngô he kiyang di vông i vin a hixôn ge. ²¹Mag, a nêb xomxo tigege vihati,

he i dô tived. Ên ông dô vac a nilôg di a dô vac ông nilôm, om a nêb he i dô vac u nilôd, ên xomxo kibun ga he i yê di xovô bê ông vông a lam. 22 Xêseac wê ông vông ge, a vông vô he ên a nêb he vihati i dô tived, tiyi xocbê u dô tived ge. 23 A dô vac he nilô di ông dô vac a nilôg, om a nêb he i dô nôn tived, ên xomxo kibun ga he i yê di xovô bê ông vông a lam, di he i xovô bê ông xêmyaa vin lec he tiyi xocbê ông xêmyaa vin lec a ge. 24 “Mag, ông vînoo xomxo tige nêb he i tu axe om a nêb he i dô hixôn a vac vîgwe wê a ob dô vac ge, ên he i yê xêseac wê a vông ge. Vô buc wê kibun gên ma ge, ông xêmyaa vin lec a om ông vông xêseac tige vô a. 25 Mag, ông xomxo bôbac. Xomxo kibun ga lungên ông, léc a xovô ông, di xomxo tige xovô nêbê ông vông a lam. 26 A nêl ông lêm kitong vô he di a ob nêl i tii vac vô he, ên môp wê ông xêmyaa vin lec a ge i yêp vac he nilô di a dô vac he nilô hixôn.”

Judas vông Yesu vac tibii vevac vîgê
(*Matyu 26:47-56; Mak 14:43-50; Luk 22:47-53*)

18 ¹Yesu kitaa pyap mêd la hixôn nue ngivîhi mi he la mia Kidlon vilu ganê di la vac yuac ti wê yevên xax vac ge. ²Lêc Judas ti wê nêl Yesu kitong vô tibii vevac ge xovô vîgwe tige, ên Yesu he nue ngivîhi mi kitucma vac vîgwe tige tiyi buc tibeac. ³Om Judas kô tibii vevac Lom kidu ti di kô xêhipu wê xomxo levac daa siên hixôn he Palisi vông ge mi he la, mêd he dii ngwax di kilê susu vevac di mila vac vîgwe tige.

⁴Yesu xovô môp wê he ob vông vô i ge vihati pyap om la kwabo vô he di kinêg vô he ên nêbê, “Xam myag letya?” ⁵Mêd he nêl vô i ên nêbê, “Xe myag Yesu Nasalet.” Om Yesu nêl vô he ên nêbê, “A ga mê.” Judas wê nêb ob vông Yesu vac he vîgê ge le hixôn he. ⁶Yesu nêl ên nêbê, “A ga xomxo tyo” mêd xomxo tige du mi lax ya nîmi di vixog sea mi la yêp kibun.

⁷Mêd Yesu kinêg vô he tii vac ên nêbê, “Xam myag letya?” Mêd he nêl vô i ên nêbê, “Yesu Nasalet.” ⁸Mêd Yesu nêl vô he ên nêbê, “A nêl vô xam gwêba ên a nêb a ga mê, om xam obêc myag a ge od xam vông a nuge i loc vêl lê.” ⁹Yesu nêl kiyang tige ên nêb kiyang wê nêl ilage i vô nôn lec, kiyang ti wê nêl ên nêbê, “Xomxo wê ông vînoo ên ông nêb he i tu axe ge, a o sea ti mi i la dô xel lêm.”

¹⁰Mêlêc Saimon Pita kô yipac ti om tul vêl ên ninîvi di sev xomxo levac wê mi si daa ge nu yuac ti nînya vilu hiyôv la vêl.

Nu yuac tige lê nêbê Malkas. ¹¹Mêd Yesu nêl vô Pita ên nêbê, “Hoo yipac i lôc vac ninîvi. Mia kilin wê Mag vông vô a ge, mêd a numên ob ma?”

He kô Yesu mi la vô Anas

¹²Tibii vevac tige hixôn xomxo levac ti wê viac he ge di xêhipu wê he Yuda vông ge he hôm Yesu xôn di ku xôn ¹³di kô mi la tax vô Anas wê

Kaiapas yen ge. Kaiapas ge wê tu xomxo daa siên nê levac lec klismas tige. ¹⁴Kaiapas ge wê nêl vô he Yuda ilage ên nêbê, “Xomxo tixed obêc yib ên ngidu xomxo vihati xôn ge od obêc nivihâ.”

Pita yax Yesu vun

(Matyu 26:69-70; Mak 14:66-68; Luk 22:55-57)

¹⁵Saimon Pita yuu li ngivihî ngwe, yuu la vô Yesu vixa. Xomxo wê mi si daa gee nêl xomxo levac xovô nu ngivihî ngwe ge, om nu ngivihî tige la xenac lôma hixôn Yesu vac xomxo levac tige ben ¹⁶dom Pita le vixun. Om nu ngivihî ngwe wê xovôxomxo levac tige lôm nêl vô vêx ti wê viac vuayen ge om kô Pita mi lam vac xenac lôma. ¹⁷Mêd vêx tige nêl vô Pita ên nêbê, “Ông ge mêd xomxo tiga nue ngivihî ti?” Lêc Pita nêl vô i ên nêbê, “Ma, a o tu i nue ngivihî ti lêm.” ¹⁸Vigwe vô ningigooên om nue yuac hixôn xêhipu vev ngwax mi nyuu, di Pita la le hixôn mi he nyuu ngwax.

Xomxo daa siên nê levac kinêg kiyang vô Yesu

(Matyu 26:59-66; Mak 14:55-64; Luk 22:66-71)

¹⁹Xomxo ti wê tu xomxo daa siên nê levac ge kinêg Yesu lec nue ngivihî di kinêg kiyang wê mi nêl vô xomxo ge. ²⁰Om Yesu nêl vô i ên nêbê, “Kiyang wê a mi nêl ge, ge a nêl i yêp seac vô xomxo vihati. Tiyi buc tibeac a la nêl kiyang vac Yuda xumac lilo di a nêl vac Anutu xumac ngibua wê Yuda tibeac lam mi kitucma vac ge, di a o nêl kiyang ti xôpacên lêm. ²¹Bêna lêc ông kinêg kiyang vô a? Ông kinêg vô xomxo wê ngô kiyang gee bêc a nêl kiyang vatya vô he. Ên he xovô kiyang wê a nêl vô he ge.”

²²Yesu nêl kiyang tige di xêhipu wê le ge ti lam pitap Yesu lia di nêl vô i ên nêbê, “Ông ob nêl kiyang tibêge vô xomxo levac wê mi si daa ge lêmê.” ²³Lêc Yesu nêl vô i ên nêbê, “A obêc nêl kiyang ti so ge od ông nêl kiyang tige bê kiyang tige so. Lêc kiyang wê a nêl ge obêc nôn ge, od bêna lêc ông hi a pileva?” ²⁴Yihi gên dô lec Yesu vigê di Anas vông i la vô Kaiapas wê tu xomxo daa siên nê levac ge.

Pita yax Yesu vun tii vac

(Matyu 26:71-75; Mak 14:69-72; Luk 22:58-62)

²⁵Pita nyuu ngwax mi le, lêc xomxo tige kinêg vô i ên nêbê, “Ông ge xomxo tige nue ngivihî ti?” Lêc Pita nêl ên nêbê, “A o i nue ngivihî ti lêm.” ²⁶Mêd xomxo ti wê tu xomxo daa siên nê levac ge, nue yuac ti dô. Nu yuac tige lie ti wê Pita sev ninya lihi vêl ge om nu yuac tige nêl vô Pita ên nêbê, “A xê ông dô hixôn i vac yuac lôma.” ²⁷Lêc Pita yax Yesu vun tii vac di lutixed kokilêx vô vya.

Yesu la le vô gavman levac Pailat manôn

(Matyu 27:1-2,11-14; Mak 15:1-5; Luk 23:1-5)

²⁸Vô pitoc yang he sea Kaiapas ben di kô Yesu mi la gavman levac ben, lêc he Yuda nêb ob la xumac lôma hixôn lêm, ên he xona nêb he obêc la

vac tibii wê o Yuda lêm ge ben ge od ob pwoos he xolac vac di o tiyi wê he ob ya vizid Pasova ge lêm. ²⁹Om gavman levac Pailat lam vixun vô he di kinêg vô he ên nêbê, “Xam ob vông kiyang vô xomxo tiga lec kiyang tina?” ³⁰Om he nêl vô i ên nêbê, “Xomxo tige vôngên nipaên obêc ma ge od xe ob kô mi lam vô ông lêm.”

³¹Mêd Pailat nêl vô he ên nêbê, “Om xam kô mi loc di loc yaxên i tiyi xochê xolac wê xam vông ge.” Lêc he Yuda nêl vô Pailat ên nêbê, “Xam Lom vibu xe ên xam nêbê o tiyi wê xe ob hi xomxo ti i yib ge lêm.”

³²Ilage Yesu nêl môp wê tibii ob hi i yib ge om kiyang wê he Yuda nêl ge vông kiyang wê Yesu nêl ge vô nôn lec.

³³Mêd Pailat lax vac ben di keac Yesu la vô i, di kinêg i ên nêbê, “Ông king wê he Yuda vông ge, me?” ³⁴Lêc Yesu luu i vya ên nêbê, “Ôcông va xovô kiyang tige lêc kinêg, me xomxo ya nêl a kitong vô ông?” ³⁵Mêd Pailat nêl vô i ên nêbê, “Bêna lêc ông kinêg kiyang tiga vô a? A o Yuda ti lêm. Ông lime Yuda hixôn xomxo levac wê mi si daa gee wê he kô ông mi lam vô a. Om ông vô va lê?”

³⁶Lêc Yesu nêl vô i ên nêbê, “He wê la vac a kwa ngibi di a tu he nêl king ge, kehe o yêp gê kibun ga lêm. Ên kehe obêc yêp kibun ga ge od a nuge obêc vông vevac kisuu a lec ên nêb he Yuda i o lêc hôm a xôn lêm. Lêc o bêge lêm, ên môp wê a tu he nêl king ge, o yêp gê kibun ga lêm.”

³⁷Om Pailat kinêg vô i ên nêbê, “Om ông ge king ti?” Mêd Yesu nêl vô Pailat ên nêbê, “Ôcông va nêb a king. A lam yubac gê kibun ga di kehe bêga nêbê a ob nêl kiyang nôn i yêp seac vô xomxo. Di xomxo wê kiyang nôn yêp vac he nilô ge wê ngô a vyag.” ³⁸Lêc Pailat kinêg vô Yesu ên nêbê, “Kiyang nôn ge vatya?”

Pailat nêl ên nêb he i tul Yesu lec xax pola
(*Matyua 27:15-31; Mak 15:6-20; Luk 23:13-25*)

Pailat nêl bêge mêd lop mi lôm vixun vô he Yuda di nêl vô he ên nêbê, “A o tulec kiyang ti lec xomxo tiga lêm. ³⁹Lêc môp wê xam vông ge mi yêp bêga nêbê buc Pasova ge a mi piwelac xomxo ti di vông i loc vô xam. Om xam nêb a piwelac king wê xam Yuda vông ge vêl, me?” ⁴⁰Lêc he tyuc vya levac ên nêbê, “O xomxo tige lêm. Nge, ông vông Balabas i lôm vô xe.” Balabas ge wê mi hi xomxo di vun he susu ge ti.

19 ¹Mêd Pailat nêl di nue vevac kô Yesu mi la pisa i ya yihi. ²Mêd tibii vevac tige buu kipomac yin di tung lec Yesu bazub di kô ngakwi hi tiyi xochê king mi vinyum ge mi la vinyum lec Yesu, ³mêd he la le vô i manôn di nêl vô ên nêbê, “Ông king wê Yuda vông ge, ông dô nimviha.” He nêl bêge di pitap i lia.

⁴Mêd Pailat lop mi lôm vixun tii vac di nêl vô he Yuda ên nêbê, “Xam ngô lê. A ob vông xomxo tige i lôm vô xam ên xam xovô bê a o tulec kiyang ti lec i lêm.” ⁵Mêd Yesu lop mi lam vixun, lêc kipomac yin wê

he buu ge dô lec bazub di i vinyum ngakwi hi wê king vông ge lec. Om Pailat nêl vô xomxo tigeê ên nêbê, “Xam wê xomxo tinê.” ⁶Mêd xomxo levac wê mi si daa gee hixôn xêhipu yê Yesu di tyuc vya levac nêbê, “Tul i lec xax pola. Tul i lec xax pola.” Mêd Pailat nêl vô he ên nêbê, “Om xaxam va kô i mi loc tul lec xax, ên a o tulec soên ti vô i lêm.” ⁷Mêd he Yuda nêl vô i ên nêbê, “Xolac wê xe vông ge ti yêp bêga nêbê xomxo tige ob yib, ên yong i ên nêb i Anutu nu.”

⁸Pailat ngô kiyang wê he nêl ge di xona mabu, ⁹di lax vac ben xumac lôma di kinêg vô Yesu ên nêbê, “Ông vac vigwe tina?” Lêc Yesu vô myapilihi vô i. ¹⁰Om Pailat nêl vô i ên nêbê, “Bêna lêc ông o nêl kiyang ti vô a lêmê? Xêkizêc wê a vông ge tiyi wê a ob piwelac ông vêl, di xêkizêc wê a vông ge tiyi wê he ob tul ông lec xax. Lêc mêd ông o xovô tige lêm?” ¹¹Lêc Yesu nêl vô i ên nêbê, “Anutu lag puunê obêc vông xêkizêc vô ông lêm ge od ông o tiyi wê ông ob vông susu ti vô a lêm. Om xomxo ti wê vông a vac ông vigê m ge, nipaên wê i vông ge levac mabu luu nipaên wê ông vông ge vêl.”

¹²Pailat ngô kiyang tige mêd myag môp wê nêb ob piwelac Yesu vêl ge. Lêc he Yuda tyuc ên nêbê, “Ông obêc piwelac i vêl ge od ông o timu vô kiyang wê king Sisa vông ge lêm, ên xomxo ti obêc nêb i king ge od xomxo tige kô i lec vô Sisa.”

¹³Pailat ngô kiyang tige mêd kô Yesu mi la vixun di lax dô lec sia wê xomxo mi dô lec di titô xomxo nêl kiyang ge. Vac he Yuda vya, he nêl vigwe tige lê nêbê Gabata, di kehe bêga nêbê pêt ngidax. ¹⁴Vô buc tige he Yuda viac he ên vizid Pasova wê he ob ya titige mêd hiyôv tyip kitôn di Pailat nêl vô he Yuda ên nêbê, “Xam wê king wê xam vông ge lê.” ¹⁵Lêc he tyuc ên nêbê, “Xam kô i mi loc vêl, di loc hi i lec xax pola.” Mêd Pailat kinêg vô he ên nêbê, “Xam nêb a tul king wê xam vông ge lec xax pola, me?” Mêd xomxo levac wê mi si daa gee nêl vô i ên nêbê, “King wê xe vông ge, Sisa tibed di king ngwe o dô hixôn lêm.” ¹⁶Om Pailat vông Yesu la vac he vigê ên nêb he i tul i lec xax pola.

He hi Yesu lec xax pola

(Matyu 27:32-44; Mak 15:21-32; Luk 23:26-43)

¹⁷Mêgem he kô Yesu mi la, mêd Yesu kilê xax pola wê he ob hi i lec ge di sea vigwe Jelusalem di mila vigwe ti wê he nêl lê vac Yuda vya nêbê Golgota, kehe bêga nêbê bazub len. ¹⁸Mêd he tul Yesu lec xax pola vac vigwe tige, di tul tibii yuu lec xax hixôn Yesu, om Yesu yux vac mahigun di tibii yuu ge, ngwe yux vilu di ngwe yux vilu.

¹⁹Mêd Pailat kivuu kiyang bo ti di tul lec xax hixôn. Kiyang tige nêl bêga nêbê, “YESU NASALET, KING WÊ HE YUDA VÔNG GE.” ²⁰Vigwe wê he hi Yesu lec xax ge yêp kwabo vô Jelusalem om xomxo tibeac kitong kiyang tige, ên Pailat kivuu vac Yuda vya di Lom vya di Glik vya.

²¹Mêgem Yuda levac wê mi si daa gee nêl vô Pailat ên nêbê, “Letya nêb ông kivuu bê king wê xe Yuda vông ge? Ông kivuu bêga bê xomxo tiga vaci nêl ên nêb i king wê Yuda vông ge.” ²²Lêc Pailat nêl vô he ên nêbê, “Kiyang wê a kivuu pyap ge ob yêp ya wê a kivuu ge.”

²³Tibii vevac tul Yesu lec xax pyap mêd kô i ngakwi di tung i dô kidu yuudiyuu di titang voma di toto kô. Dom ngakwi dia wê i vông ge o duuên tiyi xocbê siot yuu ngakwi baba lêm. Nge, duuên vac kwa di i la tô lec vixa. ²⁴Om tibii vevac nêl voma ên nêbê, “Il ob lêx nivimihi tige lêm, om il ob tide mi xê bêc letya ob kô.” He nêl bêge om kiyang ti wê yêp vac kipihac xolac ge vô nôn lec, kiyang wê nêl bêga nêbê,

“He titang a ngakwi tiyi he di he tide nêb he tina wê ob kô ngakwi dia wê a vông ge.”

Tibii vevac vông môt tibêge.

²⁵Vêx yuudiyuu le vac Yesu xax pola ngibi, Yesu ta yuu li vêx, di Malia wê Klopas vinê ge yuu Malia Makdala. ²⁶Mêd Yesu yê wê ta le ge, di a Jon, wê Yesu xêyaa vin lec a ge, a le hixôn om Yesu nêl vô ta ên nêbê, “Tag, wê. Ông num le ge.” ²⁷Nang dêc nêl vô a ên nêbê, “Wê, tam le ge.” Mêgem buc tige a kô Yesu ta mi i la dô hixôn a vac xumac wê a vông ge.

Yesu yib

(*Matyu 27:45-56; Mak 15:33-41; Luk 23:44-49*)

²⁸Tige pyap mêd Yesu xovô nêbê yuac vihati pyap, om nêl ên nêbê, “A ob num mia.” Yesu nêl bêge om kiyang bo ti wê

yêp vac kipihac xolac ge vô nôn lec. ²⁹Mia kilin le vac dêg om he kô myamilumac wê le vac gwec nilô ge di tinyum vac mia kilin di kilax vac xax ti di hôm la kisii vô Yesu mya. ³⁰Yesu num mia kilin tige pyap di nêl ên nêbê, “Pyap mêga.” Nêl di kwa too di i yib.

Tibii vevac kitiv Yesu vac byeac

³¹Buc tige, buc wê he Yuda ob viac he ên Pasova titige, ên Pasova ge da levac wê nginoo vêl ge, om he nêb xomxo ninivi i o yux lec xax pola vô buc levac lêm. Om he la nêl vô Pailat nêb tibii i loc hi he vixa i pec ên he i yib lutibed ên he ob kwax vêl. ³²Om tibii vevac la hi tibii yuu wê he hi lec xax hixôn Yesu ge vixa pec. ³³Di he yê Yesu lêc yib om he o hi Yesu vixa pec lêm. ³⁴Lêc tibii vevac ti kitiv Yesu vac byeac di hi yuu mia lam lutibed. ³⁵A Jon, a xê tige lec magnôn om a nêl kitong ên a nêb xam êno vông i vin. Kiyang wê a nêl ge kiyang nôn, di aca va xovô bêga bê kiyang tige nôn vixôhilôg.

³⁶Môt wê tibii vevac vông ge vông kiyang wê yêp vac kipihac xolac ge bo ti vô nôn lec, kiyang wê yêp bêga nêbê, “I len ti pecên obêc ma.” ³⁷Di kiyang ngwe yêp bêga nêbê, “Xomxo ob yê manôn lec xomxo ti wê he kitiv i ge.”

He lii Yesu vac lôva wê le vac ngidax ge
(*Matyu 27:57-61; Mak 15:42-47; Luk 23:50-56*)

³⁸Pyap mêd Josep wê ben Alimatia ge la kitaa Pailat ên nêb ob kô Yesu ninivi mi la yev. Josep ge vông i vin Yesu léc o nêl kitong seac lêm, ên xona ên he Yuda. Mêd Pailat tyuc lec nêb Josep i kô Yesu ninivi om Josep la kwax Yesu ninivi vêl ên xax. ³⁹Mêd Nikodimas ti wê la vô Yesu vô bucên ilage la hixôn, om kô xax myaluc wê nivivea niviha ge yuu di pilepac yuu xôn. Myaluc tige vîyin mabu tiyi xocbê 30 kilo. ⁴⁰Mêd yuu kô Yesu ninivi di vîyum vac nivimihi hixôn susu nivivea tige, tiyi xocbê môp wê Yuda mi vông vô xomxo yibên ge. ⁴¹Yuac ti yêp kwabo vô vîgwe ti wê he hi Yesu yib vac ge. Di lôva wê he kiden vac ngidax ên nêb ob lii xomxo yibên vac ge ti yêp vac yuac tige mahigun, léc he gên o lii yibên ti la vac lêm. ⁴²Buc tige, buc wê Yuda ob viac he ên sabbat titige, di lôva tige yêp kwabo om yuu kô Yesu ninivi mi la lii vac lôva tyo.

Yesu kidi lec vac yibên
(*Matyu 28:1-8; Mak 16:1-8; Luk 24:1-12*)

20 ¹Da pitoc yang, Malia wê ben Makdala ge loc mi la lôva, léc yê wê ngidax titêc la ninya vêl ên lôva mya ge. ²Om tup mi lax vô Saimon Pita yuu li ngivihi ngwe wê Yesu xêyaa vin lec i ge di nêl vô yuu ên nêbê, “He kô Apumtau vac lôva di xe lungên vîgwe wê he la lii vac ge.” ³Mêd Pita yuu li ngivihi ngweo la nêb ob la yê vac lôva. ⁴Yuu tup, léc li ngivihi ngwe ge luu Pita vêl di mila le vô lôva tax, ⁵om kilong lôva nilô léc yê nivimihi wê vîyumên Yesu ninivi vac ge diyêp, léc o la vac lôva nilô lêm. ⁶Mêd Saimon Pita mila timuên di la vac lôva nilô mi la yê nivimihi pileva wê diyêp ge, ⁷di yê nivimihi ti wê he vîyum Yesu bazub vac ge léc o dô hixôn nivimihi wê he vîyum Yesu nôn vac ge lêm. Nge, nivimihi tige buuên di i la dô vîyonên. ⁸Nang dèc nu ngivihi ngwe wê mila lôva tax ge la vac lôva nilô di la yê om vông i vin. ⁹Léc kiyang wê yêp vac kipihac xolac ên nêbê Yesu ob kidi lec vac yibên ge, he gên o xovô lêm. ¹⁰Mêd nu ngivihi yuu ge lax mi la ben.

Malia wê ben Makdala ge yê Yesu
(*Mak 16:9-11*)

¹¹Malia le kwabo vô lôva nivi di byag. Byag di kilong lôva nilô, ¹²léc yê angela wê vînyum ngakwi kwem ge yuu dô lec vîgwe wê Yesu ninivi yêp lec ge, ngwe dô vô bazub di ngwe dô vô vîxa. ¹³Mêd yuu nêl vô Malia ên nêbê, “Ông byag ên vatya?” Om Malia nêl vô yuu ên nêbê, “He kô a Apumtau vêl di a lungên vîgwe wê he la lii vac ge.”

¹⁴Malia nêl bêge mêd pilepac i, léc yê wê Yesu le ge, léc o xovô bê ge Yesu lêm. ¹⁵Mêd Yesu nêl vô i ên nêbê, “Vêx, ông byag ên vatya? Ông

myag letya?” Malia xo nêb mêd Yesu ge xomxo ti wê mi viac vigwe tige om nêl vô i ên nêbê, “Ông obêc kô xomxo tige ninivi mi la ge od ông nêl vigwe ti wê ông la lii vac ge kitong vô a, ên a ob la kô mi lôm.” ¹⁶Mêd Yesu nêl vô i ên nêbê, “Malia.” Mêd Malia pilepac i di nêl vô Yesu vac Yuda vya bêga ên nêbê, “Labonai.” Kehe bêga nêbê xolac kehe.

¹⁷Mêd Yesu nêl vô i ên nêbê, “Le i lêc vyax vigê lec a lêm, ên a gên o lec mi lax vô Mag lêm. Om ông lôc vô a lige di nêl vô he bê a ob lec mi lax vô a Mag di xam Mam, di a ob lax vô a Anutu di xam Anutu.” ¹⁸Mêgem Malia Makdala lax nêl vô Yesu nue ngivihî ên nêbê, “A xê Apumtau,” di nêl kiyang wê Yesu nêl vô i ge kitong vô he.

Yesu hilung i vô nue ngivihî

(*Matyu 28:16-20; Mak 16:14-18; Luk 24:36-49*)

¹⁹Da bucên ge Yesu nue ngivihî kitucma mi dô, lêc he xona ên Yuda om he tung xumac lec di dô xumac lôma, mêd Yesu mila le vac he mahigun di nêl vô he ên nêbê, “Xam nilôm i vô nivihî.” ²⁰Yesu nêl kiyang tige di hilung vigê yuu byeac piyaha vô he om he xêyaa vô nivihî ên wê he yê Apumtau ge. ²¹Mêd Yesu nêl tii vac vô he ên nêbê, “Xam nilôm i vô nivihî. Mag vông a lam om a ob vông xam êno loc.” ²²Yesu nêl kiyang tige mêd vê myakilôhò lec he di nêl vô he ên nêbê, “Xam kô Myakilôhò Ngibua. ²³Xam obêc kitya xomxo nên nipaên vêl ge od ob la vêl, lêc xam obêc hòm xomxo nên nipaên xôn ge od ob yêp vô he.”

Tomas yê Yesu

²⁴Buc wê Yesu mila hilung i vô nue ngivihî ge, nue ngivihî ti lê nêbê Tomas wê ta kô yuu li ngwe ked ge o dô hixôn he lêm. ²⁵Om lie ngivihî ya nêl vô i ên nêbê, “Xe xê Apumtau.” Lêc Tomas nêl vô he ên nêbê, “A obêc xê bilem myayen wê le vac vigê ge, di vông vigêg la vac, di vông vigêg la vac byeac lêm ge od a ob vông i vin lêm.”

²⁶Da ti la vêl dêc nue ngivihî kitucma mi dô vac xumac tii vac di Tomas dô hixôn he. He dô di tung xumac lec, lêc Yesu val le vac he mahigun di nêl vô he ên nêbê, “Xam nilôm i vô nivihî.” ²⁷Mêd nêl vô Tomas ên nêbê, “Titô vigêm i lam di wê a vigêg ga, di vông vigêm i lam vac a byeac. Ông nilôm i o vông yuu lêm. Nge, ông vông i vin.” ²⁸Mêd Tomas nêl vô i ên nêbê, “Ông ge a Apumtau, di ông a Anutu.” ²⁹Mêd Yesu nêl vô i ên nêbê, “Ông wê a om ông vông i vin mê. Lêc xomxo wê o yê a lêm lêc he vông i vin ge, he ob dô hixôn xêyaa nivihî.”

Jon kivuu kipihac tiga lec kehe va?

³⁰Yesu vông do levac tibeac hixôn mi nue ngivihî yê, lêc a o kivuu vihati vac kipihac tiga lêm. ³¹Lêc kiyang wê a kivuu vac kipihac ga, a kivuu ên a nêb xam vông i vin bê Yesu ge Kîlisi ti wê Anutu vông i lam ge

di i Anutu nu, ên xam obêc vông i vin ge od xam ob dô mamviha ên wê xam vông i vin Yesu ge.

Yesu hilung i vô nue ngivihî vigê vilu di sec yuu

21 ¹Yesu dô di buc mahigun ti lêc hilung i vô nue ngivihî tii vac gê mia luaên Taibilias, om kiyang yêp bêga nêbê ²Saimon Pita dêc Tomas wê ta kô yuu li ngwe ked ge, di Nataniel wê ben Kena vac vigwe levac Galili ge, di Sebedi nu yuu, di nue ngivihî yuu hixôn, he xôn dô. ³Mêd Saimon Pita nêl vô he ên nêbê, “A ob la hi pis.” Lêc he nêl vô i ên nêbê, “Il xôn ob la.” Om he la lec dipac di la tung leac vac mia vô bucên dia tige, lêc he o hi pis ti lêm.

⁴Mêd vigwe vidiên Yesu le vô mia ninya lêc nue ngivihî o xovô bê ge Yesu lêm. ⁵Mêd Yesu kinêg vô he ên nêbê, “Xam nuge, xam kô pis ya?” Lêc he nêl vô i ên nêbê, “Ma vêl, xe o kô pis ti lêm.” ⁶Mêd Yesu nêl vô he ên nêbê, “Xam nêx leac i loc vac mia vô dipac vilu wê vigêm hiyôv ge od xam ob tulec pis.” Om he nêx leac la vac mia di pis tibeac hiwocên vac leac, om o tiyi wê he ob pul leac i lôm ge lêm.

⁷Mêd nu ngivihî ti wê Yesu xêyaa vin lec i ge nêl vô Pita ên nêbê, “GeApumtau.” Pita kwax siot vêl di vông yuac mi dô, lêc ngô vya wê nêbê ge Apumtau, om vinyum ngakwi lec di sox la vac mia di la vô Yesu. ⁸Di nue ngivihî gên dô lec dipac om dipac didii leac hixôn pis di he lam. He lam dia tya tiyi 90 mita di mila vô mia ninya.

⁹He lop vêl ên dipac, lêc yê wê ngwax ditum di pis yêp lec di blet dô hixôn. ¹⁰Mêd Yesu nêl vô he ên nêbê, “Pis wê xam hi gwêbaga, xam kô ya mi lam.” ¹¹Om Saimon Pita lec lax lec dipac nang di he didii leac lam mia ninya. Pis tige tibeac hiwocên tiyi 153, lêc leac o tip lêm. ¹²Mêd Yesu nêl vô he ên nêbê, “Xam lam wa yaên.” Nue ngivihî xona om he ti o kinêg Yesu bê i ge letya, lêc he xovô nêbê ge Apumtau. ¹³Mêd Yesu la hôm blet di vông vô he, dêc vông pis hixôn vô he. ¹⁴Yesu kidi lec vac yibên di hilung i vô nue ngivihî lu tige wê vông yon ge.

Yesu nêl kiyang vô Pita

¹⁵He ya pyap mêd Yesu kinêg vô Saimon Pita ên nêbê, “Saimon, Jon nu, ông xêmyaa vin lec a luu he baba vêl, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin lec ông.” Om Yesu nêl vô Pita ên nêbê, “Ông viac sipsip nue wê a vông ge.”

¹⁶Mêd Yesu kinêg vô i lu ngwe hixôn ên nêbê, “Saimon, Jon nu, ông xêmyaa vin lec a, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.”

¹⁷Nang dêc Yesu kinêg vô Pita lu ti wê vông yon ge ên nêbê, “Saimon, Jon nu, ông xêmyaa vin lec a, me?” Pita ni lô vô viyin ên wê Yesu kinêg

i lu yon ên nêbê, “Ông xêmyaa vin lec a, me?” Om nêl vô Yesu ên nêbê, “Apumtau, ông xovô kiyang vihati di ông xovô ên ông nêbê a xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.

18 “A nêl hixôn nôn vô ông bê buc wê ông gên ngivihi ge, ôcông va vêx ông let di la vigwe wê ông nêb ông ob la ge, lêc obêc timuên wê ông ob vô kipwoc ge od ông ob titô vigêm la kisii di xomxo ngwe ob vêx let lec ông di kô ông mi la vac vigwe wê ông nêb ông la vacên obêc ma ge.”
 19 Yesu nêl kiyang tige ên nêb ob nêl Pita nêl môt wê ob yib di vông Anutu lê i vô levac ge kitong. Nêl kiyang tige pyap dêc nêl vô Pita ên nêbê, “Lam timu vô a vixag.”

Kiyang lec nue ngivihi ti wê Yesu xêyaa vin lec i luu vêl ge

20 Pita pilepac i di yê wê li ngivihi ngwe wê Yesu xêyaa vin lec i luu vêl ge timu vô yuu vixa mi val. Li ngivihi tige wê ilage he xôn dô mi ya, lêc du mi la vô Yesu di kinêg nêbê, “Apumtau, letya ob vông ông vac tibii vevac vigê?”
 21 Pita yê li ngivihi tige om kinêg vô Yesu ên nêbê, “Apumtau, xomxo tige ob dô bêna?”
 22 Lêc Yesu nêl vô Pita ên nêbê, “A obêc nêb xomxo tige i dô maviha di a vena lê ge od ge yêp vô a. Om ông lam timu vô a vixag.”

23 Mêd kiyang la vô Yesu nue vihati bêga nêbê nu ngivihi tige ob yib lêm. Lêc kiyang wê nêl nêbê ob yib lêm ge, Yesu o nêl bêge lêm. Nge, nêl ên nêbê, “A obêc nêb i dô maviha di a vena lê ge od ge yêp vô a.”

24 A, Jon, wê a nêl kiyang tige vihati kehe kitong di kivuu vac kipihac ga, di xe xovô ên xe nêbê kiyang wê a nêl di kivuu ge nôn.

25 Yesu vông môt tibeac hixôn om a xo ên a nêbê xomxo obêc kivuu toto ge vihati vac kipihac ge od kipihac tige obêc tibeac hiwocên hivun vigwe kibun ga ma vêl.

SINALE

Yuac wê he sinale vông ge

Yesu nêl ên nêb ob vông Myakilôhô Ngibua lam

1 ¹Tiopilas, kipihac wê a Luk, a kivuu tax ge, a kivuu lec kiyang yuu do vihati wê Yesu vông taxlee ge ²di i val vô buc wê Yesu lec mi lax lag puunê ge. Buc tige Myakilôhô Ngibua ngidu Yesu xôn di i vông yuac vô nue ngivihi wê vînoo he taxlee ge. Pyap dêc Anutu kô i di i lax lag puunê. ³Di buc wê Yesu kô myavinê mi yîb ge, od hilung i vô nue ngivihi ên nêb he i xovô bê kidi lec vac yibên. Dô hixôn he tîyi buc kehe yuu (40) di nêl Anutu ben kehe kitong vô he. ⁴Yesu dô hixôn he di nêl vô he ên nêbê, “Xam o léc sea Jelusalem lêm, di xam dô bin kiyang wê a nêl vô xam ilage ên a nêb Mag Anutu obêc vông i lam vô xam. ⁵Ilage Jon lipac xomxo ya mia, léc gwêbaga buc vô kwabo lec wê Anutu ob lipac xam ya Myakilôhô Ngibua.” ⁶Buc wê Yesu he nue ngivihi kitucma mi dô ge od he kinêg Yesu ên nêbê, “Apumtau, gwêbaga ông ob vông xecxe Islel tu levac di viac xecxe va xocbê ilage, me?” ⁷Lêc Yesu nêl vô he ên nêbê, “Buc tige o yêp vô xam bê xam ob xovô lêm. Buc tige Mag vaci xovô. ⁸Lêc Myakilôhô Ngibua obêc lam dô vac xam nilôm di vông xêkizêc vô xam, di xam ob nêl a kitong gê Jelusalem tax di i loc vac vigwe Judia vihati di i loc vigwe Samelia di i loc tîyi vigwe vihati.”

Yesu lec mi lax lag puunê
(Mak 16:19-20; Luk 24:50-53)

⁹Yesu nêl kiyang tige pyap léc nue ngivihi yê wê Yesu lec mi la kisii di la vac vîyobtoc nilô di he o yê i tii vac lêm. ¹⁰Nue ngivihi manôn vii lec Yesu wê lec mi la kisii ge di yê xôn, di lutibed xomxo yuu val le hixôn he. Yuu vînyum ngakwi kwem, ¹¹di yuu nêl vô he ên nêbê, “Xam xomxo Galili, xam wê mamnôn la kisii ên va? Yesu ti wê Anutu vông i lax mi la lag puunê ge obêc vena tîyi xocbê xam wê i di i lec mi lax kisii ganê ge.”

He vinoo xomxo ti le vac Judas nipilêhê

¹²Yesu nue ngivihî sea kitôn Oliv di lax mi la Jelusalem wê yêp kwabo vô kitôn Oliv tiyi xocbê 1 kilomita ge. ¹³He la Jelusalem di mîla vô xumac ti wê buhu yuu ge, léc he la dô vac ngwe kisii wê he mi dô vac ge. Xomxo tigeê lê bêga nêbê Pita yuu Jon di Jems yuu Andlu di Pilip yuu Tomas di Batolomyu yuu Matyu di Alpias nu Jems di Saimon Selot di Jems nu Judas. ¹⁴Yesu nue ngivihî tigeê hixôn vêx ya di Malia wê Yesu ta ge di Yesu lie vux, he vihati mi kitucma di kitaa vô Anutu.

¹⁵Di buc ti xomxo wê vông i vin Yesu ge tiyi xocbê 120, he kitucma mi dô, léc Pita kidi mi le vac he mahigun, ¹⁶di nêl vô he ên nêbê, “Xam lige, ilage Myakilôhê Ngibua vông Devit kivuu kiyang lec Judas wê didii xomxo mi la vô Yesu di he hôm i xôn ge. Om kiyang tige vô nôn lec. ¹⁷Judas ge wê mi dô hixôn xe di xe xôn kô Yesu yuac tiyima.” Pita nêl bêge vô he.

¹⁸Judas ge kô mone lec nipaên wê nêl Yesu kitong ge, di la kisuu kibun lec pyap, dêc mwoc di hi xêyaa toc mi i kipyax sea. ¹⁹Mêd xomxo Jelusalem vihati ngô wê Judas yib ge om nêl vigwe tige lê vac he vya nêbê Akeldama. Kehe bêga nêbê kibun wê hi kipyax lec ge.

²⁰Pita nêl vô he nang ên nêbê, “Kiyang ti yêp vac kipihac Sam bêga ên nêbê,

‘I nên xumac ob dô pileva di xomxo ti ob dô vac lêm.’

Di kiyang ngwe yêp vac Sam bêga ên nêbê, ‘Xomxo ngwe ob vông yuac wê i lê lec ge.’

²¹⁻²²Xolac nêl bêge, om il ob vinoo xomxo ti ên i le vac Judas nipilêhê, ên xe xôn la nêl kiyang kitong vô xomxo bê Apumtau Yesu kidi lec vac yibên. Il ob vinoo xomxo ti vac he wê mi dô hixôn il tiyi buc vihati wê Apumtau Yesu dô hixôn il ge, vô buc wê Jon lipac xomxo di i lam tyip lec buc wê Anutu kô Yesu mi i lec mi lax lag puunê ge.”

²³Pita nêl bêge om he yê xomxo yuu, Josep (lê ngwe nêbê Basabas di lê ngwe nêbê Jastas) yuu Mataias. ²⁴Di he kitaa vô Apumtau bêga nêbê, “Apumtau, ông xovô xomxo vihati nilô om ông nêl vô xe bê ông vinoo xomxo yuu ga ngwe na ²⁵wê ob le vac Judas nipilêhê di vông yuac sinale hixôn xe ge, ên Judas sea yuac tige di yib mi la vac ici va ben.” ²⁶Om he kivuu yuu lê lec ngidax yuu di hilog léc Mataias vôngo lam tô tax om he vông i la dô hixôn nue ngivihî vigê yuu di tô mi la ti (11).

Myakilôhê Ngibua lop mi lam

2 ¹Lec buc Pentikos xomxo wê vông i vin Yesu gee he vihati kitucma vac xumac ti mi dô, ²léc lutibed he ngô nididun ti xocbê vigwe viyiiên ge lam gê kisii, di nididun tige lam hivun xomxo wê dô vac xumac gee ma vêl. ³Mêd he yê xocbê ngwax mahelac ge lam dô lec xomxo toto bazub. ⁴Di Myakilôhê Ngibua lam la vac he vihati

nilô di he keac xomxo toto vya tiyi xocbê Myakilôhô Ngïbua vông vô he ge.

⁵He Yuda wê mi kitaa vô Anutu gee he tibeac dô vîgwe Jelusalem. He lam vac vîgwe vîhati di kitucma mi la Jelusalem. ⁶He ngô nididun om he tibeac la yê, lêc ngô wê xomxo tigeec keac he toto vya ge om he yetac. ⁷He yetac mabu di nêl ên nêbê, “Xomxo wê dikeac ge, he vîhati lam gê Galili, ⁸bêna lêc il ngô he keac vac il toto vyadê? ⁹Ên il mangwe lam gê Patia di Midia di Ilam di lam gê Mesopotemia yuu Judia di Kapadosia di Pontas di Esia ¹⁰di lam gê Plisia yuu Pampilia di Isip di vîgwe Libia viwen wê yêp kwabo vô Sailini di il mangwe lam gê Lom, ¹¹di il mangwe xomxo Yuda di il ya tibii baba wê il timu vô Yuda môp ge, di il mangwe lam gê Klit yuu Alebia, lêc il vîhati ngô he keac il toto vyad di he nêl kiyang lec do levac wê Anutu vông ge vô il.” ¹²He yetac di vông he nilô juda di he ya nêl voma ên nêbê, “Susu tiga kehe tibêna?” ¹³Lêc xomxo ya so vya vô he vông vinên di nêl ên nêbê, “Ge he num wain levac om vông he vô mavmav.”

Pita nêl xolac vô he

¹⁴Pita kidi lec mi le hixôn Yesu nue ngivîhi vîgê yuu di tô mi la ti di keac vya levac vô xomxo tigeec ên nêbê, “Xam lige Yuda hixôn xam vîhati wê xam lam dô Jelusalem gee, a ob nêl susu tiga kehe kitong vô xam mi xam ngô lê. ¹⁵Xam nêl ên xam nêbê xomxo tigae wain vông he vô mavmav, lêc o bêge lêm. Ên ga gên pitoc, 9 klok. ¹⁶Susu tiga wê plopet Joel nêl lec ilage bêga nêbê,

¹⁷‘Anutu nêl ên nêbê, “Obêc buc timuên lêc a obêc vông Myakilôhô Ngïbua wê a vông ge i loc hivun xomxo vîhati xôn, di nume vêx yuu vux obêc nêl kiyang seac tiyi xocbê plopete ge, di a obêc hilung kiyang kehe vîhati vô nume ngivîhi, di mame kipwoc ob yê vîvia lec kiyang kehe. ¹⁸Obêc vô buc tige a ob vông Myakilôhô Ngïbua i loc vô a nuge yuac vêx yuu vux vîhati di he ob nêl kiyang tiyi xocbê plopete ge. ¹⁹Di a ob vông do levac gê kisii ganê, di gê kibun ga hixôn, om hi yuu ngwax di ngwaxlu levac obêc val, ²⁰di hîyôv ob vô mapitoc vac di dentuc ob vô ma hi. Di buc levac wê Apumtau vông ge ob val timuên hixôn xêseac levac. ²¹Di xomxo vîhati wê ob kiyag vya lec Apumtau ge, Apumtau obêc hôm he lec.”’

²²“Plopet Joel nêl Anutu kiyang bêge, mêgem xam lige Islel, xam ngô kiyang wê a ob nêl vô xam bêga bê Yesu Nasalet ge Anutu vông i lam vông do levac yuu yuac nivîha ya xêkizêc wê Anutu vông ge, di xam wê di xovô pyap ên xam nêbê Anutu vông i lam. ²³Ilage Anutu xovô di hilu kiyang pyap nêb ob vông Yesu i lam vac xam vîgêm di xam vông i vac tibii nîpâen vîgê mi he hi i yib lec xax pola. ²⁴Lêc Anutu vô i vêl ên

myavinê wê yibên ge di tipi vô i kidi lec vac yibên, ên yibên o tiyi wê ob hôm i xôn ge lêm. ²⁵Tiyi xocbê kiyang wê Devit nêl lec Yesu ilage bêga ên nêbê,

‘A xê Apumtau le vô a magnôn tiyi buc vihati di i le vô a vigêg hiyôv, om susu ti o tiyi wê obêc pwoô a pec ge lêm. ²⁶Om vông a xêgyaa vô nivihã di a pîmil Anutu vac myag, di a nignivi ob dô bin kiyang nivihã. ²⁷Ên ông ob sea a kinug i loc dô vac vigwe yibên lêm, di ông ob sea num ngibua a nignivi i loc pital lêm. ²⁸Ông hilung môp wê a ob dô magviha ge vô a, di ông dô hixôn a tiyi buc vihati om vông a nilôg vô nivihã.’

²⁹“Devit nêl kiyang bêge mêgem xam lige, a ob nêl il bug Devit kitong vô xam bêga bê Devit o kivuu kiyang tige lec ici va lêm, ên ilage Devit yib mi he yev i vac lôva, di lôva wê i vông ge le vac il mahigun gwêbaga. ³⁰Lêc Devit ge plopet ti, om xovô kiyang wê Anutu hilu pyap vô i ên nêb obêc vông Devit bue timuên ti i tu king levac tiyi xocbê Devit ge. ³¹Devit xovô môp wê Anutu nêb ob vông timuên ge om kivuu kiyang lec wê Kilisi ob kidi lec vac yibên ge bêga ên nêbê,

‘Anutu ob sea i la dô vac vigwe yibên mi i ninivi i pital lêm.’

³²Yesu ge Anutu tipi vô i kidi lec vac yibên mi xe vihati xê di xe nêl i kitong. ³³Yesu lec mi lax lag puunê di la dô vô Anutu vigê hiyôv, di vông Myakilôhô Ngibua wê Ma nêl nêb ob vông ge lam vô xe om xam wê di ngô gwêbaga. ³⁴Devit o la lag puunê tiyi xocbê Yesu la ge lêm. Lêc Devit nêl kiyang lec Yesu bêga ên nêbê,

‘Apumtau Anutu nêl vô a Apumtau bêga ên nêbê, “Ông dô vô a vigêg hiyôv, ³⁵di obêc timuên a obêc vông tibii wê vông vevac vô ông ge he i dô vac ông vigêm vilu kwa ngibi.”’

³⁶“Mêgem xam Islel vihati, xam xovô bêga bê Yesu wê xam hi lec xax pola mi i yib ge Anutu vông i tu Apumtau di i tu Kilisi.” Pita nêl kiyang tige.

Xomxo tibeac vông i vin Yesu

³⁷Xomxo tigege ngô kiyang wê Pita nêl ge, lêc kiyang tige vông he nilô hibua sea om he kinêg vô Pita he lie ên nêbê, “Xam lige, xe ob vông bêna?”

³⁸Om Pita nêl vô he ên nêbê, “Xam vihati pilepac nilôm i vô paha lec di lipac mia lec Yesu Kilisi lê, ên i kitya xam nêm nipaên vêl. Di Anutu obêc vông Myakilôhô Ngibua i lam vô xam. ³⁹Ên Anutu hilu kiyang pyap ilage nêb ob vông Myakilôhô Ngibua vô xam hixôn xam nume di xomxo wê dô teva ge hixôn, om ob vông vô he vihati wê il Apumtau Anutu tyuc he nêb he i lam vô i ge.”

⁴⁰Mêd Pita nêl kiyang tibeac ya vô he di nêl xêkizêc vô he ên nêbê, “Xam viac xam nivihã ên xam o lêc vông xam vô nipaên hixôn xomxo

nipaên wê dô gwêbaga lêm.” ⁴¹Mêgem he wê vông i vin Pita kiyang ge he lipac mia di la dô hixôn xomxo vông vinên. He wê lipac mia lec buc tige, he tiyi xocbê 3,000.

Môp nivihha wê xomxo vông vinên vông ge

⁴²Tiyi buc vihati xomxo vông vinên ngô Yesu nue ngivihi xolac di viac nivihha, di he ngiduma xôn di ya mya yêp tived di le xêkizêc vac kitaaên. ⁴³Anutu vông Yesu nue ngivihi vông do tibeac om xomxo vihati yê di xona. ⁴⁴Mêd xomxo vông vinên vihati dô hixônma di susu wê he toto vông ge, he yê tiyi xocbê he vihati xe. ⁴⁵Om susu hixôn kibun wê he vông ge, he vông mi tibii kisuu, di he kê mone mi lax titang vô lie vông vinên wê nêd susu maên gee. ⁴⁶He nilô tived di he kituc la vac Anutu xumac ngibua tiyi lec buc vihati, di he la ya hixôn lie vac xumac toto hixôn xêyaa nivihha. ⁴⁷He pimil Anutu tiyi buc vihati di xomxo vihati xêyaa vin lec he di yê he nivihha. Mêd tiyi buc vihati Apumtau vô xomxo ya vêl ên he nêd nipaên di vông he la dô hixôn i nue vông vinên.

Pita yuu Jon vông xomxo ti wê vixa vô nipaên ge vô nivihha lec

3 ¹Buc ti Pita yuu Jon la, nêb ob la kitaa vac Anutu xumac ngibua vô hiyôv manôn 3 klok, wê he la mi kitaa lec ge. ²Lêc yuu mila vô xomxo ti wê ta kê i hixôn vixa nipaên ge. Xomxo tyo, lie mi ken i mi la tiyi lec buc vihati mi la tung i vô xumac ngibua vuayen ti wê he nêl lê nêbê vuayen nivihha, ên xomxo tige mi kitaa nêd mone vô xomxo wê la vac xumac ngibua ge. ³Xomxo tyo yê wê Pita yuu Jon mila ge om kitaa yuu ên nêb yuu i vông mone vô i. ⁴Mêd yuu yê xomxo tyo kizêc di Pita nêl vô i ên nêbê, “Wê mam lam xii lê.” ⁵Om tyo lax ma lec yuu, ên nêb mêd yuu ob vông susu ti vô i. ⁶Lêc Pita nêl vô xomxo tyo ên nêbê, “A o kê mone ti lêm. Lêc susu wê dô vô a ge, a ob vông vô ông. Lec Yesu Kilisi Nasalet lê, a nêl vô ông bê ông kidi lec mi loc.” ⁷Mêd Pita hêm lec xomxo tyo vigê hiyôv di vông i kidi lec, di lutibed vixa kitu yuu vixa pitehe vôxêkizêc lec ⁸di i sox mi la le di vilee la, mêd la vac xumac ngibua hixôn yuu di la vô sox sox di pimil Anutu. ⁹Mêd xomxo vihati yê wê xomxo tyo vilee mi la di lôm di pimil Anutu ge, ¹⁰di he xovô ên nêbê ge xomxo ti wê mi dô vô xumac ngibua vuayen lê nêbê vuayen nivihha ge di mi kitaa susu vô xomxo ge om he yetac mabu di nga vigê ên wê tyo vô nivihha lec ge.

Pita nêl xolac vac Anutu xumac ngibua

¹¹Xomxo tyo vii lec Pita yuu Jon mêd xomxo vihati yetac di tup mi la vô yon lec xumac pêt myahipu nilô ti wê he nêl Solomon lê lec ilage. ¹²Lêc Pita yê wê he kituc lam ge om nêl vô he ên nêbê, “Xam lige Islel, xam yetac ên va? Bêna lêc xam wê xii kizêcê? Mêd xam so ên xam nêbê

xomxo tige vô nivihā lec ya xêkizêc yuu nivihā wê xii vông ge, me?
 13 Anutu ti wê Eblaham yuu Aisak di Jekop di il buge he Anutu, ge wê vông i nu yuac Yesu lê vô levac. Lêc xomxo tyo ti wê xam vông i la vac Pailat vigê di Pailat nêb ob piwelac i vêl, lêc xam yax i vun vô Pailat manôn. 14 Yesu ge xomxo nivihā di i xomxo ngibua, lêc xam yax i vun di kitaa Pailat ên xam nêb i piwelac tibii nipaên wê hi xomxo yib ge i lôm vô xam, 15 di xomxo ti wê maviha dôên kehe ge, xam hi i yib. Lêc Anutu tipi vô i kidi lec maviha vac yibên mi xe xê lec mamnôn. 16 Xomxo ti wê xam wê di xovô i ge vông i vin Yesu, om Yesu lê ngidu xomxo tige xôn di vông i vixa vô nivihā lec. Vông vinên wê i vông ge vông i vô nivihā lec mi xam vihati wê lec mamnôn.

17 “Xam lige, a xovô ên a nêbê môt wê xam hixôn xam lime levac vông vô Yesu ge, xam lungên môt nivihā om xam vông môt tibêge. 18 Ilage Anutu vông plopete vihati he nêl kitong ên nêbê Kilisi wê Anutu vông i lam ge ob kô myavinê, om môt wê xam vông ge vông kiyang tyo vô nôn lec.

19 “Mêgem xam pilepac xam nilôm i loc vô Anutu ên i kitya xam nêb nipaên vêl. 20 Xam obêc vông bêge ge od Apumtau obêc vông xam dô seac vêl di xam ob kô xêkizêc, di obêc vông Yesu Kilisi wê nêl lec xam pyap ge i lam vô xam. 21 Ên Yesu dô lag puunê om ob dô bin buc wê Anutu ob vông susu vihati i vô paha lec ge, tiyi kiyang wê Anutu nêl vac plopete ngibua mya ilage. 22 Moses nêl kiyang bêga ên nêbê,

‘Apumtau Anutu obêc vông xam lime ti i tu plopet tiyi xocbê a ge, om xam lêc vô ninyam lehe vô kiyang vihati wê ob nêl vô xam ge.

23 Lêc xomxo vihati wê obêc vô ninya kitu vô plopete tyo vya ge, Anutu obêc kitya he vêl, di he ob dô hixôn Anutu nue tii vac lêm.’

24 Moses nêl kiyang bêge, di plopete ilage wê nêl Anutu kiyang kitong ge, Samyuel hixôn plopet wê val timuên ge, he vihati nêl kiyang lec buc wê val gwêbaga mi il dô vac ge.

25 “Xam ge plopete nue di kiyang wê Anutu hilu vô bume ilage ob lam vô xam hixôn, kiyang ti wê Anutu nêl vô Eblaham ên nêbê, ‘A ob vông bume timuên i tu xomxo kibun ga vihati nêb vizid kehe.’ 26 Om Anutu vinoo i nu yuac mi vông i lam vô xam Yuda tax, ên nêb i vô nivihā vô xam di xam toto pilepac xam di sea môt nipaên.”

Pita yuu Jon le vô kaunsil manôn

4 1 Yuu gên nêl xolac vô xomxo tige, lêc xomxo wê mi si daa vô Anutu gee hixôn xêhipu levac ti wê mi viac Anutu xumac ngibua ge di xomxo Sadyusi mangwe val vô yuu, 2 di he xêyaa vô myavinê vô yuu ên wê yuu tixuu xomxo ya kiyang bêga nêbê Yesu kidi lec vac yibên om xomxo yibên vihati obêc kidi lec maviha nang ge. 3 Om he kô yuu mi la tung vac xumac kalabuhu, nêb yuu i dô di i vidii lê, ên ge vigwe huc.

4Lêc xomxo wê ngô Pita kiyang gee he tibeac vông i vin, om he vux wê vông i vin ge tiyi xocbê 5,000.

5Di vigwe vidiiên he Yuda levac hixôn gyovixa di he wê xovô Moses xolac kehe gee, he xôn kitucma gê Jelusalem. 6He kitucma hixôn xomxo levac wê mi si daa vô Anutu ge, Anas yuu Kaiapas di Jon yuu Aleksanda hixôn lie ya. Anas ge wê tu he vihati bazub. 7Om he kô Pita yuu Jon mi lam lax yuu le vô he manôn di kinêg vô yuu ên nêbê, “Muu kô xêkizêc vô letya di muu nêl letya lê, lêc muu vông xomxo tige vô nivîha lecê?”

8Mêd Myakilôhô Ngîbua hivun Pita xôn om Pita nêl vô he ên nêbê, “Xam xomxo levac hixôn xam gyovixa, 9gwêbaga xam kinêg xii ên wê xii ngîdu xomxo ti wê vixa vô nipaên ge xôn, ên xam nêb xam ob xovô bê xii vông i vô nivîha lec tibêna? 10Om xam vihati hixôn lime Islel vihati, xam xovô bêga bê xêkizêc wê Yesu Kîlisi Nasalet vông ge wê vông xomxo tiga vô nivîha lec mi i le vô xam mamnôn. Yesu ge, xam hi i yib lec xax pola, lêc Anutu tipi vô i kidi lec vac yibên. 11Yesu ge ngîdax ti wê xam xumac loxên wê ên xam nêbê nipaên ge, lêc i tu ngîdax xêkizêc ti wê xumac ob le xêkizêc ya ge. 12Ên xomxo ngwe o tiyi wê ob hôm il lec ge lêm, ên Anutu o nêl xomxo kibun ga ti vô il ên nêb i kitya il nêd nipaên vêl lêm. Nge, Yesu tibed.”

13Xomxo levac tige, he yetac ên kiyang wê Pita yuu Jon nêl ge, ên yuu ge xomxo viyangtôv yuu di yuu o xulac xumac ti lêm, lêc yuu nêl kiyang hixôn xêkizêc di yuu o xona lêm. Om he xovô nêbê yuu ge wê mi dô hixôn Yesu ilage. 14Di he yê xomxo ti wê yuu vông i vô nivîha lec ge le hixôn yuu, om he nêl kiyang ti o yêp wê ob nêl lax vô yuu ge lêm. 15Om he nêl vô yuu nêb yuu i sea xumac kaunsil di loc vixun. Yuu la vixun di he nêl voma ên nêbê, 16“Il ob vô vatya vô xomxo yuu ganê? Ên xomxo Jelusalem vihati xovô do levac wê yuu vông ge om o tiyi wê il ob yax vun ge lêm. 17Lêc il ob le vac kiyang tige xôn, ên i o lêc vô levac mi loc vac xomxo vihati ninya lêm. Om il ob vông vibuên xêkizêc vô yuu bê yuu i o nêl kiyang vô xomxo lec Yesu lê i tii vac lêm.” 18Om he keac yuu lax vô he di nêl kiyang xêkizêc vô yuu ên nêbê, “Muu o lêc nêl kiyang lec Yesu lê lêm, di muu o lêc tixuu xomxo lec lê tige lêm.” 19Lêc Pita yuu Jon nêl vô he ên nêbê, “Xam ngô lê. Xii obêc sea Anutu xolac di vông i vin kiyang wê xam nêl ge od mêd Anutu ob yê xii nivîha? Xam xovô lê. 20Xii o tiyi wê xii ob dô kiyang maên ge lêm. Nge, xii ob nêl kiyang vihati wê xii ngô di xê mamnôn lec ge kîtong.”

21Kaunsil tige he nêl kiyang xêkizêc vô yuu tii vac di vông yuu la. He nêb he ob vông viyin vô yuu, lêc tiyiên ma, ên xomxo vihati pimil Anutu ên nivîha wê yuu vông ge. 22Xomxo ti wê yuu vông i vô nivîha lec ge, kliskas wê i vông ge kehe yuu (40).

Xomxo vông vinên kitaa vô Anutu

23He kaunsil vông Pita yuu Jon la, om yuu lax mi la vô lie vông vinên di lax nêl kiyang wê xomxo levac wê mi si daa vô Anutu gee hixôn he

gyovixa nêl vô yuu ge kitong vô he. ²⁴He ngô pyap di he xôn nilô tived di he kitaa vô Anutu bêga nêbê, “O Apumtau, ông levac wê ôcông va tung lag yuu kibun di gwec hixôn susu vihati yang. ²⁵Ilage Myakilôhô Ngibua wê ông vông ge vông xe bug Devit wê ông num yuac ge nêl ông kiyang bêga nêbê,

‘Bêna lêc tibii madiluhu xêyaa vô myavinê luu vêl? Bêna lêc he nêl kiyang vaxvax wê nôn maên ge? ²⁶King kibun ga vihati viac he ên vevac, di xomxo levac kitucma ên nêb ob vông vevac vô Apumtau Anutu hixôn Kilisi wê i vông i lam ge.’

²⁷Kiyang tige vixôhilôg nôn, ên Helot yuu Pontias Pailat di tibii wê o Yuda lêm gee hixôn xomxo Islel ya, he xôn kitucma vac vigwe ga ên nêb ob vông viyin vô Yesu, ông num yuac ngibua wê ông vinoa i ge. ²⁸He kitucma ên nêb ob hi Yesu, tiyi kiyang wê ông nêl pyap ilage ya xêkizêc wê ông vông ge, ên ông nêb obêc vô nôn lec timuên. ²⁹O Apumtau, gwêbaga xe kitaa vô ông bê ông xovô kiyang viyin wê he Yuda levac nêl ge di ngidu xe xôn, ên ông nume yuac xe le xêkizêc di nêl ông xolac i yêp seac di xonaên i ma. ³⁰Di ông vyax vigêm lec xomxo yidac ên he i vô nivihâ lec, di ông vông do levac ya lec num yuac ngibua Yesu lê.”

³¹He kitaa pyap mêd xumac ti wê he dô vac ge yoc di Myakilôhô Ngibua lam hivun he xôn di he nêl Anutu xolac hixôn xêkizêc di he o xona lêm.

Xomxo vông vinên vihati nilô yêp tived

³²Xomxo vông vinên vihati nilô tived di he xêyaa vin lecma, di he ti o nêl ên nêbê susu wê i vông ge, ge ici xe lêm. Nge, susu wê he toto vông ge he yê tiyi xocbê he vihati xe. ³³Mêd Yesu nue ngivihi nêl kiyang hixôn xêkizêc nêbê Apumtau Yesu kidi lec vac yibên, di xomxo vông vinên vihati, he dô vac xêyaa vin lecên nilô. ³⁴Di he ti, susu o ma ên he lêm, ên xomxo vihati vông kibun hixôn xumac wê he vông ge mi tibii kisuu, di he kô mone ³⁵mi la vông vô Yesu nue ngivihi ên nêb he i titang vô xomxo wê nêl susu maên gee.

³⁶Xomxo ti dô lê nêbê Josep, lêc Yesu nue ngivihi nêl i lê ngwe nêbê Banabas. (Lê tige kehe bêga nêbê xomxo wê mi ngidu xomxo xôn ya kiyang nivihâ ge.) Josep ge Livai ti di i ben Saiplas, ³⁷lêc Josep vông i kibun mya ti mi tibii kisuu di i kô mone mi la vông vô Yesu nue ngivihi.

Ananaias yuu Sapaila

5 ¹Xomxo ti lê nêbê Ananaias yuu vinê Sapaila, yuu vông kibun wê yuu vông ge ti mi tibii kisuu, ²lêc Ananaias vun mone viwen di kô viwen mi la vông vô Yesu nue ngivihi, di vinê xovô môt wê i vông ge. ³Lêc Pita nêl vô i ên nêbê, “Ananaias, bêna lêc Seten dô vac ông nilôm di vông ông vun mone wê ông kô lec kibun ge viwen di ông kityoo kiyang

vô Myakilôhô Ngibua? ⁴Ilage wê tibii gên o kisuu kibun tige lêm ge, od kibun tige tu ôcông va xe. Di buc wê tibii kisuu pyap ge od mone ge ôcông va xe. Bêna léc ông xovô môp tibêge yêp vac nilômê? Ông o kityoo xomxo lêm. Nge, ông kityoo Anutu.” ⁵Ananaias ngô kiyang tige di vixog mi la kibun di la yib lutibed. Om xomxo wê ngô kiyang tige vihati xona mabu. ⁶Mêd xomxo ngivihi ya lam viyum i vac nivimihi di kô mi la vixun mi la yev.

⁷Hiyôv manôn yon lam la vêl mêd Ananaias vinê val vô Pita, léc lungên wê liya yib ge. ⁸Om Pita kinêg vô i ên nêbê, “Mone wê muu kô lec kibun ge, muu vông i lam vihati, me?” Mêd Sapaila luu i vya ên nêbê, “Mone vihati ge, xii vông i loc.” ⁹Om Pita nêl vô i ên nêbê, “Bêna léc muu liyam nêb muu ob yaxên Apumtau Myakilôhô Ngibua? Wê lê. Xomxo wê yev liyam ge vena le vô vuayen om ob lam ken ông mi la êno bête.” ¹⁰Lutibed vêx tyo vixog mi la kibun mi la yêp vô Pita vixa di yib, di xomxo ngivihi wê yev liya ge lamyê wê yib ge om kô mi la yev i pikeb liya. ¹¹Om xomxo vông vinên hixôn xomxo wê ngô kiyang tigege he vihati xona mabu.

Yesu nue ngivihi vông do tibeac

¹²Yesu nue ngivihi vông do levac tibeac vac xomxo mahigun, di xomxo vông vinên dô kidu ti di la mi kitucma vac Anutu xumac ngibua lec pêt myahîpu nilô ti wê he nêl Solomon lê lec ilage. ¹³Mêd xomxo baba xona di o kituc la hixôn he lêm, léc xomxo tibeac pimil he di yê he nivihia, ¹⁴di xomxo vêx yuu vux tibeac vông i vin Apumtau di lam dô hixôn xomxo vông vinên. ¹⁵Mêd xomxo mi ken lie wê yidac gee mi la lii vac môp di he yêp lec pêt, ên he xo ên he nêbê Pita obêc val ge od hinyena wê i vông ge i lam lec he di vông he i vô nivihia lec. ¹⁶Di xomxo tibeac vac vigwe wê yêp kwabo vô Jerusalem ge, he kô xomxo wê yidac gee, hixôn xomxo wê vimwo nipaên dô vac he gee mi la vô Yesu nue ngivihi, di he vihati vô nivihia lec.

Angela tax xumac kalabuhu ên Yesu nue ngivihi

¹⁷Mêd xomxo wê mi si daa vô Anutu gee, he nêl xomxo levac hixôn he Sadyusi wê mi dô hixôn i gee he xêyaa vô nipaên vô Yesu nue ngivihi ên wê xomxo vihati pimil he ge, ¹⁸om he hôm Yesu nue ngivihi xôn di tung he la vac xumac kalabuhu. ¹⁹Om he dô di vô bucên Apumtau vông angela ti lam tax xumac ên he di kô he mi la vixun di nêl vô he ên nêbê, ²⁰“Xam lôc vac Anutu xumac ngibua di loc nêl kiyang maviha dôên kehe kitong i yêp seac vô xomxo vihati.” ²¹Yesu nue ngivihi ngô angela vya di kidi mi la pitoc yang di la vac Anutu xumac ngibua di nêl xolac vô xomxo.

Mêd xomxo daa siên li levac tyo hixôn xomxo wê mi dô hixôn i gee, he keac kaunsil wê he Yuda vông ge hixôn Yuda levac vihati lam kitucma, di

he vông xomxo ya la xumac kalabuhu ên nêb he i loc kô Yesu nue ngivihi mi lam. ²²Om xêhipue la yê xumac kalabuhu nilô, lêc Yesu nue ngivihi o dô lêm. He xôa ma om he lax nêl vô he kaunsil ên nêbê, ²³“Xe la xê xumac kalabuhu lêc xumac vuayen tung xôn vihati di tibii viacên dile vô vuayen om xe tax vuayen mi xê xumac nilô lê, lêc xe o tulec xomxo ti xeedô lêm. Xumac nilô pileva.”

²⁴Mêd xêhipu levac ti wê mi viac Anutu xumac ngibua ge hixôn xomxo levac wê mi si daa vô Anutu gee, he ngô kiyang tige di nilô myag kiyang tibeac di he kinêg voma ên nêbê, “Kiyang tige obêc tibêna?” ²⁵Mêd xomxo ti mila vô he di nêl ên nêbê, “Xam wê lê. Xomxo ti wê xam tung he la vac kalabuhu gee, he la le vac Anutu xumac ngibua di nêl xolac vô xomxo.” ²⁶Om xêhipu levac tige hixôn xêhipu ya la kô Yesu nue ngivihi lêc hiên he ma, ên he xona ên he nêb xomxo obêc nêx he ya ngidax.

Yesu nue ngivihi xonaên ma di nêl kiyang lec kaunsil manôn

²⁷Mêd he kô Yesu nue ngivihi mi la lax he le vô kaunsil manôn, mêd xomxo daa siên nêb levac nêl vô he ên nêbê, ²⁸“Xe le vac xam xôn di nêl xêkizêc vô xam ên xe nêbê xam o lêc nêl kiyang lec Yesu lê lêm. Lêc xam o ngô kiyang wê xe nêl ge lêm, di xam nêl kiyang tige vô levac vac vigwe Jelusalem vihati, di xam nêb xam ob nêl kiyang kityooên lec xe bê xe hi Yesu yib.”

²⁹Lêc Pita hixôn lie luu he vya ên nêbê, “Xe ob timu vô Anutu kiyang, di xe ob timu vô kiyang wê xomxo vông ge lêm. ³⁰Xam hi Yesu yib lec xax pola, lêc Anutu wê buge mi kitaa vô ge tîpi vô i kidi lec, ³¹di vông i la dô vô i vigê hiyôv, di i tu il nêd mugên wê ob hôm il lec ge, ên nêb il Islel pilepac il di vông nilôd i loc vô Anutu ên i kitya il nêd nipaên vêl. ³²Kiyang tige vihati, xe nêl kitong vô xomxo, di Myakilôhê Ngibua nêl kiyang tige hixôn. Myakilôhê Ngibua tige Anutu vông vô xomxo wê ngô i kiyang di timu vô ge.”

³³He kaunsil ngô Pita kiyang tige di he xêyaa vô myavinê mabu vô Yesu nue ngivihi om nêb ob hi he yib. ³⁴Lêc xomxo kaunsil ti lê nêbê Gameliel kidi lec ên nêb ob nêl kiyang vô lie. Gameliel ge Palisi ti wê mi tixuu xomxo ya Moses xolac ge, om xomxo vihati pimil i di vông i lê vô levac. Lêc Gameliel nêl ên nêb he i vông Yesu nue ngivihi i lop mi loc vixun vêl. ³⁵He lop mi la vixun pyap di Gameliel nêl vô he kaunsil ên nêbê, “Xam lige Islel, môt wê xam nêb xam ob vông vô xomxo tige, xam vyac xovô nivîha lê. ³⁶Xam xovô pyap wê ilage Tiudas yong i nêb i xomxo levac, di xomxo tibeac tîyi 400 timu vô i vixa, lêc gavman hi i yib di xomxo vihati wê timu vô i gee pec sea di yuac wê he vông ge tô mi la. ³⁷Nang dêc buc wê gavman kivuu xomxo lê ge, Judas gê Galili didii xomxo tibeac la vô i, nêbê he ob vông vevac vô gavman, lêc gavman hi i yib di xomxo wê timu vô i vixa gee pec mi moo sea. ³⁸Om gwêbaga a ob

nêl vô xam bê xam sea Yesu nue ngivihi tigege di vông he i loc, ên yuac wê he vông ge, xomxo vaci obêc tu kehe ge od obêc vô nipaên. ³⁹Lêc Anutu obêc tu kehe ge od xam o tiyi wê xam ob le vac xôn ge lêm, ên obêc tiyi xocbê xam vông vevac vô Anutu.”

⁴⁰Mêd kaunsil tigege vihati lee yuu lec Gameliel kiyang, om he keac Yesu nue ngivihi vena di he nêl mi tibii hi he ya yihi, di he nêl vya xêkizêc vô he ên nêb he i o léc nêl kiyang lec Yesu lê i tii vac lêm. Pyap di vông he lop mi la. ⁴¹Om Yesu nue ngivihi sea kaunsil di lop mi la vixun hixôn xêyaa nivaha, di pimil Anutu ên wê Anutu xo nêbê he tiyi wê ob kô viyin lec Yesu lê ge. ⁴²Mêd he la nêl Yesu Kilisi xolac vô xomxo vac Anutu xumac ngibua di la nêl vac xomxo toto ben tiyi buc vihati.

**He vinoo xomxo vigê vilu di sec yuu ên nêb
he i ngidu Yesu nue ngivihi xôn**

6 ¹Vô buc tigege xomxo tibeac vông i vin Yesu om xomxo vông vinên vô tibeac. Lêc he vilu wê keac vya Glik ge yê he wê keac vya Yuda ge nipaên ên nêbê, “Xam mi vông byed vô susu vô he wê nêb susu maên gee tiyi lec buc vihati, léc xam o vông vô vêxôv wê xe vông ge hixôn lêm.”

²Om Yesu nue ngivihi vigê yuu di tô mi la yuu keac xomxo vông vinên vihati lam kitucma, di nêl vô he ên nêbê, “Xe obêc sea yuac wê xe mi nêl Anutu xolac ge di la vông byed vô susu yaên ge od tiyiên ma. ³Om xam lige, xam vinoo xomxo vigê vilu di sec yuu vac xam mahigun, wê xam wê he nivaha di Myakilôhô Ngibua hivun he xôn di he piyôp nivaha ge, ên il ob vông yuac tigege vac he vigê mi he i vông, ⁴ên xe wê Yesu nue ngivihi ge ob vông yuac lec kitaaên hixôn xolac nêlên.”

⁵Mêd xomxo vông vinên vihati tyuc lec kiyang wê he nêl ge, om he vinoo Stiven yuu Pilip di Plokolas di Naikena di Taimon di Pamenas di Nikolas. Stiven ge xomxo ti wê vông i vin Yesu xêkizêc ge di Myakilôhô Ngibua hivun i xôn, di Nikolas ge tibii Antiok ti léc mi timu vô kiyang wê he Yuda vông ge. ⁶Om he lax xomxo tigege la vô Yesu nue ngivihi manôn mi he vyax vigê lec he di kitaa lec.

⁷Mêd Anutu xolac vô levac di xomxo Jelusalem tibeac vông i vin Yesu di xomxo wê mi si daa vô Anutu gee tibeac vông i vin hixôn.

He Yuda hôm Stiven xôn

⁸Stiven ge, vizid yuu xêkizêc wê Anutu vông ge hivun i xôn, om mi vông do levac mi xomxo tibeac yê. ⁹Lêc Yuda ya lam vô Stiven di he ngaênma lec xolac. Xomxo tigege lam gê Sailini yuu Aleksandlia di Silisia di Esia léc lam dô Jelusalem, di he mi la vac Yuda xumac lilo ti wê nêl lê nêbê tibii piwelac he vêl. ¹⁰Om he Stiven ngaênma lec xolac, léc Myakilôhô Ngibua vông piyôp nivaha vô Stiven om xomxo tigege tiyiên ma wê ob kitya Stiven kiyang vêl ge. ¹¹Mêd he vông xomxo ya la nêl kiyang

kityooên lec Stiven bêga ên nêbê, “Xe ngô wê xomxo tige mi so vya vô Moses yuu Anutu.” ¹²He nêl bêge om he kiyang la vông xomxo levac yuu xomxo wê xovô Moses xolac gee hixôn xomxo tibeac, he nilô vô nipaên vô Stiven, om he la hôm Stiven xôn di kô i mi la vô he kaunsil. ¹³Di he vông xomxo ya la nêl kiyang kityooên lec Stiven bêga ên nêbê, “Xomxo tige mi nêl kiyang nipaên lec Anutu xumac ngibua hixôn xolac wê Moses vông ge. ¹⁴Xe ngô wê nêl ên nêbê Yesu Nasalet ob dii xumac ngibua vêl di ob pilepac môp wê Moses vông vô il lage vac.” ¹⁵Mêd xomxo vihati wê dô vac kaunsil ben gee yê Stiven xêkizêc, lêc Stiven manôn tiyi xochê angela manôn.

Stiven nêl xolac vô he kaunsil

7 ¹Mêd xomxo daa siên nêl levac kinêg vô Stiven ên nêbê, “Kiyang wê he nêl lec ông ge, vixôhilôg, me?”

²Lêc Stiven nêl ên nêbê, “Xam mage lige, xam ngô lê. Vô buc ilage wê il bug Eblaham gên dô Mesopotemia di laên vîgwe Halan gên ma ge od xêseac kehe Anutu hilung i vô Eblaham ³di nêl vô i ên nêbê, ‘Ông sea bom di sea tame mame lime di loc vîgwe ti wê a obêc hilung vô ông ge.’ ⁴Om Eblaham sea tibii Kaldia ben di la dô vîgwe Halan. Di buc wê Eblaham ma yib ge Anutu vông i lam vac vîgwe tiga wê xam dô vac gwêbaga. ⁵Lêc Anutu o vông kibun tiga tya vô Eblaham lêm. Nge, Anutu hilu kiyang vô i ên nêbê obêc timuên ge od obêc vông vîgwe vihati i tu Eblaham hixôn bue timuên xe. Eblaham nue gên ma, lêc Anutu hilu kiyang tige tax vô i, ⁶di nêl hixôn ên nêbê, ‘Nume bume timuên obêc la dô vac tibii ben di tu tibii tigege nue yuac di he ob vông viyin vô he tiyi kliskas tibeac hiwocên xochê 400, ⁷lêc a obêc vông myaviwen vô tibii wê bume ob tu he nue yuac ge, di obêc timuên bume ob sea tibii ben di lôm lam vac vîgwe tiga tii vac di vông lilo di kitaa vô a.’ ⁸Nang dêc Anutu hilu kiyang vô Eblaham ên nêbê he i gôl nue vux ninivi ên i nêl kitong bê he tu Anutu nue, om buc wê Eblaham nu Aisak yubac di buc vîgê vilu di sec yon la vêl ge od Eblaham gôl Aisak ninivi. Nang dêc Aisak kô nu Jekop dêc Jekop kô nue vîgê yuu di tô mi la yuu wê tu il buge ge.

⁹“Lêc il buge xêyaa vô myavinê vô li Josep om he vông Josep mi tibii ya kisuu di kô mi la vîgwe Isip. Lêc Anutu dô hixôn Josep ¹⁰di ngidu i xôn vac viyin wê tibii vông vô i ge, di vông piyôp nivîha vô Josep om tibii Isip nêl king Pelo yê Josep nivîha di vông i tu Isip nêl gavman levac di i viac xumac hixôn susu vihati wê Pelo vông ge.

¹¹“He dô lêc vip levac yêp vac vîgwe Isip yuu Kenan vihati, ên he xen susu yaên ma vêl, om xomxo vihati dô vac viyin levac di il buge o tulec yaên ti lêm. ¹²Lêc Jekop ngô wê yaên dô Isip ge om vông nue la Isip taxlee. ¹³Nang dêc he lax Isip lu ngwe tii vac di Josep nêl i kitong vô lie, di nêl vô king Pelo hixôn om Pelo xovô Josep he lie kehe. ¹⁴Mêd Josep

vông kiyang la vô ma Jekop nêbê Jekop hixôn Josep lie he nue, he vihati i loc vô i gê Isip. Xomxo tige he vihati tiyi 75, ¹⁵mêd Jekop la dô Isip dêc yib. Nang dêc Jekop nue yib. ¹⁶Jekop yuu Josep, nue bue kô yuu mi lax yev gê vigwe Sekem vac vigwe ti wê tibii Hemo vông mi Eblaham kisuu ya mone ilage.

¹⁷“Xomxo Islel dô Isip di vô tibeac hiwocên mêd buc vô kwabo lec wê Anutu ob vông kiyang wê hilu vô Eblaham ilage i vô nôn lec ge. ¹⁸He dô Isip, léc Isip paha ti tu king om lungên Josep, ¹⁹mêd kityoo il buge di vông viyin vô he ên nêbê he i sea nue paha i loc dô vaxvax ên he i yib. ²⁰Vô buc tige Moses yubac, léc Moses ge nipwo nivihã ti wê Anutu yê nivihã ge, om ta yuu ma viac di i dô vac xumac lôma dentuc yon, ²¹nang dêc he kô mi la lii vô mia ninya léc Pelo nu vêx la kô mi la viac xocbê ici va nu ge di i vô levac. ²²Mêd he tixuu Moses ya môp yuu xovôên vihati wê he Isip vông ge om Moses tiyi xocbê xomxo wê mi nêl kiyang di vông yuac nivihã ge.

²³“Klismas wê Moses vông ge kehe yuu, léc xo ên nêb ob la yê lie Islel ²⁴om la yê, léc yê wê tibii Isip ti hi li Islel ti ge, om Moses nêb ob ngidu li tige xôn di ku i lu om la hi Isip tige yib. ²⁵Moses xo ên nêbê lie Islel xovô wê Anutu vînoo i nêb i vô he vêl ên viyin ge, léc he o xovô lêm. ²⁶Mêd vigwe vidiiên titige Moses lax mi la vô lie léc yê wê Islel yuu dihima ge. Om nêb ob hi kiyang wê yuu vông ge i yib om nêl vô yuu ên nêbê, ‘Letya nêb muu hima? Ên muu ge muu lim.’ ²⁷Léc xomxo ngwe wê nêl vevac tax ge ngiloo Moses di nêl vô i ên nêbê, ‘Letya nêb ông ob tu xomxo levac wê xe vông di titô xe nêl kiyangê?’ ²⁸Ông ob hi a xib tiyi xocbê ông hi Isip ti yib vihevage?’ ²⁹Moses ngô kiyang tige om pec mi la di la dô tiyi xocbê tibii ba vac vigwe ti lê nêbê Midian, mêd kô vêx di nu vux yuu yubac vac vigwe tige.

³⁰“He dô Midian klismas kehe yuu, di buc ti Moses la vac vigwe mahigun pileva ti wê yêp kwabo vô kitôn Sainai ge, léc yê

angela ti lam vac ngwax mahelac wê tum lec xax myabo ge. ³¹Moses yê tige di yetac om du mi la kwabo nêb ob la yê, léc Apumtau vya nêl ên nêbê, ³²‘A Anutu wê bume Eblaham yuu Aisak yon Jekop, yon Anutu a.’ Mêd Moses yetac di xona di vun manôn nêb yêên ob ma. ³³Mêd Apumtau nêl vô i ên nêbê, ‘Pewelac su vêl ên vixam, ên vigwe wê ông le lec ge vigwe ngibua. ³⁴A xê wê a nuge dô vac viyin levac gê Isip di a ngô wê he byag ge, om a lop mi lam ên a nêb a ob vô he vêl ên viyin tige. Om ông lam, ên a ob vông ông loc Isip.’

³⁵“Moses ge wê lie tii i la ilage di nêl vô ên nêbê, ‘Letya vînoo ông ên nêb ông tu xomxo levac wê xe vông di titô xe nêl kiyangê?’ He nêl bêge lê, léc Anutu vông angela tige la vô Moses vac xax myabo di vông i tu he Islel nêl xomxo levac wê piwelac he vêl ên viyin ge. ³⁶Om Moses didii he mi lam di he sea vigwe Isip, di Moses vông do levac gê Isip di vông lec Gwec Hi di vông vac vigwe mahigun pileva tiyi klismas kehe yuu.

37“Moses ge wê nêl vô he Islel ên nêbê, ‘Anutu obêc vông xam lime ti tu plopet xocbê a ge.’ 38Mêd Moses dô hixôn il buge vac vigwe mahigun pileva di i lec mi la lec kitôn Sainai, lêc angela nêl Anutu kiyang vô i di i kô kiyang maviha mi lôm nêl vô lie di i lam vô il gwêbaga hixôn.

39“Lêc il buge vô ninya kitu vô Moses kiyang di pilepac nilô lax vô Isip nêb ob lax mi la, 40om he la nêl vô Moses li Elon ên nêbê, ‘Ông sev xe anutu ya, ên he i didii il, ên Moses wê didii il gê Isip mi il lam ge, xe lungên, mêd la dô na?’ 41Om vô buc tige he sev bulmakau nu ti kinu di tung daa vô anutu kityooên tige di pimil susu ti wê he vông ya vigê ge. 42Om Anutu vô nimi vô he di pilepac he nilô la vô hiyôv yuu dentuc di pitua di he kitaa vô, tiyi xocbê kiyang wê plopet kivuu ilage mi i yêp vac kipihac bêga ên nêbê, ‘Xam Islel, xam la dô vac vigwe mahigun pileva tiyi klismas kehe yuu, lêc xam o hi bwoc sipsip yuu bulmakau ya mi si daa vô a lêm. 43Anutu kityooên ti lê nêbê Molok ge, xam kô i xumac sel mi lam hixôn, di kô pitua kinu wê anutu kityooên lê nêbê Lapan vông ge hixôn, ên xam nêb xam ob kitaa vô, om a ob vông xam loc dô vac vigwe ti wê yêp Babilon vilu ganê.’

44“Vô buc wê il buge dô vac vigwe mahigun pileva ge Anutu xumac sel yêp vac he mahigun di nêl kitong nêbê Anutu dô hixôn he. Xumac tige, he lox i tiyi kinu wê Anutu hilung vô Moses ge. 45Nang dêc Josua kô il buge mi he la vigwe Kenan, lêc tibii ya dô lec kibun tige om Anutu tii tibii tigeê vêl di he Islel la dô lec vigwe Kenan. Lêc xumac sel tige he kô mi la hixôn di lax i le vac he mahigun di i la tyip vô buc wê king Devit dô ge hixôn. 46Mêd Anutu yê Devit nivaha om Devit kitaa vô Anutu nêb ob lox xumac ti vô Anutu wê bu Jekop Anutu ge. Devit nêl bêge lê, 47lêc nu Solomon lox Anutu xumac tige.

48“Lêc Anutu wê luu vihati vêl ge ob dô vac xumac wê xomxo lox ya vigê ge lêm. Tiyi xocbê plopet kiyang yêp bêga ên nêbê,

49‘Anutu nêl ên nêbê, “Lag puunê ge tiyi xocbê sia wê a ob dô lec ge, di kibun ge tiyi xocbê xax wê a vixag ob le lec ge. Om xam ob lox xumac ngwe bêna vô a? Di a bog wê a ob dô seac vêl ge yêp gê na? 50A ga wê a vigêg tung susu tigeê vihati.”’

51“Anutu kiyang yêp bêge, lêc xam piyôp xêkizêc di xam nilôm mapitoc di xam vô ninyam kitu, di xam tii Myakilôhô Ngibua tiyi buc vihati. Xam vông môp tige tiyi xocbê bume vông ilage. 52Plopet tina wê bume o vông viyin vô he ilage lêm? He plopet ilage wê nêl kitong nêbê xomxo bôbac ti obêc val ge, xam bume hi he yib mîma vêl. Di xacxam va vông xomxo tyo vac tibii vevac vigê di hi i yib. 53Xam ge wê xam kô Anutu xolac vô angela ge, lêc xam o timu vô lêm.” Stiven nêl kiyang bêge vô he.

He nêx Stiven ya ngidax mi i yib

54He kaunsil ngô kiyang wê Stiven nêl vô he ge mêd he xêyaa vô myavinê mabu vô Stiven di he nga mya xôn nêb ob hi. 55Lêc Myakilôhô

Ngibua hivun Stiven xôn di i lax ma lec lag, léc yê xêseac wê Anutu vông ge di yê Yesu le vô Anutu vigê hiyôv, ⁵⁶om nêl ên nêbê, “Xam wê lê. A xê lag puunê tax di Xomxo Nu le vô Anutu vigê hiyôv.”

⁵⁷He ngô Stiven kiyang di iac mabu di kiyel ninya xôn ên nêb ob ngô Stiven kiyang lêm. Di lutibed he vihati kidi lec di la hôm Stiven xôn, ⁵⁸di kô mi la vigwe Jelusalem ninya nêb ob la nêx i yib ya ngidax. Om he wê vông kiyang vô Stiven gee kwax he ngakwi ngwe vêl mi la tung vô xomxo ngivihi ti lê nêbê Sol. ⁵⁹Mêd he nêx Stiven ya ngidax, léc Stiven kitaa bêga nêbê, “Apumtau Yesu, ông hôm a myagkilôhò i loc vô ông.” ⁶⁰Mêd Stiven

yev vixa kitu vac di kitaa vya levac ên nêbê, “Apumtau, le i léc hôm he nên nipaên wê he vông ge xôn lêm.” Stiven nêl bêge mêd yib.

Sol vông viyin levac vô xomxo vông vinên

8 ¹Sol xêyaa vô nivihà ên wê he hi Stiven yib ge. Di buc mahigun tige xomxo kidi mi vông viyin mabu vô xomxo vông vinên wê dô Jelusalem gee, om he vông vinên vihati pec mi la di la dô vigwe Judia yuu Samelia, di Yesu nue ngivihi ge he dô Jelusalem. ²Di xomxo wê mi timu vô Anutu kiyang ge, he ya kô Stiven ninivi mi la yev di byag mabu ên wê i yib ge. ³Léc Sol nêb ob kitya xomxo vông vinên vihati vêl om la vac he toto ben di la hôm vêx yuu vux xôn di kô mi la tung vac xumac kalabuhu.

Xomxo la nêl Yesu xolac gê Samelia

⁴Xomxo vông vinên wê pec sea gee la vac vigwe toto di la nêl Yesu xolac kitong. ⁵Mêd Pilip la vac vigwe ti wê yêp vac vigwe levac Samelia ge di la nêl Yesu kitong vô he ên nêbê Yesu ge Kilisi wê Anutu vông i lam ge. ⁶Di xomxo tige ngô kiyang wê Pilip nêl ge di yê do levac wê vông ge om vô ninya lehe vô i kiyang. ⁷Ên xomxo tibeac wê vimwo nipaên dô vac he nilô gee, vimwo tige iac mabu di lam lop mi la vêl ên he, di xomxo tibeac wê len vô xêlehe gee hixôn he wê vixa vô nipaên ge, he vô nivihà lec. ⁸Mêgem xomxo viyang tige dô hixôn xêyaa nivihà.

⁹Xomxo ti dô Samelia lê nêbê Saimon. Saimon mi yong i nêbê i xomxo levac di mi vông pileac om xomxo Samelia yê di yetac ên. ¹⁰Om xomxo levac hixôn xomxo vihati he vô ninya lehe vô Saimon kiyang di nêl bêga nêbê, “Xomxo tige kô xêkizêc levac vô Anutu.” ¹¹Di he yetac ên do levac wê Saimon mi vông ila ila ge om he vô ninya lehe vô Saimon kiyang. ¹²Léc Pilip la nêl Anutu ben kehe kitong vô he di nêl Yesu Kilisi xolac nivihà vô he, om xomxo vêx yuu vux tibeac vông i vin di lipac mia. ¹³Di Saimon vông i vin hixôn di lipac mia di la hixôn Pilip di yetac mabu ên do levac wê Pilip mi vông ge.

¹⁴Mêd Yesu nue ngivihi wê dô Jelusalem gee ngô wê xomxo Samelia vông i vin Anutu xolac ge om he vông Pita yuu Jon loc mi la vô he,

15 di yuu la kitaa lec he ên nêbê Myakilôhô Ngibua i loc vô he. 16 Ên Myakilôhô Ngibua gên o la vô he lêm. He lipac mia lec Yesu Kilisi vaci lê. 17 Om yuu la vyax vigê lec he di Myakilôhô Ngibua lam la vac he nilô.

18 Mêd Saimon yê wê Pita yuu Jon vyax vigê lec xomxo di Myakilôhô Ngibua lam la vac he nilô ge, om Saimon kô mone mi la vô yuu 19 di la nêl vô yuu ên nêbê, “Muu vông xêkizêc tige vô a hixôn êdêc a vyax vigêg lec xomxo ge od Myakilôhô Ngibua i loc vac he nilô.”

20 Lêc Pita nêl vô i ên nêbê, “Xêkizêc ti wê Anutu nêb ob vông pileva ge ông nêb ông ob kisuu ya mone, om ông loc di loc xôa ma hixôn ông mone. 21 Ông ob vông yuac tiga hixôn xe lêm, ên ông nilôm o yêp nivîha vô Anutu manôn lêm. 22 Om ông pilepac ông di vô nimim vô môm nipaên wê ông vông ge, di ông kitaa vô Apumtau ên i kitya ông nêb nipaên wê yêp vac ông nilôm ge vêl, 23 ên a xê wê kiyang juda juda pup vac ông nilôm di ông nêb nipaên hôm ông xôn pilihi.”

24 Mêd Saimon luu Pita vya ên nêbê, “Muu kitaa vô Apumtau lec a, ên nipaên wê muu nêl ge i o lêc tulec a lêm.”

25 Mêd Pita yuu Jon nêl Apumtau Yesu kitong vô xomxo. Pyap di yuu la, nêb ob lax mi la Jelusalem. Om yuu la nêl Anutu xolac vac vigwe toto gê Samelia di lax mi la Jelusalem.

Pilip nêl xolac vô tibii Itiopia ti

26 Apumtau vông angela ti la nêl vô Pilip ên nêbê, “Ông kidi lec di loc vô môm ngwe wê yêp vô vigê kêd wê ob sea Jelusalem di la Gasa ge.” Môm tige yêp vac vigwe mahigun pileva wê tibii dô vacên ma ge. 27 Om Pilip kidi lec mi la, lêc mila tulec xomxo ti vac môm. Xomxo tige tibii Itiopia levac ti wê mi viac mone yuu susu wê he kwin Kandesi vông ge gê Itiopia. Xomxo tyo la kitaa vô Anutu gê Jelusalem, 28 pyap di lax nêb ob lax ben, om dô lec pêt ti wê xôhô didii ge mêd kitong kîpîhac wê plopet Aisaia kivuu ilage di la vô môm mi la. 29 Mêd Myakilôhô Ngibua nêl vô Pilip ên nêbê, “Loc kwabo vô xomxo tiganê di loc hixôn.” 30 Om Pilip tup mi la di mila le hixôn xomxo tige di ngô wê xomxo tige dikitong Aisaia kiyang, om kinêg vô i ên nêbê, “Kiyang wê ông kitong ge, ông xovô kehe, me?”

31 Lêc xomxo tyo nêl ên nêbê, “Xomxo ti obêc nêl vô a ge od a ob xovô.” Om xomxo tige kitaa Pilip ên nêbê, “Ông lec lam dô hixôn a.”

32 Xolac wê xomxo tige kitong ge nêl bêga nêbê,

“He didii xomxo tige mi la tiyi xocbê bwoc sipsip wê he ob kô mi la hi i yib ge, di i tiyi xocbê bwoc sipsip nu ti wê he ob kîping nivîluhu vêl ge lêc xomxo tige le xôa maên di o keac ti lêm. 33 He vông i lê vô nipaên, di he o titô i nêb kiyang vô nivîha lêm. Om letya ob nêl i nue bue kiyang? Ên i sea kibun ga di la.”

34 Mêd tibii levac tige kinêg vô Pilip ên nêbê, “Ông nêl kitong vô a bê plopete kivuu kiyang tiga lec letya? Kivuu lec ici va, me kivuu lec xomxo ngwe?”

³⁵Om Pilip nêl Yesu xolac nivaha wê yêp vac plopete kiyang tige yêp seac vô xomxo tyo. ³⁶Mêd yuu la vô môt mi la, di mila vô mia ti, om xomxo tige nêl vô Pilip ên nêbê, “Wê lê. Mia yêp ga, om tiyi wê ông ob lipac a ge, me?”

³⁷[Mêd Pilip nêl ên nêbê, “Ông obêc vông nilôm la yadiluhu vô Anutu di vông i vin ge od tiyi wê ông ob lipac mia.” Mêd tyo nêl ên nêbê, “A vông i vin ên a nêbê Yesu Kilisi ge Anutu nu vixôhilôg.”]

³⁸Om nêl di xôhô le di yuu lop mi la vac mia di Pilip lipac i. ³⁹Mêd yuu lôm tyip kehe di Apumtau Myakilôhông Ngibua hôm Pilip vêl lutibed, om xomxo tige yê wê Pilip xôa ma ge di i la hixôn xêyaa nivaha di la ben. ⁴⁰Mêd Pilip yê lêc val dô vîgwe Asdot. Mêd loc mi la vac vîgwe tigege vihati di la nêl Anutu xolac vô xomxo di mila Sisalia.

Sol pilepac i di vông i vin Yesu

9 ¹Vô buc tige Sol le nêl kiyang xêkizêc nêb ob vông vîyin vô xomxo vông vinên di hi he yib, om la vô xomxo daa siên nêl levac ²mi la nêl vô ên nêb i kivuu kipihac i loc vac he Yuda vac xumac lilo wê yêp vîgwe Damaskas ge. Om kivuu kipihac bêga nêbê Sol obêc tulec vêx me vux wê mi timu vô Yesu môt gee od i hôm he xôn di kô mi loc Jelusalem di loc tung vac xumac kalabuhu. ³Mêd Sol la vô môt di mila kwabo vô Damaskas, lêc lutibed xêseac xocbê deac hixelac ge lam gê kisii di lam byêx Sol manôn ⁴di i tilii mi la yêp kibun di ngô vya ti lam nêl vô i ên nêbê, “Sol, bêna lêc ông vông vîyin vô a?” ⁵Lêc Sol kinêg ên nêbê, “Apumtau, ông letya?” Di i nêl ên nêbê, “A Yesu wê ông vông vîyin vô a. ⁶Ông kidi lec mi loc vîgwe Damaskas, ên xomxo ti obêc nêl kítong vô ông lec yuac wê a nêb ông ob vông ge.”

⁷Mêd xomxo wê dô hixôn Sol gee ngô vya tige lêc he o yê xomxo ti nôn lêm om he le kiyang maên. ⁸Mêd Sol kidi lec di vông manôn hixelac lêc manôn mapitoc, om he hôm lec Sol vîgê di didii i di he la Damaskas. ⁹Mêd Sol la dô tiyi buc yon lêc manôn dô mapitoc, di yaên yuu numên ma.

¹⁰Xomxo wê vông i vin Yesu ge ti dô Damaskas lê nêbê Ananaias, lêc Apumtau vông vivia vô di nêl ên nêbê, “Ananaias.” Mêd Ananaias nêl ên nêbê, “Apumtau, a dô ga.” ¹¹Mêd Apumtau nêl vô i ên nêbê, “Ông kidi di loc môt ti wê he nêl lê nêbê môt bôbac ge di loc Judas ben di loc kinêg xomxo Tasas ti lê nêbê Sol wê dô vac Judas ben di kítai mi dô. ¹²Ên Sol yê vivia ti nêbê xomxo ti lê nêbê Ananaias ob kidi mi la vô i di la vyax vîgê lec, ên i manôn i seac di i yê vîgwe.”

¹³Lêc Ananaias nêl ên nêbê, “Apumtau, a ngô wê xomxo tibeac nêl kiyang lec xomxo tige nêbê mi vông nipaên tibeac vô ông nume vông vinên gê Jelusalem, ¹⁴di xomxo daa siên nêl levac tyuc lec xomxo tige nêb i lam vîgwe ga di lam hôm xomxo wê vông i vin ông ge xôn.”

¹⁵Lêc Apumtau nêl vô i ên nêbê, “Ông kidi lec di loc, ên xomxo tige a vinoo pyap ên a nêb i tu a nug yuac di i loc nêl a lêg vô tibii viyang viyang hixôn he king di i loc nêl vô lie Islel hixôn. ¹⁶Di viyin wê xomxo tige ob kô lec a lêg ge aca va obêc hilung vô i.”

¹⁷Om Ananias loc mi la, di la vô Sol vac xumac nilô di la vyax vigê lec di nêl ên nêbê, “A lig Sol, Apumtau Yesu wê hilung i vô ông vac môm wê ông lam ge, ici va vông a lam vô ông ên nêb ông mamnôn i seac di Myakilôhô Ngibua i lam hivun ông xôn.” ¹⁸Om lutibed susu xocbê makikeng ge tô mi la vêl ên Sol manôn di i manôn seac di i yê vigwe, di i kidi lec di Ananias lipac i lec Yesu lê ên wê vông i vin ge. ¹⁹Pyap di i ya susu yaên di vô xêkizêc lec.

Sol nêl xolac gê Damaskas

Sol dô Damaskas hixôn xomxo vông vinên buc ya. ²⁰Om lutibed Sol la vac Yuda xumac lilo di la nêl Yesu kitong vô he bêga nêbê, “Yesu ge Anutu nu.” ²¹Om xomxo vihati wê ngô Sol kiyang gee yetac di nêl vômâ ên nêbê, “Xomxo tige wê mi hi xomxo ên wê he mi kitaa vô Yesu ge. Hi gê Jelusalem di lam ga hixôn ên nêb ob lam hôm xomxo xôn di kô he mi lax vô xomxo levac wê mi si daa gee. Om mêd xomxo tyo tige.” ²²Lêc Sol nêl xolac hixôn xêkizêc di nêl kiyang yêp seac nêbê Yesu ge Kilisi wê Anutu vông i lam ge, om he Yuda wê dô Damaskas gee, he o tiyi wê ob nêl kiyang ti lax vô i ge lêm.

He Yuda xêyaa vô nipaên vô Sol om Sol pec mi la

²³Mêd buc tibeac lam la vêl lêc he Yuda kitucma di nêl kiyang mi hilu xôn nêb ob hi Sol i yib. ²⁴Om Yuda ya la dô bin vuayen wê le vac xenac wê vivac vô vigwe Damaskas ge, om he dô bin vô bucên yuu vidiiên vihati ên nêb ob hi Sol i yib. Lêc Sol ngô wê he nêb ob hi i yib ge, ²⁵om bucên ti xomxo wê mi dô hixôn Sol gee kô i mi he lec xenac tige mi la tyip kisii, mêd tung Sol vac sepat levac ti di vông i lop mi la xenac kehe di i pec mi la.

Sol la dô Jelusalem

²⁶Sol loc mi la Jelusalem, nêb ob la dô hixôn xomxo wê vông i vin Yesu ge, lêc he vihati xona ên Sol, ên he o vông i vin nêbê Sol ge xomxo vông vinên ti lêm. ²⁷Mêd Banabas kô i mi yuu la vô Yesu nue ngivihi di Banabas nêl kitong vô he lec wê Sol yê Apumtau vac môm di Apumtau nêl kiyang vô i ge di nêl lec wê Sol nêl Yesu vya kitong vô tibii Damaskas di xonaên ma ge. ²⁸Om Sol dô hixôn he di la vac vigwe Jelusalem vihati di nêl Apumtau lê kitong vô xomxo di o xona lêm. ²⁹Mêd he Yuda wê keac Glik vya ge, he Sol ngaênma lec Yesu xolac di he myag môm wê nêb ob hi Sol i yib ge. ³⁰Lêc xomxo vông vinên ngô wê he nêb ob hi Sol yib ge om he kô Sol mi la vigwe Sisalia di vông Sol la ben Tasas.

³¹Mêd xomxo vông vinên wê dô Judia yuu Galili di Samelia ge he vihati dô viyin maên di vevac ma ên he. He dô vac Apumtau vilu kwa ngibi di Myakilôhô Ngibua ngidu he xôn, om he vô xêkizêc di xomxo vông vinên vô tibeac hiwocên.

Pita vông Inias vô niviha lec

³²Pita la vilee mi la vac vîgwe vihati, di buc ti léc la yê xomxo vông vinên wê dô vîgwe Lidia ge. ³³Vac vîgwe tige yê xomxo ti lê nêbê Inias wê len vô xêlehe di i yêp lec pêt tiyi klismas vîgê vilu di sec yon ge. ³⁴Mêd Pita nêl vô i ên nêbê, “Inias, gwêbaga Yesu Kîlisi vông ông vô nimviha lec. Om ông kidi lec mi vilun ông guhu.” Om Inias kidi lec lutibed. ³⁵Di xomxo vihati vac vîgwe Lidia yuu Salon yê di pilepac nilô la vô Apumtau di vông i vin.

Pita vông Tabita kidi lec vac yibên

³⁶Vêx vông vinên ti lê nêbê Tabita dô Jopa. Vac Glik vya he nêl vêx tige lê nêbê Dokas. Vêx tige vông môp niviha vô xomxo tiyi lec buc vihati di vông susu vô xomxo wê nêl susu maên ge hixôn. ³⁷Vô buc tige yidac vông i di i yib, mêd he lipac i ninivi di lii i yêp vac xumac nilô ti gê kisii. ³⁸Mêd xomxo vông vinên ngô wê Pita la dô vîgwe Lidia ge, léc Lidia yêp kwabo vô Jopa om he vông vux yuu la vô Pita di yuu la nêl vô ên nêbê, “Ông lam vô xe lutibed.” ³⁹Om Pita kidi mi la hixôn yuu di yon loc mi la Jopa, di he kô Pita mi lec mi la vac xumac nilô kisii tyo. Mêd vêxôv tibeac lam le hixôn Pita di byag, di kô nivimihi yuu ngakwi toto wê Dokas duu vac buc wê gên dô maviha ge mi hilung vô Pita. ⁴⁰Lêc Pita vông he vihati lop mi la vixun di i yev vixa kitu vac di kitaa vô Anutu, mêd pop manôn vô vêx tyo di nêl bêga nêbê, “Tabita, ông kidi lec.” Mêd vêx tyo manôn seac di i yê Pita di kidi mi dô. ⁴¹Mêd Pita hôm lec vîgê di i kidi lec mi le kisii. Mêd Pita nêl vêxôv hixôn xomxo vông vinên vihati lam di hilung vêx tyo wê kidi lec maviha ge vô he. ⁴²Mêd xomxo Jopa vihati ngô wê vêx tyo kidi lec ge om he tibeac vông i vin Apumtau. ⁴³Mêd Pita dô Jopa buc tibeac di dô hixôn xomxo ti lê nêbê Saimon wê mi vông yuac lec bwoc ninivi ge.

Angela ti nêl kiyang vô Konilias

10 ¹Tibii vevac levac ti lê nêbê Konilias dô vîgwe Sisalia. Konilias viac nue vevac 100 vac he kidu ti wê nêl he nêbê he Itali ge. ²Konilias he vinê nue vihati vông i vin Anutu di kitaa vô Anutu tiyi lec buc vihati, di Konilias mi ngidu he Yuda wê nêl susu maên gee xôn. ³Di buc ti xocbê hiyôv manôn yon, léc Anutu vông angela ti lam nêl vô Konilias ên nêbê, “Konilias.”

⁴Mêd Konilias yê ma la angela tige di xona mabu di kinêg ên nêbê, “Xomxo levac, vatya?” Mêd angela tige nêl ên nêbê, “Anutu ngô wê ông mi kitaa ge di

yê wê ông vông susu vô he wê nên susu maên gee om xovô môt wê ông mi vông ge pyap. ⁵Om ông vông xomxo ya i loc vîgwe Jopa ên loc nêl Saimon wê lê ngwe nêbê Pita ge ên i lam. ⁶Saimon Pita la dô vac Saimon ngwe ben, ngwe wê mi vông yuac lec bwoc ninivi ge ben wê yêp kwabo vô gwec ninya ge.”

⁷Angela nêl kiyang pyap vô Konilias di loc mi la, mêd Konilias tyuc i nue yuac yuu di lie vevac ti lam. Xomxo vevac tige, xomxo vông vinên ti wê mi dô hixôn Konilias tiyi buc vihati ge. ⁸Mêd Konilias nêl angela kiyang kitong vô yon di vông yon loc mi la Jopa.

Anutu hilung tixuuên ti vô Pita

⁹Xomxo yon ge loc mi la, di vîgwe vidiiên titige yon mila kwabo vô Jopa. Di hiyôv tyip kitôn lêc Pita lec mi la lec xumac kitôn kisii nêb ob la kitaa vô Anutu. ¹⁰Di vip den Pita om Pita nêb ob ya yaên, lêc he gên o viac yaên wê he ob ya ge lêm, om Pita xeedô, lêc tixuuên ti val vô i ¹¹di i yê ma la kisii, lêc lag puunê tax di susu ti xocbê nivimihi levac ti lam gê kisii lêc lam xocbê xomxo hilu yihi lec

myahîpu vihati di vông i lam tô kibun. ¹²Lilii yuu menac di bwoc yuu myel toto dô vac nivimihi tige nilô, ¹³mêd vya ti lam nêl ên nêbê, “Pita, kidi lec mi loc hi lilii tige mi wa.” ¹⁴Lêc Pita nêl ên nêbê, “Apumtau, a xaên ob ma. Ên a o mi xa yaên wê xe vibu ên xe nêbê ningeac ge lêm.” ¹⁵Mêd vya tige lam tii vac nang ên nêbê, “Susu wê Anutu kitaa lec nêbê nivîha ge, ông o lêc wê ên ông nêbê nipaên lêm.” ¹⁶Anutu nêl kiyang tige vông lu yon mêd nivimihi tige lec mi lax kisii lutibed.

¹⁷Mêd Pita dô di xo kiyang tibeac lec susu wê yê ge ên nêbê, “Tige kehe bêna?” Mêd xomxo yon wê Konilias vông yon lam ge val Jopa, mêd kinêg xumac wê Saimon vông ge vô xomxo ya di val le vô Saimon ben vuayen, ¹⁸di keac ên nêbê, “Saimon ti wê lê ngwe nêbê Pita ge dô ga, me?” ¹⁹Pita xeedô di xo susu wê yê ge, mêd Myakilôhô Ngibua nêl vô i ên nêbê, “Ngô lê. Xomxo yon val myag ông, ²⁰om ông kidi lec di lop mi loc vô yon di loc hixôn yon, di ông o lêc nilôm yuu yuu lêm, ên aca va vông yon lam.”

²¹Om Pita lop mi la vô yon di nêl vô ên nêbê, “A Pita wê mon myag a ge. Mon lam ên vatya?” ²²Mêd yon nêl ên nêbê, “Konilias wê tu levac ên tibii vevac 100 ge wê vông xen lam. Konilias ge xomxo nivîha ti wê mi kitaa vô Anutu di xomxo Yuda vihati yê i nivîha. Mêd Anutu vông angela ti lam nêl vô Konilias ên nêb Konilias i vông kiyang i loc vô ông ên ông loc i ben di loc nêl kiyang vô i.” ²³Mêgem Pita keac yon la xumac lôma di viac yon, di vidiiên titige Pita kidi mi la hixôn yon, di xomxo vông vinên Jopa he ya la hixôn mi he la.

Pita la vac Konilias ben

²⁴He mila môt di vîgwe vidiiên titige he mila Sisalia. Di Konilias kituc lie hixôn nipîpu ya mi he lam dô vac i ben di bin Pita. ²⁵Mêd Pita la vac

Konilias ben di Konilias lam yev vixa kitu vô Pita di pimil i. ²⁶Lêc Pita nêl vô ên nêbê, “Kidi lec mi le kisii, ên a ga xomxo xocbê ông.” ²⁷Mêd Pita keac vô i di yuu la xumac lôma di Pita yê wê xomxo tibeac kitucma mi xeedô ge.

²⁸Mêgem Pita nêl vô he ên nêbê, “Xacxam va xovô pyap wê xolac wê xe Yuda vông ge vibu ên nêbê xe ob dô hixôn xam tibii ba lêm. Lêc Anutu nêl kitong vô a ên nêbê a o lêc nêl xomxo ti bê i nipaên lêm. ²⁹Om gwêbaga a val i tiyi ông vyam wê ông tyuc a ge di a o pwoo ông vyam vac lêm. Om a ob kinêg ông bê ông nêbê a lam ên vatya?”

³⁰Mêd Konilias nêl ên nêbê, “Nyop ge wê hiyôv manôn mila yon xocbê hucên bêga, a dô vac xumac lôma di kitaa vô Anutu, lêc lutibed xomxo ti lam le vô a magnôn hixôn ngakwi kwem pileva, ³¹di nêl vô a ên nêbê, ‘Konilias, Anutu ngô wê ông mi kitaa ge di xovô susu nivihã wê ông mi vông vô xomxo wê nêbê susu maên gee, ³²om ông vông xomxo i loc Jopa ên loc nêl vô Saimon wê lê ngwe nêbê Pita ge ên i lam. Saimon Pita la dô vac Saimon ngwe ben, ngwe wê mi vông yuac lec bwoc ninivi ge ben wê yêp kwabo vô gwec ninya ge.’ ³³Om a ngô kiyang tige di vông xomxo loc lutibed vô ông, di ông vô ninyam lehe vô a vyag di lam vô a. Om gwêbaga xe vihati lam dô ga vô Anutu manôn ên xe nêbê xe ob ngô kiyang vihati wê Apumtau vông vô ông ge.”

Pita nêl xolac vô Konilias he lie

³⁴Mêd Pita nêl vô he bêga ên nêbê, “Gwêbaga a xovô vixôhilôg ên a nêbê Anutu o yê xomxo mangwe nêbê nivihã di yê mangwe nêbê nipaên lêm. Nge, Anutu yê xomxo vihati tiyima. ³⁵Om xomxo vac vigwe vihati gee, ti obêc xona ên Anutu di vông môp wê nivihã ge od Anutu obêc yê i nivihã. ³⁶Xam xovô xolac nivihã pyap wê Anutu nêl vô xe Islel bêga ên nêbê Yesu Kilisi wê tu il vihati nêd Apumtau ge, ge wê vông il la dô tibeac hixôn Anutu vac kiyang malehe. ³⁷Di xam xovô ên xam nêbê buc wê Jon nêl mia lipacên kitong vô xomxo pyap ge, od xolac tige kehe le vac vigwe Galili di i la vac vigwe Judia vihati hixôn. ³⁸Yesu Nasalet ge, Anutu vinoo i di vông Myakilôhông Ngibua hixôn xêkizêc levac vô i, om Yesu la vac vigwe vihati di la ngidu xomxo xôn di vông he wê Seten ku he xôn gee vô nivihã lec, ên Anutu dô hixôn i. ³⁹Di yuac vihati wê Yesu vông gê Jerusalem di vông vac xe Yuda bom vihati ge, xe xê om xe nêl kitong vô xomxo. Nang dêc he hi Yesu yib lec xax pola, ⁴⁰di buc yon lam la vêl lêc Anutu tipi vô i kidi lec vac yibên di hilung i le seac vô xe, ⁴¹lêc o hilung i vô Yuda vihati lêm. Nge, hilung i vô xe mangwe wê Anutu vinoo xe pyap nêbê xe nêl i kitong vô xomxo ge. Om Yesu kidi lec vac yibên di xe xa di num hixôn i. ⁴²Di Yesu nêl vô xe ên nêbê xe nêl xolac vô xomxo di nêl bêga bê Yesu ge wê Anutu vinoo pyap ên nêbê i titô xomxo yibên yuu maviha vihati nêbê kiyang. ⁴³Plopete vihati nêl Yesu kitong ilage ên nêbê

xomxo vihati wê vông i vin Yesu ge od Yesu lê obêc kitya he nê nipaên vêl.”

Xomxo wê o Yuda lêm gee, he kô Myakilôhô Ngibua

⁴⁴Pita gên nêl kiyang tige vô he, lêc Myakilôhô Ngibua lam dô vac he wê ngô kiyang gee vihati nilô. ⁴⁵Mêd he Yuda vông vinên wê lam hixôn Pita ge yê di yetac ên wê Anutu vông Myakilôhô Ngibua tiyi xocbê vizid nivîha vô xomxo wê o Yuda lêm ge hixôn. ⁴⁶Di he Yuda ngô wê xomxo tigeec keac xomxo vîgwe toto ge vya di pimil Anutu. Om Pita nêl ên nêbê, ⁴⁷“Anutu vông Myakilôhô Ngibua vô xomxo tigeec tiyi xocbê vông vô il Yuda ilage, om letya tiyi wê ob le vac he xôn nêb he lipacên mia i ma?” ⁴⁸Om Pita nêl di he lipac mia lec Yesu Kilisi lê. Mêd he kitaa Pita nêb i dô hixôn he buc ya.

Pita la nêl he wê o Yuda lêm gee kitong gê Jerusalem

11 ¹Yesu nue ngivîhi hixôn xomxo vông vinên wê dô vîgwe Judia vihati gee ngô wê tibii wê o Yuda lêm ge vông i vin Anutu kiyang. ²Mêd Pita la Jerusalem, lêc he Yuda wê mi le xêkizêc lec ninivi gôlên gee kunac Pita di nêl vô ên nêbê, ³“Bêna lêc ông la vô tibii madiluhu wê gôlên ninivi ma ge di wa yaên hixôn he?”

⁴Lêc Pita nêl kiyang vihati ge kitong vô he bêga nêbê, ⁵“A dô vîgwe Jopa di kitaa mi dô, lêc a xê tixuuên ti bêga lec susu ti xocbê nivîmîhi levac ti lam gê lag puunê lêc lam xocbê xomxo hilu yihi lec myahîpu vihati di vông i lop mi lam vô a. ⁶Om a xê nivîmîhi tyo, lêc bwoc yuu lilii di menac di myel toto gee dô vac nilô. ⁷Di a ngô vya ti lam hixôn ên nêbê, ‘Pita, kidi lec mi loc hi tigeec mi wa.’ ⁸Lêc a nêl ên a nêbê, ‘Apumtau, a xaên ob ma. Ên a o mi xa yaên wê xe vibu ên xe nêbê ningec ge lêm.’ ⁹Lêc vya tige lam gê lag puunê tii vac nang ên nêbê, ‘Susu wê Anutu kitaa lec nêbê nivîha ge, le i lêc nêl bê nipaên lêm.’ ¹⁰Anutu nêl kiyang tige vông lu yon mêd susu tige lax mi la lag puunê. ¹¹Mêd lutibed xomxo yon wê lam gê Sisalia wê Konilias vông yon lam vô a ge, yon val le vô xumac wê a la dô vac ge. ¹²Om Myakilôhô Ngibua nêl vô a ên nêbê, ‘Ông loc hixôn yon di le i lêc xo kiyang tibeac lêm.’ Om xomxo Jopa vîgê vilu di sec ti ga la hixôn a di xe xôn la Sisalia di la vac Konilias ben. ¹³Mêd Konilias nêl vô xe ên nêbê i yê angela ti lam vac i ben di lam nêl vô i ên nêbê, ‘Vông xomxo i loc Jopa ên loc kô Saimon, lê ngwe nêbê Pita mi i lam, ¹⁴ên Pita ob nêl kiyang kitong vô xam di kiyang tige obêc vô xam lime nume vêl ên nipaên di tung xam vac nivîha.’ Konilias nêl kiyang bêge vô xe ¹⁵di a gên nêl kiyang vô he, lêc Myakilôhô Ngibua lam dô vac he nilô tiyi xocbê lam dô hixôn il ilage. ¹⁶Om a xovô i lax lec kiyang wê Apumtau nêl ilage ên nêbê, ‘Jon lipac xomxo ya mia pileva, lêc Anutu ob lipac xam ya Myakilôhô Ngibua.’ ¹⁷Buc wê il vông

i vin Apumtau Yesu Kilisi ilage, Anutu vông Myakilôhō Ngibua vô il tiyi xochê vizid nivîha ge, di gwêbaga Anutu vông vizid tige vô tibii tigege hixôn, om a tiyiên ma wê a ob le vac Anutu kiyang tige xôn.”

¹⁸Yuda tigege ngô Pita kiyang om he sea nilô viyin di pimil Anutu ên nêbê, “Anutu pilepac he wê o Yuda lêm gee nilô, ên nêb he êno, he i dô maviha.”

Xomxo vông vinên paha wê dô Antiok gee

¹⁹Vô buc wê he hi Stiven yib di vông viyin vô xomxo vông vinên ge, xomxo vông vinên tibeac pec mi la di la dô vac vigwe Pinisia yuu Saiplas di Antiok. Di he nêl xolac vô xomxo vac vigwe tigege, léc he o nêl vô xomxo vihati lêm. Nge, he nêl vô he Yuda vaci. ²⁰Lêc xomxo vông vinên ya wê lam gê Saiplas yuu Sailini gee la Antiok di la nêl Apumtau Yesu xolac kitong vô he Glik hixôn. ²¹Mêd xêkizêc wê Anutu vông ge ngidu he xôn, om xomxo tibeac pilepac nilô la vô Apumtau di vông i vin.

²²Mêd xomxo vông vinên wê dô Jerusalem gee ngô wê tibii Antiok vông i vin xolac ge om he vông Banabas la Antiok. ²³Banabas mila yê wê Anutu vông vizid nivîha vô he Antiok ge, om xêyaa vô nivîha di i viac kiyang vô he ên nêbê he i vông i vin Apumtau hixôn nilô yadiluhu i tiyi buc vihati. ²⁴Banabas ge xomxo nivîha ti wê vông i vin xêkizêc di Myakilôhō Ngibua hivun i xôn. Mêd xomxo Antiok tibeac pilepac he di vông i vin Apumtau.

²⁵Mêd Banabas loc mi la Tasas ên nêb ob la myag Sol. ²⁶Yêvô om yuu lax mi la Antiok, mêd yuu dô hixôn xomxo vông vinên Antiok tiyi klismas ti diluhu di le vông xolac vô he tibeac. Gê Antiok he nêl xomxo vông vinên lê nêbê Klisten^a taxlee.

²⁷Vô buc tige plopete ya wê lam gê Jerusalem ge val Antiok. ²⁸Mêd he ti lê nêbê Agabas le vac he mahigun di nêl kiyang ti wê Myakilôhō Ngibua nêl vô i ge ên nêbê vip levac obêc val vac vigwe viyang viyang. Agabas kiyang tige vô nôn lec vô buc timuên wê Klodias tu he nên king ge. ²⁹Xomxo vông vinên Antiok ngô Agabas kiyang om hilu kiyang nêb he ob ngidu lie vông vinên wê dô Judia ge xôn, om xomxo toto yê léc vông i tiyi mone wê yêp vô he ge. ³⁰Om he kituc mone pyap di vông vô Banabas yuu Sol di yuu kô mi la vông vô gyovixa Jerusalem.

Helot hi Jems yib di vông Pita vac xumac kalabuhu

12 ¹Vô buc tige king Helot vông viyin vô xomxo vông vinên ya, ²om vông tibii la hi Jon li Jems ya yipac mi i yib. ³Mêd Helot yê wê Yuda mangwe he xêyaa vin lec môp tibêge om Helot nêl di tibii la hôm

^a 11:26 Lê Klisten tige, kehe bêga nêbê he wê tu Kilisi xe ge. “Klis” ge Kilisi di “ten” ge ixe, om he kituc lê yuu xôn di nêl ên nêbê “Klisten.”

Pita xôn. He vông tige lec buc levac wê he Yuda ya blet wê yis maên ge. ⁴Mêd he la hôm Pita xôn di kô mi la tung vac xumac kalabuhu, di tibii xêhipu vigê yuu di vixa vilu di sec ti (16) yê Pita xôn di he kidu yuudiyuu om he yuudiyuu la bin pyap, nang dêc yuudiyuu obêc la bin nang. Mêd Helot xo nêbê Pita ob dô vac kalabuhu di buc wê Yuda ob myêl vizid ên xovô buc wê bue sea Isip ilage i loc vêl lê, lêc vông Pita i loc le vô Yuda manôn ên he i ngô i nêb kiyang. ⁵Om xêhipu tige viac Pita mi he dô vac xumac kalabuhu, lêc he vông vinên kitaa xêkizêc vô Anutu nêb i ngidu Pita xôn.

Angela ti kô Pita vêl ên xumac kalabuhu

⁶Mêd Helot xo nêbê titige Pita ob la le vô he Yuda manôn, om bucên ge Pita yêp vac xumac kalabuhu di sen yuu ku i xôn di i yêp vac xêhipu yuu mahigun, di xêhipu ya le bin vuayen. ⁷Lêc lutibed Anutu vông angela ti val vô Pita di xêseac linac vac xumac lôma, mêd angela vyax vigê lec Pita di tipi vô ên nêbê, “Kidi lec lutibed.” Mêd lutibed sen piwelac vêl ên Pita vigê di tô mi la kibun. ⁸Mêd angela nêl vô Pita ên nêbê, “Vêx ông let lec di su ông su lec.” Om Pita vông bêge pyap di angela nêl nang ên nêbê, “Vinyum ông ngakwi ngwe kisii lec di lam timu vô a.” ⁹Om Pita kidi lec di timu vô angela vixa di yuu la. Lêc Pita lungên wê angela didii i vêl ên xumac kalabuhu nilô ge di so nêb mêd yê vivia pileva. ¹⁰Mêd yuu luu xêhipu wê tax ge vêl mi la, nang di mila luu mahigun ngweo vêl mi la nang, di yuu val vô vuayen ain ti wê ob sea xumac kalabuhu mi la vixun ge, lêc vuayen tyo, ici va tax om yuu lop mi la vixun, di tup vô môm mi la mahigun ti lê, lêc lutibed angela sea Pita di la.

¹¹Mêd Pita kinu milax vac i di i xovô ên nêbê, “Ga a xovô vixôhilôg ên a nêbê Apumtau vông angela tige lam kô a vêl ên Helot vigê di vô a vêl ên nipaên wê he Yuda nêb ob vông vô a ge.” ¹²Pita xovô pyap om loc mi la vô Malia wê Jon ta ge ben. Jon lê ngwe nêbê Mak. Xomxo tibeac kitucma di kitaa vô Anutu mi dô, ¹³om Pita hi vigê lec vuayen di vêx yuac ti lê nêbê Loda ngô om lam nêb ob tax vuayen. ¹⁴Lêc ngô Pita vya di xovô nêbê ge Pita om xêyaa vô nivihâ yang, lêc taxên vuayen ma dom tup mi lax nêl vô he wê dô vac xumac lôma ge ên nêbê Pita val le vixun. ¹⁵Lêc he nêl vô ên nêbê, “Ge ông piyôp vô yacyac.” Lêc vêx tige nêl xêkizêc ên nêbê, “Pita vixôhilôg.” Lêc he nêl vô ên he nêbê, “Ge Pita kinu.”

¹⁶Mêd Pita le vixun di hi vigê lec vuayen lu lu om he la tax vuayen lêc yê Pita vixôhilôg om he yetac mabu. ¹⁷Mêd Pita vông vigê vô he nêb he dô kiyang maên, mêd nêl wê Apumtau kô i vêl ên xumac kalabuhu ge kitong vô he di nêl ên nêbê, “Xam loc nêl a kitong vô Jems he lie vông vinên hixôn.” Mêd Pita sea he di la vigwe bangwe.

¹⁸Mêd vigwe vidii di xêhipu he yê wê Pita xôa ma ge om he yetac di nêl vôma ên nêbê, “Pita la na?” ¹⁹Mêd Helot vông yuac lec myagên Pita

lêc tulecên ma, om kinêg vô he xêhipu wê viac Pita ge lêc he lungên, om Helot nêl di tibii hi he yib. Pyap mêd Helot sea vigwe Judia di la dô Sisalia.

Helot yib

²⁰Helot xêyaa vô myavinê vô xomxo Taia yuu Saidon, om he Taia yuu Saidon kituc la vô Helot ên nêb ob hi kiyang tige yib, ên he mi kisuu xen yaên vac vigwe wê Helot viac ge. He la viac nêb kiyang tax vô Blastas wê mi viac Helot xumac ge. Pyap mêd he la kitaa Helot, nêb i hi kiyang wê he vông ge i yib. ²¹Mêd buc wê Helot tung ge od vunac ngakwi king lec di la dô lec sia king di nêl kiyang vô he vihati. ²²Mêd he wê ngô kiyang tige tyuc vya levac ên nêbê, “Ga o xomxo kibun ti vya lêm. Nge, vya ga tiyi anutu vya.” ²³Lêc Helot yong i di o pimil Anutu lêm, om lutibed Apumtau vông angela ti lam hi Helot ya myel vêê om ya i nilô ma vêl di i yib.

²⁴Mêlêc Anutu xolac la vô levac vac vigwe tibeac.

²⁵Mêd Banabas yuu Sol la vông mone vô gyovixa Jerusalem, pyap dêc yuu kô Jon Mak di yon lax mi la Antiok.

Xomxo vông vinên vông Banabas yuu Sol la

13 ¹Vac konglegesen Antiok, xomxo wê plopete di he wê tixuu xomxo ya xolac ge, he ya dô. He lê bêga nêbê Banabas yuu Simion wê lê ngwe nêbê ninivi vilicac ge, di Lusias wê lam gê Sailini ge yuu Maneyen wê gavman levac Helot nipipu ti ge, di Sol. ²Buc ti lêc xomxo vông vinên vihati ngibua yaên di kitaa vô Apumtau mi dô lêc Myakilôhê Ngibua nêl vô he ên nêbê, “Xam vinoo Banabas yuu Sol ên yuu i loc vông yuac wê a ob vông vô yuu ge.” ³Om he ngibua yaên di kitaa vô Anutu, pyap dêc vyax vigê lec yuu di vông yuu la.

Banabas yuu Sol la nêl Yesu xolac vac vigwe Saiplas

⁴Myakilôhê Ngibua vông Banabas yuu Sol la, om yuu la vigwe Selusia di lec sip gê Selusia di la vigwe kitôn Saiplas wê yêp vac gwec mahigun ge. ⁵Vac vigwe Saiplas yuu la dô vigwe Salamis di nêl Anutu xolac vac xumac lilo wê he Yuda vông ge vihati. Jon Mak dô hixôn yuu om ngidu yuu xôn vac yuac.

⁶Mêd yon la tup vac vigwe nipwo vihati di mila vigwe ti lê nêbê Pepos. Mêd yon tulec xomxo Yuda ti lê nêbê Ba-Jisas. Ba-Jisas ge plopet kityooên ti wê mi vông viloo hixôn yevac ge, ⁷di mi dô hixôn gavman levac ti lê nêbê Sesias Polas. Sesias Polas ge, xomxo wê xovôên nivîha ge om keac Banabas yuu Sol la vô i ên nêb ob ngô Anutu xolac. ⁸Lêc Ba-Jisas wê lê ngwe vac Glik vya nêbê Elimas ge nêl nipaên lec Banabas yuu Sol, ên nêb ob pilepac gavman levac tyo nilô ên i o lêc vông i vin Yesu

lêm. ⁹Lêc Sol wê lê ngwe nêbê Pol ge, Myakilôhô Ngibua hivun i xôn om Pol yê Elimas kizêc, ¹⁰di nêl vô ên nêbê, “Ông Seten nu, ông vông vevac vô kiyang nivaha vihati, di kiyang kityooên yuu nipaên pup lec ông nilôm. Ông juda Apumtau kiyang tiyi buc vihati. Obêc buc tina lêc ông sea kiyang kityooên wê ông mi nêl ge? ¹¹Om wê lê. Gwêbaga Apumtau obêc hi ông di vông ông mamnôn i toc, di ông wêên vigwe ob ma di buc ya i loc vêl lê.” Pol nêl bêge mêd lutibed Elimas manôn vô mapitoc di i vô pilax pilax vigwe di myag xomxo wê ob hôm lec i vigê mi hilung môp vô i ge. ¹²Gavman levac yê tige di yetac ên Apumtau xolac di vông i vin.

Pol yuu Banabas vông yuac gê Antiok wê yêp vac vigwe levac Pisidia ge

¹³Pol hixôn xomxo wê mi la hixôn i ge lec sip gê Pepos di la Pega vac vigwe Pampilia. Lêc Jon Mak sea he di lax mi la Jelusalem. ¹⁴Mêd he kidi vac Pega di la Antiok wê yêp vac vigwe levac Pisidia ge. Di buc sabat ge he la vac Yuda xumac lilo di la dô. ¹⁵Xomxo wê viac xumac lilo ge kitong xolac wê Moses he plopete kivuu ilage. Pyap dêc he nêl kiyang la vô Pol yuu Banabas ên nêbê, “Lig muu, muu obêc nêb nêl kiyang ya vô xe ên i ngidu xe xôn ge od muu nêl.” ¹⁶Om Pol kidi lec di vigê la kisii di i nêl vô he ên nêbê, “Xam lige Islel hixôn xam tibii ba wê xam xona ên Anutu ge, xam ngô lê. ¹⁷Anutu ti wê il Islel vông ge vînoo mage buge ilage, di buc wê he la dô Isip tiyi xocbê xomxo vitevac ge od Anutu vông he vô tibeac hiwocên. Di timuên Anutu vigê xêkizêc didii he vêl di vông he la. ¹⁸He la dô vigwe mahigun pileva tiyi klismas kehe yuu, lêc Anutu o kitya he vêl ên wê he pwoo i vya vac ge lêm. ¹⁹Nang dêc Anutu kitya tibii viyang vigê vilu di sec yuu wê dô vac vigwe Kenan ge vêl di vông kibun tige vô he Islel mi he dô vac i tiyi klismas 450. ²⁰Nang dêc Anutu vînoo Islel levac di he viac lie di i val tyip vô buc wê plopet Samyuel dô ge.

²¹“Lêc he Islel nêb he ob vînoo king wê ob viac he ge om Anutu vînoo Kis nu Sol wê kehe yêp vac Bensamin ge, di i tu king mi viac he tiyi klismas kehe yuu. ²²Lêc Anutu kitya Sol lê king vêl di vông i la lec Devit. Anutu nêl lec Devit bêga ên nêbê,

‘A xê Jesi nu Devit di a xêgyaa vin lec i, ên i ge xomxo wê ob vông yuac vihati tiyi xocbê a nêl ge.’

²³“Mêd Anutu hilu kiyang nêbê Devit bue paha ti obêc lam hôm xomxo Islel lec. Om Yesu lam vông kiyang tyo vô nôn lec.

²⁴“Di buc wê Yesu gên o lam lêm ge, Jon nêl kiyang vô he Islel vihati ên nêbê he i pilepac he di lipac mia. ²⁵Vô kwabo lec wê Jon yuac ob pyap ge om Jon nêl ên nêbê, ‘Xam xovô ên xam nêb a letya? A o xomxo ti wê xam dô bin ge lêm. Xomxo ti obêc val timuên, di a o nivaha wê a obêc piwelac su vêl ên i vixa ge lêm.’

²⁶“Jon nêl bêge, om xam lige wê xam tu Eblaham nue gee hixôn xam tibii ba wê xam xona ên Anutu gee, xam ngô lê. Kiyang wê Anutu nêl

nêb ob hòm il lec ge, Anutu vông i lam pyap vô il. ²⁷Ên xomxo Jerusalem hixôn he nêb xomxo levac, he o xovô Yesu lêm, di he o xovô plopete kiyang wê he mi kitong vô buc sabat ge kehe lêm. Om he vông kiyang vô Yesu nêb ob hi i yib, léc môp wê he vông ge vông plopete kiyang vô nôn lec. ²⁸He o tulec i nêb nipaên ti lêm, léc he kitaa Pailat ên nêb i hi i yib. ²⁹He vông i tiyi kiyang vihati wê plopete kivuu lec Yesu ilage, nang dêc he kwax Yesu ninivi vêl ên xax pola di kô mi la lii vac lôva. ³⁰Lêc Anutu tipi vô i kidi lec vac yibên ³¹di buc tibeac Yesu hilung i vô he wê he mi la hixôn i gê Galili mi la Jerusalem ge. Di gwêbaga xomxo tige nêl Yesu kehe kitong vô lie Islel.

³²“Om xe ob nêl xolac nivihia vô xam bêga bê kiyang wê Anutu hilu vô buge ilage, ³³Anutu vông kiyang tige vô nôn lec vô he bue il, ên wê tipi vô Yesu kidi lec vac yibên ge. Tiyi xocbê kiyang wê yêp vac Sam ngwe wê vông yuu lec ge bêga nêbê,

‘Ông ge a nug ông, di gwêbaga a vông ông lêm vô levac.’

³⁴“Anutu tipi vô Yesu kidi lec vac yibên om Yesu ob yib i tii vac mi ninivi pital lêm, tiyi xocbê kiyang wê Anutu nêl ilage ên nêbê,

‘Vizid nivihia wê a nêl vô Devit ge a ob vông i vô nôn lec vô xam.’

³⁵“Di kiyang ti yêp vac Sam ngwe bêga nêbê,

‘Ông ob sea num ngibua ninivi i loc pital lêm.’

³⁶“Il xovô ên il nêbê Devit vông i tiyi kiyang wê Anutu nêl vô i vô buc wê dô mavihia gê kibun ga ge, léc yib di he yev i hixôn mae bue di i ninivi pital. ³⁷Lêc xomxo ti wê Anutu tipi vô i kidi lec vac yibên ge ninivi o pital lêm. ³⁸Om xam lige, xam vvac xovô kiyang wê xe nêl vô xam bêga bê xomxo tige wê ob kitya xam nêb nipaên vêl. ³⁹Xolac wê Moses vông ilage o tiyi wê ob kitya xam nêb nipaên vêl ge lêm. Lêc Yesu ge, xomxo ti obêc vông i vin i ge od Anutu obêc piwelac i vêl ên nipaên di vông i dô nivihia. ⁴⁰Om xam xona nêb di viac xam, ên kiyang wê plopete kivuu ilage i o léc tulec xam lêm, kiyang wê nêl bêga nêbê,

⁴¹ ‘Xam wê xam so vvac vô Anutu kiyang ge, xam wê di yetac di nga vigêm vac myam, léc xam obêc wib mi la vac nipaên. Ên vuac ti wê a vông vô buc wê xam dô ge, xomxo obêc nêl kitong vô xam léc xam ob vông i vin lêm.’ ”

⁴²Pol nêl kiyang pyap di yuu Banabas nêb ob la vixun, léc xomxo kitaa yuu ên nêbê, “Muu lôm lec sabat ngwe timuên ên lôm nêl kiyang tige i tii vac.” ⁴³He vihati lop mi la vixun, mêd he Yuda hixôn tibii wê vông i vin Anutu di mi timu vô Yuda môp gee he tibeac timu vô Pol yuu Banabas vixa. Mêd yuu viac kiyang vô he ên nêbê he i dô vac vizid wê Anutu vông ge.

⁴⁴Vô buc sabat ngwe timuên xomxo wê dô vigwe tige vihati kitucma ên nêb ob ngô Anutu xolac. ⁴⁵Lêc he Yuda yê wê xomxo tibeac kitucma vô Pol yuu Banabas ge om he xêyaa vô nipaên vô yuu di he so vva vô

Pol hixôn xolac wê nêl ge. ⁴⁶Lêc Pol yuu Banabas xonaên ma di yuu nêl kiyang xêkizêc vô he ên nêbê, “Ge nivîha wê xe nêl Anutu xolac vô xam Yuda taxlee, lêc xam vô nimim vô, om tiyi xocbê xam nêl ên xam nêbê xam o tiyi wê xam ob dô mamviha luta lêc luta ge lêm. Om xam ngô lê. Gwêbaga xe ob sea xam di la vô tibii wê o Yuda lêm gee, ⁴⁷ên Apumtau nêl vô xe ên nêbê,

‘A ob vông ông loc tiyi xocbê ngwax wê ob linac vô he wê o Yuda lêm ge, di ông ob hilung môp maviha dôên vô xomxo kibun ga vihati.’ ”

⁴⁸Xomxo wê o Yuda lêm gee ngô kiyang wê Pol nêl ge di he xêyaa vô nivîha yang di he pimil Apumtau xolac, mêd he wê Anutu vînoo he ên nêb he ob dô maviha luta lêc luta gee he vihati vông i vin.

⁴⁹Mêd Apumtau xolac la vô levac vac vîgwe tîgee vihati. ⁵⁰Lêc he Yuda vông vêx wê lê levac wê mi kitaa vô Anutu gee hixôn xomxo levac vac vîgwe tîgee he nilô kidi lec nêb ob hi Pol yuu Banabas, om he vông vîyin vô yuu di tii yuu la vêl ên he ben. ⁵¹Om yuu liloo vîjuva vêl ên vîxa pitehe ên nêbê he i xovô bê he nên nîpaên yêp vô he. Mêd yuu loc di la vîgwe Aikoniam. ⁵²Di xomxo vông vinên wê dô Antiok gee he xêyaa vô nivîha di Myakilôhò Ngîbua hivun he xôn.

Pol yuu Banabas nêl xolac gê Aikoniam

14 ¹Gê vîgwe Aikoniam Pol yuu Banabas vông i tiyi wê yuu vông gê Antiok ge. Om yuu la vac xumac lîlo wê he Yuda vông ge di nêl kiyang hixôn xêkizêc, om Yuda hixôn tibii ba he tîbeac vông i vin Yesu. ²Lêc he Yuda wê o vông i vin lêm ge nêl kiyang vaxvax lec xomxo vông vinên om vông tibii wê o Yuda lêm gee he xêyaa vô nîpaên vô xomxo vông vinên. ³Mêd Pol yuu Banabas dô Aikoniam buc dia tya di nêl Apumtau xolac hixôn xêkizêc, di Apumtau vông xêkizêc vô yuu tiyi wê yuu ob vông do levac toto ya ge, ên nêbê xomxo i yê di xovô bê kiyang wê yuu nêl lec xêyaa vin lecên wê Apumtau vông ge, kiyang nôn vîxôhilôg. ⁴Lêc xomxo wê dô vîgwe tîgee hibû he la yuu, vilu vông i vin he Yuda di vilu vông i vin sinale. ⁵Mêd he Yuda hixôn tibii ba kidi lec hixôn lie levac, ên nêb he ob vông vîyin vô Pol yuu Banabas di nêx yuu ya ngîdax mi yuu i yib. ⁶Lêc yuu ngô wê he nêb ob hi yuu ge om yuu pec mi la Listla yuu Debi wê yêp vac vîgwe levac Likionia ge, di la vîgwe wê yêp kwabo ge ya hixôn. ⁷Mêd yuu nêl xolac vac vîgwe tîgee vihati.

Pol yuu Banabas nêl xolac gê Listla

⁸Xomxo vux ti dô vîgwe Listla, lêc ta kô i di vîxa vô xêlehelehe di o mi vîlee ti lêm. Mi dô kîzêc. ⁹Mêd xomxo tyo ngô kiyang wê Pol nêl ge mêd Pol yê i xêkizêc di xovô nêbê tyo vông i vin tiyi wê ob vông i vô nivîha lec ge, ¹⁰om nêl vya levac ên nêbê, “Ông kidi lec mi le kisii.” Mêgem tyo kidi lec lutibed di vîlee mi la.

11 Tibii tibeac yê wê Pol vông xomxo tige vô nivaha lec ge om he tyuc vac Likionia vya ên nêbê, “Anutu tu xomxo manôn di lop mi lam vô il.”
 12 Om he nêl he anutu kibun ga yuu lê lec Banabas yuu Pol, om nêl lê Sus lec Banabas di nêl lê Hemis lec Pol, ên Pol ge wê mi nêl kiyang tibeac.
 13 Xumac ngibua wê Sus vông ge yêp kwabo vô vigwe tige ninya. Mêd xomxo wê mi si daa vô Sus ge ti la kô bwoc levac vux ya hixôn ngaola di kô mi la vô vuayen ên xomxo nêb ob hi bwoc levac mi tung daa vô yuu.
 14 Lêc Banabas yuu Pol ngô kiyang tige om yuu nilô viyin di yuu lêx ngakwi wê yuu vông ge sea di tup mi la le vac xomxo mahigun di nêl vya levac ên nêbê, 15 “Xamê, bêna lêc xam vông môt tibêge? Xii ga xomxo kibun ga xocbê xam ge. Lêc xii lam ên xii nêb xii ob nêl kiyang nivaha vô xam bê xam sea susu nôn maên tige di pilepac nilôm i loc vô Anutu maviha wê tung lag yuu kibun di gwec hixôn susu vihati yang ge. 16 Vixôhilôg, vô buc ilage xomxo vac vigwe vihati vông i tiyi xovôên wê heche va vông ge, di Anutu o le vac xôn lêm. 17 Lêc Anutu o xôpac ên xomxo di vông he lungên i lêm. Nge, vông môt nivaha vô il, xocbê vông lun lam gê kisii di vông yaên vô nôn tibeac, om vông yaên tiyi xam di vông xam xêmyaa vô nivaha.”
 18 Yuu nêl kiyang tige vô he, léc he vô xêkizêc nêb he ob tung daa vô yuu, om yuu nêl kiyang tige tii vac vac om he o tung daa vô yuu lêm.

He nêx Pol ya ngidax

19 Mêd Yuda ya lam gê Antiok yuu Aikoniam di val pilepac xomxo nilô om he nêx Pol ya ngidax di didii i mi la vigwe ninyawehe ên he xo ên he nêb Pol yib. 20 Lêc xomxo vông vinên val le ngivina Pol di i kidi lec di lax viyangtôv, di vigwe vidiiên ge yuu Banabas la vigwe Debi.

21 Yuu nêl xolac vô tibii Debi di he tibeac vông i vin. Pyap dêc yuu lax mi la Listla yuu Aikoniam di Antiok tii vac nang. 22 Yuu ngidu xomxo vông vinên xôn ya kiyang di nêl kiyang xêkizêc vô he ên nêbê, “Xam le xêkizêc vac vông vinên di xam o léc sea lêm. Il ob kô viyin tibeac tax êdêc la dô vac Anutu ben timuên.” 23 Mêd vac vigwe vihati yuu vinoo gyovixa wê ob viac xomxo vông vinên ge mêd yuu ngibua yaên di kitaa lec he vihati ên nêb Anutu ti wê he vông i vin ge i viac he.

Pol yuu Banabas lax mi la Antiok vac vigwe levac Silia

24 Pol yuu Banabas la vilee vac vigwe Pisidia di la vac vigwe levac Pampilia 25 di la nêl Anutu xolac vô tibii Pega. Pyap dêc loc mi la Atelia, 26 di lec sip di lax mi la Antiok. Antiok ge wê ilage xomxo vông yuu vac Anutu vigê nêb i viac yuu di yuu vông yuac. Mêd yuu vông yuac tyo pyap om yuu lax mi la Antiok. 27 Yuu val Antiok mêd kituc xomxo vông vinên di nêl yuac vihati wê Anutu ngidu yuu xôn ge kitong vô he di nêl hixôn ên nêbê, “Gwêbaga Anutu vông tibii wê o Yuda lêm ge he ngô xolac hixôn di vông i vin.” 28 Mêd yuu dô buc ya hixôn xomxo vông vinên tige.

Xomxo vông vinên kitucma gê Jerusalem

15 ¹He Yuda wê dô Judia gee he ya la Antiok di la nêl vô xomxo vông vinên bêga nêbê, “Xam obêc gôl nimnivi tiyi xolac wê Moses vông ilage lêm ge od o tiyi wê Anutu ob kô xam lec ge lêm.” ²He nêl bêge léc Pol yuu Banabas yê kiyang tige tiyiên ma om he ngaênma levac lec kiyang tige. Om xomxo vông vinên vînoo Pol yuu Banabas hixôn xomxo ya ên nêb he i loc Jerusalem vô Yesu nue ngivihi yuu gyovixa ên he i titô kiyang wê he ngaênma lec ge.

³Xomxo vông vinên vông he la, om he la môp Jerusalem di la vac vigwe toto vac Pinisia yuu Samelia di he nêl lec wê tibii wê o Yuda lêm gee tibeac pilepac nilô di vông i vin Yesu ge kitong vô xomxo vông vinên, om he wê ngô kiyang tige, he xêyaa vô nivîha.

⁴Mêd he mila tyip Jerusalem di xomxo vông vinên hixôn Yesu nue ngivihi di gyovixa, he kô Pol yuu Banabas he lie lec nivîha. Mêd Pol yuu Banabas nêl yuac vihati wê yuu vông di Anutu ngidu yuu xôn ge kitong vô he. ⁵Lêc Palisi ya wê vông i vin Yesu ge he kidi lec di nêl ên nêbê, “Xomxo vông vinên wê o Yuda lêm gee, xam gôl he ninivi di nêl vô he bê he i timu vô xolac wê Moses vông ge.”

⁶Mêgem Yesu nue ngivihi hixôn gyovixa kitucma ên nêb ob viac kiyang tige. ⁷He nêl kiyang tibeac lec kiyang tige, pyap dêc Pita kidi lec di nêl vô he ên nêbê, “Xam lige, xam xovô pyap ên xam nêbê ilage Anutu vînoo a vac xam mahigun ên nêb a la nêl xolac vô tibii wê o Yuda lêm gee ên he i ngô di vông i vin. ⁸Mêd Anutu wê xovô il vihati nilôd ge vông Myakilôhō Ngibua vô he tiyi xocbê vông vô il Yuda ilage. Om il xovô ên il nêbê Anutu yê he nivîha. ⁹Di Anutu o vông môp bangwe vô il Yuda di vông bangwe vô he tibii ba lêm. Nge, he vông i vin om Anutu vông he vô paha lec. ¹⁰Di bêna léc xam nêb xam ob yaxên Anutu? Moses xolac vông viyin vô buge ilage di il gwêbaga hixôn, di il o tiyi wê il ob kilê viyin tige lêm. Di bêna léc xam nêb xam ob lii viyin tige lec he wê o Yuda lêm ge hixônê? ¹¹Il vông i vin ên il nêbê xêyaa vin lecên wê Apumtau Yesu vông ge ob vông il dô madviha di he êno ob dô maviha.”

¹²Pita nêl bêge mêd Yesu nue ngivihi hixôn gyovixa dô kiyang maên di ngô kiyang wê Pol yuu Banabas nêl ge, om yuu nêl lec do levac wê Anutu ngidu yuu xôn di yuu la vông vac tibii madiluhu ben ge.

¹³Yuu nêl kiyang pyap mêd Jems nêl ên nêbê, “Xam lige, xam ngô kiyang wê a ob nêl ge. ¹⁴Saimon Pita nêl vô xam gwêba ên nêbê taxlee Anutu xo tibii wê o Yuda lêm ge ên nêb ob vînoo he ya tu i nue. ¹⁵Di kiyang wê he plopete kivuu ilage nêl kiyang tige bêga nêbê,

¹⁶‘Apumtau nêl ên nêbê, “Timuên ge a obêc vena, di Devit xumac wê kipê ge a ob vena lox paha vac. Di susu wê vô nipaên vac xumac ge, a ob viac vô i tii vac. ¹⁷Om he wê o Yuda lêm ge, he ob vông

yuac lec myagên Apumtau. He ge wê a vinoo he ên a nêb he i tu a nuge.”¹⁸ Kiyang tige Apumtau vya wê nêl ilage mi i yêp.’

¹⁹“Mêgem xovôên wê a vông ge bêga nêbê il ob vông vîyin tibeac vô tibii ba wê pilepac he ge lêm. ²⁰Lêc il ob kivuu kipihac i loc vô he bêga bê he i kol he ên yaên wê xomxo tung i tu daa vô anutu kityooên ge, di he i o léc vông môp yôdac vêx yuu vux lêm, di he i o ya lilii wê he ngibina kwa di hi dô vac nilô ge lêm, di he yaên hi i ma. ²¹Ên kiyang wê yêp vac Moses xolac ge, xomxo mi nêl xolac tige vac vîgwe vihati di xomxo mi kitong xolac tige vac xumac lilo tiyi buc sabat vihati. Môp tige yêp ilage di i val tyip lec gwêbaga hixôn.”

Yesu nue ngivihi hixôn gyovixa vông kipihac la vô tibii vông vinên wê o Yuda lêm gee

²²Mêgem Yesu nue ngivihi hixôn gyovixa hixôn xomxo vông vinên vihati nêb ob vinoo lie ya ên vông he i loc hixôn Pol yuu Banabas mi loc Antiok. Om he vinoo Judas wê lê ngwe nêbê Basabas ge yuu Sailas, ên yuu ge xomxo levac wê he Yuda vông ge. ²³Yuu kô kipihac wê Yesu nue ngivihi hixôn gyovixa kivuu bêga nêbê, “Yesu nue ngivihi hixôn gyovixa kivuu kipihac tiga di vông i loc vô xam tibii Antiok yuu Silia di Silisia wê xam vông i vin Yesu gee. ²⁴Xe ngô wê xomxo ya kidi vac xe mahîgun di loc juda xam nilôm ya kiyang di vông xam nilôm vô vîyin. Lêc xe o vông he loc vô xam lêm. ²⁵Mêgem xe kitucma di hilu kiyang bêga ên xe nêbê xe ob vinoo xomxo yuu i loc vô xam hixôn il lig Pol yuu Banabas wê xe xêmyaa vin lec yuu ge. ²⁶Pol yuu Banabas o xona ên wê xomxo nêb ob hi yuu yib lec Yesu Kilisi lê ge lêm. ²⁷Om xe vông Judas yuu Sailas loc vô xam di yuu ob nêl kiyang tiga hixôn vô xam. ²⁸Myakilôhō Ngîbua dô hixôn xe di xe hilu kiyang bêga ên xe nêbê xe ob vông vîyin tibeac vô xam lêm. Dom môp wê xam ob timu vô ge bêga bê ²⁹xam kol xam ên susu yaên wê xomxo kô mi la tung i tu daa vô anutu kityooên ge, di xam waên hi i ma, di xam o wa lilii wê xomxo ngibina kwa di hi dô vac nilô ge lêm, di xam o léc vông yôdac vêx yuu vux lêm. Xam obêc sea môp nipaên tige, od obêc nivîha. Vidiiên xam. Xam dô nivîha.”

³⁰Mêd xomxo vông vinên vông he la mêd he mila Antiok di kituc xomxo vông vinên vihati di vông kipihac tyo vô he. ³¹He kitong kipihac pyap di he xêyaa vô nivîha ên kiyang nivîha wê yêp vac kipihac ge. ³²Judas yuu Sailas ge plopete yuu om yuu nêl kiyang tibeac mangwe vô he ên nêb i ngidu he xôn di he i vông i vin xêkizêc. ³³Mêd Judas yuu Sailas dô Antiok buc dia hixôn he. Pyap dêc lie Antiok nêl kiyang nivîha vô yuu di vông yuu lax vô he Jelusalem wê vông yuu lam ge. ³⁴[Lêc Sailas nêb ob dô Antiok om dô.] ³⁵Mêd Pol yuu Banabas dô Antiok, di yuu hixôn xomxo tibeac mangwe nêl Apumtau xolac kitong vô he Antiok.

Pol yuu Banabas seama

³⁶Buc ya la vêl di Pol nêl vô Banabas ên nêbê “U ob lax mi la vô lige wê u la nêl Apumtau xolac vac he ben ilage, di tup vac he mi xê bêc he

dô nivihā, me?” ³⁷Mêd Banabas nêb Jon Mak i loc hixôn yuu, ³⁸lêc Pol nêl ên nêbê, “Jon Mak sea u gê Pampilia ilage di o vông yuac ti hixôn u lêm, om ob la hixôn u lêm.” ³⁹Om yuu nêlma lec kiyang tige di seama, om Banabas kô Mak di yuu lec sip mi la vigwe Saiplas, ⁴⁰di Pol kô Sailas ên nêb yuu ob la, om lie vông vinên vông yuu vac Apumtau vigê ên nêb i viac yuu. ⁴¹Mêd yuu la vac vigwe Silia yuu Silisia vihati di ngidu xomxo vông vinên xôn.

Timoti la hixôn Pol

16 ¹Pol kidi vac Antiok di la Debi yuu Listla mi la tulec xomxo vông vinên ti lê nêbê Timoti. Timoti ta ge vêx Yuda ti wê vông i vin Yesu ge, di ma ge tibii Glik ti. ²Mêd Timoti lie vông vinên vac vigwe Listla yuu Aikoniam gee nêl i kitong nêbê i xomxo nivihā. ³Mêgem Pol nêb Timoti i loc hixôn i om kô Timoti mi la gôl ninivi tiyi môm wê he Yuda vông ge. Pol xo he Yuda di vông môm tige, ên he Yuda vac vigwe tige vihati, he xovô wê Timoti ma ge tibii Glik. ⁴Mêd he la tup vac vigwe vihati di nêl kiyang wê Yesu nue ngivihā hixôn gyovixa hilu gê Jelusalem ge kitong vô xomxo vông vinên ên nêb he i timu vô. ⁵Om xomxo vông vinên vac konglegesen vihati vông i vin xêkizêc di naba levac wê he vông ge le lec mi la kisii tiyi buc vihati.

Pol yê vîvia lec wê xomxo Masedonia tyuc i ge

⁶Myakilôhō Ngibua le vac he xôn ên nêb he i o nêl xolac vô tibii Esia lêm, om he la tup vac vigwe Plisia yuu Galesia. ⁷Mêd he mîla vigwe Misia di xo nêb he ob la vigwe Bitinia, lêc Myakilôhō Ngibua wê Yesu vông ge le vac he xôn nêb he locên Bitinia i ma. ⁸Mêgem he luu Misia vêl di la Tloas. ⁹Mêd vô bucên tige Pol yê vîvia ti nêbê xomxo Masedonia ti le kisii di kitaa i ên nêbê, “Ông sox lam Masedonia ên lam hôm xe lec.” ¹⁰Pol yê vîvia tige pyap mêd lutibed a, Luk, hixôn he, xe myag môm wê xe ob la Masedonia ge, ên xe xovô ên xe nêbê Anutu keac xe ên nêb xe la nêl xolac vô tibii viyang tiganê.

Pol la vigwe Pilipai di Lidia vông i vin

¹¹Mêgem xe lec sip gê Tloas di la bôbac vô vigwe Samotles. Mêd xe xêp di vidiiên xe kô sip mi la Niapolis. ¹²Mêd xe sea Niapolis di mîla vigwe levac Pilipai wê yêp vac vigwe levac Masedonia ge. Vigwe tige tibii Lom viac. Xe dô vigwe tige buc ya, ¹³di buc sabat xe sea vigwe ni lô di mîla vô mia ên xe xo ên xe nêb mêd vigwe wê xomxo mi kitaa lec ge yêp vô mia tige. Mêgem xe mîla vô vêx ya wê kitucma mi xeedô ge, om xe la dô hixôn he di nêl xolac vô he. ¹⁴Vêx ti lê nêbê Lidia ngô kiyang tige. Lidia lam gê vigwe Taiataila di mi vông yuac bisnis lec nivimihi hi. Lidia mi kitaa vô Anutu di Apumtau pilepac i ni lô di i vô nînya vô kiyang wê Pol

nêl ge. ¹⁵Mêd Lidia hixôn xomxo wê mi dô hixôn i ge he vihati lipac mia. Mêd Lidia nêl vô xe ên nêbê, “Xam obêc wê bêc a vông i vin Apumtau nô n ge od xam lam dô vac a bog.” Nêl kiyang xêkizêc vô xe om xe la dô hixôn i.

Pol yuu Sailas la dô vac xumac kalabuhu gê Pilipai

¹⁶Buc ti xe nêb xe ob la vigwe ti wê xomxo mi kitaa vac ge, lêc xe mîla tulec vêx yuac ti vac môp. Vêx tige, vimwo nipaên dô vac nilô di nêl kiyang vihati kitong om xomxo wê vêx tige vông yuac vô he ge, he kô mone levac lec kiyang wê vêx tige mi nêl ge. ¹⁷Mêd vêx tige timu vô xe hixôn Pol vixam di tyuc ên nêbê, “Tibii tigae, Anutu ti wê luu baba vêl ge nue yuac, om he lam nêl môp wê Anutu ob vô xam vêl ên nipaên ge kitong vô xam.” ¹⁸Vêx tyo nêl kiyang tibêge tiyi buc tibeac om Pol ni nyag vô i di pop di nêl vô vimwo nipaên ên nêbê, “A nêl lec Yesu Kilisi lê bêga bê ông lop mi loc vêl ên vêx tige.” Mêgem lutibed vimwo nipaên lop mi la vêl ên vêx tige.

¹⁹Mêd xomxo levac wê vêx tige vông yuac vô he ge he yê di xovô nêbê he ob kô mone ti tii vac lêm, om he hôm Pol yuu Sailas xôn di kô yuu mi la vô xomxo levac vac vigwe wê he mi kitucma vac ge. ²⁰He kô yuu mi la vô gavman levac manôn di nêl vô he ên nêbê, “Xomxo yuu ga, Yuda yuu. Yuu lam il bed ga nêb ob vông il vô nipaên. ²¹Om yuu nêl kiyang ya lec môp wê gavman vîbu ên nêb il Lom ob timu vô lêm ge.” ²²Mêd tibii wê lam kitucma gee vihati so vya vô Pol yuu Sailas, di gavman levac tige lêx yuu nêl ngakwi di nêl ên nêb xomxo i pisa yuu. ²³Mêd he hi yuu mi yuu kô myavinê levac, pyap dêc vông yuu la vac xumac kalabuhu di nêl xêkizêc vô xomxo ti wê mi viac xumac kalabuhu ge ên nêb i yê yuu xôn. ²⁴Mêd xomxo tige ngô kiyang wê he nêl xêkizêc vô i ge, om kô yuu mi la tung vac xumac nilô wê yêp mahîgun ge di ving yuu vîxa xôn ya plang.

²⁵Vô vivuaên mahîgun Pol yuu Sailas kitaa di vông lilo vô Anutu, di tibii vihati wê dô vac xumac kalabuhu gee he ngô hixôn. ²⁶Lêc lutibed ngiyêg levac ti val di xumac kalabuhu yoc, di lutibed vuayen vihati tax di sen wê dô lec tibii kalabuhu vigê gee tul vêl ên he. ²⁷Om tibii ti wê viac xumac kalabuhu ge kidi lec, lêc yê wê vuayen vihati tax mi la le myadongên ge, di xo ên nêbê tibii kalabuhu pec mi la, om loc hôm yipac nêb ob hi ici va yib. ²⁸Lêc Pol keac vya levac vô i ên nêbê, “Hiên ông i ma, ên xe vihati dô.” ²⁹Om xomxo tyo keac di he dii ngwax mi lam, di i tup mi la vô Pol yuu Sailas vac xumac lôma di la yev vîxa kitu vô yuu hixôn ni yetacên. ³⁰Mêd kô yuu mi la vixun di kinêg vô yuu ên nêbê, “Xomxo levac muue, a ob vông bêna êdêc Anutu i hôm a lec?”

³¹Om yuu nêl lax vô i ên nêbê, “Ông vông i vin Apumtau Yesu di Anutu ob hôm ông lec hixôn vinême nume.” ³²Mêd yuu nêl Apumtau xolac vô xomxo tige hixôn xomxo vihati wê mi dô vac i ben gee. ³³Vô buc tibed

tige xomxo tige kô yuu mi la lipac yuu ninivi wê tibii hi i vô kityax ge. Di Pol yuu Sailas lipac xomxo tige hixôn vinê nue vihati. ³⁴Pyap dêc xomxo tyo kô yuu mi la vac ben xumac lôma di la vông yaên vô yuu, di he vinê nue vihati xêyaa vô nivîha ên wê he vông i vin Anutu ge.

³⁵Vigwe vidiiên titige gavman levac vông nue xêhipu val di he nêl ên nêbê, “Ông piwelac xomxo yuu ge di vông yuu i loc.” ³⁶Om xomxo wê viac xumac kalabuhu ge la nêl vô Pol ên nêbê, “Gavman levac vông kiyang lam ên nêbê muu loc, om muu loc hixôn xêmyaa nivîha.”

³⁷Lêc Pol la nêl vô xêhipu ên nêbê, “Xii ga tibii Lom yuu, lêc he hi xii vô xomxo tibeac manôn di vông xii la dô vac kalabuhu vîdaaên. Di he o tulec soên wê xii vông ge ti lêm, di gwêbaga he nêb he ob vông xii la kiyang maên. Ge o tiyi lêm. Om heche va i lam kô xii mi loc.”

³⁸Mêd xêhipu lax nêl kiyang tige vô gavman levace om he ngô di xona mabu ên bo ti wê nêl ên nêbê yuu ge tibii Lom yuu. ³⁹Om he la nêl kiyang malehe vô yuu ên nêbê, “Xe vông i so vô muu,” mêd kô yuu mi he la vixun di nêl vô yuu ên nêbê, “Muu sea vigwe ga di loc.” ⁴⁰Pol yuu Sailas sea kalabuhu di la vac xumac Lidia vông, di yuu yê lie vông vinên di nêl kiyang wê ob ngidu he xôn ge ya vô he, pyap di yuu la.

Xomxo Tesalonaika nêb ob hi Pol yuu Sailas

17 ¹Pol yuu Sailas sea vigwe Pilipai di la vigwe Ampipolis di la vigwe Apolonia. Nang di yuu mila vigwe Tesalonaika. Xumac lilo wê he Yuda vông ge ti le vac vigwe tige, ²om Pol la vac xumac tige tiyi xocbê mi la vac ya ilage, om la vac xumac tige lu yon lec buc sabat di he Yuda nêlma lec kiyang wê yêp vac kipihac xolac ge. ³Mêd Pol nêl xolac kehe kitong vô he di nêl ên nêbê, “Kilisi ti wê xam dô bin ge, Anutu tyuc lec nêb ob kô myavinê di yib di kidi lec maviha vac yibên. Om Yesu wê a nêl i kitong vô xam gwêbaga ge, ge Kilisi tyo tige.” ⁴Mêd xomxo wê ngô kiyang gee he ya vông i vin kiyang wê Pol nêl ge om he timu vô Pol yuu Sailas vîxa, di tibii Glik wê mi kitaa vô Anutu gee hixôn tibii levac vinêe, he tibeac vông i vin hixôn.

⁵Lêc he Yuda xêyaa vô myavinê vô yuu om he la kô tibii nipaên wê mi dô vax vac vigwe tige mêd he kituc xomxo tibeac di he xôn vông nididun levac vac vigwe Tesalonaika, di la ka bua ên xumac wê Jeson vông di myag Pol yuu Sailas ên nêb ob kô yuu mi la vô xomxo levac. ⁶Lêc he o yêvô yuu lêm, om he didii Jeson hixôn lie vông vinên ya mi la vô gavman levac wê viac vigwe Tesalonaika ge, di nêl vô he ên nêbê, “Xomxo yuu wê la vac vigwe vihati mi la vông xomxo vô nipaên ge yuu val dô ga vac il bed. ⁷Di Jeson ga kô yuu mi la vac i ben di he pwoo king Sisa kiyang vac di nêl ên nêbê king ngwe dô lê nêbê Yesu.” ⁸Mêd gavman levac hixôn xomxo vihati ngô kiyang tige di yetac mabu. ⁹Mêd he nêl vô Jeson he lie ên nêb he i kisuu kot, pyap di he la.

Pol yuu Sailas la vîgwe Belia

¹⁰Vô bucên tige xomxo vông vinên vông Pol yuu Sailas la, di yuu la vîgwe Belia. Yuu mîla Belia mêd la vac xumac lilo wê he Yuda vông ge. ¹¹He Yuda wê dô Belia gee he vô ninya lehe vô xolac luu Yuda wê dô Tesalonaika gee vêl, om he hôm kiyang wê yuu nêl ge lec nivîha di he mi kitong kiyang wê yêp vac kipihac xolac ge tiyi lec buc vîhati ên nêb ob xovô bê kiyang wê yuu nêl ge, ge kiyang nôn, me? ¹²Mêgem he Yuda tibeac, he vông i vin, di Glik levac wê dô hixôn he gee, vêx yuu xôn vux tibeac vông i vin hixôn. ¹³Lêc he Yuda wê dô Tesalonaika gee ngô wê Pol la nêl Anutu xolac gê Belia ge, om he la Belia di la nêl kiyang vaxvax ya vô he Belia om vông he yetac di xêyaa vô myavinê vô Pol. ¹⁴Om lutibed xomxo vông vinên vông Pol la gwec ninya di Sailas yuu Timoti dô Belia. ¹⁵Mêd xomxo wê la hixôn Pol ge kô i mi la Atens, pyap di he lax mi la ben Belia, lêc Pol vông kiyang vô he nêbê Sailas yuu Timoti i loc lutibed vô i.

Pol nêl xolac vô tibii Atens

¹⁶Pol dô bin Sailas yuu Timoti gê Atens, lêc yê wê anutu kityooên tibeac dô vac vîgwe tige om vông i nilô vô vîyin. ¹⁷Mêgem Pol la vac xumac lilo wê he Yuda vông ge di he Yuda hixôn tibii ba wê vông i vin Anutu ge, he Pol nêlma lec xolac. Di buc vîhati Pol la nêl kiyang vô xomxo wê kitucma mi dô lec wetôv ge. ¹⁸Om tibii wê vông i vin kiyang ti nêbê Epikulian ge hixôn he wê vông i vin kiyang wê nêbê Stoik ge he Pol ngaênma lec kiyang, di he ya nêl lec Pol ên nêbê, “Xomxo ti wê nêl kiyang vaxvax ge nêb ob nêl kiyang vatya vô ilê?” Di he ya nêl ên nêbê, “Mêd ob nêl kiyang lec anutu wê xomxo ya vông.” He nêl bêge, ên he ngô xolac wê Pol nêl lec Yesu wê kidi lec vac yibên ge. ¹⁹Om he kô Pol mi la vô kaunsil wê mi kitucma lec kitôn Aliopagas ge, di he nêl vô Pol ên nêbê, “Xe ob ngô kiyang paha wê ông nêl vô xomxo ya ge. ²⁰Ên kiyang wê ông nêl ge, xe ngô di yaxên lêc ge kiyang ba ti wê xe lungên ge, om ông nêl kiyang tyo kehe kitong ên xe ngô.” ²¹Tibii Atens hixôn tibii wê la dô hixôn he gee, he mi kitucma tiyi buc vîhati ên he nêb he ob ngô kiyang paha di nêl kiyang paha. Di he o vông yuac ti hixôn lêm. Nge, he dô vac môp tige tîbed.

²²Om Pol kidi mi la le vac he kaunsil mahîgun di nêl vô he ên nêbê, “Xam tibii Atens. A xê wê xam vông yuac levac lec kitaaên vô anutu ya, ²³ên a tup vac vîgwe wê xam vông ge di a xê anutu wê xam mi kitaa vô ge, di a xê alta ti wê kiyang yêp lec bêga nêbê, ‘Alta tiga anutu wê xe lungên ge, ixê.’ Om Anutu tige wê xam lungên lêc xam mi kitaa vô ge, a ob nêl i kitong vô xam.

²⁴“Anutu tige wê tung kibun hixôn susu vîhati yang, di i ge Apumtau wê viac lag yuu kibun om ob dô vac xumac wê xomxo lox ya vîgê ge lêm.

²⁵Anutu ge, susu ti o ma ên i lêm, di xomxo ti ob vông yuac ên ngidu i xôn lêm. Ên ici va vông myakilôhō hixôn maviha vō xomxo di vông susu tibeac vō he. ²⁶Taxlee Anutu tung xomxo tived di xomxo vō tibeac lec, mêd Anutu vông mi he dô lec kibun ga kidu kidu di ici va vông buc vō he di vông yôg vac kibun wê he ob dô lec ge. ²⁷Anutu nêb xomxo vihati i vông yuac lec myagên i ên he obêc tulec i. Lêc Anutu o dô teva ên il lêm. ²⁸Anutu ge wê vông xêkizêc vō il di il dô madviha di il vilee mi la di lôm. Tiyi xocbê xam lime wê piyôp levac ge nêl ên nêbê, 'Il vihati tu i nue.' ²⁹Il ga Anutu nue om il ob nêl bê Anutu ge tiyi xocbê susu wê xomxo vaci piyôp xovô, di he tixuu lec gol yuu silva di ngidax ge lêm. ³⁰Ilage xomxo o xovô Anutu lêm, lêc Anutu o nêl kiyang ti lec he lêm. Lêc gwêbaga Anutu nêl kiyang vō xomxo vac vigwe vihati ên nêbê he i pilepac he. ³¹Ên Anutu vinoo buc ti pyap, om obêc yaxên xomxo vihati nêl kiyang i yêp bôbac vō buc tige. Anutu vông yuac tige vac xomxo ti vigê om tipi vō xomxo tyo kidi lec maviha vac yibên, ên nêbê xomxo vihati i xovô bê Anutu vinoo xomxo tige vixôhilôg."

³²Xomxo tigege ngô kiyang wê Pol nêl lec xomxo ti wê kidi lec maviha vac yibên ge, om he ya nêl kiyang manôn nipaên ya lec Pol, lêc he ya nêl ên nêbê, "Buc ti xe ob ngô kiyang tige i tii vac nang." ³³Pyap dec Pol sea he di la. ³⁴Lêc xomxo ya vông i vin kiyang wê Pol nêl ge di timu vō i vixa. He wê vông i vin ge ti lê nêbê Daionisias wê kaunsil vac vigwe Aliopagas ge ti, yuu vêx ngwe lê nêbê Damalis, di xomxo ya hixôn.

Pol la vông yuac vac Kolin

18 ¹Pol sea Atens di la Kolin, ²di mila tulec Yuda vux ti lê nêbê Akwila wê ben kehe Pontas ge. Ilage Akwila yuu vinê Plisila dô Lom wê yêp vac vigwe levac Itali ge, lêc king Klodias nêl ên nêbê he Yuda he i sea Lom. Om yuu sea Lom di la dô Kolin. Buc ya lam la vêl di Pol mila vō yuu, ³lêc yê yuac wê yuu vông ge tiyi xocbê yuac wê i vông ge, om la dô hixônyuu di yon duu xumac sel di tibii kisuu. ⁴Mêd buc sabat vihati Pol la vac xumac lilo wê he Yuda vông ge mi la nêl kiyang tibeac vō he, ên nêb he Yuda hixôn tibii ba he i vông nilô i loc vō Yesu di vông i vin.

⁵Mêd Sailas yuu Timoti lam gê Masedonia di val vō Pol, di Pol nêl xolac vō he Yuda tiyi lec buc vihati di nêl vō he ên nêbê, "Yesu ge Kilisi wê Anutu vinoo i pyap ge." ⁶Lêc he Yuda pwoo Pol vya vac di so vya vō i om Pol liloo vijuva vêl ên ngakwi wê i vông ge ên nêbê he i xovô nêl nipaên wê he vông ge, di nêl vō he ên nêbê, "Xam obêc wib mi la vac nipaên ge od ge myaviwen wê xacxam va vông, ên a o vông nipaên ti vō xam lêm. Om gwêbaga a ob sea xam di la nêl xolac vō tibii madiluhu wê o Yuda lêm gee." ⁷Mêgem Pol sea he mi la dô vac tibii ti ben lê nêbê Tisias Jastas. Tisias ge mi kitaa vō Anutu, di i xumac le kwabo vō xumac

lilo wê he Yuda vông ge. ⁸Di xomxo levac ti wê mi viac he Yuda xumac lilo ge lê nêbê Klispas hixôn vinêe nue vông i vin Apumtau, di tibii Kolin tibeac ngô xolac wê Pol nêl ge di vông i vin di lipac mia.

⁹Vô bucên ti Anutu vông vivia ti lam vô Pol bêga nêbê, “Xonaên i ma. Ông nêl xolac di le i o dô xôa maên lêm. ¹⁰Ên a dô hixôn ông, om xomxo ti o tiyi wê ob vông ông vô nipaên ge lêm, ên xomxo wê tu a nuge ge tibeac dô vac vigwe tîga.” ¹¹Om Pol dô Kolin tiyi kliskas ti di dentuc vigê vilu di sec ti, di tixuu tibii Kolin ya Anutu xolac.

¹²Vô buc wê Galio tu gavman levac di viac vigwe Glik ge he Yuda tibeac kitucma di la hôm Pol xôn di kô mi la vông kiyang vô ¹³di nêl ên nêbê, “Xomxo tiga tixuu xomxo lec môm kitaaên lê, léc la môm bangwe di o tiyi xocbê xolac wê xe vông ge lêm.” ¹⁴Mêd Pol nêb ob nêl kiyang, léc gavman levac Galio nêl vô he Yuda ên nêbê, “Xam Yuda, xomxo tiga obêc pwoo kiyang wê gavman vông ge vac, me obêc vông môm nipaên ya ge od a ob ngô kiyang wê xam nêl ge. ¹⁵Léc xam lam kinêg a lec kiyang hixôn lê di xolac wê xacxam va vông ge, om xacxam va kô xam kiyang mi loc viac, ên a ob ngô kiyang tibêge lêm.” ¹⁶Mêd Galio tii he vêl ên kot, ¹⁷di he la hôm xomxo levac wê mi viac Yuda xumac lilo ge ti lê nêbê Sostenis xôn di kô mi la hi vô gavman levac Galio manôn di Galio yê léc o nêl kiyang ti lec lêm.

Pol lax mi la Antiok wê yêp vac vigwe levac Silia ge

¹⁸Pol dô Kolin buc ya, nang dêc sea xomxo vông vinên tige, di Pol hixôn Plisila yuu Akwila yon la Senkليا ên nêb ob lec sip mi la Silia. Gê Senkليا Pol hilu kiyang ti vô Anutu om kiping bazub lihi. ¹⁹Yon mila Epesas, di Pol sea yuu dô di la vac xumac lilo wê he Yuda vông ge di la nêl kiyang vô he. ²⁰Mêd he nêl vô Pol ên nêb i dô hixôn he buc ya, léc Pol nêl nêb ob la. ²¹Om buc wê ob sea he ge od nêl vô he ên nêbê, “Anutu obêc tyuc lec ge od a obêc vena vô xam tii vac.” Pyap di Pol sea he di la lec sip mi la. ²²La lec sip mi la Sisalia, léc sip mila le di i lop vêl ên sip di la Jelusalem mi la keac vô xomxo vông vinên. Pyap di i loc mi la Antiok.

Apolos nêl xolac gê Epesas

²³Mêd Pol dô Antiok buc ya, nang dêc kidi vac Antiok di la tup vac vigwe wê yêp vac vigwe levac Galesia yuu Plisia ge, di la nêl kiyang vô xomxo vông vinên ên nêb i ngidu he xôn.

²⁴Yuda ti lê nêbê Apolos wê ben Aleksandlia ge mila dô Epesas. Apolos ge mi nêl kiyang nivîha di xovô kiyang vîhati wê yêp vac kipihac xolac ge. ²⁵Ilage xomxo nêl Apumtau Yesu môm kitong vô Apolos mi i xovô di i nilô kidu i nêb ob timu vô xolac vîhati, om Apolos nêl Yesu kitong bôbac vô xomxo, léc môm mia lipacên ge, xovô wê Jon lipac xomxo ge tîbed. ²⁶Mêd Apolos la nêl xolac vac xumac lilo wê he Yuda vông ge di xonaên

ma, di Plisila yuu Akwila ngô kiyang wê Apolos nêl ge, om kô i mi la vac yuu ben di la nêl Anutu môp yuu xolac wê Apolos lungên ge vihati kitong vô i. ²⁷Mêd Apolos nêb ob la vigwe Glik di lie vông vinên Epesas tyuc lec nêb i loc. Om he kivuu kipihac ti di vông i la vô xomxo Glik ên nêbê he i kô Apolos lec nivihia. Mêgem Apolos mila Glik, di xomxo wê Anutu xêyaa vin lec he mi he vông i vin gee, Apolos ngidu he xôn. ²⁸Apolos he Yuda ngaênma lec xolac vô xomxo tibeac manôn, lêc Apolos nêl kiyang hixôn xêkizêc om hi he nêl kiyang tô mi la. Ên Apolos nêl kiyang wê yêp vac kipihac xolac ge kitong vô he om vông xovôên vô he ên nêbê Yesu ge Kilisi wê Anutu vînoo pyap ge.

Pol la nêl xolac gê Epesas

19 ¹Apolos dô Kolin di vô buc tige Pol la tup vac vigwe kitôn di mila Epesas. Di mila tulec xomxo vông vinên ya ²di kinêg vô he ên nêbê, “Buc wê xam vông i vin taxlee ge, Myakilôhô Ngibua lam dô hixôn xam, me?” Lêc he nêl ên nêbê, “Xe o ngô kiyang ti lec Myakilôhô Ngibua lêm.” ³Om Pol kinêg vô he ên nêbê, “Om xam lipac mia tina?” Lêc he nêl ên nêbê, “Xe lipac mia tiyi wê Jon vông ge.”

⁴Mêd Pol nêl ên nêbê, “Ilage Jon lipac xomxo wê pilepac he di vô nîmi vô nîpâên ge, di nêl vô he ên nêbê he i vông i vin xomxo ti wê ob val timuên ge. Xomxo tige Yesu.” ⁵Xomxo tige ngô kiyang wê Pol nêl ge om he lipac mia lec Apumtau Yesu lê. ⁶Mêd Pol vyax vigê lec he di Myakilôhô Ngibua lam hivun he xôn di vông he keac vac tibii toto vya wê he lungên ge di he nêl kiyang tiyi xocbê plopet ge. ⁷Xomxo tige vigê yuu di tô mi la yuu.

⁸Mêd Pol la vac xumac lilo wê he Yuda vông ge di la nêl Anutu xolac vô xomxo hixôn xêkizêc di xonaên ma. Pol nêl Anutu ben kehe kitong vô he. Pol vông môp tibêge tiyi dentuc yon. ⁹Lêc xomxo ya nilô xêkizêc om he o vông i vin kiyang wê Pol nêl ge lêm, di he la nêl kiyang nîpâên lec môp wê Yesu vông ge vô xomxo tibeac manôn. Mêgem Pol hixôn xomxo vông vinên sea he di la dô vac xumac wê Tilanas mi tixuu xomxo vac ge, di Pol viac kiyang nivihia vô xomxo tiyi buc vihati. ¹⁰Pol vông môp tibêge tiyi lec klismas yuu, om Apumtau xolac la vô he Yuda hixôn he Glik wê dô vac vigwe levac Esia ge vihati.

Kiyang lec Siva nue vux

¹¹Anutu vông xêkizêc vô Pol om Pol vông do levac tibeac, ¹²om xomxo kô Pol nivîmihi wê ka bazub ya ge hixôn i nêl ngakwi ya mi la vông vô xomxo wê yidac ge di he vô nivihia lec, di xomxo wê vimwo nîpâên dô vac he nilô ge, vimwo nîpâên pec mi la vêl ên he.

¹³Yuda ya mi vilee vac vigwe viyang viyang di la tii vimwo nîpâên vêl ên xomxo, di he ya tixuu nêb ob nêl Apumtau Yesu lê di tii vimwo nîpâên

vêl lec Yesu lê. Om he nêl bêga nêbê, “Yesu ti wê Pol nêl i kitong ge, xe nêl vô ông lec i lê bêga bê ông lop mi loc vêl ên xomxo tige.” ¹⁴Xomxo levac wê mi si daa vô Anutu ge ti lê nêbê Siva, nue vux vîgê vilu di sec yuu vông môp tibêge, ¹⁵lêc vimwo nipaên nêl vô he ên nêbê, “A xovô Yesu di a xovô Pol, lêc xam ge letya?” ¹⁶Mêd xomxo ti wê vimwo nipaên dô vac i nilô ge hôm he xôn di hi he ninivi vô nipaên di lêx he ngakwi sea, om he sea xumac tige di pec mi la xêtuac. ¹⁷Mêd he Yuda hixôn he Glik wê dô Epesas gee vihati ngô kiyang tige om he xona mabu di pîmîl Apumtau Yesu lê. ¹⁸Mêgem xomxo vông vinên tibeac lam nêl he nêl nipaên wê mi vông ge kitong seac, ¹⁹di he wê mi vông yevac ilage kituc he kipihac yevac lam di si lec ngwax vô xomxo vihati manôn. Kipihac tige, he kisuu lec mone levac tiyi xocbê 50,000 kina. ²⁰Mêgem Apumtau xolac la vô levac vac vîgwe tibeac.

Tibii Epesas vô nididun levac lec he anutu Artemis

²¹Pyap dêc Myakilôhô Ngîbua vông xovôên vô Pol, om Pol nêl ên nêbê, “A ob la tup vac vîgwe Masedonia yuu Glik di la Jelusalem. Pyap di a ob la Lom hixôn.” ²²Mêd Pol vông Timoti yuu Elastas wê yuu mi ngîdu i xôn ge yuu la Masedonia, di Pol dô myabo tya gê Esia.

²³Vô buc tige xomxo ya vông vevac vô môp wê Apumtau vông ge di vông nididun levac. ²⁴Ên xomxo ti dô Epesas lê nêbê Demitlias wê mi vông yuac lec silva. Demitlias vông xumac nipwo ya silva tiyi xocbê xumac ngîbua wê anutu kityooên Artemis vông ge. Demitlias he nue yuac kô mone mabu lec yuac tige, ²⁵om Demitlias kituc nue yuac hixôn tibii wê mi vông yuac tibêge lam di nêl vô he ên nêbê, “Xame, xam xovô wê il kô mone mabu lec yuac wê il mi vông ge. ²⁶Lêc xam wê di ngô wê Pol vac pilepac xomxo tibeac nilô di he vông i vin kiyang wê nêl ge. Ên Pol nêl ên nêbê anutu wê xomxo vông ya vîgê ge, ge o Anutu nôn lêm. Pol lam nêl kiyang tige vac il bed di nêl vac vîgwe levac Esia vihati hixôn. ²⁷Om kiyang wê Pol nêl ge ob vông yuac bisnis wê il vông ge lê vô nipaên, di xumac ngîbua wê anutu Artemis vông ge, xomxo ob yê tiyi xocbê xumac pileva. Artemis ge il anutu vêx wê il Esia hixôn xomxo vac vîgwe vihati mi kitaa vô ge, lêc Pol kiyang ob vông lê levac wê Artemis vông ge vô nipaên.”

²⁸Xomxo tige ngô kiyang wê Demitlias nêl ge om he xêyaa vô myavinê di he tyuc vya levac ên nêbê, “Artemis wê il Epesas vông ge i vêx levac.” ²⁹Mêd tyucên tige la vac vîgwe Epesas vihati om tibii vihati vông didun levac di tup mi la hôm Gaias yuu Alistakas xôn di didii yuu di he la vac vîgwe wê he mi kitucma vac ge. Yuu ge Masedonia yuu wê mi la hixôn Pol ge. ³⁰Pol nêb ob la vac tibii wê kitucma gee mahigun, lêc xomxo vông vinên le vac xôn nêb i locên i ma. ³¹Dêc gavman Esia mangwe wê Pol nipîpu ge he vông kiyang la vô Pol nêbê i loc vacên kitucmaên i ma.

³²Mêd xomxo wê kitucma gee, he tibeac o xovô kitucmaên tige kehe lêm, om he piyôp juda di he ya tyuc kiyang bangwe di ya tyuc kiyang baba ya. ³³Om Yuda ya kô lie ti lê nêbê Aleksanda mi la tung vac tibii kitucmaên mahigun ên nêbê i nêl kiyang vô he, om Aleksanda vông vigê la kisii ên nêb ob nêl kiyang. ³⁴Lêc xomxo tige yê Aleksanda di xovô nêbê ge Yuda ti, om he vihati tyuc vya yêp tived ên nêbê, “Atemis wê il Epesas vông ge i vêx levac.” Mêd he tyuc vya tibêge tiyi hiyôv manôn yuu.

³⁵Mêd xomxo levac wê mi kivuu kiyang wê he Epesas vông ge ti lam keac lec he di he dô kiyang maên, di i nêl vô he ên nêbê, “Xam Epesas, bêna lêc xam tyuc vya lec Atemis? Xomxo vihati xovô ên nêbê il Epesas viac xumac ngibua wê Atemis vông ge di il viac ngidax ngibua wê tô gê kisii ganê mi lam ge hixôn. ³⁶Xomxo ti tiyiên ma wê ob pwoo kiyang tige vac, om xam dô didun maên, di xam o lêc vông môp nipaên decdec lêm. ³⁷Xam kô xomxo yuu ge mi lam, lêc yuu o vun susu ti vac xumac ngibua lêm, di yuu o so vya vô anutu wê il vông ge lêm. ³⁸Om Demitlias he nue yuac obêc nêb vông kot vô xomxo ti ge, od buc wê xomxo ob vông kot lec ge yêp, di gavman levac dô, om he i loc vông kiyang vô gavman levac ên i titô he nêl kiyang. ³⁹Lêc kiyang wê xam vông ge ya obêc gên yêp ge od buc wê kitucmaên ge xam nêl kiyang tige di il hi i yib. ⁴⁰Ên môp wê il vông gwêbaga tiyi wê il ob tulec myaviwen levac, ên il lam kitucma mi vông didun levac, lêc gavman obêc kinêg kitucmaên tiga kehe vô il ge, od o tiyi wê il ob nêl kiyang ti lax vô he ge lêm.” ⁴¹Xomxo levac nêl bêge vô he di vông he toto la.

Pol la tup vac vigwe Masedonia yuu Glik

20 ¹Nididun wê Epesas vông ge tiyôd, di Pol keac xomxo vông vinên kituc lam vô i di viac kiyang vô he ên nêb i ngidu he xôn. Pyap dêc pul he vigê di sea he di la Masedonia. ²Mêd Pol tup vac vigwe Masedonia vihati di nêl kiyang tibeac vô xomxo vông vinên ên nêb i ngidu he xôn. Pyap di i la Glik ³di la dô dentuc yon. Nang dêc Pol nêb ob lec sip mi la Silia, lêc he Yuda wê dô Glik ge hilu kiyang xôn nêb ob hi Pol i yib om Pol xo nêb ob lax mi la Masedonia. ⁴Xomxo wê la hixôn Pol ge he lê nêbê Sopata wê ma Pilas wê lam gê Belia ge, di Alistakas yuu Sekandas wê yuu lam gê Tesalonaika ge, di xomxo Debi ti lê nêbê Gaias, di Timoti, di Tikikas yuu Tlopimas wê yuu lam gê vigwe levac Esia ge. ⁵Xomxo tige la dô bin xe gê Tloas. ⁶Di xe dô di da levac wê Yuda mi ya blet wê yis maên ge lam la vêl, mêd xe lec sip gê Pilipai di la, di buc vigê vilu lam la vêl lêc xe mila Tloas di dô da ti gê Tloas.

Pol vông Yutikas kidi lec maviha

⁷Xe kitucma lec da ên xe nêb xe ob xa yaên di xa pasa hixôn, mêd Pol nêl xolac vô xe ên nêb vidiiên titige ob sea xe di la, om nêl xolac dia di

i la di la vivuaên mahigun. ⁸Xe kitucma vac xumac nilô wêyêp kisii ge di lam tibeac tum vac. ⁹Mêd xomxo ngivihi ti lê nêbê Yutikas la dô lec xumac vuayen nipwo kisii, mêd Pol nêl kiyang dia om Yutikas manôn yêp di i yêp nilô ma om tô lec vuayen nipwo tige di la kibun. Xumac nilô tige yêp kisii di nilô ti yêp vac mahigun di ti yêp ngibi. Om he lop mi la yê ngivihi tige léc yib. ¹⁰Mêd Pol lop mi la vô xomxo tyo di le ni xocên kisii di hêm lec vigê di nêl vô he ên nêbê, “Xam o vô viyin lêm, ên ga dô maviha.” ¹¹Mêd Pol lec mi lax kisii di lax ya hixôn xomxo vông vinên. Pyap di i nêl kiyang dia vô he di vigwe vidii lec, di sea he di la. ¹²Mêd ngivihi tyo dô maviha di he kô mi lax ben hixôn xêyaa nivihia.

Pol sea Tloas di la Mailitas

¹³Mêd xe lec sip gê Tloas mi la mug mi la vigwe Asos, ên Pol nêl nêb ob la kibun mi la Asos di xe xôn obêc lec sip gê Asos. ¹⁴Om Pol mila vô xe gê Asos, di xe kô i lec sip di xe xôn la Mitilini. ¹⁵Nang dêc xe sea Mitilini mi la, di vigwe vidiiên titige xe mila kwabo vô vigwe Kaios, di xe xêp di vigwe vidiiên xe mila Semos di vidiiên xe mila Mailitas. ¹⁶Xe luu vigwe Epesas vêl, ên Pol nêb ob dô vigwe levac Esia buc tibeac lêm, ên xo nêb ob la lutibed ên la yê buc Pentikos gê Jerusalem.

Pol nêl kiyang vô gyovixa Epesas

¹⁷Vac vigwe Mailitas Pol vông kiyang la vô gyovixa Epesas nêb he i loc vô i. ¹⁸Om he mila di Pol nêl vô he ên nêbê, “Xam xovô môp yuu yuac wê a lam vông vac xam mahigun vô buc wê a val Esia taxlee ge hixôn buc vihati wê a dô hixôn xam ge. ¹⁹Di buc tibeac he Yuda hilu kiyang xôn nêb ob vông viyin vô a, om a dô vac viyin tibeac, di a lêg vô nipwo lec, léc a vông yuac wê Apumtau vông vac a vigêg ge. ²⁰Di a o yax kiyang ti vun ên xam lêm. Nge, a nêl kiyang wê ob ngidu xam xôn ge vihati yêp seac vô xam. A tixuu xam vac kitucmaên di a loc tixuu xam vac xam toto bom hixôn. ²¹Di buc tibeac a nêl kiyang xêkizêc vô xam Yuda hixôn xam tibii ba ên a nêbê xam pilepac nilôm i loc vô Anutu di xam vông i vin il lig Apumtau Yesu. ²²Om xam ngô lê. Gwêbaga Myakilôhô Ngibua nêl vô a nêb a la Jerusalem, léc viyin wê xomxo ob vông vô a gê Jerusalem ge, a lungên. ²³Vac vigwe vihati wê a la dô vac ge Myakilôhô Ngibua nêl kitong vô a ên nêbê a ob kô viyin di tibii ob tung a vac xumac kalabuhu. ²⁴Lêc a nêb a ob vông yuac vihati wê Apumtau Yesu vông vô a ge i loc tiyi lec myahipu di a o xo a nignivi lêm. Yuac wê a ob vông ge a ob nêl vizid nivihia wê Anutu vông ge kitong vô xomxo.

²⁵“Xam xovô bê ilage a loc tup vac xam di loc nêl Anutu ben kehe kitong vô xam, léc gwêbaga a xovô ên a nêbê xam obêc wê a magnôn tii vac lêm. ²⁶Om a ob nêl kiyang xêkizêc vô xam bêga bê xam ti obêc wib mi la vac nipaên ge od kiyang ti o yêp vô a lêm. ²⁷Ên a o yax kiyang ti

vun ên xam lêm. Nge, a nêl kiyang wê Anutu vông ge vîhati kitong vô xam. ²⁸Om xam viac xam di xam viac Anutu nue vîhati, ên Myakilôhông Ngibua vînoo xam nêb xam viac he. Xam viac he i nivîha, ên Apumtau kisuu he ya hi wê ici va vông ge. ²⁹A xovô ên a nêbê a ob sea xam di a ob la, di timuên xomxo nipaên ya obêc lam vac xam mahigun di lam vông xam vô nipaên tiyi xocbê noo vîmen la hi bwoc sipsip ge. ³⁰Di xaxcam va ya obêc kidi vac xam mahigun di nêl kiyang kityooên vô xam di didii xam mi lax timu vô he vîxa. ³¹Om xam viac xam nivîha, di xam xovô bê tiyi klîsmas yon a dô hixôn nilôg vîyin yuu byagên, lêc a nêl Anutu xolac vô xam tiyi bucên yuu vidiiên vîhati.

³²“Di gwêbaga a ob tung xam vac Anutu vigê di xam dô vac kiyang xêyaa vin lecên wê Anutu vông ge. Ên kiyang tige tiyi wê ob vông xam le xêkizêc, di ob vông vizid wê Anutu nêb ob vông vô il vîhati wê il tu i nue ge vô xam hixôn.

³³“A o kitaa gol yuu silva hixôn nivîmihi vô xomxo ti lêm. ³⁴Xam xovô ên xam nêbê aca va vigêg vông yuac di a tulec susu wê ngidu a xôn di ngidu xomxo wê dô hixôn a ge xôn. ³⁵Yuac vîhati wê a vông ge nêl kitong vô xam bêga nêbê il ob vông yuac xêkizêc ên i ngidu xomxo wê he nêl xêkizêc ma ge xôn. Di il ob xovô kiyang wê Apumtau Yesu nêl bêga nêbê xomxo ti obêc vông susu vô xomxo ngwe ge od xêyaa ob vô nivîha luu môp wê ob kô susu vô xomxo ngwe ge vêl.”

³⁶Pol nêl kiyang tige pyap di yev vîxa kitu vac di he gyovîxa kitaa. ³⁷Pyap di he vîhati byag mabu di kiva Pol xôn di pul i vigê. ³⁸Di he nilô vô vîyin levac ên kiyang wê Pol nêl vô he ên nêbê, “Xam obêc wê a magnôn tii vac lêm.” Mêd he kô Pol mi la tung lec sip.

Pol lec sip nêb ob la Jelusalem

21 ¹Mêd xe lec sip di sea he di mîla bôbac vô vigwe Kos, di vigwe vidiiên ge xe kidi mi la vigwe Los, di xe sea Los di mîla Patala. ²Mêd xe tulec sip ngwe wê ob la vigwe Pinisia ge om xe lec sip tige di la. ³Mêd xe mîla kwabo vô vigwe Saiplas wê yêp vô xe vigêm kêd ge di xe luu Saiplas vêl di la Taia vac vigwe levac Sîlia. Mêd tibii tul kupac vêl ên sip, ⁴di xe lop vêl ên sip di la myag xomxo vông vinên vac vigwe tige lêc xe tulec he ya om xe la dô hixôn he da ti. Myakilôhông Ngibua vông xovôên vô he om he nêl vô Pol ên nêbê, “Locên Jelusalem i ma.” ⁵Mêd buc wê xe dô hixôn he ge tiyôô om he vông vinên vîhati hixôn vinêe nue, xe xôn sea he ben di la gwec nînya, mêd xe vîhati yev vîxam kitu vac di kitaa, ⁶pyap di xe pulma vigêm di xe lec sip di he lax mi la ben.

Agabas nêl kiyang vô Pol

⁷Xe sea Taia di mîla Tolemes, di xe la vô xomxo vông vinên wê dô vigwe tige di keac vô he di dô hixôn he buc tibed. ⁸Dêc vigwe vidiiên ge

xe sea Tolemes di la Sisalia, di mila dô hixôn sinale Pilip vac i ben. Pilip ge xomxo wê Yesu nue ngivihi vinoo he vigê vilu di sec yuu gê Jerusalem ilage ên nêb he i ngidu Yesu nue ngivihi xôn ge. ⁹Pilip nue vêxwo yuudiyuu dô wê he mi nêl Anutu xolac ge.

¹⁰Xe dô Sisalia buc ya la vêl mêd plopet ti lê nêbê Agabas kidi gê Judia di val Sisalia vô xe, ¹¹di val hôm Pol let di ku ici va vigê yuu vixa xôn ya, di nêl ên nêbê, “Myakilôhô Ngibua nêl bêga nêbê he Yuda wê dô Jerusalem ge obêc ku xomxo ti wê i let tiga xôn tiyi bêga, di he obêc vông i la vac tibii wê o Yuda lêm ge vigê.”

¹²Xe ngô kiyang tige om xe wê xe la hixôn Pol ge, hixôn he wê dô vac vigwe tige xe kitaa Pol ên xe nêbê, “Locên Jerusalem i ma.” ¹³Lêc Pol nêl vô xe ên nêbê, “Bêna lêc xam byag di vông a nilôg vô viyin? A o xona ên wê tibii ob ku a xôn ge lêm. Di he obêc hi a xib gê Jerusalem ge od ge pyap. A obêc xib lec Apumtau lê.” ¹⁴Xe nêl kiyang tibeac vô Pol, lêc o ngô lêm, om xe sea vyam wê xe nêl ge di nêl bêga bê, “Anutu i vông i tiyi wê xovô ge.”

Pol nêl yuac kitong vô gyovixa gê Jerusalem

¹⁵Buc ya lam la vêl mêd xe kô xe susu lec ên xe nêb xe ob la Jerusalem. ¹⁶Dêc xomxo vông vinên Sisalia ya la hixôn xe di xe la Jerusalem, di he kô xe mi la vac Neson ben wê xe ob xêp vac ge. Neson ge xomxo Saiplas ti wê vông i vin Yesu ilage. ¹⁷Xe mila Jerusalem di lige vông vinên wê dô Jerusalem gee kô xe lec hixôn xêyaa nivaha.

¹⁸Di vigwe vidiien ge xe hixôn Pol la xê Jems, di gyovixa Jerusalem vihati la dô hixôn. ¹⁹Mêd Pol pul he vigê di nêl kiyang lec yuac vihati wê Anutu ngidu i xôn di i la vông vac tibii wê o Yuda lêm gee ben.

²⁰He gyovixa ngô kiyang wê Pol nêl ge om he pimil Anutu di nêl vô Pol ên nêbê, “Lige, ông xovô bê Yuda tibeac xochê 1,000 ge he vông i vin Yesu, lêc he timu vô xolac wê Moses vông ge hixôn. ²¹Di xomxo ya nêl kiyang kityooên vô he ên nêbê ông la nêl kiyang vô he Yuda wê la dô vac tibii ba ben gee ên ông nêbê he i sea Moses xolac di sea môp wê ob gôl nue ninivi ge di sea môp wê he Yuda mi vông ge. ²²Om il ob vông bêna? Ên gwêbaga he Yuda ob ngô wê ông val dô ga. ²³Om ông vông i tiyi kiyang wê xe ob nêl vô ông bêga bê xe lige yuudiyuu dô wê he hilu kiyang ti vô Anutu ge. ²⁴Om ông loc hixôn he di xam loc vông i tiyi môp wê yêp vac Moses xolac ge wê ob kitya xam nêp nipaên vêl di xam vô paha lec, di ông vông mone vô he, ên he i loc kiping bazub lihi. Ông vông môp bêge, ên xomxo vihati i yê wê ông timu vô Moses xolac ge di he i xovô bê kiyang wê xomxo kityoo lec ông ge nôn maên.

²⁵“Di tibii vông vinên wê o Yuda lêm ge, ilage il hilu kiyang di vông kipihac ti la vô he ên il nêbê he i kol he ên susu yaên wê tibii vông i tu daa vô anutu kityooên ge, di he yaên hi i ma, di he i o ya lilii wê he

ngibina kwa di hi dô vac nilô ge lêm, di he i xona ên môp yôdac vêu yuu vux.”²⁶ He nêl bêge vô Pol, om Pol kô xomxo yuudiyuu tige di vigwe vidiiên titige he xôn la timu vô môp wê ob kitya he nêl nipaên vêl ge, pyap di he la vô xomxo wê mi si daa ge vac Anutu xumac ngibua di la nêl buc wê he ob vô paha lec di he toto ob vông daa vô Anutu ge kitong vô he.

He Yuda la hôm Pol xôn vac xumac ngibua

²⁷He dô di buc vigê vilu di sec yuu vô kwabo lec wê ob tiyô ge, lêc he Yuda wê lam gê Esia gee yê wê Pol la dô vac Anutu xumac ngibua ge, om he vông xomxo tibeac nilô juda sea di he la hôm Pol xôn, ²⁸di tyuc vya levac ên nêbê, “Xam lige Islel, xam lam hixôn xe, ên xomxo tiga wê mi la vac vigwe vihati di la so vya lec il Islel hixôn Moses xolac di xumac ngibua tiga. Di gwêbaga xomxo tiga vông môp nipaên bêga bê kô tibii wê o Yuda lêm ge mi he lam vac Anutu xumac ngibua ga om vông xumac tyo vô nipaên.”²⁹ He nêl bêge, ên he yê wê Pol la vilee vac Jelusalem hixôn Tlopmas wê tibii Epesas ti ge, om he so nêbê mêd Pol kô Tlopmas mi yuu la vac Anutu xumac ngibua nilô.

³⁰Om xomxo Jelusalem vihati xêyaa vô myavinê vô Pol di he kitucma mi la hôm Pol xôn vac Anutu xumac ngibua di kô i mi la vixun di tung vuayen lec lutibed.

³¹Mêd xomxo tige hi Pol ên nêb ob hi i yib, lêc kiyang la vô Lom levac ti wê viac tibii vevac vihati ge ên nêbê xomxo Jelusalem vihati kitucma di vông nididun levac. ³²Om tibii levac tige kô tibii vevac levac ya hixôn he nue vevac di he la lutibed di mila le vac xomxo mahigun. Mêd xomxo yê wê he val ge om he sea Pol di hiên ma. ³³Mêd tibii levac tige nêl vô nue vevac ên nêbê he i loc hôm Pol xôn di ku i xôn ya sen yuu. Mêd tibii levac nêl ên nêbê, “Xomxo tiga letya? Di i vô va lêc xam hi?” ³⁴Lêc xomxo ya tyuc kiyang ngwe di he ya tyuc kiyang bangwe, di he tyuc vac nididun levac om tibii levac tige o ngô kiyang wê he tyuc ge nivaha lêm, om nêl vô nue vevac ên nêbê he i kô Pol mi loc vac xumac wê he vông ge. ³⁵⁻³⁶Om he kô Pol mi la lec peb, lêc xomxo tibeac timu vô he vixa di tyuc ên nêbê, “Hi i yib.” Om tibii vevac tige hôm Pol kisii di kô mi la.

Pol nêl i kehe kitong vô he Yuda

³⁷He nêb he ob kô Pol mi la xumac lôma, lêc Pol nêl vô tibii vevac levac tige vac vya Glik ên nêbê, “A ob nêl kiyang ti vô ông.” Mêd tibii vevac tyo nêl vô Pol ên nêbê, “Ông xovô vya Glik. ³⁸A so ên a nêbê mêd ông Isip ti wê ông vông vevac vô gavman ilage di i kô tibii 4,000 hixôn he yipac di didii he mi la vac vigwe myadongên.” ³⁹Mêd Pol nêl vô i ên nêbê, “A ga Yuda ti di a bog vigwe levac Tasas wê yêp vac vigwe Silisia ge. Om a kitaa ông bê ông tyuc lec di a nêl kiyang ya vô xomxo tigea.”

40 Mêd tibii levac tige lee yuu om Pol le lec peb di vông vigê la kisii di xomxo vihati dô kiyang maên, mêd Pol nêl kiyang vô he vac Yuda vya.

22 ¹Pol nêl vô he bêga nêbê, “Xam mage lige, a ob nêl a kehe kitong om xam ngô.” ²He ngô wê Pol keac vac Yuda vya ge om he dô kiyang maên, di Pol nêl vô he ên nêbê,

³“A ga Yuda ti di a yubac gê Tasas vac vigwe levac Silisia, lêc a lig gê Jelusalem di Gameliel tixuu a ya Moses xolac vihati wê il buge timu vô ge om a vông i vin Anutu xêkizêc di vông yuac wê i vông ge tiyi xocbê xam vông gwêbaga. ⁴Di a vông viyin levac vô xomxo wê vông i vin Yesu ge ên a nêb a ob hi he i yib, di a ku he vêx yuu vux xôn di tung he vac xumac kalabuhu. ⁵Xomxo daa siên nêl levac hixôn kaunsil vihati xovô môp wê a vông ilage, om he tiyi wê ob nêl a kitong. Mêd he kivuu kipihac vô he Yuda wê dô Damaskas ge di a kô mi la Damaskas ên a nêb a ob hêm xomxo vông vinên wê dô vigwe tige xôn di kô he mi lam Jelusalem ên he i lam kô myavinê.

Pol nêl kiyang lec wê vông i vin Kîlisi ge

⁶“A loc mi la di a mila kwabo vô Damaskas vô vidiiên wê hiyôv tyip kitôn ge, lêc lutibed xêseac ti lam gê kisii di lam byêx a magnôn, ⁷di a tilii mi la xêp kibun, di a ngô vya ti lam nêl vô a ên nêbê, ‘Sol, bêna lêc ông vông viyin vô a?’ ⁸Lêc a kinêg ên a nêbê, ‘Apumtau, ông letya?’ Di i nêl vô a ên nêbê, ‘A Yesu Nasalet wê ông vông viyin vô a ge.’ ⁹Mêd xomxo wê dô hixôn a gee yê xêseac lê, lêc he o ngôvô xomxo ti wê keac vô a ge vya lêm.

¹⁰“Mêd a kinêg ên a nêbê, ‘Apumtau, a ob vông bêna?’ Lêc Apumtau nêl vô a ên nêbê, ‘Ông kidi lec mi loc Damaskas, ên xomxo ti obêc nêl yuac wê Anutu nêb ông ob vông ge kitong vô ông.’ ¹¹Xêseac tige byêx a magnôn di a o xê susu ti lêm, om he wê dô hixôn a gee hêm lec a vigêg di didii a di xe la Damaskas.

¹²“Xomxo ti lê nêbê Ananias dô Damaskas. Ananias viac Moses xolac vihati di timu vô nivîha om he Yuda wê dô Damaskas gee yê ên nêb i xomxo nivîha. ¹³Mêd Ananias lam le vô a magnôn di nêl ên nêbê, ‘A lig Sol, mamnôn i seac.’ Dêc lutibed a magnôn seac di a xê Ananias. ¹⁴Di i nêl vô a ên nêbê, ‘Anutu wê il buge vông ge vînoo ông ên nêb ông xovô kiyang wê i vông ge di ông wê xomxo nivîha tyo wê ici va nêl kiyang vô ông vac mya ge, ¹⁵ên ông obêc kô kiyang wê ông wê di ngô ge mi la nêl kitong vô xomxo vihati. ¹⁶Om ông dibin vatya? Kidi lec mi loc lipac mia, di ông kitaa vô Apumtau ên i kitya ông nêl nipaên vêl.’

Pol nêl kiyang lec wê Anutu vông i la vô tibii madîluhu ge

¹⁷“Mêd a lôm Jelusalem di la kitaa vac Anutu xumac ngîbua, lêc a xê vîvia ti bêga nêbê ¹⁸Apumtau nêl kiyang ti vô a ên nêbê, ‘Ông sea

Jelusalem di loc lutibed, ên ông obêc nêl a kitong vô xomxo ge od he ob vông i vin lêm.’¹⁹ Mêd a nêl ên a nêbê, ‘Apumtau, he xovô wê ilage a la vac xumac lilo vihati di a la hôm xomxo wê vông i vin ông ge xôn di a hi he.’²⁰ Di buc wê he hi Stiven wê mi nêl ông kiyang ge od a le hixôn di viac he wê nêx Stiven ya ngidax ge nên ngakwi, di a xê môm wê he vông ge ên a nêbê nivuha.’²¹ Lêc Apumtau nêl vô a ên nêbê, ‘Ông loc ên a ob vông ông loc môm dia vô tibii madiluhu wê o Yuda lêm gee.’”

Xomxo levac Lom ti viac Pol

²² He Yuda ngô kiyang wê Pol nêl ge, di i val vô kiyang ti wê nêb ob la vô tibii ba ge lêc he yê tiiên ma om he tyuc vya levac ên nêbê, “Hi xomxo tige i yib. Xomxo tibêge ob dô maviha lêm.”²³ He tyuc levac di nêx nivimihi kisii di hôm vijuva mi nêx i la kisii hixôn.²⁴ Om tibii vevac tige nêl vô nue vevac ên nêbê, “Xam kô Pol mi loc vac il bed xumac lôma di loc hi i ya yihi, ên i nêl kiyang wêYuda tyuc lec i ge kehe vô il mi il ngô.”²⁵ Om he ku Pol vigê xôn ya let, lêc Pol kinêg vô tibii vevac ti wê le kwabo ge ên nêbê, “Xolac wê gavman vông ge yêp ên nêbê xam obêc hi xomxo Lom ti tax dêc i vông kot timuên ge od obêc la tiyi, me?”

²⁶ Tibii tige ngô kiyang wê Pol nêl ge om lax nêl vô tibii vevac levac ên nêbê, “Ông ob vông bêna vô xomxo tige? Ên xomxo tige Lom ti.”²⁷ Om xomxo levac tige la vô Pol di kinêg vô i ên nêbê, “Ông nêl kitong vô a bê ông Lom ti vixôhilôg, me?” Om Pol nêl ên nêbê, “Vixôhilôg, a xomxo Lom ti^b.”²⁸ Mêd tibii levac tige nêl vô Pol ên nêbê, “A vông mone levac la vô gavman, om a dô tiyi xocbê xomxo Lom.” Lêc Pol nêl ên nêbê, “Di a mô, a o bêge lêm, ên tag kô a di a Lom ti.”²⁹ Mêd nue vevac wê nêb ob hi Pol ge ngô kiyang tige om xona di sea Pol lutibed, di tibii vevac levac tige ngô wê Pol Lom ti lêc he ku i xôn ge, om xona.

³⁰ Tibii levac tige nêb ob ngôvô kiyang wê he Yuda nêl lec Pol ge kehe, om vigwe vidiiên ge piwelac sen vêl ên Pol di vông kiyang la vô Yuda levac wê mi si daa gee hixôn kaunsil vihati ên nêbê he i lam kitucma, mêd tibii vevac levac tyo kô Pol mi lam lax vô he manôn.

Pol nêl kiyang vô kaunsil wê he Yuda vông ge

23 ¹ Pol manôn la vô he kaunsil di nêl kiyang vô he nêbê, “Xam lige, môm wê a vông ilage di i val tyip gwêbaga, Anutu yê nêb a o vông ti so lêm.”² Mêd xomxo daa siên nêl levac lê nêbê Ananias ngô Pol kiyang, om nêl vô xomxo wê le kwabo vô Pol ge ên nêbê, “Pitap i mya.”³ Lêc Pol nêl vô Ananias ên nêbê, “Ông tiyi xocbê xax wê xomxo lipac pên lec kisii lêc nilô pital ge, om Anutu obêc hi ông, ên ông nêb ông ob

^b 22:27 Pol ge xomxo Lom ti vixôhilôg, ên yubac vac vigwe Tasas vac vigwe levac Silisia wê Lom viac ge. Lêc Pol ge Islele ti, ên ta yuu ma ge xomxo Islele yuu.

titô a kiyang ya Moses xolac lê, léc ông pwoo Moses xolac vac ên wê ông nêl di xomxo hi a ge.”

⁴Mêd xomxo wê le hixôn Pol ge nêl vô i ên nêbê, “Letya nêb ông nêl kiyang nipaên lec xomxo levac wê mi si daa vô Anutu ge?” ⁵Mêd Pol nêl ên nêbê, “Xam lige, a xovô kiyang wê yêp vac kipihac xolac bêga nêbê, ‘Xam o léc nêl kiyang nipaên lec xomxo levac wê viac xam ge lêm.’ Léc a o xovô bê xomxo tige xomxo levac wê mi si daa ge lêm om a nêl kiyang bêge lec i.”

⁶Pol xovô nêbê he ya Sadyusi di he ya Palisi om keac levac vô he kaunsil ên nêbê, “Xam lige, mag ge Palisi di a ga Palisi, di a vông i vin ên a nêbê xomxo yibên obêc kidi lec tii vac, léc gwêbaga xomxo vông kiyang vô a lec kiyang tige.” ⁷Pol nêl bêge om he Palisi yuu Sadyusi kunacma di le kidu yuu, ⁸ên he Sadyusi nêl nêbê xomxo yibên ob kidi lec i tii vac lêm, di he nêl ên nêbê angela di xomxo kinu o dô lêm. Léc he Palisi vông i vin kiyang tige vihati. ⁹Om he nêlma levac di higac vôma di he Palisi wê tixuu xomxo ya Moses xolac gee he ya kidi lec di nêl ên nêbê, “Xe o tulec soên ti vô xomxo tige lêm. Angela hixôn xomxo kinu mêd lam nêl kiyang vô i.” ¹⁰He kunacma mabu yocên om xomxo vevac levac tyo xona nêbê he ob titê Pol vôma léc yib, om nêl vô nue vevac ên nêbê, “Xam loc kô Pol vac he mahigun di kô mi loc vac xumac wê il vông ge.”

¹¹Vô bucên hig ge Apumtau lam le vô Pol manôn di nêl ên nêbê, “Ông xonaên i ma, ên ông nêl a kitong gê Jelusalem om ông obêc la nêl a kitong gê Lom hixôn.”

He Yuda hilu kiyang nêb ob hi Pol i yib

¹²Vigwe vidiên he Yuda kitucma di hilu kiyang bêga nêbê, “Il ob hi Pol i yib, om il ob ngibua susu yaên hixôn mia numên di i loc tyip lec buc wê il ob hi Pol i yib ge.” ¹³He wê hilu kiyang tige tiyi xocbê kehe yuu (40). ¹⁴Mêd he la vô xomxo levac wê mi si daa gee hixôn he Yuda levace di nêl vô he ên nêbê, “Xe vihati hilu kiyang bêga ên xe nêbê xe ob xa yaên ti lêm di i loc tyip lec buc wê xe ob hi Pol i yib ge. ¹⁵Om xam hixôn kaunsil, xam vông kiyang i loc vô xomxo vevac levac tyo bê i kô Pol mi lam vô xam ên xam ob ngôvô kiyang kehe, di xe ob viac xe pyap di obêc val môp mahigun ti di xe ob hi i yib.”

¹⁶He nêl bêge, léc Pol viwa ngivihi ti ngô wê he nêb ob hi Pol i yib ge om la vac tibii vevac ben di la nêl kiyang tige kitong vô yihi. ¹⁷Om Pol keac tibii vevac levac ti val di nêl vô i ên nêbê, “Kô xomxo ngivihi tiga mi loc vô xomxo levac wê viac tibii vevac ge ên ob nêl kiyang ti vô i.” ¹⁸Om tibii tige kô i mi la vô tibii vevac levac tyo di nêl vô i ên nêbê, “Pol ti wê il hôm i xôn ge keac a la vô i ên nêb a kô xomxo ngivihi tiga mi lam vô ông, ên xomxo ngivihi tiga ob nêl kiyang ti vô ông.”

¹⁹Mêd xomxo levac tige kô ngivihi tyo mi yuu la le viyonên di kinêg vô i ên nêbê, “Ông ob nêl kiyang vatya vô a?” ²⁰Om ngivihi tyo nêl vô i

ên nêbê, “He Yuda hilu kiyang xôn nêbê he ob vông kiyang i lam vô ông ên nêb titige ông kô Pol mi loc vô he kaunsil. He kityoo ên he nêb he ob ngô i nêb kiyang kehe i tii vac. ²¹Om ông o léc ngô he vya lêm, ên he lie 40 dô vac môp ên nêb ob hi Pol i yib, ên he hilu kiyang bêga nêbê he ob ngibua yaên hixôn numên di i loc tyip lec buc wê he ob hi Pol i yib ge. Di gwêbaga he dô bin ông nêb ông tyuc lec kiyang wê he nêl ge.” ²²Mêd tibii vevac levac tyo vông ngivihige tige lax mi la di nêl kiyang xêkizêc vô i nêbê, “Ông o léc nêl kitong vô xomxo ti bê ông lam nêl kiyang tige vô a lêm.”

Tibii vevac levac vông Pol la vô gavman levac Piliks

²³Mêd tibii vevac levac tige keac nue yuu wê mila le ngiduên wê i vông ge lam di nêl vô yuu ên nêbê, “Muu kô xomxo vevac 200 hixôn xomxo vevac 70 wê ob lec xôhô gee di xomxo 200 wê ob kô yii ge, di xam loc Sisalia vô bucên lec hîyôv manôn xocbê 9 klok. ²⁴Di xam viac xôhô ya ên Pol i dô lec ti, di xam viac i nivîha di kô i mi loc vô gavman levac Piliks.” ²⁵Di tibii levac tige kivuu kipihac ti vô Piliks bêga nêbê,

²⁶“A, Klodias Lisias, a kivuu kipihac tiga vô ông gavman levac Piliks. Vidiiên nivîha i loc vô ông. ²⁷Xomxo tiga, he Yuda hôm i xôn di hi i ên nêb ob hi i yib, léc a ngô wê i Lom ti ge, om a hixôn nuge vevac, xe la kô i vêl ên he Yuda vîgê. ²⁸A nêb a ob ngô kiyang wê he nêl lec xomxo tige kehe, om a kô i mi la vô kaunsil wê he Yuda vông ge. ²⁹Mêd a ngô kiyang wê he nêl lec i ge, léc kiyang tige tiyi xocbê xolac wê heche va vông ge, di a xovô ên a nêbê kiyang tige o tiyi wê il ob tung i la vac kalabuhu di hi i yib ge lêm. ³⁰Nang dêc xomxo ti lam nêl kitong vô a ên nêbê he Yuda hilu kiyang nêb he ob hi xomxo tige i yib, om a vông i loc vô ông lutibed. Di a nêl vô he Yuda wê vông kiyang vô i ge ên a nêbê he i loc nêl kiyang wê he nêl lec i ge vô ông.” Kipihac nêl bêge.

³¹Mêd nue vevac vông i tiyi wê tibii levac tige nêl vô he ge om he kô Pol di la bucên di mila vîgwe Antipatlis. ³²Di vîgwe vidiiên tibii vevac wê la kibun gee hixôn he wê kô yii ge lax mi la ben, di he wê dô lec xôhô gee la hixôn Pol mi he la. ³³He mila Sisalia mêd vông kipihac vô gavman levac Piliks di vông Pol la hixôn. ³⁴Mêd Piliks kitong kipihac tyo di kinêg vô Pol ên nêbê, “Ông lam vac vîgwe levac tina?” Om Pol nêl ên nêbê, “A bog Silisia.” ³⁵Mêd Piliks nêl ên nêbê, “Xomxo wê nêl kiyang lec ông ge obêc val ge od a ob ngô kiyang wê ông vông.” Pyap mêd nêl vô nue vevac ên nêb he i kô Pol mi loc tung vac gavman xumac wê Helot lox ilage di he i yê i xôn.

He Yuda vông kiyang vô Pol

24 ¹Buc vîgê vilu lam la vêl dêc Ananias wê xomxo daa siên nêb levac ge hixôn Yuda levac ya di xomxo ti wê ob nêl xomxo nêb

kiyang vô gavman ge lê nêbê Tetalas, he la vô gavman levac Piliks ên he nêb he ob vông kiyang vô Pol. ²Om Piliks keac Pol lam di Tetalas nêl kiyang kityooên ya lec Pol bêga nêbê, “Xomxo levac Piliks, ông viac xe nivihã om xe dô nimvihã di vevac ti o tyip vac xe bom lêm, di ông kityã môt nipaên vêl di vông xe dô vac môt nivihã wê ob vô nivihã vô xe ge. ³Om môt tige vông xe xêmyaa vô nivihã di xe hi vixam ên ông tiyi buc vihati.

⁴“A ob nêl kiyang dia vô ông lêm, lêc a kitaa ông bê ông xêmyaa i vô nivihã di ông ngô kiyang bo ti wê a ob nêl vô ông ga. ⁵Xomxo tige, xe xê ên xe nêb i xomxo judaên, ên la vông Yuda vac vîgwe vihati he nilô juda di he o dô nivihã lêm, di xomxo kidu ti wê nêbê Nasalet ge ici va tu he nêl xomxo levac. ⁶Dêc nêb ob vông Anutu xumac ngibua i vô nipaên om xe la hôm i xôn. [Ên xe nêb xe ob vông kiyang vô i lec kiyang wê yêp vac Moses xolac ge, ⁷lêc tibii vevac levac Lisias val tii xe sea di kô Pol mi la, ⁸di nêl ên nêbê xomxo wê nêb ob vông kiyang vô Pol ge, he i lam nêl kiyang vô ông.] Om ông obêc kinêg xomxo tyo ge od ông obêc ngô kiyang wê xe nêl lec i ge vihati vac i mya.”

⁹Tetalas nêl bêge di Yuda vihati ngidu i kiyang xôn di nêl ên nêbê kiyang vihati ge vixôhilôg nôl.

Pol nêl kiyang vô Piliks

¹⁰Mêd Piliks too kwa vô Pol ên nêb i nêl i kiyang, om Pol nêl ên nêbê, “A xovô wê ông viac kiyang wê xe Yuda vông ge vac ilage di i val tyip gwêbaga hixôn, om a xêgyaa nivihã ên wê a ob nêl kiyang wê a vông ge vô ông. ¹¹Ông obêc kinêg vô xomxo ya ge od he ob nêl vô ông bê a la Jelusalem di la kitaa vô Anutu di buc vîgê yuu di tô mi la yuu lam la vêl di i val gwêbaga. ¹²Di he Yuda o yê wê xe ngaênma lec kiyang ya vac xumac ngibua ge lêm, di a o kituc xomxo tibeac vac xumac lilo me lec wetôv di vông he xêyaa vô myavinê lêm. ¹³Kiyang kityooên wê he nêl lec a ge, he o tiyi wê he ob nêl kiyang kehe kitong mi ông xovô bê kiyang nôl lêm.

¹⁴“Lêc a ob nêl a kitong seac bêga bê kiyang wê he Yuda yê tiyiên ma ge, vixôhilôg, a mi timu vô. Lêc a timu vô môt tige di a kitaa vô Anutu wê buge mi kitaa vô ilage, di a vông i vin Moses xolac hixôn plopete kiyang wê yêp vac kipihac ge vihati. ¹⁵Di a vông i vin di dô bin kiyang wê nêl ên nêbê xomxo vihati, nipaên yuu xôn nivihã, obêc kidi lec mavihã tii vac. Di he Yuda êno vông i vin kiyang tige mi dô bin. ¹⁶Om a vông môt nivihã tiyi buc vihati ên a nêb a nilôg i yêp nivihã, di Anutu hixôn xomxo he i yê a nivihã.

¹⁷“A la dô klismas ya la vêl vac vîgwe ya, nang di a la Jelusalem ên a nêb a ob vông mone vô lige Yuda wê nêl susu maên gee di a nêb a ob tung daa vô Anutu. ¹⁸A viac môt tige om a timu vô môt wê ob vông a

vô paha lec ge, pyap di he Yuda yê wê a la vac Anutu xumac ngibua ge. Xomxo tibeac o dô hixôn a di vô nididun levac lêm, ¹⁹lêc he Yuda wê lam gê Esia ge he val hôm a xôn. Xomxo tigege, a nêg kiyang ti obêc yêp vô he ge od he i lam nêl vô ông di obêc nivihia. ²⁰Lêc obêc ma ge od xomxo wê dô gae he i nêl a nêg soên wê he tulec vô buc wê a la le vô he kaunsil manôn ge. ²¹Kiyang tibeac wê a le vô kaunsil manôn di a nêl bêga ên a nêbê, ‘A vông i vin ên a nêbê Anutu obêc tipi vô xomxo yibên kidi lec i tii vac om gwêbaga xam vông kot vô a lec kiyang tige tibeac.’”

²²Pol nêl bêge, lêc Piliks xovô kiyang yuu môm wê xomxo vông vinên vông ge om nêl vô he Yuda ên nêbê, “Xam dô di xomxo levac Lisias obêc val ge od a obêc titô kiyang wê xam vông ge.” ²³Mêd Piliks nêl vô tibii vevac tige ên nêbê, “Viac Pol nivihia di ông wê i xôn di i o lêc dô kizêc lêm, di ông o lêc vibu lie wê nêb ob lam vông susu ya vô i ge lêm.”

Pol dô vac xumac kalabuhu tiyi klismas yuu

²⁴Buc ya la vêl dêc Piliks yuu vinê Dlusila keac Pol lam vô yuu. Dlusila ge Yuda vêx ti. Om yuu ngô kiyang wê Pol nêl lec môm wê xomxo ob vông i vin Yesu Kilisi ge kehe kitong. ²⁵Dêc Pol nêl kiyang lec môm nivihia hixôn môm wê xomxo ob kol he ên nipaên ge di nêl lec wê Anutu obêc titô xomxo nêl kiyang vô buc timuên ge. Piliks ngô kiyang tige di xona om nêl vô Pol ên nêbê, “Kiyang pyap om ông loc, di obêc buc ngwe nang di a obêc keac ông lôm i tii vac.” ²⁶Dêc Piliks xo vac nilô ên nêbê mêd Pol obêc vông mone ya vô i om keac Pol la vô i tiyi buc tibeac di yuu keac mi dô.

²⁷Klismas yuu lam la vêl dêc Posias Pestas la kô vigwe wê Piliks vông ge. Di Piliks xo nêbê he Yuda i yê i nivihia, om sea Pol dô vac kalabuhu di i loc mi la.

Pol nêl nêbê king Sisa ob ngô kiyang wê i vông ge

25 ¹Pestas val dô vac vigwe wê ob viac ge di buc yon la vêl di i sea Sisalia di la Jelusalem. ²Mêd xomxo levac wê mi si daa vô Anutu gee hixôn lie levac ya he la vô Pestas di so kiyang lec Pol di nêl vô Pestas ên nêbê, ³“Xe kítaa ông bê ông vông Pol i lam Jelusalem.” He nêl bêge ên he nêb Pol obêc val vô he vac môm mahigun ti ge od he ob hi i yib. ⁴Lêc Pestas nêl vô he ên nêbê, “Pol la dô kalabuhu gê Sisalia, di a ob dô buc myabo tya di a ob la Sisalia. ⁵Om xam levac ya lam hixôn a, ên i nêl soên ya obêc yêp ge od xam vông kot vô i.”

⁶Om Pestas dô hixôn he tiyi buc vigê vilu di sec yon me buc vigê yuu dêc la Sisalia. Di vigwe vidiiên Pestas la dô vac xumac kot di nêl vô nue ên nêb he i loc kô Pol mi lam. ⁷Pol val di he Yuda wê lam gê Jelusalem gee le hixôn Pol di so kiyang tibeac lec i. Lêc kiyang wê he nêl ge, nôn ti o yêp vac lêm. ⁸Mêd Pol nêl vô he ên nêbê, “A o nêl kiyang nipaên ti lec xolac wê il Yuda vông di Anutu xumac ngibua di Lom gavman lêm.”

⁹Pestas ngô kiyang tige léc xo nêb he Yuda i yê i nivihā om nêl vô Pol ên nêbê, “Ông obêc nêb ông ob la Jelusalem ge od a ob ngô kiyang wê ông vông ge gê Jelusalem.” ¹⁰Lêc Pol nêl ên nêbê, “Xumac wê a le vac ga, king Sisa xumac wê ob ngô kiyang wê a vông. Ông xovô pyap bê a o vông soên ti vô he Yuda lêm. ¹¹A nêg soên ti obêc yêp tiyi wê xam ob hi a xib lec ge od pyap, léc kiyang wê he Yuda nêl lec a ge nôn obêc ma ge od xam ti tiyiên ma wê xam ob vông a la vac he vigê ge. A nêl bêga bê king Sisa ob ngô kiyang wê a vông ge i tii vac nang.” ¹²Mêd Pestas he nue kaunsil viac kiyang vōma, pyap dêc Pestas la nêl vô Pol ên nêbê, “Ông nêb ông ob la vô Sisa, om ông loc vô Sisa ên i ngô kiyang wê ông vông ge.”

Pestas nêl Pol kiyang kitong vô Aglipa

¹³Buc ya la vêl di Yuda gavman levac ti lê nêbê king Aglipa yuu li vêx Benaisi mīla Sisalia nêb yuu ob la yê Pestas. ¹⁴Yuu dô buc ya lam la vêl di Pestas nêl Pol kiyang kitong vô king Aglipa bêga nêbê, “Ilage Piliks tung xomxo ti la kalabuhu léc sea i dô di la, ¹⁵di buc wê a la Jelusalem ge he Yuda levac wê mi si daa gee hixôn lie levac ya he nêl vô a ên nêb a titô kiyang wê i vông ge. ¹⁶Lêc a nêl vô he ên a nêbê môp wê xe Lom vông ge ti o yêp wê xe ob vông myaviwen vô xomxo ti vaxvax ge lêm. Xomxo ti kiyang obêc yêp vô i ge od ob la le hixôn xomxo wê vông kiyang vô i ge di ici va ob nêl kiyang wê i vông ge kitong.

¹⁷“Om he Yuda lam ga hixôn a, di a o val dô seac vêl lêm. Nge, vigwe vidiiên a la dô vac xumac kot di nêl mi he kô Pol mi lam vô a. ¹⁸Mêd he Yuda kidi lec nêb ob vông kiyang vô Pol, di a xo ên a nêbê he ob nêl soên levac ti lec Pol, léc he o nêl lêm, ¹⁹di he nêl kiyang lec môp wê he Yuda mi kitaa vô Anutu ge di nêl lec xomxo ti lê nêbê Yesu wê yib léc Pol nêl nêbê xomxo tige kidi lec, om he vông kot vô Pol lec kiyang tige. ²⁰A nêb a ob xovô kiyang tige kehe, léc a piyôp ob la tiyi lêm. Om a nêl vô Pol ên a nêbê, ‘Ông obêc nêb ông ob la Jelusalem ge od a ob ngô ông nêb kiyang gê Jelusalem.’ ²¹Lêc Pol nêb ob dô kalabuhu dêc king Sisa vaci obêc ngô kiyang wê i vông ge. Om a nêl vô a nuge vevac ên a nêb he i viac Pol nivihā di i miloc vô buc wê a obêc vông i loc vô king Sisa ge.” ²²Pestas nêl bêge di Aglipa nêl vô Pestas ên nêbê, “Aca va ob ngô xomxo tige nêb kiyang.” Om Pestas nêl ên nêbê, “Titige ông ob ngô i nêb kiyang.”

²³Mêd vigwe vidiiên Aglipa yuu li Benaisi val hixôn vunac vunac, di yuu hixôn tibii vevac levac ya di tibii Sisalia levac ya la vac xumac kitucmaên. Di Pestas nêl di tibii vevac kô Pol mi lam. ²⁴Mêd Pestas nêl ên nêbê, “King Aglipa, hixôn xam vihati wê xam val dô hixôn xe gee, xam wê xomxo tiga. Ên he Yuda wê dô ga hixôn he wê dô Jelusalem gee, he vihati so vya vô i di nêl vya levac vô a ên nêb a hi i yib. ²⁵Lêc a o

tulec kiyang ti tiyi wê il ob hi i yib lec ge lêm. Di ici va nêb king Sisa vaci ob ngô kiyang wê i vông ge, om a nêb a ob vông i loc vô king Sisa. ²⁶Lêc a o tulec kiyang soên ti vô i wê a ob kivuu kipihac i loc vô il xomxo levac Sisa ge lêm. Om king Aglipa, a kô xomxo tige mi lam vô ông hixôn xam vihati ên a nêb il xôn vihati ob ngô kiyang wê i vông ge di il obêc tulec kiyang ya vô i ge od a ob kivuu vac kipihac. ²⁷Ên a xo ên a nêbê a obêc vông xomxo ti i loc vô Sisa, lêc a obêc nêl kiyang ti wê xomxo vông kot vô i ge kitong lêm ge, od ge tiyiên ma.”

Pol nêl i kiyang kitong vô Aglipa

26 ¹Mêd Aglipa nêl vô Pol ên nêbê, “Ông nêl ông kiyang ên xe ob ngô.” Om Pol vigê la kisii di i nêl i kiyang kitong bêga nêbê, ²“King Aglipa, gwêbaga a xêgyaa vô nivaha ên wê a ob nêl kiyang wê he Yuda

so lec a ge kitong vô ông, ³ên ông xovô môm wê xe Yuda vông ge vihati hixôn kiyang wê xe mi nêlma lec ge, om a kitaa ông bê ông ngô kiyang wê a ob nêl ga di ông nim i o léc ma lec lêm.

⁴“He Yuda vihati xovô ên he nêbê ilage wê a gên nipwo di i lam tyip gwêbaga, a dô hixôn lige vac xe bom di a la dô Jelusalem. ⁵He Yuda xovô a ilage om he obêc nêb nêl a kitong ge od he ob nêl bê a mi timu vô môm wê xe Palisi vông ge vihati nivaha. Xe Palisi ge, xe vông yuac levac lec môm kitaaên hixôn môm ya luu Yuda vông môm ya vêl. ⁶Lêc gwêbaga he vông kiyang vô a di a lam le vô ông mamnôn ên wê a vông i vin di a dô bin kiyang wê Anutu hilu vô buge ilage nêb obêc vô nôn lec timuên ge. ⁷He Yuda wê hîpu vigê yuu di tô mi la yuu ge he vông i vin kiyang tige di he kitaa xêkizêc vô Anutu tiyi bucên yuu vidiiên vihati di dô bin kiyang tige. King Aglipa, a êno vông i vin kiyang tige, lêc gwêbaga he Yuda vông kiyang vô a lec kiyang tige. ⁸Bêna lêc xam ya xo ên xam nêbê Anutu o tiyi wê ob tipi vô xomxo vac yibên ge lêmê?

⁹“Ilage a xo ên a nêbê a obêc vông Yesu Nasalet lê vô nipaên ge od obêc nivaha, ¹⁰om a la vông môm tibêge gê Jelusalem. Di xomxo levac wê mi si daa gee tyuc lec, nêb a la kô xomxo wê vông i vin Yesu ge mi lam tung he i loc vac kalabuhu, di buc wê he hilu kiyang nêb he ob hi xomxo vông vinên i yib ge od a tyuc lec. ¹¹Di buc tibeac a la vông viyin vô he vac xumac lilo, ên a nêb he i sea vông vinên wê he vông ge di nêl kiyang nipaên lec Yesu. A xêgyaa vô myavinê levac vô he, om a la vông viyin levac vô he wê dô teva ge hixôn.

Pol nêl kiyang lec wê vông i vin Kîlisi ge

¹²“Mêgem xomxo levac wê mi si daa gee tyuc lec nêb a la Damaskas om he vông a la. ¹³A mila môm ti di hîyôv tyip kitôn, lêc xêseac wê luu hîyôv vêl ge ti lam gê kisii ganê di linac lec a hixôn xomxo wê la hixôn a

gee. ¹⁴Mêd xe vihati tilii mi la xêp kibun, di a ngô kiyang ti vac vya Yuda bêga nêbê, ‘Sol, bêna lêc ông vông viyin vô a? Môp tibêge tîyi xocbê ông hi vixam lec xax manôn di vông myavinê vô ôcông va.’ ¹⁵Mêd a kinêg ên a nêbê, ‘Apumtau, ông letya?’ Di Apumtau nêl vô a ên nêbê, ‘A Yesu wê ông vông viyin vô a ge. ¹⁶Om ông kidi mi le kisii, ên gwêbaga a hilung a vô ông ên a nêb ông tu a nug yuac di ông ob nêl kiyang wê a hilung vô ông hixôn kiyang wê a ob nêl vô ông timuên ge kitong vô xomxo. ¹⁷A ob vô ông vêl ên he Yuda hixôn he tibii ba vigê. Di a ob vông ông loc vô tibii wê o Yuda lêm ge, ¹⁸ên ông vông he manôn i seac di vông he i sea môp mapitoc di lam dô vac xêseac, di he i sea xêkizêc wê Seten vông ge di lôm vô Anutu di vông i vin a, ên Anutu i kitya he nêl nipaên vêl di he i dô hixôn xomxo wê Anutu vînoo he pyap ge.’

Pol nêl i yuac xolac kitong vô Aglipa

¹⁹“King Aglipa, a ngô kiyang tige lam gê kisii, di a o vô ninyag kitu vô lêm. ²⁰Nge, a la nêl xolac vô xomxo Damaskas tax, nang dêc a la nêl gê Jelusalem di a nêl vac vigwe Judia vihati, di a la nêl vô tibii wê o Yuda lêm gee ya hixôn. A nêl bêga vô he ên a nêbê, ‘Xam pilepac xam di vông nilôm i loc vô Anutu di xam vông môp nivîha ên i nêl kitong bê xam pilepac xam vixôhilôg.’ ²¹A nêl xolac bêge, om he Yuda la hôm a xôn vac Anutu xumac ngîbua, nêb ob hi a xib. ²²Lêc Anutu ngîdu a xôn tîyi buc vihati di i val tyip gwêbaga, om a le vô xam mamnôn di a nêl kiyang tiga vô xomxo wê vidaaên di he wê lê levac ge vihati. Kiyang wê a nêl ge, a nêl i tîyi kiyang wê Moses he plopete nêl ilage nêb obêc vô nôn lec timuên ge. ²³Kiyang bêga nêbê, ‘Kilisi wê Anutu vông i lam ge obêc kô myavinê di yib, lêc obêc kidi lec vac yibên, di mug xomxo vihati di obêc nêl xêseac wê i vông ge kitong vô he Islel hixôn he wê o Islel lêm ge.’ ”

Pol nêl vô Aglipa nêb i vông i vin Kilisi

²⁴Pol nêl kiyang bêge, lêc gavman levac Pestas keac levac lec i ên nêbê, “Pol, ông mav. Ông kô xovôên tîbeac om vông ông piyôp juda.” ²⁵Lêc Pol nêl ên nêbê, “Xomxo levac Pestas, a o mav lêm. Kiyang wê a nêl ge kiyang nôn di a piyôp yêp om a nêl kiyang nivîha. ²⁶Di king Aglipa xovô kiyang tige vihati pyap, om a nêl kitong vô i di a o xona ên i lêm. A xovô ên a nêbê kiyang tige vihati, Aglipa ngô di yê pyap, ên kiyang ti o yêp xôpacên lêm. ²⁷King Aglipa, ông vông i vin plopete kiyang, me? A xovô ên a nêbê ông vông i vin.”

²⁸Lêc Aglipa nêl vô Pol ên nêbê, “Kwabo yang tya ga di ông nêb a vông i vin Kilisi?” ²⁹Lêc Pol nêl vô i ên nêbê, “Obêc buc kwabo me buc dia ge od obêc tîyi. Lêc a kitaa vô Anutu ên a nêbê ông hixôn xam vihati wê xam ngô kiyang wê a nêl ge, xam tîyi xocbê aca va lê, lêc sen wê ku a ge ob ku xam xôn lêm.”

³⁰Pol nêl bêge mêd king Aglipa yuu li vêx Benaisi di gavman levac Pestas hixôn xomxo wê dô hixôn he gee, he vihati kidi lec ³¹mi la vixun, di la nêl voma ên nêbê, “Xomxo tige o vông nipaên ti tiyi wê il ob tung i vac kalabuhu me hi i yib ge lêm.” ³²Mêd king Aglipa nêl vô Pestas ên nêbê, “Xomxo tige obêc nêl bê Sisa i ngô kiyang wê i vông ge lêm ge od tiyi wê ông ob piwelac i vêl ên kalabuhu.”

Tibii vông Pol lec sip ên nêb i loc Lom

27 ¹Xe nêl kiyang pyap ên xe nêb xe ob la Lom wê yêp vac vîgwe levac Itali ge, om he vông Pol hixôn tibii kalabuhu ya vac Lom levac ti lê nêbê Julias vîgê nêb i kô he mi loc. Tibii tige tu levac ên tibii vevac 100 wê king Sisa vông ge. ²Mêd xe lec sip ti wê tibii Adlamitiam vông ge. Sip tige ob la le vac vîgwe toto wê yêp vô gwec ninya vac vîgwe levac Esia ge. Om xe lec sip mi la, di Alistakas wê lam gê Tesalonaika vac vîgwe levac Masedonia ge la hixôn xe. ³Di vîgwe vidiiên titige xe mila Saidon. Mêd Julias yê Pol nivîha om tyuc lec nêb Pol i loc yê lie wê dô Saidon ge ên he i vông yaên vô i. ⁴Di xe sea Saidon mi la, lêc lea levac hôm sip xôn, om xe la hixôn kitôn Saiplas, ên xe nêbê i kisuu lea lec ên xe. ⁵Mêd sip kô xe mi xe la gwec mahîgun di xe luu vîgwe levac Silisia yuu Pampilia vêl, di xe la Maila wê yêp vac vîgwe levac Lisia ge.

⁶Di Julias ngô wê sip ti lam gê Aleksandlia di ob la Itali ge, om xe la lec sip tige. ⁷Xe lum la tiyi buc ya di xe mila kwabo vô vîgwe Naidas, lêc lea levac hôm sip xôn om tiyiên ma wê xe ob la bôbac ge, om xe la vô kitôn Klit nîmi di luu vîgwe Salmoni vêl di la. ⁸Lea soo xe la ninya di xe xulac vô gwec ninya Klit di mila vîgwe ti lê nêbê ‘Gwec Ninya Malehe’ wê yêp kwabo vô vîgwe Lasia ge.

⁹Buc tibeac la vêl di buc wê he Yuda ngîbua yaên ge tiyôô vac, om xe xovô ên xe nêbê buc wê gwec ob vô nipaên ge val om Pol nêl vô xe ên nêbê, ¹⁰“Xame, a xovô ên a nêbê il obêc lec sip mi la nang ge od obêc vô viyin levac vô il di obêc vông sip hixôn susu vihati vô nipaên di il obêc xib hixôn.” ¹¹Lêc tibii levac Julias o vông i vin Pol vya lêm. Nge, vông i vin xomxo ti wê kô sip ge hixôn xomxo ti wê tu sip kehe ge vya. ¹²Vîgwe tige o nivîha tiyi wê sip ob le vac vô buc lea ge lêm, om xomxo wê la lec sip tige he tibeac xo ên he nêbê he ob sea vîgwe tige di la, di obêc mila vîgwe Piniks ge od he ob le vîgwe tige di lea i tip loc vêl lê. Piniks ge vîgwe ti wê yêp vac vîgwe Klit ge wê sip ob le nivîha vac ge.

Lea levac vông gwec vô nipaên

¹³Lea val malehe tya, om he xo ên he nêbê xe ob la tiyi xocbê he nêl ge, om xe lec sip di pul anka lôm vac sip di xe xulac vô Klit gwec ninya mi la. ¹⁴Xe la myabo tya, lêc lea levac lam gê Klit ¹⁵di lam vông sip mya la vaxvax, om tiyiên ma wê sip ob la bôbac ge, om xe vông lea vaci kô

sip. ¹⁶Mêd xe mila kitôn nipwo ti lê nêbê Koda, di kitôn tige kisuu lea lec ên xe, mêd he vông yuac levac lec pulên dipac wê sip didii ge, ¹⁷mêd he pul i lam lec sip, pyap di he ku sip xôn vac mahigun ya yihi, ên he xona ên he nêb lea obêc hîbu sip. Di he xona ên he nêb lea ob kô sip mi la tulec ngidax wê yêp vac gwec nilô kwabo vô vigwe Aplika ge, om he vilun sel di sip xoc gwec pileva. ¹⁸Mêd lea lam xêkizêc om vigwe vidiên he hôm kupac wê sip kô gee mi nêx sea vac gwec. ¹⁹Di vigwe vidii nang dêc he hôm susu xocbê sel yuu yihi yuubê ge di nêx i la vac gwec hixôn. ²⁰Buc tibeac la vêl, di xe xêên hiyôv yuu pitua ma, di lea viyiên ge o tip la lêm, om xe xo ên xe nêbê, “Ga il ob xib mima vêl.”

²¹Buc tibeac he o ya yaên ti lêm, mêd Pol le vac he mahigun di nêl vô he ên nêbê, “Xame, xam obêc ngô kiyang wê a nêl ge di il dô Klit ge od il ob tulec viyin levac tiga lêm di kupac ob la vac gwec lêm. ²²Lêc gwêbaga a ob nêl vô xam bê xam nilôm i o vô viyin lêm, ên xam ti obêc wib lêm, dêc sip tibeac ge wê obêc vô nipaên. ²³Ên vô bucên Anutu ti wê a tu i nu di a mi kitaa vô ge vông angela ti lam le kwabo vô a, ²⁴di nêl bêga nêbê, ‘Pol, xonaên i ma, ên ông obêc la le vô Sisa manôn. Anutu ngô kitaaên wê ông vông ge om he vihati wê dô lec sip tiga, ti ob yib lêm.’ ²⁵Angela nêl kiyang tige vô a, om xam lige, xam xonaên i ma, ên a vông i vin Anutu om a xovô ên a nêbê kiyang tige obêc vô nôn lec tiyi xocbê nêl vô a ge. ²⁶Lêc lea levac ob hisoo sip hixôn il di il ob la lec kitôn ti.”

²⁷Lea levac vông xe la vac gwec levac Edlia di xe dô tiyi da yuu la vêl, di vivuaên mahigun tibii wê kô sip ge yaxên nêbê sip val vô kwabo vô gwec ninya. ²⁸Om he hilu ain viyin ti lec yihi di tung i la vac gwec nilô di hôm i lôm mi yê, lêc gwec gên madia tiyi xocbê 40 mita ge, di xe la tya nang, di he tung vac mi yê, lêc gwec madia tiyi xocbê 30 mita. ²⁹Mêd he xona ên he nêb sip ob la tulec ngidax levac wê le kehe vô gwec ninya ge, om he vông anka yuudiyuu la vac gwec vô sip viwen timuên ên nêb i hôm sip xôn di he kidu nêbê vigwe i vidii lutibed. ³⁰Mêd he wê kô sip gee nêb he ob pec mi la om he hôm dipac di vông i tô mi la vac gwec di kityoo nêbê he ob kô anka ya mi la tung vac gwec vô sip viwen mugên ên i hôm sip xôn. ³¹Lêc Pol nêl vô tibii levac Julias hixôn i nue vevac ên nêbê, “Xomxo tige ob dô vac sip lêm ge od xam xôn obêc wib mima.” ³²Om tibii vevac tige la kitov yihi vêl ên dipac tige di gwec kô mi la.

³³Vô kwabo lec wê vigwe ob vidii ge mêd Pol nêl vô he vihati ên nêbê, “Il dô vac viyin levac tiyi da yuu la vêl di il o xa yaên ti lêm. ³⁴Om a nêl xêkizêc vô xam bê xam kô yaên mi wa ên i ngidu xam xôn di xam vô xêkizêc. Xam ngô lê. Xam ob tulec viyin ti lêm. Nge, xam vihati, xam ob dô nivîha.” ³⁵Pol nêl bêge mêd hôm blet ti di kitaa vô Anutu vô he vihati manôn, di hîbu mi ya. ³⁶Om he vihati xêyaa vô nivîha di he ya yaên. ³⁷Mêd xe wê xe dô vac sip tige naba tiyi xocbê 276. ³⁸He ya i den he dêc nêx wit nôn wê dô vac sip ge la vac gwec, ên nêb sip i vô viyin maên lec.

Sip vô nipaên

³⁹Vigwe vidii vêl di he yê ma la kitôn ti wê le vac gwec mahigun ge, lêc he lungên vigwe tige. Lêc he yê vigwe ti wê sip ob la le vac ge wê luda nivîha ge, om he xo ên he nêb obêc tiyi ge od he ob vông sip i loc le lec luda tige. ⁴⁰Om he kitov yihi vêl ên anka di anka la yêp vac gwec, di he piwelac yihi vêl ên stia wê mi popên sip ya ge, di he yu sel ti la lec xax vô sip mugên ên he nêb lea i lam vihi lec di kô sip mi loc kehe. ⁴¹Om xe la, lêc sip la tulec luda wê le vac gwec nilô ge mêd sip viwen mugên la vîng vac luda di le, di gwec vuac mi lam hi sip viwen timuên hibû sea. ⁴²Mêd tibii vevac tigeê xo ên he nêbê he ob hi xomxo kalabuhu gee i yib, ên ti i o lêc xoc gwec mi loc kehe di pec mi loc lêm. ⁴³Lêc tibii vevac levac tige nêb ob ngidu Pol xôn di i dô nivîha om le vac he xôn nêb he hiên tibii i ma. Mêd nêl vô he wê xovô gwec xocên gee nêbê he i sox vac gwec di xoc mi loc mug di loc le kehe. ⁴⁴Di nêl vô he baba nêbê he i yêp lec plang me sipmyahîpu wê hibû sea ge di xoc gwec mi loc kehe. Om xe vông bêge di lam kehe di xe vihati dô nivîha.

Pol dô Molta

28 ¹Xe lam dô kehe di ngô wê he nêl vigwe tige lê nêbê Molta. ²Mêd tibii vigwe tige vông nivîha vô xe, ên lun val di vigwe vô ningigooên lê, lêc he vev ngwax vô xe di xe vihati nyuu. ³Mêd Pol la vilu ngwax myahîpu ên nêb ob vev lec ngwax, lêc ngwax nux myel ti di i lam nga Pol vigê miyux lec. ⁴Mêd tibii Molta yê wê myel tige diyux lec Pol vigê ge, om he nêl voma ên nêbê, “Xomxo tige mêd hi xomxo ti yib lêc o yib vac gwec lêm di val ga, lêc anutu ti wê vông myaviwen ge nêb i ob dô maviha lêm, om ob yib.” ⁵Lêc Pol liloo myel tige la vac ngwax, di dô nivîha di o yaxên myavinê ti lêm. ⁶Mêd xomxo tigeê dô di yê Pol xôn ên nêb mêd Pol vigê obêc vuac di obêc yib lutibed, om he dô mi yaxên xuhu dia nêb mêd susu ti obêc vông i vô nipaên, lêc he o yê ti lêm om he pilepac vya di nêl ên nêbê Pol ge anutu ti.

⁷Mêd tibii Molta nên xomxo levac ti lê nêbê Pablias, kibun wê i vông ge yêp kwabo vô vigwe tige, om Pablias kô xe mi xe la dô vac i ben di i viac xe nivîha tiyi buc yon. ⁸Lêc Pablias ma vông yidac ngwax tum di yaa xêlehe om yêp xumac lôma, mêd Pol la vô i di la kitaa di vyax vigê lec i, di i vô nivîha lec. ⁹Pol vông bêge om tibii Molta wê yidac gee vihati lam vô Pol di i vông he vô nivîha lec. ¹⁰Om tibii tigeê viac xe nivîha, di buc wê xe ob sea he di la ge, he kô susu yaên ya mi lam tung vac sip ên nêb i ngidu xe xôn vac môp.

Pol sea Molta di la Lom

¹¹Xe dô Molta di dentuc yon lam la vêl, mêd xe lec tibii Aleksandlia vông sip wê val le Molta vô buc lea ge, di xe la. Sip tige, anutu Sus nue

yuu kinu le lec sip viwen mugên. ¹²Mêd xe la di mila vigwe Sailakyus di la dô buc yon. ¹³Di xe sea Sailakyus di mila vigwe Lisiam, di vigwe vidiiên titige lea val om kô xe mi xe la, di vigwe vidii nang di xe mila vigwe Pyutiolai. ¹⁴Vac vigwe tige, xe la tulec xomxo vông vinên ya om he nêl xe xôn nêbê xe dô hixôn he da ti, om xe dô da ti vêl, nang di xe loc mi la ên xe nêbê xe ob la Lom. ¹⁵Lêc xomxo vông vinên Lom ngô wê xe val ge om he ya lam vô xe vac Maket Apias di he ya lam vô xe vac vigwe ti lê nêbê Xumac Pasandia Yon. Pol yê he om Pol xêyaa vô nivihã di i pimil Anutu.

¹⁶Mêd xe xôn val vigwe Lom mêd gavman Lom tyuc lec nêb Pol vaci ob dô vac xumac ti, di tibii vevac ti ob dô hixôn i di yê i xôn.

Pol nêl Yesu xolac gê Lom

¹⁷Buc yon la vêl, mêd Pol keac Yuda levac wê dô Lom gee lam om he lam kitucma di Pol nêl vô he ên nêbê, “Xam lige, a o vông ti so vô lige Yuda lêm, di a o nêl kiyang nipaên ti lec môp wê buge vông ge lêm. Lêc he hôm a xôn gê Jêlusalem di vông a la vac he Lom vigê. ¹⁸Mêd he Lom ngô kiyang wê a vông ge vihati, lêc he o tulec soên ti lec a wê he ob hi a xib lec ge lêm, om he nêb he ob piwelac a, ¹⁹lêc he Yuda le vac xôn nêb tiyiên ma om a nêg môp ti o yêp lêm, om a nêl ên a nêbê king Sisa vaci ob ngô kiyang wê a vông ge. Lêc ge od tiyi xocbê a ob vông kot vô lige Yuda lec kiyang ti lêm. ²⁰Om gwêbaga a keac xam lam ên a nêb a ob xê xam di nêl kiyang tige kitong vô xam. A vông i vin di a bin kiyang ti wê il Yuda vihati dô bin ge, lêc he ku a xôn ya sen tiga ên wê a vông i vin kiyang tige.”

²¹Mêd he Yuda levac nêl vô Pol ên nêbê, “Il lige Judia ti o vông kipihac lam mi nêl ông kiyang vô xe lêm, di he ti o val nêl ông nêb nipaên ti vô xe lêm. ²²Lêc xe nêb xe ob ngôvô ông nilôm bôbac di ôcông va ob nêl vac myam, ên xe ngô wê xomxo vac vigwe vihati nêl kiyang nipaên lec xam xolac ba wê xam vông i vin Yesu ge.”

²³He nêl bêge om he Pol tung buc ti di buc tige xomxo tibeac la vô Pol vac xumac wê mi dô vac ge. Mêd Pol nêl xolac vô he vô pitoc yuu vidiiên di i la vigwe bucên hixôn, om nêl Anutu ben kehe kitong vô he, di nêl Moses he plopete vya kitong ên nêb he i xovô bê Moses he plopete nêl kiyang tige lec Yesu. ²⁴Om he wê ngô xolac wê Pol nêl ge, he ya vông i vin di ya vông vinên ma. ²⁵Om he nêlma lec kiyang tige di lop mi la vixun, lêc taxlee ge od Pol nêl kiyang vô he bêga nêbê, “Myakilôhô Ngibua nêl kiyang nôb vô plopet Aisaia lec buge ilage bêga nêbê,

²⁶ ‘Ông loc nêl vô xomxo viyang tige bêga bê, “Xam ob ngô kiyang, lêc xam ob xovô kehe lêm, di xam ob wê, lêc xam ob wê susu ti lêm.”

²⁷Xomxo tigeê nilô xêkizêc di he ninya vô kitu di he manôn toc om he manôn o yê susu ti lêm, di he ninya o ngô kiyang ti lêm, di

he o xovô kiyang ti kehe lêm, om he ob vông nilô lam vô a ên a vông he vô nivihã lec lêm.'

²⁸Anutu nêl bêge, om xam xovô bêga bê kiyang wê Anutu nêl ên nêbê ob vô il vêl ên nipaên ge, Anutu vông i la pyap vô tibii wê o Yuda lêm ge, ên he ge wê ob ngô kiyang tige di vông i vin.” ²⁹[Pol nêl kiyang tige pyap di he Yuda la nêlma mabu lec kiyang tige.] ³⁰Mêd Pol kisuu xumac ti mi dô vac tiyi klismã yuu, di xomxo obêc mîla vô i ge od mi viac he nivihã, ³¹di nêl Anutu ben kehe kitong vô he di tixuu he ya Apumtau Yesu Kîlisi xolac. Pol nêl kiyang yêp seac vô xomxo di xonaên ma, di he o vîbu i lêm.

LOM

Kipihac wê Pol kivuu vô tibii Lom ge

Pol nêl i yuac sinale kehe kitong

1 ¹A, Pol, a kivuu kipihac ga vô xam Lom. A ga Yesu Kilisi nu yuac ti wê Anutu vînoo a nêb a tu sinale ti di nêl i xolac ge.

²Xolac tiga, Anutu nêl vô plopete ilage mi he kivuu i yêp vac kipihac ngîbua. ³Xolac tiga nêl lec Anutu nu Yesu wê lam tu xomxo gê kibun ga, vac hîpu wê Devit vông ge, ⁴lêc Yesu ge xomxo xêseac pileva ti, om Anutu tîpi vô i kidi lec maviha vac yibên ên nêb xomxo i xovô bê Yesu ge Anutu nu wê xomxo xêkizêc. Yesu Kilisi ge il nêd Apumtau. ⁵Mêd Anutu vông vizid vô xe lec Yesu tibed om vông yuac sinale vô xe ên nêb xe vông Kilisi lê i vô levac. Anutu vông bêge ên nêbê xomxo vac vîgwe vîyang vîyang ge i ngô xolac di vông i vin di vông i vô nôn lec. ⁶Di xam êno, Anutu tyuc xam ên nêb xam tu Yesu Kilisi xe.

⁷Mêgem a kivuu kipihac ga vô xam tibii Lom wê Anutu xêyaa vin lec xam di i tyuc xam nêbê xam tu i nue ge. Il Mag Anutu yuu Apumtau Yesu Kilisi, yuu i vông vizid hixôn kiyang malehe i loc ngîdu xam xôn.

Pol nêb ob la yê tibii Lom

⁸A ob nêl kiyang vô xam tax bêga bê tibii nêl vông vinên wê xam vông ge vô levac vac vîgwe vîhati, om a hi vixag pec ên xam vô Anutu lec Yesu Kilisi lê. ⁹A ga wê a vông nilôg la yadîluhu vô Anutu yuac di a nêl nu tuc xolac kitong, om Anutu vaci xovô wê a mi xo xam vac kîtaaên tîyi lec buc vîhati ge. ¹⁰Lêc a gên o loc vô xam ila ti lêm, mêgem a mi kîtaa vô Anutu ên a nêbê Anutu obêc tyuc lec ge od i lêc hîlung mîp wê a ob loc vô xam ge. ¹¹Ên a nilôg kidu a ên nêb a loc xê xam, ên vông vizid wê Myakîlôhî Ngîbua vông ge ya vô xam ên i ngîdu vông vinên wê xam vông ge xôn.

¹²Kehe bêga, a nêb vông vinên wê a vông ge i ngidu xam xôn, di xam êno, vông vinên wê xam vông ge i léc ngidu a xôn, ên vông vinên wê il vông ge i ngidu il vihati xôn.

¹³Xam lige, a nêb xam xovô bê buc tibeac a nêb a ob loc vô xam lê, léc kiyang yuu yuac tibeac hôm a xôn om a o tiyi wê a ob loc ge lêm. Om a nêb a ob loc vông xolac vô xam ên i vô nôn vac xam mahigun i tiyi xocbê a la vông vac tibii baba ben ge. ¹⁴A yuac yêp wê a ob nêl xolac vô tibii viyang viyang, om a ob nêl vô he Glik wê he xovô kiyang tibeac gee di he madiluhu êno, di a ob nêl vô tibii wê piyôp nivihha gee di nêl vô he wê piyôp maên gee hixôn. ¹⁵Mêgem a nilôg kidu a nêb a nêl xolac kitong vô xam Lom hixôn.

Anutu xolac ge xêkizêc

¹⁶A nig ob yoc ên Anutu xolac lêm, ên xolac tiga xêkizêc wê Anutu vông ge, tiyi wê xomxo ti obêc vông i vin xolac ge od Anutu obêc kitya i nêl nipaên vêl di tung i lôm lam dô vac xêseac nilô. Kiyang tige val vô xe Yuda tax dêc la vô tibii madiluhu timuên. ¹⁷Ên xolac tiga nêl Anutu môp yêp seac bêga ên nêbê Anutu ob yê xomxo nêb he xomxo nivihha, kehe lec wê he vông i vin Kilisi ge, tiyi xocbê kiyang wê yêp vac xolac bêga ên nêbê, “Xomxo ti obêc vông i vin ge, od Anutu obêc yê i nêbê i xomxo nivihha wê ob dô maviha ge.”

Kiyang yêp vô xomxo vihati ên wê he vông nipaên ge

¹⁸Il xovô ên il nêbê Anutu xêyaa vô myavinê vô xomxo nipaên om ici va obêc vông myaviwen vô he lec nipaên wê he vông ge, ên he vô nimi vô Anutu di vông môp nipaên luu vêl, om nipaên wê he vông ge kitya kiyang nôl vêl ên he nilô. ¹⁹Anutu ob vông myaviwen vô he, ên môp wê Anutu vông ge ti o yêp xôpacên mi he lungên lêm. Nge, vihati yêp seac tiyi wê xomxo ob yê di xovô ge, ên Anutu vaci hilung vô he. ²⁰Vô buc mugên ilage wê Anutu tung lag yuu kibun ge di i lam tyip gwêbaga hixôn, xomxo obêc yê susu wê Anutu tung ge od ob xovô bê Anutu ge Anutu nôl di i xêkizêc wê ob yêp luta léc luta ge. Vixôhilôg, xomxo o tiyi wê ob yê Anutu lec manôn ge lêm, léc susu wê Anutu tung ge wê ob vông xovôên vô xomxo, om xomxo ti o tiyi wê ob nêbê i lungên Anutu ge lêm.

²¹Ên he xovô Anutu lê, léc he o pimil Anutu lê di nêl bê i Anutu lêm, di he o hi vixa pec ên vizid wê i vông ge lêm. Nge, he piyôp vô judajuda di he vyac xovôên ma, om vông he nilô vô mapitoc. ²²He yong he nêbê he tibii xovôên, léc he tiyi xocbê tibii piyôp maên. ²³He vô nimi vô Anutu maviha wê yibên ob ma ge, di la yev vixa kitu vô anutu mayibên wê xomxo sev i tiyi xocbê xomxo yuu menac di lilii yuu myel hixôn susu mayibên mangwe. ²⁴He vông môp nipaên bêge, mêgem Anutu sea he di he nilô didii he mi la vac môp ningeac om he vông he ninivi vô nipaên

lec môp tibêgee. ²⁵Xomxo tigege sea Anutu kiyang nôn di vông i vin kiyang kityooên. Mêd he sea Anutu wê tu susu viyang viyang ge kehe ge di la yev vixa kitu vô di kitaa vô susu wê Anutu tung ge. Lêc Anutu ge maviha kehe mêgem il ob pimil i lê i vô levac di i yêp luta lêc luta. Nôn.

²⁶Xomxo vông môp nipaên tibêge, mêgem Anutu sea he di he la vac môp nipaên wê he nilô kidu he nêb he ob vông ge, om vêx sea môp wê ob kô vux ge di vông môp nipaên vôma. ²⁷Di he vux êno sea môp nivihã wê ob kô vêx ge, di he nilô kidi lec nêb he ob la vô vux vaci, om he vux vông môp nipaên vôma, mêgem heche va kô myaviwen nipaên tiyi môp wê he vông ge.

²⁸He nêb he ob xovô Anutu vac piyôp wê he vông ge lêm, mêgem Anutu sea he di he timu vô môp nipaên wê heche va piyôp xovô ge. ²⁹Mêgem xomxo tigege vông môp nipaên viyang viyang ge pup vac he nilô, om he doma vô xomxo susu, di he doma vô môp nipaên nêb he ob vông xomxo i vô nipaên, di he yê xomxo wê he susu tibeac ge nipaên, di he hi xomxo yib, di he xêyaa vô myavinê vôma, di he nêl kiyang kityooên, di he nêb he ob vông xomxo vihati i vô nipaên, di he yê xomxo nêb soên di keac lec i la ninya ninya, ³⁰di he nêl kiyang kityooên lec xomxo, di he vô nimi vô Anutu, di he yong he di kô he lec, di he piyôp la tulec môp paha wê ob vô nipaên ge mangwe hixôn, di he pwoo tae mae vya vac, ³¹di he piyôp vô judajuda, di he nêl kiyang lê, lêc he o vông kiyang vô nôn lec lêm, di he xêyaa o vin lec lie lêm, di he o xo vîgwe pisiv ên xomxo ti lêm. ³²Xomxo tigege xovô kiyang wê Anutu nêl ên nêbê xomxo obêc vông môp nipaên tibêgee ge od tiyi wê he ob yib lec nipaên wê he vông ge. He xovô kiyang tige lê, lêc he o sea môp nipaên wê he mi vông ge lêm, di he nêb nipaên ti yêp hixôn bêga nêbê he pimil xomxo wê vông nipaên gee hixôn.

Anutu obêc yaxên xomxo vihati ge nêb kiyang timuên

2 ¹Xam wê xam vô nilôm vô xomxo ya ên xam nêb he tibii nipaên ge, xam o tiyi wê xam ob yax nipaên wê xam vông ge vun lêm. Ên môp nipaên wê xam vô nilôm vô he ge yêp vô xam êno hixôn, om xam obêc vô nilôm vô he ge od xocbê xam vô nilôm vô xacxam va ge êno. ²Il xovô ên il nêbê Anutu obêc vông myaviwen nipaên vô xomxo wê vông môp nipaên tibêgee, di Anutu môp wê ob yaxên he di titô he ge od obêc la tiyi. ³Xame, xam vô nilôm vô tibii lec môp nipaên wê he mi vông ge, lêc xam êno môp nipaên yêp vô xam, lêcom xam so ên xam nêbê mêd myaviwen wê Anutu vông ge obêc tulec xam hixôn lêm. ⁴Anutu vông môp nivihã vô xam luu vêl, om dô bin xam buc xuhu dia di o vông myaviwen ti vô xam lutibed lêm. Lêc mêd xam wê Anutu môp nivihã tige xocbê kiyang pileva ti? Anutu vông nivihã vô xam ên nêb xam xovô di pilepac xam, lêc mêd xam o xovô lêm? ⁵Xam nilôm yen xêkizêc ta

di xam o pilepac xam lêm, om ge tiyi xocbê xam kituc nipaên wê xam vông ge vô levac vô xam. Mêgem obêc vô buc timuên wê Anutu obêc titô xomxo nêc kiyang ge od obêc vông myaviwen vô xam lec nipaên wê xam vông ge. ⁶Ên Anutu obêc vông myaviwen vô xomxo vihati i tiyi môp wê he toto mi vông gee. ⁷Om xomxo wê le xêkizêc vac môp nivîha di myag môp wê he ob dô hixôn Anutu vac xêseac di kê lê levac ge, od Anutu obêc vông xomxo tigeê dô maviha luta lêc luta. ⁸Dom he wê xovô heche va di vô nîmi vô kiyang nôn di la vac môp wê nipaên ge od Anutu xêyaa obêc vô myavinê vô he di kitya he vêl. ⁹Mêgem xomxo tigeê, viyin levac obêc hivun he xôn di he ob kê myavinê levac luu vêl lec nipaên wê he vông ge, om myaviwen ob tulec xomxo nipaên vihati, he Yuda hixôn tibii baba ya. ¹⁰Di xomxo wê mi vông môp nivîha ge, Anutu obêc tung he la dô vac xêseac gê lag puunê di vông lê levac vô he di he ob dô vac kiyang malehe nilô, om obêc vông vô xomxo wê nivîha ge vihati, he Yuda hixôn tibii baba ya. ¹¹Ên Anutu obêc yaxên xomxo vihati tiyima, om xomxo vihati obêc la le vô Anutu manôn, di i yaxên môp wê he toto vông ge.

¹²Tibii madiluhu wê lungên Moses xolac ge, he obêc vông nipaên ge od Anutu ob titô he nêc kiyang ya Moses xolac lêm. Nge, heche va obêc yib vidaaên lec nipaên wê he vông ge. Di Yuda wê he xovô Moses xolac ge, he obêc vông nipaên ge od Anutu ob titô he ya Moses xolac wê he mi ngô ge. ¹³Lêc xomxo obêc ngô Moses xolac pileva ge od o tiyi wê Anutu ob yê nivîha ge lêm. Nge, xomxo wê vông xolac tyo vô nôn lec ge wê Anutu ob yê he nivîha. ¹⁴Tibii madiluhu o xovô Moses xolac lêm, lêc heche va piyôp vinoo kiyang ya tiyi xocbê kiyang wê yêp vac Moses xolac ge, om kiyang tige tiyi xocbê heche va xolac wê yêp vô he ge. ¹⁵Om môp wê he vông ge nêl kitong ên nêbê xolac wê Anutu vông vô Moses ge yêp vac he nilô êno, di heche va nilô le yaxên môp vilu vilu, om môp ya he nêbê nivîha di ya he nêbê nipaên. Om môp tige nêl kitong hixôn ên nêbê xolac yêp vac he nilô. ¹⁶Mêgem Anutu obêc yaxên xomxo nêc kiyang vô buc timuên di ob vông yuac vac Yesu Kilisi vigê di Yesu ob yaxên kiyang vihati wê yêp xôpacên vac xomxo nilô ge di titô. Kiyang tige yêp vac xolac nilô mi a nêl vô xomxo.

Yuda yong he lec Moses xolac ên nêb ob vô nivîha vô he

¹⁷Xame, xam wê xam nêbê xam lêm Yuda ge, xam hôm Moses xolac xôn ên xam nêbê ob vô nivîha vô xam, di xam yong xam ên xam nêbê xam ge Anutu nue xam. ¹⁸Xam xovô môp wê Anutu xêyaa vin lec ge pyap, ên xomxo tixuu xam ya Moses xolac om xam xovô môp nivîha. ¹⁹⁻²⁰Xam xo ên xam nêbê xovôên hixôn kiyang nôn yêp vac xolac wê Moses vông ge nilô. Om xam mi nêl ên xam nêbê, “A tiyi wê a ob hilung môp nivîha vô xomxo wê matocên ge, di a ob hilung xêseac vô he wê dô vac mapitoc ge. Di a tiyi wê a ob tixuu he wê gên o xovô lêm ge, di he wê tiyi xocbê xomxo nipwo

ge.”²¹ Vixôhilôg, xam mi tixuu xomxo di vông xovôên vô he, léc bêna léc xam o vông xovôên vô xacxam va lêmê? Xam mi nêl xolac vô xomxo ên xam nêbê he i o léc vông yôdac vô xomxo susu lêm, léc mêd xam êno, xam mi vông yôdac vô xomxo susu hixôn.²² Di xam mi nêl vô xomxo ên xam nêbê, “Le i léc vông yôdac vêu yuu vux lêm,” léc mêd xacxam va mi vông hixôn. Di xam nêbê xam xêmyaa o vin lec anutu mayibên lêm, léc bêna léc xam la vun susu vac xumac ngibua wê tibii madiluhu vông ge?²³ Xam yong xam ên xam nêbê xam xovô Anutu xolac pyap, lêcom xam o timu vô xolac mi vông i vô nôn lec lêm, om ge tiyi xocbê xam vông Anutu lê vô nipaên,²⁴ tiyi xocbê kiyang wê yêp vac kiphac xolac bêga ên nêbê, “Tibii wê o Yuda lêm ge yê môt nipaên wê xam Yuda mi vông ge om so vya vô Anutu.”

Yuda môt wê mi gôl ninivi ge o vô nivihha vô he lêm

²⁵ Xam obêc timu vô xolac wê Anutu nêl vô Moses ge od môt wê gôlên ninivi ge ob vô nivihha vô xam, léc xam obêc pwooc xolac vac ge od môt wê xam mi gôl nimnivi ge, tiyi xocbê xam vông lec kisii di xam o xovô Anutu lêm.²⁶ Di tibii madiluhu wê gôlên ninivi ma ge obêc timu vô Anutu xolac ge od Anutu ob yê he nivihha tiyi xocbê xomxo wê gôl ninivi ge.²⁷ Xam Yuda, Anutu xolac yêp vac kiphac wê xam vông ge om xam gôl nimnivi tiyi, léc xam o vông xolac tyo vô nôn lec lêm. Mêgem tibii wê ninivi gôlên ma ge obêc timu vô Anutu xolac ge od môt wê he vông ge obêc nêl xam kitong seac bêga bê xam tibii nipaên.²⁸ Môt wê ninivi ge ti o yêp wê ob nêl Yuda kitong nêbê he Yuda nôn ge lêm. Di môt ninivi gôlên ge, kehe o yêp vac ninivi gôlên pileva lêm.²⁹ Xomxo wê Yuda nôn ge, kehe yêp vac wê he vông nilô la yadiluhu vô Anutu ge, di môt wê ob nêl he kitong nêbê he Anutu nue nôn ge, kehe o yêp vac môt ninivi gôlên ge lêm. Nge, ge yuac wê Myakilôhô Ngibua vông vac he toto nilô. Xomxo tibêgee ob kô lê levac ge od ob kô lê levac vô xomxo kibun ga lêm. Nge, obêc kô lê levac vô Anutu môci.

Anutu nêl Yuda nêl nipaên yêp seac vô he manôn

3¹ Om xomxo Yuda nginoo tibii madiluhu vêl lec vatya? Di môt ninivi gôlên ge ob vô nivihha vô he lec vatya?² Xam wê. Yuda tulec vizid levac luu xomxo baba ge vêl. Vizid taxlee bêga nêbê Anutu vînoo he di nêl i xolac vô he nêb he i viac.³ Léc he ya o vông i vin xolac tige lêm. Om obêc bêna? Mêd môt wê he vông ge obêc vông Anutu sea i kiyang wê nêl vô he ge, me?⁴ Ma vêl. Anutu ob sea i kiyang ti lêm. Ên il vihati yang obêc nêl kiyang kityoên, dom Anutu tived ge wê obêc nêl kiyang hixôn nôn, tiyi xocbê kiyang wê nêl lec Anutu mi i yêp vac xolac bêga ên nêbê, “Kiyang wê ông nêl vô xomxo ge, he obêc ngô di xovô nêbê nivihha, di he ti obêc nêb vông kiyang ti vô ông ge od ông kiyang nôn obêc nginoo he vêl.”

⁵Môp nipaên wê il vông ge obêc nêl môp nivihâ wê Anutu vông ge kehe kitong vô xomxo ge, od il ob nêbê va? Il ob nêl bê môp wê Anutu ob vông myaviwen vô xomxo lec nêl nipaên ge, mêd Anutu vông i so, me? Kiyang tiga a nêl i tiyi xomxo piyôp wê mi nêl ge. ⁶Lêc kiyang tibêge kiyang kityooên. Ên môp wê Anutu vông ge tiyiên obêc ma ge od o tiyi wê ob yaxên xomxo nêl kiyang ge lêm. ⁷Xomxo ya nêl ên he nêbê kiyang kityooên wê he mi timu vô ge obêc vông Anutu kiyang nôn yêp seac di vông i lê i vô levac, om Anutu o tiyi wê ob nêl bê he xomxo nipaên di vông myaviwen vô he ge lêm. ⁸He ya nêl ên he nêbê, “Om il ob vông môp nipaên i luu vêl, ên nivihâ obêc val lec tige.” Kiyang tibêge o tiyi lêm. Lêc xomxo ya so vya lec a ên nêbê a mi nêl kiyang tibêge. Om xomxo tibêgee obêc tulec myaviwen nipaên tiyi môp nipaên wê he mi vông ge.

Xomxo kibun ga vihati dô vac nipaên

⁹Om il ob nêbê va? Xe Yuda nginoo xomxo baba vêl, me? Ma vêl. Ên a nêl pyap vô xam ên a nêbê xe Yuda hixôn xam tibii ba, il xôn vihati dô vac nipaên nilô. ¹⁰Tiyi xocbê xolac nêl bêga ên nêbê, “Xomxo wê Anutu ob yê nêb he xomxo nivihâ ge, ti dôên ma. ¹¹Di xomxo piyôp nivihâ ti o dô lêm, di xomxo wê nêb ob myag Anutu mi la tulec nôn ge, ti o dô lêm. ¹²Ên xomxo vihati vô nîmi vô Anutu di la vac môp nipaên nilô, om he ti o vông môp nivihâ ti lêm. Ma vêl. ¹³He mya mi nêl kiyang nipaên tiyi xocbê lôva wê xomxo yibên la yêp vac ge lêc mya tax di nuhu lam ge, om he mya mi nêl kiyang kityooên, di kiyang nipaên wê he nêl ge la vông xomxo vô nipaên tiyi xocbê myel mya kilin wê nga xomxo ge. ¹⁴He mi nêl vya lôt xomxo ên nêb i yib vêl. ¹⁵He tup lutibed ên nêb he ob la hi xomxo i yib. ¹⁶Di môp wê he vông ge vông xomxo vô nipaên di vông he dô vac viyin. ¹⁷He lungên môp wê ob dô vac kiyang malehe ge, ¹⁸di he o xona ên Anutu lêm.” Xolac nêl bêge. ¹⁹Il xovô ên il nêbê kiyang wê yêp vac xolac ge Anutu nêl vô xomxo wê dô vac xolac nilô ge ên nêb he i timu vô, lêc il o timu vô vihati lêm, om xomxo ti o tiyi wê ob nêl vô Anutu bê i xomxo nivihâ wê timu vô xolac vihati ge lêm. Nge, xomxo kibun ga vihati tiyi wê ob tulec myaviwen vô Anutu manôn ge. ²⁰Ên xomxo obêc nêb timu vô xolac wê Anutu nêl vô Moses ge od môp ge o tiyi wê ob vông Anutu yê he nivihâ ge lêm, ên xolac wê Moses vông ge nêl kitong vô il ên nêbê il tibii nidpaên.

Xomxo wê vông i vin Yesu ge, Anutu ob yê nêb he xomxo nivihâ

²¹Gwêbaga môp wê Anutu ob yê xomxo nêb he xomxo nivihâ ge lam yêp seac. Môp tige, kehe o yêp vac Moses xolac lêm, lêc Moses xolac hixôn plopete kiyang nêl lec môp tige hixôn. ²²Môp yêp bêga ên nêbê xomxo ti obêc vông i vin Yesu Kîlisi ge od Anutu ob yê nêb i xomxo

niviha wê nipaên ti o yêp vô i ge lêm. Di Anutu ob vông vô xomxo wê vông i vin ge vihati tiyima, ên xomxo ngwe o bangwe di ngwe bangwe lêm. ²³Nge, il vihati yang, il vông môp nipaên, om il o tiyi wê il ob tulec xêseac wê Anutu vông ge lêm. ²⁴Lêc Anutu xo vigwe pisiv ên il om vông vizid levac vô il bêga ên nêbê vông Yesu Kilisi lam vô il vêl ên nipaên, om Anutu yê il nêbê il xomxo nivaha. Lêc il o kisuu ya susu ti lêm. Nge, Anutu vông pileva vô il lec yuac nivaha wê Yesu Kilisi vông ge. ²⁵Anutu vông Yesu lam yib mi kipyax i hi sea ên nêbê xomxo i vông i vin Yesu, ge od Anutu obêc kitya he nêb nipaên vêl. Anutu vông Yesu lam ên nêb môp wê ob yê xomxo nêb nivaha ge i yêp seac vô xomxo, ên ilage Anutu yê nipaên wê xomxo vông ge, lêc o vông myaviwen vô he lêm. Nge, hôm xôn mi i yêp. ²⁶Lêc gwêbaga Anutu kitya il nêd nipaên vêl lec Yesu Kilisi, om il ob xovô bê Anutu ge xêseac pileva di nivaha kehe, di xomxo wê vông i vin Yesu ge Anutu ob yê he tiyi xocbê xomxo nivaha.

²⁷Om môp ti yêp wê il ob kô il lec ge, me? Môp ti o yêp bêge lêm. Mêd il ob kô il lec ên wê il timu vô xolac wê Moses vông ge, me? Ma vêl. Ên Anutu yê il nivaha lec vông vinên wê il vông ge, om o tiyi wê il ob yong il ge lêm. ²⁸Ên il xovô ên il nêbê môp wê Anutu ob yê xomxo nivaha ge, kehe o yêp vac xolac wê Moses vông ge lêm. Nge, kehe yêp vac wê xomxo obêc vông i vin Yesu Kilisi ge.

²⁹Il ob nêl bê Anutu tu Yuda vaci Anutu di o tu tibii baba Anutu lêm, me? Ma vêl. Tibii wê o Yuda lêm ge, Anutu tu he Anutu hixôn. ³⁰Vixôhilôg nôn, Anutu tived, om tibii Yuda wê ninivi gôlên ge obêc vông i vin ge od Anutu ob yê he nivaha, di tibii baba wê gôlên ninivi ma gee obêc vông i vin ge od Anutu ob yê he nivaha êno. ³¹Lêc môp wê il vông i vin Yesu ge ob kitya Moses xolac vêl lêm. Nge, il ob hôm Moses xolac xôn mi i yêp hixôn.

Anutu yê Eblaham nivaha ên wê vông i vin ge

4 ¹Om il ob nêl kiyang bêna lec il bug Eblahamê? ²Anutu obêc yê Eblaham nivaha lec wê vông yuac nivaha ge od Eblaham obêc tiyi wê ob yong i ge, lêc o tiyi wê ob yong i vô Anutu manôn ge lêm. ³Ên kiyang yêp vac kipihac xolac bêga ên nêbê, “Eblaham vông i vin Anutu om Anutu yê vông vinên wê i vông ge, nêb i xomxo nivaha.” ⁴Il xovô ên il nêbê yuac wê yêp vô il gê kibun ga, xomxo ti obêc vông yuac di kô mone lec ge, od mone wê i kô ge, tibii o vông pileva vô i lêm. Nge, vông lec yuac wê i vông ge. ⁵Xomxo môp bêge yêp, lêc môp wê Anutu vông ge o ngwe bêge lêm. Ên Anutu o yê yuac wê xomxo vông ge nêbê i xomxo nivaha lêm. Nge, ob yê wê xomxo vông i vin ge di nêl ên nêb i xomxo nivaha lec môp vông vinên tived. Ên Anutu ge wê kitya il nêd nipaên vêl di yê il tiyi xocbê xomxo wê nipaên ti o yêp vô il lêm ge. ⁶Devit êno nêl kiyang lec xomxo wê Anutu yê nêb he xomxo nivaha ge, ên nêbê he hi

vixa pec ên wê Anutu yê he nivîha ge, léc kehe o yêp vac yuac nivîha wê he vông ge lêm. ⁷Om Devit kiyang yêp bêga ên nêbê,

“Xomxo wê Anutu kitya he nê nipaên vêl di hi i yib ge, he ob dô hixôn xêyaa nivîha. ⁸Di xomxo wê Anutu o hôm he nê nipaên xôn lêm ge, od he ob dô hixôn xêyaa nivîha.”

⁹Om kiyang tige yêp vô xomxo tina? Mêd yêp vô he Yuda wê gôl ninivi ge vaci, me yêp vô xomxo wê gôlên ninivi ma ge hixôn? Ge nêl lec xomxo vihati. Ên kiyang yêp bêga ên nêbê, “Vông vinên wê Eblaham vông ge, Anutu yê ên nêbê i xomxo nivîha.” ¹⁰Om xam xovô lê. Vô buc tina Anutu yê Eblaham nêbê i xomxo nivîha? Ge nêl vô buc wê Eblaham gôl ninivi pyap ge, me nêl vô buc wê ninivi gôlên gên ma ge? Ge nêl vô buc wê Eblaham gôlên ninivi gên ma ge. ¹¹Ên buc wê ninivi gôlên gên ma ge od Eblaham vông i vin Anutu tax di Anutu yê nêbê i xomxo nivîha. Pyap dêc gôl ninivi timuên ên nêbê môp ninivi gôlên i nêl kitong bê Anutu yê Eblaham nêbê i xomxo nivîha ên wê vông i vin ge. Mêgem tibii wê ninivi gôlên ma gee, léc he vông i vin Anutu di Anutu yê he nivîha, om Eblaham tiyi xocbê he bu. ¹²Di xomxo wê gôlên ninivi gee, he êno tiyi xocbê Eblaham bue. Léc o nêl kiyang lec ninivi gôlên pileva mô lêm. Nge, nêl lec he wê gôl ninivi di vông i vin tiyi xocbê Eblaham vông i vin vô buc wê gên o gôl ninivi lêm ge.

Kiyang wê Anutu hilu vô Eblaham ge ob vô nôn lec vô xomxo wê vông i vin ge

¹³Ilage Anutu hilu kiyang vô Eblaham he bue ên nêbê ob vông kibun vihati vô he. Léc kiyang tige Anutu o hilu vô Eblaham ên wê mi timu vô xolac ge lêm. Nge, hilu vô Eblaham ên wê vông i vin Anutu om Anutu yê nêbê i xomxo nivîha ge. ¹⁴Ên kiyang wê Anutu hilu pyap ge obêc vô nô n lec vô xomxo ên wê he mi timu vô Moses xolac ge, od vông vinên wê he vông ge obêc pileva, di kiyang wê Anutu hilu vô he ge, he ob yê tiyi xocbê kiyang pileva. ¹⁵Il xovô ên il nêbê xomxo ti obêc pwoo Moses xolac vac ge od ob tulec myaviwen. Xolac yêpên obêc ma ge od o tiyi wê il ob nêl bê xomxo pwoo kiyang vac ge lêm. Léc xolac yêp, om vông xovôên vô il.

¹⁶Om kiyang wê Anutu hilu vô Eblaham ge ob vô nô n lec vô xomxo wê vông i vin ge, ên vizid wê Anutu hilu ge, Anutu nêbê ob vông pileva vô Eblaham bue vihati. Léc ob vông vô xomxo wê mi timu vô Moses xolac ge vaci lêm. Nge, ob vông vô xomxo vihati wê vông i vin xocbê Eblaham ge. Eblaham ge xocbê il vihati bug mugên, ¹⁷tiyi xocbê kiyang wê Anutu nêl vô Eblaham mi i yêp vac xolac bêga ên nêbê, “A vînoo ông tu xomxo vihati bu.” Mêgem kiyang tige vô nô n lec mi yêp vô Anutu. Anutu ti wê Eblaham vông i vin i ge, ge wê ob tipî vô xomxo yibên kidi lec maviha, di i wê ob nêl susu wê gên ma ge vihati ob lam le seac.

¹⁸Anutu nêl vô Eblaham ên nêbê, “Bume obêc vô tibeac hiwocên.” Eblaham ngô kiyang tige di vông i vin ên nêbê obêc vô nôn lec. Môt ti o yêp wê kiyang ob vô nôn lec ge lêm, lêc Eblaham vông i vin xêkizêc di yaxên kiyang. Mêgem Eblaham tiyi xocbê xomxo tibeac, kinu i. ¹⁹Eblaham vô kipwoc di klismas wê i vông ge vô kwabo lec 100 di vinê Sela êno vô vêxta om yuu o tiyi wê yuu ob kô nue ti ge lêm. Eblaham xo bêge lê, lêc vông vinên wê i vông ge yêp xêkizêc ta, ²⁰di o sea vông vinên wê i vông ge lêm. Di nilô o la yuu lec kiyang wê Anutu hilu vô i ge lêm. Nge, vông i vin xêkizêc ta di pimil Anutu, ²¹ên Eblaham xovô vinux yang ên nêbê, “Anutu tiyi wê ob vông kiyang wê hilu vô a ge ob vô nôn lec.” ²²Mêgem Anutu yê vông vinên wê Eblaham vông ge nêb Eblaham xomxo nivihã.

²³Kiyang yêp vac xolac bêga ên nêbê, “Anutu yê nêb i xomxo nivihã.” Kiyang tige o nêl lec Eblaham tived lêm. ²⁴Nge, nêl lec il xôn vihãti, ên nêb il obêc vông i vin Anutu wê tipi vô il lig Apumtau Yesu kidi lec vac yibên ge, od Anutu ob yê il nêb il xomxo nivihã. ²⁵Ên Anutu vông Yesu lam yib ên il nêd nipaên, di Anutu tipi vô Yesu kidi lec vac yibên ên nêb ob yê il tiyi xocbê il xomxo nivihã.

Anutu yê ên nêb il xomxo nivihã

5 ¹Il vông i vin Yesu om Anutu yê nêb il xomxo nivihã, mêgem il lig Apumtau Yesu Kilisi vông Anutu xêyaa myavinê tip la di tung il la dô vac xêyaa vin lecên wê Anutu vông ge. ²Yesu vaci didii il mi la tung vac vizid yuu malehe mi il dô vac gwêbaga, di il vông i vin ên il nêbê obêc buc timuên ge od il ob la dô vac xêseac hixôn Anutu, om gwêbaga il ob dô di yaxên buc tige hixôn xêdyaa nivihã. ³Lêc il ob hi vixad i pec ên kiyang tige mô lêm. Nge, il ob hi vixad i pec ên viyin wê ob val vô il ge hixôn. Ên il xovô ên il nêbê viyin tige ob vông il le xêkizêc, ⁴di il obêc le xêkizêc vac viyin ge od il ob tiyi xocbê xomxo wê Anutu yaxên he, lêc he le xêkizêc om Anutu yê nêbê nivihã ge, di Anutu obêc yê il nivihã ge od il ob vông i vin di yaxên vizid wê Anutu obêc vông vô il timuên ge. ⁵Di il obêc vông i vin mi yaxên vizid tige ge od vông vinên wê il vông ge obêc vidaaên lêm, ên Anutu obêc vông i vô nôn lec timuên. Il xovô bêge, ên Myakilôhô Ngibua wê Anutu vông i lam vô il ge vông xêyaa vin lecên wê Anutu vông ge lam hivun il xôn.

⁶Ilage il xêkizêc o tiyi wê ob vô il vêl ge lêm, lêc vô buc gwêbaga Kilisi lam yib, ên nêb ob kitya il wê il vô nimid vô Anutu ge nêd nipaên vêl. ⁷Môt wê il xomxo vông ge bêga nêbê xomxo ti ob yib mi kisuu xomxo nivihã ti lec lêm. Lêcom mêd xomxo ti ti tiyi wê ob vông he vac yibên ên kisuu xomxo nivihã lec. ⁸Dom môp wê Anutu vông ge yêp bêga ên nêbê yê wê il gên dô vac nipaên nilô ge, om vông Yesu lam yib ên nêb ob ngidu il xôn, om môp tige nêl kitong seac bêga nêbê Anutu xêyaa vin

lec il luu vël. ⁹Yesu hi vông Anutu yê il nivihā di kitya il nêd nipaên vël om il xovô vinux ên il nêbê Yesu ob vô il vël ên xêyaa myavinê wê Anutu ob vông vô il timuên ge. ¹⁰Ên ilage Anutu yê il tiyi xocbê tibii wê vông vevac vô i ge, lêc nu tuc Yesu lam yib om vông kisoac ên il di vông il lax dô hixôn ma Anutu. Il dô hixôn Anutu, om il xovô vinux ên il nêbê maviha wê Yesu vông ge obêc vông il la dô madviha di ob vô nivihā vô il luu vël. ¹¹Dêc kiyang o tixed ge lêm. Il ob hi vixad i pec ên Anutu ên wê il lig Apumtau Yesu Kîlisi didii il lax dô hixôn ma Anutu hixôn kiyang malehe ge.

**Adam vông xomxo dô vac môp yibên, di Kîlisi
vông xomxo dô vac môp maviha**

¹²Il xovô bêga ên il nêbê xomxo tixed wê nêbê Adam ge pwoo kiyang vac, om môp nipaên tige vô levac gê kibun, di nipaên tige didii il vac yibên, om yibên sox vac sox vac mi la hivun xomxo vihati xôn, ên xomxo vihati vông môp nipaên. ¹³Anutu gên o vông xolac vô Moses lêm di nipaên yêp lec kibun tax, lêc xolac gên ma, om o tiyi wê ob nêl nipaên toto ge lêm. ¹⁴Lêc môp wê yibên ge yêp vô xomxo vihati vô buc wê Adam vông ge di i lam tyip vô buc wê Moses vông ge hixôn. Vixôhilôg, xomxo tige he ya o pwoo Anutu kiyang vac tiyi xocbê Adam ge lêm, lêcom he vihati yib hixôn.

Adam ge tixuu lec xomxo ngwe wê val timuên ge, ¹⁵lêc nipaên wê Adam vông ge o tiyi xocbê vizid wê Anutu vông vô il ge lêm. Ên xomxo tixed vông nipaên om xomxo vihati ob yib, lêc Anutu xo vîgwe pisiv ên il om vông vizid nivihā lam hivun il tibeac xôn lec Yesu Kîlisi nôn tixed. Om il kô vizid tibeac luu vël, lêc il o kisuu ya susu lêm. Nge, Anutu vông pileva vô il. ¹⁶Om vizid wê Anutu vông pileva vô il ge, nôn o tiyi xocbê nôn wê yêp vac nipaên wê Adam vông ge lêm. Ên Adam vông môp nipaên om Anutu yaxên lêc nêbê xomxo ob yib mi la vac nipaên. Dom xomxo wê timuên gee he pwoo Anutu kiyang vac, lêc Anutu xo vîgwe pisiv ên he di vông vizid yuu malehe vô he bêga nêbê kitya he nêl nipaên vël di yê nêb he xomxo nivihā. ¹⁷Ilage Adam vông môp nipaên, om môp yibên hivun xomxo kibun ga vihati xôn ên wê xomxo tige tixed vông nipaên ge. Lêc môp nivihā wê xomxo tixed Yesu Kîlisi vông ge luu môp nipaên wê Adam vông ge vël. Ên Anutu vông vizid levac vô xomxo om kitya he nêl nipaên vël di yê nêb he xomxo nivihā lec yuac wê Yesu vông ge, om xomxo obêc vông i vin Yesu ge od he ob kô lê levac di dô maviha luta lêc luta.

¹⁸Xomxo tixed wê nêbê Adam ge wê vông môp nipaên ilage, om myaviwen nipaên wê i vông ge tulec xomxo vihati hixôn, lêc xomxo tixed Yesu Kîlisi vông môp nivihā, om Anutu kitya xomxo vihati nêl nipaên vël di vông he dô maviha. ¹⁹Xomxo tixed ge pwoo kiyang vac, om vông xomxo tibeac dô vac nipaên. Lêc xomxo ngwe bed Yesu Kîlisi wê vô ninya

lehe vô Anutu kiyang mi vông i vô nôn lec, om môp tige vông Anutu yê xomxo tibeac nêb he xomxo nivihã.

²⁰Anutu vông xolac vô Moses, ên nêb i nêl xomxo nêl nipaên i yêp seac, mêgem môp wê xomxo pwooxolac vac ge vô levac vô he, lêc xêyaa vin lecên yuu malehe wê Anutu vông ge, levac mabu luu vêl. ²¹Vixôhilôg, môp nipaên hivun xomxo vihati yang xôn di he dô vac môp mayibên, lêc gwêbaga vizid levac wê Anutu vông ge lam hivun il xôn, om Anutu kitya il nêd nipaên vêl di yê il ên nêb il xomxo nivihã wê il ob dô madviha luta lêc luta. Vizid wê Anutu vông ge kehe lec il lig Apumtau Yesu Kïlisi nôn tïbed.

Il xib hixôn Kïlisi

6 ¹A nêl gwêba ên a nêbê vizid wê Anutu vông ge luu nipaên wê il vông ge vêl, om il ob nêl kiyang bêna? Il ob vông môp nipaên i luu vêl êdêc Anutu xêyaa i vin lec il luu vêl di i kitya il nêd nipaên vêl, me? ²Ma vêl. Ên il sea môp nipaên la vêl pyap om il ob timu vô môp tigege i tii vac lêm. ³Buc wê il lipac mia lec Yesu Kïlisi lê ge od tiyi xocbê il xib hixôn Yesu. Lêc mêd xam lungên kiyang tige? ⁴Buc wê il lipac mia ge od tiyi xocbê il xib hixôn Kïlisi mi la vac lôva, lêc xêkizêc yuu xêseac wê Mag Anutu vông ge tïpi vô Kïlisi kidi lec maviha, om vông il kidi lec madviha hixôn di dô vac môp paha.

Il dô madviha hixôn Kïlisi

⁵Il xib hixôn Kïlisi, om il ob xovô bêga hixôn bê il ob kidi lec madviha tiyi xocbê Kïlisi kidi lec maviha ge. ⁶Il xovô ên il nêbê il nilôd nipaên yib hixôn Kïlisi lec xax pola, mêgem xêkizêc wê il nilôd nipaên vông ge tip la vêl, om nipaên ti ob hôm il xôn nang lêm. ⁷Ên xomxo wê yib ge, môp nipaên ti o tiyi wê ob ku he xôn ge lêm.

⁸Il xib hixôn Kïlisi pyap, mêgem il vông i vin ên il nêbê il ob dô madviha hixôn Kïlisi. ⁹Ên il xovô ên il nêbê Kïlisi kidi lec maviha vac yibên di obêc yib i tii vac nang lêm, ên xêkizêc wê yibên vông ge ob hôm i xôn lêm. ¹⁰Yesu yib lu tïbed, om kitya il nêd nipaên vêl, di gwêbaga dô maviha hixôn Anutu. ¹¹Mêgem xam xovô bêga bê xam êno o dô vac xêkizêc wê nipaên vông ge tii vac nang lêm, mêd gwêbaga xam dô mamviha hixôn Anutu lec yuac wê Yesu Kïlisi vông ge.

Il ob timu vô môp nivihã

¹²Mêgem xam o lêc vông xam vac môp nipaên lêm, di xam o lêc timu vô môp nipaên wê xam nilôm kidu xam ên ge lêm. ¹³Xam o lêc vông nimnivi i loc vac môp vilu wê nipaên ge lêm. Xam vông nilôm i loc diluhu vô Anutu, ên xam tiyi xocbê xomxo wê kidi lec vac yibên mi dô maviha ge, om xam vông xam i loc yadiluhu vô Anutu, di dô vac môp

niviha. ¹⁴Môp nipaên o tiyi wê ob hôm xam xôn ge lêm. Ên xam o dô vac xolac wê Moses vông ge kwa ngibi lêm. Nge, xam dô vac vizid wê Anutu vông ge kwa ngibi.

¹⁵Il o dô vac Moses xolac kwa ngibi lêm. Nge, il dô vac vizid wê Anutu vông ge. Om il obêc nêb va lec môp tige? Tiyi wê il ob vông môp wê nipaên ge, me? Ma vêl. ¹⁶Om xam wê lê. Xam obêc la vac xomxo ti kwa ngibi di vô ninyam lehe vô kiyang wê i nêl ge od xam tu xomxo tige nue yuac. Om xam obêc la vac môp nipaên kwa ngibi di tu môp nipaên nue yuac ge od xam obêc wib. Lêc xam obêc la vac Anutu kwa ngibi di vông i kiyang vô nôn lec ge od xam obêc kô nôn nivihã wê Anutu ob yê xam nêb xam xomxo nivihã ge. ¹⁷Om il ob hi vixad i pec ên Anutu, ên ilage xam dô vac môp nipaên kwa ngibi, lêc gwêbaga xam dô vac Anutu xolac kwa ngibi di xam vô ninyam lehe vô xolac di hôm xôn mi i yêp vac nilôm. ¹⁸Anutu vô xam vêl ên môp nipaên wê hôm xam xôn ilage, di xam tu Anutu nue yuac wê xam ob vông môp nivihã ge. ¹⁹Il ga xomxo kibun wê il o vyac xovô Anutu kiyang lêm, om kiyang wê a nêl lec nue yuac ge, a nêl i tiyi xocbê il mi nêl ge, ên a nêb i vông xovôên vô xam. Om kiyang yêp bêga nêbê ilage xam vông nilôm yuu nimnivi la vac môp wê ningeac yuu nipaên ge di xam pwoô Anutu kiyang vac luu vêl, om xam dô tiyi xocbê môp nipaên nue yuac xam. Lêc gwêbaga, xam dô tiyi xocbê Anutu nue yuac, om xam vông nilôm yuu nimnivi i loc vô môp nivihã di xam tu xomxo ngibua lec.

²⁰Vô buc ilage wê xam tu môp nipaên nue yuac ge, xam o dô vac môp nivihã kwa ngibi lêm. ²¹Môp wê xam mi vông ilage, xam kô nôn nivihã lec môp tige, me? Ma vêl, xam o kô nôn nivihã lec môp tige lêm. Ên môp tibêge ob vô nôn nipaên bêga bê xomxo ob yib lec, om gwêbaga xam nim yoc ên môp nipaên wê xam mi vông ilage. ²²Lêc Anutu vô xam vêl ên nipaên wê ku xam xôn ilage di xam tu Anutu nue yuac, om xam kô nôn nivihã bêga nêbê xam tu xomxo ngibua di xam ob dô mamvihã luta lêc luta. ²³Ên môp nipaên ob vông myaviwen nipaên vô xomxo bêga bê he ob yib. Lêc vizid wê Anutu vông pileva vô il ge bêga ên nêbê il lig Apumtau Yesu Kilisi lam yib ên il nêd nipaên om il ob dô madvihã luta lêc luta.

Il o dô vac Moses xolac kwa ngibi lêm

7 ¹Xam lige, a ob nêl kiyang ti vô xam lec Moses xolac wê xam mi ngô ge. Kiyang yêp bêga nêbê xomxo wê dô vac Moses xolac kwa ngibi ge, od ob dô vac i tiyi buc wê dô maviha ge di i la tyip vô buc wê ob yib ge, lêc obêc yib ge od ob dô vac Moses xolac kwa ngibi i tii vac lêm. Môp tige xam xovô pyap. ²Môp wê yêp kibun ga bêga nêbê vêx ti obêc kô vux ge od xolac nêl kitong ên nêbê vêx i dô hixôn liya i tiyi buc wê ob dô maviha ge. Lêc liya obêc yib ge od xolac wê nêl nêbê i dô vac liya kwa ngibi ge ob tip vac. ³Xolac nêl bêge, om liya obêc gên dô maviha di

vêx la kô vux paha ge, od xomxo ob nêl vêx tige nêbê vêx yôdac. Lêc liya obêc yib ge od xolac wê vêx la vac liya kwa ngibi ge tip vac, om vêx tige obêc kô vux ti ge od o tiyi xochê vông môm yôdac ge lêm. Nge, ge tiyi môm nivihâ.

⁴Om xam lige, kiyang tige nêl kiyang tixuuên lec il, ên Kîlisi yib om tiyi xochê il xib hixôn i di il o dô vac Moses xolac kwa ngibi lêm. Di gwêbaga il dô vac xomxo ngwe kwa ngibi. Ge a nêl lec Kîlisi ti wê Anutu tipi vô i vac yibên mi i kidi lec maviha, ên nêbê il vông i vin di il dô vac môm nivihâ wê Anutu vông ge. ⁵Ilage il timu vô môm tiyi wê icil va xovô ge, lêc kiyang wê yêp vac Moses xolac ge vông nipaên wê yêp vac il nilôd ge kidu il om il vông môm nipaên. Di nipaên vông yuac vac il nidnivi om vông il tulec nôn wê yibên ge. ⁶Lêc il xib hixôn Kîlisi om Anutu piwelac il vêl ên Moses xolac wê ku il xôn ge, om gwêbaga il ob vông yuac wê Anutu vông ge. Lêc il ob vông i tiyi môm tikwê wê yêp vac Moses xolac ge lêm. Nge, il ob vông i tiyi môm paha wê Myakilôhông Ngibua vông ge.

Nipaên vông il la vac yibên

⁷Om il ob nêbê va lec Moses xolacê? Il ob nêl bê xolac ge nipaên, me? Ma vêl, ên Moses xolac ge wê nêl môm nipaên kitong mi i yêp seac vô il. Om xolac nêl bêga ên nêbê, “Le i lêc doma vô xomxo ngwe susu lêm.” Xolac nêlên bêge obêc ma ge od xomxo ob so ên nêb môm madoên ge nivihâ. ⁸Xolac nêl môm madoên kitong yêp seac, om nipaên wê yêp vac il nilôd ge vông môm madoên viyang viyang ge vô levac vac il nilôd. Xolac obêc ma ge od xêkizêc wê nipaên vông ge obêc yêp lêm. Lêc xolac yêp om nipaên vông yuac vac il nilôd. ⁹Ilage a lungên xolac om a so ên a nêb mêd a dô nivihâ. Nang dêc a xovô xolac wê nêl môm nipaên kitong ge, om môm nipaên vông yuac vac a nilôg di a xovô ên a nêbê a xomxo mayibên. ¹⁰Ilage Anutu vông xolac vô xomxo ên nêb obêc timu vô ge od ob dô maviha. Lêc xolac tige o vông a dô magviha lêm. Nge, xolac tiyi xochê hi a xib. ¹¹Ên nipaên pilepac kiyang nivihâ wê yêp vac xolac ge vac di kityoo a, om vông a la vac môm yibên. ¹²Om il ob xovô bêga bê Anutu xolac ge ngibua, di kiyang toto wê yêp vac xolac ge, nivihâ di bôbac hixôn xêseac pileva.

¹³Om il ob nêl bêna lec xolacê? Il ob nêl bê kiyang nivihâ tige hi il xib, me? Ma vêl. Nipaên môci wê hi il xib. Ên nipaên pilepac xolac nivihâ vac di vông il la vac môm yibên, om môm nêl nipaên kitong i yêp seac, di xolac vông xovôên vô il bêga nêbê nipaên ge nipaên vixôhilôg nôn mêge.

Nipaên ku xenac kisuu il lec

¹⁴Il xovô ên il nêbê xolac ge, Myakilôhông Ngibua wê Anutu vông ge tu kehe, lêc a ga xomxo kibun wê a dô vac nipaên nilô. ¹⁵Om môm wê a mi vông ge, a o xovô kehe lêm. Ên môm nivihâ wê a nêb a ob vông ge, a

vôngên ma. Di môt nipaên wê a xona ên ge od a vông. ¹⁶Lêc a xona ên môt nipaên wê a vông ge, om vông xovôên vô a ên nêbê Moses xolac wê vibu môt nipaên tige nêl kiyang nô. ¹⁷Lêc ge aca va o vông môt nipaên ge lêm. Nge, nipaên wê yêp vac a nilôg ge môci vông. ¹⁸A xovô ên a nêbê a ga tibii kibun om môt nivihia ti o yêp vac a nilôg lêm. Om a nêb a ob vông môt nivihia lê, lêc a o vông i la tiyi lêm. ¹⁹Om môt nivihia wê a nêb a ob vông ge, a vôngên ma, di môt nipaên wê a nêb a vôngên obêc ma ge, od a vông. ²⁰Om môt nipaên wê a vông ge, ge o aca va vông lêm. Nge, nipaên wê yêp vac a nilôg ge môci vông.

²¹Mêgem môt yêp bêga nêbê a nêb a ob vông môt nivihia lê, lêc nipaên le vac môt xôn. ²²Vixôhilôg, a xêgyaa vin lec Anutu xolac tiyi buc vihati, ²³lêc nipaên yêp vac a nilôg hixôn om vông vevac vô kiyang nivihia wê yêp vac a nilôg ge, mêgem môt nipaên tige ku a xôn tiyi xocbê a dô vac kalabuhu ge. ²⁴A obêc bêna timuênê? A ga, a dô hixôn viyin levac, om letya obêc vô a vêl ên môt yibên tige? ²⁵A ob hi vixag i pec ên Anutu, ên wê vông il lig Apumtau Yesu Kilisi lam vô il vêl ên nipaên.

Mêgem môt yêp bêga nêbê a nilôg hixôn a piyôp kidu a nêb a timu vô Anutu xolac, lêc nipaên wê yêp vac a nilôg ge vông a la vac môt wê nipaên ge.

Kilisi kitya il nêd nipaên vêl di vông Myakilôhō Ngibua lam dô hixôn il

8 ¹Mêgem il wê il vông i vin Yesu Kilisi ge, myaviwen wê xomxo ob kô lec nêd nipaên ge, ti ob tulec il lêm. ²Ên ilage il dô vac môt nipaên yuu yibên, lêc Myakilôhō Ngibua vô il vêl di vông il dô madvihia hixôn Yesu Kilisi. ³Il kibun ga, il tibii nidpaên om xolac wê Moses vông ge o tiyi wê ob vô il vêl ên nipaên ge lêm. Xolac wê Moses vông ge o tiyi lêm, lêc Anutu vaci vô il vêl. Ên Anutu nêb ob kitya nipaên vêl om vông ici va nu tuc lam kibun di i lam kô ninivi kibun xocbê il xomxo kibun ga, di Anutu vông myaviwen wê il vông ge la vô i mi i kilê. ⁴Anutu vông bêge, ên nêb il timu vô môt nivihia wê xolac nêl ge di vông i vô nô lec. Om il ob la vô môt nipaên wê yêp vô icil va ge lêm. Nge, il ob la vô môt wê Myakilôhō Ngibua vông ge.

⁵Ên xomxo wê dô vac môt nipaên kibun ga ge, od he vông nilô la vô môt kibun ga, lêc xomxo wê dô vac môt wê Myakilôhō Ngibua vông ge, he vông piyôp hixôn nilô yen vihati yang la vô môt wê Myakilôhō Ngibua vông ge. ⁶Ên xomxo obêc vông nilô la vô môt kibun ga ge od obêc yib, lêc xomxo obêc vông nilô yen la vô môt wê Myakilôhō Ngibua vông ge od ob dô mavihia hixôn kiyang malehe. ⁷Ên xomxo wê vông nilô la vô môt kibun ga ge od tiyi xocbê vông vevac vô Anutu, ên kehe bêga nêbê xomxo tibêge o dô vac xolac wê Anutu vông ge kwa ngibi lêm, di ici va o tiyi wê ob la vac xolac kwa ngibi ge lêm. ⁸Mêgem xomxo wê timu vô môt nipaên kibun ga ge o tiyi wê he ob vông môt wê Anutu ob yê nivihia ge lêm.

⁹Lêc xam o dô vac môp nipaên kibun ga lêm. Nge, xam dô vac môp wê Myakilôhô Ngibua vông ge, ên Myakilôhô Ngibua dô vac xam nilôm. Lêc xomxo ti, Myakilôhô Ngibua wê Kìlisi vông ge obêc dô vac i nilô lêm ge od ob tu Kìlisi nu lêm. ¹⁰Xam nimnivi obêc yib lec nipaên, lêc Kìlisi obêc dô vac xam nilôm ge od xam kinum obêc dô maviha, ên wê Anutu yê xam nêbê xam xomxo nivihã ge. ¹¹Anutu tipì vò Yesu Kìlisi kidi lec vac yibên, om Myakilôhô Ngibua wê Anutu vông ge obêc dô vac xam nilôm ge od Anutu obêc vông Myakilôhô Ngibua tipì vò xam nimnivi wê ob yib ge kidi lec maviha nang.

Myakilôhô Ngibua vông il tu Anutu nue

¹²Xam lige, il nilôd obêc kidu il ên nipaên ge od le i lêc vông i vò nôn lec lêm. ¹³Ên il obêc dô vac môp wê il nilôd nipaên xovô ge od il ob xib. Lêc il obêc ngiloo môp nipaên la vêl ya xêkizêc wê Myakilôhô Ngibua vông ge od il ob dô madviha.

¹⁴Xomxo wê timu vò môp wê Myakilôhô Ngibua vông ge, he tu Anutu nue. ¹⁵Ên Anutu o vông Myakilôhô Ngibua vò il ên nêb il dô i tiyi xocbê xomxo wê nipaên hòm he xôn di he xona ge lêm. Nge, Myakilôhô Ngibua wê Anutu vông vò il ge vông il tu Anutu nue nôn, di xêkizêc wê Myakilôhô Ngibua vông ge vông il keac vò Anutu ên il nêbê, “Mag.” ¹⁶Myakilôhô Ngibua nêl kitong vac il nilôd ên nêbê il Anutu nue. ¹⁷Il ge Anutu nue, om vizid wê nu tuc Yesu kô vò ma Anutu ge, il obêc kô hixôn. Ên il obêc kô myavinê tiyi xocbê Kìlisi ge od il ob la dô vac xêseac hixôn Kìlisi timuên.

Il ob dô vac xêseac timuên

¹⁸A xovô ên a nêbê viyin wê il tulec gê kibun ga, ge o susu levac ti lêm. Ge susu pileva. Dom xêseac wê Anutu ob vông vò il timuên ge, levac luu vêl. ¹⁹Om kibun hixôn susu vihati yang wê Anutu tung ge, he dô bin buc timuên wê Anutu ob vông xêseac vò nue il ge. ²⁰Ên susu vihati ge vò nipaên di o vò nôn nivihã lêm. Lêc susu vaci o nêb ob dô bêge lêm. Nge, Anutu ku he xôn nêb he i dô bin buc wê ob val timuên ge. ²¹Ên gwêbaga susu kibun ga dô vac nipaên hixôn pitalên, om tiyi xocbê Anutu ku he xôn, lêc obêc buc timuên ge od Anutu obêc piwelac he vêl di vông he la dô vac nivihã hixôn i nue, di nipaên ti ob hòm he xôn i tii vac lêm.

²²Il xovô ên il nêbê susu wê Anutu tung ge vihati dô vac viyin yuu myavinê om iac, tiyi xocbê vêx wê nu ob yubac om yaxên myavinê ge, om môp ge yêp ila di val tyip lec gwêbaga hixôn. ²³Lêc o susu kibun vaci wê yaxên myavinê ge lêm. Nge, il êno, il yaxên myavinê. Vixôhîlôg, Anutu vông vizid taxlee vò il bêga, wê vông Myakilôhô Ngibua lam dô hixôn il, lêc il gên dô vac viyin kibun ga, om il dô bin buc wê Anutu obêc vông il midnivi kidi lec di vông il dô tiyi xocbê i nue ge. ²⁴Anutu vò il vêl

ên nipaên om il dô bin kiyang wê Anutu nêb ob vô nôn lec vô il ge. Ên kiyang tige obêc vô nôn lec pyap ge od il ob dô bin kiyang tige lêm. Ên susu wê il xê madnôn lec nôn pyap ge od o tiyi wê il ob dô bin ge lêm. ²⁵Lêc kiyang wê gên o vô nôn lec lêm ge, il ob dô bin di il nid ob ma lec lêm, ên il vông i vin ên il nêbê obêc vô nôn lec timuên.

²⁶Xêkizêc wê il vông ge o tiyi lêm, lêc Myakilôhô Ngibua môci ngidu il xôn. Ên il o vvac xovô kiyang wê il ob kitaa vô Anutu ge lêm, om Myakilôhô Ngibua kô il myad mi la nêl ên nêb Anutu i ngidu il xôn. Lêc vya ti wê Myakilôhô Ngibua kô mi la ge nginoo kiyang wê xomxo nêl ge vêl. ²⁷Anutu ge wê xovô kiyang vihati wê yêp vac xomxo nilô ge om ob xovô kitaaên wê Myakilôhô Ngibua vông ge kehe, ên Myakilôhô Ngibua kitaa tiyi xocbê xovôên wê Anutu vông ge ên nêb Anutu i ngidu nue il xôn.

²⁸Il xovô ên il nêbê il wê il xêdyaa vin lec Anutu ge, nivihya yuu xôn viyin obêc tulec il, lêc Anutu obêc vông vihati i vô nôn nivihya vô il, ên il ga wê Anutu xovô pyap nêb ob kô il ge, om tyuc il lam. ²⁹Ên xomxo wê Anutu xovô he pyap ilage ge, Anutu vinoo he nêb he i tu xomxo tiyi xocbê nu tuc Yesu ge, êdêc Yesu i tu xocbê he li tuc di he i tu xocbê Yesu lie. ³⁰Di xomxo wê Anutu vinoo he ge od tyuc he nêb he i tu i nue, di xomxo wê Anutu tyuc he ge od kitya he nêb nipaên vêl di yê he nêb he xomxo nivihya, di xomxo wê Anutu yê he nêb he xomxo nivihya ge od vông he la dô vac xêseac wê i vông ge.

Xêyaa vin lecên wê Anutu vông ge ob sea il lêm

³¹Anutu môp wê vông vô il ge bêge, om il ob nêb va? Anutu ge wê ob ngidu il xôn, om xomxo ti o tiyi wê ob vông il vô nipaên ge lêm. ³²Anutu o xona ên wê ob vông nu tuc lam kibun ge lêm. Nge, vông i lam ên nêb i hôm il lec. Anutu vông ici va nu tuc lam, om il ob xovô hixôn bêga bê Anutu obêc vông vizid tibeac mangwe lam pileva hixôn vô il.

³³Xomxo wê Anutu vinoo he mi he tu i nue ge, letya ob so kiyang ti lec he? Xomxo ti tiyiên ma, ên Anutu vaci yê he nêbê he xomxo nivihya wê nipaên ti o yêp vô he ge lêm. ³⁴Om letya ob nêl nêbê xomxo vông vinên ob kô myaviwen nipaênê? Xomxo ti o tiyi wê ob nêl ge lêm, ên Yesu Kilisi yib mi kidi lec mavihya nang, di lax dô vô Anutu vigê hiyôv di kitaa vô Anutu ên nêb i ngidu il xôn.

³⁵Môp tinae wê ob vô il vêl ên xêyaa vin lecên wê Kilisi vông ge? Môp ti o yêp lêm. Ên il obêc tulec viyin yuu myavinê, di tibii ob vông viyin vô il, me vip ob den il, di il nêd ngakwi ob ma, me susu ya ob vông il vô nipaên, di xomxo ob vông vevac vô il ge od susu tige o tiyi wê ob vô il vêl ên xêyaa vin lecên wê Yesu Kilisi vông ge lêm. ³⁶Vixôhîlôg, il ob tulec viyin, i tiyi xocbê kiyang wê yêp vac xolac bêga nêbê,

“Anutu, xe tu ông nume, om tiyi lec buc vihati xomxo nêb ob hi xe xib lec vông vinên wê xe vông ge. He yê xe tiyi xocbê bwoc sipsip wê he ob hi i yib ge.”

³⁷Kiyang nêl bêge, lêc viyin ge susu vidaaên. Ên Yesu xêyaa vin lec il di vông xêkizêc vô il, om il ob yax mang vô viyin wê ob tulec il ge di le xêkizêc ya vông vinên. ³⁸Ên a xovô vinux ên a nêbê susu ti o tiyi wê ob vô il vêl ên xêyaa vin lecên wê Anutu vông ge lêm. Om il obêc xib me il obêc dô madviha ge od xêyaa vin lecên wê Anutu vông ge ob sea il lêm. Di angela wê dô kisii ganê hixôn xomxo levac kibun ga, di susu wê dô gwêbaga hixôn susu wê ob val timuên, di xêkizêc wê susu viyang viyang ge vông, ³⁹di susu wê dô vac lag hixôn susu wê dô lec kibun, di susu yaya hixôn, susu tigege vihati o tiyi wê ob vô il vêl ên xêyaa vin lecên wê Anutu vông ge lêm. Ên il dô vac xêyaa vin lecên wê Anutu vông ge lec yuac wê il lig Apumtau Yesu Kilisi vông ge.

Pol nilô vô viyin ên wê lie Islel vô nîmi vô Yesu ge

9 ¹A ga Kilisi nu a, om kiyang wê a ob nêl vô xam ge o kiyang kityooên lêm. Nge, a nêl kiyang nôn, di Myakilôhō Ngibua ngidu kiyang wê yêp vac a nilôg ge xôn, ²om a nêl kiyang bêga ên a nêbê a nilôg vô viyin levac di a dô hixôn viyin tiyi buc vihati ên a lige Islel. ³Ên a nêb Anutu i vô a lige wê xe kehe tîbed ge vêl, om a nêb obêc tiyi ge od a ob kilê myavinê lec nîpaên wê he vông ge di Kilisi i kitya a vêl ên i ngidu a lige xôn. ⁴Ên xomxo Islel ge, Anutu vînoo he nêb i nue, di xêkizêc hixôn xêseac wê Anutu vông ge lam le seac vô he mi he yê, di Anutu hilu kiyang vô he di vông xolac vô he, di nêl môp wê he ob si daa di kitaa vô Anutu ge, di hilu kiyang ya hixôn vô he, ⁵di he ge wê he pum lec Eblaham yuu Aisak di Jekop wê he bue taxlee ge, di Yesu lam tu xomxo gê kibun ga ge od kehe yêp vac Islel. Kilisi ge Anutu, di ici va tu susu vihati kehe, om il ob pimil i lê i vô levac di i yêp luta lêc luta. Nôn.

Anutu ob vînoo xomxo ya, ya xovôên wê ici va vông ge

⁶Vixôhilôg, xomxo Islel vô nîmi vô Anutu kiyang, lêc kiyang wê Anutu hilu vô he ge o tiyi wê ob sea he ge lêm. Ên kiyang tige obêc vô nôn lec vô he Islel nôn. Lêc xomxo wê kô lê Islel ge, he ya o tu Anutu nue Islel nôn lêm. ⁷Di xomxo wê pum lec Eblaham ge, he ya o tu Eblaham nue nôn lêm, xochê kiyang wê Anutu nêl vô Eblaham bêga ên nêbê, “He kidu ti wê nêbê num Aisak bue ge, heche va ob tu ông nume.” ⁸Kiyang tige kehe bêga nêbê nipwo wê Eblaham vaci kô ya xovôên wê i vông ge, he o tu Anutu nue lêm. Lêc nu Aisak wê Eblaham kô tiyi kiyang wê Anutu hilu vô i ge od Anutu yê nêbê Eblaham nu nôn. ⁹Kiyang wê Anutu hilu vô Eblaham ge bêga nêbê, “Buc wê a vînoo pyap ge, a obêc lôm lam i tii vac, di vînêm Sela obêc kô num ti.”

¹⁰Nang dêc Anutu nêl kiyang ngwe vô Lebeka lec nu Jekop yuu Iso. Nu yuu ge, yuu ma Aisak wê il bug. ¹¹Nu yuu gên o yubac lêm, om yuu gên o vông môp nivîha me nîpaên ti lêm. Lêc Anutu xovô nêb ob vînoo

nu yuu ngwe i tiyi xocbê xovôên wê ici va vông ge, om o dô mi yê môt wê yuu vông ge léc vînoo ngwe lêm. Nge, vînoo ngwe tax, di nu yuu gên o yubac lêm ¹²od Anutu nêl kiyang tax vô Lebeke ên nêbê, “Num tuc ob vông yuac vac num môn kwa ngibi.” ¹³Om kiyang yêp vac xolac bêga ên nêbê, “A xêgyaa vin lec Jekop, léc Iso ge a xêgyaa o vvac vin lec i lêm.”

¹⁴Om il ob nêb va? Il ob xê Anutu môt wê vînoo xomxo ge ên il nêb tiyiên ma, me? Ma vêl. ¹⁵Ên kiyang wê Anutu nêl vô Moses ge yêp bêga nêbê, “A obêc nêb vông nivîha vô xomxo ti ge od a ob vông vô i, di a obêc nêb xo vîgwe pisiv ên xomxo ti ge od a obêc xo vîgwe pisiv ên i.” ¹⁶Om il ob xovô bêga bê Anutu obêc vînoo xomxo ti ge od o kehe lec xovôên hixôn yuac nivîha wê xomxo tige vông ge lêm. Nge, Anutu vaci xo vîgwe pisiv ên xomxo tige om vînoo. ¹⁷Tiyi xocbê kiyang wê Anutu nêl vô Pelo mi i yêp vac xolac bêga ên nêbê, “A vông lê levac vô ông di vông tixuu tixuu tibeac vô ông, ên a nêbê xêkizêc wê a vông ge i yêp seac di xomxo tibeac i yê di nêl a lêg i vô levac vac vîgwe vîhati.” ¹⁸Om il ob xovô bêga bê Anutu obêc nêb xo vîgwe pisiv ên xomxo ti ge od obêc xo vîgwe pisiv ên i, di obêc nêb vông xomxo i hîngoo kiyang wê i nêl ge od xomxo tige obêc hîngoo kiyang wê i vông ge.

Anutu xêyaa myavinê hixôn xêyaa vin lecên

¹⁹Mêd xam ti obêc nêl vô a bê, “Anutu vông xomxo ya hîngoo i kiyang om bêna léc Anutu ob nêl bê nîpaên yêp vô heê? Xomxo ti tiyiên ma wê ob le vac Anutu kiyang xôn ge.” ²⁰Léc a ob nêl vô xam bê xomxo letya wê ob luu kiyang vô Anutu ge? Dêg kibun o tiyi wê ob kunac xomxo ti wê pitii i ge di nêl bê “Bêna léc ông

pitii a tibêga?” ge lêm. ²¹Ên xomxo ti wê pitii dêg ge ob pitii i tiyi xovôên wê ici va vông ge, om hôm kibun nipwo ti di pitii dêg yuu, ngwe tiyi xocbê dêg nivîha di ngwe tiyi dêg nîpaên. Léc môt tige tiyi.

²²Di môt wê Anutu vông ge yêp bêga wê nêl lec dêg. Ên Anutu nêb ob hilung xêyaa myavinê hixôn xêkizêc wê i vông ge i yêp seac. Om dêg nîpaên wê Anutu xêyaa vô myavinê vô he nêb ob kitya he vêl ge, Anutu o vông myaviwen vô he lutibed lêm. Nge, hôm he nêb nîpaên xôn mi i yêp dia. ²³Anutu vông bêge, ên nêb ob vông xêseac wê i vông ge lam hîvun dêg nivîha xôn. Dêg tige wê Anutu pitii ên nêb ob xo vîgwe pisiv ên he di vông he i dô vac xêseac wê i vông ge. ²⁴Dêg nivîha ge tiyi xocbê il wê Anutu tyuc il. Il ya xomxo Yuda, léc Anutu o tyuc xomxo Yuda vaci lêm. Nge, tibii wê o Yuda lêm gee tibeac hixôn.

²⁵Tiyi xocbê Anutu vya wê yêp vac kipihac wê plopet Hosea kivuu ge bêga nêbê,

“Xomxo wê he o tu a nuge ilage lêm ge, od a ob nêl bê a nuge he hixôn, di xomxo wê a xêgyaa o vin lec he ilage lêm ge od a xêgyaa ob vin lec he hixôn. ²⁶Di vîgwe ti wê he dô vac di a nêl vô he ên a

nêbê he o a nuge lêm ge, od vac vigwe tige a ob nêl bê, ‘A, Anutu magviha, nuge he.’ ”

²⁷Nang dèc plopet Aisaia kivuu kiyang lec xomxo Islel mi i yêp bêga ên nêbê,

“Xomxo Islel obêc vô tibeac hiwocên tiyi xocbê luda wê dô vô gwec ninya ge, lêc Anutu obêc kô he yuu bed mi la vô i. ²⁸Ên Apumtau obêc yaxên xomxo vihati nêl kiyang lec buc timuên di vông myaviwen lutibed vô he.”

²⁹Mêd Aisaia nêl kiyang ngwe tii vac nang ên nêbê,

“Apumtau wê xêkizêc kehe ge obêc kitya il buge vihati vêl ilage ge od gwêbaga il obêc ma, tiyi xocbê tibii Sodom yuu Gomola ge.”

Xomxo Islele o vông i vin Kilisi lêm

³⁰Om il ob nêl bêna? Il ob xovô bêga bê xomxo wê o Islel lêm gee, he nilô yen o myag môp nivihha wê Anutu ob yê nêb he xomxo nivihha ge lêm, lêc he vông i vin Kilisi om Anutu yê he nêb he xomxo nivihha. ³¹Di xomxo Islel timu vô xolac wê Moses vông ge di vông yuac levac lec, ên nêb Anutu i yê he nivihha, lêc môp wê he vông ge o tiyi lêm. ³²Môp wê he vông ge o tiyi lêm, ên he o nêl ên he nêbê Anutu i yê he nivihha lec vông vinên lêm. Nge, he so ên he nêbê yuac wê he vông ge obêc vông Anutu yê he nêb he tibii nivihha, di he o vông i vin Yesu lêm. Om Yesu ge tiyi xocbê ngidax wê he vinux vixa lec, ³³tiyi xocbê kiyang wê yêp vac xolac bêga nêbê,

“Xam wê lê. Vac vigwe Saion a ob lax ngidax ti wê xomxo obêc vinux vixa lec di tili ge. Lêc xomxo ti obêc vông i vin ngidax tige ge od vông vinên wê i vông ge obêc pileva lêm. Nge, ob vô nivihha vô i.”

Môp wê xomxo Islel dô vac ge o vô nivihha vô he lêm

10 ¹Xam lige, a nêb Anutu i vô a lige Islel vêl ên he nêl nipaên, om a kitaa vô Anutu ên he tiyi lec buc vihati. ²A xovô môp wê he vông ge om a nêl he kitong ên a nêbê he xêyaa vin lec nêb he ob timu vô Anutu kiyang lê, lêc he o vyac xovô môp wê Anutu vông ge lêm. ³Ên môp wê Anutu ob yê xomxo nêb he xomxo nivihha lec vông vinên ge, he Islel lungên môp tige, om he o la vac môp tige kwa ngibi lêm. Nge, he dô vac môp wê timu vô Moses xolac ge ên nêb Anutu i yê he nivihha lec môp tige. ⁴Lêc Kilisi hi xolac wê Moses vông ge tip la vêl, om gwêbaga xomxo obêc vông i vin Kilisi ge od Anutu ob yê he nêb he xomxo nivihha.

Anutu nêb xomxo vac vigwe vihati i vông i vin Kilisi

⁵Ilage Moses kivuu kiyang lec môp wê Anutu ob yê xomxo nivihha ên wê he timu vô Moses xolac ge, om kiyang yêp bêga nêbê, “Xomxo ti obêc

timu vô kiyang tigae vihati ge od ob vông he dô maviha.” 6-7 Lêc môp wê Anutu ob yê xomxo nêb he xomxo nivîha lec vông vinên ge o bêge lêm. Ên kiyang yêp bêga nêbê, “Le i lêc xo vac nilô bêga bê, ‘Letya ob lec mi la lag puunê?’, di le i lêc nêl bê, ‘Letya ob la vac vigwe yibênê?’ ” Le i lêc nêl bêge lêm, ên Kîlisi lop mi lam kibun pyap di kidi lec vac yibên pyap. 8 Om kiyang wê nêl lec môp vông vinên ge yêp vac xolac bêga nêbê, “Anutu xolac yêp vô xam pyap, tiyi wê xam ob xovô vac piyôp di nêl vac myam ge.” Kiyang tige nêl lec xolac wê xe mi nêl vô xam ên xe nêbê xam vông i vin ge. 9 Om xomxo ti obêc nêl Yesu kitong seac vac mya bêga ên nêbê, “Yesu ge Apumtau” di obêc vông i vin nêbê Anutu tiyi vô Yesu kidi lec vac yibên ge od Anutu obêc kitya i nêl nipaên vêl. 10 Ên il obêc vông i vin ge od Anutu ob yê il nêb il xomxo nivîha, di il obêc nêl vông vinên kitong i yêp seac vac myad ge od Anutu ob kitya il nêd nipaên vêl di vông il dô vac nivîha.

11 Di kiyang ti yêp vac xolac bêga nêbê, “Xomxo ti obêc vông i vin Yesu ge od vông vinên wê i vông ge obêc pileva lêm. Nge, ob vô nivîha vô i.” 12 Kiyang tige nêl lec xomxo vihati yang, ên Anutu ob yê xomxo Yuda hixôn tibii ba vihati tiyima, ên Apumtau ge xomxo vihati yang, he Apumtau, om obêc vông vizid nivîha vô xomxo vihati wê he kiyag vya lec i ge. 13 Tiyi xobê kiyang wê yêp vac xolac bêga ên nêbê, “Xomxo ti obêc kiyag vya lec Apumtau ge od Apumtau obêc vô i vêl ên nipaên di vông i dô vac nivîha.” 14 Lêc xomxo obêc vông i vin Yesu lêm ge od he obêc kiyag vya lec i bêna? Di he obêc ngô Yesu kiyang lêm ge, od he ob vông i vin bêna? Di xomxo obêc la nêl kiyang tige vô he lêm ge, od he ob ngô kiyang tige bêna? 15 Di Anutu obêc vông xomxo la nêl xolac lêm ge, od xomxo ob nêl xolac tibêna? Ên kiyang yêp vac xolac bêga nêbê, “Xomxo obêc kô xolac mi lam nêl vô il ge od nivîha yang.”

Islel ngô xolac lê, lêc he o vông i vin lêm

16 Xomxo Islel ngô xolac lê, lêc he tibeac o vông i vin lêm, tiyi xobê kiyang wê plopet Aisaia kivuu mi i yêp vac xolac bêga nêbê, “Apumtau, xomxo vihati ge, he o vông i vin kiyang wê xe nêl ge lêm.” 17 Om il ob xovô bêga bê xomxo obêc vông i vin ge od kehe bêga nêbê he ngô xolac, di xolac wê he ngô ge, xomxo nêl Kîlisi kitong vô he.

18 Om a ob kinêg vô xam bêga bê xomxo Islel ge, he ngô xolac, me he ngôên ma? He ngô pyap ila, ên kiyang yêp vac xolac bêga nêbê,

“Xomxo kô xolac mi la nêl vac vigwe viyang viyang, di kiyang wê he nêl ge la tiyi kibun myahîpu vihati yang.”

19 Om a ob kinêg kiyang ngwe hixôn vô xam bêga bê xomxo Islel ge, he lungên xolac tige, me? He o lungên lêm. Nge, he xovô pyap, lêc he o vông i vin lêm. Om Anutu nêl kiyang vô he Islel mi i yêp vac kipihac wê Moses kivuu ilage bêga nêbê,

“Tibii madiluhu gee, xam wê he tiyi xocbê xomxo pileva wê piyôp maên ge, léc a ob vông he tu a nuge di vông vizid vô he, om xam obêc wê he nipaên di kunac he.”

²⁰Nang dèc Aisaia nêl Anutu vya yêp seac bêga ên nêbê,

“Xomxo wê o myag a ilage lêm ge, od gwêbaga he xovô a, di xomxo wê o kinêg a lêm ge, od a hilung a vô he.”

²¹Lêc Anutu nêl kiyang lec xomxo Islel bêga ên nêbê,

“A tyuc he tiyi buc vihati ên a nêb he i lam vô a, léc he vô ninya kitu vô a di pwoo a vyag vac.”

Anutu xo vîgwe pisiv ên Islel vilu bed

11 ¹Om a ob kinêg vô xam bêga bê Anutu ngiloo i nue Islel vihati vêl, me? Ma vêl. Xam wê lê. A ga, a êno xomxo Islel ti wê a pum lec Eblaham di a kehe yêp vac Bensamin. ²Anutu o ngiloo nue Islel wê vînoo he ilage lêm. Kiyang wê Ilaija nêl vô Anutu mi i yêp vac kipihac xolac ge, xam mêd lungên, me? Ên Ilaija kitaa vô Anutu di nêl lie Islel nêl nipaên kitong bêga ên nêbê, ³“Apumtau, he hi ông nume plopete yib di dii ông alta wê ob si daa lec ge vêl. Lêc a tîbed gên dô om he myag a ên nêb ob hi a xib.” ⁴Di Anutu nêl kiyang tina vô Ilaija? Anutu nêl vô i ên nêbê, “O ôcông tîbed lêm. Ên a nuge 7,000 gên dô wê a vînoo he pyap ge wê he o yev vixa kitu vô anutu mayibên Bal ge lêm.”

⁵Om môp tibêge yêp gwêbaga hixôn, ên gwêbaga he Islel viwen dô wê Anutu nue ge, ên Anutu xo vîgwe pisiv ên he di vînoo he. ⁶Lêc Anutu o vînoo he ên yuac nivîha wê he vông ge lêm. Nge, ici va vînoo he tiyi xocbê vông vizid pileva vô he ge. Ên Anutu obêc vông vizid vô he lec yuac nivîha wê he vông ge od obêc tiyi xocbê he kisuu ya yuac nivîha wê he vông ge. Lêc o ngwe bêge lêm. Nge, Anutu vaci vông pileva vô he.

⁷Om il ob xovô bêga bê xomxo Islel myag môp wê Anutu ob yê he nivîha lec ge, léc he o tulec lêm. He vilu bed wê Anutu vînoo he ge, he tulec. Dom he tîbeac vô ninya kitu vô Anutu kiyang, ⁸tiyi xocbê kiyang wê yêp vac xolac bêga nêbê,

“Anutu vông he ni lô tiyi xocbê he yêp ge om he manôn o yê susu ti lêm, di he ninya o ngô kiyang ti lêm, om he dô lung lung di i val tyip lec gwêbaga hixôn.”

⁹Nang dèc Devit êno nêl kiyang lec he Islel bêga nêbê,

“Vizid wê he myêl mi ya ge, i tiyi xocbê pulac wê he ob vac ge, me xocbê lôva wê he ob tô di vac kipêd ge, me leac wê ob ku he xôn ge, ên i vông myaviwen vô he. ¹⁰Di he manôn i toc, ên he i o léc yê vîgwe lêm, di viyin levac i tulec he di he i kilê tiyi buc vihati.”

Anutu ob kô he wê o Islel lêm ge vêl

¹¹Xomxo Islel o vông i vin Yesu lêm, om tiyi xocbê he tô mi la, om a ob kinêg vô xam bê he ob tô mi la dô xel, me? Ma vêl. Ên he pwoo kiyang

vac, om Anutu vông vizid la vô tibii ba di vô he vêl ên he nêl nipaên. Mêgem xomxo Islel obêc yê vizid nivihâ wê Anutu vông vô tibii ba ge od obêc vông he nilô yen yetac di he ob lôm vô Anutu. ¹²Xomxo Islel pwo kiyang vac, mêgem Anutu vông vizid levac la vô tibii viyang viyang, om he Islel vihati obêc pilepac he di lôm vô Anutu ge od Anutu ob vông vizid levac lax mi la vô he vihati luu vêl.

¹³A ob nêl kiyang ti vô xam wê xam o Islel lêm ge. Anutu vinoa a nêl a nêl xolac vô xam wê o Islel lêm ge, om a xêgyaa nivihâ ên yuac tige, ¹⁴ên a nêl mêd a lige Islel ob yetac ên vizid wê xam kô vô Anutu ge di he ya ob pilepac he di lôm vô Anutu ên i ngidu he xôn. ¹⁵Anutu ngiloo Islel vêl di la vô tibii ba ên nêb he i tu i nue, om Anutu obêc vông he Islel lax tu i nue nang ge od obêc tiyi xocbê Anutu tiyi vô he kidi lec mavihâ vac yibên.

¹⁶Xomxo ti obêc kô blet nipwo ti mi la kitaa lec ge od blet vihati ge tu Anutu xe. Di xomxo ti obêc kô xax ngilôhê ti mi la kitaa lec ge od xax ngen vihati ge tu Anutu xe. Kiyang tige nêl lec xomxo Islel, ên Anutu nêl vô Eblaham ilage nêbê i tu ixe, om Eblaham bue tivae ob tu Anutu xe hixôn.

¹⁷Di a ob nêl kiyang pilepacên ti lec xax oliv. Ên xomxo Islel ge tiyi xocbê xax oliv wê Anutu vaci tung he ge, di xam wê xam o Islel lêm ge, xam tiyi xocbê xax oliv wê vimen ge. Mêd Anutu xoo ngen ya vêl ên xax wê ici va tung ge, di la kô xax ngen wê vimen ge di lam yev lec di ku xôn. Om xam dô di kô vizid wê xomxo Islel vông ge tiyi xocbê xax ngen kô hizi vô xax yatôv ge. ¹⁸Om xam o léc wê ngen wê Anutu xoo vêl ge nipaên lêm, di xam o yong xam lêm. Ên xam ge ngen pileva dom xam o viac xax ngilôhê lêm. Nge, xax ngilôhê viac xam.

¹⁹Lêc mêd xam ya obêc nêl bêga bê, “Xe ga, Anutu xoo ngen ya vêl ên nêb ob yev xe la le vac he nipilêhê.” ²⁰Xam nêl vixôhilôg, ên Anutu xoo he Islel vêl ên wê he o vông i vin lêm ge di yev xam la le vac he nipilêhê ên wê xam vông i vin ge. Lêc xam o léc yong xam lêm. Nge, xam viac xam di xona nêl. ²¹Ên Islel ge tiyi xocbê ngen wê nôl ge, léc Anutu o vông he le lêm. Nge, xoo he vêl. Om xam obêc sea vông vinên ge od Anutu obêc vông xam le lêm. Nge, obêc xoo xam vêl hixôn êno. ²²Om xam wê lê. Anutu ge wê ob vông vizid vô xomxo di obêc vông myaviwen nipaên vô xomxo êno. Om xomxo wê vông môp nipaên ge, Anutu ob vông myaviwen nipaên vô he, léc xam mô ge, Anutu vông vizid vô xam. Om xam dô vac vizid tige nilô, ên xam obêc sea ge od Anutu obêc xoo xam vêl. ²³Di xomxo Islel obêc pilepac he di vông i vin ge od he ob lax le vac xax tige i tii vac, ên Anutu tiyi wê ob yev he lax le vac nipilêhê ge. ²⁴Xam tibii ba, ilage xam dô tiyi xocbê xax oliv wê vimen ge ngen, léc Anutu xoo xam vêl di yev xam le vac xax xumac wê xam o le vac ilage lêm. Om Anutu tiyi wê obêc kô Islel wê xoo vêl ge mi lax yev vac xax oliv wê he le vac ilage.

He Islel obêc pilepac he di vông i vin tii vac

²⁵Xam lige, kiyang wê yêp xôpacên ilage, a nêb a ob nêl kitong vô xam, êdêc xam o lêc yong xam di nêl bê xam xovô kiyang vihati lêm. Om kiyang wê yêp xôpacên ilage bêga nêbê, xomxo Islel vô ninya kitu vô Anutu kiyang, di obêc mîla vô buc wê tibii ba tibeac obêc pilepac he mi la vô Anutu ge od Islel vông môp wê vô ninya kitu vô Anutu kiyang ge obêc tip la vô buc tige, ²⁶di Anutu obêc vô he Islel vihati vêl. Tiyi xocbê Anutu vya wê yêp vac xolac bêga nêbê,

“Xomxo ti wê ob hôm xomxo lec ge obêc val vac vigwe Saion, di obêc vô xomxo wê Jekop bue tivae ge vêl ên he nêl nipaên. ²⁷Di a ob kitya he nêl nipaên vêl, tiyi xocbê kiyang wê a hilu vô he ge.”

²⁸Xomxo Islel o vông i vin Yesu xolac lêm, om tiyi xocbê he vông vevac vô Anutu di Anutu yê he nipaên, om Anutu vông vizid loc vô xam wê tibii ba ge. Lêc Anutu xêyaa vin lec Islel ên wê vînoo he ilage, om xovô kiyang wê hilu vô he bue ilage, di o sea he lêm. ²⁹Ên Anutu obêc vînoo xomxo di vông vizid vô he ge od obêc hôm i kiyang xôn di ob sea lêm.

³⁰Xam wê xam o Islel lêm ge, ilage xam pwoo Anutu kiyang vac, lêc gwêbaga Anutu xo vigwe pisiv ên xam, ên he Islel pwoo kiyang vac, om Anutu vông xêyaa vin lecên wê i vông ge loc vô xam. ³¹Gwêbaga he Islel pwoo Anutu kiyang vac, lêc obêc timuên ge od xêyaa vin lecên wê Anutu vông ge ob la vô he tiyi xocbê val vô xam gwêbaga. ³²Ên Anutu yê wê xomxo vihati pwoo i kiyang vac ge om vông he vihati dô tiyi xocbê he dô vac kalabuhu ge. Anutu vông bêge, ên nêb obêc xo vigwe pisiv ên he vihati timuên.

Il ob pimil Anutu lê

³³Piyôp yuu xovôên wê Anutu vông ge, levac mabu luu vêl. Xomxo ti o tiyi wê ob xovô piyôp wê Anutu vông ge kehe lêm, di ti o tiyi wê ob xovô môp wê i vông ge kehe êno lêm. ³⁴Tiyi xocbê kiyang wê yêp vac xolac bêga nêbê,

“Letya xovô kiyang wê yêp vac Apumtau piyôp ge? Di letya vông xovôên vô i? ³⁵Di letya vông susu ti vô Anutu tax ên nêb i lêc vông vacê? Ma vêl.”

³⁶Anutu vaci tu susu vihati yang ge kehe, om susu vihati yang ge tiyi xocbê ici va xe, wê ob vông i lê i vô levac. Om il ob pimil i lê i vô levac di i yêp luta lêc luta. Nôn.

Il ob vông icil va vô Anutu i tiyi xocbê daa

12 ¹Xam lige, Anutu xo vigwe pisiv ên il di vông vizid levac vô il, om a nêl vô xam bê xam vông xam i loc yadiluhu vô Anutu i tiyi xocbê daa ngîbua wê maviha ge, ên Anutu i yê nivîha. Ên xam obêc

vông môt tibêge ge od môt tige tiyi xocbê xam hi vixam pec ên Anutu di pimil i lê. ²Di xam o léc timu vô môt xocbê xomxo kibun ga mi vông ge lêm. Xam vông piyôp yuu nilôm i loc vô Anutu, ên i pilepac xam nilôm yuu piyôp i vô paha lec, êdêc xam xovô môt wê Anutu xêyaa vin lec nêb il timu vô ge, ên môt tige nivihia yuu xêseac tiyi wê ob vông Anutu xêyaa vô nivihia vô il ge.

Il ob vông yuac ya xovôên wê Anutu vông vô il ge

³Anutu vông yuac sinale vô a tiyi xocbê vizid nivihia ge, om a nêb a ob nêl vô xam vihati bêga bê xam o léc xo bê xam ge tibii levac me tibii nivihia i luu vêl lêm. Xam vyac xovô xam lê, di xam toto ge yaxên vông vinên wê Anutu vông vô xam ge di xovô yuac wê xam ob vông ge. ⁴Ên il xovô ên il nêbê xomxo tived, léc ninivi toto. Léc vihati o vông yuac tived lêm. Nge, toto ge he vông yuac wê yêp vô he ge. ⁵Di il ga, il tiyi xocbê ngang ngang tibeac, léc Kilisi vông il lax tu ninivi nôn tived. Om il ngang toto ge, il ob vông yuac di ngiduma xôn di i tu ninivi nôn tived.

⁶Anutu vông xovôên hixôn yuac toto vô il tiyi xocbê vizid wê vông pileva vô il ge, om il toto ge il ob vông yuac ya. Di Anutu obêc vông xovôên vô xomxo ti nêb i nêl xolac ge, od xomxo tige i nêl xolac i tiyi xocbê vông vinên wê yêp vô i ge. ⁷Di Anutu obêc vông xovôên vô xomxo ti ên nêb i ngidu lie xôn ge, od i xovô yuac wê ob ngidu lie xôn ge. Di Anutu obêc vông xovôên vô xomxo ti ên nêb i tixuu lie ya xolac ge od i vông yuac wê ob tixuu lie ge. ⁸Di Anutu obêc vông xovôên vô xomxo ti nêb i ngidu vông vinên wê lie vông ge xôn ge od i ngidu lie xôn nivihia. Di xomxo ti obêc vông susu vô lie ge od i vông tibeac vô he. Di xomxo ti obêc kô yuac wê ob viac lie ge od i xêyaa i vin lec yuac tige. Di xomxo ti obêc xo vigwe pisiv ên xomxo di ngidu he xôn ge od i ngidu he xôn, hixôn xêyaa nivihia.

Il ob dô vac môt xêyaa vin lec maên

⁹Xam xêmyaa i vin lec lime hixôn nôn, di xam o léc kityoo lêm. Xam xona nêb di vô nimim vô môt nipaên di hôm môt nivihia xôn mi i yêp pilihi. ¹⁰Xam xêmyaa i vin lec lime vông vinên i tiyi xocbê xam xêmyaa vin lec lime wê xam hi tived ge, di xam toto ge pimil lime di ngidu he xôn.

¹¹Xam nim i o léc ma ên yuac wê yêp vô xam ge lêm. Nge, xam vông yuac vô Apumtau ya xêkizêc wê Myakilôhô Ngibua vông ge.

¹²Kiyang wê xam vông i vin mi dô bin ge, xam bin hixôn xêmyaa nivihia. Di xam le xêkizêc vac viyin wê xam ob tulec ge. Di xam o léc sea môt kitaaên lêm. Nge, xam kitaa i tiyi buc vihati.

¹³Di lime vông vinên nêb susu obêc ma ên he ge od xam ngidu he xôn. Di xomxo viyang bangwe obêc val vac xam bom ge, od xam viac he i nivihia.

¹⁴Di xomxo obêc vông xam vô nipaên ge od xam o lêc kitaa vô Anutu bê i vông myaviwen vô he lêm. Nge, xam kitaa vô Anutu ên i vông niviha vô he.

¹⁵Lime obêc dô hixôn xêyaa niviha ge od xam xêmyaa i vô niviha hixôn he, di he obêc byag ge od xam byag hixôn he.

¹⁶Xam viac lime i niviha, i tiyi xocbê xam viac xacxam va niviha ge. Di xam o lêc yong xam di nêl bê xam tibii levac lêm. Nge, xam dô hixôn xomxo wê o kô lê levac lêm ge. Di xam o lêc yong xam di nêl bê xam piyôp levac lêm.

¹⁷Xomxo ti obêc vông nipaên vô xam ge od le i lêc vông nipaên i luu nipaên lêm. Xam timu vô môp wê xomxo vihati ob yê di xovô nêbê niviha ge. ¹⁸Môp obêc yêp ge od xam viac kiyang voma di dô malehe hixôn xomxo vihati. ¹⁹Xam lige, xam o lêc vông nipaên i luu nipaên lêm. Xam vông myaviwen nipaên i loc vac Anutu vaci vigê. Ên Apumtau nêl kiyang mi i yêp vac kipihac bêga nêbê, “Aca va tibed wê a obêc vông myaviwen vô xomxo i luu nipaên wê he vông ge.” ²⁰Om xam vông i tiyi kiyang wê yêp vac xolac bêga nêbê, “Xomxo wê yê xam tiyiên ma ge, vip obêc den he ge od xam vông yaên vô he, di he obêc nêb num mia ge od xam vông mia vô he mi he num. Ên xam obêc vông bêge vô he ge od he ob xo i lax lec nipaên wê he vông ge di ni ob yoc ên he.” ²¹Môp nipaên i o lêc vông xam vô nipaên lêm. Nge, xam dô vac môp niviha wê ob nginoo môp nipaên vêl ge.

II ob la vac gavman kiyang kwa ngibi

13 ¹Xam vihati, xam dô vac gavman kwa ngibi. Ên gavman wê viac xam ge, heche va o vînoo he lêm. Nge, Anutu vaci tung he di vông xêkizêc vô he. ²Om xomxo ti obêc pwoo kiyang wê gavman vông ge vac ge od tiyi xocbê he pwoo Anutu kiyang vac hixôn, om xomxo tibêge ob kô myaviwen nipaên, ên Anutu vaci tung gavman. ³Xomxo wê dô vac môp niviha ge ob xona ên gavman lêm. Dom xomxo wê vông môp nipaên ge, od ob xona ên gavman nêbê gavman obêc vông myaviwen vô he. Om xam obêc nêb xam xonaên ma ge od xam dô vac môp niviha ên gavman i pimil xam. ⁴Ên gavman viyang viyang tu Anutu nue yuac wê ob ngidu xam xôn di vông xam dô nimviha ge. Lêc xam obêc vông môp nipaên ge od xam xona ên he, ên xêkizêc wê yêp vô he ge, he o kô vidaaên lêm. Nge, Anutu vông vô he ên nêb he i tu i nue yuac wê ob vông myaviwen luu nipaên wê xomxo vông ge. ⁵Mêgem xam vô ninyam lehe vô gavman kiyang. Lêc xam o lêc vông ên wê xam xona ên myaviwen nipaên ge vaci lêm. Nge, xam vông lec kehe bêga bê xam nilôm kidu xam nêb môp tibêge niviha.

⁶Mone wê il mi vông vô gavman ge, kehe yêp vac kiyang tige hixôn, ên gavman viyang viyang ge he tu Anutu nue yuac wê ob viac yuac

wê Anutu vông vô he ge. 7Mêgem xam vông mone yuac toto ge i loc vô gavman tiyi xocbê he nêb xam vông vô he ge. Di he wê kô lê gavman di viac xam ge, xam pimil he di loc vac he kwa ngibi.

Môp xêyaa vin lecên ob vông xolac vô nôn lec

⁸Le i léc kô lime ti susu di myaviwen i yêp dia lêm. Ên môp tibed wê yêp bêga nêbê il xêdyaa i vin lecma i yêp i loc buc dia. Ên xomxo ti xêyaa obêc vin lec xomxo ge od tiyi xocbê vông xolac wê Anutu nêl vô Moses ge vô nôn lec. ⁹Ên xolac wê Moses vông ge nêl bêga nêbê, “Le i léc vông yôdac vêx yuu vux lêm”, di “le i léc hi xomxo i yib lêm,” di “le i léc vông yôdac vô xomxo susu lêm,” di “le i léc doma vô xomxo susu ya lêm.” Léc xolac tige hixôn xolac baba, he xôn vihati yang ge, kehe tibed bêga nêbê ông xêmyaa i vin lec lime baba i tiyi xocbê ông xêmyaa vin lec ôcông va ge. ¹⁰Ên xomxo ti xêyaa obêc vin lec xomxo ngwe ge od obêc vông i vô nipaên lêm. Om xomxo ti obêc dô vac môp xêyaa vin lecên ge, od tiyi xocbê vông xolac wê Moses vông ge vihati vô nôn lec.

¹¹Mêgem xam léc dô vac môp tibêgee, ên xam xovô buc wê il dô vac gwêbaga pyap, om xam sea yêpên di kidi lec. Ên ilage wê il vông i vin taxlee ge, buc wê Anutu ob kô il mi la tung vac ben ge gên yêp teva, léc gwêbaga, buc tige vô kwabo lec. ¹²Om vô kwabo lec wê mapitoc ob tip vac di vîgwe ob vidii. Om il ob sea môp mapitoc di la le vac xêseac, êdêc vông vevac vô nipaên. ¹³Om il ob dô vac môp bôbac tiyi xocbê xomxo wê la vac xêseac wê hiyôv vông ge. Om il ob num di vô mavmav di vông môp vaxvax wê nipaên ge hixôn lêm, di il ob vông môp yôdac vêx yuu vux lêm, di il ob kunacma di xêma nipaên di do mad vô lige susu lêm. ¹⁴Il ob timu vô môp yuu yuac wê Apumtau Yesu Kilisi vông ge, di il ob timu vô môp nipaên wê yêp vac il nilôd ge lêm.

Il ob yaxên môp wê lige vông vinên vông ge lêm

14 ¹Xomxo wê vông i vin Yesu pyap léc vông vinên wê he vông ge gên o vô xêkizêc lec lêm ge, od xam vông he lam dô vac xam mahigun, di xam o léc ngaênma lec kiyang yaya wê xomxo tige vông ge lêm. ²Ên xomxo ya vông i vin xêkizêc om he xovô ên he nêbê susu yaên vihati ge nivîha tiyi wê he ob ya ge. Léc xomxo wê vyac xovôên xolac ma ge, he vîbu nêbê he ob ya bwoc liyôhô lêm. ³Om xomxo wê mi ya susu yaên vihati ge, he i o léc yê xomxo wê mi ngîbua bwoc liyôhô ge nipaên lêm, di xomxo wê mi ngîbua bwoc ge, he i o léc yê xomxo wê mi ya susu vihati ge di nêl bê he vông i so lêm, ên Anutu kô he ge êno la tu ixê. ⁴Bêna léc xam nêb xam ob vông kiyang vô xomxo ngwe nue yuacê? Xomxo tige, Apumtau tu he nê levac om obêc yaxên môp wê he vông ge di nêl bê tiyi me tiyiên ma. Léc môp wê he vông ge obêc tiyi, ên Apumtau vaci ob ngidu he xôn di vông he le xêkizêc.

⁵Xomxo ya nêl ên he nêbê buc ya levac i luu buc baba vêl, di xomxo ya nêl ên he nêbê buc vihati ge tiyima. Om xam toto yaxên lê, di xam vyac xovô môt wê xam ob timu vô ge di hôm xôn pilihi mi i yêp vac xam piyôp. ⁶Ên xomxo wê vinoo buc ya nêbê buc ge levac ge, he vông ên he nêbê he ob pimil Apumtau lec buc tige. Di xomxo wê mi ya susu yaên vihati ge, he vông ên nêbê he ob pimil Apumtau lê om he pimil Anutu ên yaên vihati di ya. Di xomxo wê mi ngibua yaên ya ge, he vông ên he nêb he ob pimil Apumtau, om he êno pimil Anutu ên yaên wê he mi ya ge.

⁷Il ob xovô bêga bê il obêc dô madviha ge od il o xovô icil va lêm, me il obêc xib ge od il o xovô icil va lêm. ⁸Ên buc wê il dô madviha ge od il ob vông Apumtau lê i vô levac, di il obêc xib ge od il ob vông Apumtau lê i vô levac hixôn. Om il obêc dô madviha me il obêc xib ge od il ob tu Apumtau xe. ⁹Ên Kilisi yib di kidi lec maviha om kehe bêga nêbê tu xomxo wê dô maviha hixôn he wê yib ge nên Apumtau.

¹⁰Bêna lêc xam yaxên môt wê lime vông ge di nêl ên xam nêbê tiyiên ma, di bêna lêc xam wê lime ya nipaênê? Ên il vihati obêc la le vô Anutu manôn di ici va ob yaxên môt wê il toto vông ge. ¹¹Tiyi xocbê kiyang wê Apumtau nêl di i yêp vac xolac bêga nêbê,

“A nêl hixôn nôn ên a nêbê xomxo vihati yang ob yev vixa kitu vô a, di nêl a kitong seac bêga bê a ga Anutu nôn.”

¹²Om il ob xovô bêga bê il toto obêc nêl môt wê il vông gê kibun ga kehe kitong vô Anutu vô buc timuên.

Il ob vông lige vô nipaên lec môt wê il vông ge lêm

¹³Om il ob sea môt wê il ob xê lige ngwe tiyiên ma ge, di il ob xovô môt bêga bê môt wê ob vông lige sea vông vinên wê he vông ge di vông he la vac môt wê he yê nêbê nipaên ge, il ob vông môt tibêge lêm. ¹⁴Apumtau Yesu vông xovôên vô a om a xovô ên a nêbê yaên ti o nipaên tiyi wê ob vông il vô nipaên ge lêm. Lêc xomxo ti obêc yê susu yaên tiyi xocbê nipaên ge od ob ya lêm, ên obêc ya ge od obêc vông i vô nipaên. ¹⁵Om ông obêc wa yaên ti wê lim tige ngibua ge od obêc vông lim tige nilô vô viyin, om môt wê ông vông ge o tiyi xocbê ông xêmyaa vin lec lim tige lêm. Kilisi yib ên xomxo tige hixôn, om xam viac xam ên yaên wê xam mi wa ge, êdêc yaên i o lêc vông lim tige i vô nipaên lêm. ¹⁶Om môt wê xam wê ên xam nêbê nivaha ge, xam viac xam êdêc xomxo i o lêc yê môt tige nipaên lêm. ¹⁷Ên môt wê il tu Anutu nue di la vac i kwa ngibi ge, kehe o yêp vac yaên yuu numên lêm. Nge, kehe bêga nêbê il dô vac môt nivaha yuu kiyang malehe di xêyaa nivaha wê Myakilôhông Ngibua vông ge. ¹⁸Om xomxo obêc tu Kilisi nue yuac di dô vac môt tige ge od Anutu ob yê he nivaha di xomxo êno ob pimil he.

¹⁹Mêgem il ob timu vô môt wê xêyaa vin lec maên ge di dô vac kiyang malehe nilô, di il ob ngiduma xôn vac vông vinên. ²⁰Om yaên wê xam

mi wa ge i o léc vông yuac wê Anutu vông ge i vô nipaên lêm. Vixôhilôg, yaên vihati ge nivihā tiyi wê il ob xa ge, léc yaên wê xam mi wa ge obêc vông lime la vac môp wê he yê nêbê tiyiên ma ge od môp wê xam vông ge, xam vông i so. ²¹Om il ob timu vô môp bêga bê il ob xa bwoc me il ob num wain me il ob vông môp vae vae, léc môp tige obêc vông lige nilô vô viyin ge od il ob sea môp tibêge i loc yêp xel di vôngên i ma. ²²Om môp yaên yuu numên yuu bêge, xam toto xovô môp wê xam ob timu vô ge, léc môp ge ông sea i loc vô Anutu vaci. Ên xomxo ti obêc timu vô môp wê yê nêbê nivihā ge, di nilô yuu piyôp obêc vông kiyang vô i lec môp tige lêm ge od xomxo tige ob dô hixôn xêyaa nivihā. ²³Léc xomxo ti obêc ya yaên ti hixôn nilô yuu ge od ge vông i so, ên xomxo tige o ya hixôn nilô tived lêm. Nge, ya hixôn xonaên. Ên môp wê xomxo nêb ob vông ge, he obêc vông hixôn nilô yuu ge od ge nipaên.

Il ob timu vô môp wê Kilisi vông ge

15 ¹Il wê il vông i vin xêkizêc ge, il ob ngidu lige wê gên o vông i vin xêkizêc lêm ge xôn di kilê viyin wê he vông ge. Di il ob vông môp wê ob vô nivihā vô icil va ge lêm. ²Nge, il toto ob vông môp wê ob vô nivihā vô lige vông vinên, ên i ngidu vông vinên wê he vông ge xôn, ên he i le xêkizêc. ³Ên môp wê Kilisi vông ge, o vông ên nêb i vô nivihā vô ici va lêm. Nge, môp wê i vông ge, tiyi xocbê kiyang wê yêp vac xolac bêga nêbê, “Kiyang nipaên wê xomxo nêl lec Anutu ge, he nêl lec a hixôn.” ⁴Kiyang vihati wê xomxo kivuu mi i yêp vac kipihac xolac ge, Anutu nêl ên nêbê i vông xovôên vô il di vông il le xêkizêc vac vông vinên di bin buc wê il ob tulec vizid vô Anutu ge. ⁵Anutu ti wê ngidu xomxo xôn di vông he le xêkizêc vac vông vinên ge, i ngidu xam xôn di vông xam nilôm i yêp tived i tiyi xocbê môp wê Yesu Kilisi vông ge, ⁶êdêc xam vihati hi vixam i pec ên Anutu, wê il lig Apumtau Yesu Kilisi ma ge.

Kilisi xolac lam vô he Yuda hixôn tibii ba

⁷Xam hêm lime lec nivihā i tiyi xocbê Kilisi hêm il lec nivihā ge, êdêc xam vông Anutu lê i vô levac. ⁸A nêl bêga vô xam ên a nêbê Kilisi lam tu Yuda nêl xomxo yuac di hêm he lec, ên nêb ob vông kiyang wê Anutu hilu vô bue ilage i vô nôl lec, ên he Yuda i xovô bê Anutu kiyang ge kiyang nôl. ⁹Di Kilisi nêb ob vông xomxo wê o Yuda lêm ge he êno i pimil Anutu ên wê i vông vizid vô he ge, tiyi xocbê kiyang wê yêp vac xolac bêga nêbê,

“A ob pimil ông lêm vac tibii madiluhu mahigun, di a ob vông lilo di hi vixag i pec ên ông.”

¹⁰Di kiyang ngwe yêp vac xolac bêga hixôn nêbê,

“Xam wê xam o Yuda lêm ge, xam xêmyaa i vô nivihā hixôn Anutu nue Yuda.”

- ¹¹Di kiyang ti yêp vac xolac hixôn bêga nêbê,
 “Xam tibii ba, xam pîmil Apumtau lê, di xomxo vihati yang i hi vixa
 i pec ên Apumtau.”
- ¹²Di plopet Aisaia kivuu kiyang ti lec Kilisi mi i yêp bêga nêbê,
 “Xomxo ti obêc val vac he kidu ti wê nêb Jesi bue ge, di xomxo tige
 ob tu tibii baba nêb king hixôn di viac he, om he baba ob vông i
 vin di dô bin buc wê xomxo tige ob vông he vô nivuha lec ge.”
- ¹³Nôn wê xam dibin ge, Anutu tu kehe, om obêc ngîdu xam xôn di
 vông xêyaa nivuha hixôn kiyang malehe i lam pup vac xam nilôm ên wê
 xam vông i vin ge. Di xêkizêc wê Myakilôhô Ngibua vông ge i ngîdu xam
 xôn, ên xam le pîlihi vac vông vinên di bin nôn wê xam ob tulec timuên
 ge.

Pol xêyaa vô nivuha ên yuac sinale wê vông ge

¹⁴Xam lige, aca va xovô pyap ên a nêbê xam dô vac môp nivuha, di
 xovôên nivuha pup vac xam nilôm tiyi wê xam ob vông xovôên vô lime
 vông vinên ge. ¹⁵Lêc kiyang ya wê a kivuu vô xam ge, a kivuu xêkizêc di
 a o xona lêm, ên a nêb xam piyôp i yêp seac. A vông bêge, ên Anutu vông
 vizid vô a ¹⁶nêb a tu i nu yuac ti di la nêl Yesu Kilisi kitong vô xomxo
 madiluhu. Om yuac wê a vông ge tiyi xocbê xomxo si daa vô Anutu ge,
 ên a la nêl Anutu xolac vô tibii wê o Yuda lêm gee, ên a nêb Myakilôhô
 Ngibua i vông he i tu xomxo ngîbua tiyi xocbê daa wê Anutu ob yê nivuha
 ge.

¹⁷Yesu Kilisi ngîdu a xôn om a xêgyaa vô nivuha ên yuac wê a mi vông
 vô Anutu ge. ¹⁸Om a ob nêl lec yuac baba lêm. Nge, a ob nêl lec wê Kilisi
 ngîdu a xôn di vông xêkizêc vô a om a didii tibii wê o Yuda lêm gee mi
 la vô Anutu ên a nêb he i vô ninya lehe vô Anutu xolac. Om yuac tige,
 a vông ya kiyang wê a mi nêl vô he ge, hixôn môp wê a mi vông vac he
 mahigun ge, ¹⁹di Anutu vông xêkizêc vô a om a vông do levac ya hixôn,
 di xêkizêc wê Myakilôhô Ngibua vông ge ngîdu a xôn. Mêgem a nêl
 Kilisi xolac vac vigwe Jerusalem di vigwe yaya hixôn mi i la tiyi vigwe
 Ililikam. ²⁰A vông yuac bêge, ên a nêb a ob la nêl xolac vô tibii madiluhu
 wê gên o ngô Yesu xolac lêm ge, ên a nêb a ob la vông yuac vac vigwe wê
 xomxo la nêl xolac pyap vac ge lêm, ên ge obêc tiyi xocbê a la lox xumac
 lec xomxo ngwe teac kisii ge. ²¹Om a nêb a ob vông i tiyi xocbê kiyang
 wê yêp vac xolac bêga nêbê,

“Xomxo wê gên o ngô Kilisi lê lêm ge, he ob yê i, di he wê gên o ngô
 i xolac lêm ge, he ob ngô di xovô.”

Pol nêb ob la vigwe Lom yuu Spên

²²Buc tibeac ge, yuac hôm a xôn om a o tiyi wê a ob loc vô xam ge
 lêm. ²³Tiyi klismas tibeac ge, a nêb a ob loc xê xam, lêc a o loc lêm. Di

gwêbaga a vông yuac vac vîgwe tigae vîhati pyap, ²⁴om a nêb a ob loc vô xam. Om buc wê a ob la vîgwe Spên ge, od a ob miloc vô xam taxlee, di il dô buc ya ên i vông a xêgyaa i vô nivîha. Pyap dêc xam ngîdu a xôn vac môp ên a la Spên.

²⁵Lêc gwêbaga a ob la Jelusalem ên la ngîdu lige wê Anutu nue gee xôn. ²⁶Ên xomxo vông vinên vac vîgwe Masedonia yuu Glik ga nêl kiyang pyap di kituc mone ên nêb ob vông i loc Jelusalem ên i loc ngîdu he Yuda vông vinên wê nêb susu maên ge xôn. ²⁷Heche va nêb he ob vông mone tige vô he Yuda, lêc mone tige wê he obêc hi myaviwen wê he Yuda kô xolac mi la nêl vô he ilage. Vizid wê Anutu vông vô he Yuda ge la vô tibii baba hixôn di vông he kinu hixôn nilô vô nivîha lec, om gwêbaga he tibii baba ob vông vizid wê ninivi xe ge i la vô he Yuda ên i ngîdu he xôn.

²⁸Om a ob kô mone wê he Masedonia yuu Glik kituc pyap ge di kô mi la vông vô xomxo Jelusalem, di yuac tige obêc pyap ge od a ob miloc vô xam di la Spên. ²⁹Di a xovô ên a nêbê a obêc loc vô xam ge od a obêc miloc hixôn vizid wê Kilisi vông ge ên i hivun xam xôn.

³⁰Xam lige, xam tu il lig Apumtau Yesu Kilisi xe di dô vac xêyaa vin lecên wê Myakilôhông Ngîbua vông ge, om a nêl vô xam bê xam ngîdu a xôn ya kitaaên. Xam kitaa xêkizêc vô Anutu ên i ngîdu a xôn ³¹di i vô a vêl ên xomxo Judia wê hingoo Yesu xolac ge. Di mone wê a ob kô mi la vông vô xomxo vông vinên Jelusalem ên a nêb i ngîdu he xôn ge, xam kitaa vô Anutu ên he xêyaa i vin lec mone tige di he i yê nivîha. ³²Anutu obêc lee yuu ge od a obêc miloc vô xam hixôn xêgyaa nivîha di loc dô seac vêl hixôn xam. ³³Mêgem Anutu ti wê kiyang malehe kehe ge, i dô hixôn xam vîhati. Kiyang nôn.

Pol nêl vidiiên wê i vông ge la vô xomxo Lom

16 ¹A ob nêl vêx Pibi kitong vô xam, ên Pibi ge il lig vêx vông vinên wê mi vông yuac vac konglegesên wê dô vîgwe Senkليا ge. ²Om Pibi obêc val vô xam ge od xam hôm i lec nivîha ên wê i vông i vin Apumtau ge, ên môp tibêge môp nivîha wê il xomxo vông vinên ob vông vônga ge. Di vîyin obêc tulec i ge od xam ngîdu i xôn, ên i ge wê mi ngîdu xe xomxo tibêac xôn.

³Xam nêl vidiiên i loc vô Plisila yuu liya Akwila, wê xen xôn vông yuac wê Yesu Kilisi vông ge. ⁴Ên yuu ge wê yuu ngîdu a xôn om tibii hôm yuu xôn nêb ob hi yuu yib, lêc he o hi yuu yib lêm. Om a hi vîxag i pec ên yuu, lêc o aca va tibed lêm. Nge, tibii vông vinên wê o Yuda lêm ge, he êno, he vîhati hi vîxa pec ên yuu hixôn. ⁵Om xam nêl vidiiên i loc vô he vông vinên wê mi kitucma vac yuu ben ge.

Di xam nêl vidiiên i loc vô Epinitas wê a xêgyaa vin lec i ge, ên i ge wê vông i vin taxlee vac vîgwe Esia ge.

⁶Di xam nêl vidiiên i loc vô Malia wê vông yuac levac ên nêb ob ngîdu xam xôn ge.

⁷Di xam nêl vidiiên i loc vô Andlonikas yuu Junias. Yuu ge a lige Yuda wê xen xôn dô vac kalabuhu lec xolac wê xen mi nêl ge. Yuu vông i vin tax, di a vông i vin timuên, di sinale viyang viyang xovô yuu nêb yuu xomxo nivihâ.

⁸Di xam nêl vidiiên i loc vô a lig vông vinên Amplietas wê a xêgyaa vin lec i ge.

⁹Di xam nêl vidiiên i loc vô Eban wê mi vông Kilisi yuac hixôn il ge. Di xam nêl vidiiên i loc vô Stekis hixôn, ên i ge wê a xêgyaa vin lec i.

¹⁰Di xam nêl vidiiên i loc vô Apelis wê vông i vin Kilisi nôn.

Di xam nêl vidiiên i loc vô Alistobyulas hixôn he wê dô vac i ben ge.

¹¹Di xam nêl vidiiên i loc vô Helodion wê a lig Yuda ti.

Di xam nêl vidiiên i loc vô Nasisas hixôn xomxo vac i ben wê he vông i vin Apumtau ge.

¹²Di xam nêl vidiiên i loc vô vêx yuu Tlaipina yuu Tlaiposa wê yuu vông yuac levac vô Apumtau ge.

Di xam nêl vidiiên i loc vô Pesis wê a xêgyaa vin lec i nôn ge, ên i ge wê vông yuac tibeac vô Apumtau.

¹³Di xam nêl vidiiên i loc vô Lupas wê vông i vin xêkizêc di vông yuac vô Apumtau ge, di ta êno hixôn, ên i ge tiyi xocbê a tag.

¹⁴Di xam nêl vidiiên i loc vô Asinklitas, Pligon, Hemis, Patlobas, di Hemas, hixôn lie vông vinên wê dô hixôn he ge.

¹⁵Di xam nêl vidiiên i loc vô Pilologas yuu Julia, di Nelias hixôn li vêx, di Olimpas, hixôn lie vông vinên vihati wê dô hixôn he ge.

¹⁶Xam pulma vigêm ên i nêl xam kitong bê xam xêmyaa vin lecma.

Konglegesen vac vigwe gae vihati nêl vidiiên i loc vô xam.

Pol nêl kiyang lec xomxo wê xolac kityooên ge

¹⁷Xam lige, a nêl vô xam bê xam viac xam ên xomxo wê nêl xolac so xolac wê xam ngô ilage, ên kiyang tibêge ob vông xam le kityê kityê di ngaênma lec xolac di obêc vông xam sea vông vinên wê xam vông ge, om xam le teva ên he. ¹⁸Ên xomxo tigeo o vông nilô la vô il lig Apumtau Kilisi lêm. Nge, he vông nilô la vô môm nipaên wê heche va xovô ge, di he mi nêl kiyang hizi nivihâ yang vô xomxo om kityoo he wê vyac xovôên ma gee. ¹⁹Môm wê xam vông ge vông a nilôg vô nivihâ, ên xomxo viyang viyang ge xovô ên he nêbê xam timu vô Yesu xolac. Lêc gwêbaga a nêb a ob nêl vô xam bê xam lêc vyac xovô môm wê nivihâ ge di xam o lêc xo môm wê nipaên ge lêm. ²⁰Di buc vô kwabo lec wê Anutu ti wê kiyang malehe kehe ge ob kê Seten la vac xam kwa ngibi di hi i hibû sea lutibed.

Vizid yuu xêyaa vin lecên wê il lig Apumtau Yesu vông ge i loc vô xam vihati.

Xomxo wê dô hixôn Pol ge nêl vidiiên la vô xomxo Lom

²¹Timoti wê mi vông yuac hixôn a ge di Lusias yuu Jeson hixôn Sosipata, wê a lige Yuda ge, he nêl vidiiên vô xam.

²²Di a Tetias, wê a kivuu Pol mya wê nêl ga, a nêl vidiiên vô xam ên wê il xôn vông i vin Apumtau lê ge.

²³Di Gaias nêl vidiiên vô xam. Gaias ge wê viac a nivîha vac ben, di mi viac xomxo vông vinên tibeac hixôn.

Elastas wê mi viac mone wê gavman mi kô vac vigwe ga ge yuu Kwotas wê il lig ge, yuu nêl vidiiên vô xam.

²⁴[Vizid yuu xêyaa vin lecên wê il lig Apumtau Yesu Kîlisi vông ge i loc viac xam. Nôn.]

Il ob pimil Anutu ên vông i lê i vô levac

²⁵Anutu tîyi wê ob vông xam le xêkizêc vac xolac wê a mi nêl ge. Xolac tiga nêl lec Yesu Kîlisi. Xolac tige yêp xôpacên ilatîkwê, léc gwêbaga Anutu vông i lam yêp seac. ²⁶Di Anutu wê dô luta ge nêl om xe la nêl kiyang wê plopete kivuu ilage vô tibii vîyang vîyang ge vihati, ên xe nêb plopete kiyang i nêl xolac kitong i yêp seac vô he ên he i ngô di vông i vin. ²⁷Anutu tîbed ge i xovôen kehe, om il ob xovô yuac wê Yesu Kîlisi vông ge di il ob pimil Anutu lê i vô levac di i yêp luta léc luta. Kiyang nô.

1 KOLIN

Kipihac taxlee wê Pol kivuu vô tibii Kolin ge

1 ¹A Pol wê Anutu vaci vinoo a ên nêb a tu sinale wê Yesu Kilisi vông ge. A hixôn a lig Sostenis ²xii kivuu kipihac tiga vôxam wê xam tu Anutu nue vông vinên mi dô vac vigwe Kolin ge, ên Anutu vinoo xam ên nêb xam tu xomxo ngîbua nôn lec yuac wê Yesu Kilisi vông ge di xam tu i nue, hixôn xomxo vac vigwe vihati wê he kiyag vya lec il Apumtau Yesu Kilisi ge, ên Yesu Kilisi ge xomxo levac wê he vông ge di il êno vông ge hixôn. ³Il mag Anutu yuu Apumtau Yesu Kilisi i vông vizid hixôn kiyang malehe i loc dô hixôn xam.

Pol pimil Anutu

⁴A pimil Anutu ên xam tiyi buc vihati, ên wê Anutu vông vizid nivihã vô xam lec yuac wê Yesu Kilisi vông ge. ⁵Anutu vông vizid toto ge vô xam ên nêb xam nêl kiyang nivihã di xovô kiyang vihati. ⁶Ên ilage xe nêl Kilisi kitong vô xam di xam hôm kiyang tige xôn pîlihi mi i yêp vac xam nilôm, ⁷om gwêbaga vizid toto wê Myakilôhô Ngîbua vông ge, ti o ma ên xam lêm, di xam dô bin buc wê il lig Apumtau Yesu Kilisi ob vena le seac vô il ge. ⁸Di il lig Apumtau Yesu Kilisi vaci ob ngidu xam xôn di xam le pîlihi, om buc wê Kilisi ob vena lec ge, od xam nêb soên ti ob yêp i tii vac vô xam lêm. ⁹Anutu tyuc xam ên nêb xam ob dô xêmyaa nivihã hixôn nu tuc Yesu Kilisi wê il Apumtau ge, di Anutu ob vông i tiyi kiyang wê nêl ge di ob kityoo kiyang ti lêm.

Konglegesen Kolin hibũ sea

¹⁰Xam lige, a nêl kiyang xêkizêc vô xam lec il lig Apumtau Yesu Kilisi lê bêga bê xam dô hixôn kiyang tibed, di xam o léc hibũ xam sea lêm. Nge, xam nilôm yuu piyôp i yêp tibed. ¹¹Xam lige, xomxo wê Klowi lie ge

ya nêl vô a ên nêbê xam ngaênma lec kiyang di xam xêmyaa vô myavinê vômá. ¹²Kehe bêga nêbê xam ya nêl ên xam nêbê xam timu vô Pol, di xam ya nêl ên xam nêbê xam timu vô Apolos,

di ya nêl ên nêbê xam timu vô Pita, di ya nêl ên nêbê he timu vô Kílisi. ¹³Bêna léc xam nêl tibêge? Kílisi ge xam hibú sea, me? Di a, Pol, a xib lec xax ên xam, me? Di xam lipac mia lec a lêg, me? ¹⁴A pimil Anutu ên wê a o lipac xam tibeac lêm. Nge, a lipac Klispas yuu Gaias, yuubed. ¹⁵Om o tiyi wê xomxo ti ob nêl bê xam lipac mia lec a lêg ge lêm. ¹⁶Vixôhilôg, a lipac Stepanas he vinê nue hixôn. Di a mêd lipac xomxo ya hixôn, léc a o xovô lêm. ¹⁷Ên Kílisi o vông a la ên nêb a la lipac xomxo lêm. Nge, vông a la ên nêb a la nêl xolac vô xomxo. Léc a o nêl xolac tiyi xocbê xomxo hixôn piyôp levac mi nêl ge lêm, ên obêc bêge ge od kiyang wê nêl ên nêbê Kílisi yib lec xax ge obêc tiyi xocbê kiyang pileva wê nôn maên ge.

Kílisi ge xêkizêc yuu xovôên wê Anutu vông ge

¹⁸Kiyang wê nêl ên nêbê Kílisi yib lec xax ge, xomxo wê xôa obêc ma ge yê kiyang tige tiyi xocbê kiyang pileva. Dom il wê Anutu vô il vêl ge, il xovô ên il nêbê kiyang wê nêl lec wê Yesu yib lec xax pola ge, ge xêkizêc wê Anutu vông ge. ¹⁹Ên Anutu nêl kiyang mi i yêp vac xolac bêga ên nêbê,

“Xomxo wê kô piyôp levac ge, a ob vông he piyôp i vô nipaên, di xomxo wê xovô kiyang tibeac ge, a ob kitya he nên piyôp vêl.”

²⁰Xolac nêl bêge, om xomxo wê piyôp levac ge, di xomxo wê xovô kipihac vihati ge hixôn he wê mi ngaênma lec kiyang ge, il ob nêb va lec xovôên wê he vông ge? Ên Anutu nêl pyap ên nêbê xovôên wê xomxo kibun ga vông ge, vidaaên di nôn ma.

²¹Anutu ge piyôp levac om vông môp bêga ên nêbê xovôên wê xomxo kibun ga vông ge o tiyi wê ob vông he xovô Anutu ge lêm. Om xolac wê xe mi nêl ge, xomxo yê tiyi xocbê kiyang pileva lê, léc Anutu nêl ên nêbê xomxo obêc vông i vin kiyang tige ge od Anutu obêc vô he vêl ên he nên nipaên. ²²Xomxo Yuda nêb he ob yê do levac di tibii Glik vông yuac levac ên nêb ob tulec piyôp levac. ²³Léc xe ga, xe mi nêl lec wê Kílisi yib lec xax ge, om he Yuda yê kiyang tige nipaên, nêbê tiyiên ma, di he Glik yê nêbê kiyang tige, nôn ti o yêp vac lêm. ²⁴Léc il wê Anutu tyuc il ge, Yuda hixôn tibii baba ge, il xovô ên il nêbê Kílisi ge xêkizêc yuu xovôên wê Anutu vông ge. ²⁵Ên Anutu piyôp wê xomxo yê nêb piyôp yacyac ge luu piyôp wê xomxo kibun ga vông ge vêl, di Anutu xêkizêc wê xomxo yê nêbê xêkizêc ma ge, ge luu xêkizêc wê xomxo vông ge vêl.

²⁶Xam lige, xam xovô i lôc lec môp wê xam dô vac ilage vô buc wê Anutu vînoo xam mi xam tu i nue ge, ên xam tibeac o tulec piyôp levac gê kibun ga lêm, di xam tibeac o kô xêkizêc gê kibun ga lêm, di xam tibeac o kô lêm levac gê kibun ga lêm. Nge, xam titi kô lêm levac. ²⁷Léc

xomxo wê xomxo kibun ga yê nêbê he piyôp maên ge, od Anutu vinoo he ên nêb he i vông xomxo wê piyôp levac ge, he ni i yoc ên he, di xomxo wê xomxo kibun ga yê nêbê he nêb xêkizêc ma ge, od Anutu vinoo he ên nêb he i vông xomxo wê nêb he xêkizêc ge ni i yoc ên he. ²⁸Di xomxo wê xomxo kibun ga yê nipaên nêbê he xomxo pileva ge, od Anutu vinoo he ên nêb he i vông xomxo wê kô lê levac ge, he i dô i tiyi xocbê xomxo wê o kô lê levac lêm ge. ²⁹Anutu vông bêge, ên nêb xomxo ti ob yong i vô i lêm. ³⁰Anutu vông xam la dô hixôn Yesu Kilisi. Ên Kilisi ge wê hilung piyôp wê Anutu vông ge yêp seac vô il, di Kilisi vaci vô il vêl ên il nêd nipaên, di Anutu yê il nêb il xomxo nivihha lec yuac wê Kilisi vông ge, di Kilisi vông il dô vac môp vilu wê nivihha ge. ³¹Om il ob vông i tiyi xocbê kiyang wê yêp vac xolac bêga ên nêbê “Xomxo ti obêc nêb pimil ge od i pimil Apumtau vaci.”

Pol nêl kiyang lec wê Kilisi yib lec xax ge

2 ¹Xam lige, ilage wê a loc nêl Anutu xolac kitong vô xam ge, od a o yong a di nêl kiyang tiyi xocbê xomxo wê piyôp levac yuu xovôên nivihaviha ge lêm. ²Ên a xovô bêga tax ên a nêbê buc wê a ob dô hixôn xam ge, od a ob xovô kiyang tived. Ge kiyang wê nêl lec Yesu Kilisi di nêl lec wê Yesu yib lec xax ge, di a ob nêl kiyang ya hixôn lêm. ³Di buc wê a dô hixôn xam ge, xêkizêc wê a vông ge ma, om a dô hixôn xonaên di nignivi yetac. ⁴Mêd kiyang yuu xolac wê a nêl vô xam ge, a o nêl ya piyôp nivihha wê ob vông xam pilepac xam ge lêm. Nge, Myakilôhō Ngibua vông xêkizêc vô a di ngidu kiyang wê a nêl ge xôn. ⁵A vông yuac tibêge, ên a nêb vông vinên wê xam vông ge, kehe i o lêc yêp vac piyôp yuu xovôên wê xomxo kibun ga vông ge lêm. Nge, kehe i yêp vac xêkizêc wê Anutu vông ge.

Myakilôhō Ngibua vông piyôp vô il

⁶Xomxo wê vông i vin Anutu xolac xêkizêc ge, xe mi nêl xolac hixôn xovôên nivihha vô he, lêc xovôên tige o tiyi xocbê xovôên kibun ga lêm, di o tiyi xocbê xovôên wê xomxo levac kibun ga vông ge lêm, ên he xôa obêc ma. ⁷Xovôên wê xe mi nêl ge, ge xovôên wê Anutu vông ge. Xovôên tige yêp xôpacên ilage, lêc buc wê Anutu gên o tung lag yuu kibun lêm ge od Anutu nêl pyap nêbê xovôên tige obêc vông il la dô vac xêseac wê i vông ge. ⁸Lêc xomxo levac kibun ga, he o xovô piyôp wê Anutu vông ge lêm. He obêc xovô ge od he ob hi Apumtau wê xêseac kehe ge yib lec xax lêm. ⁹Lêc piyôp wê Anutu vông ge tiyi xocbê kiyang wê yêp vac xolac bêga ên nêbê

“Susu wê xomxo manôn o yê lêm di xomxo ninya o ngô lêm di xomxo piyôp o xovô lêm ge, ge wê Anutu viac pyap ên nêb obêc vông vô xomxo wê he xêyaa vin lec i ge.”

¹⁰Kiyang tige yêp xôpacên lê, léc Anutu vông Myakilôhô Ngibua lam ên nêb i nêl kiyang tige kitong i yêp seac vô il. Ên Myakilôhô Ngibua xovô kiyang vihati yang om xovô kiyang vihati wê yêp xôpacên vac Anutu nilô ge.

¹¹Xomxo ti o tiyi wê ob xovô kiyang wê yêp vac xomxo ngwe nilô ge lêm. Nge, xomxo vaci piyôp ob xovô kiyang wê yêp vac ici va nilô ge. Om Anutu tiyi bêge êno, ên xomxo ti o xovô kiyang wê yêp vac Anutu nilô ge lêm. Nge, Myakilôhô Ngibua wê Anutu vông ge vaci wê xovô Anutu piyôp. ¹²Xe o kô xovôên kibun ga ti lêm. Nge, Anutu vông Myakilôhô Ngibua wê i vông ge lam vô il, ên nêb i vông xovôên vô il ên il xovô vizid vihati wê Anutu vông pileva vô il ge. ¹³Xe mi nêl vizid tige kitong vô xomxo, léc xe o kô xovôên tige vô xomxo kibun ga lêm. Nge, xe nêl i tiyi xovôên wê Myakilôhô Ngibua vaci vông vô xe ge, om xe nêl kiyang wê Myakilôhô Ngibua vông ge kitong vô xomxo wê Myakilôhô Ngibua dô vac he nilô ge.

¹⁴Léc xomxo wê Myakilôhô Ngibua o dô vac he nilô lêm ge, od he ob vông i vin kiyang wê Myakilôhô Ngibua vông ge lêm, ên he ob ngô kiyang ge tiyi xocbê kiyang vidaaên, di he o tiyi wê ob xovô kehe ge lêm, ên Myakilôhô Ngibua vaci wê ob nêl kiyang tige kitong vô xomxo. ¹⁵Xomxo wê Myakilôhô Ngibua dô vac he nilô ge tiyi wê ob yaxên kiyang vihati ge, léc xomxo kibun ga o tiyi wê ob yaxên xomxo wê Myakilôhô Ngibua dô vac he nilô ge lêm. ¹⁶Ên kiyang yêp vac kipihac xolac bêga ên nêbê

“Letya xovô piyôp wê yêp vô Apumtau ge di obêc tixuu i ya kiyang?”

Xolac nêl bêge, léc xe ga, piyôp wê Kilisi vông ge yêp vac xe nilôm pyap.

Xomxo wê tu Anutu nue yuac ge

3 ¹Xam lige, buc wê a loc dô hixôn xam ilage, a o tiyi wê a ob nêl kiyang vô xam tiyi xocbê a ob nêl vô xomxo wê timu vô Myakilôhô Ngibua ge lêm. Nge, a nêl kiyang tiyi xocbê a ob nêl vô xomxo wê dô hixôn nilô yen kibun ga ge, ên xam dô tiyi xocbê nume nipwo wê gên o xovô Kilisi kiyang nivaha ge lêm. ²Mêgem a vet xam ya lul pileva, di a o vet xam ya yaên xêkizêc ti lêm, ên xam gên o tiyi wê xam ob wa yaên xêkizêc ge lêm. Di gwêbaga hixôn, xam gên o tiyi lêm, ³ên xam gên dô vac môp kibun ga. Gwêbaga a ngô wê xam xêmyaa vô nipaên vô lime di xam ngaênma lec kiyang, om môp tige nêl xam kitong ên nêbê xam gên timu vô môp kibun ga tiyi xocbê tibii madiluhu ge. ⁴Ên xam ya pimil Pol di nêl ên nêbê xam timu vô Pol, di xam ya pimil Apolos di nêl ên nêbê xam timu vô Apolos, léc môp tige tiyi xocbê môp wê tibii kibun ga mi vông ge.

⁵Om xam xovô lê. Apolos ge letya? Di a Pol, a letya? Xii ga, xii xomxo yuac pileva wê Anutu vông yuac toto vô xii ge, om xii loc vông yuac vac

xam mahigun di xam vông i vin Kilibi. ⁶Om ge tiyi xocbê a loc xin vê vac yuac, nang dêc Apolos loc pivux ya mia, lêc Anutu ge wê vông vê tyip mi vô levac. ⁷Om xomxo wê xin vê ge hixôn xomxo wê pivux ya mia ge, yuu tiyi xocbê xomxo pileva, lêc Anutu tived ge wê lê levac, ên i ge wê vông vê tyip mi vô levac. ⁸Xomxo ti wê xin vê ge hixôn xomxo wê pivux ya mia ge, yuu tiyima, om Anutu ob vông nôn vô yuu xôn i tiyi yuac wê yuu toto vông ge. ⁹Ên xe ga, xe tu Anutu nue yuac, di xam tiyi xocbê yuac yaên wê Anutu vông ge.

Anutu nue yuac tiyi xocbê xomxo xumac loxên

Xam tiyi xocbê xumac wê Anutu vông ge. ¹⁰Ên Anutu vông vizid hixôn piyôp vô a tiyi xocbê xomxo wê xumac loxên ge, om a loc yev teac vac xam bom, di xomxo ya ob lox xumac lec kisii. Om xomxo wê ob lox xumac ge, a nêl vô he ên a nêbê he i viac he êdêc lox xumac nivaha lec teac kisii. ¹¹Ên teac wê le pyap ge, ge Yesu Kilibi, om o tiyi wê xomxo ob yev teac paha ngwe hixôn ge lêm. ¹²Xomxo wê ob lox xumac lec teac kisii ge, he ob lox ya gol me silva me ngidax nivihaviha me xax me hêx, ¹³om yuac wê he toto vông ge ob yêp seac timuên vô buc wê Kilibi ob vena lec ge, ên buc tige ob val hixôn ngwax, om Anutu ob yaxên xomxo toto nêl yuac ya ngwax mi yê bêc yuac wê he vông ge nipaên me nivaha. ¹⁴Om xumac wê xomxo lox lec teac kisii ge, ngwax yaên obêc ma di i le nivaha ge, od xomxo tige ob kô nôn nivaha lec. ¹⁵Lêc ngwax obêc ya xumac wê xomxo ti lox ge od xomxo tige ob kô nôn nivaha lec yuac wê i vông ge lêm. Xomxo vaci ob dô nivaha, ên Anutu obêc hôm i vêl ên ngwax tiyi xocbê xomxo hôm susu vêl vac ngwax ge.

Xomxo vông vinên tiyi xocbê xumac ngibua wê Anutu vông ge

¹⁶Xam ngô lê. Xam ge, Anutu xumac ngibua xam, di Myakilôhô Ngibua dô vac xam nilôm. Lêc mêd xam lungên kiyang tige? ¹⁷Xomxo ti obêc vông Anutu xumac ngibua vô nipaên ge, od Anutu obêc kitya xomxo tige vêl, ên Anutu xumac ge ngibua, di xumac tige xaxam va.

Il ob pimil xomxo kibun ga lêm

¹⁸Xomxo ti i o lêc kityoo i lêm. Xam ti obêc nêbê xam kô piyôp yuu xovôên kibun ga pyap ge od xomxo tige i sea piyôp wê i vông ge di i dô i tiyi xocbê xomxo wê piyôp maên ge lê, êdêc tulec piyôp nôn timuên. ¹⁹Ên piyôp yuu xovôên kibun ga, Anutu yê tiyi xocbê piyôp yacyac. Tiyi xocbê kiyang wê yêp vac kipihac xolac bêga ên nêbê

“Xomxo wê piyôp levac ge Anutu ob ku he xôn ya kiyang kityooên wê heche va vông ge tiyi xocbê he vac pulac.”

²⁰Di kiyang ngwe yêp bêga nêbê

“Apumtau xovô ên nêbê xovôên wê xomxo piyôp levac vông ge tiyi xocbê susu vidaaên.”

²¹Mêgem le i léc pimil xomxo kibun ga lêm. Ên susu vihati ge xam xe, ²²om a Pol xii Apolos di Pita, di susu kibun ga vihati, di maviha dôên, di yibên, di susu wê dô gwêbaga, hixôn susu wê ob val timuên ge, vihati tu xam xe. ²³Di xam tu Kilisi xe, di Kilisi tu Anutu xe.

Anutu vaci ob yaxên nue yuac wê i vông ge

4 ¹Mêgem xam léc wê xe i tiyi xocbê Kilisi nue yuac wê Anutu vông kiyang xôpacên wê i vông ge vac xe vigêm ên nêb xe viac di nêl kitong i yêp seac vô xam. ²Di xomxo wê ob viac yuac ge kiyang yêp bêga nêbê he i viac yuac i nivihã. ³Léc xam, me xomxo ya obêc yaxên yuac wê a vông ge di nêl bê nivihã me nipaên ge od ge yêp vô xam. Di aca va obêc yaxên yuac wê a vông ge lêm. ⁴Vixôhilôg, a xovô ên a nêbê soên ti o yêp vô a lêm, lêcom a o tiyi wê a ob nêl bê a xomxo nivihã ge lêm. Ên Apumtau vaci wê ob yaxên a. ⁵Om xam o léc yaxên xomxo lutibed di nêl bê he vông nivihã me nipaên lêm. Nge, xam vông i yêp di buc wê Apumtau ob vena lec ge lê, ên susu wê dô xôpacên vac mapitoc, hixôn kiyang wê yêp xôpacên vac xomxo nilô ge, Anutu obêc vông i lam yêp seac vihati, di Anutu vaci obêc vông myaviwen vô xomxo vihati tiyi yuac wê he toto vông ge.

Xomxo Kolin yong heche va

⁶Xam lige, kiyang vihati wê a nêl ge a nêb a ob ngidu xam xôn om a tixuu kiyang tige lec xii Apolos, ên a nêb xam ngô di xovô di timu vô kiyang wê yêp vac kipihac xolac ge, di le i léc timu vô môp ba ya hixôn lêm. Om a nêl vô xam bê xam o léc yong xomxo ti lê bê nivihã di wê xomxo ngwe bê nipaên lêm. ⁷Ên letya nêl vô ông nêb ông xomxo levacê? Di piyôp wê ông vông ge, ông kô vô letya? Piyôp hixôn vizid vihati ge, ông kô vô Anutu tibed, om bêna léc ông yong ông di nêl ên ông nêb ôcông va tu piyôp tige kehe?

⁸Xam so ên xam nêb mêd xam tulec vizid vihati pyapê? Om susu ti o ma ên xam lêmê? Xam mêd luu xe vêl di kô lêm levac mi la dô lec sia king pyap, me? Xam obêc tu xomxo levac ge od obêc nivihã, ên a nêb xe ob tu levac hixôn xam ên il xôn ob kô léd levac tiyima. ⁹A xo ên a nêbê Anutu vông xe sinale lax timuên tiyi xocbê xomxo vidaaên ge, ên xe dô tiyi xocbê xomxo vông kiyang vô xe pyap ên nêb ob hi xe xib, om he vông xe la le vô xomxo vihati hixôn angela manôn. ¹⁰Xomxo kibun ga yê xe tiyi xocbê xomxo piyôp maên ên wê xe timu vô Kilisi ge, dom xam ge, xam nêb xam timu vô Kilisi om xam kô piyôp levac. Xe ga, xe nêb xêkizêc ma, di xam ge, xam nêbê xam xêkizêc yêp. Xomxo hi vixa ên xam nêb xam xomxo levac, di xe ga, xomxo yê xe nipaên nêb xe xomxo pileva. ¹¹Ilage di i val tyip gwêbaga, xe o dô vac nivihã ti lêm. Ên vip den xe di xe kwam liyêê ên mia, di xe nêb ngakwi ma ên xe, di xomxo hi xe ya vigê, di xe nêb xumac wê xe ob dô vac ge ma, ¹²di xe vông yuac levac ya vigêm,

lêc xomxo obêc so vya vô xe ge od xe kitaa vô Anutu ên xe nêb i ngidu he xôn, di xomxo obêc vông viyin vô xe ge od xe o vông viyin ti lax vô he lêm. Nge, xe kilê viyin wê he vông vô xe ge. ¹³Di xomxo nêl kiyang nipaên lec xe, lêc xe nêl kiyang malehe lax vô he. Tiyi buc vihati di i val tyip gwêbaga hixôn, he yê xe tiyi xocbê susu yacyac wê xomxo ob nêx i la ge hixôn susu ningeac kibun ga.

Pol nêl nêb xomxo Kolin i timu vô i vixa

¹⁴Kiyang wê a kivuu ga, a o kivuu ên a nêb i vông xam nim i yoc lêm. Ên a xêgyaa vin lec xam tiyi xocbê a nuge xam om a nêb a ob vông xovôên vô xam. ¹⁵Ên xomxo wê ob viac xam di tixuu xam ya Kilisi xolac ge mêd he tibeac hiwocên, lêc xam mame o tibeac lêm. Nge, a tived wê a nêl Yesu Kilisi xolac vô xam di xam vông i vin om a tiyi xocbê xam mam a. ¹⁶Mêgem a nêl kiyang xêkizêc vô xam bêga bê xam timu vô a vixag. ¹⁷A nêb xam vông bêge om a vông Timoti loc vô xam. Timoti ge, a nug vông vinên wê a xêgyaa vin lec i ge, di i wê viac Apumtau yuac nivuha, om Timoti ob nêl a môt wê a mi timu vô Kilisi ge kitong vô xam tii vac. Môt tige wê a mi nêl vô xomxo vông vinên vac vigwe vihati.

¹⁸Xam ya xo ên xam nêbê mêd a lôc vôn xam ob ma, om xam yong xam. ¹⁹Lêc Apumtau obêc lee yuu ge od a ob lôc vô xam lutibed di yaxên xomxo wê yong he ge. Lêc a ob yaxên kiyang wê he nêl ge lêm. Nge, a ob yaxên xêkizêc wê he vông ge. ²⁰Ên môt wê xomxo ob tu Anutu nue mi la vac i kwa ngibi ge, kehe o yêp vac kiyang pileva lêm. Nge, kehe yêp vac xêkizêc wê Anutu vông ge. ²¹Mêgem xam nêb a vông môt ngwe na vô xamê? Xam nêb a lôc hixôn viyi ên titô xam ya, me xam nêb a xo vigwe pisiv ên xam di lôc hixôn kiyang malehe?

Môt yôdac vêx yuu vux yêp vac konglegesen Kolin

5 ¹Xomxo ya nêl vô a ên nêbê môt yôdac vêx yuu vux yêp vô xam bêga nêbê xomxo ti vông yôdac vô ma vinê, lêc o ta wê kô i ge lêm. Môt tige nipaên nôn, wê tibii madiluhu o mi vông ge lêm. ²Bêna lêc xam yong xam? Xam sea môt wê xam yong xam ge, di xam nim i yoc ên xam di xam byag, di xam tii xomxo ti wê vông môt nipaên tige i loc vêl.

³A ga, a nignivi dô teva ên xam, lêc a nilôg mi xo xam, om a yaxên kiyang wê xomxo tige vông ge pyap, tiyi xocbê a dô hixôn xam ge. ⁴Om a nêl bêga vô xam bê xam kitucma lec Apumtau Yesu lê di xam xovô a kiyang i tiyi xocbê a dô hixôn xam ge, di xêkizêc wê il lig Apumtau Yesu vông ge ob dô hixôn xam, ⁵om xam vông xomxo tige i loc vac Seten vigê ên i vông i nini vi i vô nipaên, êdêc xomxo tige kinu i loc dô nivuha vô buc wê Apumtau Yesu ob vena lec ge.

Pol nêl ên nêbê he i tii xomxo nipaên i loc vêl

⁶Xam yong xacxam va, lêc môt tibêge o nivuha lêm. Yis nipwo tya tiyi wê ob vông blet vihati vuac mi vô levac ge, lêc mêd xam o xovô lêm?

7Xam tiyi xocbê blet wê yis maên ge, om xam hóm yis vêl, êdêc xam dô i tiyi xocbê blet nivîha wê yis maên ge, ên Kilisi yib di kitya il nêd nipaên vêl pyap, tiyi xocbê bwoc sipsip wê he hi i yib lec buc Pasova ilage. ⁸Om il ob sea môp nipaên viyang viyang i tiyi xocbê he Yuda nêx yis la xel lec buc Pasova di ya blet pileva wê yis maên ge, di il ob dô hixôn nilôd tibed di nêl kiyang nôn voma, i tiyi xocbê blet wê yis maên ge.

⁹Kipihac wê a kivuu i loc vô xam ilage, a nêl vô xam ên a nêbê xam o léc dô hixôn xomxo wê mi vông môp yôdac vêx yuu vux ge lêm. ¹⁰Kiyang tige, a o nêl lec tibii madiluhu wê vông yôdac vêx yuu vux, di he wê mi doma, di he wê mi vun xomxo susu, di he wê yev vixa kitu vô anutu kityooên ge lêm. Ên xam obêc nêb xam ob dô hixôn tibii madiluhu lêm ge od xam ob la na? Ên xomxo tigeê dô vac vigwe vihati. ¹¹Lêc kiyang wê a kivuu ge kehe bêga nêbê xomxo ti wê nêl nêb il lig vông vinên ti ge obêc dô vac môp yôdac vêx yuu vux, me obêc doma vô xomxo ngwe susu, me obêc yev vixa kitu vô anutu kityooên, me obêc so vya vô xomxo, me obêc num mi vô mavmav, me obêc vun xomxo ngwe susu ge, od xam o dô hixôn xomxo tibêgee lêm, di xam o léc wa hixôn he lêm. ¹²⁻¹³Tibii wê o vông i vin lêm ge, a o tiyi wê a ob yaxên he ge lêm. Ên Anutu vaci obêc yaxên he. Lêc lime vông vinên ge, xacxam va ob yaxên he. Om xam tii xomxo ti wê vông môp yôdac vêx yuu vux ge i loc vêl ên xam.

Xam o léc vông kiyang vô lime vông vinên lêm

6 ¹Xam ti kiyang obêc yêp vô lime ngwe ge om bêna léc xam luu lime vông vinên vêl di kô kiyang mi la vô tibii madiluhu ên xam nêb he i titô xam nêm kiyangê? ²Il wê Anutu nue ge, il obêc yaxên xomxo kibun ga nên kiyang timuên, léc xam mêd lungên tige? Xam obêc titô xomxo vihati nên kiyang timuên, léc mêd xam o tiyi wê xam ob titô xacxam va kiyang nipipwo ge lêmê? ³Xam ngô lê. Il obêc titô angela nên kiyang timuên, om môp kibun ga, ge tiyi wê il ob titô êno mêge. ⁴Om kiyang obêc yêp lec susu kibun ga ge od bêna léc xam kô mi la vô tibii wê madiluhu ge ên xam nêb he i titô xam nêm kiyangê? ⁵A nêl kiyang bêge vô xam ên a nêb i vông xam nim i yoc ên xam. Xam lime piyôp wê ob yaxên lime nên kiyang ge, ti mêd o dô vac xam mahigun lêmê? ⁶Ên lime vông vinên ya vông kiyang vô lie, léc he kô kiyang tige mi la vô tibii wê vông vinên maên ge ên nêb he i titô.

⁷Môp wê xam kô lime ngwe mi la kiyang ge, ge xam vông i so. Môp wê nivîha ge bêga nêbê lime ti obêc vông nipaên vô xam ge od xam o léc nêl lêm. Di lime ti obêc vun xam nêm susu ti ge od xam o le vac i xôn lêm.

⁸Xam o timu vô môp nivîha bêge lêm. Nge, xacxam va vông môp nipaên vô lime di vun he nên susu.

⁹Xam ngô lê. Xomxo nipaên ti ob la dô vac Anutu ben lêm, léc mêd xam o xovô tige lêm? Xam nilôm i o léc kityoo xam lêm. Ên xomxo

wê vông môt yôdac vêx yuu vux di xomxo wê yev vixa kitu vô anutu kityooên, di xomxo wê vông môt iimaên vô nipaên, di vux wê vông môt nipaên vô vux vaci, ¹⁰ di xomxo wê vun xomxo susu, di xomxo madoên, di xomxo wê mi num mi vô mavmav, di xomxo wê nêl kiyang nipaên lec xomxo, di xomxo wê vô xomxo ngwe susu vêl ge, xomxo tibêgee o tiyi wê ob la dô vac Anutu ben ge lêm. ¹¹ Ilage xam ya mi timu vô môt tibêgee, léc Anutu lipac xam vô paha lec di vînoo xam nêb xam tu i nue di yê xam nêb xam xomxo nivîha. Anutu vông bêge lec Apumtau Yesu Kîlisi yuu Myakîlôhò Ngîbua wê Anutu vông ge.

Il ob vông il nidnivi i pimil Anutu

¹² Xomxo ya nêl ên he nêbê môt vihati nivîha tiyi wê il ob vông ge. He nêl vixôhilôg, léc môt ya ob vô nivîha vô il lêm. Môt vihati ge tiyi wê a ob vông ge lê, léc a ob vông môt ti i viac a lêm. ¹³ Xomxo ya nêl ên he nêbê yaên dô ên il xêdyaa di il xêdyaa dô ên yaên. He nêl vixôhilôg, léc Anutu obêc vông yuu xôn xôa obêc ma timuên. Di il nidnivi ge, Anutu o tung ên nêb il vông môt yôdac vêx yuu vux lêm. Nge, il nidnivi ob tu Apumtau xe, di Apumtau ob ngîdu il nidnivi xôn. ¹⁴ Anutu tipî vô Apumtau Yesu kidi lec vac yibên, om obêc tipî vô il kidi lec vac yibên êno ya xêkizêc wê i vông ge.

¹⁵ Il hixôn Kîlisi tiyi xocbê ninivi nôn tîbed, léc mêd xam o xovô lêmê? Tiyi wê il ob hôm Kîlisi ninivi mya ti vêl di vông i tu vêx yôdac ninivi mya ti, me? Ma vêl, môt tibêge o tiyi lêm. ¹⁶ Vux ti obêc la dô hixôn vêx yôdac ti ge od yuu ob tiyi xocbê nôn tîbed, léc mêd xam o xovô tige lêm? Ên kiyang wê yêp vac kipihac xolac ge nêl bêga ên nêbê, “Yuu ob tu ninivi nôn tîbed.” ¹⁷ Léc xomxo ti obêc vông i vin Apumtau ge od yuu xôn ob dô nôn tamaên tîbed. ¹⁸ Mêgem xam xona nêl ên môt yôdac vêx yuu vux. Ên môt nipaên viyang viyang wê xomxo vông ge ob vông he vô nipaên, léc môt yôdac vêx yuu vux ge wê ob vông xomxo nîlô yuu ninivi vihati vô nipaên. ¹⁹ Xam nimnivi ge tiyi xocbê xumac ngîbua wê Myakîlôhò Ngîbua ob dô vac ge, léc mêd xam o xovô tige lêm? Anutu vông Myakîlôhò Ngîbua lam dô vac xam nîlôm. Om xacxam va o tu xam kehe lêm, ²⁰ ên Anutu kisuu xam ya susu levac mabu yocên mi xam tu ixe, om xam nimnivi i pimil Anutu ya môt wê xam vông ge.

Kiyang lec môt iimaên

7 ¹ Kiyang wê xam kinêg vô a vac kipihac ge, a ob nêl vô xam. Kiyang bêga nêbê xomxo ti obêc dô pileva di iîên vêx obêc ma ge od obêc nivîha. ² Léc môt yôdac vêx yuu vux yêp, om vux toto ge, he i kô vêx di vêx toto ge, he i kô vux. ³ Di vux i o léc kol ninivi ên vinê lêm. Di vinê êno i o léc kol ninivi ên liya lêm. ⁴ Ên vêx o tu ici va ninivi kehe lêm. Nge, liya tu vinê ninivi kehe. Di vux êno o tu ici va ninivi kehe lêm. Nge,

vinê tu liya ninivi kehe. ⁵Om xam wê xam iima ge, muu o léc kol nimnivi ênma lêm. Vixôhilôg, muu xôn obêc nêl kiyang i yêp tibed ên muu nêb muu ob vông mahigun vac di kitaa vô Anutu ge od obêc nivihâ. Lêc muu obêc kitaa pyap ge od muu xôn kitucma tii vac nang, ên muu ob dô teva ênma xuhu dia ge od muu o tiyi wê muu ob viac nimnivi nivihâ ge lêm di Seten ob yaxên muu di vông muu vac môp nipaên. ⁶Kiyang wê a nêl ga, a o nêl ên a nêb xam vihati ob timu vô ge lêm. Ge yêp vô xam toto, om xam ti obêc nêb timu vô ge od i timu vô. ⁷A nêb xomxo vihati obêc dô pileva tiyi xocbê a ge od obêc nivihâ, léc Anutu vông xêkizêc hixôn xovôên vô xomxo toto, om ya ob iima di ya iimaên ob ma.

⁸A ob nêl kiyang ti vô xam ngivihî yuu vêxwo wê xam gên o iima lêm ge hixôn xam vêxôv bêga bê xam obêc dô pileva tiyi xocbê a ge od obêc nivihâ. ⁹Lêc xam tiyiên ob ma wê xam ob viac nimnivi nivihâ ge od xam iima, ên xam ob dô pileva ge od nilô ngaên ob vông xam vô nipaên, om xam iima ên dô nivihâ.

¹⁰A ob nêl kiyang bo ti vô xomxo wê iimaên ge, léc o aca va kiyang lêm. Nge, Apumtau kiyang, om a nêl kiyang xêkizêc bêga bê vêx i o léc sea liya lêm. ¹¹Lêc obêc sea ge od i dô pileva di i o léc loc kô vux ngwe lêm. Lêc obêc nêb dô pileva lêm ge od i lôc vô liya ên yuu i titô kiyang wê yêp vac yuu mahigun di kitucma i tii vac. Di vux êno i o léc sea vinê lêm.

¹²Nang di a ob nêl kiyang ti vô xam ya. Lêc kiyang ga o Apumtau vya lêm. Nge, aca va nêl bêga ên a nêbê vux wê vông i vin ge ti obêc kô vêx wê madiluhu ge ngwe, léc vinê obêc lee yuu nêb ob dô hixôn liya ge od liya i o léc sea vinê lêm. ¹³Di vêx wê vông i vin ge ti obêc kô vux wê madiluhu ge ngwe, léc liya obêc lee yuu nêb ob dô hixôn vinê ge, od vinê i o léc sea liya lêm. ¹⁴Ên vux wê madiluhu ge obêc dô hixôn vinê wê vông i vin ge od tiyi xocbê yuu xôn tu Anutu xe. Di vêx wê madiluhu ge obêc dô hixôn liya wê vông i vin ge od tiyi xocbê yuu xôn tu Anutu xe. Ên obêc ma ge od xomxo tige nue ob dô tiyi xocbê tibii madiluhu ge, léc o bêge lêm. Ên he nue tu Anutu xe hixôn. ¹⁵Lêc vêx wê madiluhu ge obêc nêb sea liya wê vông i vin Kilisi ge od i sea, di vux wê madiluhu ge obêc nêb sea vinê wê vông i vin ge od i sea. Ên kiyang ti o yêp wê ob ku xomxo vông vinên tige xôn ge lêm. Ên Anutu tyuc il nêb il ob dô vac kiyang malehe. ¹⁶Ông vêx, ông tiyi wê ông ob didii liyam mi loc vô Anutu ge, me? Ông o xovô lêm. Di ông vux, ông tiyi wê ông ob didii vinêm mi loc vô Anutu ge, me? Ông lungên.

Il ob dô vac môp yuu yuac wê il dô vac di Anutu tyuc il ge

¹⁷Apumtau vông môp yuu yuac toto vô xomxo toto, om môp yuu yuac wê xam dô vac vô buc wê Anutu tyuc xam ilage od xam tup vô gwêbaga hixôn. A mi nêl kiyang tibêge vô xomxo vac konglegesen vihati. ¹⁸Om

xomxo ti obêc gôl ninivi pyap, lêc Anutu tyuc i nêb i tu i nu ge od xomxo tige ob lax duu ninivi xôn tii vac lêm. Di xomxo ti obêc dô di ninivi gôlên ma, lêc Anutu tyuc i nêb i tu i nu ge od i o lêm gôl ninivi lêm. ¹⁹Ên môp wê ninivi gôlên hixôn môp wê gôlên ninivi ma ge, yuu xôn tiyi xocbê susu pileva. Di môp nôn tixed wê nêb il viac Anutu xolac nivîha di timu vô ge.

²⁰Xam lêc dô vac môp yuu yuac i tiyi xocbê xam dô vac ilage di Anutu tyuc xam nêb xam tu i nue. ²¹Om xam wê xam tu xomxo ya nue yuac pileva xocbê kalabuhu ge dêc Anutu tyuc xam nêb xam tu i nue ge, od xam nilôm i o lêm vô viyin ên yuac wê xam dô vac ge lêm. Lêc xomxo levac wê viac ông ge obêc nêb ông sea yuac tige ge od ông sea. ²²Ên xomxo wê tu xomxo ngwe nu yuac pileva ge, Apumtau obêc tyuc i nêb i tu i nu ge od Anutu ob yê xomxo tige tiyi xocbê o dô vac xomxo ngwe kwa ngibi ge lêm. Di xomxo wê o dô vac xomxo ngwe kwa ngibi lêm ge, Kîlisi obêc tyuc i nêb i tu i nu ge od obêc dô tiyi xocbê Kîlisi nu yuac. ²³Anutu kisuu xam ya susu levac mi xam tu i nue, om xam o lêm sea Anutu di loc vac xomxo ngwe kwa ngibi vidaa vidaa lêm. ²⁴Xam lige, môp yuu yuac wê xam dô vac ilage di Anutu tyuc xam ge, xam lêc dô vac gwêbaga hixôn Anutu.

Kiyang lec xomxo wê iimaên ma ge

²⁵Vêx yuu vux wê gên o iima lêm ge, Apumtau o nêl kiyang ti vô a lec he lêm, lêc a ob nêl i tiyi xovôên wê a vông ge, ên Apumtau xo vigwe pisiv ên a di vông xovôên vô a, om kiyang wê a nêl ge nivîha tiyi wê xam ob vông i vin ge. ²⁶⁻²⁷Buc gwêbaga il dô vac viyin levac, om a xo bêga ên a nêbê xam wê xam ii vêx ge, xam o lêm myag môp wê xam ob sea vêx ge lêm. Di xam wê xam dô pileva ge, xam o lêm nêb ii vêx lêm. Nge, xam toto dô i tiyi xocbê xam dô gwêbaga. ²⁸Lêc ông obêc ii vêx ti ge od ông o vông nipaên ti lêm. Di vêxwo ti obêc kô vux ti ge, ge o nipaên lêm. Lêc xomxo wê iima ge obêc xo yuac tibeac om a xo ên a nêb viyin tibêge i o lêm tulec xam lêm.

²⁹Xam lige, a nêl bêga ên a nêbê buc vô kwabo lec, om buc wê gên yêp ge, xomxo wê ii vêx ge, he i vông yuac vô Anutu i tiyi xocbê xomxo wê iiaên vêx ma ge. ³⁰Di xomxo wê byag ge, he i dô i tiyi xocbê he o byag lêm, di xomxo wê dô hixôn xêyaa nivîha ge he i dô i tiyi xocbê he xêyaa o nivîha lêm. Di xomxo wê kisuu susu ge, he i dô i tiyi xocbê he nêb susu maên ge. ³¹Di xomxo wê vông yuac ên susu kibun ga ge, he i dô i tiyi xocbê he o vông nilô la vô susu kibun ga lêm. Ên môp yuu susu wê dô lec kibun ga ge xôa obêc ma.

³²A nêl bêge, ên a nêb xam dô hixôn nilôm nivîha, di nilôm i o lêm loc vô môp yuu susu kibun ga lêm. Vux wê o ii vêx lêm ge tiyi wê he ob vông nilô la diluhu vô Anutu yuac ên nêb ob vông môp wê Anutu xêyaa

vin lec ge. ³³Lêc xomxo wê ii vêx ge ob vông nilô la vô môt yuu susu wê ninivi xen ge hixôn, ên nêb ob vông vinê xêyaa i vô nivihã, ³⁴om nilô la yuu. Di vêxwo hixôn vêx wê o kê vux lêm ge, he ob vông nilô la vô yuac wê Anutu vông ge, ên he nêb he ninivi yuu nilô yen i dô ngibua. Lêc vêx wê ii vux ge ob vông nilô la vô môt yuu susu wê ninivi xen ge hixôn ên nêb ob vông liya xêyaa i vô nivihã. ³⁵A nêl kiyang tige vô xam ên a nêb i ngidu xam xôn di xam dô nimvihã. Di a ob le vac xam xôn lêm. Nge, a nêb xam dô nivihã di vông nilôm i loc diluhu vô Apumtau.

³⁶Xomxo ti obêc xo nêb i vông môt soên, ên wê nu vêx vô vêxwo pyap tiyi wê ob kê vux ge di nu vêx êno nêb ob kê vux, léc ma gên o lee yuu lêm ge od ma i timu vô môt wê i xovô ge di vông nu vêx tige i kê vux, ên môt ii maên o nipaên lêm. ³⁷Lêc ma obêc xo vac nilô nêbê i nu vêx ob dô gilon di kêên vux obêc ma, di susu ti o le vac môt xôn lêm ge od i léc timu vô xovôên wê yêp vac i nilô ge di nu vêx i dô gilon ge od obêc nivihã. ³⁸Mêgem ma tyo obêc vông nu vêx kê vux ge od nivihã, léc ma obêc nêb vông nu vêx dô pileva di iiên vux ob ma ge od ge nivihã yang.

³⁹Vêx ti liya obêc gên dô ge od xolac nêl bêga ên nêbê i dô hixôn liya di seaên liya i ma, léc liya obêc yib di vêx tige obêc nêb kê vux paha ngwe nang ge od i kê vux tiyi xovôên wê i vông ge. Léc i kê vux wê yuu xôn timu vô Apumtau xolac ge. ⁴⁰Lêc xovôên wê a vông ge bêga nêbê vêxôn tige obêc dô pileva di kêên vux obêc ma ge od obêc dô hixôn xêyaa nivihã yang. Di a ga, a xovô ên a nêbê Myakilôhô Ngibua wê Anutu vông ge dô hixôn a om vông xovôên nivihã vô a.

Bwoc liyôhô wê tibii vông i tu daa vô anutu kityooên ge

8 ¹A ob nêl kiyang lec môt wê ob yaên bwoc wê tibii vông i tu daa vô anutu

kityooên ge. Vixôhilôg, il vihati tulec piyôp pyap, léc piyôp ge pileva wê obêc vông il yong il, léc môt wê ob ngidu il xôn ge, môt xêyaa vin lec maên. ²Xomxo ti obêc yong i nêb i xovô kiyang vihati pyap ge od xovôên wê i vông ge o tiyi lêm. ³Lêc xomxo ti xêyaa obêc vin lec Anutu ge od Anutu xovô xomxo tige nêb tu ixê.

⁴Om kiyang lec môt wê ob yaên bwoc liyôhô wê tibii vông i tu daa vô anutu kityooên ge, il xovô ên il nêbê anutu kityooên o susu nôn lêm, ên Anutu nôn tived wê dô. ⁵Vixôhilôg, susu wê xomxo vînoo nêb anutu, di susu wê he vînoo nêb xomxo levac ge, tibeac dô kibun ga di dô kisii ganê, ⁶léc il ga, il xovô ên il nêbê Anutu ge tived, wê il mag, di ici va tu susu vihati kehe, om il ob vông i lê i vô levac. Xomxo levac nôn tived, ge Apumtau Yesu Kilisi, wê i tu susu vihati kehe di ici va vông il lax tu ixê.

⁷Anutu kityooên ge o susu nôn ti lêm, léc xomxo vông vinên ya o vyac xovô kiyang tige lêm. Ên ilage he mi timu vô anutu kityooên, di he mi ya bwoc wê tibii vông vô anutu kityooên ge, léc gwêbaga he xo ên he nêbê

he obêc ya bwoc tige ge od ob vông he nilô vô ningeac di Anutu ob yê he nêb he xomxo nipaên. ⁸Lêc Anutu ob yê môp wê il xa yaên ge di nêl bê il xomxo nivihha me nipaên lêm. Om il xaên obêc ma ge od Anutu ob yê il nipaên lêm, di il obêc xa yaên ge od il ob kô lê levac vô Anutu lec môp tige lêm.

⁹Lêc xam viac xam di xona nêb, ên xam tiyi wê xam ob wa yaên tige lê, lêc xomxo wê gên o vông i vin xêkizêc lêm ge obêc yê wê xam wa ge od obêc vông he nilô vô nipaên. ¹⁰Xam wê xam xovô ge, xam ti obêc la vac xumac wê anutu kityooên vông ge di la dô mi wa, di xomxo wê o vông i vin xêkizêc lêm ge obêc yê wê ông la wa yaên wê tibii vông i tu daa vô anutu kityooên ge od xomxo tige nilô obêc kidu i nêb i ya yaên tige hixôn. ¹¹Om tige tiyi xocbê piyôp wê xam vông ge vông lim tige wê o vông i vin xêkizêc lêm ge vô nipaên. Lim tige Kilisi yib ên i êno, lêc xam vông i vô nipaên. ¹²Xovôên wê he vông ge myabo, om xam obêc vông bêge ge od tiyi xocbê xam vông he sea vông vinên wê he vông ge. Môp tibêge tiyi xocbê xam vông nipaên vô Yesu Kilisi. ¹³Mêgem yaên wê a ob xa ge obêc vông a lige ti vô nipaên ge od a ob xa yaên tige i tii vac lêm, ên a nêb a ob vông a lig tige i vô nipaên lêm.

Pol nêl xolac di o kô susu lec yuac wê i vông ge lêm

9 ¹Mêd môp ti yêp wê ob le vac a xôn ge, me? Ti o yêp lêm. Mêd a o sinale nôn lêm, me? A ga, a sinale nôn, wê a xê il lig Apumtau Yesu lec magnôn. Di yuac wê a vông vô Apumtau ge yuac tige nôn xam wê vông vinên ge. ²Xomxo ya nêl ên he nêbê a o sinale ti lêm, lêc xam xovô ên xam nêbê a ga sinale, ên a nêl xolac vô xam mi xam vông i vin Apumtau, om tiyi xocbê môp wê xam vông i vin ge nêl kitong nêbê a sinale nôn.

³Xomxo ya obêc vông kiyang vô a lec yuac sinale wê a mi vông ge od a mi luu kiyang bêga vô he ên a nêbê, ⁴Mêd xe o tiyi wê xe ob kô xom yaên hixôn numên vô xomxo vông vinên ge lêmê? ⁵Di Pita hixôn Apumtau Yesu lie di sinale baba kô vinêe wê vông i vin ge mi he xôn la vilee vac yuac, di xam lee yuu ên xam nêbê nivihha, lêc mêd xam nêb xe o tiyi wê xe ob timu vô môp tibêge hixôn lêm ge, me? ⁶Mêd xii Banabas, xicxii va o tiyi wê xii ob sea yuac ninivi xen ge lêm, me? ⁷Xam xovô lê. Tibii vevac ob kisuu xen yaên yuu ngakwi wê ob viac heche va ge, me? Ma vêl. Di xomxo ti obêc xin wain vac yuac ge od ici va tiyi wê ob yul nôn ya mi ya, di xomxo ti obêc viac bwoc kau ge od ici va ob gig lul mi num.

⁸Kiyang wê a nêl ga, mêd a nêl i tiyi kiyang kibun ga, me? Lêc kiyang ga yêp vac kipihac xolac hixôn. ⁹Ên kiyang wê Anutu nêl vô Moses ge yêp bêga nêbê, “Bwoc levac ti obêc vông yuac vô ông di kê wit ge od le i lêc ku mya xôn lêm. Nge, i kê wit di ya nôn hixôn.” Kiyang tige, Anutu o nêl lec bwoc vaci lêm. ¹⁰Nge, Anutu nêl kiyang tige lec xe hixôn, ên xomxo

wê vông yuac lec kibun ên nêb ob xin vê ge hixôn xomxo wê ob yul nô n ge, yuu xôn vông yuac levac ên nêb yuu ob kô nô n timuên. ¹¹ Xe loc nêl xolac vô xam tiyi xocbê xe xin vê wê kinu xen ge vac xam nilôm, om xe obêc kô nô n wê ninivi xen ge ya hixôn vô xam ge od ge tiyi. ¹² Ên xomxo ya kô susu wê ninivi xen ge ya vô xam, lêc xe ga, xe tiyi wê xe ob kô susu i luu vêl vô xam.

Xe tiyi wê xe ob kô susu ninivi xen ge vô xam lê, lêc xe nêb xe ob kô lêm, om xecxe va vông yuac ên susu wê ob ngidu xe nimnivi xôn ge, ên xe nêb xe ob le vac Kilisi xolac xôn ên xam lêm. ¹³ Xomxo wê vông yuac vac Anutu xumac ngibua ge, he kô xen yaên vac xumac ngibua, di he wê mi si daa vô Anutu lec alta ge, he mi kô bwoc wê he mi si ge vilu mi la ya. ¹⁴ Môm yêp bêge, om Apumtau nêl kiyang xêkizêc bêga nêbê xomxo wê nêl xolac ge ob kô susu wê ob ngidu he xôn ge vô xomxo wê he la nêl xolac vô he ge.

¹⁵ Lêc a o kô susu bêge ti vô xam lêm. Di kiyang wê a kivuu ga, a o kivuu ên a nêb a ob kô susu ya vô xam ge lêm. Ma vêl. Om vip obêc den a di a xib ge od pyap, ên a xêgyaa vô nivihâ ên wê a o kô susu ti vô xam ge lêm. Mêgem a ob kitaa susu ti vô xam lêm, ên obêc vô xêyaa nivihâ tige vêl ên a. ¹⁶ A mi nêl xolac vô xomxo, lêc o tiyi wê a ob yong a ên wê a mi nêl xolac ge lêm. Ên Anutu vaci vông yuac vô a nêb a nêl xolac, om a nêlên obêc ma ge od a ob tulec myaviwen. ¹⁷ Aca va obêc nêb vông yuac tige ge od tiyi wê a ob kô nô n nivihâ lec yuac tige. Lêc o bêge lêm, ên Anutu vaci vông yuac tige vac a vigêg om a ob vông. ¹⁸ Om nô n vatya wê a obêc kô ge? A kô nô n bêga bê a kô yuac nivihâ wê a ob nêl xolac pileva vô xomxo di a ob kô susu ti vô he lêm. Ên a tiyi wê a ob kô susu vô he ge lê, lêc a nêb a ob kô lêm.

Pol tu xomxo vihati nu yuac

¹⁹ A o tu xomxo ti nu yuac pileva lêm. Lêc aca va nêb a ob tu xomxo vihati nu yuac, ên a nêb a ob didii he tibeac i loc vô Kilisi. ²⁰ Om buc wê a dô hixôn xomxo Yuda ge od a dô vac môm tiyi xocbê he Yuda mi dô vac ge, ên a nêb a ob didii he i loc vô Kilisi. A o dô vac Moses xolac kwa ngibi lêm, lêc a obêc dô hixôn xomxo wê dô vac Moses xolac kwa ngibi ge, od a dô tiyi xocbê a dô vac xolac wê Moses vông ge kwa ngibi hixôn, ên a nêb a ob didii he i loc vô Kilisi. ²¹ Di a obêc dô hixôn xomxo ba wê o xovô Moses xolac lêm ge, od a dô tiyi xocbê he dô ge, ên a nêb a ob didii he mi lôm vô Kilisi. Lêc a o sea Anutu xolac lêm. Nge, a hôm Kilisi xolac xôn pilihi. ²² Di a ob dô hixôn xomxo wê o vông i vin xêkizêc lêm ge od a dô tiyi xocbê he ge, ên a nêb a ob ngidu he xôn ên he i vông i vin xêkizêc. Om a ob dô hixôn xomxo viyang toto ge od a mi dô vac môm tiyi xocbê he mi dô vac ge ên a nêb a ob didii he ya mi lôm vô Kilisi. ²³ A vông môm bêge, ên a nêb a ob vông xolac i vô levac êdêc tulec vizid wê xolac vông ge ya hixôn.

Il ob tup xêkizêc ên kô nôn nivihâ timuên

²⁴Il xovô bê xomxo obêc nêb tup mi nginoo ma ge od he vihâti tup, lêc xomxo tibed obêc nginoo di kô nôn. Om xam tup xêkizêc êdêc nginoo di kô nôn nivihâ. ²⁵Di xomxo wê nêb ob tup mi nginoo ge, he tixuu he nivihâ tiyi buc vihâti di he o vông nilô la vô susu ngwe hixôn lêm. He vông bêge ên he nêb he obêc nginoo ên kô nôn kibun ga, lêc nôn kibun ga ge wê obêc pital lutibed di xôa obêc ma. Lêc nôn wê il ob tup ên ge, wê obêc yêp luta. ²⁶Om a ga, a tup lêc a o tup mi la vaxvax lêm. Nge, a tup mi la bôbac. Di a vông tiyi xocbê xomxo wê mi hi xomxo ya vigê ge, lêc a o hi vigêg la pisiv lêm. ²⁷A tixuu nignivi lec viyin ên a nêb i tup vô môt nivihâ, ên a obêc nêl xolac vô xomxo ya di obêc timuên ge lê, lêc Anutu obêc ngiloo a vêl di a o kô nôn lêm.

Il ob la vac môt nipaên lêm

10 ¹Xam lige, a nêb xam xovô wê ilage Moses didii xe buge Islel mi he la vac vigwe myadongên ge, om viyôbtoc yêp kisii mêd didii he vihâti, di gwec tip lax yêp viwen viwen di he vihâti la vac mahigun wê kwepên ge di la kehe vilu ganê. ²Om viyôbtoc yuu xôn gwec ge, tiyi xocbê he vihâti lipac mia di timu vô Moses xolac. ³Di he xôn vihâti ya yaên wê Anutu Myakilôhô Ngibua vông vô he ge. ⁴Di he xôn num mia wê Anutu Myakilôhô Ngibua vông vô he ge. Mia tige lam vac ngidax ti wê la hixôn he ge. Ngidax tige, ge Kilisi. ⁵Lêc Anutu xêyaa vô myavinê vô he tibeac ên nipaên wê he vông ge om kitya he vêl vac vigwe myadongên.

⁶Kiyang tige ob vông xovôên vô il bêga bê il ob do mad vô môt nipaên i tiyi xocbê he vông ilage lêm. ⁷Om xam o lêc yev vixam kitu vô anutu kityooên tiyi

xocbê he ya vông ge lêm. Kiyang yêp vac xolac bêga nêbê, “He Islel dô mi ya di num, pyap dêc kidi lec mi yoo vô anutu kityooên.” ⁸Di il ob vông môt yôdac vêx yuu vux i tiyi xocbê he ya vông ge lêm, ên he tibeac hiwocên tiyi xocbê 23 tausen ge vông nipaên om yib mima vêl lec buc tibed. ⁹Di il ob yaxên Apumtau i tiyi xocbê he ya vông ilage lêm. Ên he yaxên Anutu om myel nga he di he yib. ¹⁰Di xam o lêc kunac Anutu di nêl kiyang tibeac lec i tiyi xocbê he Islel ya nêl ilage lêm. Ên he kunac Anutu di nêl kiyang tibeac lec i om angela vevac ti lam hi he yib.

¹¹Môt vihâti wê he Islel vông ilage ob vông xovôên vô il, om xomxo kivuu mi i yêp vac kipihac ên nêb il xê di xona ên môt nipaên, ên buc myahipu vô kwabo lec. ¹²Om xomxo ti obêc xo nêb i le xêkizêc pyap ge od i viac i nivihâ ên gec lêc tô mada. ¹³Môt wê tulec xam ên nêb ob yaxên xam ge, môt tibêge wê ob tulec il vihâti tiyima. Lêc Anutu ob vông i tiyi kiyang wê hilu pyap ge di ob sea il lêm, om yaxên wê ob tulec il ge Anutu obêc vông i nginoo il vêl lêm. Nge, obêc hilung môt vô il bêga bê ob vông xêkizêc vô il ên nipaên i o lêc pwoo il pec lêm.

Il o tiyi wê il ob timu vô Anutu hixôn vimwo nipaên ge lêm

¹⁴Xam lige wê a xêgyaa vin lec xam ge, xam vô nimim vô anutu kityooên di pec ên môt tibêge. ¹⁵Xam piyôp nivaha om a ob nêl kiyang vô xam di xam yaxên kiyang wê a ob nêl ge. ¹⁶Kap wain wê il kitaa lec di num vac ge tiyi xocbê Kilisi hi kituc il la tu nôn tived. Di blet wê il hibû mi xa ge, tiyi xocbê Kilisi ninivi kituc il tu nôn tived. ¹⁷Blet tige nôn tived di il xôn vihati, il xa blet tige, om il dô tiyi xocbê nôn tived.

¹⁸Xam xovô lec môt wê he Islel mi vông ge. Ên he obêc tung daa vô Anutu lec alta di ya viwen ge od tiyi xocbê he hixôn Anutu wê i alta tige, he tu nôn tived. ¹⁹Kiyang wê a nêl ga, kehe lec vatya? Mêd a nêl ên a nêbê anutu kityooên hixôn yaên wê tibii vông i tu daa vô anutu kityooên ge, ge susu nôn ti, me? ²⁰Ma vêl, ge o susu nôn ti lêm. Susu wê tibii madiluhu vông i tu daa vô anutu kityooên ge he o vông vô Anutu lêm. Nge, he vông vô vimwo nipaên. Om a nêb xam o lêc kituc loc dô nôn tived hixôn vimwo nipaên lêm. ²¹Ên o tiyi wê xam ob num vac kap wê Apumtau vông ge, nang dêc la num vac kap wê vimwo nipaên vông ge hixôn lêm. Di o tiyi wê xam ob wa yaên wê Apumtau vông ge, nang dêc la wa yaên wê vimwo nipaên vông ge hixôn lêm. ²²Lêc mêd xam nêb xam ob vông Apumtau xêyaa i vô myavinê, me? Xêkizêc wê xam vông ge mêd luu xêkizêc wê Anutu vông ge vêl, me?

Il ob pimil Anutu lê i tiyi buc vihati

²³Xam ya nêl ên xam nêbê môt vihati nivaha tiyi wê il ob vông ge. Xam nêl vixôhilôg lê, lêc môt ya ob vô nivaha vô il lêm. Di môt vihati nivaha tiyi wê il ob vông ge lê, lêc môt ya ob ngidu vông vinên wê il vông ge xôn lêm. ²⁴Xomxo ti i o lêc xovô môt wê ob vô nivaha vô ici va ge lêm. Nge, i xovô môt wê ob vô nivaha vô he xôn lie vihati ge.

²⁵Xam obêc nêb kisuu bwoc liyôhô vac stua ge od le i lêc kinêg bê “Bwoc tiga wê tibii vông i tu daa vô anutu kityooên ge, me?” Le i lêc kinêg bêge lêm. Nge, xam kisuu mi wa. ²⁶Ên kiyang yêp vac xolac bêga nêbê, “Susu vihati wê dô lec kibun ga, Anutu tu kehe.”

²⁷Tibii wê o vông i vin lêm ge ti obêc nêb ông loc wa hixôn i, di ông obêc nêb la ge od ông loc, di ông wa yaên vihati wê ob vông vô ông ge, di ông o lêc xo kiyang tibeac lec di kinêg lec yaên tige lêm. ²⁸Lêc xomxo ti obêc nêl vô ông bê “Yaên tiga, he vông i tu daa vô anutu kityooên” ge od ông xovô xomxo wê nêl kiyang tige di ông xovô viyin wê yêp lec yaên ge. ²⁹Vixôhilôg, ông tiyi wê ông ob wa yaên tige, lêc vô viyin vô xomxo ti wê nêl yaên kitong vô ông ge, om ông o lêc wa yaên tige lêm.

Aca va tiyi wê a ob xa lê, lêc xomxo ngwe wê o vông i vin xêkizêc lêm ge obêc yê a nipaên ên wê a xa ge, om o nivaha lêm. ³⁰A obêc pimil Anutu ên yaên tige di xa lê, lêc xomxo tige obêc yê di nêl kiyang nipaên lec a lec yaên tige om o nivaha lêm.

³¹Mêgem xam obêc wa di num, me xam obêc vông môm vae vae hixôn ge od xam vông môm tigege vihati ên pimil Anutu lê i vô levac. ³²Di xam xovô he Yuda hixôn he Glik, hixôn Anutu nue vông vinên vihati, di xam vông môm wê he ob yê nivihâ ge, di xam o léc didii he loc vac môm nipaên lêm. ³³A ga, môm vihati wê a vông ge, a vông ên a nêb xomxo vihati i yê nivihâ. Di a o vông môm tigege ên a nêb i vô nivihâ vô aca va lêm. Nge, a vông ên a nêb i vô nivihâ vô xomxo tibeac, ên he i pilepac he vô Anutu di Anutu i vô he vêl ên he nêb nipaên.

11 ¹Mêgem xam timu vô a vixag di vông môm i tiyi xocbê a vông ge, ên a timu vô Kilisi vixâ di vông môm tiyi xocbê Kilisi vông ge.

Môm wê ducên nivimihi lec bazub xôn ge

²A hi vixag pec ên xam ên wê xam xovô a, di kiyang wê a nêl vô xam ge xam hôm xôn pilihî di timu vô. ³Lêc a nêb xam xovô kiyang bêga bê Kilisi tu vux vihati bazub, di vux vihati tu vinê bazub, di Anutu tu Yesu bazub. ⁴Om vux ti obêc duc nivimihi lec bazub xôn di kitaa me nêl Anutu xolac ge od ob vông ni yocên vô ici va bazub. ⁵Lêc vêx ti obêc kitaa me obêc nêl Anutu xolac léc o duc nivimihi lec bazub xôn lêm ge od ob vông ni yocên vô ici va bazub, tiyi xocbê vêx nipaên wê pul bazub lihi vêl ge. ⁶Vêx ti ob duc nivimihi lec bazub xôn lêm ge od i kiping bazub lihi vô myabo. Lêc môm wê obêc kiping bazub vô myabo hixôn môm wê ob pul bazub ge obêc vông i ni yoc, om i duc nivimihi lec

bazub xôn mô. ⁷Lêc vux i o léc duc nivimihi lec bazub xôn lêm, ên Anutu tung vux tiyi xocbê ici va, nêb i hilung xêseac wê Anutu vông ge, dom vêx ob hilung xêseac wê vux vông ge. ⁸Ên ilage Anutu o hôm vêx ninivi mi vông i lax tu vux lêm. Nge, hôm vux ninivi di vông i lax tu vêx. ⁹Di Anutu o tung vux ên nêb i ngidu vêx xôn lêm. Nge, tung vêx ên nêb i ngidu vux xôn. ¹⁰Môm yêp bêge, mêgem vêx ob duc nivimihi lec bazub ên i nêl kitong bê i dô vac liya kwa ngibi, ên angela i yê hixôn. ¹¹Lêc môm wê Apumtau vông ge ob xovô vux vaci di lungên vêx lêm, me ob xovô vêx vaci di lungên vux lêm. Nge, yuu xôn ob ngiduma xôn. ¹²Ên taxlee vêx lam vac vux, léc gwêbaga vêx kô nue vux om xocbê vux lam vac vêx. Lêc xomxo vihati ge Anutu tu kehe.

¹³Om xacxam va yaxên lê. Vêx ti obêc kitaa vô Anutu léc o duc nivimihi lec bazub xôn lêm ge od obêc tiyi, me tiyiên obêc ma? ¹⁴Môm wê il mi vông ge nêl kitong vô il bêga nêbê vux ti bazub lihi obêc dia ge od o tiyi lêm. ¹⁵Lêc vêx bazub lihi obêc dia ge od tiyi xocbê vunacên nivihâ, ên Anutu vaci vông vêx bazub lihi dia nêb i hivun he bazub xôn. ¹⁶Xomxo ti obêc nêb ngaên a lec kiyang tiga ge od i xovô bêga bê xe hixôn konglegesen wê Anutu nue ge, xe vihati mi vông môm bêge.

Xomxo Kolin vông môm pasa yaên vô nipaên

¹⁷Kiyang wê a ob nêl vô xam ge, a ob pimil xam lêm. Ên kitucmaên wê xam vông ge o vô nivihâ vô xam lêm, di môm nipaên ya yêp vac hixôn.

¹⁸Kiyang taxlee bêga nêbê buc wê xam kitucma mi wê da ge od xam o dô mya tibed lêm. Nge, xam wêma nipaên om xam dô kidu kidu. Xomxo ya nêl tibêge vô a di a vông i vin kiyang tige mangwe. ¹⁹Vixôhilôg, môt yêp bêga nêbê xam hibuma sea di dô kidu kidu, ên xomxo wê vông i vin nôn ge he i le seac ên xam xovô he. ²⁰Lêc buc wê xam kitucma ge, xam o wa pasa wê Apumtau vông ge niviha lêm. ²¹Ên yaên wê xam toto kô mi lam ge xam wa lutibed, om lime ya dô vip di xam ya wa mi num levac mi vô mavmav. ²²Bêna lêc xam vông môt tibêge vac kitucmaên? Xam nêm xumac wê xam ob wa di num vac ge mêd ma, me? Xam mêd wê Anutu nue vông vinên tiyi xocbê xomxo pileva, di xam vông he wê xen yaên ma ge ni yoc. Om a ob nêb va vô xamê? Xam so ên xam nêb mêd a ob pimil xam lec môt tibêge? Ma vêl. A ob pimil xam lec môt tibêge lêm.

Pol nêl lec wê Yesu vông pasa vô nue ngivihige

²³Kiyang wê a nêl vô xam ilage, Apumtau vaci nêl vô a. Kiyang bêga nêbê vô buc wê Judas vông Yesu Kilisi la vac tibii vevac vigê ge, Yesu hôm blet, ²⁴di kitaa lec mêd hibû di nêl ên nêbê, “Ga a liyôhô wê a vông ên a nêb i ngidu xam xôn. Xam vông i tiyi xocbê a vông vô xam ga di xovô a.” ²⁵He ya pyap, mêd Yesu hôm kap di kitaa lec di nêl ên nêbê, “Mia wain tiga a hi wê ob vông kiyang paha wê Anutu hilu ge vô nôn lec. Buc wê xam ob num ge od xam vông i tiyi xocbê a vông ge di xovô a.” ²⁶Om buc wê xam ob wa blet di num wain ge od xam ob nêl kitong bêga bê Apumtau yib ên il, om xam vông bêge di i loc tyip vô buc wê Apumtau ob vena lec ge.

Xomxo ti obêc vông pasa vô nipaên ge od ob kô myaviwen nipaên lec

²⁷Mêgem xomxo ti ob viac i niviha lêm di ob ya Apumtau liyôhô di num Apumtau hi pileva ge od tiyi xocbê vông Apumtau liyôhô yuu hi vô nipaên, om ob kô myaviwen nipaên lec. ²⁸Om xomxo toto ge i yaxên he di viac he, pyap dêc ya blet di num vac kap. ²⁹Ên xomxo ti obêc ya di num vaxvax di o xovô Apumtau ninivi niviha lêm ge od ob kô myaviwen levac lec nên nipaên wê i vông ge. ³⁰Xam mi vông môt bêge, om xam tibeac tulec vîyin wê xam nimnivi vô xêlehe di yidac vông xam, di xam ya wib. ³¹Lêc il toto obêc yaxên il niviha ge od Anutu ob vông myaviwen tulec il lêm. ³²Lêc Anutu obêc vông myaviwen nipaên vô il ge od vông ên nêb ob titô il, ên il o kô myaviwen nipaên hixôn xomxo nipaên kibun ga lêm.

³³Om xam lige, xam obêc kitucma ên nêb wa pasa ge od xam dô binma. ³⁴Di xomxo ti, vip ob den i ge od i ya yaên vac ben lê, ên kitucmaên wê xam vông ge i o lêc vô nipaên di xam kô myaviwen lec lêm.

Kiyang ya gên yêp om a obêc miloc vô xam lê, lêc titô.

Myakilôhô Ngibua vông xovôên toto vô xomxo

12 ¹Xam lige, a nêb a ob nêl xovôên nivihâ wê Myakilôhô Ngibua vông vô xomxo ge kitong vô xam, ên xam xovô. ²Xam xovô ên xam nêbê buc wê xam gên dô mamdiluhu di lungên xolac ge, od xam nilôm vông xam la vô anutu kityooên wê mayibên ge. ³Om a nêb a ob vông xovôên vô xam bêga bê Anutu Myakilôhô Ngibua obêc dô hixôn xomxo ti ge od o tiyi wê ob nêl kiyang nipaên ti lec Yesu lê ge lêm. Di Myakilôhô Ngibua obêc dô hixôn xomxo ti lêm ge od o tiyi wê ob nêl bê Yesu ge Apumtau ge lêm. Ên Myakilôhô Ngibua vaci wê ob ngidu xomxo xôn di i nêl bê Yesu ge Apumtau.

⁴Myakilôhô Ngibua vông xovôên toto vô xomxo, lêc Myakilôhô Ngibua nôn tived. ⁵Di yuac wê il ob vông ge toto, lêc il vông yuac vô Apumtau nôn tived. ⁶Di piyôp toto yêp wê il ob vông yuac ya ge, lêc Anutu nôn tived wê vông xêkizêc vô xomxo vihati ên nêb he i vông yuac ya ge. ⁷Myakilôhô Ngibua vông xêkizêc wê i vông ge vô xomxo toto ên nêb he toto i vông yuac di i vô nivihâ vô xomxo vihati. ⁸Om Myakilôhô Ngibua vông xêkizêc vô xomxo ya tiyi wê he ob nêl xolac hixôn piyôp nivihâ vô xomxo ge, di Myakilôhô Ngibua nêl xolac kehe kitong vô xomxo ngwe ên nêb i nêl hixôn nôn vô lie. ⁹Di Myakilôhô Ngibua vông xêkizêc vô xomxo ti tiyi wê ob vông i vin xêkizêc ge, di Myakilôhô Ngibua vông xêkizêc vô xomxo ti tiyi wê ob vông xomxo yidac vô nivihâ lec ge. ¹⁰Di xomxo ti kô xêkizêc tiyi wê ob vông do levac ge, di ti tiyi wê ob nêl Anutu xolac yêp seac vô xomxo ge, di ti tiyi wê ob yaxên kiyang yuu môp vihati di xovô bê nivihâ me nipaên, di ti tiyi wê ob nêl kiyang vac vya xôpacên ge^a, di ti tiyi wê ob nêl vya tige kehe kitong yêp seac ge. ¹¹Xovôên tige vihati yêp vô Myakilôhô Ngibua nôn tived, di ici va titang vô xomxo toto ya xovôên wê i vông ge.

Il nidnivi toto ge kitucma di la tu nôn tived

¹²Xomxo ninivi ge tived, di vigê yuu vixa di manôn yuu ninya yuubê ge dô. Lêc vihati ge kitucma di tu ninivi nôn tived. Di Kilisi êno tiyi bêge, ¹³ên il vihati lipac mia ya Myakilôhô Ngibua nôn tived om il tu nôn tived. Il mangwe Yuda di il mangwe tibii Glik, di il ya tu xomxo nue yuac pileva di il ya o tu xomxo ti nue yuac lêm, lêc il xôn vihati ge, il kô Myakilôhô Ngibua tived.

¹⁴Il xovô ên il nêbê xomxo ninivi o tived lêm. Nge, mya toto dô. ¹⁵Om xomxo ti vixa obêc nêl bê, “A o vigê lêm, om a o tu ninivi mya ti lêm.”

^a **12:10** Kiyang bo ti wê nêbê xomxo ya kô xovôên tiyi wê ob nêl kiyang vac vya xôpacên ge, kiyang tige o nêl lec xomxo kibun ga viyang ti vya lêm. Nge, nêl lec angela vya me vya lag puunê ti, lêc Myakilôhô Ngibua vaci vông vac xomxo mya mi he nêl lê, lêc he o xovô vya tige kehe lêm. Nge, he mya vaci nêl.

Obêc nêl bêge ge od ge kityoo nêl, ên i ge ninivi mya ti. ¹⁶Di xomxo ti ninya obêc nêl bêga bê, “A o manôn lêm, om a o tu ninivi mya ti lêm.” Obêc nêl bêge ge od ge kityoo nêl, ên i ge ninivi mya ti. ¹⁷Ên il nidnivi vihati obêc manôn ge od il ob ngô kiyang tibêna? Di il nidnivi vihati obêc ninya ge od il ob yaxên susu nivivea tibêna? ¹⁸Lêc môp o yêp bêge lêm, ên Anutu vaci tung ninivi toto ge vihati tiyi xovôên wê ici va vông ge. ¹⁹Ninivi vihati obêc dô mya tixed ge od ninivi nôn tyo obêc tibêna? ²⁰Lêc môp o yêp bêge lêm. Ên ninivi toto ge kitucma di la tu nôn tixed.

²¹Di xomxo ti manôn tiyiên ma wê ob nêl vô vigê bêga bê, “Ông loc dô xel, ên aca va tiyi wê a ob dô nigviha ge.” Di bazub êno tiyiên ma wê ob nêl vô vixa bêga bê, “Ông loc dô xel, ên aca va tiyi wê a ob dô nigviha ge.” ²²Ên il nidnivi mya ti wê il xê ên il nêbê xêkizêc ma ge obêc ma ge od il nidnivi ob nivihâ lêm. ²³Di il nidnivi mya ti wê il xê ên il nêbê o nivihâ vêl lêm ge od il vunac vô nivihâ, di il nidnivi mya ti wê il xê di il nid yoc ên ge od il viac nivihâ. ²⁴Lêc il nidnivi mya ti wê il xê ên il nêbê nivihâ ge, il o vông bêge vô he lêm, ên he ge nivihâ pyap. Anutu tung ninivi mya titi dô kidu tixed, di ninivi ya wê il xê ên il nêbê pileva ge od Anutu vông lê levac vô he. ²⁵Anutu vông bêge ên nêb ninivi i o lêc hibû he sea lêm. Nge, ninivi mya toto ge, he i viacma nivihâ di ngiduma xôn i tiyima. ²⁶Om ninivi mya ti obêc tulec myavinê ge od ninivi vihati obêc yaxên myavinê tige hixôn. Di ninivi mya ti obêc kô lê levac ge od ob vông xêyaa nivihâ vô he vihati.

²⁷Xam tiyi xocbê ninivi wê Kilisi vông ge, di xam toto tiyi xocbê ninivi mya titi wê Kilisi ninivi vông ge. ²⁸Om Anutu vông yuac vac xomxo vông vinên toto vigê ên nêbê he i vông. Anutu vinoo he wê sinale ge taxlee, nang dêc vinoo xomxo wê ob nêl xolac ge, nang dêc vinoo xomxo wê ob tixuu lie ya xolac ge. Nang dêc vinoo xomxo ya hixôn nêbê he wê ob vông do levac, di xomxo wê ob vông xomxo yidac vô nivihâ lec, di xomxo wê ob ngidu lie xôn, di xomxo wê ob viac yuac vihati, di xomxo wê ob nêl kiyang vac vya xôpacên. ²⁹Om il vihati ge, il ob tu sinale, me? Di il vihati ob nêl xolac vô xomxo, me? Di il vihati ob tixuu lige ya xolac, me? Di il vihati ob vông do levac, me? ³⁰Di il vihati ob vông xomxo yidac i vô nivihâ lec, me? Di il vihati ob keac vac vya xôpacên, me? Di il vihati ob nêl vya tige kehe kitong, me? Ma vêl. Xomxo toto ge, he ob kô he yuac bôbac. ³¹Lêcom xam vông nilôm i loc xêkizêc vô yuac nôn wê ob luu baba vêl ge.

Om a ob nêl môp wê luu môp yuu yuac vihati vêl ge kitong vô xam.

Môp xêyaa vin lecên

13 ¹A obêc keac xomxo toto vya di keac angela vya hixôn, lêc a xêgyaa obêc vin lec xomxo lêm ge od a tiyi xocbê kileng kileng yuu xax kitivên wê tyuc pileva ge. ²Wê a obêc nêl Anutu xolac yêp seac,

di a obêc xovô Anutu kiyang wê yêp xôpacên ge vihati kehe, di xovô kiyang vihati kehe hixôn, di a obêc vông i vin xêkizêc tiyi wê a ob nêl di kitôn i hiyal mi loc ge, lêc a xêgyaa obêc vin lec xomxo lêm ge od a tiyi xocbê xomxo pileva. ³Di a obêc vông susu wê a vông ge vihati la vô xomxo wê susu maên ge, di a obêc vông nignivi mi xomxo si lec ngwax ge, lêc a xêgyaa o vin lec xomxo lêm ge, od môp tige ob vô nivihâ vò a lêm.

⁴Môp xêyaa vin lecên yêp bêga nêbê xomxo ti xêyaa obêc vin lec xomxo ge od ni ob nyag decdec di i vông myaviwen nipaên i luu nipaên wê he vông ge lêm. Xomxo wê xêyaa vin lec xomxo ge od ob vông môp nivihâ vò he. Di xomxo ti xêyaa obêc vin lec xomxo ngwe ge od ob yê xomxo tige nipaên lec susu tibeac wê i vông ge lêm. Di xomxo wê xêyaa vin lec xomxo ge ob yong i di kô i lec vô he lêm. ⁵Di xomxo ti xêyaa obêc vin lec xomxo ge od ob vông xomxo ni nyag vô i lêm, di ob xovô môp wê ob vô nivihâ vò ici va ge lêm. Di xêyaa ob vô myavinê vô xomxo lutibed lêm, di ob hêm nipaên wê xomxo vông vô i ge xôn lêm. ⁶Di xomxo tige ob hi vixa pec ên môp nipaên lêm. Nge, ob hi vixa pec ên môp nivihâ tibed. ⁷Xomxo ti xêyaa obêc vin lec xomxo ge od ob xona ên myavinê wê ob tulec i ge lêm. Nge, ob vông i vin kiyang vihati di ob dô bin nôn nivihâ wê ob val timuên ge di ob le xêkizêc vac viyin wê tulec i ge.

⁸Môp xêyaa vin lecên o tiyi wê ob tip vac ge lêm. Nge, ob yêp dia. Môp wê xomxo nêl Anutu xolac hixôn môp wê xomxo keac vya xôpacên ge ob tiyô vac, di môp wê xomxo kô xovôên lec kiyang ge ob tiyô vac hixôn. ⁹Gwêbaga xovôên wê il vông ge, il xovô bo titi, di xolac wê il nêl ge, il o nêl vihati yêp seac lêm. ¹⁰Lêc obêc timuên ge od susu wê nivihâ nôn ge ob val, om susu wê o nivihâ vêl lêm ge obêc tiyô vac. ¹¹Buc wê a gên dô nipwo ge od a keac tiyi xocbê nipipwo keac ge. Di piyôp yuu xovôên wê a vông ge tiyi xocbê he nipipwo ge. Lêc buc wê a lig ge od a sea môp wê he nipwo vông ge. ¹²Kiyang tige nêl lec il. Ên gwêbaga il o xê susu vihati dô seac lêm, tiyi xocbê il xê madnôn vac deac mapitoc ge, lêc obêc timuên ge, od il obêc xê Anutu nôn lec madnôn. Di gwêbaga xovôên wê il vông ge myabo, di obêc timuên ge il ob xovô Anutu hixôn i kiyang vihati i tiyi xocbê Anutu xovô il ge. ¹³Om môp yon wê ob yêp luta ge bêga nêbê môp vông vinên, di môp wê ob dô binên vizid nivihâ wê ob val timuên ge, hixôn môp xêyaa vin lecên. Lêc môp ti wê luu vêl ge môp xêyaa vin lecên.

**Môp wê ob nêl xolac yêp seac ge luu môp wê
ob nêl kiyang vac vya xôpacên ge vêl**

14 ¹Xam lêc timu vô môp xêyaa vin lecên. Di xam xêmyaa i vin lec yuac nivihâ wê Myakilôhō Ngibua ob vông vô xam ge, lêc yuac ti wê luu vêl ge bêga nêbê xam nêl Anutu xolac vô xomxo. ²Ên xomxo

ti obêc nêl kiyang vac vya xôpacên ge^b od tiyi xocbê o keac vô xomxo kibun ga lêm. Nge, nêl vô Anutu vaci. Ên xomxo wê ngô kiyang tige ob xovô kehe lêm, ên xomxo tige nêl kiyang wê xôpacên ge ya xêkizêc wê Myakilôhô Ngibua vông ge. ³Lêc xomxo ti obêc nêl Anutu xolac yêp seac ge od xolac wê i nêl ge ob ngidu vông vinên wê xomxo vông ge xôn, di ob tipi vô he ên nêb he i timu vô môp nivaha, di ob vông he nilô vô viyin maên. ⁴Xomxo ti obêc nêl kiyang vac vya xôpacên ge, od ob ngidu vông vinên wê ici va vông ge xôn. Lêc xomxo ti obêc nêl Anutu xolac yêp seac vô xomxo ge od ob ngidu xomxo vông vinên vihati ge xôn. ⁵A nêb xam vihati obêc keac vac vya xôpacên ge od obêc nivaha. Lêc xam vihati obêc nêl Anutu xolac vô xomxo ge od obêc nivaha luu vêl. Ên môp wê xomxo nêl xolac yêp seac vô xomxo ge luu môp wê xomxo keac vac vya xôpacên ge vêl. Ên xomxo ti obêc keac vac vya xôpacên ge lêc o nêl kiyang tige kehe yêp seac hixôn lêm ge od o tiyi wê ob ngidu xomxo vông vinên xôn ge lêm. ⁶Xam lige, a obêc loc vô xam lêc nêl kiyang vac vya xôpacên ge od ob ngidu xam xôn tibêna? Lêc a ob nêl kiyang wê Anutu nêl vô a ge kehe kitong vô xam, di a ob vông xovôên ya vô xam, di a ob nêl xolac yêp seac vô xam, di a ob tixuu xam ya kiyang ya ge od môp tibêgee wê ob ngidu xam xôn.

⁷Susu ya xocbê pijôg yuu gita ge tiyi bêge êno. Ên xomxo obêc hi nivaha lêm ge od il ob xovô vya ti wê tyuc ge tibêna? ⁸Di vuac obêc tyuc vya yacyac ge od xomxo vevac ob viac he nivaha lêm. ⁹Om xam tiyi bêge êno. Ên xam obêc nêl kiyang vô xomxo vac vya ba wê he lungên ge od he ob xovô kiyang tige kehe tibêna? Kiyang wê xam obêc nêl ge obêc nididun pileva xocbê lea ge.

¹⁰Vixôhilôg, xomxo vya tibeac yêp kibun ga, di vya ti o nididun pileva lêm. Nge, xomxo ngô di xovô kehe, ¹¹lêc a obêc lungên kiyang wê xomxo nêl vac vya bangwe ge od xomxo tige ob yê a xocbê tibii ba ti di a êno ob xê i tiyi xocbê tibii bangwe. ¹²Xam êno, xam tiyi bêge. Xam nêb xam ob kô xovôên hixôn xêkizêc wê Myakilôhô Ngibua vông ge, om a ob nêl vô xam bê xam nilôm i loc vô xovôên wê ob ngidu lime vông vinên xôn ge.

¹³Mêgem xomxo ti obêc kô xovôên vô Myakilôhô Ngibua tiyi wê ob keac vac vya xôpacên ge, od i kitaa vô Anutu, ên i vông xovôên vô i tiyi wê ob nêl kiyang tige kehe kitong i yêp seac ge. ¹⁴Xam xovô lê. A obêc kitaa vô Anutu vac vya xôpacên ge od tiyi xocbê a kinug vaci kitaa di a piyôp o xovô kitaaên tige hixôn lêm. ¹⁵Om a ob vông bêna lec môp tige? A ob vông môp bêga, a obêc kitaa ge od a kinug obêc kitaa di a piyôp ob xovô hixôn. Di a obêc vông lilo ge od a kinug ob vông di a piyôp ob xovô hixôn. ¹⁶Ên ông kinum vaci obêc pimil Anutu vac vya xôpacên ge od xomxo ti wê ngô kitaaên wê ông kitaa ge o tiyi wê ob lee yuu hixôn ge

^b 14:2 ông wê 1 Kolin 12:10.

lêm, ên o xovô kiyang tige kehe lêm. ¹⁷Kitaaên wê ông pimil Anutu vac vya xôpacên ge nivihâ, léc o tiyi wê ob ngidu xomxo tige xôn ge lêm.

¹⁸A pimil Anutu ên wê a nêl kiyang vac vya xôpacên tiyi buc vihati luu xam vêl ge, ¹⁹léc a ob nêl kiyang vac kitucmaên wê xomxo mia lipacên vông ge od a ob nêl kiyang xuhu dia vac vya xôpacên lêm. Nge, a ob nêl kiyang bo ti hixôn piyôp, ên i vông xovôên vô he.

²⁰Xam lige, xam o léc xovô kiyang xocbê he nipipwo xovô ge lêm. Vixôhilôg, môm wê nipaên ge, xam o léc xovô môm tibêge lêm, i tiyi xocbê nipwo wê xovôên ma ge. Léc kiyang nô n ge, od xam xovô nivihâ i tiyi xocbê xomxo levac wê xovôên ge. ²¹Kiyang yêp vac kipihac xolac bêga ên nêbê,

“Apumtau nêl bêga nêbê, ‘Kiyang wê a ob nêl vô xomxo tige ge, a ob vông tibii wê vya bangwe ge he i kô kiyang tige mi loc nêl vô he, di he ob ngô lê, léc he ob vông i vin kiyang tige lêm.’”

²²Xolac nêl bêge, om il ob xovô bêga bê môm wê xomxo ob nêl kiyang vac vya xôpacên ge od Anutu o hilung vô xomxo vông vinên ên nêb he i ngô lêm. Nge, hilung vô tibii madiluhu nêb he i ngô. Di môm wê xomxo ob nêl Anutu xolac ge, Anutu o vông ên nêb tibii madiluhu i ngô lêm. Nge, vông ên nêb xomxo vông vinên i ngô.

²³Om xam vihati vac konglegesen obêc kitucma di keac vac vya xôpacên, di tibii madiluhu ya obêc val dô hixôn xam di ngô vya wê xam keac ge od he ob nêl bê xam vô mavmav. ²⁴Léc xam vihati obêc dô di nêl Anutu xolac, léc tibii madiluhu me tibii wê xovôên ma ge ti obêc val dô hixôn xam di ngô xolac wê xam nêl ge od xolac wê xam nêl ge obêc kitiv i nilô di i xovô nê nipaên wê yêp vô i ge, ²⁵di kiyang wê yêp xôpacên vac i nilô ge obêc lam yêp seac, om xomxo tige obêc yev vixâ kitu vô Anutu di pimil i nêbê, “Vixôhilôg nô n, Anutu dô vac xam mahigun.”

Kiyang lec lilo hixôn xolac nêlên

²⁶Om xam lige, il ob vông môm bêna? Buc wê xam ob kitucma ge od yuac yêp vô xam vihati, om xam ti obêc vông lilo, di ti ob tixuu xam ya xolac, di ti ob nêl Anutu xolac di ti ob nêl kiyang vac vya xôpacên di ti ob pilepac kiyang tige. Xam vông môm tigege vihati ên i ngidu vông vinên wê xam vông ge xôn. ²⁷Di xomxo ya obêc nêb nêl kiyang vac vya xôpacên ge od xomxo yuu me yon ob nêl ge od i pyap, di yon xôn ob nêl kiyang lutibed lêm. Nge, yon toto ob nêl, nang dèc ti pilepac. ²⁸Léc xomxo wê ob pilepac vya tige obêc ma ge, od xomxo wê nêb ob nêl kiyang vac vya xôpacên ge i dô kiyang maên vac kitucmaên, di buc wê ici va obêc dô ge od i nêl vac vya tige vô Anutu.

²⁹Di xomxo yuu me yon ob nêl Anutu xolac, di xomxo wê dôên ge he i yaxên xolac wê yon nêl ge. ³⁰Di xomxo ti ob dô léc Anutu vông kiyang vô i nêb i nêl ge od xomxo ti wê dinêl xolac ge i tiyôô di xomxo ngwe ge i

nêl kiyang nang. ³¹Xam obêc vông môm bêge ge od xam toto ob nêl xolac voma ên vihati i xovô di le xêkizêc vac vông vinên. ³²Xomxo wê mi nêl Anutu xolac ge, he i viac heche va nivîha lê di nêl xolac, ³³ên Anutu o vông môm judajuda ge vô il lêm. Nge, nêb il dô vac kiyang malehe.

Xam timu vô môm i tiyi xocbê xomxo vông vinên vac konglegesen vihati mi timu vô ge. ³⁴Môm bêga nêbê xam obêc kitucma mi wê da ge od vêx i dô kiyang maên, di he i o lêc nêl kiyang ti lêm. Nge, he i dô vac vux kwa ngibi di ngô kiyang wê he ob nêl ge, i tiyi xocbê Moses xolac nêl ge. ³⁵Di vêx ti obêc lungên kiyang ti kehe ge od i kinêg vô liya vac ben xumac lôma. Ên vêx obêc nêl kiyang vac kitucmaên ge od o tiyi lêm. ³⁶Xam nêb va? Xam nêb xam tu Anutu xolac kehe, me? Di xolac val vô xacxam va di o val vô xomxo ya hixôn lêm, me?

³⁷Xomxo ti obêc xo nêb i tiyi wê ob nêl Anutu xolac ge, me obêc xo nêb kô xovôên vô Myakilôhô Ngibua ge, od i lêc xovô bê kiyang wê a kivuu ga, Apumtau vông ên nêb il vông i tup vô. ³⁸Lêc xomxo ti obêc vông i vin kiyang tiga lêm ge od xam o lêc vông i vin bê i xomxo xolac nêlên lêm.

³⁹Mêgem xam lige, xam nilôm i loc vô môm wê xam ob nêl Anutu xolac ge, di xam o lêc le vac môm xôn ên xomxo wê nêb ob nêl kiyang vac vya xôpacên ge lêm. ⁴⁰Môm gee vihati, xam viac nivîha ên i yêp bôbac.

Kilisi yib di kidi lec nang

15 ¹Xam lige, a nêb xam xovô xolac wê a nêl vô xam ilage. Xolac tige xam ngô di vông i vin mi timu vô gwêbaga. ²Om xam obêc vông i vin nôn di hôm xolac xôn pilihi ge od Anutu ob vô xam vêl ên nipaên di xam ob la dô mamviha.

³Kiyang taxlee wê luu kiyang baba vêl ge, a ngô di a nêl ila vô xam bêga ên a nêbê Kilisi yib ên il nêd nipaên, tiyi xocbê xolac nêl ilage. ⁴Di he lii i la vac lôva, di buc yon la vêl di i kidi lec vac yibên tiyi xocbê xolac nêl ilage. ⁵Dêc hîlung i vô Pita, nang dêc hîlung i vô Yesu nue ngivîhi vigê yuu di tô mi la yuu. ⁶Dêc hîlung i vô lie tibeac vô buc tived. Xomxo tige naba nginoo 500, lêc he mangwe yib di he tibeac gên dô gwêbaga. ⁷Nang dêc hîlung i vô Jems di hîlung i vô sinale vihati.

⁸Tîmuên yang tyo ge, od hîlung i vô aca va mi a xê, lêc a tiyi xocbê nipwo wê ta o kô i lec i buc bôbac ge lêm. ⁹Ên sinale vihati luu a vêl di a o nigvîha tiyi wê a ob kô lê sinale tige lêm, ên ilage a vông vîyin levac vô Anutu nue vông vinên. ¹⁰Lêc Anutu xo vigwe pisiv ên a om vông yuac sinale vô a mi a vông di dô gwêbaga. Lêc vizid tyo, nôn o ma lêm, ên a vông yuac xêkizêc luu sinale baba vêl. Lêc o aca va wê vông yuac tige lêm. Ên Anutu vông vizid hivun a xôn di a vông yuac ya. ¹¹Om yuac tige a vông, me sinale baba vông, lêc xe xôn nêl xolac tived ge vô xam om xam ngô di vông i vin.

Xomxo yibên obêc kidi lec

¹²Xe mi nêl ên xe nêbê Anutu tipi vô Yesu kidi lec vac yibên, lêcom bêna lêc xam ya nêl ên xam nêbê xomxo yibên ob kidi lec i tii vac lêmê?

13 Kiyang wê xam nêl ên xam nêbê xomxo yibên obêc kidi lec lêm ge obêc nôn ge od Kilibi êno o kidi lec vac yibên ilage lêm. 14 Di Kilibi obêc kidi lec vac yibên lêm ge od kiyang wê xe nêl ge ob pileva, di vông vinên wê xam vông ge êno ob pileva. 15 Obêc bêge ge od kiyang wê xe nêl lec Anutu ge obêc kityooên, ên xe mi nêl ên xe nêbê Anutu tipi vô Kilibi kidi lec vac yibên. Lêc kiyang wê nêl ên nêbê xomxo yibên obêc kidi lec lêm ge obêc nôn ge od Anutu ob tipi vô Kilibi kidi lec vac yibên êno lêm. 16 Ên Anutu obêc tipi vô xomxo yibên kidi lec maviha lêm ge od o tiyi wê ob tipi vô Kilibi vac yibên êno ge lêm. 17 Anutu obêc tipi vô Kilibi kidi lec lêm ge od vông vinên wê xam vông ge obêc kityooên, di xam ob gên dô vac nipaên, 18 di xomxo wê vông i vin Kilibi lêc yib ge xôa ma hixôn. 19 Il vông i vin di dô bin Kilibi. Lêc xomxo yibên obêc kidi lec lêm ge od kiyang tige obêc ngidu il xôn gê kibun ga vaci di nôn obêc ma timuên, om obêc bêna vô il timuênê?

20 Lêc kiyang o yêp bêge lêm. Ên Anutu tipi vô Kilibi vixôhilôg, om Kilibi kidi lec mugên vac yibên, om il ob xovô bêga bê xomxo yibên vihati ob kidi lec timuên. 21 Xomxo vihati obêc yib ge, kehe yêp vô xomxo ti wê vông nipaên taxlee ge, di xomxo vihati ob kidi lec vac yibên ge, kehe yêp vô xomxo ngwe. 22 Ên xomxo wê pum lec Adam ge vihati obêc yib, di xomxo wê vông i vin Kilibi ge vihati obêc kidi lec maviha. 23 Lêc xomxo vihati ge obêc kidi lec maviha lec he buc, ên Kilibi kidi lec tax, om il ob xovô bêga bê buc timuên wê Kilibi obêc vena lec ge, od il wê il tu i nue ge il ob kidi lec nang.

24 Om buc tige wê susu vihati yang ob tiyô vac, di Kilibi obêc kitya xêkizêc wê gavman hixôn xomxo levac vông ge vêl di xêkizêc vihati yang ge ob la vêl, pyap di Yesu obêc vông xomxo hixôn susu vihati lax vac ma Anutu vigê nêb i viac. 25 Ên Kilibi ob viac xomxo hixôn susu vihati di i loc tyip vô buc wê xomxo wê vông vevac vô i ge ob la vac i vixa kwa ngibi ge. 26 Kilibi obêc kitya xomxo tige vihati vêl, di kitya yibên vêl lec myahipu timuên. 27 Kiyang yêp vac xolac bêga nêbê, “Anutu vông xomxo hixôn môp vihati yang la vac i kwa ngibi.” Il xovô ên il nêbê kiyang tige nêl lec wê Anutu vông xomxo hixôn môp vihati la vac Kilibi kwa ngibi ge, lêc Anutu ticed wê o la vac Kilibi kwa ngibi hixôn lêm. 28 Vihati obêc la vac Kilibi kwa ngibi, nang dêc Anutu nu vaci obêc la vac ma kwa ngibi, di Anutu vaci ob tu levac di viac vihati.

29 Kiyang tige obêc kityooên ge od bêna lêc xomxo ya lipac mia vac xomxo yibên nipilêhê? Ên xomxo yibên obêc kidi lec tii vac lêm ge od bêna lêc xomxo lipac mia ên nêb i ngidu xomxo yibên xônê? 30 Di xe ga, xomxo vông viyin vô xe tiyi buc vihati. Lêc xomxo obêc kidi lec vac yibên lêm ge od bêna lêc xe kilê viyinê? 31 Xam lige, a xêgyaa vô nivaha yang ên xam ên wê xam vông i vin il lig Apumtau Yesu Kilibi ge. Om a nêl hixôn nôn vô xam bêga bê tiyi buc vihati a dô vac viyin tiyi xocbê a ob xib ge.

³²Gê Epesas ga, xomxo vông vevac vô a tiyi xochê bwoc vimen ge. A obêc nêl i tiyi xovôên kibun ga ge od a ob nêl bêga bê viyin tige ob vô nivihavô a lêm. Di xomxo yibên obêc kidi lec i tii vac lêm ge od il ob vông i tiyi kiyang wê xomxo nêl ên he nêbê, “Il ob xa di num di dô vaxvax, ên vô kwabo lec wê il ob xib di la vêl.”

³³Xame, le i lêc vông i vin kiyang kityooên tibêge lêm. Ên il ob dô hixôn xomxo nipaên ge od he ob vông môm nivihavê il vông ge vô nipaên. ³⁴Xam sea piyôp judajuda di xam viac piyôp i yêp nivihavê. Di xam sea môm nipaên wê xam vông ge, ên xam ya gên o xovô Anutu lêm, om a nêl kiyang tiga vô xam ên a nêb i vông xam nim i yoc.

Ninivi yibên wê obêc kidi lec ge obêc bangwe

³⁵Lêc xam ya obêc kinêg bêga bê, “Xomxo yibên obêc kidi lec tibêna? Di ninivi wê he vông ge obêc tiyi vatya?” ³⁶Ông xomxo piyôp maên, ông xovô bê ông obêc xin susu vê ge od obêc la dô vac kibun nipwo tya dêc tyip timuên. Lêc xinên obêc ma ge od ob tyip mavihavlêm. ³⁷Di susu vê wê ông xin ge, o tiyi xochê yatôv yuu lihi ge lêm. Nge, ông xin nôn pileva, xochê skom vê di susu vê ya. ³⁸Lêc Anutu vông vê tige tyip hixôn yatôv yuu lihi tiyi xochê ici va xovô ge, om vê toto ge obêc tyip hixôn yatôv yuu lihi toto.

³⁹Di susu mavihavê dô kibun ga ge vihati, ninivi o tiyima lêm. Nge, he ninivi toto. Om xomxo vaci, ninivi ba ti, di bwoc vaci ninivi ti, di menac ninivi ti, di beac vaci ti. ⁴⁰Di susu ya le lec lag di ya dô gê kibun, lêc vunac vunac wê he vông ge o tiyima lêm. Nge, susu wê le lec lag ge, vunac vunac wê he vông ge viyonên di wê dô lec kibun ga, viyonên. ⁴¹Om xêseac wê hiyôv vông ge vaci, di xêseac wê dentuc vông ge bangwe, di xêseac wê pitua vông ge vaci ti, di byac luu vông ge vaci ti. Om pitua toto ge, xêseac wê he vông ge toto.

⁴²Kiyang tige nêl lec xomxo yibên wê ob kidi lec timuên ge. Ên xomxo ninivi wê yevên ge ob pital, lêc ninivi wê ob kidi lec vac yibên ge obêc pital lêm. ⁴³Di ninivi wê yevên ge o susu nivihavê lêm, lêc ninivi wê ob kidi lec ge od nôn nivihavê hixôn xêseac. Di ninivi wê yevên ge xêlehelehe, lêc ninivi wê obêc kidi lec ge xêkizêc ta. ⁴⁴Di ninivi wê yevên ge, ge ninivi kibun. Lêc ninivi wê ob kidi lec ge, ge kinu wê ob la dô mavihavac Anutu ben ge.

Ninivi kibun dô, di kinu ge êno ninivi dô. ⁴⁵Kiyang yêp vac kipihac xolac bêga nêbê, “Adam taxlee ge tu xomxo mi dô mavihava.” Di Adam ngwe timuên i Anutu nôn wê ob vông xomxo dô mavihavê luta. ⁴⁶Môm wê il kinud ob dô mavihava ge o val tax lêm. Nge, môm wê il dô madvihavê kibun ga val tax, dêc môm wê kinu ob dô mavihava ge val timuên. ⁴⁷Xomxo ngwe wê taxlee ge, xomxo kibun ga wê Anutu hôm kibun mi pitii ya ge, di xomxo ngwe wê timuên ge lam gê lag puunê. ⁴⁸Om il xomxo kibun ga,

il tiyi xocbê xomxo ngwe wê Anutu hôm kibun mi pitii ya ge, di xomxo wê ob la dô lag puunê ge ob tiyi xocbê xomxo ngwe wê lam gê lag puunê ge. ⁴⁹Gwêbaga il dô tiyi xocbê xomxo ngwe wê kibun ga ge, léc obêc timuên ge od il ob dô tiyi xocbê xomxo ngwe wê lam gê lag puunê ge.

⁵⁰Xam lige, a ob nêl bôbac vô xam bê il nidnivi kibun ga o tiyi wê ob la dô vac Anutu ben ge lêm. Me susu wê ob pital ge o tiyi wê ob la dô hixôn susu wê pitalên obêc ma ge lêm. ⁵¹Xam ngô lê. A ob nêl kiyang xôpacên ti kitong vô xam bêga bê il ga, il ya xibên obêc ma, léc il vihati nidnivi obêc pikwê paha lutibed ⁵²vô buc timuên wê vuac ob tyuc ge. Vuac obêc tyuc di xomxo yibên obêc kidi lec maviha vac yibên di he ob pital i tii vac lêm, di il xôn nidnivi obêc pilepac manôn viyonên ti. ⁵³Om il nidnivi wê pitalên ge obêc pilepac di obêc pital i tii vac lêm, di il nidnivi wê yibên ge obêc yib i tii vac lêm. Nge, ob dô maviha luta léc luta. ⁵⁴Vô buc tige il nidnivi pitalên obêc pilepac di pitalên obêc ma, di il nidnivi yibên obêc pilepac di yibên obêc ma, om obêc vông kiyang wê yêp vac kipihac xolac ge vô nôn lec, kiyang wê nêl ên nêbê, “Anutu vông vevac vô yibên ge nginoo vêl om kitya yibên vihati vêl. ⁵⁵Om xêkizêc ti wê yibên vông ge dô tina? Di myavinê wê yibên vông ge dô tina?” ⁵⁶Myavinê wê yibên vông ge, kehe yêp vac môp nipaên wê xomxo mi vông ge. Di xêkizêc wê môp nipaên vông ge, kehe yêp vac Moses xolac. ⁵⁷Léc il ob hi vixad i pec ên Anutu, ên Anutu vông il lig Apumtau Yesu Kilisi lam ên il, om lam vông vevac vô môp nipaên hixôn yibên mi kitya vêl om vông il dô vac xêkizêc wê i vông ge.

⁵⁸Xam lige wê a xêgyaa vin lec xam ge, xam le xêkizêc vac vông vinên di xam o léc xona mi le teva lêm. Nge, xam vông Apumtau yuac xêkizêc i tiyi buc vihati, ên xam xovô pyap bê yuac wê il vông vô Apumtau ge, il o vông pileva lêm. Nge, vihati obêc vô nôn lec.

Mone wê ob ngidu Anutu nue xôn ge

16 ¹A ob nêl kiyang lec mone wê il ob kituc di vông i la vô xomxo vông vinên Jerusalem ên i ngidu he xôn ge. Xam vông i tiyi xocbê a nêl vô konglegesen toto vac vîgwe levac Galesia ge. ²Lec da vihati ge, xam toto wê mone wê xam tulec vac da tige di tung viwen i dô viyonên di bin buc wê a obêc mîloc ge, êdêc buc wê a obêc mîloc ge od xam o léc myag mone lêm. ³Ên a ob mîloc ge od xam vînoo lime ya, di a ob kivuu kipihac di vông vô he, ên he i kô hixôn mone tige mi loc Jerusalem. ⁴Léc a obêc xo ên a nêb a ob la hixôn he ge od xe xôn ob la.

Pol nêb ob la yê he Kolin

⁵A nêb a ob la tup vac vîgwe levac Masedonia, om a ob la xê he vêl tax dêc mîloc vô xam. ⁶Di a ob dô hixôn xam buc ya, om a lungên, mêd a ob dô di buc lun yuu viyiiên i loc vêl lê, di a obêc nêb la vîgwe ya ge od xam

obêc ngidu a xôn. ⁷A obêc miloc vô xam ge od a nêb a ob sea xam lutibed lêm. Apumtau obêc tyuc lec ge od a ob dô hixôn xam buc xuhu dia tya.

⁸Lêc a nêb a ob dô Epesas ga di buc Pentikos i lam loc vêl lê, ⁹ên vuayen tax ên a di yuac tibeac yêp tiyi wê a ob vông ên i vô nôn niviha. Lêcom xomxo wê nêb ob vông yuac i vô nipaên ge tibeac dô hixôn.

¹⁰Timoti obêc miloc vô xam ge od xam viac i niviha ên i dô hixôn nilô niviha, ên Timoti vông Apumtau yuac tiyi xocbê a vông ge. ¹¹Om xam o léc wê i tiyi xocbê xomxo pileva ti di vô nimim vô i lêm. Di buc wê ob sea xam ge od xam vông i lôm hixôn kiyang malehe vô a, ên a hixôn lige ya, xe dô bin i.

¹²Il lig Apolos ge, a nêl nginong ên a nêb i kô lige ya mi he i loc vô xam lê, léc Apolos xêyaa o vin lec wê nêb ob loc decdec ge lêm, om ob dô lê, di obêc xovô buc ti ge od ob miloc vô xam.

Pol nêl kiyang myahipu ya

¹³Xam viac xam niviha di le xêkizêc ya vông vinên. Di xam o léc xona lêm. Nge, xam dô i tiyi xocbê xomxo wê xêkizêc ge. ¹⁴Môp vihati wê xam ob vông ge, xam xêmyaa i vin lecma di xam vông.

¹⁵Xam lige, xam xovô Stepanas he vinê nue wê he vông i vin taxlee vac vigwe levac Glik, di he xôn vông nilô la tibed vô yuac wê ob ngidu lie vông vinên xôn ge. Om a ob nêl vô xam bê ¹⁶xam vô ninyam lehe vô xomxo tibêgee, hixôn xomxo vihati wê vông yuac hixôn he ge.

¹⁷A xêgyaa vô niviha ên wê Stepanas yuu Potyunetas yon Akaikas val vô a ge, ên xam o tiyi wê xam ob lam ge lêm, léc tiyi xocbê yon tu xam mamnôn mi val vô a, ¹⁸om yon vông a nilôg vô viyin maên tiyi xocbê he vông xam nilôm vô viyin maên ge. Om xam kô xomxo tibêge lec niviha.

¹⁹Konglegesen wê dô vac vigwe levac Esia ge vihati nêl vidiiên vô xam. Di Akwila yuu vinê Plisila hixôn xomxo vông vinên wê mi kitucma vac yuu ben ge nêl vidiiên niviha vô xam lec Apumtau lê. ²⁰Xomxo vông vinên ga vihati nêl vidiiên vô xam. Xam pulma vigêm ên i nêl kitong bê xam xêmyaa vin lecma.

²¹Kiyang myahipu timuên tya ga, a Pol, aca va kivuu ya vigêg di a nêl vidiiên vô xam.

²²Xomxo ti xêyaa obêc vin lec Apumtau lêm ge od Apumtau i vông myaviwen nipaên vô i di tii i vêl. O Apumtau, ông lamê.

²³Xêyaa vin lecên yuu vizid wê Apumtau Yesu vông ge i viac xam. ²⁴A xêgyaa vin lec xam vihati lec Yesu Kilisi lê. Kiyang nôn.

2 KOLIN

Pol kivuu kipihac wê vông yuu ge la vô tibii Kolin

1 ¹A Pol wê Anutu vînoo a nêb a tu sinale wê Yesu Kilisi vông ge. A hixôn il lig Timoti, xii kivuu kipihac tiga i loc vô Anutu nue xam wê xam dô vac vîgwe Kolin ge, hixôn xam wê xam dô vac vîgwe levac Glik vîhati ge. ²Il mag Anutu yuu Apumtau Yesu Kilisi i vông vîzid hixôn kiyang malehe i loc dô hixôn xam.

Pol pimil Anutu ên wê ngidu i xôn vac viyin ge

³Il ob hi vixad i pec ên Anutu wê il lig Apumtau Yesu Kilisi ma ge, ên Anutu ge wê xo vîgwe pisiv ên xomxo vîhati, di ici va wê ob vông xomxo nilô vô viyin maên. ⁴Om viyin vîhati wê tulec xe ge, Anutu vông xe nilôm vô viyin maên, ên nêb xomxo ya obêc tulec viyin ya ge od xe tiyi wê xe ob vông he nilô vô viyin maên ge, tiyi xocbê Anutu vông xe nilôm vô viyin maên ge. ⁵Viyin yuu myavinê wê Yesu kilê ilage val vô xe gwêbaga hixôn, lêc Yesu ngidu xe xôn di vông xe nilôm vô viyin maên. ⁶Om xe obêc kilê viyin ya ge od kehe bêga nêbê xe nêb xam nilôm i vô viyin maên di Anutu i vô xam vêl ên nipaên. Anutu obêc vông xe nilôm vô viyin maên ge od ob vông xam êno nilôm vô viyin maên, om buc wê xam ob tulec viyin tiyi xocbê xe tulec ge od xam le xêkizêc di kilê viyin vîhati hixôn nilôm nivîha. ⁷Xe xovô ên xe nêbê xam obêc le xêkizêc vac viyin. Ên xam kilê viyin hixôn xe, om xe xovô ên xe nêbê Anutu ob vông xam nilôm i vô viyin maên tiyi xocbê vông xe nilôm vô viyin maên ge.

⁸Xam lige, xe nêb xe ob nêl viyin wê xe kilê vac vîgwe levac Esia ge kitong vô xam, ên xam xovô. Ên viyin tige levac mabu yocên luu xe vêl om vông xe xovô bêga ên xe nêbê xe obêc xib. ⁹Om xe xo viyin vac nilôm

bêga ên xe nêbê xe tiyi xocbê xomxo wê tibii tung buc pyap ên nêb ob hi xe xib ge. Lêc viyin levac tige val vô xe ên nêb xe o vông nilôm i loc vô xêkizêc wê xecxe va vông ge lêm. Nge, xe nilôm i loc vô Anutu tixed, ên xêkizêc wê Anutu vông ge ob tipi vô xomxo yibên kidi lec maviha ge. ¹⁰Viyin tige levac mabu tiyi wê ob hi xe xib ge, lêc Anutu vô xe vêl ên viyin tyo, di obêc vô xe vêl ên viyin wê obêc tulec xe timuên ge hixôn. Om xe vông i vin xêkizêc ên xe nêbê viyin vihati wê ob tulec xe ge, Anutu ob vô vêl ên xe di vông xe dô nivihia. ¹¹Om xam ngidu xe xôn ya kitaaên, ên Anutu i ngô kitaaên wê xam tibeac vông ge di ngidu xe xôn, êdêc xomxo tibeac i yê di hi vixa i pec ên Anutu.

Pol o kityoo he Kolin lêm

¹²Xe hi vixam pec ên môp wê xe mi vông ge, ên Anutu vông yuac vac xe nilôm om xe vông môp bôbac hixôn nilôm nivihia. Di xe o vông ya xovôên kibun ga lêm. Nge, vizid wê Anutu vông ge ngidu xe xôn di xe vông yuac ya. Om xe nilôm xovô bêga ên xe nêbê xe vông môp tibêge vac xomxo viyang viyang mahigun, di buc wê xe dô hixôn xam ge, od xe vông môp nivihia tibêgee luu vêl. ¹³⁻¹⁴Di kipihac vihati wê a kivuu vô xam ge, a o yax kiyang ti vun ên xam lêm. Nge, a kivuu kiyang vihati yêp seac tiyi wê xam ob kitong di xovô kehe ge. Xam xovô kiyang ya pyap, lêc tibeac xam gên o xovô lêm, om a xovô ên a nêbê xam xovô kiyang i loc tiyi vihati, êdêc buc wê Apumtau Yesu ob vena ge od xam hi vixam i pec ên xe i tiyi xocbê xe hi vixam pec ên xam ge.

¹⁵Ilage a xovô ên a nêbê xam wê yuac wê a vông ge nivihia, om a nêb a ob lôc vô xam tax, ên vông xam xêmyaa i vô nivihia lu yuu. ¹⁶A nêb a ob milôc vô xam tax, nang dêc la Masedonia, pyap dêc vena vô xam i tii vac, ên xam ngidu a xôn vac môp di a la Judia. ¹⁷A nêb a ob la lê, lêc a laên ma, om xam xo bêna? Kiyang wê a nêl vô xam ge, mêd a nêl hixôn nilôg yuu yuu, me? Ge o bêge lêm. Ên môp wê a nêb a ob vông ge, a o nêl kiyang tiyi xocbê tibii ya mi nêl ge lêm. Ên vya wê lee yuu ên nêb ob vông ge, di ngwe wê nêbê obêc ma ge, he nêl yuu xôn vaxvax. Lêc a o vông bêge lêm. ¹⁸Anutu ge wê kiyang nôn kehe om a nêl hixôn nôn bêga bê kiyang wê xe mi nêl vô xam ge, xe o lee yuu ên xe nêb “Xe ob vông”, me nêl ngwe nêb “ob ma”, xe o nêl yuu xôn vaxvax lêm. ¹⁹Ên xen Sailas yuu Timoti, xen nêl Yesu Kilisi wê Anutu nu ge kitong vô xam, di xam xovô ên xam nêbê Kilisi ob nêl kiyang yuu vaxvax lêm. Nge, nêl kiyang nôn tixed. ²⁰Ên kiyang wê Anutu hilu ge Yesu vông vihati vô nôn lec, om il xovô kiyang wê Yesu vông ge di il lee yuu ên il nêb kiyang nôn, om il pimil Anutu lê vô levac. ²¹Anutu vaci vông xêkizêc vô xe hixôn xam om il xôn le xêkizêc hixôn Kilisi, di ici va vinoo il ên nêb il vông i yuac, ²²di vông Myakilôhô Ngibua lam dô vac il nilôd tiyi xocbê il dô vac xenac tibit wê byêxên dop kisuu il lec ge, ên nêb il tu i nue pyap. Anutu vông

Myakilôhô Ngibua tiyi xocbê vông vizid taxlee, ên nêb il xovô bê obêc vông vizid vihati vô il timuên.

Pol nêl kiyang wê o la Kolin lêm ge kehe kitong

²³Anutu xovô a nilôg pyap om a obêc kityoo kiyang ge od i nêl a nêg nipaên i yêp seac di vông myaviwen vô a. Lêc a o kityoo lêm. Nge, a nêl kiyang hixôn nôn ên a nêbê a o lôc vô xam lutibed lêm, ên a nêb a ob lôc nêl kiyang xêkizêc vô xam di vông xam nilôm i vô viyin lêm. ²⁴Xe o tiyi wê xe ob kidu xam lec môp vông vinên ge lêm, ên xam le xêkizêc vac vông vinên pyap, om xe nêb xe ob ngidu xam xôn, ên xam dô hixôn xêmyaa nivaha.

2 ¹A xo vac nilôg ên a nêbê a ob milôc vô xam ên vông xam nilôm i vô viyin i tii vac lêm. ²Ên a obêc vông xam nilôm vô viyin ge od letya ob vông a xêgyaa vô nivaha? Ên xam obêc dô hixôn nilôm viyin ge od o tiyi wê xam ob vông a xêgyaa vô nivaha ge lêm. ³A xo bêge, om a kivuu kipihac ti mi vông i loc vô xam ila, ên a nêb xam lêc pilepac xam, ên buc wê a obêc miloc vô xam ge od xam o lêc vông a nilôg i vô viyin lêm. Ên xam ge wê xam ob vông a xêgyaa vô nivaha, om a xovô ên a nêbê a obêc dô hixôn xêgyaa nivaha ge od ob vông xam xêmyaa vô nivaha hixôn. ⁴Lêc buc wê a kivuu kipihac tige vô xam ilage od a kivuu hixôn nilôg viyin levac di a byag hixôn. A o kivuu kipihac tige ên a nêb a ob vông xam nilôm i vô viyin lêm. Nge, a nêb a ob vông xovôên vô xam bê a xêgyaa vin lec xam luu vêl.

Xam kitya lim ti wê vông nipaên ilage nêl nipaên vêl

⁵Xam lim ti wê vông môp nipaên ilage, môp wê i vông ge o vông a tibed nilôg vô viyin lêm. Nge, vông xam vihati nilôm vô viyin hixôn. Lêc a nêb a ob vông xomxo tige ni i yoc lêm om a ob nêl kiyang tibeac lec i lêm. ⁶Ên xomxo tige kô myaviwen vô xam tibeac lec nipaên wê i vông ge, om ge pyap. ⁷Om gwêbaga xam xêmyaa i vin lec i di xam kitya nipaên wê i vông ge vêl di nêl kiyang malehe vô i, ên obêc dô hixôn nilô viyin levac ge od obêc vông i vô nipaên. ⁸Mêgem a nêl vô xam bê xam vông môp nivaha vô i, ên i xovô bê xam xêmyaa vin lec i.

⁹Kipihac wê a kivuu vô xam ilage, a kivuu ên a nêb a ob yaxên xam béc xam obêc vô ninyam lehe vô kiyang wê a nêl ge vihati, me? ¹⁰Xam obêc kitya xomxo ti nêl nipaên vêl ge od a êno ob kitya nipaên tige vêl. Nipaên ti obêc yêp di a obêc kitya vêl ge od a le vô Kîlisi manôn di kitya vêl ên a nêb i vô nivaha vô xam. ¹¹Ên il kityaên nipaên tige vêlên obêc ma ge od Seten ob kityoo il di vông il la vac môp nipaên, ên piyôp wê Seten vông ge il xovô pyap.

Pol nilô vô viyin ên he Kolin

¹²Ilage wê a la vigwe Tloas ge od Apumtau tax vuayen ên a tiyi wê a ob nêl Kîlisi xolac kitong vô he lê, ¹³lêc a nilôg vô viyin, ên a lig Taitas

o val nêl xam kiyang kitong vô a lêm, om a sea he Tloas di la vigwe Masedonia di la bin Taitas.

¹⁴Lêc gwêbaga a hi vixag pec ên Anutu, ên wê Kilisi vông vevac vô nipaên mi nginoo, om didi xe la vac nivîha hixôn i, di vông xe la nêl Kilisi kitong vac vigwe vihati ên nêb xomxo vihati i xovô, tiyi xocbê susu nivîvea nivîha la vac vigwe vihati mi xomxo yaxên ge. ¹⁵Ên Anutu yê xe tiyi xocbê susu nivîvea wê Kilisi vông ge, om nivîvea tige la vac xomxo mahigun, he wê Anutu ob vô he vêl ge di he wê ob yib mi la vac nipaên ge. ¹⁶Lêc he wê ob yib mi la vac nipaên ge ob yaxên nivîvea tige tiyi xocbê nivîvea nuhu wê ob nux he yib ge, di he wê Anutu ob vô he vêl ge ob yaxên nivîvea tige tiyi xocbê nivîvea nivîha wê ob vông he dô maviha ge. Om letya tiyi wê ob vông yuac tige? ¹⁷Xomxo tibeac nêl xolac tiyi xocbê yuac bisnis wê he ob kô mone lec ge, lêc xe o vông môp tibêge lêm. Nge, xe nêl xolac ya nilôm tibed di xe o nêl kiyang kityooên ya hixôn lêm. Ên xe tu Kilisi nue om xe le vô Anutu manôn di nêl xolac wê Anutu vông vô xe ên nêb xe nêl vô xomxo vihati ge.

Xomxo Kolin tiyi xocbê kipihac wê ob nêl Pol he sinale yuac kitong ge

3 ¹Kiyang wê a kivuu ga, ga xe kô xe lec vô xam, me? Ma vêl. Di môp wê xomxo ya mi vông ge, wê he kô kipihac wê xomxo kivuu mi pimil he vac ge, xam nêb xe kô kipihac tibêge vô xomxo ya mi lam hilung vô xam, me? Di xam nêb xe kô kipihac tibêge vô xam ên i nêl xe kitong vô xomxo ya, me? ²Xacxam va tiyi xocbê xe kipihac wê ob nêl xe kitong vô xomxo ge. Anutu kivuu kiyang tige yêp vac xe nilôm, om xomxo vihati xovô kipihac tige di kitong. ³Ên xam le seac tiyi xocbê kipihac wê Kilisi kivuu di vông vô xe ên nêb xe viac ge. Lêc o kivuu ya kilipi lêm. Nge, kivuu ya Myakilôhô Ngîbua wê Anutu maviha vông ge. Di o kivuu lec ngidax pitehe ti lêm. Nge, kivuu vac xomxo nilô.

⁴Xe nêl kiyang bêge, ên Kilisi ngidu xe xôn di xe vông i vin Anutu om xe nêl. ⁵Xe o tiyi wê xe ob nêl bê xecxe va vông yuac ti ge lêm. Nge, Anutu ngidu xe xôn om xe vông yuac. ⁶Ên Anutu vaci vông xêkizêc vô xe tiyi wê xe ob nêl kiyang paha wê hilu vô il ge kitong vô xomxo. Kiyang paha tige o tiyi xocbê Moses xolac wê yêp vac kipihac ge lêm. Nge, ge kiyang wê Myakilôhô Ngîbua vông ge. Ên Moses xolac ge nêl xomxo nêl nipaên yêp seac om tiyi xocbê hi he yib, lêc Myakilôhô Ngîbua môci vông il dô madviha.

Kiyang paha wê Anutu hilu ge nginoo Moses xolac tikwê vêl

⁷Xolac wê Anutu kivuu lec ngidax di vông vô Moses ge, Anutu vông i lam hixôn xêseac, om xêseac tige linac lec Moses manôn di byêx lie Islel manôn om he o tiyi wê ob yê i manôn ge lêm, nang dêc xêseac tyo la vêl. Xolac wê Anutu vông vô Moses ge vông xovôên vô xomxo bêga nêb he

ob yib lec nê n nipaên, lêc xolac tige lam hixôn xêseac. ⁸Om il ob xovô bêga bê kiyang paha wê Myakilôhô Ngibua vông ge, xêseac wê i vông ge levac luu xolac tikwê wê Moses vông ge vêl. ⁹Ên xolac tikwê nêl ên nêbê xomxo nê n nipaên yêp om he ob kô myaviwen lec, lêc xolac tige lam hixôn xêseac. Di xolac paha wê nêl ên nêbê Anutu yê xomxo nivihalec lec yuac wê Kilisi vông ge, val hixôn xêseac levac luu vêl. ¹⁰Om xêseac wê val hixôn xolac tikwê ge tip la, ên xêseac wê val timuên ge luu xêseac ngwe wê lam tax ge vêl. ¹¹Ên xolac tikwê wê tip la ge lam hixôn xêseac lê, lêc xolac paha wê ob yêp luta ge, xêseac luu vêl.

¹²Xe vông i vin di dô bin buc wê kiyang tige vihati ob vô nôn lec ge. Om xe nêl kiyang vihati yêp seac vô xam, ¹³di xe o vông xocbê Moses vông ilage lêm. Ên ilage Moses manôn xêseac ta lêc vun xôn ya nivimihi ên nêb Islele i o yê wê xêseac ob tip la ge lêm. ¹⁴He Islele ge, piyôp xêkizêc. Vac ilage di i val tyip lec gwêbaga hixôn, om he obêc kitong xolac tikwê ge od tiyi xocbê nivimihi tige vun he manôn xôn om o tiyi wê he ob xovô kiyang tige kehe lêm. Ên Kilisi tibege wê ob kwax nivimihi tige vêl. ¹⁵Vixôhilôg, buc vihati di i val vô gwêbaga, he obêc kitong Moses xolac ge od tiyi xocbê nivimihi yux vac he piyôp xôn. ¹⁶Lêc xomxo ti obêc pilepac i mi lax vô Apumtau ge od Apumtau ob kwax nivimihi tige vêl ên i piyôp. ¹⁷Apumtau ge Myakilôhô Ngibua om Myakilôhô Ngibua wê Apumtau vông ge obêc dô vac xomxo ti nilô ge od ob piwelac kiyang yuu môp wê ku i xôn ge vêl di i dô vac nivihalec. ¹⁸Om il vihati ga, susu ti o vun il madnôn xôn lêm, om xêseac wê Apumtau vông ge linac lec il tiyi xocbê deac wê hixelac di linac lec xomxo vihati ge. Xêseac linac lec il tiyi buc vihati om Myakilôhô Ngibua wê Apumtau vông ge vông yuac vac il nilôd di pilepac il lax tiyi xocbê Apumtau vaci ge.

Pol he sinale vông yuac di tulec viyin hixôn

4 ¹Anutu xo vigwe pisiv ên xe di vông yuac sinale tige vô xe, om xe nim o ma lec yuac tige lêm. ²Nge, xe vô nimim vô môp xôpacên wê nipaên ge, di xe o kityoo xomxo ya kiyang lêm, di xe o kô kiyang baba ya mi lôm juda vac Anutu xolac hixôn lêm. Nge, xe nêl kiyang nôn kitong vô xomxo, ên xe nêb he i ngô di xovô bê yuac wê xe vông vô Anutu manôn ge, xe vông nivihalec. ³Xolac wê xe nêl ge, kehe obêc yêp xôpacên vô xomxo ya ge, od yêp xôpacên vô he wê obêc yib mi la vac nipaên ge. ⁴Xomxo tigege o vông i vin lêm, ên Seten wê mi kityoo xomxo kibun ga ge le vac he piyôp xôn mi i vô mapitoc, om o tiyi wê xêseac wê xolac vông ge ob linac vac he nilô ge lêm. Xolac tige nêl xêseac wê Kilisi vông ge kitong, ên Kilisi tiyi xocbê Anutu vaci. ⁵Kiyang wê xe nêl ge, xe o yong xe lêm. Nge, xe nêl Yesu kitong bêga ên xe nêbê Yesu Kilisi ge Apumtau. Di xe ga, xe tu xam nume yuac lec Yesu lê. ⁶Lec buc taxlee ilage Anutu nêl ên nêbê, “Xêseac i linac vac mapitoc.” Di gwêbaga Anutu vông xêseac wê i vông ge

lam linac vac il nilôd, om il xovô xêseac wê Anutu vông ge wê linac lec Kîlisi manôn.

⁷Xêseac tige tiyi xocbê vizid nivîha yang, lêc Anutu tung i la vac xê nilôm tiyi xocbê tung vac dêg wê o xêkizêc lêm ge nilô, ên nêb xomxo i yê di xovô bê xêkizêc levac tige o yêp vô xe lêm. Nge, lam vô Anutu tîbed. ⁸Viyin viyang viyang ge vihati tulec xe tiyi buc tîbeac, lêc o pwooc xe pec lêm. Viyin tige vông xe piyôp vô judajuda di xe xo kiyang tîbeac lê, lêc o vông xe piyôp vô nîpaên lêm. ⁹Di xomxo tîbeac tii xe nêb ob vông myavinê vô xe, lêc Anutu o sea xe lêm. Di he hi xe lê, lêc he o hi xe vinux lêm. ¹⁰Xe kilê yibên wê Yesu vông ge lec nimnivi tiyi buc vihati, ên maviha wê Yesu vông ge i lam yêp seac di ngidu xe nimnivi xôn. ¹¹Xomxo vông myavinê vô xe tiyi buc vihati ên nêb ob hi xe xib ên wê xe nêl Yesu xolac ge, lêc môp yêp bêga, ên nêb xomxo i yê xe nimnivi mayib yib di xovô bê maviha wê Yesu vông ge ngidu xe nimnivi xôn. ¹²Om xe dô tiyi xocbê xe ob xib ge, lêc môp tige ngidu xam xôn di vông xam dô mamviha.

¹³Xe timu vô môp vông vinên tiyi xocbê kiyang wê yêp vac kipihac xolac bêga ên nêbê, “A vông i vin Anutu om a nêl i kiyang kitong.” Xe êno vông i vin om xe nêl Anutu kiyang kitong yêp seac, ¹⁴ên xe xovô ên xe nêbê Anutu tipî vô Apumtau Yesu kidi lec vac yibên om obêc tipî vô xe êno kidi lec vac yibên tiyi xocbê Yesu ge, di ob vông xe hixôn xam, il xôn la le vô Anutu manôn. ¹⁵Viyin vihati wê xe kilê ge ob vô nôn nivîha vô xam, êdêc vizid wê Anutu vông ge i loc vô xomxo tîbeac di he i hi vîxa i pec ên Anutu di yong i lê i vô levac.

Viyin kibun ga ob vô nôn nivîha timuên

¹⁶Xe xovô kiyang tige, om xe nim o ma lec yuac wê xe vông ge lêm. Vixôhîlôg, xe kilê viyin tîbeac om vông xe nimnivi vô xêlehe sea, lêc xe nilôm mô, Anutu ngidu xôn di vông i vô paha lec tiyi buc vihati. ¹⁷Viyin tige obêc vô nôn nivîha vô xe timuên bêga bê xe ob la dô vac xêseac nilô luta lêc luta. Xêseac tige levac mabu luu viyin kibun ga vêl. Om viyin wê tulec xe ge, xe xê tiyi xocbê susu pileva wê ob yêp dia lêm ge. ¹⁸Om xe mamnôn o la vô susu wê il xê ya madnôn ge lêm. Nge, xe mamnôn la vô susu wê il madnôn yêên ma ge. Ên susu wê il madnôn yê ge ob dô myabo tya di xôa ob ma. Dom susu wê il madnôn yêên ma ge ob yêp luta lêc luta.

Pol nilô vô nivîha ên wê ob la dô hixôn Kîlisi gê lag puunê ge

5 ¹Xe xovô ên xe nêbê xe nimnivi kibun ga tiyi xocbê xumac wê ob yêp myabo tya di pital mi tô sea ge, om xumac tige obêc dii sea ge od xumac ngwe yêp lag puunê wê Anutu ob vông vô xe ge. Xumac tige, xomxo o lox ya vigê lêm. Nge, Anutu vaci lox om ob yêp luta lêc luta.

²Lêc gwêbaga xe dô hixôn nimnivi kibun ga, om xe dô hixôn viyin di vô zidzid, ên xe nêb xe ob dô vac xe xumac lag puunê tiyi xocbê xe vinyum ngakwi lec nimnivi xôn ge. ³Ên xe obêc vinyum lec ge od xe ob dô nimnivi pileva lêm. ⁴Lêc gwêbaga xe gên dô hixôn nimnivi kibun ga tiyi xocbê xe dô vac xumac wê ob dii sea ge, om xe nilôm vô viyin di xe dô hixôn nilôm byagên. Lêc xe o nêl ên xe nêbê xe ob sea nimnivi kibun ga di dô ya kinum pileva lêm. Nge, xe nêb xe ob vinyum nimnivi lag puunê lec, ên ninivi maviha tige i vông ninivi mayibên i vixôl vêl. ⁵Anutu vaci viac xe ên nêb xe la dô mamviha timuên, di vông Myakilôhô Ngibua lam vô xe ên nêb xe xovô bê kiyang tige vihati ob vô nôn lec vô xe.

⁶Om xe dô hixôn nilôm nivaha tiyi buc vihati, di xe xovô ên xe nêbê xe nimnivi kibun ga tiyi xocbê xe bom wê xe dô vac ge om xe gên dô teva ên Apumtau ben. ⁷Gwêbaga xe o xê Apumtau manôn lêm, lêcom xe vông i vin i kiyang di dô vac môp vông vinên. ⁸Om xe dô hixôn nilôm nivaha, di xe xêmyaa vin lec ên xe nêb xe ob sea nimnivi kibun ga di la dô nivaha hixôn Apumtau vac i ben. ⁹Lêcom xe obêc dô hixôn Apumtau vac i ben, me xe ob gên dô teva ge od xe xêmyaa vin lec ên xe nêb xe ob vông môp wê Apumtau ob yê nivaha ge. ¹⁰Ên obêc buc timuên ge od il vihati ob la le vô Kilisi manôn di i yaxên môp wê il vông vô buc wê il dô hixôn nidnivi kibun ga ge di il toto obêc kô myaviwen tiyi nivaha yuu nipaên wê il vông ge.

Pol nêl he sinale yuac kitong

¹¹Xe xona ên Apumtau om xe vông yuac ên xe nêb xomxo i vô ninya lehe vô xolac di vông i vin. Môp wê xe vông ge vihati yêp seac vô Anutu mi i xovô pyap, di a xo ên a nêbê xam êno xovô xe hixôn. ¹²Xe o nêl kiyang tibêge ên xe nêb xe ob yong xe vô xam lêm. Nge, xe nêl ên xe nêb xaxam mô xovô di hi vixam i pec ên xe, ên obêc bêge ge od xam obêc tiyi wê xam ob nêl kiyang lax vô xomxo wê so vya vô xe di kô he lec ên môp wê he vông ge, lêc kiyang nôn o yêp vac he nilô lêm. ¹³Xomxo ya obêc nêb xe vông yuac tiyi xocbê piyôp yacyac ge od pyap, ên xe vông ên xe nêbê Anutu lê i vô levac. Di xe obêc vông ya piyôp nivaha ge od xe vông ên xe nêb i vô nivaha vô xam. ¹⁴Ên Kilisi xêyaa vin lec xe, om xêyaa vin lecên tige kidu xe di xe vông yuac, ên xe xovô ên xe nêbê xomxo tived yib ên il vihati, om tiyi xocbê il vihati xib hixôn. ¹⁵Yesu yib ên xomxo vihati, ên nêb il wê il dô madviha ge, il o lêc xovô icil va lêm. Nge, nêb il xovô xomxo ti wê yib di kidi lec maviha ên il ge di vông yuac wê ob vông i lê vô levac ge.

¹⁶Om xe ob tixuu xomxo lec môp wê xomxo vông ge lêm. Vixôhilôg, ilage xe tixuu Kilisi lec môp wê xomxo vông ge, lêc gwêbaga xe xovô i om xe ob vông môp tibêge i tii vac lêm. ¹⁷Xomxo ti obêc vông i vin di tu Kilisi xe ge od Anutu obêc vông xomxo tige nilô vô paha lec. Xam ngô lê. Môp tikwê tip la, di môp paha val gwêbaga.

¹⁸Anutu vaci tu môt tige vihati kehe, om ici va vông Kĩlisi lam hi kiyang wê yêp vac il Anutu mahigun ge yib di kituc il lam dô nôn tixed hixôn Anutu, di vông kiyang malehe vac xe vigêm ên nêb xe la nêl kitong vô xomxo ên he i dô vac kiyang malehe nilô. ¹⁹Kiyang malehe tige bêga nêbê Anutu vông Kĩlisi lam ên nêb ob hi kiyang wê yêp vac il Anutu mahigun ge i yib. Om Anutu o hôm nipaên wê il vông ge xôn lêm. Nge, kitya vihati vêl. Di vông yuac vac xe vigêm ên nêb xe nêl kiyang malehe kitong vô xomxo. ²⁰Om xe tu Kĩlisi manôn di nêl i kiyang, om tiyi xocbê Anutu vaci nêl kiyang vô xomxo vac xe myam, om xe nêl kiyang lec Kĩlisi lê bêga ên xe nêbê “Xam loc kwabo vô Anutu ên i vô malehe vô xam.” ²¹Kĩlisi o vông môt nipaên ti lêm, lêcom Anutu kituc il nêd nipaên vihati la lec Kĩlisi di i yib ên il. Anutu vông bêga ên nêb ob yê il nivihha lec yuac wê Kĩlisi vông ge.

Sinale kilê viyin lec yuac wê he vông ge

6 ¹Xe wê xe vông yuac hixôn Anutu, om xe ob nêl kiyang vô xam bêga bê Anutu xo vigwe pisiv ên xam di vông vizid nivihha vô xam, om le i léc sea vizid tige i loc yêp lêm. ²Ên Anutu kiyang yêp vac kipihac xolac bêga ên nêbê,

“Vô buc nivihha wê a xo vigwe pisiv ên xam ge, om a vô ninyag vô xam vyam, di buc wê a nêb a ob vô xam vêl ge om a ngidu xam xôn.”

Anutu nêl bêga, om xam wê lê. Gwêbaga buc nivihha tyo mê. Di buc wê Anutu ob vô il vêl ge, val gwêbaga.

³Xe nêb xomxo ti i o léc nêl kiyang nipaên lec yuac wê xe vông ge lêm, om xe o vông môt wê xomxo ob yê tiyiên ma ge lêm. ⁴Nge, môt vihati wê xe vông ge xe vông ên xe nêb i nêl xe kitong bê xe ga Anutu nue yuac, om buc wê xe tulec viyin ya, me susu ma ên xe, me xomxo vông viyin ya vô xe ge od xe le xêkizêc di kilê viyin tige vihati. ⁵Xomxo hi xe di vông xe la dô vac kalabuhu, di xomxo tii xe ên

nêb ob hi xe vô nipaên, di xe vông yuac levac, di xe o xêp nivihha ti lêm di xe dô vip. ⁶Lêc xe nilôm xêseac, di xe dô hixôn xovôên nivihha, di xe o kunac xomxo lutixed lêm, di xe vông môt nivihha vô xomxo vihati, di Myakilôhò Ngibua vông xêkizêc vô xe di xe xêmuya vin lec xomxo nôn yang. ⁷Xe nêl kiyang nôn di vông yuac ya xêkizêc wê Anutu vông ge, di môt nivihha wê xe vông ge tiyi xocbê susu vevac wê xe hôm vac vigêm vilu vilu di vông vevac ya ge. ⁸Xomxo mangwe yê xe nivihha di kô xe lec, di mangwe yê xe nipaên. Di xomxo ya nêl kiyang nimi lec xe di ya pimil xe vô xomxo ya. Xomxo ya nêl ên nêbê xe tibii kityooên, léc kiyang wê xe mi nêl ge nôn. ⁹Xomxo ya lungên xe, léc xomxo tibeac xovô xe pyap. Xe dô tiyi xocbê xe xib ge lê, léc xe gên dô mamvihha. Anutu vông myavinê vô xe nêb ob titô xe, léc o hi xe xib lêm. ¹⁰Xe nilôm vô viyin lê, léc xe

xêmyaa vô niviha tiyi buc vihati. Di xe dô tiyi xocbê xomxo wê nêl susu maên ge, lêc xe vông vizid tibeac vô xomxo tibeac. Xe nêl susu ma, lêc susu vihati tu xe xe.

¹¹Xam Kolin, kiyang wê yêp vac xe nilôm ge, xe nêl vihati yêp seac vô xam, di xe vông nilôm loc diluhu vô xam. ¹²Xe o kol xe ên xam lêm. Nge, xe xêmyaa vin lec xam. Lêc xam ge, xam kol xam ên xe. ¹³Om a nêl vô xam tiyi xocbê ma nêl vô nue ge, bêga bê xam tax vuayen ên nilôm di vông i loc yadiluhu vô xe.

Il tiyi xocbê Anutu xumac ngibua

¹⁴Xomxo wê o vông i vin Kilisi lêm ge, xam o lêc kituc lec he mi vông yuac i yêp tived lêm. Ên niviha yuu nipaên, yuu o tiyi wê yuu xêyaa ob vin lecma ge lêm. Di xêseac o tiyi wê ob yêp hixôn mapitoc ge lêm. ¹⁵Xam xovô lê. Kilisi yuu Seten, yuu xôn ob vông yuac tiyima, me? Di xomxo wê vông i vin Yesu ge hixôn xomxo wê vông vinên maên ge, yuu xôn ob dô ya xovôên tived, me? Ma vêl. ¹⁶Anutu xumac ngibua hixôn xumac wê anutu kityooên vông ge, yuu xôn tiyima, me? Xam xovô bê il tu xumac ngibua wê Anutu mavuha vông ge, tiyi xocbê kiyang wê Anutu nêl mi i yêp bêga ên nêbê,

“A ob dô vac he mahigun di tup vac he, di a ob tu he Anutu, di he ob tu a nuge.”

¹⁷Mêgem Anutu nêl hixôn bêga ên nêbê,

“Xam sea he di loc dô viyonên, di le i lêc hêm susu ningeac hixôn lêm, ên aca va ob kô xam di viac xam nivuha. ¹⁸A ob tu xam mam, di xam ob tu a nuge vêx yuu vux. Apumtau xêkizêc kehe nêl kiyang tiga.”

7 ¹Xam lige wê a xêgyaa vin lec xam ge, Anutu hilu kiyang tige vô il, om môp ningeac wê ob vông il nidnivi yuu nilôd vô nipaên ge, il ob sea vihati i yêp xel, di vông nilôd i vô paha lec. Om il ob xona ên Anutu di tup vô môp bôbac tived êdêc tu xomxo nivuha nôn.

He Kolin pilepac he om vông Pol nilô vô nivuha

²A nêl vô xam bê xam xêmyaa i vin lec xe, ên xe o vông soên ti vô xomxo ti lêm, di xe o vông xomxo ti vô nipaên lêm, di xe o kityoo xomxo ti di vô i susu vêl lêm. ³A o nêl kiyang tiga ên a nêb a ob titô xam lêm. Ên a nêl pyap gwêba ên a nêbê xe xêmyaa vin lec xam, om xe obêc dô mamviha hixôn xam, me xe obêc xib hixôn xam ge od pyap. ⁴A nêl kiyang vihati yêp seac vô xam, di a hi vixag pec ên xam. A dô vac viyin levac, lêc xam vông a nilôg vô viyin maên om a dô hixôn xêgyaa nivuha yang.

⁵Buc wê xe val dô vîgwe levac Masedonia ge od xe kilê viyin tibeac di xe nimnivi o dô seac vêl lêm. Nge, viyin viyang viyang hivun xe xôn,

ên xomxo tibeac vông vevac vô xe, di xe nilôm xona. ⁶Lêc Anutu ge wê ob vông xomxo wê nilô vô viyin ge, he nilô vô viyin maên, om vông xe nilôm vô viyin maên ên wê vông Taitas val vô xe ge. ⁷Taitas val vô xe, om vông xe nilôm vô viyin maên, lêc o môt tige tibeac lêm. Nge, xam vông Taitas nilô vô viyin maên mi i val tixuu kiyang wê ngô vô xam ge vô xe, om kiyang tige vông xe nilôm vô viyin maên hixôn. Ên Taitas nêl ên nêbê xam nilôm kidu xam ên xam nêb xam ob wê a, di xam nilôm byag ên wê xam vông viyin vô a ge, di xam nilôm kidu xam ên xam nêb xam ob ngidu a xôn, om kiyang tige vông a xêgyaa vô nivihya yang.

⁸A xovô ên a nêbê kipihac wê a kivuu vô xam ilage vông xam nilôm vô viyin, lêc a nilôg o vô viyin ên kipihac tige lêm. Vixôhilôg, ilage a nilôg vô viyin ên wê kipihac tige vông xam nilôm vô viyin ge, lêc viyin tige o yêp vô xam xuhu dia lêm. Nge, yêp myabo tya di tiyôô. ⁹Om gwêbaga a xêgyaa vô nivihya, lêc o vô nivihya ên wê a vông xam nilôm vô viyin ge lêm. Nge, vô nivihya ên wê viyin tige vông xam pilepac xam ge. Ên Anutu vaci vông xam nilôm vô viyin, om kiyang wê xe nêl ge ti o vông xam vô nipaên lêm. ¹⁰Ên nilô viyin wê Anutu vông vô xomxo ge vông he pilepac he di Anutu vô he vêl ên nipaên di vông he dô vac vizid, om il nilôd ob vô viyin lec môt tibêge lêm. Lêc nilô viyin wê xomxo kibun ga vông ge ob vô nôn nivihya lêm. Nge, ob hi he yib. ¹¹Om xam wê lê. Anutu vông xam nilôm vô viyin, lêc viyin tige vô nôn nivihya tibeac vô xam bêga bê xam nilôm kidu xam ên xam nêb xam ob titô nêb kiyang, di xam xêmyaa vô myavinê vô môt nipaên di xam xona ên Anutu. Di xam nilôm kidu xam ên nêb xam ob wê a, di xam vông yuac xêkizêc ên xam nêb xam ob titô xomxo ti wê vông nipaên ge di vông myaviwen vô i. Môt tige vihati nêl xam kitong bêga ên nêbê xam titô kiyang tige pyap, om nipaên ti o yêp vô xam lêm.

¹²Om kipihac wê a kivuu vô xam ilage, a o kivuu vô xomxo ti wê vông môt nipaên ge lêm. Di a o kivuu vô xomxo ti wê xomxo tige vông i vô nipaên ge lêm. Nge, a kivuu vô xam vihati ên a nêb i vông xovôên vô xam vô Anutu manôn bêga bê xam xêmyaa vin lec xe nôn.

¹³Om môt wê xam vông ge vông xe nilôm vô viyin maên. Xe nilôm vô viyin maên di xe nilôm vô nivihya hixôn. Ên xe xovô wê xam vihati vông Taitas nilô vô viyin maên ge om vông xe nilôm vô nivihya hixôn. ¹⁴Ên ilage a kô xam lêm lec vô Taitas manôn di xam o vông a nig yoc ên kiyang tige lêm, ên xam vông kiyang tige vihati vô nôn lec. Kiyang vihati wê a nêl vô xam ilage vixôhilôg nôn, di kiyang vihati wê a kô xam lêm lec vô Taitas manôn ge kiyang nôn vixôhilôg. ¹⁵Buc wê Taitas loc vô xam ge od xam vihati kô i lec hixôn xonaên di nim yetacên di xam vô ninyam lehe vô kiyang wê i nêl ge, om gwêbaga Taitas xovô môt nivihya wê xam vông vô i ge di i xêyaa vin lec xam luu vêl. ¹⁶Di a ga, a xovô ên a nêbê xam obêc dô vac môt nivihya tiyi buc vihati, om a xêgyaa vô nivihya ên xam.

Pol nêl kiyang lec mone wê ob ngidu xomxo Judia xôn ge

8 ¹Xam lige, a ob nêl he konglegesen vac vigwe levac Masedonia ge kitong vô xam, ên xêyaa vin lecên wê Anutu vông ge vô nôn nivihã vac he mahigun. ²Viyin levac tulec he tiyi buc vihati, léc he kilê viyin hixôn xêyaa nivihã. Dì he nêl susu ma, léc he vông nilô la vô môm wê ob ngidu xomxo wê susu ma ên he ge xôn. ³A xovô môm wê he vông ge om a nêl bêga vô xam ên a nêbê heche va nêb he ob tung mone ya, om he tung mone tiyi xocbê wê dô vô he ge, léc he tung mone ya la luu vêl hixôn. ⁴Dì he nêl xe xêkizêc ên he nêb xe kô mone wê he tung ge mi la hixôn mone wê konglegesen viyang viyang kituc ên nêb ob vông i loc ngidu Anutu nue wê dô Judia ge xôn. ⁵Ilage xe xo ên xe nêbê he Masedonia ob vông mone ya, léc he vông xe yetac ên wê he o vông môm tige tibed lêm. Nge, taxlee he vông heche va la diluhu vô Apumtau di vông he la vac xe kwa ngibi tiyi môm wê Anutu nêl ge.

⁶Konglegesen Masedonia vông môm tibêge, om xe nêl vô Taitas ên xe nêb i loc vô xam, ên vông yuac nivihã wê loc nêl vô xam ilage i vô nôn lec. ⁷Môm wê nivihã ge vihati vô levac vac xam mahigun, om xam vông i vin xêkizêc ta di nêl Yesu xolac, di xam xovô kiyang vihati, di xam vông nilôm la diluhu vô Anutu yuac di xam xêmyaa vin lec xe. Om a nêl vô xam bêga bê môm wê ob ngidu xomxo xôn ya mone ge i vô levac vac xam mahigun hixôn.

⁸A nêb a ob kidu xam lec môm tige lêm. Nge, a ob nêl he Masedonia môm kitong vô xam ên a nêbê he vông nilô la vô môm nivihã tige, om a nêb a ob yaxên bê xêyaa vin lecên wê xam vông ge obêc vô nôn nivihã tibêge, me? ⁹Xam xovô vizid wê il lig Apumtau Yesu Kilisi vông ge pyap. Ên Yesu dô vac xêseac hixôn vizid vihati, léc nêb ob ngidu il xôn om lam tu xocbê xomxo wê nêl susu maên ge, ên nêb môm wê lam tu xocbê xomxo wê nêl susu maên ge i vông il tulec vizid tibeac.

¹⁰Om a ob nêl vô xam i tiyi xovôên wê aca va vông ge bêga bê xam vihati obêc tung mone pyap ge od obêc nivihã. Ên xam xovô yuac tige taxlee ên xam nêb xam ob vông, di klismas ngwe tax, xam vông mone mangwe. ¹¹Om a ob nêl vô xam bê gwêbaga xam kituc mone ya hixôn ên yuac tige i pyap. Ilage xam nilôm kidu xam ên nêb xam ob vông yuac tige, om gwêbaga xam nilôm i kidu xam di xam tung mone i tiyi xocbê wê dô vô xam ge, ên yuac tige i pyap. ¹²Xomxo ti obêc nêb tung mone di obêc tung i tiyi xocbê wê dô vô i ge od Anutu ob yê nivihã. Xomxo ya ob vông levac di ya ob vông nipwo, léc Anutu ob yê vihati nivihã. Ên Anutu nêb xomxo toto i tung mone i tiyi xocbê wê dô vô he ge.

¹³A o nêl ên a nêb xam vông mone levac vô xomxo ên he i dô nivihã di xam dô nipaên lêm. Nge, a nêb xam vihati dô nimvihã i tiyima.

¹⁴Gwêbaga xam nêl susu tibeac dô, om xam vông ya i loc ngidu he wê

susu ma ên he ge xôn, êdêc susu obêc ma ên xam vô buc timuên di he vông tibeac obêc dô ge od he i vông ya vô xam ên i ngidu xam xôn. Ên obêc bêge ge od xam vihati ob dô tiyima. ¹⁵Tiyi xocbê kiyang wê yêp vac xolac bêga ên nêbê, “Xomxo wê tulec yaên tibeac ge, yaên tiyi he di o luu vêl lêm, di he wê tulec nipwo tya ge o myag yaên ti lêm.”

Taitas yon li yuu ob loc vô he Kolin

¹⁶A hi vixag pec ên wê Anutu vông Taitas xêyaa vin lec xam tiyi xocbê a xêgyaa vin lec xam ge. ¹⁷Om kiyang wê a nêl vô Taitas ên a nêb i loc yê xam ge, Taitas tyuc lec, di ici va nilô kidu i hixôn ên nêb ob loc vô xam. ¹⁸Di il lig vông vinên ti ob loc hixôn Taitas. Xomxo tige vông yuac xolac om xomxo vac konglegesen vihati xovô i di pimil i. ¹⁹Lêc he o pimil i ya kiyang pileva lêm. Nge, konglegesen vihati vinoo i, ên nêb i loc hixôn xe di xe xôn kô mone mi la vông vô lige vông vinên Judia wê nêb susu maên ge. Yuac tige, xe vông ên xe nêb xe ob vông Apumtau lê i vô levac, om xe nêb xomxo i yê di xovô bê xe vông nilôm la vô yuac wê ob ngidu xomxo xôn ge.

²⁰Mone mabu tige, xe nêb xomxo ti i o lêc so kiyang lec xe lec mone tige lêm, om xe ob vông xomxo tige i loc hixôn. ²¹Ên xe nêb xe ob vông yuac nivîha vô Anutu vaci lêm. Nge, xe nêb xomxo i yê yuac wê xe ob vông ge nivîha hixôn.

²²Om xe ob vông il lig ti i loc hixôn yuu. Xomxo tige, xe yaxên tiyi buc tibeac, lêc vông yuac viyang viyang ge xêkizêc, di gwêbaga xomxo tige nilô kidu i di vô nibu nibu nêb ob loc vô xam, ên xovô xam pyap ên nêb xam obêc vông yuac nivîha. ²³Taitas ge xam xovô pyap bê i wê xii xôn vông yuac lec xam ge. Di lig yuu ge, yuu tu konglegesen vihati manôn di vông yuac wê ob vông Kilisi lê vô levac ge. ²⁴Om xam xêmyaa i vin lec yon di xam viac yon i nivîha, ên konglegesen vihati i yê mi xovô bê kiyang wê xe pimil xam ge kiyang nôn.

Môp wê ob ngidu Anutu nue xôn ge

9 ¹Xam xovô pyap lec mone wê il ob vông i la ngidu Anutu nue Judia xôn ge, om a ob kivuu kiyang ti i tii vac vô xam lêm. ²Ên a xovô pyap ên a nêbê xam nilôm kidu xam ên xam nêb xam ob vông yuac tige, om a pimil xam vô he Masedonia bêga ên a nêbê, “Xomxo vac vigwe levac Glik hilu kiyang pyap lec kliskas ngwe tax ên he nêb he ob tung mone.” He Masedonia ngô kiyang tige di xovô wê xam nilôm kidu xam ên yuac tige om vông he tibeac xêyaa vin lec yuac tige ên he nêb he ob vông hixôn. ³Om gwêbaga a nêb a ob vông lig yon i loc vô xam, om xam viac mone pyap i tiyi xocbê kiyang wê a nêl vô he Masedonia ge, ên kiyang wê a mi yong xam vô he ge, he i o lêc yê tiyi xocbê kiyang nôn maên lêm. ⁴Ên he Masedonia ya obêc loc hixôn a timuên di xe obêc xê wê xam gên

o tung mone pyap lêm ge od obêc vông a nig yoc di vông xam nim yoc hixôn ên wê a yong xam pileva vô he ge. ⁵A xo bêge, om a nêb lig yon i loc mug vô xam, ên viac mone wê xam nêl pyap ên xam nêb xam ob vông ge, êdêc buc wê xe obêc miloc vô xam ge od xe ob xê wê xam kituc mone pyap hixôn nilôm nivaha di xam o vông ên wê xomxo kidu xam nginong ge lêm.

⁶Xam xovô bêga bê xomxo ti obêc xin vê yuu ge od ob kô nôn yuutyabed. Di xomxo ti obêc xin vê tibeac ge od ob kô nôn tibeac luu vêl. ⁷Om xam toto vông mone i tiyi xocbê xam nilôm xovô ên xam nêb xam ob vông ge. Di xam o lêc vông hixôn nilôm viyin lêm. Di le i lêc vông ên wê xomxo kidu xam ge lêm. Ên Anutu xêyaa vin lec xomxo wê tung mone hixôn nilô nivaha ge. ⁸Anutu tiyi wê ob vông vizid vihati hivun xam xôn, om obêc vông susu wê ob ngidu xam xôn ge vô xam i tiyi buc vihati di obêc vông vô xam i luu vêl tiyi wê xam ob vông yuac nivaha ya ge. ⁹Tiyi xocbê kiyang wê yêp vac xolac bêga ên nêbê,

“Xomxo ti wê titang i susu vô xomxo wê nêb susu maên ge, môp nivaha wê i vông ge ob vô nôn nivaha di ob yêp luta.”

¹⁰Anutu ge wê vông susu vê vô xomxo mi he la xin, di vông vê tige vô nôn tibeac mi xomxo ya, om Anutu obêc vông susu vê vô xam di vông i vô tibeac, di ob vông môp nivaha wê xam vông ge vô nôn tibeac. ¹¹Anutu obêc vông susu tibeac vô xam tiyi buc vihati, tiyi wê xam ob vông susu tibeac vô xomxo wê nêb susu maên ge. Om mone wê xam vông ge xe obêc kô mi la vông vô xomxo ge od ob vông he hi vixa pec ên Anutu. ¹²Om yuac nivaha wê xam vông ge ob ngidu Anutu nue wê nêb susu maên ge xôn di ob vô nôn nivaha hixôn bêga bê ob vông he tibeac hi vixa pec ên Anutu. ¹³Ên môp wê xam ngidu lime vông vinên xôn ge ob nêl xam kitong vô xomxo, om he ob xovô wê xam vông i vin Kilisi xolac di vông i vô nôn lec ge, di he ob yê wê xam vông mone levac vô he hixôn xomxo baba ge, om he ob pimil Anutu ên xam. ¹⁴Di he ob xovô bê xêyaa vin lecên wê Anutu vông ge vô levac vô xam, om he xêyaa ob vin lec xam di he ob kitaa vô Anutu lec xam. ¹⁵Il ob hi vixad i pec ên Anutu, ên wê vông vizid levac mabu ti vô il ge. Kiyang wê il nêl ge o tiyi wê ob nêl vizid tige kehe ge lêm, ên vizid tige nivaha yang luu vêl.

Pol piwelac kiyang viyin vêl ên i

10 ¹Xomxo ya nêl ên he nêbê buc wê a dô hixôn xam ge od a xona om a mi nêl kiyang malehe vô xam, lêc buc wê a dô teva ên xam ge od a kivuu kiyang xêkizêc vô xam. He nêl bêge, lêc a Pol, a nêb a ob nêl kiyang malehe vô xam tiyi xocbê Kilisi vông ge. ²Om a ob kitaa xam bê xam viac xam nivaha, êdêc buc wê a obêc miloc vô xam ge od a ob nêl kiyang xêkizêc vô xam lêm. Lêc a nêb a ob nêl kiyang xêkizêc vô xomxo wê nêb xe mi timu vô môp kibun ga ge. ³Vixôhilôg, xe dô kibun ga, lêc

vevac wê xe vông ge o tiyi xocbê vevac kibun ga lêm. ⁴Ên xe vông vevac vô môt nipaên, léc xe o vông vevac ya susu kibun ga lêm. Nge, xe vông vevac ya xêkizêc wê Anutu vông ge tiyi wê xe ob dii xumac xêkizêc wê Seten vông ge vêl. ⁵Om xovôên wê xomxo vaci vông ge, hixôn kiyang wê xomxo yong he di le vac môt xôn ên xomxo wê nêb ob xovô Anutu ge, xe hi kiyang tibêge vihati tô sea, om kiyang vihati ge, xe vông i la vac Kílisi kwa ngibi. ⁶Xe viac xe di bin xam, ên xe nêb xam obêc la vac Kílisi kiyang vihati kwa ngibi ge od xe ob vông myaviwen vô he wê vô ninya kitu vô Kílisi kiyang ge.

⁷Xam xovô kiyang wê yêp vô xam mamnôn ge lê. Xomxo ti obêc xovô nêb i tu Kílisi xe pyap ge od i xovô bêga bê xe êno tu Kílisi xe tiyi xocbê i ge. ⁸Apumtau vông xêkizêc vô xe ên nêb xe ngidu vông vinên wê xam vông ge xôn, di xe o vông xam vô nipaên lêm. Om a obêc kô xe lec ên yuac sinale wê xe vông ge od a nig ob yoc ên kiyang tige lêm. ⁹Xam o léc xovô bêga bê a kivuu kipihac ge vô xam ên a nêb i vông xam yetac di xona lêm. ¹⁰Ên xomxo ya nêl ên he nêbê, “Kipihac wê Pol mi kivuu vô xe ge, kivuu kiyang viyin hixôn xêkizêc, léc wê lam dô hixôn xe ge od dô i tiyi xocbê xomxo wê xêkizêc ma ge di i kiyang tiyi xocbê kiyang pileva.” ¹¹Om xomxo wê nêl kiyang tibêge ge, he i xovô bê buc wê a obêc miloc dô hixôn xam ge od a obêc vông i tiyi xocbê kiyang wê a kivuu vac kipihac vô xam ge.

¹²Xomxo wê yong he ge, xe ob nêl bê xe tiyi xocbê he ge lêm, di xe xona ên wê xe ob tixuu xe lec he ge. Ên heche va yaxên he ya xovôên wê he va vông ge, di he tixuu he lec heche va, om he tiyi xocbê xomxo piyôp maên. ¹³Di xe ga, xe nêb xe ob yong xe i luu vêl lêm. Nge, xe ob yong xe lec yuac wê Anutu vông vac xe vigêm mi xe vông i tup vô di miloc vô xam ge. ¹⁴Xe obêc miloc vô xam ilage lêm ge, od obêc tiyi xocbê xe kiyl yôg wê Anutu vông vô xe ge di yong xe vidaaên. Léc o bêge lêm, ên xe kô Kílisi xolac mi loc nêl vô xam taxlee. ¹⁵Om xe o kiyl yôg di yong xe lec yuac wê xomxo ngwe vông ge lêm. Xe xo ên xe nêbê vông vinên wê xam vông ge i vô xêkizêc, ên yuac wê xe vông vac xam mahigun ge i vô levac di i loc tiyi yôg wê Anutu vông vô xe ge. ¹⁶Ên obêc bêge ge od xe ob la nêl xolac vô tibii madiluhu wê dô nimi ge hixôn, di xe ob yong xe lec yuac wê xomxo ngwe vông ge lêm.

¹⁷Kiyang yêp bêga ên nêbê, “Xomxo ti obêc nêb pimil ge od i pimil Apumtau.” ¹⁸Ên xomxo ti obêc pimil ici va ge od ob kô lê levac lêm. Léc Apumtau obêc pimil i ge od ob kô lê levac.

Pol nêl sinale kityooên nêl môt kitong

11 ¹A xo ên a nêb a ob yong a tya tax, om xam vông a nêl. ²A nêl bêge, ên a xêgyaa vin lec xam tiyi xocbê Anutu xêyaa vin lec xam nêb xam tu ixê, ên a nêl pyap ên a nêb xam ob ii vux ti. Vux tyo ge

Kilisi, om a ob vông xam vô i tiyi xocbê vêxwo nivihā ti. ³Lêc a xona ên wê xomxo obêc kityoo xam tiyi xocbê myel nipaên kityoo Iv ya kiyang yacyac ilage, ên kiyang tibêge obêc vông xam piyôp vô nipaên di vông xam sea môp wê xam vông nilôm la diluhu vô Kilisi tixed ge. ⁴Ên xomxo ya miloc vô xam di nêl kiyang lec Yesu, lêc o nêl i tiyi kiyang wê xe nêl vô xam ilage lêm. Di he nêb he ob vông Myakilôhô Ngibua vô xam, lêc o Myakilôhô Ngibua nôn wê xam kô ilage lêm. Di he nêl xolac ba ya vô xam wê o tiyi xocbê xolac wê xam vông i vin ilage lêm, lêcom xam ngô di vông i vin lutibed.

⁵Xam ngô lê. A xovô ên a nêbê xomxo wê xam yong he ên xam nêbê he sinale levac ge, he o luu a vêl lêm. ⁶Mêd a nêl kiyang xocbê xomxo paha ti, lêc xovôên wê a vông ge o nipwo tya lêm. Nge, môp vihati wê a vông ge, a vông hixôn xovôên nivihā mi xam wê pyap.

⁷Buc wê a loc nêl xolac vô xam ge od a o kô mone ti lec yuac tige lêm, ên a nêb a ob vông xam lêm i vô levac, om môp tige vông a vô nipwo lec. Xam nêb a vông ge nipaênê? ⁸Konglegesen ya vông mone lam vô a ên nêb ob ngidu a xôn di a vông yuac vac xam mahigun, om môp tige tiyi xocbê a vô he mone vêl ên a nêb i ngidu xam xôn. ⁹Buc wê a dô hixôn xam di susu ya ma ên a ge od a o kitaa susu ti vô xam lêm. Ên il lige vông vinên ya kidi gê Masedonia di val vông susu wê ma ên a ge ya vô a. A viac a nivihā, om a ob viac a nivihā bêge di a ob vông viyin vô xam lêm. ¹⁰Kiyang nôn wê Kilisi vông ge yêp vac a nilôg om a nêl hixôn nôn ên a nêbê a o kitaa susu ti vô xam lêm, di xomxo vac viḡwe levac Glik vihati ge ti o tiyi wê ob le vac môp xôn ên kiyang tige lêm. ¹¹A nêl kiyang tige lec kehe vatya? Mêd a xêgyaa o vin lec xam lêm, me? Ma vêl, Anutu vaci xovô wê a xêgyaa vin lec xam ge.

¹²Xomxo ya nêb ob yong he di nêl bê he mi vông yuac tiyi xocbê xe mi vông ge. Om a ob le vac môp xôn ên he, di vông yuac i tiyi xocbê a vông ilage, di a ob kô susu ti vô xam lêm. ¹³Xomxo tige, sinale kityooên, lêc he viyum he vac kiyang wê Kilisi nue sinale vông ge, di nêl kiyang kityooên vô xomxo. ¹⁴Xam o lêc yetac ên môp tibêge lêm. Ên Seten vaci obêc viyum i vac kiyang nivihā tiyi xocbê angela xêseac vông ge, ¹⁵om Seten nue yuac obêc viyum he vac môp nivihā wê Anutu nue yuac vông ge, om xam o lêc yetac ên môp tibêge lêm. Obêc timuên ge od xomxo tibêge ob kô myaviwen nipaên lec yuac wê he vông ge.

Pol nêl viyin wê tulec i ge kitong

¹⁶A nêl gwêba di a ob nêl i tii vac vô xam bê xam o lêc xo bê a xomxo piyôp yacyac lêm. Lêc xam obêc xo bêge ge od pyap. Om xam ngô kiyang wê a ob nêl ga, ên a êno ob yong a nipwo tya. ¹⁷Kiyang wê a ob nêl ga, Apumtau o nêl ên nêb a nêl tibêge lêm. Lêc a ob yong a tiyi xocbê xomxo piyôp yacyac ti. ¹⁸Xomxo tibêac yong he lec môp kibun ga, om a êno, a

ob yong a lec môp tibêge hixôn. ¹⁹Xam nêb xam piyôp levac lê, lêc xam mi ngô kiyang wê xomxo piyôp yacyac mi nêl ge. ²⁰Ên xomxo ya vông xam tu he nue yuac pileva di vun susu wê xam vông ge, di vông xam vô nipaên, mi pitap xam mamnôn di kô he lec vô xam, lêc xam o le vac he xôn lêm. ²¹Xêkizêc wê xe vông ge ti o yêp tiyi wê xe ob vông môp bêge vô xam ge lêm. Lêc mêd xam so ên xam nêb xe nim ob yoc ên wê xe o vông môp bêge vô xam lêm ge?

A ob nêl kiyang i tiyi xocbê xomxo piyôp yacyac ge. Xomxo ti obêc yong i lec môp wê i vông ge od a êno tiyi wê a ob yong a lec môp wê a vông ge. ²²Xomxo ti obêc nêb i Hiblu ge od a êno, a Hiblu. Di ti obêc nêb i Islel ge od a êno a Islel. Di ti obêc nêb i kehe Eblaham ge od a êno kehe yêp vac Eblaham. ²³Di he obêc nêbê he Kilisi nue yuac ge od a êno Kilisi nu yuac. Lêc a obêc nêl kiyang i tiyi xomxo yacyac ti ge od a ob nêl bê a ga Kilisi nu yuac wê a luu he vêl ge. Ên a vông yuac levac ngînoo he vêl, di a la kalabuhu buc tibeac luu he vêl, di tibii hi a vô nipaên buc tibeac luu he vêl. Di buc tibeac, vô kwabo lec wê a ob xib. ²⁴He Yuda hi a ya let buc vigê vilu om he mi hi a lu 39 lec buc titi. ²⁵Di tibii hi a ya viyi lu yon, di buc ti xomxo nêx a ya ngidax, di sip vô nipaên lu yon di a la vac gwec, di lu ti gwec kô a mi vilee vô vidiiên ngwe di bucên ngwe. ²⁶Di a la môp dia tiyi buc tibeac, om susu wê vông a vô nipaên ge tibeac, xocbê mia butac, di tibii yôdac, di a lige Yuda hixôn tibii madiluhu ya nêb ob vông a vô nipaên, di a tulec viyin vac vigwe levac hixôn vigwe mahigun pileva di vac gwec, di buc ya, xomxo wê kityoo nêb he xomxo vông vinên ge nêb ob vông a vô nipaên. ²⁷Di a vông yuac levac om a nignivi vô myavinê sea, di a o xêp nivihia vô bucên lêm. Buc tibeac vip den a, lêc yaên hixôn mia ma ên a, di lea hi a ên a nêg ngakwi ma.

²⁸Lêc o viyin tibêge vaci mô lêm. Ên buc vihati a xo konglegesen vihati ên a nêb a ob viac he nivihia, om kiyang tige vô viyin levac vô a. ²⁹Ên xomxo ti obêc vông i vin xêkizêc lêm ge od a êno ob dô i tiyi xocbê a o xêkizêc lêm. Di nipaên obêc pwoo xomxo ti pec ge od obêc vông a xêgyaa vô myavinê.

³⁰A obêc yong a ge od a ob yong a lec môp wê nêl a kitong ên nêbê a o xêkizêc lêm. ³¹Il lig Apumtau Yesu ma Anutu xovô pyap ên nêbê kiyang wê a nêl ga, a o kityoo lêm. Il ob pimil Anutu lê i vô levac di i yêp luta lêc luta.

³²Buc wê a dô vigwe Damaskas ge, hizap levac wê King Aletas vông ge, vông nue la viac môp Damaskas nêb ob hôm a xôn, ³³lêc lige ya tung a vac sepac nilô di vông a lop vac vuayen nipwo wê le vac xenac levac ge di a lop mi la xenac kehe di pec mi la ên hizap levac vigê.

Pol nêl vivia wê yê ge kitong

12 ¹A obêc yong a ge od ob vô nivihia vô a lêm, lêc xomxo ya ge, he yong he vô xam, om a êno ob yong a lec vivia hixôn kiyang wê

Apumtau hilung vô a ge. ²Xomxo wê vông i vin Kilisi ge ti dô, lêc Anutu kô i mi la lag puunê ti wê vông yon ge. Ge ilatikwê di klismas vigê yuu di tô mi la yuudiyuu la vêl. Xomxo tige ninivi la, me ninivi dô di kinu vaci la, ge a lungên. Anutu vaci yê. ³A xovô ên a nêbê xomxo tige, Anutu kô i mi la lag puunê. Ninivi mêd la hixôn me kinu vaci la, ge a lungên, di Anutu tived xovô. ⁴Gê lag puunê xomxo tige ngô kiyang ya, lêc o tiyi wê ob nêl kiyang tige kitong lêm, ên kiyang tige Anutu nêl xôn nêb nêl kitongên i ma. ⁵A tiyi wê a ob yong xomxo tige, lêc a ob yong aca va lêm. A obêc nêb yong a ge od a ob nêl bêga bê a o xomxo xêkizêc lêm, di a ob yong a lec tige tived. ⁶Vixôhilôg, a obêc nêb yong a ge od a ob nêl kiyang i tiyi xocbê xomxo yacyac mi nêl ge lêm. Nge, kiyang wê a ob nêl ge, a ob nêl kiyang nôn. Lêc a ob yong a tibêge lêm, ên a nêb xomxo ti i o lêc ngô kiyang wê a ob kô a lec ge di nêl bê a xomxo nivihâ lêm. Nge, a nêb xomxo i yê môp wê a mi vông ge di ngô kiyang wê a mi nêl ge di xovô a.

Pol ninivi tulec myavinê

⁷Vivia wê Anutu hilung vô a ge, nivihâ yang, lêc Anutu nêl ên nêb a o lêc yong a lec vivia tige lêm, om vông myavinê ti vô a xocbê yin vac a nignivi. Myavinê tige tiyi xocbê Seten nu yuac ti lam hi a, ên Anutu nêb a o lêc kô a lec lêm. ⁸Om a kitaa vô Apumtau lu yon, ên a nêb i vông myavinê tige i tip loc vêl ên a, ⁹lêc Apumtau nêl vô a ên nêbê, “A ob vô vêl lêm, ên xêyaa vin lecên wê a vông ge tiyi ông pyap, di xêkizêc wê a vông ge ob vô levac vô xomxo xêlehelehe.” Apumtau nêl bêge vô a, om a ob dô hixôn xêgyaa nivihâ di hi vixag i pec ên wê a nêg xêkizêc ma ge, ên xêkizêc wê Kilisi vông ge i hivun a xôn. ¹⁰Om a nêg xêkizêc obêc ma di xomxo obêc nêl kiyang nipaên vô a, di a obêc tulec viyin ya, di xomxo obêc nêb vông a vô nipaên, di a obêc kilê viyin viyang viyang lec Kilisi lê ge od a xêgyaa ob vô nivihâ, ên buc wê a dô xêlehelehe ge od Kilisi ngidu a xôn di a dô xêkizêc.

Pol nêb ob ngidu vông vinên wê he Kolin vông ge xôn

¹¹Kiyang wê a nêl ga, a nêl i tiyi xocbê xomxo yacyac ge, lêc xam vông a nêl kiyang tibêge, ên xam obêc pimil a ge od nivihâ, lêc xam vôngên ma om aca va kô a lec vô xam. Vixôhilôg, a xomxo pileva ti, lêc sinale levac levac o luu a vêl lêm. ¹²A dô hixôn xam di kilê viyin hixôn xêgyaa nivihâ, di a vông do levac wê ob nêl sinale kitong ge, om a vông do levac viyang viyang ya xêkizêc wê Anutu vông ge. ¹³Om môp tina wê a la vông vac konglegesen ya di a o vông vac xam mahigun lêmê? Môp tived wê a o vông vac xam mahigun lêm ge bêga nêbê a o kô susu ti vô xam pileva lêm. Om xam kitya a nêg nipaên tige vêl!

¹⁴A viac a pyap om a ob lôc vô xam lu ti hixôn wê ob vông lu yon ge, di a ob kitaa susu ti vô xam lêm. Ên a nêb a ob kô susu wê xam vông ge

lêm. Nge, a nêb a ob viac xam i tiyi xocbê mae viac nue ge. Ên nue nipwo ob kituc susu ên i ngidu tae mae xôn lêm. Nge, tae mae, he ob kituc susu di ngidu nue xôn. ¹⁵Om a obêc vông aca va hixôn susu vihati ên i ngidu xam xôn ge od a ob vông hixôn xêgyaa nivihia. A xêgyaa vin lec xam luu vêl, lêc mêd xam xêmyaa o vin lec a nipwo tya lêmê?

¹⁶Xam ya nêl ên xam nêbê, “Vixôhilôg, Pol o kô susu wê xe vông ge ti vô xe mamnôn lêm, lêc Pol ge xomxo kityooên om mêd kityoo xe di vô xe susu ya vêl.” ¹⁷Xam wê lê. Xomxo wê a vông i loc vô xam ge, mêd a vông he ya loc kityoo xam di vô xam susu ya vêl, me? ¹⁸A vông Taitas hixôn li ngwe, yuu loc vô xam, om mêd Taitas kityoo xam di vô susu ya vêl ên xam, me? Myakilôhō Ngibua wê dô hixôn xii Taitas ge, mêd o tived lêmê? Mêd xii xôn o timu vô mōp tived lêmê?

¹⁹Xam mêd xo ên xam nêbê xe kivuu kiyang ga ên xe nêb xe ob titô kiyang wê xe vông ge di yong xe vô xam mamnôn. Lêc o bêge lêm. Ên xe tu Kîlisi nue yuac om xe nêl kiyang tige vô Anutu manôn. Xam lige, kiyang ga vihati xe kivuu ên xe nêb xe ob ngidu vông vinên wê xam vông ge xôn. ²⁰Ên a xona ên a nêbê buc wê a obêc loc vô xam ge, mêd a ob miloc xê wê xam o tup vô mōp wê a xovô ge lêm, di kiyang wê a ob nêl vô xam ge, a ob nêl tiyi xocbê kiyang wê xam nêb a nêl vô xam ge lêm. A xona ên a nêb a obêc xê wê xam kunacma di wêma nipaên, di xêmyaa vô myavinê vōma, di xam vông vevac vōma, di xam nêl kiyang nipaên lecma, di nêl kiyang nimi, di kô xam lec, di vông mōp vaxvax. ²¹A xona ên buc wê a obêc miloc vô xam tii vac ge, ên a Anutu mêd obêc vông a nig yoc ên nipaên wê xam vông ge, di a nilôg obêc vô viyin levac ên wê lime tibeac o pilepac he di sea mōp nipaên wê he vông ge lêm. Mōp nipaên bêga nêbê mōp ningeac di mōp yōdac vêx yuu vux, di mōp vaxvax.

Pol nêl vô he Kolin ên nêb he i viac he i nivihia

13 ¹Gwêbaga a ob loc vô xam lu ti hixôn wê ob vông lu yon ge. Xomxo yuu me yon obêc nêl kiyang ti timu vōma vixa lec xomxo ti nêl nipaên ge od il ob yaxên kiyang tige. ²Ilage a loc dô hixôn xam lu yuu di a nêl vô he wê vông mōp nipaên ge hixôn xam baba ên a nêb a obêc vông myaviwen vô xam. Di gwêbaga a dô teva ên xam, lêc a ob nêl i tii vac vô xam bê a obêc milôc vô xam ge od a ob xo viḡwe pisiv ên he wê vông mōp nipaên ge lêm. ³Xacxam va nêb xam ob xovô bê Kîlisi nêl kiyang vac a myag, me? Om xam obêc xovô lec mōp wê a vông ge. Ên Kîlisi o tiyi xocbê xomxo xêhehehe ge lêm. Nge, vông yuac hixôn xêkizêc vac xam mahigun. ⁴Vixôhilôg, he hi Yesu yib lec xax pola tiyi xocbê xomxo wê xêkizêc ma ge, lêc gwêbaga Yesu dô maviha ya xêkizêc wê Anutu vông ge. Di xe êno, xe timu vô Kîlisi vixa om xe dô tiyi xocbê xomxo xêhehehe ge, lêc xêkizêc wê Anutu vông ge vông xe dô mamviha hixôn Kîlisi om xe hilung xêkizêc tige vô xam.

⁵Xam toto yaxên nilôm di xovô bê xam vông i vin Kîlisi nôn, me xam o vông i vin lêm. Xacxam va dô di yaxên. Yesu Kîlisi dô vac xam nilôm, léc mêd xam o xovô lêm? Xam obêc yaxên bê xam o vông i vin lêm ge od xam o tu Kîlisi nue nôn lêm. ⁶Di a xovô ên a nêbê xam obêc yaxên xe ge od xam ob xovô bê xe vông i vin nôn. ⁷Xe kitaa vô Anutu ên xe nêb i ngidu xam xôn di xam sea môp nipaên vihati. Xe o nêl ên xe nêbê xomxo i yê môp wê xam vông ge di pimil xe lec yuac wê xe vông vac xam mahigun ge lêm. Nge, xe nêb xam vông môp wê nivihâ ge, di xomxo obêc yaxên xe léc nêb yuac wê xe vông ge tiyiên ma ge od pyap. ⁸Léc xe o tiyi wê xe ob vông kiyang nôn i vô nipaên ge lêm. Nge, xe ob ngidu kiyang nôn xôn. ⁹Om xe nêb xêkizêc obêc ma di xam obêc le xêkizêc ge od ob vông xe xêmyaa vô nivihâ. Om xe kitaa vô Anutu tiyi buc vihati ên xe nêb vông vinên wê xam vông ge i léc xêkizêc. ¹⁰Gwêbaga a dô teva di kivuu kipihac tiga vô xam, ên a nêb xam pilepac xam di buc wê a ob mîloc vô xam ge od a ob nêl kiyang myagpilihi vô xam lêm. Ên Apumtau vông xêkizêc vô a ên nêb a ngidu vông vinên wê xam vông ge xôn, di o vông xêkizêc vô a ên nêb a vông xam vô nipaên lêm.

Kiyang myahipu ya

¹¹Xam lige, a ob nêl kiyang myahipu timuên bêga bê xam titô xam kiyang i yêp nivihâ, di xam ngô kiyang wê a nêl ga, di xam nilôm i yêp tibed, di xam dô vac kiyang malehe nilô. Xam obêc vông bêge ge od Anutu wê xêyaa vin lecên di kiyang malehe kehe ge ob dô hixôn xam.

¹²Xam pulma vigêm ên i nêl kitong bê xam xêmyaa vin lecma. Lime vông vinên vihati ga nêl vidiiên vô xam.

¹³Apumtau Yesu Kîlisi i vông vizid nivihâ vô xam, di xêyaa vin lecên wê Anutu vông ge i viac xam, di Myakilôhô Ngibua i titup xam xôn di hivun xam vihati xôn.

GALESIA

Kiyang wê Pol kivuu vô tibii Galesia ge

1 ¹A, Pol, a sinale ti, léc xomxo ti o vinoo a nêb a kô yuac sinale lêm, di xomxo ti o vông a lam vac yuac tiga lêm. Nge, Yesu Kilisi yuu Ma Anutu wê tipî vô Yesu kidi lec vac yibên ge, yucyuu va vinoo a nêb a vông yuac sinale. ²Om a hixôn lige wê dô hixôn a ge, xe kivuu kipihac tiga di vông i loc vô xam vông vinên vac konglegesen toto wê yêp vac vigwe levac Galesia ge.

³Xêyaa vin lecên yuu kiyang malehe wê Mag Anutu yuu il lig Apumtau Yesu Kilisi vông ge i viac xam. ⁴Kilisi timu vô môm wê il Mag Anutu nêb i vông ge, om lam yib lec il nêd nipaên ên nêb ob vô il vêl ên môm nipaên kibun ga wê xomxo dô vac ge. ⁵Mêgem il ob pimil Anutu lê i vô levac di i yêp luta léc luta. Nôn.

Kilisi xolac ge tived

⁶Xame, a yetac mabu ên môm wê xam vông ge. Ên Anutu tyuc xam nêb xam tu i nue lec vizid wê Kilisi vông ge om xam vông i vin, léc lutibed xam sea Anutu di la vac xolac bangwe. ⁷Vixôhilôg, Yesu xolac tived ge wê nôn, di kiyang baba ge o xolac nôn lêm. Léc a nêl kiyang tige ên wê xomxo ya nêb ob pilepac Kilisi xolac i loc bangwe ge, om he la juda xam piyôp. ⁸Léc a ob nêl vô xam bê xe ti, me angela lag kisiinê ti obêc nêl xolac vô xam so xolac wê xe nêl vô xam ilage, od xomxo tige obêc kô myaviwen nipaên. ⁹A nêl pyap vô xam di a ob nêl i tii vac vô xam bê xomxo ti obêc nêl xolac vô xam, léc o nêl xolac tiyi xochê xolac wê xam ngô mi vông i vin ilage lêm ge, od xomxo tige obêc kô myaviwen lec nipaên wê i vông ge.

¹⁰Kiyang wê a nêl ga, a nêl ên a nêb xomxo i yê a nivihâ, me a nêb Anutu i yê a nivihâ? A o vông ên a nêb xomxo i pimil a lêm. Ên a obêc nêb xomxo i pimil a ge od o tiyi wê a ob tu Kilisi nu yuac ti ge lêm.

Pol nêl i yuac sinale kitong

¹¹Xam lige, a ob nêl kitong vô xam bê xolac wê a nêl vô xam ilage, kehe o yêp vô xomxo kibun ga ti lêm. ¹²Ên a o ngô vô xomxo ti lêm, di xomxo ti o nêl kitong vô a lêm. Nge, Yesu Kilisi vaci nêl kitong vô a.

¹³Xam ngô mi xovô lec môp wê a vông ilage. Ên buc wê a timu vô Yuda vông môp ge, od a vông vevac vô Anutu nue vông vinên ên a nêb a ob kitya he vêl. ¹⁴Di a vông nilôg la diluhu vô buge Yuda vông môp ên a nêb a ob timu vô môp wê he mi vông ge vihati, om a timu vô buge môp luu lige wê xe xôn lig tiyima ge vêl.

¹⁵A môp bêge, mêlêc buc wê a gên dô vac tag xêyaa ge, od Anutu nêb ob vông nivihia vô a, om vînoo a pyap ên nêb a tu i nu yuac ti. Mêgem buc wê Anutu vaci xovô ge ¹⁶od hilung nu tuc Yesu vô a ên nêb a la nêl Yesu xolac kitong vô tibii madiluhu wê o Yuda lêm ge. Lêc buc tige, a o la kinêg xolac kehe vô xomxo ti lêm, ¹⁷di a o la Jelusalem vô sinale wê vông xolac tax ge ti lêm. Nge, a la dô vîgwe Alebia, nang dêc lôm la vîgwe Damaskas.

¹⁸A dô kliskas yon lam la vêl di a lec mi la Jelusalem ên a nêb a ob la xê Pita, om a la dô hixôn i da yuu, ¹⁹di a o xê sinale baba hixôn lêm. Jems tîbed wê il Apumtau Yesu li tîmuên ti ge, a xê i manôn. ²⁰Kiyang wê a kivuu ga, o kiyang kityooên lêm. Nge, a le vô Anutu manôn di nêl kiyang nôn vô xam.

²¹Nang dêc a loc mi la vac vîgwe levac Silia yuu Silisia, ²²om vô buc tige konglegesen toto vac vîgwe Judia ge gên o yê a magnôn lêm. ²³Di he xovô bo tîbed wê xomxo mi nêl ên nêbê, “Xomxo ti wê mi vông myavinê vô il ilage ên nêb ob kitya Yesu xolac vêl ge, gwêbaga nêl xolac tyo vô xomxo ên nêb he i vông i vin.” ²⁴He Judia ngô wê Anutu vông nivihia vô a ge om he pimil Anutu.

Pol nêl i yuac kitong vô xomxo levac levac Jelusalem mi he ngô nivihia

2 ¹Kliskas vîgê yuu di tô mi la yuudiyuu (14) lam la vêl, dêc xii Banabas nêb xii ob lax mi la Jelusalem, om xii kô Taitas hixôn mi xen la. ²Anutu nêl vô a nêb a la Jelusalem om a la. A mîla dô hixôn he Yuda levac vaci di nêl xolac wê a la vông vô tibii wê o Yuda lêm ge kitong vô he. A nêl kitong vô he ên a nêb he i ngô di tyuc lec, êdêc yuac wê a vông ilage di vông gwêbaga hixôn ge nôn i o ma lêm. ³Om he tyuc lec yuac wê a la vông ge, di Taitas wê lam hixôn xii ge, ge tibii Glik ti, lêc he o nêl nêb i gôl ninivi tiyi môp wê Yuda mi vông ge lêm. ⁴Vixôhilôg, xomxo ya nêb Taitas i gôl ninivi lê, lêc he ge xomxo kityooên wê lam dô vac xe mahîgun ên nêb he ob yê xe xôn ên pilepac môp nivihia wê xe dô vac ge i vô nîpaên. Ên Yesu Kilisi piwelac il vêl ên Yuda vông môp wê ku il xôn ge di vông il dô nidviha, lêc xomxo tîgee nêb ob vông il lax mi la

vac Yuda vông môt i tii vac, tiyi xocbê ob vông il lax dô vac kalabuhu ge. ⁵He nêl bêge lê, léc xe o tyuc lec kiyang wê he nêl ge lêm, ên xe nêbê kiyang nôn wê yêp vac xolac ge i yêp luta vô xam.

⁶Mêd he Yuda levac ngô a kiyang léc nêb ge pyap, di he o nêl kiyang ba ya hixôn vô a lêm. Xomxo tigege he lê levac, léc a xê he tiyi xocbê he o lê levac lêm, ên Anutu yê xomxo vihati tiyima. ⁷Xomxo levac tigege o nêl kiyang ya vô a hixôn lêm, ên he xovô ên he nêbê Anutu vông a la ên nêb a la nêl xolac vô tibii wê o Yuda lêm ge i tiyi xocbê nêl vô Pita nêb i nêl xolac vô xomxo Yuda ge. ⁸He xovô bêge, ên xêkizêc wê Anutu vông ge ngidu a xôn di a la nêl xolac vô tibii ba, tiyi xocbê ngidu Pita xôn di i nêl xolac vô he Yuda ge. ⁹Mêgem xomxo levac yon, Jems yuu Pita di Jon, yon xovô ên nêbê Anutu vông yuac tige vô a, mêgem yon pul xii Banabas vigêm hixôn xêyaa nivaha, di xe xôn hîlu kiyang ên xe nêbê xe xôn ob vông yuac xolac, léc xii Banabas ob la vô tibii ba, di yon ob dô hixôn he Yuda. ¹⁰Lêc yon nêl kiyang ti vô xii bêga ên nêbê xii ngidu he lie vông vinên wê nêl susu maên ge xôn. Môt tibêge wê a xê nivaha om a vông nilôg la diluhu vô yuac tibêge.

Pol nêl Pita nêl soên kitong

¹¹Buc wê Pita la dô Antiok ge, od a kunac i di nêl i nêl soên vô i manôn. ¹²Pita vông môt bêga, wê dô Antiok ge od mi la vô tibii vông vinên wê o Yuda lêm ge mi la mi ya hixôn he, léc Jems lie vông vinên ya mila Antiok om Pita xona ên he, ên he nêl ên he nêbê tibii wê o Yuda lêm ge he i gôl ninivi i tiyi xocbê he Yuda ge. Pita xona ên he, om sea môt wê la mi ya hixôn tibii vông vinên wê o Yuda lêm ge. ¹³Mêd Yuda vông vinên wê dô Antiok ge, Pita didii he mi la vac môt tige dêc Banabas la hixôn. ¹⁴Mêd a val xê môt wê he vông ge, léc a xovô ên a nêbê he o vông môt ge nivaha tiyi kiyang nôn wê xolac nêl ge lêm, om a nêl vô Pita vac he vihati mahigun ên a nêbê, “Ông ge Yuda ti, léc ông o timu vô môt wê il Yuda vông ge lêm. Nge, ông la vô tibii baba môt. Léc môt wê ông vông gwêbaga, tiyi xocbê ông nêl ên ông nêbê tibii ba i timu vô Yuda vông môt hixôn. Letya nêb ông vông môt tibêge?” A nêl kiyang tibêge vô Pita.

Yuda hixôn tibii ba, Anutu yê he nivaha ên wê he vông i vin Kîlisi ge

¹⁵Vixôhîlôg, il ga xomxo Yuda wê mage buge ge Yuda, di il o tibii ba wê madîluhu ge lêm. ¹⁶Lêc il xovô ên il nêbê môt wê il ob timu vô Moses xolac ge o tiyi wê ob vông il le nivaha vô Anutu manôn ge lêm. Nge, xomxo ti obêc vông i vin Yesu Kîlisi ge, od môt tige Anutu ob yê nêbê i xomxo nivaha. Om il Yuda, il êno vông i vin Yesu Kîlisi ên il nêb Anutu i yê il ên nêb il xomxo nivaha. Di il ob nêl bê Anutu i yê il nivaha lec wê il mi timu vô Moses xolac ge lêm, ên Anutu ob yê xomxo ti nivaha ên wê viac Moses xolac nivaha ge lêm. ¹⁷Il sea Moses xolac di vông i vin Kîlisi

ên il nêb Anutu i yê il nivîha. Lêc môt wê il sea Moses xolac ge vông il dô tiyi xocbê tibii madiluhu wê lungên Moses xolac ge, om il ob nêl bê Kilisi vông il la vac môt nipaên, me? Ma vêl, il ob nêl bêge lêm. ¹⁸A sea Moses xolac ên a xovô ên a nêbê o tiyi wê ob vông a le nivîha vô Anutu manôn ge lêm. Om a obêc lax timu vô Moses xolac tii vac ge od obêc nêl a kitong bê a xomxo nipaên. ¹⁹A o tiyi wê a ob timu vô Moses xolac vihati ge lêm, om xolac tige o tiyi wê ob vông a la dô magviha ge lêm. Mêgem gwêbaga a o dô vac xolac tige kwa ngibi lêm, ên a nêb a ob timu vô Anutu tîbed di vông yuac wê i vông ge. Ge tiyi xocbê a xib lec xax hixôn Kilisi, ²⁰om gwêbaga a o dô magviha ya xêkizêc wê aca va vông ge lêm. Nge, a dô magviha ya xêkizêc wê Kilisi vông ge. Di môt yuu yuac vihati wê a vông mi dô vac gwêbaga, a vông nilôg la diluhu vô Kilisi wê Anutu nu ge, ên Kilisi ge wê xêyaa vin lec a di i yib lec a nêg nipaên. ²¹Om a nêb a ob ngiloo Anutu vizid vêl di lax vac Moses vông xolac i tii vac lêm. Ên Moses xolac obêc vông Anutu yê il nivîha ge, od yibên wê Kilisi yib lec xax ge obêc tiyi xocbê susu pileva.

Kiyang yuu, ngwe lec Moses xolac di ngwe lec vông vinên

3 ¹Xam Galesia, xam piyôp maên! Ên a nêl Yesu Kilisi môt wê lam yib lec xax pola ge kitong vô xam mi xam ngô tiyi xocbê xam wê lec mamnôn ge, lêc bêna lêc xam piyôp vô judajuda? ²Om a ob kinêg kiyang tîbed vô xam bêga bê Myakilôhông Ngibua loc dô vac xam nilôm lec kehe bêna? Mêd loc dô vac xam nilôm ên wê xam timu vô Moses xolac ge, me? Ma vêl, Myakilôhông Ngibua loc dô vac xam nilôm ên wê xam ngô Yesu xolac mi vông i vin ge. ³Lêc mêd xam piyôp ma om xam nêb xam ob timu vô môt tibêge? Ên xêkizêc wê Myakilôhông Ngibua vông ge, ge wê vông xam tu Anutu nue ge, lêcom bêna lêc gwêbaga xam nêb xam ob vông yuac ya xêkizêc wê xaxam va vông ge? ⁴Viyin levac wê xam kô lec vông vinên ge, mêd xam kilê pileva? Lêc a xovô ên a nêbê xam o kilê pileva lêm. ⁵Môt wê Anutu vông Myakilôhông Ngibua lam vô xam di vông do levac vac xam mahigun ge, ge vông lec kehe bêna? Mêd vông ên wê xam timu vô Moses xolac ge, me? Ma vêl, vông ên wê xam ngô Yesu xolac mi vông i vin ge.

⁶Xam xovô lec Eblaham wê kiyang nêl kitong mi i yêp vac xolac bêga nêbê, “Eblaham vông i vin Anutu xêkizêc om Anutu yê vông vinên wê i vông ge di nêl nêb Eblaham ge xomxo nivîha.” ⁷Mêgem xam xovô bêga bê xomxo wê vông i vin Anutu ge, ge wê tu Eblaham nue bue nôn. ⁸Ên ilage Anutu xovô nêbê obêc timuên ge od obêc yê tibii wê o Yuda lêm ge nivîha ên wê he vông i vin Yesu ge, om buc wê kiyang tyo gên o vô nôn lec lêm ge, od Anutu nêl kiyang vô Eblaham tax mi i yêp vac kipihac xolac bêga ên nêbê, “A obêc vông vizid nivîha vô xomxo kibun ga vihati lec ông.” ⁹Mêgem xomxo vihati wê vông i vin Anutu ge, he ob kô vizid nivîha tiyi xocbê Anutu vông vô Eblaham ilage ên wê vông i vin ge.

¹⁰Lêc xomxo wê xo ên nêb he ob timu vô Moses xolac êdêc dô maviha ge od he ob tulec myaviwen nipaên, ên kiyang yêp vac Moses xolac bêga ên nêbê, “Xomxo wê o timu vô xolac ga vihati yang mi vông i vô nôn lec lêm ge od he ob yib mi la vac nipaên.” ¹¹Di kiyang ngwe yêp vac xolac bêga ên nêbê, “Xomxo wê vông i vin Anutu ge, ge wê Anutu ob yê ên nêb he xomxo nivihã wê ob dô maviha.” Mêgem kiyang tige ob vông xovôên vô il bêga bê Anutu o yê xomxo nivihã ên wê he timu vô Moses xolac ge lêm. ¹²Ên môp wê xomxo timu vô Moses xolac ge, di ngwe wê xomxo vông i vin Kilisi ge, yuu xôn o tiyima lêm. Ên kiyang yêp vac xolac bêga ên nêbê, “Xomxo ti obêc viac Moses xolac vihati nivihã ge od obêc la dô maviha.”

¹³Moses xolac nêl kitong nêbê il ob kô myaviwen lec nipaên wê il vông ge. Mêlêc Kilisi vô il vêl ên myaviwen tige, ên ici va kô myaviwen nipaên wê il vông ge, tiyi xocbê kiyang wê yêp vac Moses xolac bêga nêbê, “Xomxo wê yux lec xax ge, ge wê kô myaviwen nipaên vô Anutu.” ¹⁴Anutu vông bêge, ên nêb vizid nivihã wê hilu vô Eblaham ge i vô nôn lec vô tibii ba hixôn ên wê he vông i vin Yesu Kilisi ge, di nêl ên nêb Myakilôhô Ngibua wê Anutu nêb ob vông i lam ge, i lam dô hixôn il ên wê il vông i vin ge.

Moses xolac o tiyi wê ob kitya Anutu kiyang wê hilu vô Eblaham ge vêl lêm

¹⁵Xam lige, kiyang wê a ob nêl ga, a ob tixuu lec il kibun ga vông môp, xocbê xomxo ngwe obêc hilu kiyang vô xomxo ngwe di yuu xôn lee yuu di kivuu lec kipihac mi i yêp ge od xomxo ti o tiyi wê ob pwoo kiyang tige vac, me kivuu kiyang ya hixôn ge lêm. ¹⁶Kiyang tige tiyi xocbê Anutu hilu vô Eblaham ên nêb ob vông vô i hixôn i bue timuên ti ge. Kiyang tige, Anutu o nêl ên nêb ob vông vô Eblaham bue vihati lêm. Nge, ob vông vô bu timuên tived. Ge nêl lec Yesu Kilisi. ¹⁷Mêgem kiyang wê a nêl lec xomxo yuu wê hilu kiyang ge, kehe bêga nêbê Anutu hilu kiyang vô Eblaham ilage ên nêb obêc vô nôn lec timuên. Pyap mêd klismas tibeac hiwocên xocbê 430 ge lam la vêl di Anutu vông xolac vô Moses timuên. Om xolac wê Anutu vông vô Moses ge o tiyi wê ob kitya kiyang wê Anutu hilu vô Eblaham ge vêl ge lêm. ¹⁸Ên vizid nivihã wê Anutu hilu pyap nêb ob vông ge, Anutu obêc vông vô xomxo ên wê he timu vô Moses xolac ge od obêc kitya kiyang wê Anutu hilu vô Eblaham ge vêl. Lêc o bêge lêm, ên vizid wê Anutu nêb ob vông ge, Anutu vông i tiyi kiyang wê hilu vô Eblaham ge.

Yuac wê Moses xolac vông ge

¹⁹Mêgem Anutu vông xolac vô Moses, kehe lec vatya? Kehe bêga nêbê Anutu hilu kiyang vô Eblaham pyap, dêc vông xolac vô Moses hixôn

timuên, ên nêb xolac i hilung xomxo nêb nipaên i yêp seac. Om Anutu nêl ên nêb Moses vông xolac i yêp di i miloc vô buc wê Eblaham bu tyo obêc val lec ge. Xomxo tige wê Anutu hilu kiyang vô Eblaham ên nêb obêc vông i lam ge. Moses xolac tige, Anutu vaci o nêl vô xomxo lêm. Nge, Anutu vông angela lam nêl xolac tige vô Moses, pyap dêc Moses lam nêl vô he Islel. ²⁰Dom kiyang wê Anutu hilu vô Eblaham ge, xomxo ti o kô kiyang tige mi la nêl lêm. Nge, Anutu vaci tived wê nêl i kiyang.

²¹Om Moses xolac ob vông vevac vô kiyang wê Anutu hilu pyap ge, me? Ma vêl. Ên Moses xolac obêc vông il dô madviha ge od Anutu obêc yê il nêb il xomxo nivihia ên wê il timu vô xolac tige. ²²Lêc o bêge lêm, ên xolac nêl bêga nêbê nipaên hivun xomxo vihati xôn tiyi xocbê he dô vac kalabuhu ge. Môm yêp bêge, ên Anutu nêb xomxo obêc vông i vin Yesu Kilisi ge od ob kô nôn nivihia wê Anutu hilu pyap nêb obêc vông vô he wê vông vinên ge.

²³Lêc buc wê kiyang vông vinên gên o val lêm ge, om Moses xolac ku il xôn tiyi xocbê il dô vac kalabuhu ge, di i val vô buc wê kiyang vông vinên val le seac pyap. ²⁴Mêgem yuac wê Moses xolac vông ge bêga nêbê yê il xôn di didii il mi la vô Kilisi ên nêb Anutu i yê il nivihia ên wê il vông i vin Kilisi ge. ²⁵Gwêbaga buc wê il ob vông i vin Kilisi ge val pyap om il ob dô vac Moses xolac kwa ngibi di i viac il i tii vac nang lêm.

²⁶Xam vihati tu Anutu nue pyap ên wê xam vông i vin Yesu Kilisi ge. ²⁷Di xam lipac mia lec Kilisi lê om xam xôn Kilisi tiyima. ²⁸Di xam vihati tu nôn tived ên wê xam vông i vin Yesu Kilisi ge. Om il ob xê il i tiyi xocbê kidu kidu lêm, xocbê Yuda yuu tibii ba, di xomxo pileva yuu xomxo wê lê levac ge, di vêx yuu vux toto ge lêm. Ên il vihati ga, il tiyima. ²⁹Xam tu Kilisi xe, mêgem xam tiyi xocbê Eblaham nue bue wê xam obêc kô vizid nivihia wê Anutu hilu vô Eblaham ge.

Il tu Anutu nue nôn

4 ¹Kiyang wê a ob nêl ge bêga bê xomxo ti ma obêc nêl i lê lec susu vihati pyap, lêc xomxo tyo gên dô nipwo ge od ob dô tiyi xocbê xomxo yuac ti, ²di ob dô vac xomxo ngwe kwa ngibi di he i viac i hixôn susu vihati wê ma nêl i lê lec ge di i miloc vô buc wê ma tung ge. ³Di il ga, il tiyi lec bêge. Ên ilage il dô tiyi xocbê xomxo wê gên nipwo ge, ên il dô vac môm yuu xovôên kibun ga kwa ngibi. ⁴Lêc buc wê Anutu vînoo pyap ge om vông nu tuc lam kibun mi vêx ti kô i di i timu vô Moses vông xolac, ⁵ên nêb ob piwelac il vêl ên Moses xolac wê ku il xôn ge di vông il tu Anutu nue.

⁶Il tu Anutu nue pyap, mêgem Anutu vông Myakilôhô Ngibua wê nu Yesu vông ge lam dô vac il nilôd om il keac ên il nêbê, “Mag.” ⁷Mêgem xam xovô bêga bê xam ob tu nue yuac tii vac nang lêm. Ên xam tu Anutu nue nôn, om xam ob kô vizid wê Anutu nêl i nue lê lec ge.

Tibii Galesia vông Pol nilô vô viyin

⁸Vô buc ilage, xam lungên Anutu om xam dô vac anutu mayibên wê nôn maên ge kwa ngibi. ⁹Lêc gwêbaga xam xovô Anutu pyap, me a ob nêl ngwe hixôn bêga bê Anutu xovô xam pyap. Lêc bêna lêc xam vông xam lax vac môm wê nôn maên di o xêkizêc lêm ge? Xam nêb xam ob lax mi la vac kalabuhu i tii vac nang, me? ¹⁰Ên xam pimil buc levac yuu da dêc dentuc paha yuu kliskas paha ên xam nêbê Anutu i yê xam nêb xam xomxo nivîha. ¹¹Om a xo xam di a nilôg viyin, ên a nêb mêd yuac levac wê a vông vac xam mahigun ge, mêd a vông pileva di nôn ma.

¹²Xam lige, a o dô vac Moses xolac kwa ngibi lêm, om a kitaa xam bê xam dô i tiyi xocbê a dô ge. Ên ilage a dô tiyi xocbê xam dô ge. Ilage xam o vông nipaên ti vô a lêm. ¹³Ên xam xovô pyap ên xam nêbê ilage yidac vông a di a o tiyi wê a ob la tup vac vigwe ge lêm, om a dô hixôn xam di vông xolac vô xam taxlee. ¹⁴Mêd yidac tige vông yuac levac vô xam, lêc xam o xona ên a lêm, di xam o vô nimim vô a lêm. Nge, xam kô a lec nivîha tiyi xocbê xam kô angela ti lec, me xam kô Yesu Kilisi vaci lec ge. ¹⁵Lêc gwêbaga xam xêmÿyaa nivîha tyo yêp gê tina? Vixôhilôg, a xovô ên a nêbê ilage xam xêmÿyaa vin lec a luu vêl, om xam vông xam nilôm la yadiluhu vô a. ¹⁶Lêc gwêbaga, mêd xam wê a nipaên ên wê a nêl kiyang nôn vô xam ge, me?

¹⁷Xomxo ya la pimil xam di nêl kiyang nivîha vô xam ên nêbê xam vông i vin he vya, lêc he o vông hixôn nilô nivîha lêm. Nge, he nêb he ob vô xam vêl ên a, ên xam pimil heche va. ¹⁸Vixôhilôg, môm wê xomxo ob pimil xam di nêl kiyang nivîha vô xam ge, he obêc vông hixôn nilô nivîha ge od obêc nivîha, tiyi wê he ob vông lec buc vihati, buc wê a dô hixôn xam ge di buc wê a dô hixônên xam ma ge. ¹⁹Xam nuge, xam vông a nilôg vô viyin levac nang, tiyi xocbê vêx ti wê nu ob yubac ge om dô vac viyin ge. Om a ob kilê viyin tige di i loc tyip lec buc wê xam obêc vông xam la diluhu vô Kilisi ge. ²⁰Xame, a obêc dô hixôn xam ge od a ob nêl kiyang bôbac wê ob vô nivîha vô xam ge, lêc a o dô hixôn xam lêm, om a nilôg xo kiyang tibeac ên a nêb a ob ngidu xam xôn ya vatya?

Kiyang pilepacên lec Hega yuu Sela

²¹Om xam wê xam nêb xam ob dô vac Moses xolac kwa ngibi ge, xam nêl lê. Xam xovô kiyang wê xolac tige nêl ge, me? ²²Ên kiyang yêp vac Moses xolac bêga nêbê Eblaham nu yuu, lêc vêx wê vông yuac vô Eblaham ge lê nêbê Hega kô ngwe, di vinê Sela kô ngwe. ²³Om nu ngwe wê vêx yuac kô ge, kô i tiyi xovôên wê xomxo vông ge, di nu ngwe wê vinê Sela kô ge, kô i tiyi kiyang wê Anutu hilu vô Eblaham ge. ²⁴⁻²⁵Kiyang ga, kiyang pilepacên lec vêx yuu ge. Ên vêx yuu ge tixuu lec kiyang yuu wê Anutu hilu vô xomxo ge. Om vêx ngwe wê Hega ge, tiyi

xocbê kiyang ngwe wê Anutu vông vô Moses lec kitôn Sainai vac vigwe Alebia ge, om Hega nu ge wê ob vông yuac pileva vô xomxo ge. Hega ge tiyi xocbê vigwe Jerusalem gwêbaga, ên xomxo Jerusalem dô vac Moses xolac kwa ngibi tiyi xocbê he tu tibii yuac pileva ge. ²⁶Di vêx ngwe wê Sela ge tiyi xocbê Jerusalem paha ngwe wê yêp kisii ganê. Il dô nidviha di il o dô tiyi xocbê tibii yuac pileva ge lêm, om Sela ge tiyi il tag. ²⁷Tiyi xocbê kiyang wê yêp vac xolac bêga ên nêbê,

“Ông vêx wê ông o kô nipwo ti lêm ge, ông xêmyaa i vô nivihã. Di ông vêx wê ông o yaxên myavinê wê nipwo kê ông ge lêm, ông pimil di vô didun hixôn xêmyaa nivihã. Ên ông vêx wê ông le môô ge, nume obêc tibeac luu vêx wê dô hixôn liya ge nue vêl.” Xolac nêl bêge.

²⁸Xam lige, xam tiyi xocbê Aisak wê ta Sela kô i tiyi kiyang wê Anutu hilu ge, ên xam tu Anutu nue tiyi xocbê kiyang wê hilu pyap ên nêb ob vô nôn lec ge. ²⁹Lêc Hega nu Ismael wê ta kô i tiyi xovôên wê xomxo kibun ga vông ge, vông vevac vô Sela nu Aisak wê ta kô i tiyi xocbê kiyang wê Myakilôhô Ngibua nêl ge. Mêd môp tibêge yêp gwêbaga hixôn. ³⁰Mêlêc xolac nêl bêna lec kiyang tige? Kiyang yêp bêga nêbê,

“Tii vêx yuac tige yuu nu i loc vêl, ên vêx yuac tige nu lê ob lec susu wê ma Eblaham vông ge ti lêm. Nge, Sela nu Aisak lê ob lec susu wê Eblaham vông ge.”

³¹Om xam lige, il ob xovô bê il o tiyi xocbê vêx wê vông yuac pileva ge nue lêm. Nge, il tu vêx wê Eblaham vinê bôbac ge nue.

Kilisi piwelac il vêl pyap om il ob viac nêd môp i nivihã

5 ¹Kilisi piwelac il vêl ên Moses xolac ên nêb il o dô vac kwa ngibi i tii vac lêm. Mêgem xam le pilihi, di le i lêc vông xomxo i lii viyin lec xam i tii vac lêm.

²Xam ngô lê. A, Pol, a ob nêl vô xam bê xam obêc nêb xomxo i gôl xam nimnivi ge od yuac wê Kilisi vông ge ob vô nivihã vô xam lêm. Ma vêl.

³Om a ob nêl vô xam i tii vac bê xam obêc tyuc lec ên xam nêb xomxo i gôl xam nimnivi i tiyi xocbê kiyang wê yêp vac Moses xolac ge, od kiyang yêp bêga nêbê xam lêc timu vô môp wê Moses xolac nêl ge vihati hixôn.

⁴Lêc xam wê xam nêb xam ob timu vô Moses xolac ên Anutu i yê xam nivihã ge, ge xam tax xam tip vêl ên Kilisi di vô xam vêl ên vizid wê Anutu vông ge. ⁵Lêc il ga, il vông i vin ya xêkizêc wê Myakilôhô Ngibua vông ge, om il dô bin wê Anutu ob yê il nêb il xomxo nivihã ge. ⁶Om il wê il vông i vin Yesu Kilisi ge, il ob xê môp ninivi gôlên yuu môp ninivi gôlên maên i tiyi xocbê susu pileva. Ên môp wê nôn ge bêga nêbê vông vinên wê il vông ge ob vô nôn nivihã bêga bê il xêdyaa i vin lecma.

⁷Xame, ilage xam dô nimvihã vac môp vông vinên. Lêc gwêbaga kiyang tina wê le vac xam xôn di vông xam sea kiyang nôndê? ⁸Piyôp

tibêge o lam vô Anutu lêm, ên Anutu ge wê tyuc xam nêb xam tu i nue. ⁹Yis nipwo tya tiyi wê ob vông blet vuac mi vô levac ge, tiyi xocbê kiyang kityooên wê xomxo ti nêl ge obêc vô levac di hivun xomxo vihati xôn. ¹⁰Lêc a vông i vin ên a nêbê Apumtau obêc ngidu xam xôn di xam ob vông i vin kiyang wê a nêl ga, di kiyang ba ge, xam ob sea i loc yêp xel. Di xomxo ti wê loc juda xam piyôp ge, a lungên, ge xomxo levac me xomxo pileva, lêc a ob nêl bêga bê obêc kô myaviwen lec nên nipaên wê i vông ge.

¹¹Xam lige, a obêc nêl vô xomxo bê he i gôl ninivi ge od he Yuda obêc vông viyin ti vô a lêm. Ên a obêc nêl bê he i gôl ninivi ge od kiyang wê a nêl lec wê Yesu yib lec xax ge ob vông he yê a nipaên lêm. Lêc kiyang tige o tibêge lêm, om he yê a nipaên di vông viyin vô a. ¹²Om xomxo wê loc juda xam piyôp ge, a nêb he i loc gôl ninivi vihati vêl.

¹³Xam lige, vixôhilôg, Anutu piwelac xam vêl ên xolac wê Moses ge di vông xam dô nimviha. Lêc xam o lêc xo bêga bê, “Gwêbaga xe dô vac nivihia di kiyang ti o hôm xe xôn lêm, om xe ob vông môt vaxvax i tiyi xocbê xovôên wê xe vông ge”, xam o lêc xo kiyang tibêge lêm. Xam xêmyaa i vin lec lime vihati di xam vông môt wê ob ngidu he xôn ge. ¹⁴Ên xolac vihati yang wê Anutu nêl vô Moses ge, kehe levac tived bêga nêbê, “Ông xêmyaa i vin lec xomxo vihati i tiyi xocbê ông xêmyaa vin lec ôcông va ge.” ¹⁵Lêc xam xêmyaa obêc vô myavinê voma di xam vông nipaên voma ge od xam xona nêm, ên xam obêc kitya xam vihati vêl.

Môt wê Myakilôhông Ngibua vông ge hixôn môt nipaên wê xomxo nilô xovô ge

¹⁶Mêgem a ob nêl vô xam bê xam timu vô môt wê Myakilôhông Ngibua vông ge, di xam o lêc timu vô môt nipaên wê xacxam va xovô ên nêb xam ob vông ge lêm. ¹⁷Ên môt nipaên wê xomxo nilô xovô ge vông vevac vô Myakilôhông Ngibua, di môt wê Myakilôhông Ngibua nêb il vông ge vông vevac vô môt nipaên wê xomxo xovô ge, om yuu vông vevac voma, om môt wê xam nêb xam ob vông ge, xam o tiyi wê xam ob vông ge lêm. ¹⁸Lêc xam obêc dô vac môt wê Myakilôhông Ngibua vông ge od xam ob dô vac Moses xolac kwa ngibi lêm.

¹⁹Xam xovô pyap bê môt nipaên wê xomxo vaci xovô ge yêp bêga nêbê yôdac vêx yuu vux, nilô ngaên yôdac vêx yuu vux, di vông yôdac vaxvax, ²⁰di vông nilô la vô anutu kityooên, di vông yevac, di xêyaa vô nipaên voma, di vông vevac voma, di yetac ên xomxo ngwe susu, di kunacma, di vông môt wê ob vô nivihia vô heche va ge, di yêma nipaên mi dô kidu kidu, ²¹di yêma tiyiên ma, di num levac mi vô mavmav di yoo di vông lilo yacyac, di vông môt nipaên toto ge tibeac hixôn. A nêl vô xam ilage di a ob nêl vô xam gwêbaga i tii vac nang bê xomxo wê mi vông môt nipaên tibêge ge ob la dô hixôn Anutu vac i ben lêm.

²²Dom môp wê Myakilôhô Ngibua vông ge ob vô nôn lec bêga bê môp xêyaa vin lec maên, di xêyaa nivihã, di kiyang malehe, di vông nivihã vac nipaên, di vông nivihã vô xomxo mi ngidu he xôn, di timu vô môp nivihã tiyi buc vihati, ²³di nêl kiyang malehe vô xomxo, di viac he nivihã ên môp nipaên vihati. Môp nivihã tibêgee, kiyang ti o vibu môp tibêgee lêm. ²⁴Il wê il tu Yesu Kilisi xe ge, il hi nilôd yuu xovôên nipaên wê kidu il ge lec xax pola mi i yib mi la vêl.

²⁵Myakilôhô Ngibua vông il dô madvihã, mêgem il ob timu vô môp wê Myakilôhô Ngibua vaci vông ge. ²⁶Om il ob yong icil va lêd lêm, di il ob vông lige ni i nyag vô il lêm, di il ob xê lige ngwe nipaên lec he susu lêm.

Il ob ngidu lige wê kilê viyin ge xôn

6 ¹Xam lige, lime vông vinên ti obêc vông môp nipaên ti ge od xam wê xam mi timu vô môp wê Myakilôhô Ngibua vông ge, xam lum nêl kiyang malehe vô i di kô i mi lôm vac môp nivihã. Di xam toto ge, xam xona nêl, ên Seten i o lêc didii xam vac môp nipaên hixôn lêm. ²Di viyin obêc tulec lime ti ge od xam kilê viyin hixôn i, ên môp tibêge wê ob vông Kilisi xolac vô nôn lec. ³Xomxo ti obêc yong i nêb i xomxo levac ge od ge kityoo nêl, ên i o xomxo levac lêm. ⁴Om xomxo toto ge he i yaxên môp yuu yuac wê he vông ge bê nivihã me nipaên. Ên obêc vông bêge ge od he xêyaa ob vô nivihã lec yuac nivihã wê he toto vông ge, di he ob tixuu môp wê he vông ge lec môp wê xomxo ya vông ge lêm. ⁵Ên il toto ge vihati, Anutu obêc yaxên yuac wê il vông ge.

⁶Om xomxo wê mi nêl xolac vô xam ge, xam vông susu nivihã wê xam vông ge ya vô he ên i ngidu he xôn.

⁷Xam o lêc xo bê xam ob kityoo Anutu lêm. Ên xomxo ti o tiyi wê ob kityoo Anutu ge lêm. Ên xomxo obêc xin vê ge od ob kô nôn i tiyi vê wê xin ge. ⁸Om xomxo ti obêc timu vô môp nipaên wê ici va xovô ge od ob kô nôn nipaên bêga nêbê obêc yib mi la vac vigwe nipaên, lêc obêc timu vô môp nivihã wê Myakilôhô Ngibua vông ge od obêc kô nôn nivihã wê Myakilôhô Ngibua vông ge bêga nêbê ob la dô mavihã luta lêc luta. ⁹Om il nid ob ma lec môp nivihã wê il ob vông ge lêm. Ên il obêc vông yuac xêkizêc di il nid obêc ma lêm ge od il obêc kô nôn nivihã lec timuên. ¹⁰Mêgem môp obêc yêp wê il ob vông nivihã vô xomxo ge od il ob vông, lêc il ob vông nivihã vô lige vông vinên i luu vêl.

Pol kiyang timuên wê ici va kivuu ya vigê ge

¹¹Xam wê a kiyang wê a kivuu levac levac ga. Ga aca va kivuu ya vigê ge vô

xam. ¹²Om xam ngô lê. Xomxo wê kidu xam nêb xam gôl nimnivi ge, he vông ên he nêb xomxo i pimil he di vông lê levac vô he lec môp kibun ga. He vông bêge, ên he xo ên he nêbê he obêc nêl lec wê Kilisi yib lec

xax pola ge od tibii obêc vông vîyin vô he. ¹³Xomxo tigeê gôl he ninivi lê, lêc he o timu vô môp vihati wê Yuda vông ge lêm. Lêc he nêb he ob gôl xam nimnivi, ên kô lê levac lec wê xam vông i vin he vya dî gôl nimnivi ge. ¹⁴Dî a ga, a ob yong a lec kiyang tîbed bêga nêbê il Apumtau Yesu Kîlisi yib lec xax pola, om ge tiyi xocbê môp yuu xovôên kibun ga yib lec xax hixôn, om ti o tiyi wê ob ku a xôn ge lêm, dî a êno xê môp tige tiyi xocbê susu mayibên ge. ¹⁵Om môp ninivi gôlên yuu ninivi gôlên maên, yuu xôn susu pileva, lêc kiyang tîbed wê nôn ge bêga nêbê Anutu vông il vô paha lec. ¹⁶Om xam wê xam vông i vin kiyang tiga ge, kiyang malehe yuu xêyaa vin lecên i hivun xam xôn, hixôn he Islele wê Anutu nue nôn ge.

¹⁷Om xomxo ti i o lêc vông vîyin vô a lec kiyang tige i tii vac lêm, ên vîyin wê xomxo vông vô a lec Yesu lê ge, piyaha yêp lec a nignivi pyap.

¹⁸Xam lige, vizid nivîha yuu xêyaa vin lecên wê il Apumtau Yesu Kîlisi vông ge i viac xam. Kiyang nôn.

EPESAS

Kipihac wê Pol kivuu vô tibii Epesas ge

1 ¹A, Pol wê Anutu vînoo a ya xovôên wê ici va vông ge ên nêb a tu Yesu Kîlisi nu sinale ti. A kivuu kiyang tiga vô xam Epesas wê xam tu Anutu nue ði xam vông i vin Yesu Kîlisi ge. ²Mag Anutu yuu Apumtau Yesu Kîlisi, yuu i vông vizid nivîha hixôn kiyang malehe i lam dô hixôn xam.

Anutu vông vizid nivîha vô il

³Il ob pimil Anutu wê il lig Apumtau Yesu Kîlisi ma yuu Anutu. Il tu Kîlisi nue, om Anutu vông vizid kîsîi ganê vîhati vô il ên nêb he i ngîdu il xôn. ⁴Taxlee ilage wê Anutu gên o tung lag yuu kibun lêm ge od vînoo il pyap lec yuac wê Kîlisi ob vông ge ên nêb il tu xomxo ngîbua wê nîpâên ti ob yêp vô il lêm ge. ⁵Anutu xêyaa vin lec il, om ilage ici va vînoo il pyap ên nêb il tu i nue lec yuac wê Yesu Kîlisi vông ge. Anutu vông bêge ya xovôên wê ici va vông ge. ⁶Om il ob pimil Anutu ên vizid nivîha yang wê vông pileva vô il ge. Anutu vông vizid tige vô il lec yuac wê nu tuc vông vô il ge. Anutu xêyaa vin lec nu tuc.

⁷Anutu xo vîgwe pisiv ên il luu vêl, om vô il vêl ên il nêd nîpâên ya Yesu hi ði kîtya il nêd nîpâên vêl. ⁸Om wê xo vîgwe pisiv ên il ge, ge vizid nivîha wê Anutu vông i lam hivun il xôn, ði Anutu vông piyôp hixôn xovôên vîhati vô il. ⁹Ilage Anutu xovô yuac wê Kîlisi ob vông ge, léc yuac tige yêp xôpacên vô Anutu vaci. Dêc timuên léc Anutu vông i tiyi xovôên wê yêp vô i ge om hîlung xovôên tige lam yêp seac vô il ên nêb il xovô. ¹⁰Xovôên wê yêp vô Anutu ge bêga nêbê buc wê Anutu vînoo pyap ge od obêc kîtuc xomxo hixôn susu vîhati wê dô lec kibun ði wê dô vac lag ge lam dô vac Kîlisi kwa ngîbi ði i ob tu he nêb bazub.

¹¹Anutu vông ya xovôên wê i vông ge om vînoo il ên nêb il tu i nue lec yuac wê Kîlisi vông ge. Ên Anutu obêc nêl kiyang ti ge od obêc vông i vô

nôn lec tiyi xocbê kiyang wê yêp ilage. ¹²Anutu vông xolac mug lec xe Yuda taxlee di vinoo xe ên nêb xe pimil Anutu wê xêseac kehe ge.

¹³Xam êno, xam ngô Anutu kiyang nô. Kiyang tige kiyang nivihâ wê nêl bêga ên nêbê Kilisi vô il vêl ên il nêd nipaên. Xam ngô di vông i vin Kilisi di tu i nue, om Anutu vông i tiyi kiyang wê hilu pyap ilage di vông Myakilôhô Ngibua lam dô vac xam nilôm tiyi xocbê Anutu vinoo xam pyap. ¹⁴Myakilôhô Ngibua dô vac il nilôd, om vông xovôên vô il bêga nêbê Anutu ob kô il mi il la dô hixôn i. Di Myakilôhô Ngibua obêc dô vac il nilôd di i loc tyip lec buc timuên wê il ob la vô Anutu ge di ob sea il lêm. Om il ob xovô vizid wê Anutu vông vô il ge di pimil i lê i vô levac.

Pol kitaa vô Anutu ên nêbê i vông xovôên vô tibii Epesas

¹⁵A ngô wê xam vông i vin Apumtau Yesu di xam xêmyaa vin lec xomxo vông vinên vihâti ge, ¹⁶om a pimil Anutu tiyi buc vihâti ên xam di a o sea lêm, di a mi kitaa vô Anutu ên a nêb i ngidu xam xôn. ¹⁷Anutu ge il Apumtau Yesu Kilisi Anutu i di il Mag wê xêseac kehe ge. Om a kitaa vô Anutu ên a nêbê i vông xovôên nivihâ wê i vông ge vô xam di nêl i kiyang kehe i yêp seac vô xam ên xam ngô di xovô Anutu. ¹⁸A kitaa ên a nêb Anutu i vông xam piyôp i yêp seac ên xam xovô nô nivihâ wê Anutu nêl ên nêb obêc vông vô xam ge, di xam xovô vizid nivihâ vihâti wê Anutu nêl xam lêm lec pyap mi i dô bin xam wê xam tu i nue ge. ¹⁹Di a kitaa vô Anutu ên a nêbê i vông xovôên vô xam ên xam xovô bêga bê xêkizêc wê Anutu vông ge i ngidu il wê il vông i vin ge xôn. Xêkizêc wê Anutu vông ge luu xêkizêc vihâti vêl, om il o tiyi wê il ob yaxên mi xovô ge lêm. Xêkizêc levac tige vông yuac vac il nilôd, ²⁰di Anutu tipi vô Kilisi kidi lec maviha vac yibên ya xêkizêc tige di vông i la dô vô Anutu vigê hiyôv gê kisii ganê. ²¹Mêgem gwêbaga Kilisi tu levac mi nginoo xomxo levac kibun ga vêl, di nginoo angela hixôn vimwo nipaên vihâti vêl, di nginoo susu hixôn xomxo vihâti vêl, di kô lê levac di nginoo xomxo lê levac vihâti vêl, he wê dô gwêbaga hixôn he wê ob dô timuên ge. ²²Anutu vông xomxo yuu susu vihâti la dô vac Kilisi kwa ngibi, di vông Kilisi tu xomxo vông vinên vihâti bazub. ²³Kilisi hixôn xomxo vông vinên vihâti tiyi xocbê nô tibe, lêc Kilisi tu bazub. Di Kilisi viyum xomxo hixôn susu vihâti xôn di ici va tiyi lec vihâti, di i dô vac xomxo vông vinên vihâti nilô hixôn.

Anutu tipi vô il dô madviha hixôn Kilisi

2 ¹Ilage xam mi vông môp nipaên yuu soên viyang viyang ge, mêgem xam dô tiyi xocbê xam wib di la dô teva ên Anutu. ²Vô buc tige xam la dô vac môp kibun ga, di timu vô môp wê Seten vông ge. Seten ge wê tu vimwo nipaên vihâti nêb levac, di gwêbaga i vông yuac vac he wê pwoo Anutu kiyang vac ge nilô. ³Ilage il vihâti dô tiyi xocbê xomxo

tibêgee di timu vô môt nipaên kibun ga, di vông môt nipaên tiyi xocbê il nilôd kidu il ên nêb il vông ge, di il vông môt nipaên tiyi xocbê il nidnivi yuu piyôp xovô ên nêb il vông ge. Om Anutu xêyaa vô myavinê vô il hixôn xomxo nipaên vihati ên nêb obêc kitya il vêl.

⁴⁻⁵Ilage môt nipaên wê il vông ge vông il dô teva ên Anutu tiyi xocbê il xib. Lêc Anutu xo vigwe pisiv ên il luu vêl, di xêyaa vin lec il luu il nêd nipaên vêl, om vông il dô madviha hixôn Kîlisi. Môt tixed wê Anutu xo vigwe pisiv ên il ge, ge wê vô il vêl ên il nêd nipaên. ⁶Anutu tîpi vô il kidi lec madviha hixôn Kîlisi di il tu Kîlisi xe, om vông il lêd vô levac hixôn Yesu Kîlisi gê kisii ganê. ⁷Anutu vông bêge ên nêb xomxo vihati wê dô gwêbaga hixôn he wê obêc dô timuên ge, he i xovô bêga bê Anutu vông vizid nivîha vô il. Vizid nivîha tige bêga nêbê Anutu xo vigwe pisiv ên il di vông Yesu Kîlisi lam vô il vêl ên il nêd nipaên. Om vizid nivîha tige luu vizid vihati yang vêl. ⁸Il vông i vin Kîlisi om Anutu xo vigwe pisiv ên il di vô il vêl ên il nêd nipaên. Lêc Anutu o vông vizid tige vô il ên môt nivîha ti wê il vông ge lêm. Nge, vông pileva vô il. ⁹Ên il nêd yuac nivîha ti yêpên ma wê ob kisuu Anutu ên i kitya il nêd nipaên vêl ge. Om xomxo ti o tiyi wê ob yong i vô Anutu ge lêm. ¹⁰Anutu vaci tung il vihati di vông il vô paha lec, lec yuac wê Kîlisi vông ge, ên nêb il timu vô môt nivîha vihati wê i viac pyap ila ên nêb il ob la vac ge.

Kîlisi kituc xomxo viyang yuu tu nôn tixed

¹¹Xam Epesas ge, xam o xomxo Yuda lêm. Nge, xam tibii ba. Xe Yuda, xe mi gôl nimnivi, ên môt tige wê Anutu vông vô xe Yuda ge. Om xe mi nêl kiyang lec xam bêga ên xe nêbê xam ge xomxo wê gôlên nimnivi ma ge. Om xam xovô bê ilage xam gên dô mamdiluhu. ¹²Vixôhilôg, ilage xam le teva ên Kîlisi, di xam dô ninya ên xe Islel. Di Anutu hilu kiyang ên nêb obêc vông vizid nivîha vô xe Yuda, lêc o nêl bêga vô xam tibii ba hixôn lêm. Xam dô kibun ga, lêc xam o dô bin susu nivîha ti wê ob val vô xam timuên ge lêm, di xam lungên Anutu. ¹³Ilage xam dô teva ên Anutu, lêc Kîlisi lam yib di kipyax i hi sea ên nêb ob didii xam lôm vô Anutu. Om gwêbaga xam lam dô kwabo vô Anutu lec yuac wê Yesu Kîlisi vông ge. ¹⁴Ên Kîlisi vaci tu il nêd malehe kehe. Ilage xe Yuda hixôn xam tibii ba, il xêdyaa vô nipaên voma. Om môt wê il xêdyaa vô nipaên voma ge tiyi xocbê xenac levac ti wê le vac il mahigun, om xe Yuda dô vilu di xam tibii ba dô vilu. Lêc Yesu lam yib ên il vihati, mêmegem dii xenac tige vêl di vông xe Yuda hixôn xam tibii ba il xôn dô kidu tixed, ¹⁵ên Yesu kitya Moses xolac hixôn kiyang yuu môt wê yêp vac ge vihati vêl. Yesu vông bêge ên nêb ob kituc xe Yuda hixôn xam baba di vông il tu nôn paha tixed, om vông il xêma nivîha mi dô vac kiyang malehe nilô. ¹⁶Yesu yib lec xax ên nêb ob vông il vihati tu nôn tixed di didii il xôn mi la vô Anutu. Om kitya môt wê il xêma nipaên ge vêl. ¹⁷Kîlisi lam nêl kiyang

niviha vô il bêga nêbê ob vông il vihati dô vac kiyang malehe nilô. Om lam nêl kiyang bêge vô xam tibii ba wê ilage xam dô teva ên Anutu ge, di nêl vô xe Yuda wê xe dô kwabo vô Anutu ge hixôn. ¹⁸Xe Yuda hixôn xam tibii ba ge, Myakilôhô Ngibua tived tax vuayen ên môp wê il xôn ob la vô Anutu ge lec Kilisi tived.

¹⁹Mêgem gwêbaga xam o dô tiyi xocbê tibii ba wê vitevac ge lêm. Nge, xam tu Anutu nue pyap di lam kituc lec xe Yuda hixôn xomxo vông vinên vihati. ²⁰Il vihati tiyi xocbê xumac wê Anutu lox ge. Om Yesu Kilisi vaci tiyi xocbê teac wê le vac kibun di xumac le lec ge, di xe sinale hixôn plopete, xe tiyi xocbê xax wê le lec teac ge. Di xam ge tiyi xocbê xax malecên wê le lec pêt ngibi ge. ²¹Di Yesu vaci ngidu xumac tige xôn, om xumac yêp nivihia di le xêkizêc. Anutu vaci lox xumac tige om obêc vô levac di tu Apumtau xumac ngibua. ²²Xam êno vông i vin Yesu, om Anutu vilu vô il vihati dô tived om il xôn vihati tu Anutu xumac ngibua wê Anutu hixôn Myakilôhô Ngibua ob dô vac ge.

Pol nêl xolac vô tibii ba wê o Yuda lêm ge

3 ¹Anutu vông xe Yuda hixôn xam tibii ba tu nôn tived. Lêc tibii tung a Pol, a lam dô vac xumac kalabuhu ên wê a nêl Yesu Kilisi xolac vô xam wê xam o Yuda lêm ge. ²A xovô ên a nêbê xam ngô kiyang lec wê Anutu vông vizid vô a ge. Anutu vông vizid vô a bêga nêbê a loc vô xam tibii ba di nêl xêyaa vin lecên wê i vông ge kitong vô xam. ³Ilage vizid wê Anutu vông ge yêp xôpacên. Mêd gwêbaga Anutu nêl mi i yêp seac vô a di a xovô. Om ga tiyi kiyang myabo wê a kivuu vô xam ilage. ⁴Mêgem xam obêc kitong kipihac tiga od xam obêc xovô bê piyôp wê a vông ge nêl kiyang xôpacên lec Kilisi yêp seac. ⁵Vô buc taxlee ilage Anutu o nêl kiyang xôpacên tige yêp seac vô xomxo ti lêm, lêc gwêbaga Anutu vông Myakilôhô Ngibua lam nêl kiyang tige kehe kitong vô xe sinale hixôn he plopete wê Anutu vinoo xe ên nêb xe vông i yuac ge. ⁶Om kiyang tige bêga nêbê Anutu kituc xe hixôn xam tu nôn tived pyap, om nôn nivihia vihati wê Anutu nêb obêc vông vô xe Yuda ge od obêc vông vô xam êno hixôn. Di kiyang vihati wê Anutu hilu ilage ên nêb obêc vô nôn lec vô xe Yuda ge, od kiyang tige obêc vô nôn lec vô xam baba hixôn, ên xam vông i vin xolac nivihia wê Yesu Kilisi vông ge.

⁷Anutu vông vizid nivihia vô a di vinoo a ên nêb a loc nêl xolac nivihia vô xam. Om vông xêkizêc wê i vông ge vô a ên nêb xêkizêc tige i ngidu a xôn di a vông yuac. ⁸A ga, a o levac lêm. Nge, Anutu nue vihati ge nginoo a vêl. Mêlêc Anutu vông vizid nivihia vô a bêga nêbê a loc nêl xolac vô xam tibii ba. Xolac tige nêl vizid nivihia vihati wê Kilisi vông ge kitong. Lêc il piyôp o tiyi wê il ob xovô vihati ge lêm. ⁹Anutu ge wê tung susu lag yuu kibun vihati, di ilage môp wê Anutu nêb ob vông ge yêp xôpacên vac i piyôp di i val tyip gwêbaga. Lêc gwêbaga Anutu vông

yuac vô a ên nêb a loc nêl kiyang xôpacên tige i yêp seac vô xomxo vihati. ¹⁰Anutu nêl kiyang xôpacên tige yêp seac vô xomxo vông vinên vihati ên nêb he levac levac hixôn xêkizêc kisii ganê, he i yê di xovô bê Anutu piyôp levac luu vihati vêl. ¹¹Buc taxlee ilage Anutu nêb ob vông yuac tibêge tiyi xocbê xo mi yêp lec Apumtau Yesu Kîlisi ên nêb Kîlisi ob vông ge. ¹²Mêgem gwêbaga il vông i vin Kîlisi, om Kîlisi vông môp vô il wê il ob la vô Anutu ge di il ob xona lêm. ¹³Om a kitaa xam bê myavinê levac wê a kô ên wê a ngidu xam xôn ge, xam nilôm i o lêc vô viyin ên myavinê tige lêm. Ên myavinê wê a kilê lec xam ge ob vông xam lêm vô levac.

Pol kitaa vô Anutu ên tibii Epesas

¹⁴Mag Anutu kituc xe Yuda hixôn xam baba ge lam dô kidu tixed, om a yev vixag kitu vô Mag di pimil i lê. ¹⁵Anutu nêl lê tixed lec he wê dô lag puunê gee hixôn il wê il dô kibun ga ge. ¹⁶Om a kitaa vô Anutu bêga bê xêseac nivaha wê yêp vô i ge i lam ngidu xam xôn, di i vông Myakilôhông Ngibua wê i vông ge i dô vac xam nilôm di xam le xêkizêc ta. ¹⁷Di a kitaa vô Anutu ên a nêbê i vông Kîlisi i lam dô vac xam nilôm ên wê xam vông i vin i ge, di i vông môp xêyaa vin lecên i vô levac vô xam ên xam le xêkizêc ya, i tiyi xocbê xax ngilôhông la vac kibun di hôm yatôv xôn di i le pilihi ge. ¹⁸Ên xam obêc le xêkizêc vac môp xêyaa vin lecên ge od xam hixôn xe vông vinên vihati ge, il xôn obêc xovô môp xêyaa vin lecên wê Yesu vông ge. Xêyaa vin lecên wê Yesu vông ge levac di dia nginoo la vêl di viyum vihati ge xôn, ¹⁹di luu xovôên wê il vông ge vêl. Om a kitaa vô Anutu bêga bê i vông xovôên vô xam ên xam xovô xêyaa vin lecên wê Kîlisi vông ge, di xêkizêc yuu xovôên di vizid nivaha vihati wê Anutu vông ge i lam hivun xam xôn. ²⁰Xêkizêc wê Anutu vông ge vông yuac vac il nilôd, om il obêc xo susu ti, me il obêc kitaa susu ti vô i ge od Anutu tiyi wê obêc vông vô il i luu wê il xovô me il kitaa vô i ge vêl. ²¹Om il xomxo vông vinên vihati, il wê il dô gwêbaga hixôn he wê ob dô timuên gee, il obêc pimil Anutu lec yuac wê Yesu Kîlisi vông ge i yêp luta léc luta. Kiyang nôn.

Il hixôn Kîlisi tiyi xocbê nôn tixed

4 ¹A ga, tibii tung a lam dô vac xumac kalabuhu ga ên wê a nêl Apumtau xolac vô xam ge. Ilage Anutu tyuc xam ên nêb xam tu i nue, om a ob nêl kiyang vô xam bêga bê xam viac môp vihati i yêp nivaha i tiyi xocbê Anutu nêb il ob timu vô ge. ²Om môp nivaha wê Anutu vông vô il ge bêga nêbê xam pilepac xam di vô nipwo lec, di xam lum nêl kiyang vôma, di le i lêc vông nipaên vô xomxo wê vông viyin vô xam ge lêm. Nge, xam xêmyaa i vin lec lime di xam kilê viyin wê he vông vô xam ge. ³Môp malehe wê Myakilôhông Ngibua vông ge kisuu il lec di vông

il le nôn tived. Mêgem xam vông yuac xêkizêc di hôm môp malehe xôn pilihi ên i ngidu xam xôn. ⁴Il vihati tu nôn tived, di Myakilôhô Ngibua tived, di Anutu tyuc il vihati ên nêb il vông nilôd i loc vô nôn tived wê i obêc vông vô il timuên ge. ⁵Il Apumtau tived, di vông vinên wê il vông ge tived, di il lipac mia lec lê tived, ⁶di il Mag Anutu tived. Anutu tu il vihati nêd levac, di ngidu il vihati xôn, di dô vac il vihati nilôd.

⁷Kilisi titang vizid toto ge vô il ya xovôen wê i vông ge ên nêb ob vông vô il. ⁸Mêgem kiyang wê yêp vac kipihac xolac ge vô nôn lec. Kiyang tige nêl bêga ên nêbê,

“Buc wê i lec mi lax kisii ganê ge od didii tibii wê vông vevac vô i lêc i nginoo he vêl ge mi la hixôn, dêc titang vizid toto vô xomxo.”

⁹Kiyang nêl bêge, om bo ti wê nêbê lec mi la kisii ganê ge, kehe nêbê va? Kehe nêl bêga ên nêbê ilage i sea ben lag kisii ganê di lop mi lam kibun ga di la vac kibun nilô. ¹⁰Om xomxo tyo wê lop mi lam kibun ga ge wê lec mi lax kisii ganê tii vac nang di luu lag vêl, om dô i nêx lec lag yuu kibun vihati. ¹¹Di Kilisi vông vizid yuu xovôen toto vô xomxo ên nêb he i vông he yuac ya. Om vông yuac sinale vô xomxo ya, di vông yuac plopete vô xomxo ya, di vông yuac xolac nêlên vô xomxo ya ên nêb he i loc nêl xolac vô tibii madiluhu, di vông yuac pasto vô xomxo ya ên nêb he i viac xomxo vông vinên di tixuu he ya xolac. ¹²Kilisi vông yuac tigeê vô xomxo ya ên nêb he i ngidu il xomxo vông vinên vihati xôn di il vông yuac wê Kilisi vông vô il ge i yêp nivihia. Il hixôn Kilisi tiyi xocbê nôn tived. Om yuac wê il vông ge ob vông nôn tige vô levac di ngidu vông vinên wê il vông ge xôn. ¹³Mêgem yuac tige i vô levac vô il di i loc vô buc wê il xomxo vông vinên vihati obêc le xêkizêc vac vông vinên, di kô xovôen tived lec Anutu nu tuc, di il ob tu xomxo nivihia tiyi xocbê Kilisi ge. ¹⁴Mêgem il ob dô tiyi xocbê nue nipwopwo ge lêm. Ên xomxo kityooên obêc tixuu nipwo ya xolac ba ti, me didii he mi la vac môp kityooên ge od ob vô pilepac pilepac vô he tiyi xocbê gwec vuac di pilepac dipac di lea vô pop pop vô dipac la di lôm ge. Om il ob dô tiyi xocbê nipwopwo tibêgee lêm. ¹⁵Nge, il ob dô tiyi xocbê xomxo levac di nêl kiyang hixôn nôn voma di xêdyaa i vin lecma, ên il obêc timu vô môp tibêgee ge od il ob le pilihi hixôn Kilisi wê tu il badzub ge. ¹⁶Il hixôn Kilisi tiyi xocbê nôn tived, lêc Kilisi tu bazub di il ge tiyi xocbê vixa yuu vigê di manôn yuubê. Di bazub vông ngang vihati kitucma di tu nôn tived. Om ngang toto obêc vông he yuac toto nivihia ge od nôn tige ob dô nivihia di lig mi vô levac di ob vô xêkizêc lec ya môp xêyaa vin lecên.

Xomxo vông vinên ob tup vô môp paha

¹⁷A ob nêl kiyang ti vô xam. A tu Apumtau manôn om a nêl xêkizêc vô xam bêga bê le i lêc vông môp i tiyi xocbê tibii madiluhu vông ge lêm, ên he vông nilô la vô môp vaxvax wê nôn ti yêp vacên ma ge, ¹⁸di mapitoc

hivun he piyôp xôn. He lungên Anutu di he nêb he ob ngô kiyang nôn lêm, om he dô ninyawehe ên maviha dôen wê Anutu vông ge. ¹⁹He ni o yoc ên môp nipaên wê he mi vông ge lêm. Nge, he vông he la diluhu vô môp yôdac vêx yuu vux, di he doma vô môp ningeac vihati.

²⁰Mêlêc Kilisi o didii xam vac môp tibêgee lêm. ²¹Nge, a xovô ên a nêbê ilage xam ngô kiyang lec Kilisi, di xomxo tixuu xam ya Yesu kiyang nôn. ²²Kiyang tige nêl bêga ên nêbê ilage xam mi timu vô môp nipaên wê xomxo ngwe vông ge, om kityoo xam di didii xam la vac môp nipaên wê xam nimnivi xovô ge. Lêc môp nipaên tige wê ob kitya xam vêl. Om xam sea môp wê xomxo nipaên tige vông ge i loc yêp xel. ²³Di xam pilepac nilôm yuu piyôp i vô paha lec, ²⁴di xam hôm môp wê xomxo paha ngwe vông ge lec. Môp wê xomxo tige vông ge ngibua di xêseac nôn tiyi xocbê Anutu vaci.

²⁵Mêgem xam sea kiyang kityooên i loc yêp xel di nêl kiyang nôn vôma, ên il vihati tu nôn tixed pyap. ²⁶Xam xêmyaa obêc vô myavinê vôma ge od xam viac xam, ên xêyaa myavinê i o lêc vông xam loc vac nipaên lêm. Di le i lêc dô hixôn xêyaa myavinê di hiyôv i hoo loc hixôn lêm, ²⁷ên xam obêc tax vuayen vô Seten di i ob didii xam la vac môp nipaên. ²⁸Xomxo wê mi vông yôdac vô xomxo ngwe susu ge i o lêc vun xomxo susu i tii vac lêm. Nge, ici va vigê i vông yuac nivîha êdêc kisuu susu lec di vông ya vô xomxo wê nêl susu maên ge. ²⁹Le i lêc nêl kiyang nipaên lêm. Nge, xam nêl kiyang nivîha wê ob ngidu xomxo xôn ge ên i vô nivîha vô he wê ob ngô kiyang ge. ³⁰Le i lêc vông viyin vô Myakilôhò Ngibua wê Anutu vông ge lêm, ên Myakilôhò Ngibua lam dô vac il nilôd tiyi xocbê il tu Anutu nue om vông xovôên vô il bêga nêbê il ob la dô hixôn Anutu timuên. ³¹Xam sea môp nipaên wê xam xêmyaa vô nipaên vô xomxo ngwe ge, di môp kunacmaên, di môp xêyaa myavinê, di môp higacên, di môp wê xam nêl kiyang nipaên lec xomxo ge, di sea môp nipaên vihati i loc yêp xel. ³²Xam vông nivîha vôma di xo vigwe pisiv ênma, di xomxo ti obêc vông nipaên vô xam ge od xam kitya i nêl nipaên vêl i tiyi xocbê Anutu kitya xam nêl nipaên vêl lec Yesu Kilisi lê ge.

Il dô vac xêseac om il ob timu vô môp nivîha

5 ¹Anutu kitya xam nêl nipaên vêl di xêyaa vin lec xam, di xam tu i nue. Om a nêl vô xam bêga bê xam timu vô môp wê Anutu hilung vô xam ge, ²di xam timu vô môp xêyaa vin lec maên i tiyi xocbê Kilisi wê xêyaa vin lec il om yib ên il nêd nipaên ge. Kilisi vông ici va tu daa wê Anutu yê nivîha ge, tiyi xocbê ilage xomxo si daa wê nivivea nivîha ge ên nêb Anutu i yê nivîha.

³Le i lêc timu vô môp yôdac vêx yuu vux di môp ningeac lêm, di xam o vông nilôm i loc vô susu vax vax lêm, di le i lêc keac lec môp nipaên tibêgee

lêm. Ên il Anutu nue il, om o tiyi wê il ob nêl kiyang lec môp nipaên tibêgee lêm. ⁴Le i lêc nêl kiyang yôdac lecma lêm, di le i lêc nêl kiyang xêlila lec kiyang nipaên lêm, di le i lêc nêl kiyang vidaaên wê nôn maên ge lêm, ên kiyang tibêgee tiyiên ma, om xam sea i loc yêp xel di xam pîmil Anutu. ⁵Xacxam va xovô pyap bêga bê xomxo wê vông môp yôdac vêx yuu vux ge, me vông môp ningeac, me vông nilô la vô susu vaxvax ge, he obêc la dô vac Anutu yuu Kîlisi ben lêm. Di a nêl vô xam bê xomxo wê vông nilô la vô susu vaxvax ge, he tiyi xocbê he yev vixa kitu vô anutu kityooên.

⁶Xam viac xam, ên xomxo kityooên obêc val nêl kiyang vidaaên vô xam ên nêb ob didii xam mi la vac môp nipaên ge od xam o lêc ngô kiyang wê he vông ge lêm. Ên Anutu xêyaa vô myavinê vô xomxo wê pwoo i kiyang vac di timu vô môp nipaên tibêgee. ⁷Mêgem xam dô teva ên xomxo wê vông môp nipaên bêgee, ⁸ên ilage xam dô vac mapitoc, lêc gwêbaga xam tu Apumtau nue, om xam dô vac xêseac. Mêgem xam timu vô môp wê xomxo xêseac vông ge, ⁹ên xomxo obêc dô vac xêseac ge od ob timu vô môp nivîha yuu bôbac di dô vac kiyang nôn hixôn. ¹⁰Di xam myag môp wê Apumtau obêc yê nêb nivîha ge. ¹¹Xomxo wê mi dô vac mapitoc ge, he mi timu vô môp wê ob vô nôn nivîha lêm ge, om le i lêc timu vô he lêm. Nge, xam nêl he nêb nipaên kitong vô he. ¹²Lêc a ob nêl kiyang lec môp wê he vông mi i yêp xôpacên ge lêm, ên ob vông ni yocên vô a. ¹³Lêc xêseac obêc linac lec môp yuu susu vihati ge od he ob dô seac di ti ob dô vac mapitoc lêm. Ên susu vihati wê xêseac tige linac lec ge, he tiyi xocbê xêseac nôn. ¹⁴Mêgem kiyang ti yêp bêga ên nêbê,

“Ông wê ông wêp ge, ông kidi lec mamviha di sea môp mayibên, ên xêseac wê Kîlisi vông ge i linac vô ông.”

¹⁵Om xam viac xam ên môp wê xam timu vô ge, di xam o lêc dô i tiyi xomxo wê lungên Anutu ge lêm. Nge, xam dô i tiyi xocbê xomxo wê xovô Anutu ge, ¹⁶di xam xovô môp nivîha wê Anutu vông ge i tiyi buc vihati, di xam o sea buc ti i yêp vidaaên lêm, ên buc gwêbaga il dô vac viyin. ¹⁷Mêgem xam o dô i tiyi xocbê xomxo wê piyôp maên ge lêm. Nge, xam xovô môp wê Anutu vông vô xam ên nêb xam timu vô ge.

¹⁸Le i lêc num mia xêkizêc di i vông xam piyôp i vô yacyac lêm, ên môp tibêge ob vông xam vô nipaên. Om xam sea môp tibêge di lam dô vac Myakîlôhô Ngîbua kwa ngibi ên i hivun xam xôn. ¹⁹Om kiyang wê xam keac voma ge, xam keac di vông lilo wê pîmilên Anutu ge, hixôn lilo daa, di lilo wê Myakîlôhô Ngîbua vông vô xam ge, di xam vông lilo vô Apumtau vac myam di vông vac nilôm hixôn, ²⁰di i tiyi buc vihati xam pîmil Anutu lec il lig Apumtau Yesu Kîlisi lê ên viyin yuu nivîha vihati wê val vô xam ge.

Kiyang lec môp iimaên

²¹Xam pîmil Kîlisi di kô i lec, di xam loc dô vac lime vông vinên kwa ngibi i tiyi xocbê môp wê Kîlisi hîlung vô xam ge. ²²Xam vêx, xam ngô

kiyang wê liyame nêl ge di loc vac he kwa ngibi i tiyi xocbê xam ngô Anutu kiyang di la vac i kwa ngibi ge, ²³ên liyame ge tu xam bamzub tiyi xocbê Kilisi tu il wê il vông i vin ge badzub. Il hixôn Kilisi tu nôn tived, di Kilisi vaci vô il vêl ên il nêd nipaên. ²⁴Il wê il vông i vin ge, il dô vac Kilisi kwa ngibi, om xam vêx êno, xam loc vac kiyang wê liyame vông ge kwa ngibi i tiyi buc vihati.

²⁵Xam vux, xam xêmyaa i vin lec vinême i tiyi xocbê Kilisi xêyaa vin lec il xomxo vông vinên vihati, om lam yib lec il nêd nipaên, ²⁶ên nêb ob lipac il vô paha lec ya mia hixôn xolac wê ici va vông ge, di vông il vông vinên vihati il tu i nue. ²⁷Kilisi vông bêge ên nêb ob vông il tu xomxo nivaha wê ningeac yuu byepacên ti me susu nipaên ti ob dô hixôn il lêm. Nge, il ob tu xomxo ngibua wê judaên ti ob yêp hixôn il lêm ge. ²⁸Kilisi vông bêge, mêgem xam vux, xam xêmyaa i vin lec vinême i tiyi xocbê xam xêmyaa vin lec xacxam va nimnivi ge. Vux ti xêyaa obêc vin lec vinê ge od tiyi xocbê xêyaa vin lec ici va, ²⁹ên xomxo ti ob vông myavinê vô ici va ninivi lêm. Nge, ob vet ninivi di viac nivaha tiyi xocbê Kilisi viac xomxo vông vinên vihati nivaha ge, ³⁰ên il tiyi xocbê Kilisi vixa yuu vigê di manôn yuubê, om il hixôn Kilisi tiyi xocbê nôn tived. ³¹Kiyang yêp vac xolac bêga nêbê,

“Mêgem vux ti obêc kô vêx ge od ob sea ta yuu ma di la dô hixôn vinê, di yuu ob tu nôn tived.”

³²Xolac nêl bêge, lêc kiyang ga kehe yuu. Kehe ngwe wê levac ge nêl lec Kilisi hixôn xomxo vông vinên. ³³Di ngwe nêl lec môp wê vêx hixôn vux iimaên ge, om xam vux, xam toto xêmyaa i vin lec vinême i tiyi xocbê xam xêmyaa vin lec xacxam va nimnivi ge. Di xam vêx, xam pimil liyame lê di kô he lec.

Kiyang lec nue hixôn tae mae

6 ¹⁻²Xam nuge, xam tu Apumtau xe, om xam vô ninyam lehe vô tame mame kiyang, ên ge môp bôbac wê xolac nêl ilage bêga ên nêbê, “Xam hôm tame mame lê lec di ngô he kiyang.” Xolac tige Anutu hilu taxlee bêga ên nêbê, ³“Xam obêc vô ninyam lehe vô kiyang wê tame mame nêl ge od xam obêc dô nimviha di dô mamviha buc dia gê kibun ga.” Anutu nêl bêge ilage.

⁴Xam mae, le i lêc kunac nume i luu vêl mi vông he xêyaa i vô myavinê vô xam lêm. Nge, xam viac he i nivaha di titô he di tixuu he ya Apumtau xolac.

Kiyang lec xomxo levac hixôn nue yuac

⁵Xam wê xam tu xomxo levac nue yuac ge, xam loc vac kiyang wê xomxo levac vông ge kwa ngibi, di xona ên he di xam nilôm i o lêc vông yuu lêm. Nge, xam nilôm i loc tived vô yuac wê xam ob vông ge, di xam

timu vô xomxo levac vya i tiyi xocbê xam timu vô Kilisi vya ge. ⁶Le i léc kityoo di hi xomxo levac manôn lec ya yuac lêm, ên ge tiyi xocbê xam nêb xomxo i yê xam nivihā. Om xam vông xam yuac kibun ga i yêp nivihā i tiyi xocbê xam vông yuac nivihā vô Kilisi ge od ge tiyi xocbê xam vông ya xovôên wê Anutu vông ge. ⁷Xam vông xam yuac kibun ga hixôn xêmyaa nivihā, di vông yuac vô xomxo kibun ga i tiyi xocbê xam vông yuac vô Anutu. ⁸Xam xovô bê xomxo ti obêc vông i yuac i yêp nivihā ge od Apumtau ob vông nôn nivihā vô i. Om Apumtau obêc vông nôn nivihā vô he wê tu xomxo levac nue yuac ge di ob vông vô he wê lê levac ge hixôn.

⁹Xam xomxo levac wê xam viac nume yuac ge, xam vông nivihā vô nume yuac, di le i léc higac di vông he i xona lêm, ên xam xovô bê Apumtau wê dô kisii ganê ge tu xam nêb levac di tu nume yuac nêb levac êno, di Apumtau o yê il mangwe levac di mangwe nipwo lêm. Nge, yê il vihati tiyima.

Susu vevac wê Anutu vông vô il ge

¹⁰A ob nêl kiyang xêxuhu ya hixôn bêga bê xam tu Apumtau xe pyap, om xam le pilihi ya xêkizêc wê Apumtau vông vô xam ge. ¹¹Xam vinyum susu vevac wê Anutu vông vô xam ge lec xam nimnivi xôn di le xêkizêc di vông vevac vô Seten di pwoo kiyang kityooên wê i vông ge i pec. ¹²Ên il o vông vevac vô xomxo kibun ga lêm. Nge, il vông vevac vô vimwo nipaên hixôn angela nipaên di Seten he nue yuac hixôn xêkizêc levac wê viac mapitoc ge. ¹³Om xam vinyum susu vevac wê Anutu vông vô xam ge lec xam nimnivi xôn, di buc nipaên wê Seten nêb obêc vông vevac vô xam ge od xam ob le xêkizêc vac vevac di nginoo Seten vêl mi le pilihi.

¹⁴Mêgem xam le xêkizêc di vinyum susu vevac wê Anutu vông vô xam ge lec. Susu vevac tigeê bêga bê xam vêx Anutu kiyang nôn i tiyi xocbê let, di xam vinyum môt nivihā i kisuu xam lec i tiyi xocbê ngakwi xêkizêc wê kisuu xam pikopac lec ge. ¹⁵Anutu xolac nivihā nêl ên nêbê Anutu vông il la dô vac kiyang malehe nilô, om xam nêl xolac tige mi le xêkizêc vac i tiyi xocbê su wê xam su lec vixam xôn ge. ¹⁶Om xam vinyum susu vevac tigeê lec xam nimnivi xôn, di xam hôm vông vinên wê xam vông ge xôn pilihi i tiyi xocbê êê wê kisuu xam lec ge, êdêc Seten obêc byêx yii wê ngwax tum lec ge lam ge od i lam selac lec vông vinên wê xam vông ge di xam le nivihā. ¹⁷Xam xovô pyap ên xam nêbê Anutu vô il vêl ên il nêd nipaên, om xam hôm xovôên tige xôn pilihi i tiyi xocbêxam tung kilung xêkizêc ta lec bamzub ên nêb i kisuu bamzub lec ge. Xam hôm yipac levac wê Myakilôhō Ngibua vông ge. Yipac tige Anutu xolac nôn. ¹⁸Xam kitaa vô Anutu i tiyi buc vihati ya xêkizêc wê Myakilôhō Ngibua vông vô xam ge, di xam kitaa lec môt toto wê xam vông ge. Xam viac xam di hôm môt kitaaên xôn pilihi di seaên i ma, di

xam kitaa lec xomxo vông vinên vihati ên Anutu i ngidu he xôn. ¹⁹Di xam kitaa vô Anutu lec a êno bêga bê Anutu i ngidu a xôn ên a xonaên ên xomxo ti i ma di a myag i vô viyin maên di a nêl xolac wê yêp xôpacên ilage i yêp seac. ²⁰A ga wê Anutu vông a la nêl xolac, om gwêbaga tibii tung a lam dô vac xumac kalabuhu ga ên wê a nêl xolac ge. Mêgem xam kitaa vô Anutu bêga bê i vông xêkizêc vô a ên a xonaên i ma di a nêl Anutu xolac vô xomxo vihati i tiyi xocbê yuac wê Anutu vông vô a ge.

Kiyang viwen timuên

²¹Tikikas ob nêl a kitong vô xam di nêl yuac wê a vông vac vigwe ga kitong êno. Tikikas ge il lig vông vinên ti wê il xêdyaa vin lec i ge, di i vông yuac nivihha vô Apumtau ge. ²²Om a vông i loc vô xam ên a nêb i loc nêl kitong bê xe dô tibêna vac xumac kalabuhu ga, ên i vông xam nilôm i vô viyin maên.

²³Mag Anutu yuu Apumtau Yesu Kilisi, yuu i vông kiyang malehe hixôn xêyaa vin lecên di vông vinên nôn i loc vô xam wê a lige ge.

²⁴Vizid nivihha wê Anutu vông ge i loc vô xomxo vihati wê xêyaa vin lec il lig Apumtau Yesu Kilisi tiyi buc vihati di ob tiyôô vac lêm.

PILIPAI

Kipihac wê Pol kivuu vô tibii Pilipai ge

1 ¹A, Pol, hixôn Timoti, xii ga Yesu Kilisi nue yuac. Xii kivuu kipihac ga mi vông i loc vô xam vihati gê vîgwe Pilipai, xam gyovixa di xam wê xam vông yuac vac konglegesen ge hixôn xam vihati wê xam vông i vin Yesu Kilisi ge.

²Il Mag Anutu hixôn Apumtau Yesu Kilisi yuu i vông vizid nivihax hixôn kiyang malehe i hivun xam xôn.

Pol pimil Anutu ên tibii Pilipai

³Tiyi buc vihati wê a mi xo xam ge od a pimil Mag Anutu ên xam, ⁴di buc vihati wê a kitaa vô Anutu lec xam ge od a kitaa hixôn xêgyaa nivihax ⁵ên wê xam vông yuac xolac hixôn a taxlee di i lam tyip gwêbaga hixôn ge. ⁶Om a xovô ên a nêbê Anutu vông yuac nivihax vac xam nilôm, om ob vông yuac vac xam nilôm i tiyi buc vihati di i loc tyip lec buc wê Yesu Kilisi obêc lop mi lôm ge. ⁷Om môp wê a xêgyaa nivihax ên xam ge, ge môp bôbac, ên a xo xam yêp vac nilôg lec buc vihati, ên xam mi ngidu a xôn om Anutu vông vizid nivihax vô il tiyi buc vihati, gwêbaga wê a lam dô vac xumac kalabuhu ge hixôn buc wê a dô vixun di a nêl xolac vô xomxo ên a nêb he i xovô bê Anutu xolac ge kiyang nôn. ⁸Anutu yê wê a vông nilôg hixôn piyôp vihati ge loc vô xam, ên Yesu Kilisi vông a xêgyaa vin lec xam vihati.

⁹Di a kitaa vô Anutu ên a nêbê i vông môp xêyaa vin lecên wê xam vông ge i vô levac, di i vông xovôên levac hixôn piyôp nivihax vô xam, ¹⁰tiyi wê xam ob yaxên môp vihati nêb nivihax me nipaên ge. Om timuên wê Kilisi obêc vena ge od xam obêc dô nivihax di kiyang ti ob yêp vô xam lêm, ¹¹di môp nivihax wê xam vông ge ob vô nôn nivihax vô xam i luu vêl ya xêkizêc wê Yesu Kilisi vông ge. Om xomxo ob yê di pimil Anutu di vông i lê i vô levac.

Wê Pol dô vac kalabuhu gê Lom ge od ngidu xolac xôn

¹²Xam lige, a nêb a ob nêl kitong vô xam ên xam xovô bêga bê gwêbaga a lam dô vac xumac kalabuhu lê, lêc vîyin tiga o le vac xolac xôn lêm. Nge, vông xolac vô levac, ¹³om tibii vevac wê bin xumac kalabuhu ga hixôn gavman levac Sisa ben ge, he vîhati hixôn xomxo baba xovô nêbê tibii tung a lam dô vac xumac kalabuhu ga ên wê a mi nêl Yesu Kilisi kitong vô xomxo ge. ¹⁴Ilage lige vông vinên ya xona ên wê he ob nêl xolac ge ên he nêbê mêd tibii ob vông vîyin vô he ên xolac. Lêc gwêbaga he tibeac yê di xovô bê Apumtau ngidu a xôn vac kalabuhu, mêgem gwêbaga he le xêkizêc di nêl Anutu xolac di xonaên ma.

¹⁵Vixôhilôg, he ya xêyaa vô nipaên ên wê a lêg vô levac ge, om he nêl Kilisi xolac ên nêb xomxo i yê he nivîha di vông he lê i vô levac nginoo a vêl. Lêc he ya nêl xolac di o xo bêge lêm. ¹⁶Nge, he xêyaa vin lec a om he nêl xolac kitong ên he xovô ên he nêbê tibii vông a lam dô vac kalabuhu ga ên wê a ngidu xolac xôn ge. ¹⁷Lêc he wê a nêl tax ge he nêb tibii i yê he di vông he lê i vô levac ên yuac xolac, om he nêl Kilisi kitong, di he o nêl xolac hixôn nilô tîbed lêm. Nge, he nêl xolac ên he nêb he ob vông a lêg i tô di vông a nilôg i vô vîyin vac xumac kalabuhu ga. ¹⁸Lêc a ob nêl kiyang ti lec wê he vông ge lêm. Ên xomxo ya nêl Kilisi kitong hixôn nilô nivîha di ya nêl hixôn nilô nipaên. Lêc he vîhati nêl Yesu Kilisi kitong yêp seac, om a nilôg vô nivîha.

¹⁹Vixôhilôg, a nilôg vô nivîha gwêbaga di ob vô nivîha timuên hixôn, ên a xovô ên a nêbê xam mi kîtaa lec a, di Myakilôhó Ngîbua wê Yesu Kilisi vông ge mi ngidu a xôn om ob vô a vêl ên vîyin tiga. ²⁰Om a xo vînuv yang di a dô bin wê Anutu ob ngidu a xôn, di a ob vông nipaên ti wê a nig ob yoc ên ge lêm. Nge, a nêb a ob le xêkizêc vac vông vinên gwêbaga tiyi xocbê a le xêkizêc ilage, di a ob xona ên xomxo ti lêm. A vông bêge ên a nêb a obêc dô magvîha me a obêc xib ge od a ob vông Kilisi lê i vô levac. ²¹Wê a dô magvîha ga ge od a vông nilôg la yadîluhu vô Kilisi, lêc wê a obêc xib ge od a obêc kô vizid nivîha luu vizid wê kibun ga vêl. ²²Lêc wê a gên dô magvîha ga ge od a vông yuac nivîha wê ob vô nôn nivîha ge. Om môp yuu xôn nivîha. Ngwe wê a ob dô magvîha di ngwe wê a ob xib ge. Om a obêc timu vô ga ngwe na? Ge a lungên. ²³A nilôg vô yuu. A xêgyaa vin lec wê a ob xib di la dô hixôn Kilisi. Môp ngwe ga luu ngwe wê dôên mavîha ge vêl. ²⁴Lêc wê a obêc dô magvîha lec kibun ga ge od ge wê a ob ngidu xam xôn. ²⁵A xovô kiyang tige pyap om a nêl bêga ên a nêbê a ob dô magvîha lec kibun ga ên dô hixôn xam di ngidu xam xôn ên xam lêc vông i vin xêkizêc ta di dô hixôn xêmyaa nivîha. ²⁶Mêgem buc wê a obêc loc dô hixôn xam ge od ge wê xam xêmyaa ob vô nivîha di xam ob pimil Yesu Kilisi ên wê a vena vô xam ge.

Xomxo Pilipai hixôn Pol vông vevac ya xolac

²⁷A nêl vô xam bêga bê môp vîhati wê xam nêb xam ob vông ge, xam vông i tiyi wê Kilisi xolac nêl ge. Om a obêc loc vô xam di xê môp wê xam

vông ge, me a obêc dô teva di ngô kiyang lec môp vihati wê xam vông ge, od a nêb a ob xovô wê xam le xêkizêc ta hixôn nilôm tived di vông vevac ya xolac hixôn piyôp tived ên xam nêb xomxo i ngô di vông i vin. 28 Di a nêb a ob xovô wê xam o xona ên xomxo wê vông vevac vô xolac ge lêm. Ên xam obêc xona ên he lêm ge od obêc vông xovôên vô he bê Anutu obêc kitya he vêl timuên, dom xam ge xam ob dô nivihã. Ên Anutu vaci wê ob vông xam dô nivihã hixôn i ge. 29 Ên Anutu nêb Kilisi lê i vô levac, om vông môp yuu vô xam ên nêb xam timu vô. Ngwe wê xam vông i vin Kilisi ge, di ngwe wê xam ob kilê viyin lec Kilisi lê 30 di vông vevac ya xolac ge. Ilage xam wê vevac wê a vông ya xolac ge di gwêbaga xam ngô wê a gên divông vevac ya xolac tibêge. Om il xôn ob vông i yêp tived.

Il ob pilepac il di vô nipwo lec

2 1 Xam dô vac Kilisi vigê vilu kwa ngibi om vông xam dô nivihã. Di Kilisi xêyaa vin lec xam om xam dô malehe, di Myakilôh Ngibua dô hixôn xam di ngidu xam xôn. Di xam xêmyaa mi vin lecma di xam mi xo vigwe vô pisiv ênma. 2 Vixôhilôg, xam mi vông môp nivihã bêgee om a xêgyaa vô nivihã. Om a ob nêl vô xam bêga bê xam timu vô môp mangwe gae hixôn bêga bê xam piyôp i tived, di xam timu vô môp xêyaa vin lecên tived, di nilôm i tived, di xam vông i vinma kiyang. Xam obêc vông bêge ge od ob vông a xêgyaa vô nivihã yang. 3 Le i lêc xo xacxam va lêm di le i lêc yong xam lêm. Nge, xam pilepac xam di vô nipwo lec di wê xomxo vihati i tiyi xocbê he nginoo xam vêl ge. 4 Le i lêc viac xacxam va susu yuu yuac lêm. Nge, xam viac xomxo vihati susu yuu yuac êno di ngidu he xôn.

Kilisi pilepac ici va di vô nipwo lec

5 Xam timu vô piyôp i tived xocbê Yesu Kilisi xo ge. 6 Ên Yesu Kilisi yuu ma Anutu dô nôn tived lê, lêc Yesu o hôm môp wê yuu ma dô tiyima ge pilihã lêm. 7 Nge, ici va sea lê levac wê i vông ge di lam yubac gê kibun ga xocbê xomxo kibun ga ti di vông yuac tiyi xocbê xomxo wê vidaaên ge ti. 8 Yesu tu xocbê xomxo kibun ti, di pilepac ici va tu xocbê nipwo di la vac Anutu kiyang kwa ngibi di vông i tiyi wê Anutu nêl ge di i la tyip lec buc wê yib ge. Vixôhilôg, yib lec xax pola. 9 Mêgem Anutu vông Yesu tu levac nginoo xomxo vihati vêl, di vông lê wê nginoo lê vihati vêl ge vô i. 10 Anutu vông lê levac vô Yesu ên nêb xomxo wê dô kisii ganê ge di he wê dô kibun ga ge, hixôn he wê yib di la yêp vac kibun nilô ge, he vihati ob ngô Yesu lê di yev vixa kitu vô i, 11 di nêl kitong i yêp seac bêga bê, “Yesu Kilisi ge il nêd Apumtau.” Obêc bêge ge od Mag Anutu lê ob vô levac.

Il ob dô xocbê xêseac ge vac xomxo mahigun

12 Yesu vông yuac vihati i tiyi wê Anutu nêl ge, mêgem xam lige wê a xêgyaa vin lec xam ge, xam vông i tiyi wê Yesu vông ge. Ilage wê a dô

hixôn xam ge, xam ngô a kiyang di vông i tiyi wê a nêl ge. Lêc gwêbaga a lam dô teva ên xam, om a ob nêl vô xam bêga bê xam ngô kiyang di vông i tiyi wê a nêl ge i luu wê xam vông lec buc wê a dô hixôn xam ge vêl. Anutu vô xam vêl ên xam nêl nipaên, om xam vông i yuac xêkizêc ên yuac i vô nôn lec, di xam xona ên Anutu di xam nim i yoc ên môt nipaên. ¹³Xam tiyi wê xam ob vông bêge, ên Anutu vông yuac vac xam nilôm, om ob vông xam xo môt yuu yuac wê i yê nivihâ ge, di ob vông xam timu vô.

¹⁴Yuac vihati wê xam ob vông ge, le i lêc so vya vô yuac tige di nêl kiyang tibeac lec lêm. ¹⁵Xam sea môt tibêge êdêc nipaên ti i o lêc yêp vô xam lêm. Nge, xam tu xomxo wê nivihâ ge, ên Anutu nue ge wê nipaên ti o yêp vac he nilô lêm. Ên xomxo kibun ga wê dô hixôn xam gwêbaga ge, he ge xomxo nipaên wê dô vac mapitoc, ên he sea môt nivihâ di timu vô môt nipaên. Om xam dô vac he mahigun tiyi xocbê lam ên i vông xêseac vô he, ¹⁶di xam nêl Anutu kiyang wê ob vông he dô maviha ge kitong vô he. Xam obêc vông bêge ge od buc timuên wê Kilisi obêc vena ge od a xêgyaa ob vô nivihâ ên xam, di a ob xovô bêga bê yuac wê a vông vac xam mahigun ge, a o vông pisiv lêm, di a yuac o tô mi la lêm.

¹⁷Vông vinên wê xam vông ge tiyi xocbê daa wê xam vông vô Anutu ge. Om tibii obêc hi a xib di kipyax a hi sea ên wê a nêl xolac vô xam ge od pyap, ên obêc tiyi xocbê a êno vông daa vô Anutu. Om a xêgyaa ob vô nivihâ, di il xôn nilôd ob dô nivihâ. ¹⁸Mêgem a nêl vô xam bêga bê xam êno, xam xêmyaa i vô nivihâ, di xam dô hixôn nilôm nivihâ i tiyi xocbê a ge.

Pol nêl Timoti yuac kitong vô tibii Pilipai

¹⁹Apumtau Yesu obêc tyuc lec ge od a ob vông Timoti i loc vô xam Pilipai lutibed, ên i yê yuac wê xam vông ge, dêc lôm nêl kitong vô a, ên vông a xêgyaa i vô nivihâ. ²⁰Xomxo ngwe xocbê Timoti ge o dô hixôn a lêm. Nge, Timoti tibed wê mi xo xam tiyi xocbê a mi xo xam ên a nêb a ob ngidu xam xôn ge. ²¹Xomxo ya ge he mi xo heche va yuac yuu ninivi, di o xo Yesu Kilisi yuac lêm. ²²Di Timoti mô ge, xam xovô ên xam nêbê xomxo nivihâ, ên mi ngidu a xôn vac yuac xolac tiyi xocbê nu ti ngidu ma xôn ge. ²³Mêgem a nêb a ob vông Timoti i loc vô xam. Lêc gwêbaga a lungên môt wê gavman levac ob vông vô a ge. A ob yaxên lê, di vông Timoti i loc vô xam timuên. ²⁴Lêc a xo ên a nêbê Apumtau obêc piwelac a vêl ên kalabuhu ga, om a êno obêc loc vô xam lutibed.

Pol nêl Epaplodaitas yuac kitong

²⁵Ilage xam vông il lig vông vinên Epaplodaitas lam vô a ên xam nêb i kô xam mamnôn di lam ngidu a xôn. Om i lam dô hixôn a di xii xôn vông yuac, di xii vông vevac ya xolac. Lêcom a xovô ên a nêbê a ob vông

Eaplodaitas i lôc mi loc vô xam i tii vac nang, ²⁶ên xam ngô wê yidac vông i ilage lêcom xam lungên wê yidac ma ge, om xam obêc dixo i. Mêgem vông Eaplodaitas nilô vô vîyin di i dixo xam êno. ²⁷Vixôhilôg nô, ilage i vông yidac levac tîyi wê ob yib ge. Mêlêc Anutu xo vigwe pisiv ên i om vông i vô nivîha lec. Di Anutu xo vigwe pisiv ên a êno, ên nêb vîyin tige i o hivun a xôn lê. ²⁸Om a xo vînuv ên a nêb a ob vông i lôc mi loc vô xam i tii vac nang, ên xam wê di xêmyaa i vô nivîha, di i vông a nilôg i vô vîyin maên. ²⁹Mêgem buc wê obêc lôc mi loc vô xam ge od xam kô i lec nivîha hixôn xêmyaa nivîha di pimil Apumtau lê. Di xam vông xomxo vîhati wê tîyi xocbê Eaplodaitas gee lê i vô levac, ³⁰ên Eaplodaitas ge vông Kîlisi yuac, lêc yidac levac vông i om vô kwabo lec wê ob yib ge, lêc o xo ici va lê. Nge, xovô nêbê xam nêb i kô xam mamnôn di lam ngîdu a xôn, om nêb ob vông yuac tige i ma lê.

Xomxo wê vông i vin Kîlisi ge wê Anutu yê nivîha

3 ¹Xam lige, a nêb a ob nêl kiyang xêxuhu ya hixôn bêga bê xam xêmyaa i nivîha ên Apumtau. A nêl kiyang bêge vô xam ilage pyap, lêc a nilôg o vô vîyin ên wê a ob kivuu kiyang tige i tii vac vô xam ge lê, ên kiyang tige ob ngîdu xam xôn.

²Xam viac xam ên xomxo nîpaên wê tîyi xocbê noo vîmen ge, ên he mi vông môp nîpaên, di xam xona nêb ên he Yuda wê ninîvi gôlên ge. He gôl he ninîvi ên nêb ob vông xovôên vô xomxo bê he Anutu nue. ³Lêc he o Anutu nue lê. Nge, il ga il tu Anutu nue nô. Lêc il o tu Anutu nue ên wê il timu vô Yuda vông môp di gôl il nidnîvi ge lê. Nge, il wê il tu Anutu nue ge wê Myakilôhê Ngîbua ngîdu il xôn di il vông lîlo vô Anutu, di vông Yesu Kîlisi lê vô levac ge, di il xovô bê Yuda vông môp kîbun ga o tîyi wê ob vông Anutu yê il nivîha ge lê. ⁴Lêc xomxo ya timu vô Yuda vông môp kîbun ên he so ên he nêb mêd môp tîgee ob vô he vêl ên he nêb nîpaên. Om a obêc nêb a ob vông i vin i tîyi he ge od môp kîbun wê vông a lêg vô levac ge ob ngînoo wê he vông ge vêl. ⁵Ên a ga, a Islel ti, ên a pum lec Bensamin wê Islel kehe vîgê yuu di yuu tô mî la (12) ge ti, di a tag yuu mag ge Hiblu, om a êno Hiblu ti. A yubac, dêc buc vîgê vîlu di sec yon lam la vêl, mêd ge wê tag yuu mag gôl a nîgnîvi tîyi môp wê xe Yuda mi vông ge. Di a kô yuac Palisi wê a mi viac môp wê Moses xolac vông ge vîhati. ⁶Di a xo vînuv ên a nêb môp vîhati wê Moses vông ge tô vacên i ma, di a so ên a nêbê xomxo wê vông i vin Yesu ge sea Moses xolac, om a vông vîyin yuu myavînê vô he. Lêc xomxo ti obêc nêb yaxên môp wê a vông ge od obêc nêl bê a timu vô Moses xolac vîhati om nîpaên ti o yêp vô a lê. ⁷Môp tîgee wê a vông ilage vông a lêg vô levac. Lêc gwêbaga a sea môp tîgee vîhati di xê tîyi xocbê môp pileva ge, di a vông nilôg la yadîluhu vô Kîlisi. ⁸Vixôhilôg, a sea Yuda môp yuu yuac wê vông a lêg vô levac ge vîhati yang, di gwêbaga a xovô a Apumtau Yesu Kîlisi

vaci ên a xovô ên a nêbê i luu môt yuu xovôên kibun ga vihati vêl. A nêb a ob timu vô Yesu, om a sea môt baba ge vihati di xê xocbê myapipu vidadâen ge ên a nêb a ob hôt Kilisi tived pilihî, ⁹di dô hixôn i. Ilage a xo bêga ên a nêb Moses xolac wê a mi timu vô ge ob vông Anutu yê a nivihâ di nêl bê a xomxo bôbac ti. Lêc gwêbaga a o xo bêge lêm. Nge, a xo ên a nêbê Anutu ob yê a nivihâ di nêl bê a xomxo bôbac ên wê a vông i vin Kilisi ge. Om môt tived wê Anutu ob yê xomxo nivihâ ge, ge môt vông vinên. ¹⁰A nêb a ob xovô Kilisi vaci, di xovô xêkizêc wê i vông ge. Ên Kilisi kidi lec mavihâ vac yibên om xêkizêc wê i vông ge yêp seac, om a nêb a ob xovô xêkizêc tige. Di a nêb a ob kilê viyin i tiyi xocbê i kilê ge. Yesu kilê viyin mi yib lec, om Anutu ob nêbê a êno timu vô bêge ge od a ob kilê viyin di xib êno. ¹¹A ob vông bêge ên a nêb a êno ob kidi lec magvihâ vac yibên.

Pol tup mi la vô yôg wê xomxo ob nginoo lec ge

¹²A o xo ên a nêbê a tu ngibua xocbê Kilisi ge lêm, me a o xo ên a nêbê a vông môt vihati tiyi xocbê Kilisi vông ge lêm. Lêcom Kilisi vông a tu i xe, om a divông yuac xêkizêc ên a nêb a ob tu ngibua xocbê i ge. ¹³Xam lige, a xovô ên a nêbê a gên o tu ngibua xocbê Kilisi ge lêm. Xovôên wê a vông ge tived bêga bê a ob xovô môt wê a mi vông ilage lêm. Nge, a ob xovô môt wê a ob timu vô gwêbaga mô, di vông yuac xêkizêc êdêc kô vizid nivihâ timuên. ¹⁴Om tiyi xocbê a tup ên a nêb a ob la vô yôg wê xomxo ob nginoo lec ge êdêc kô non. Om nôn wê a nêb a ob kô ge, ge wê Anutu ob tyuc a la dô hixôn i ge, ên wê a vông i vin Yesu Kilisi ge.

¹⁵Il vihati wê il xovô Kilisi di timu vô i ge, il piyôp i tived i tiyi kiyang wê a nêl ga. Lêc xam obêc xo kiyang ba ge od Anutu obêc nêl kitong di titô wê so ge. ¹⁶Lêcom le i lêc sea xovôên nivihâ wê xam kô pyap ge lêm. Nge, xam hôt xôn pilihî yang.

¹⁷Xam lige, xam tup vô môt vihati i tiyi môt wê a vông ge, di xovô xomxo wê timu vô môt nivihâ vihati wê xe vông vac xam mahigun mi xam wê pyap ilage. ¹⁸Ilage a nêl xomxo nipaên kitong vô xam tiyi buc tibeac, di gwêbaga a ob nêl he kitong vô xam i tii vac nang, di a magluc tyip ên wê he tibeac vông vevac vô Kilisi xolac wê nêl ên nêbê i yib lec xax pola ge. ¹⁹He timu vô môt wê heche va xovô ge, om ge tiyi xocbê he yev vixa kitu vô anutu ba. Di he xêyaa vin lec môt nipaên wê ob vông xomxo ni yoc ge, lêc he ni o yoc ên môt tigege lêm. Di he mi xo susu kibun ga, om obêc timuên ge od Anutu obêc kitya he vêl. ²⁰Dom il vông vinên ge, il bed wê Anutu ben kisii ganê, di il dô bin Apumtau Yesu Kilisi wê vô il vêl ên il nêd nipaên ge, ên obêc kidi vac ben kisii ganê di lop mi lôm i tii vac nang. ²¹Buc wê Kilisi obêc vena ge od obêc pilepac il nidnivi kibun tiyi xocbê ici va ninivi wê nivihâ yang ge ya xêkizêc wê i vông ge. Xêkizêc wê i vông ge tiyi wê ob vông xomxo yuu susu vihati la dô vac i kwa ngibi.

Pol viac kiyang nivaha vô tibii Pilipai

4 ¹Xam lige, xam xovô ên xam nêbê Yesu obêc vena, om a nêl vô xam bê xam le xêkizêc hixôn Apumtau. A xêgyaa vin lec xam, di a xo xam nginong ên a nêb a ob xê xam i tii vac nang, ên xam mi vông a xêgyaa vô nivaha di vông a lêg vô levac ên wê xam vông i vin Anutu xolac ge.

²A ob nêl kiyang vô vêx yuu, Yuodia yuu Sintiki, wê yuu dô vac xam mahigun ge. Om a ob nêl vô muu bêga bê muu sea môp wê muu kunacma ge di xovô Apumtau di vông nilôm i loc tived vô i. ³Di a nêl vô xomxo ti wê xii vông yuac tived ilage bêga bê ông ngidu vêx yuu ge xôn, ên ilage yuu hixôn Klemen di xomxo ya wê vông yuac hixôn a ge, he vihati ngidu a xôn vac yuac xolac, di he lê yêp vac Anutu kipihac maviha wê nêl he wê obêc dô maviha luta lêc luta ge lê kitong.

⁴A nêl vô xam vihati bêga bê xam xêmyaa i vô nivaha ên Apumtau i tiyi buc vihati. A ob nêl vô xam i tii vac nang bêga bê xam xêmyaa i vô nivaha.

⁵Xam lum nêl kiyang vô xomxo vihati ên he i ngô di xovô bê xam mi dô vac malehe. Buc wê Apumtau obêc vena lec ge vô kwabo lec. ⁶Xam nilôm i lêc vô viyin ên susu me viyin ti lêm. Nge, xam kitaa vô Anutu lec susu vihati wê xam nêb xam ob kô ge di kitaa lec viyin vihati wê val vô xam ge. Xam kitaa vô Anutu di hi vixam i pec di pimil i, ⁷ên xam obêc vông bêge ge od môp malehe wê Anutu vông ge ob vông xam piyôp yuu nilôm la tived vô Yesu Kilisi. Môp malehe wê Anutu vông ge luu xovôên wê xomxo toto vông ge vêl.

⁸Xam lige, a ob nêl kiyang ngwe vô xam i tii vac nang. Xam xovô môp tigea bêga bê môp wê nôn ge, di môp wê piyôp nivaha vông ge, di môp wê bôbac ge, di môp wê o ningeac lêm ge, di môp wê xêseac ge, di môp wê xam lêm ob yêp nivaha ge, di môp wê vông xomxo vô nivaha ge, di môp vihati wê il xovô ên il nêbê nivaha ge. Môp tigea vihati xam xovô i luu vêl di hôm xôn mi i yêp vac xam nilôm. ⁹Môp vihati wê a tixuu xam ya mi xam xovô pyap ge, di môp wê a nêl mi xam ngô ge, di môp wê a mi vông vac xam mahigun di xam wê ge, xam lêc timu vô môp tigea vihati, ên xam obêc vông bêge ge od Anutu wê kiyang yuu môp malehe kehe ge obêc dô hixôn xam.

Tibii Pilipai vông mone la vô Pol

¹⁰Ilage xam xo ên xam nêb xam ob ngidu a xôn ya mone lê, lêc xam tiyiên ma. Lêc gwêbaga xam tiyi wê xam ob ngidu a xôn ge di om xam xo a tii vac nang di ngidu a xôn ya mone, om a xêgyaa vô nivaha yang di a pimil Apumtau. ¹¹A o nêl ên a nêbê susu ma ên a lêm. Ên a xovô pyap ên a nêbê nivaha me nipaên obêc val vô a ge od pyap, ge a xêgyaa ob vô

niviha. ¹²A tiyi wê a ob dô susu maên ge, di a tiyi wê a ob tulec susu tibeac ge. A xovô wê yaên tibeac ge di a xovô wê dôên vip ge. A xovô môp wê tulec ên susu ge di môp wê susu maên ge. Vac nivîha yuu nipaên ge a xovô môp wê a xêgyaa ob vô nivîha tiyi buc vihati ge. ¹³Kilisi vông xêkizêc wê i vông ge vô a, om a tiyi wê a ob le xêkizêc vac viyin yuu xôn nivîha di vông yuac wê i vông vô a ge vihati.

¹⁴Lêc xam vông môp nivîha vô a ên wê xam ngidu a xôn ên viyin wê tulec a ge. ¹⁵Xam Pilipai, xacxam va xovô pyap ên xam nêbê buc taxlee wê a kô yuac xolac di sea vigwe Masedonia ge od konglegesen ngwe o ngidu a xôn lêm. Nge, xacxam va ngidu a xôn di vông mone vô a ên nêb il ngiduma xôn ên yuac i yêp nivîha. ¹⁶Di buc wê a la dô vac vigwe Tesalonaika ge od xam vông mone lam vô a lu yuu. ¹⁷Lêc a o xo mone me susu ên a nêb xam vông i lam vô a lêm. Nge, a xo xam môci ên a nêb môp nivîha tige wê xam mi vông ge i vô levac di vô nôn nivîha ên i vông xam lêm i vô levac. ¹⁸Ilage xam vông mone vô Eaplodaitas ên xam nêb i kô mi lam vông vô a ên a kô. Om mone wê xam vông i lam vô a ge tiyi a di luu wê a nêb a ob kô

ge vêl. Om susu ti o ma vô a lêm. Mone wê xam vông i lam vô a ge tiyi xocbê daa wê nivîvea nivîha wê xam vông vô Anutu ge. Om Anutu ob yê daa tige nivîha di kô hixôn xêyaa nivîha. ¹⁹Il nêd Anutu ge tu susu nivîha vihati yang kehe. Om xam susu ti obêc ma ge od Anutu ob vông vô xam i tiyi wê xam nêb xam ob kô ge, ên wê xam tu Yesu Kilisi xe ge. ²⁰Om il ob pimil il Mag Anutu i yêp luta lêc luta. Kiyang nôn.

Pol kiyang timuên

²¹A nêl vidiiên vô xam vihati wê xam tu Yesu Kilisi xe ge. Di lige vông vinên vihati wê dô hixôn a ga, he êno nêl vidiiên vô xam. ²²Xomxo vông vinên wê vông yuac vac king Sisa ben ge he mi xo xam nginong, om he êno nêl vidiiên vô xam, di xomxo vông vinên vihati wê dô vac vigwe tiga ge nêl vidiiên vô xam.

²³Vizid nivîha wê Apumtau Yesu Kilisi vông ge i viac xam vihati.

KOLOSİ

Kipihac wê Pol kivuu vô tibii Kolosi ge

1 ¹A Pol wê Anutu vinoa a ya xovôên wê ici va vông ge ên nêb a tu Yesu Kilisi nu sinale ti. Il lig Timoti dô hixôn a, ²di xii kivuu kipihac tiga vô xam Kolosi wê xam tu Anutu nue ge. Xam ge xii lige wê xam vông i vin Kilisi.

Il Mag Anutu i vông vizid nivihã hixôn kiyang malehe i lam hivun xam xôn.

Pol xêyaa vô nivihã ên tibii Kolosi

³Tiyi buc vihati wê xii Timoti kitaa lec xam Kolosi ge, xii pimil Anutu wê il lig Apumtau Yesu Kilisi ma ge, ⁴ên xii ngô wê xam vông i vin Yesu Kilisi di xam xêmyaa vin lec xomxo vông vinên vihati. ⁵Ilage Anutu xolac nivihã wê kiyang nôn ge val vô xam mi xam ngô. Xolac tige nêl bêga ên nêbê Anutu viac vizid hixôn nôn nivihã vihati pyap gê lag puunê ên nêb ob vông vô xam timuên. Om môp vông vinên hixôn môp xêyaa vin lecên wê xam vông ge kehe bêga nêbê xam xovô di xam bin vizid hixôn nôn nivihã tige. ⁶Ilage xolac val vô xam mi xam ngô di xovô kiyang nôn wê nêl kitong lec xêyaa vin lecên wê Anutu vông vô xam ge. Om gwêbaga xolac tige vô levac vac xam mahigun, di la vô levac vac vigwe vihati di vô nôn nivihã vô xomxo tibeac. ⁷Eaplas kô xolac mi loc nêl kitong vô xam Kolosi taxlee mi xam xovô. Eaplas ge Anutu nu yuac tiyi xocbê xii ge, di xii xêmyaa vin lec i, di i le vac xii nimpilêhê mi nêl xolac di viac Kilisi yuac nivihã, ⁸di Eaplas val nêl kitong vô xii lec môp xêyaa vin lecên wê Myakilôhô Ngibua vông vô xam mi xam timu vô ge.

Pol kitaa lec tibii Kolosi

⁹Mêgem vô buc taxlee wê xii ngô kiyang lec môp nivihã wê xam mi vông ge di i val tyip gwêbaga hixôn, xii kitaa lec xam tiyi buc vihati di

xii nim o ma lec kitaaên lêm. Nge, xii kitaa vô Anutu lec xam bêga ên xii nêbê i vông xovôên vô xam ên xam xovô môp nivihã vihati wê Anutu xovô nêb xam ob vông ge, di i vông xovôên levac hixôn piyôp nivihã wê Myakilôhô Ngibua vông ge i dô vac xam nilôm di hivun xam xôn. ¹⁰Xam obêc kô xovôên wê Myakilôhô Ngibua vông ge od xam ob timu vô môp wê Apumtau nue vông ge, di Anutu ob yê xam nivihã, di xam ob vông yuac nivihã wê ob vô nôn nivihã ge, di xam ob xovô Anutu di xovôên tige ob vô levac vô xam. ¹¹Xii kitaa vô Apumtau xêkizêc kehe lec xam bêga ên xii nêbê i vông xêkizêc vô xam êdêc xam le xêkizêc di kilê viyin vihati hixôn xêmyaa nivihã, ¹²di xam pimil il Mag Anutu. Anutu nêb xam tiyi wê xam ob kô nôn nivihã vihati wê nêl xam lêm lec ge tiyi xocbê xomxo vông vinên vihati wê dô vac xêseac ge ob kô. ¹³Anutu vô il vêl ên xêkizêc yuu mapitoc wê Seten vông ge di tung il la dô vac xêkizêc yuu xêseac wê Anutu nu tuc vông ge. Nu tuc ge wê Anutu xêyaa vin lec i, ¹⁴di i vô il vêl ên il nêd nipaên di kitya il nêd nipaên vêl.

Anutu nu tuc hixôn yuac wê i vông ge

¹⁵Il o xê Anutu lec madnôn lêm, lêc Anutu nu tuc ge tiyi xocbê Anutu vaci, di i tu mugên ên susu vihati wê Anutu tung ge. ¹⁶Ên nu tuc tu susu lag yuu kibun vihati yang kehe, di tung susu wê il xê hixôn susu wê il xêên ma ge vihati êno, om ici va tung he angela wê xêkizêc di lê levac ge hixôn xomxo levac vihati. Anutu nu tuc tung susu vihati yang ên nêb he i pimil i lê di vông yuac i tiyi xovôên wê i vông ge. ¹⁷Nu tuc dô taxlee di susu vihati ge ti o dô hixôn i lêm. Nge, ici va tung susu vihati, om gwêbaga he dô ya xêkizêc wê ici va vông ge. ¹⁸Kilisi hixôn il xomxo vông vinên vihati tiyi xocbê nôn tived, lêc Kilisi tu il badzub. Kilisi ge mugên, di ici va xomxo taxlee wê kidi lec maviha vac yibên ge, om tu xomxo hixôn susu vihati bazub di ti o luu i vêl lêm. ¹⁹Mêgem Anutu xovô nêb ob vông maviha yuu xêkizêc wê i vông ge vihati vô nu tuc, om vông i hivun nu tuc xôn. ²⁰Ilage Anutu yê il hixôn susu lag yuu kibun vihati tiyi xocbê il vông vevac vô i. Lêc Anutu nêb ob vilu vô xomxo hixôn susu vihati ge i loc dô vac i kwa ngibi. Om vông nu tuc lam yib lec xax pola di kip yax i hi sea, om nu tuc vông kisoac mi le vac il Anutu mahigun di hi ni nyagên wê Anutu vông vô il ge.

²¹Ilage xam dô teva ên Anutu, di xam piyôp vông vevac vô Anutu, di xam mi vông môp nipaên. ²²Lêc Kilisi lam yib lec xax pola, om vông kisoac mi le vac il Anutu mahigun di hi ni nyagên wê Anutu vông vô il ge. Kilisi vông bêge ên nêb ob kô il mi il la le vô Anutu manôn ên Anutu i yê il tiyi xocbê xomxo ngibua wê il nilôd vô paha lec di nipaên ti o yêp vô il lêm. ²³Xam obêc nêb Anutu i yê xam tibêge ge od xam hêm môp vông vinên xôn pilihi, di le xêkizêc, di susu ti i o lêc vông xam sea môp wê xam bin nôn nivihã wê xam ob kô timuên ge lêm. Xolac nêl

nôn nivihā kitong vō xam mi xam ngō ilage. Xolac tige, xomxo la nêl vō xomxo kibun ga vihati, di a Pol, a tu xolac tige nu yuac.

Pol ngidu tibii Kolosi xôn

²⁴Gwêbaga tibii ya vông viyin yuu myavinê vō a ên wê a ngidu xam xôn ya xolac ge. Lêc a xêgyaa vō nivihā, ên myavinê ya wê o la lec Kîlisi hixôn lêm ge, ya gên yêp. Om a ob kô vihati lec nignivi ên i ngidu xam wê xam vông i vin ge xôn. Ên il hixôn Kîlisi tiyi xocbê nôn tived. ²⁵Anutu vaci vînoo a ên nêb a tu xomxo vông vinên nu yuac ti wê a ob ngidu xam xôn ge, om vông yuac vō a ên nêb a la nêl Anutu xolac vihati kitong i yêp seac. ²⁶Vô buc vihati ilage Anutu xolac wê nêl Yesu kitong ge yêp xôpacên om xomxo vihati yang lungên. Lêc gwêbaga, Anutu vông xolac tige lam yêp seac vō il wê il vông i vin Yesu ge. ²⁷Anutu nêb ob nêl kitong vō il ên il xovô bêga bê kiyang wê yêp xôpacên ilage ge kiyang nivihā yang tiyi wê obêc ngidu xomxo vihati ge xôn. Om nêl kiyang tige kitong vō xam wê xam o Yuda lêm gee êno. Kiyang xôpacên tige nêl ên nêbê Kîlisi dô hixôn xam, om xam dô bin buc wê Kîlisi obêc tung xam la dô vac xêseac wê i vông ge. ²⁸Xe nêl Kîlisi kitong i yêp seac, di xe tixuu xomxo toto ya xovôen vihati, di xe viac kiyang nivihā vō he. Xe vông yuac tibêge ên xe nêb xe ob kô he toto mi la le vō Anutu manôn ên Anutu i yê he i tiyi xocbê xomxo wê xovô Kîlisi pyap ge. ²⁹Om yuac tibêge yuac levac wê a vông ya xêkizêc levac wê Kîlisi vông vō a ge.

Piyôp yuu xovôen vihati yêp vō Kîlisi vaci

2 ¹A nêb xam xovô bêga bê a vông yuac levac ên a nêb a ob ngidu xam Kolosi di tibii Leodisia hixôn xomxo vông vinên vihati wê o yê a magnôn lêm ge xôn. ²Om a vông yuac levac ên a nêb xam nilôm i vō nivihā di xam xêmyaa i vin lecma, di xam kô xovôen levac ên xovôen tige i vông xam le xêkizêc vac vông vinên di i vō nôn nivihā vō xam. Di a nêb xam xovô Anutu kiyang wê yêp xôpacên ge kehe, ên kehe ge Kîlisi vaci. ³Ên piyôp yuu xovôen nivihā wê Anutu vông ge vihati yêp vō Kîlisi vaci. ⁴A nêl kiyang tiga vō xam ên a nêb xomxo ti i o kityoo xam ya kiyang hizi lêm. ⁵A dô teva lêc a xo xam tiyi xocbê a dô hixôn xam ge, om a nilôg vō nivihā ên wê xam vông mōp nivihā di vông i vin Kîlisi xêkizêc ta ge.

Xam dô hixôn Kîlisi di hôm i xôn pilihi

⁶Xam vông i vin Apumtau Yesu Kîlisi pyap, om xam lêc timu vō i vîxa, ⁷di hôm Kîlisi xôn xêkizêc i tiyi xocbê xax ngilôhō la hôm kibun xôn ge, di xam le xêkizêc hixôn Kîlisi i tiyi xocbê xumac le lec teac kisii mi le pilihi. Om xam le xêkizêc ya vông vinên wê xe tixuu xam ya ilage. Di xam pîmil Anutu i tiyi buc vihati.

⁸Xam viac xam niviha, ên xomxo ya nêb ob kityoo xam di ku xam xôn ya kiyang vaxvax wê ob vô nôn niviha lêm ge. Kiyang wê he mi nêl ge he nêl tiyi xocbê bue vông ilage, tiyi xocbê môp yuu xovôên wê yêp gê kibun ga. Di he o nêl kiyang nôn wê Kîlisi vông ge ti lêm.

⁹Xam xovô pyap ên xam nêbê Kîlisi ninivi tiyi xocbê xomxo kibun ga, léc Anutu vông xêkizêc yuu xovôên wê i vông ge vihati hivun Kîlisi xôn, om yuu xôn tiyima. ¹⁰Di xam dô hixôn Kîlisi om Anutu vông maviha dôên nôn hivun xam xôn. Kîlisi ge wê luu xomxo wê piyôp levac ge hixôn xêkizêc vihati ge vêl. ¹¹Xomxo Yuda mi gôl he ninivi ên he nêb i nêl kitong bê he tu Anutu nue. Di xam êno tu Anutu nue, léc xam o gôl nimnivi lêm. Nge, xam vông i vin Kîlisi om Kîlisi lipac xam nilôm vô paha lec di vông xam sea môp nipaên wê xam nimnivi xovô ge, om ge nêl kitong nêbê xam tu Anutu nue. ¹²Môp wê xam lipac mia ge tiyi xocbê xam wib hixôn Kîlisi, di dô vac lôva hixôn i, di kidi lec mamviha vac yibên hixôn i, ên xam vông i vin ên xam nêbê xêkizêc wê Anutu vông ge vông Yesu kidi lec maviha vac yibên. ¹³Ilage xam vông môp nipaên viyang viyang ge di timu vô môp kibun wê xam nilôm xovô ge. Om xam dô tiyi xocbê xam wib di la dô teva ên Anutu. Léc Anutu kitya xam nêb nipaên vêl om vông xam dô mamviha hixôn Kîlisi. ¹⁴Xolac wê Anutu vông vô Moses ge nêl il nêd nipaên kitong. Léc Anutu hi il nêd nipaên vihati la lec xax hixôn Kîlisi, om il wê il vông i vin ge, Anutu kitya il nêd nipaên vêl di vông xolac tikwê wê Moses vông ge tip la vêl. ¹⁵Môp yibên wê Kîlisi vông ge vông xêkizêc wê Seten he nue yuac vông ge tip la vêl, om Kîlisi nginoo Seten he nue yuac vêl di vông xomxo yê he tiyi xocbê susu vidaaên.

Xam wib hixôn Kîlisi

¹⁶Kîlisi kitya xam nêb nipaên vêl, om le i léc ngô kiyang wê xomxo ya kidu xam ên nêb xam timu vô ge lêm. Ên môp wê he nêl ge môp kibun, xocbê môp yaên yuu numên, di môp lec klismas paha hixôn dentuc paha di da vihati. ¹⁷Môp tigeê tixuuên pileva, ên he tixuu lec môp wê ob val timuên ge. Léc Kîlisi ge nôn vixôhilôg. ¹⁸Xomxo ya yong he ên nêb he yê vivia, di yong he ên nêb he vông heche va vô nipwo lec di yev vixa kitu vô angela. Léc xam vîbu he di ngôên he kiyang i ma. Ên he so ên he nêbê môp wê he vông ge luu xam vông môp vêl. Léc he yong he pileva, ên piyôp wê he vông ge la timu vô môp kibun ga, ¹⁹di he o hôm Kîlisi xôn pîlihi lêm. Il hixôn Kîlisi tiyi xocbê xomxo nôn tîbed, léc Kîlisi tu il badzub. Di bazub viac nôn vihati di vông kilôhê hixôn len di ninivi vihati kitucma tu nôn tîbed di lig mi vô levac ya xêkizêc wê Anutu vông ge.

²⁰Xam wib pyap hixôn Kîlisi om xam sea môp kibun ga vihati. Bêna léc xam lax vông môp tiyi xocbê xomxo kibun ga ge? Bêna léc xam la vac xolac baba wê nêl bêga ên nêbê, ²¹“Le i léc hôm susu tigeê lêm, di le i léc ya yaên

tigee lêm, di le i léc vyax vigêm lec susu tigee lêm.”²² Susu wê xolac baba nêl lec ge, il ob vông yuac ya, léc he xôa obêc ma timuên. Xomxo kibun ga heche va nêl kiyang lec susu tigee.²³ Di he kitaa vô angela, di he yê heche va nipaên di vông he ninivi vô nipaên. Môm tigee hi xomxo manôn lec om he so nêb môm nivihã. Léc môm tigee o tiyi wê ob vông he kol he ninivi ên nipaên ge lêm.

Anutu tîpi vô il kidi lec madviha hixôn Kilisi

3¹ Anutu tîpi vô xam kidi lec mamviha hixôn Kilisi, om xam vông nilôm i loc vô nôn nivihã wê yêp lag puunê ge. Ên Kilisi tu il nêd levac mi la dô lag puunê vô Anutu vigê hiyôv.² Xam vông piyôp i loc diluhu vô nôn nivihã wê yêp lag puunê ge, di le i léc vông piyôp i loc vô susu kibun ga lêm.³ Ên xam wib hixôn Kilisi, om Kilisi hôm maviha dên wê xam vông ge mi viac i yêp nivihã, di kehe yêp vô Anutu.⁴ Kilisi ge maviha dên wê il vông ge kehe, om vô buc timuên wê Kilisi obêc lop mi lôm le seac ge od xam êno obêc lam le pikeb i vac xêseac wê i vông ge.

Il vô paha lec

⁵ Xam obêc kô xêseac wê Kilisi vông ge, om xam léc sea môm kibun ga wê yêp vac xam nilôm ge i loc yêp xel. Môm nipaên tigee bêga nêbê môm yôdac vêx yuu vux, môm ningec, môm yôdac viyang viyang wê xam nimmivi xovô ge, môm nipaên wê xam nilôm kidu xam ên nêb xam vông ge, di môm wê xam wê xomxo ngwe susu di nilôm yetac ên ge, ên môm tige tiyi xocbê xam yev vixam kitu vô anutu kityooên.⁶ Anutu xêyaa vô myavinê vô xomxo wê vông môm nipaên tibêgee, om obêc vông myaviwen nipaên vô he.⁷ Ilage xam dô hixôn xomxo wê mi vông môm nipaên tibêgee om xam mi timu vô môm nipaên tibêgee vihati.

⁸ Léc gwêbaga a ob nêl vô xam bê xam sea môm nipaên vihati i loc yêp xel. Môm nipaên bêga nêbê môm kunacmaên, di môm xêyaa myavinê, di môm wê xam nêb xam ob vông xomxo ngwe vô nipaên ge, di môm wê xam nêl kiyang nipaên lec xomxo ge, di môm wê kiyang yacyac tyip vac xam myam di vông xam ngilooma di pipingma ge.⁹ Le i léc nêl kiyang kityooên voma lêm, ên ilage xam sea môm nipaên wê yêp vac xam nilôm ge la vêl,¹⁰ di xam vô paha lec pyap, ên Anutu vaci wê vông xam nilôm vô paha lec ge, di Anutu ob vông yuac vac xam nilôm i tiyi buc vihati ên xam xovô i di dô i tiyi xocbê ici va ge.¹¹ Om xomxo Glik di xomxo Yuda, di he wê gôl ninivi ge, hixôn he wê o gôl ninivi lêm ge, di tibii madiluhu, di xomxo vimen wê dô vac nita ge, di xomxo wê vông yuac vidaaên vô xomxo ge, hixôn he wê viac heche va yuac ge, Kilisi yê il vihati tiyima, ên Kilisi vaci wê tu il vihati kehe di i dô hixôn xomxo vihati.

Môm nivihã wê il ob timu vô ge

¹² Anutu vinoo xam pyap ên nêb xam tu i nue, di i xêyaa vin lec xam. Mëgem xam léc timu vô môm nivihã bêga bê xam xo vigwe pisiv ên xomxo,

di vông nivihā vō he, di xam pilepac xam mi vō nipwo lec, di xam lum nêl kiyang malehe vō xomxo, di le i lêc vông nipaên vac nipaên lêm. ¹³Nge, lime ti obêc vông nipaên vō ông ge od ông kitya i nêl nipaên vêl di vông nivihā vō i. Ên il Apumtau kitya xam nêl nipaên vêl, om xam êno, xam kitya lime nêl nipaên vêl. ¹⁴Di xam xêmyaa i vin lecma, ên mōp xêyaa vin lecmaên wê ob vông mōp nivihā vihāti ngiduma xôn di ob vông xam dô kidu tixed. ¹⁵Kilisi tyuc il ên nêb il tu nôn tixed di dô vac kiyang malehe nilô. Om xam vông kiyang malehe wê Kilisi vông ge i yêp vac nilôm ên i viac xam, di xam pimil Anutu i tiyi buc vihāti. ¹⁶Xam hôm Kilisi kiyang xôn pilihi mi i yêp vac nilôm di xam xovô i nivihā. Di xam tixuu lime ya xolac di viac kiyang nivihā vōma ya xovôên nivihā vihāti. Xam pimil Anutu vac nilôm di vông lilo wê pimil ên i lê ge hixôn lilo da, di lilo wê Myakilôhō Ngibua vông vō xam ge. ¹⁷Di kiyang vihāti wê xam ob nêl ge hixôn yuac vihāti wê xam ob vông ge, od xam nêl xam kiyang di vông xam yuac vihāti lec Apumtau Yesu lê, di xam pimil il Mag Anutu hixôn lec Yesu lê.

Kiyang lec vux hixôn vinêe nue

¹⁸Xam vêx gee, xam loc vac liyame vông kiyang kwa ngibi, ên mōp tibêge tiyi wê Apumtau nêbê vêx ob vông ge. ¹⁹Xam vux gee, xam xêmyaa i vin lec vinême, di le i lêc vông nipaên vō he lêm.

²⁰Xam nuge, xam vō ninyam lehe vō kiyang vihāti wê tame mame nêl ge di loc vac he kwa ngibi, ên Apumtau ob yê mōp tibêge nêb nivihā.

²¹Di xam mae, le i lêc vông nume nilô i vō nipaên di he xêyaa i vō myavinê lutixed vō xam lêm, ên xam ob vông he nilô vō viyin di he ob xo ên nêb xam xêmyaa o vyac vin lec he lêm.

Kiyang lec xomxo levac hixôn nue yuac

²²Xam wê xam tu xomxo levac nue yuac ge, xam loc vac kiyang vihāti wê xomxo levac nêl ge kwa ngibi. Le i lêc kityoo di hi xomxo levac manôn lec ya yuac lêm, ên ge tiyi xocbê xam nêb xomxo i yê xam nivihā. Om xam nilôm i o lêc vông yuu lêm. Nge, xam nilôm i loc tixed vō yuac wê xam ob vông ge, di xam xona ên Apumtau. ²³Di yuac vihāti wê xam vông ge, xam vông ya nilôm tixed di nim i o lêc ma lêm, ên tiyi xocbê xam o vông yuac vō xomxo kibun ga ti lêm. Nge, xam vông yuac vō Apumtau. ²⁴Xam xovô bê xam obêc vông xam yuac i yêp nivihā ge od vō buc timuên Apumtau obêc vông nôn nivihā wê nêl xam lêm lec ge vō xam, ên yuac wê xam mi vông ge, xam vông vō Apumtau Yesu Kilisi. ²⁵Lêc xomxo wê vông mōp nipaên ge, Anutu obêc vông myaviwen vō he lec nipaên wê he toto vông ge, ên Anutu obêc yê xomxo mangwe levac di mangwe nipwo lêm. Nge, yê il vihāti tiyima.

4 ¹Xam xomxo levac wê viac nume yuac ge, xam vông nivihā vō he di viac he nivihā. Xam xovô bê xam êno, xam nêl levac dô kisii ganê di yê mōp wê xam vông ge.

Kiyang lec môp kitaaên hixôn xolac nêlên

²Xam hóm môp kitaaên xôn pilih i tiyi buc vihati di seaên i ma. Wê xam obêc kitaa ge od xam vông piyôp i loc vô kitaaên vaci, di xam pimil Anutu ya kitaaên. ³Di xam kitaa vô Anutu lec xe êno bêga bê Anutu i ngidu xe xôn di hilung môp vô xe ên xe nêl Kilisi kiyang wê yêp xôpacên ilage i yêp seac. Gwêbaga tibii tung a lam dô vac xumac kalabuhu ga ên wê a nêl xolac ge. ⁴Om xam kitaa lec

a, ên buc wê a obêc nêl Kilisi xolac ge od a nêl xolac i yêp seac, ên yuac tige wê Anutu vông vac a viêgê.

⁵Môp wê xam vông vac tibii madiluhu mahigun ge, xam vông ya xovôên nivih a i tiyi buc vihati di xam o sea buc ti i loc vidaaên lêm.

⁶Kiyang vihati wê xam ob nêl ge, xam nêl kiyang nivih a wê ob vô nôn nivih a ge. Ên xam obêc nêl bêge ge od xam ob tiyi wê xam ob luu kiyang nivih a vô xomxo toto ge.

Pol vông Tikikas yuu Onisimas la vô tibii Kolosi

⁷Tikikas ob nêl a kitong vô xam. Tikikas ge il lig vông vinên ti wê il xêdyaa vin lec i ge, di i xomxo ti wê vông yuac nivih a ge di vông Apumtau yuac hixôn xe. ⁸Om a vông i loc vô xam ên a nêb i loc nêl kitong bê xe dô tibêna vac xumac kalabuhu ga, ên i vông xam nilôm i vô viyin maên. ⁹Di a vông Onisimas i loc hixôn Tikikas. Onisimas ge xam Kolosi lime ti di il lig vông vinên ti wê vông Anutu yuac nivih a ge, di il xêdyaa vin lec i. Om yuu Tikikas ob nêl kitong vô xam lec viyin yuu nivih a wê tulec a vac viêgwe ga.

Kiyang viwen timuên

¹⁰Alistakas wê lam dô vac xumac kalabuhu ga hixôn a ge nêl vidiiên vô xam, di Mak wê Banabas ngidê ge êno nêl vidiiên vô xam. Mak obêc miloc vô xam ge od xam kô i lec nivih a i tiyi xocbê kiyang wê a vông i loc vô xam ilage. ¹¹Di Jisas wê lê ngwe nêbê Jastas ge nêl vidiiên vô xam. Xomxo Yuda tibeac vông i vin Yesu, lêc Alistakas, Mak, di Jastas, yonbed wê yon vông yuac hixôn a mi xe nêl Anutu xolac vô tibii tibeac. Di yon ge wê yon ngidu a xôn di vông a nilôg vô viyin maên.

¹²Eaplas nêl vidiiên vô xam. Eaplas ge xam Kolosi lime ti wê tu Yesu Kilisi nu yuac, di i kitaa vô Anutu lec xam tiyi buc vihati nêb Anutu i vông xam le xêkizêc vac vông vinên wê xam vông ge, di i vông xovôên vô xam ên xam xovô môp nivih a vihati wê Anutu xovô ên nêb xam vông ge.

¹³A xovô pyap om a nêl kitong vô xam bêga bê Eaplas vông yuac levac ên nêb ob ngidu xam Kolosi hixôn tibii Leodisia di he Hilapolis xôn. ¹⁴Il docta Luk wê il xêdyaa vin lec i ge hixôn Dimas, yuu nêl vidiiên vô xam.

¹⁵Xam nêl vô lime vông vinên vac viêgwe Leodisia bê a nêl vidiiên vô he. Di xam nêl vô vêx ti lê nêbê Nimpa hixôn xomxo vông vinên wê he

kitucma mi yê da vac i ben ge bêga bê a nêl vidiên vô he êno. ¹⁶Xam obêc kitong kipihac tiga pyap ge od xam vông i loc vô konglegesen vac vigwe Leodisia ên he i kitong êno. Di kipihac wê a vông i la vô he Leodisia ge, he i vông i lam vô xam Kolosi ên xam êno kitong. ¹⁷Xam nêl vô Akipas bêga bê, “Ông viac yuac wê Apumtau vông vô ông ge di vông yuac tige i vô nôn nivihã.”

¹⁸A, Pol, a kivuu kiyang tiga ya vigêg di a nêl vidiên vô xam. Xam lêc xovô wê a gên dô vac xumac kalabuhu ga. Vizid nivihã wê Anutu vông ge i dô hixôn xam vihati.

1 TESALONAIKA

Kipihac tax ngwe wê Pol kivuu vô tibii Tesalonaika ge

1 ¹A, Pol, xen Sailas yuu Timoti, xen kivuu kiyang ga vô xam Tesalonaika wê xam vông i vin Mag Anutu yuu Apumtau Yesu Kilisi ge.

Vizid nivihã di kiyang malehe i hivun xam xôn.

Xomxo Tesalonaika vông i vin xêkizêc di dô vac Anutu môp bôbac

²Xe mi pimil Anutu tiyi buc vihati ên xam, di xe mi kitaa vô Anutu lec xam, ³di xe xovô môp nivihã wê xam vông ge, om xe mi nêl xam kitong vô il Mag Anutu ên xe nêbê xam vông i vin nivihã om xam mi vông yuac nivihã, di xam xêmyaa vin lec Yesu om xam mi vông yuac xêkizêc, di xam mi vông i vin xêkizêc bêga ên nêbê Apumtau Yesu Kilisi ob lop mi lôm vô buc timuên, om xam diyaxên buc tige. ⁴Xam lige, xe xovô bêga ên xe nêbê Anutu xêyaa vin lec xam di ici va vînoo xam ên nêb xam tu i xe, ⁵ên buc wê xe loc nêl Anutu xolac vô xam ge od xe o nêl tiyi xochê kiyang pileva ge lêm. Nge, xe nêl xolac hixôn xêkizêc wê Anutu Myakilôhô Ngibua vông ge, om xam ngô di vông i vin, di xam nêl ên xam nêbê xolac ge kiyang nôn vixôhilôg. Di xam xovô môp nivihã wê xe vông vac xam mahigun ên xe nêb i ngîdu xam xôn ge.

⁶Om gwêbaga xam mi timu vô môp wê xe hixôn Apumtau vông ge, ên xam vông i vin xolac di kô viyin lec, lêc Anutu Myakilôhô Ngibua ngîdu xam xôn di vông xam nilôm vô nivihã. ⁷Om xomxo vông vinên vihati vac vigwe levac Masedonia yuu Glik ngô wê xam Tesalonaika le xêkizêc vac vông vinên, om tiyi xochê xam hilung môp nivihã tige vô he. ⁸Om môp wê xam vông ge vông Apumtau kiyang la vô levac vac vigwe Masedonia

yuu Glik vihati. Lêc o vigwe yuubed ge lêm. Nge, la vô levac vac vigwe tibeac hixôn, om xomxo vihati ngô wê xam Tesalonaika vông i vin Anutu ge, mêgem xe ob nêl vông vinên wê xam vông ge kitong vô he lêm, ên heche va ngô pyap. ⁹Di tibii Masedonia yuu Glik heche va nêl xam kitong ên nêbê buc taxlee wê xe loc vô xam Tesalonaika ge od xam kô xe lec nivihã, di sea anutu kityooên wê mayibên ge di pilepac xam nilôm la vô Anutu nôl wê maviha kehe ge ên xam nêb xam ob tu i nue yuac. ¹⁰Di he nêl xam kitong ên nêbê xam diyaxên buc wê Anutu nu tuc ob sea ben lag puunê di lop mi lôm ge. Anutu nu tuc ge wê yib lêc Anutu tipi vô i kidi lec maviha vac yibên. Ge Yesu wê ob vô il vêl ên Anutu xêyaa myavinê wê ob val vô xomxo lec buc timuên ge.

Pol vông yuac gê Tesalonaika

2 ¹Xam lige, xacxam va xovô ên xam nêbê ilage wê xe loc dô hixôn xam ge od yuac wê xe vông vac xam mahigun ge o tô vac lêm, ên xam ngô xe kiyang di vông i vin. ²Di xam xovô pyap ên xam nêbê buc taxlee ge xe mila dô vigwe Pilipai, lêc he ya vông viyin levac vô xe di nêl kiyang nipaên lec xe hixôn. Mêgem xe sea he di pec mi loc vô xam Tesalonaika, mêdec xomxo mangwe vac xam bom vông viyin vô xe ên wê xe nêl xolac vô xam ge. Mêlêc il nêd Anutu ngidu xe xôn om xe nêl Anutu xolac vô xam di xonaên ma. ³Kiyang wê xe nêl vô xam ge, xe o nêl kiyang soên ti lêm, di xe o xo kiyang tibeac nêb xam ngidu xe xôn lêm, di xe o nêb xe ob kityoo xam lêm. Ge o kiyang wê xe nêl ge kehe lêm, ⁴dom kehe mô bêga nêbê Anutu yê di xovô pyap ên nêb nipaên ti o yêp vac xe nilôm lêm, om nêbê xe tiyi wê xe ob vông yuac xolac nêlên ge. Mêgem xe mi nêl xolac vô xomxo, lêc xe o nêl xolac ên xe nêb xomxo i yê xe nivihã lêm. Nge, xe nêl xolac di vông yuac ên xe nêbê Anutu vaci wê diyê di xovô xe nilôm ge i yê xe nivihã. ⁵Xam xovô pyap ên xam nêbê xe o nêl kiyang hizi vô xam lêm, di Anutu vaci yê pyap di xovô bêga ên nêbê xe o viyum kiyang madoên vac kiyang nivihã lêm. ⁶Di xe o vông yuac ên xe nêb xam pimil xe lêm, me xomxo ba he i pimil xe lêm. Lêc xe ga Kilisi nue sinale xe, om xe tiyi wê xe ob nêl di xam vông xe lêm vô levac. Lêcom xe o nêl bêge vô xam lêm. ⁷Nge, xe dô mamlehe vac xam mahigun di viac xam tiyi xocbê nipwo ti ta viac i ge. ⁸Xe xêmyaa vin lec xam om xe nêb xe ob nêl Anutu xolac nivihã vô xam, di xe nêb xe ob ngidu xam xôn lê, lêc xe obêc xib lec yuac wê xe vông ge od pyap, ên xe xêmyaa vin lec xam. ⁹Xam lige, xam xovô pyap ên yuac levac wê xe mi vông vac xam mahigun vô vidiiên yuu bucên vihati ge. Xe vông yuac xêkizêc lec xolac nêlên di vông nêm yuac bisnis hixôn ên xe nêb xe ob kô mone ên kisuu xom yaên lec di xe ob vông viyin vô xam ên xe xom yaên lêm.

¹⁰Xam xovô pyap di Anutu êno yê di xovô môp wê xe mi vông tiyi buc vihati wê xe miloc dô hixôn xam wê xam vông i vin ge. Môp vihati wê xe

mi vông ge môt ngibua di môt bôbac, di ti o so lêm. ¹¹Di xam xovô ên xam nêbê xe viac xam toto tiyi xocbê nipwo wê ma viac i ge. Mêgem xe didii xam vac môt nivihia, di nêl kiyang wê ob ngidu xam xôn ge vô xam, di xe viac kiyang nivihia vô xam, ¹²ên xe nêb xam timu vô môt nivihia vihati wê Anutu vông ge. Anutu ge wê tyuc xam ên nêb xam lam vac i ben di lam dô vac xêseac wê i vông ge hixôn i nue vông vinên vihati.

Tibii Tesalonaika le xêkizêc vac viyin

¹³Tiyi buc vihati xe pimil Anutu lec môt ngwe wê xam vông ilage bêga nêbê ilage xam ngô Anutu xolac wê xe nêl ge di kô pilihi ên xam nêbê kiyang ge o xomxo pivulac pileva ti lêm. Nge, xam nêbê ge Anutu kiyang nôn vixôhilôg. Om xam nêl vixôhilôg, ên ge Anutu kiyang nôn mê. Kiyang tige divông yuac xêkizêc vac xam wê xam vông i vin ge nilôm. ¹⁴Xam lige, xam tiyi xocbê konglegesen viyang viyang wê he Yuda vông, wê dô vac vigwe levac Judia ge. Ên he vông i vin Yesu Kilisi di tu Anutu nue, lêc he lie ya vông viyin vô he. Om xam tiyi xocbê he, ên xam lime ya vông viyin vô xam lec vông vinên wê xam vông ge. ¹⁵Xomxo Yuda gee wê mae bue ilage hi plopete yib. Nang dêc he hi Apumtau Yesu yib, di gwêbaga he vông viyin vô xe lec xolac di tii xe la, di he vông Anutu yê he nipaên, di he vông vevac vô xomxo vihati, ¹⁶ên he le vac xe môt xôn ên nêb xe o la nêl Anutu kiyang vô tibii viyang ba lêm. Anutu kiyang tige tiyi wê ob vô xomxo vêl ên he nêl nipaên. Lêc he Yuda le vac xe xôn. Om he nêl nipaên vô levac vô he ên môt nipaên wê he vông ilage di vông gwêbaga hixôn. Mêgem Anutu xêyaa myavinê lam yêp vô he gwêbaga.

Pol nêb ob yê he i tii vac nang

¹⁷Xam lige, xomxo Yuda tii xe vêl ên xam, om xe lam dô teva ên xam buc myabo di xe o xê xam mamnôn lêm. Lêc xe xo xam tiyi buc vihati di xe myag môt wê xe ob lôc mi loc xê xam i tii vac nang ge, di xe nilôm vô viyin ên wê xe o loc xê xam lêm ge. ¹⁸Ên xe nêb xe ob lôc vô xam, lêc xe o tiyi lêm. A Pol, a myag môt lu tibeac ên a nêb a ob lôc vô xam, lêc Seten le vac môt xôn ên a. ¹⁹Lêc xe nêb xe ob xê xam mamnôn, ên buc timuên wê Yesu obêc lop mi lôm di il le vô i manôn ge od Yesu obêc yê letyae di vông vizid nivihia vô xe lec wê xe nêl xolac vô he ge, di letyae obêc vông xe xêmyaa vô nivihia, di xe obêc nêl kiyang vô Yesu lec letyae ên nêbê he vông xe yuac vô nôn lec? Xacxam va mê. ²⁰Ên xam ge wê xam vông xe lêm vô levac di vông xe xêmyaa vô nivihia.

Pol vông Timoti la ngidu he xôn

3 ¹Ilage xe tiiyên ma wê xe ob loc vô xam ge, ên môt ma, om vông viyin vô xe, ên xe xo xam lê, lêc mad xii Sailas nêb xii ob dô Atens, ²di xii ob vông Timoti i lôc vô xam. Timoti ge, il lig di Anutu nu yuac

ti wê nêl Kilisi xolac ge. Om xii vông Timoti lôc ên xii nêb i lôc ngidu xam xôn ên vông vinên wê xam vông ge i yêp xêkizêc ta ³di viyin wê xomxo vông vô xam ge i o léc pilepac xam ti lêm. Xacxam xovô pyap bê Anutu nêb il obêc kô viyin. ⁴Ên ilage wê xe loc dô hixôn xam ge od xe nêl kitong vô xam ên xe nêbê il obêc kô viyin lec vông vinên wê il vông ge. Mêgem xam xovô pyap ên xam nêbê xe kiyang tige vô nôn lec di il xôn kilê viyin. ⁵Mêgem a nilôg viyin ên xam om a vông Timoti lôc mi loc vô xam ên a nêb i lôc yê xam ên a ob xovô bê vông vinên wê xam vông ge diyêp xêkizêc, me? Ên a dixo ên a nêb mêd Seten kityoo xam di kitya yuac wê xe vông vô xam ge vêl.

Pol xêyaa vô nivaha ên wê he divông i vin xêkizêc ge

⁶Mêgem Timoti milôc vô xam di kô kiyang yuu yuac wê lôc yê ge mi lôm lam nêl vô xe, di nêl xam kiyang yuu yuac nivaha kitong vô xe. Om nêl ên nêbê vông vinên wê xam vông ge diyêp xêkizêc di xam xêmyaa vin lec xomxo vihati. Nang dèc nêl ên nêbê xam mi xo xe di xam nilôm vô nivaha ên xe di xam nêb xam ob wê xe mamnôn tiyi xocbê xe nêb xe ob xê xam mamnôn ge. ⁷Xam lige, xe ngô wê xam vông i vin xêkizêc ta ge, mêgem vông vinên wê xam vông ge ngidu xe xôn vac viyin wê tulec xe ge, ⁸ên xam obêc vông nilôm i la diluhu vô Apumtau di le xêkizêc ta ge od ge wê ob vông xe dô nivaha. ⁹Om gwêbaga xe tiyi wê xe ob pîmil Anutu ên xam ge. Mêgem xe le vô il Anutu manôn di pîmil i nginong nginong ên wê xam vông xe xêmyaa vô nivaha yang ge. ¹⁰Di xe kitaa vô Anutu tiyi bucên yuu vidiên vihati ên xe nêb i vông môp vô xe ên xe lôc xê xam mamnôn i tii vac nang, di vông vinên wê xam vông ge tiyiên obêc ma ge od xe ob ngidu xam xôn ên xam vông i vin xêkizêc ta.

Pol kitaa vô Anutu ên nêb i vông môp wê ob la yê he ge

¹¹Mêgem xe kitaa vô il Mag Anutu yuu il Apumtau Yesu bêga bê yuu i vông môp wê xe ob lôc xê xam ge vô xe. ¹²Di xe kitaa vô Apumtau ên xe nêb i vông môp xêyaa vin lecên i hivun xam xôn di i vô levac vac xam mahigun êdêc xam xêmyaa i vin lecma di xêmyaa i vin lec xomxo vihati i tiyi xocbê xe xêmyaa vin lec xam ge. ¹³Xe kitaa bêge ên xe nêb Anutu i vông xam le xêkizêc ta, di obêc buc timuên wê Apumtau Yesu obêc lop mi lôm hixôn xomxo vông vinên vihati ge od xam obêc le vô il Mag Anutu manôn, di kiyang soên ti ob yêp vô xam lêm, om Anutu obêc yê xam nivaha tiyi xocbê xomxo ngibua ge.

Môp wê Anutu yê nivaha ge

4 ¹Xam lige, a ob nêl kiyang ngwe hixôn. Ilage xe tixuu xam ya môp nivaha vihati ên xe nêb xam timu vô ên Anutu i yê xam nivaha. Om xam mi timu vô môp tibêgee. Léc gwêbaga xe tu Apumtau Yesu manôn di nêl xêkizêc vô xam i

tii vac nang bêga bê xam vông môm tibêgee vihati i vô levac, ²ên xam xovô môm yuu kiyang wê Apumtau Yesu vông vô xe đi xe nêl vô xam ge. ³Môm wê Anutu nêb xam ob timu vô ge bêga bê xam tu xomxo ngibua wê nipaên ti o yêp vô xam lêm ge. Di xam xona nêb ên môm yôdac vêx yuu vux. ⁴Xam vux ge, xam obêc nêb ii vêx ge od xam timu vô môm iimaên wê Anutu hixôn lime vông vinên ob yê nêb nivaha ge, ⁵di le i lêc yetac ên vêx wê diloc ge lêm ên ge môm nipaên wê tibii madiluhu wê lungên Anutu ge mi vông ge. ⁶Le i lêc kityoo lime đi vông he i vô nipaên lec môm tibêge lêm, ên xe nêl vô xam ilage ên xe nêbê Apumtau obêc vông myaviwen nipaên lec môm bêge, ⁷ên Anutu o hilung môm ningeac tibêge vô il lêm. Nge, tyuc il ên nêb il tup vô môm nivaha wê xêseac ge. ⁸Mêgem xomxo ti obêc vô nimi vô Anutu kiyang tiga ge od o vô nimi vô xomxo kibun ga lêm. Nge, vô nimi vô Anutu wê vông Myakilôhông Ngibua wê i vông ge lam dô hixôn il ge.

⁹Lêc môm wê xam xêmyaa ob vin lec lime ge, a ob kivuu kiyang ti vô xam lec môm tige lêm, ên Anutu vaci hilung vô xam pyap, om xam xêmyaa mi vin lecma, ¹⁰di xam xêmyaa vin lec xomxo vông vinên wê dô vac vigwe Masedonia gee vihati hixôn. Lêcom xe nêl xêkizêc vô xam bêga bê xam vông môm xêyaa vin lecên i vô levac, ¹¹di xam dô vac kiyang malehe, di timu vô xam toto yuac bôbac, di vông yuac ya xacxam va vigêm i tiyi xocbê xe nêl vô xam ilage, ¹²êdêc tibii madiluhu he i yê xam nivaha, di xam ob vông viyin vô lime lec yaên yuu susu lêm.

Apumtau obêc lop mi lôm

¹³Xam lige, xe nêb xe ob nêl kitong vô xam lec lime vông vinên wê yib ge, ên xam xovô di xam nilôm i o lêc vô viyin ên he i tiyi xocbê tibii madiluhu ge lêm, ên tibii madiluhu ge wê he nilô vô viyin ên lie wê yib ge, ên he lungên môm wê xomxo yibên ob kidi lec maviha vac yibên ge. ¹⁴Dom il ge, il vông i vin pyap ên il nêbê Yesu yib lêc kidi lec maviha vac yibên. Om il xovô ên il nêbê xomxo vông vinên wê yib ge, Anutu ob tipii vô he kidi lec ya xêkizêc wê Yesu vông ge di didii he mi lam hixôn Yesu.

¹⁵Mêgem gwêbaga xe nêl Apumtau kiyang vô xam bêga bê buc timuên wê Apumtau obêc lop mi lôm ge od il wê il gên dô madviha ge il ob luu xomxo wê yib ge mi la mug lêm. Nge, heche mô obêc mug. ¹⁶Vô buc tige Anutu ob tyuc vya levac di angela levac ti ob keac di Anutu vuac ob tyuc, di Apumtau Yesu obêc sea vigwe kisii ganê di lop mi lôm, mêdêc xomxo wê vông i vin Kîlisi lêc yib ge ob kidi lec maviha tax. ¹⁷Nang dêc il wê il vông i vin lêc gên dô madviha ge Kîlisi obêc kô il timuên di il ob mi la kituc lec xomxo wê yib ge vac viyobtoc, di il xôn ob mi la le vô Apumtau gê lag puunê di la dô madviha hixôn i luta lêc luta. ¹⁸Mêgem xam nêl kiyang tiga vôma ên i ngidu xam xôn di vông xam nilôm i vô viyin maên.

Il ob viac il ên buc wê Apumtau obêc vena lec ge

5 ¹Xam lige, xe ob kivuu kiyang vô xam lec buc me klismas wê Apumtau ob vena lec ge lêm, ²ên xacxam va vyaac xovô ên xam nêbê

il lungên buc tige tiyi xocbê il lungên buc wê xomxo yôdac ti ob val vông yôdac vô susu vô bucên ge. ³Vô buc tige xomxo tibeac ob nêl ên nêbê, “Gwêbaga buc malehe om il ob dô nidviha mê.” Lêc ge buc wê viyin ob val hivun he xôn lutibed tiyi xocbê vêx ti nu obêc yubac ge od ta yaxên myavinê lutibed. Mêgem he ti o tiyi wê ob pec ên viyin wê ob val ge lêm. ⁴Lêc xam lige, xam o dô vac mapitoc lêm, om buc viyin tige i o léc val vông xam yetac i tiyi xocbê tibii yôdac vông xam yetac ge lêm, ⁵ên xam o dô vac bucên wê mapitoc ge lêm. Nge, il vihati dô vac vidiên wê xêseac ge. ⁶Mêgem il ob xêp i tiyi xocbê tibii madiluhu ge lêm. Nge, il madnôn i seac di il piyôp i xovô, ⁷ên xomxo wê yêp ge mi yêp vô bucên di he wê num mia ge mi num mi vô mavmav vô bucên di piyôp vô judajuda. ⁸Dom il mô dô vac xêseac, om il piyôp i xovô, di il vinyum môp vông vinên yuu xêdyaa vin lecmaên i kisuu il lec i tiyi xocbê ngakwi xêkizêc kisuu il nidnivi lec ge. Di il vông i vin kiyang wê nêbê Apumtau obêc kô il mi il la dô hixôn i ge, om kiyang tige i hivun il xôn i tiyi xocbê kilung xêkizêc ta ti hivun il badzub xôn ge. ⁹Ên Anutu o tung il ên nêbê ni ob nyag vô il mi kitya il vêl lêm. Nge, tung il ên nêbê il obêc vông i vin Apumtau Yesu Kilisi ge od ob vô il vêl ên il nêd nipaên. ¹⁰Yesu yib lec il nêd nipaên ên nêb il yibên yuu xôn madviha ge il vihati ob dô madviha hixôn i. ¹¹Mêgem xam nêl kiyang nivihã vôma di ngiduma xôn i tiyi xocbê môp wê xam mi vông gwêbaga.

Kiyang viwen timuên

¹²Xam lige, xe nêl vô xam bêga bê xam loc vac lime wê vông Anutu yuac vac xam mahigun ge kwa ngibi di ngô he kiyang, ên Apumtau vông he tu xam nêm levac ên nêb he i nêl kiyang vô xam di titô xam. ¹³Om xam vông he lê i vô levac lec yuac wê he vông ge, di xam xêmyaa i vin lec he, di xam vihati dô vac kiyang malehe.

¹⁴Xam lige, xe nêl xêkizêc vô xam bêga bê xam titô he wê ni maên ge, di xam ngidu he wê xona xona ge xôn, di ngidu he wê o vông i vin xêkizêc lêm ge xôn, di lum nêl kiyang malehe vô xomxo vihati.

¹⁵Le i léc vông nipaên vac nipaên lêm. Nge, xam vông nivihã vô lime hixôn tibii vihati i tiyi buc vihati.

¹⁶Xam dô hixôn xêmyaa nivihã i tiyi buc vihati, ¹⁷di xam kitaa vô Anutu i tiyi buc vihati, ¹⁸di xam pimil Anutu i tiyi buc vihati, buc wê xam tulec viyin hixôn buc wê xam tulecên viyin ma ge. Xam tu Yesu Kilisi xe pyap, om Anutu nêb xam vông môp tibêgee.

¹⁹Le i léc le vac Anutu Myakilôhô Ngibua xôn lêm, ²⁰di le i léc vô nimi vô Anutu kiyang wê xomxo ob nêl vô xam ge lêm, ²¹di xam yaxên kiyang vihati mi wê, dêc hôm nôn nivihã ²²di sea nipaên vihati i loc dô xel.

²³Anutu vaci wê malehe kehe ge i vông xam tu xomxo ngibua, di i viac xam kinum yuu myamkilôhô di nimnivi ên xam dô nivihã di kiyang soên

ti i o léc yêp vô xam vô buc wê Apumtau Yesu Kîlisi ob lop mi lôm ge lêm. ²⁴Anutu wê tyuc xam ên nêb xam tu i nue ge ob vông bêge vô xam, ên ici va ob pwoo i vya vac lêm.

²⁵Xam lige, xam kitaa vô Anutu ên i ngidu xe xôn.

²⁶Xam nêl vidiiên vô lime vông vinên vihati dĩ pul he vigê i tiyi xochê môp wê Anutu nue il mi vông ge.

²⁷A nêl kiyang xêkizêc lec Apumtau lê bêga bê xam kitong kipihac ga vô lime vông vinên vihati mi he i ngô.

²⁸Vizid nivîha wê il Apumtau Yesu Kîlisi vông ge i hivun xam vihati xôn.

2 TESALONAIIKA

Pol kivuu kipihac wê vông yuu ge

la vô tibii Tesalonaika

1 ¹A, Pol, xen Sailas yuu Timoti, xen kivuu kiyang ga vô xam Tesalonaika wê xam vông i vin Yesu ge. Xam tu il Mag Anutu yuu Apumtau Yesu Kilisi xe pyap.

²Mag Anutu yuu Apumtau Yesu Kilisi yuu i vông xam dô vac vizid nivihã di vông kiyang malehe i hivun xam xôn.

Pol pimil Anutu

³Xam lige, xe nilôm kidu xe om xe pimil Anutu ên xam tiyi buc vihati. Móp tige môp bôbac, ên vông vinên wê xam vông ge diyêp xêkizêc di vô levac tiyi buc vihati, di xam toto xêmyaa mi vin lecma nô, di môp xêmyaa vin lecên tige divô levac vac xam mahigun tiyi buc vihati.

⁴Mêgem xe yong xam lêm vô levac vac konglegesen viyang viyang ge bêga ên xe nêbê xomxo vông viyin yuu myavinê levac vô xam lec wê xam vông i vin ge, lêcom xam le xêkizêc ta di kilê viyin di hôm vông vinên wê xam vông ge xôn pilihi.

Anutu yaxên il ya môp bôbac

⁵Xam mi le xêkizêc ta vac vông vinên, om xam môp bêge nêl xam kitong ên nêbê Anutu yaxên xam ya môp bôbac, om gwêbaga xam kô viyin levac ên wê xam tu Anutu nue ge, lêcom viyin tige ob vông xam vô nivihã tiyi wê xam ob la dô vac Anutu ben lag puunê ge. ⁶Di Anutu ob vông môp bôbac ngwe hixôn bêga bê ob vông myaviwen nipaên vô he wê vông viyin vô xam ge, ⁷di ob vô viyin vêl ên xam, di ob vông il xôn dô seac vêl vô buc timuên wê Apumtau Yesu hixôn angela xêkizêc

wê i vông ge obêc sea ben lag puunê di lop mi lam le seac ge. He ob lam hixôn ngwax mahelac levac, ⁸di ob vông myaviwen nipaên vô xomxo wê lungên Anutu gee hixôn he wê vô ninya kitu vô il Apumtau Yesu xolac gee. ⁹Om he ob kô myaviwen nipaên bêga bê Apumtau obêc ngiloo he la vêl tevabanê ên i manôn hixôn xêkizêc levac yuu xêseac wê i vông ge, om he ob la dô vac nipaên luta lêc luta ¹⁰vô buc timuên wê Kilisi obêc lop mi lôm ge. Vô buc tige xomxo wê vông i vin di tu i nue gee vihati ob nêl Yesu lê vô levac di pimil i hixôn xêyaa nivihya yang. Mêgem xam êno ob vông bêge ên xam vông i vin Anutu kiyang wê xe nêl vô xam ilage.

Pol kitaa vô Anutu lec tibii Tesalonaika

¹¹Xe xovô ên xe nêbê xe nêl xolac vô xam ilage di xam vông i vin. Mêgem xe kitaa vô il Mag Anutu tiyi buc vihati bêga bê i ngidu xam xôn ên xam tu xomxo nivihya tiyi wê xam ob vông môp yuu yuac nivihya vihati wê Anutu tyuc xam ên nêb xam ob vông ge. Di xe kitaa vô Anutu bêga bê i ngidu xam xôn ya xêkizêc wê i vông ge êdêc xam vông môp nivihya vihati i tiyi wê xam nêb xam ob vông ge, di xam vông yuac vihati wê xam vông ên wê xam vông i vin Yesu ge i diyêp nivihya. ¹²Xe kitaa bêge ên xe nêb môp wê xam vông ge i vông il lig Apumtau Yesu lê i vô levac, di Yesu i vông xam lêm i vô levac êno. Il Mag Anutu hixôn Apumtau Yesu Kilisi obêc vông bêge ya vizid nivihya wê yuu vông ge.

Kiyang lec xomxo nipaên kehe nônon wê ob tu levac ge

2 ¹Xam lige, a ob nêl kitong vô xam lec buc wê Apumtau Yesu obêc vena di kituc il xôn mi il la vô i ge. Om xe nêl kitong vô xam bêga ên xe nêbê ²xomxo ya ob val nêl kiyang kityooên vô xam ên nêbê buc wê Apumtau ob vena lec ge val pyap. He ya nêl i tiyi xocbê plopete kityooên mi nêl ge, di he ya nêl ya xovôên wê heche va vông ge, di he ya so ên he nêbê xe kivuu kiyang tibêge vac kipihac. Om xam obêc ngô kiyang kityooên tige ge od xam nilôm i o lêc vô viyin di xam vông i vin kiyang tibêge lutibed lêm. ³Le i lêc vông i vin kiyang yuu môp kityooên wê xomxo ob nêl vô xam ge lêm, ên buc tige obêc seb lam tax lêm. Nge, xomxo tibeac hiwocên ob pwoo Anutu kiyang vac di vô nîmi vô Anutu, di xomxo nipaên kehe nônon ob val le seac tax, nang dêc Apumtau ob vena timuên. Xomxo nipaên kehe nônon tige wê Anutu ob vông i la dô vac Seten ben. ⁴Lêc xomxo nipaên tyo ob val le seac lê, lêc vông vevac vô Anutu nônon di anutu baba wê xomxo vaci vînoo ge hixôn susu ngîbua vihati yang, di ob yong ici va lê ên nêbê i tu levac di luu susu ngîbua vêl. Om ob la vac Anutu xumac ngîbua di la dô di kityoo xomxo ên nêbê, “A ga a Anutu tyo mêga.”

⁵Ilage wê a loc dô hixôn xam ge od a nêl kiyang tiga kitong vô xam. Mêd xam lungên kiyang tige tii vac nang, me? ⁶Lêcom xam xovô ên xam

nêbê gwêbaga xomxo ngwe le vac xomxo nipaên tyo nêb môp xôn ên nêb i lamên i ma, lêc ob lam le seac vô buc timuên wê Anutu vînoo vô i ge. ⁷Xomxo nipaên kehe nôn tyo valên gên ma, lêcom gwêbaga i vông yuac nipaên wê pwoo Anutu kiyang vac ge mi dô xôpacên. Mêdêc obêc buc timuên ge od xomxo ngwe wê le vac i xôn ge obêc titêc la vêl, ⁸mêd ge wê xomxo nipaên kehe nôn tyo ob lam le seac. Nang dêc Apumtau Yesu ob hi i yib ya myakilôhò wê lam vac mya ge. Apumtau ob lam le seac hixôn xêseac wê i vông ge, di ob hi xomxo nipaên tige vô nipaên ya xêkizêc wê i vông ge. ⁹Lêcom buc wê xomxo nipaên kehe nôn tyo obêc val ge od obêc val hixôn xêkizêc wê Seten vông ge, om ob vông yuac levac hixôn do levac wê kityooên ge viyang viyang, ¹⁰di ob vông môp nipaên wê kityooên ge vihati ên nêb i kityoo xomxo wê ob la dô vac nipaên luta ge. Xomxo tige xêyaa obêc vin lec Anutu kiyang nôn ge od Anutu ob vô he vêl ên he nêb nipaên, lêc he vô nîmi vô om Anutu ob kitya he vêl. ¹¹Mêgem Anutu ob vông xêkizêc wê kityooên ge vô he ên nêb he i vông i vin kiyang kityooên. ¹²Mêgem he vihati wê o vông i vin kiyang nôn lêm di xêyaa vin lec môp nipaên ge, Anutu ob nêl he nêb nipaên kitong di vông he la dô vac nipaên luta lêc luta.

Anutu vînoo xam pyap ên nêb ob vô xam vêl ên nêb nipaên

¹³Xam lige, Apumtau xêyaa vin lec xam, di xe nilôm kidu xe om xe pimil Anutu ên xam tiyi buc vihati, ên mugên ilage Anutu vînoo xam ên nêb ob vô xam vêl ên xam nêb nipaên. Om vô xam vêl ya yuac wê Myakilôhò Ngibua vông ge hixôn môp vông vinên wê xam vông ge, ên xam vông i vin i kiyang nôn. ¹⁴Mêgem Anutu nêb ob tung xam la dô vac xêseac wê il Apumtau Yesu Kilisi vông ge, om didii xam pyap ya xolac nivîha wê xe nêl vô xam ge. ¹⁵Mêgem xam lige, xe nêl vô xam bêga bê xam le xêkizêc di hôm kiyang nôn wê xe nêl vô xam vac myam di kivuu vac kipihac ge xôn pilihi di timu vô.

¹⁶Il Apumtau Yesu Kilisi yuu Mag Anutu, yuu xêyaa vin lec il om vông vizid nivîha vô il ên nêb ob ngidu il xôn di vông il nilôd i vô viyin maên luta lêc luta. Di yuu ngidu il xôn om il dô bin nôn nivîha wê yuu ob vông vô il timuên ge. ¹⁷Mêgem xe kitaa vô Anutu ên xe nêbê i ngidu xam xôn di vông xêkizêc vô xam êdêc xam vông yuac wê nivîha ge ya di nêl kiyang wê nivîha ge vihati.

Xam kitaa vô Anutu bê i ngidu xe xôn

3 ¹Xam lige, a ob nêl kiyang ngwe hixôn bêga bê xam kitaa vô Anutu bê i ngidu xe xôn ên Apumtau kiyang i loc vac vigwe viyang viyang ge lutibed di i vô levac i tiyi xocbê vô levac vac xam mahîgun ge. ²Di xam kitaa vô Anutu bê i vô xe vêl ên tibii nipaên wê mi vông môp nipaên ge vigê, ên xam xovô ên xam nêbê xomxo tibeac o vông i vin Anutu lêm.

³Lêc Apumtau ob pwoo vya vac di sea il lêm. Nge, ob vông xam le xêkizêc di viac xam, ên Seten i o vông xam vô nipaên lêm. ⁴Apumtau vông xovôên vô xe lec xam, om xe xovô en xe nêbê gwêbaga xam ditimu vô môp vihati wê xe vông vô xam ge, di xe xovô ên xe nêbê timuên ge xam ob vông môp bêgee i tii vac nang. ⁵Om xe kitaa vô Apumtau bêga bê i vông xovôên nivihha vô xam ên xam vyaac xovô bê Anutu xêyaa vin lec xam, di xam xovô bê Kilisi le xêkizêc di kilê viyin.

Xomxo vihati i vông yuac

⁶Xam lige, xe tu Apumtau Yesu Kilisi manôn di nêl vô xam bêga bê xam kol xam mi dô teva ên lime vông vinên wê mi vô ni maên ên he yuac kibun ga, ên he o vông i tiyi wê xe nêl vô xam ilage lêm. ⁷Ên xacxam va xovô pyap bêga bê xam ob tup vô môp wê xe vông ge, ên buc wê xe loc dô hixôn xam ilage od xe o dô vidaaên di yuac ma lêm, ⁸di xe o kê yaên ti vô xam pileva lêm. Nge, xe vông yuac bisnis tiyi vidiiên yuu bucên vihati ên xe nêb xe ob kê mone lec di kisuu xe xom yaên vô xam lêc xa, om xe vông yuac levac ên xe nêb xe ob vông viyin vô xam ên susu yaên lêm. ⁹Xe vông yuac bêge, lêcom xam xovô ên xam nêbê xe tu xam nêm levac om xe tiyi wê xe ob nêl bê xam vông xe xom yaên pileva. Mêlêc xe o nêl bêge vô xam lêm, ên xe nêb xe ob hilung môp nivihha wê xam ob timu vô ge vô xam. ¹⁰Om tiyi buc vihati wê xe dô hixôn xam ge od xe nêl vô xam bêga ên nêbê, “Xomxo ti obêc nêb ob xeedô pileva di yuac i ma ge od xam o lêc vông yaên vô i lêm. Toto vigê i vông yuac lec, lêc ya.”

¹¹Xe nêl kiyang tibêge vô xam ên xe ngô wê xam ya dô vidaaên di o vông yuac ti lêm. Nge, xam ngena tibeac lec xomxo mangwe yuac wê he vông ge, di xacxam va ge xam o vông yuac wê xam ob tulec yaên ge lêm. ¹²Mêgem xe viac kiyang vô he wê mi dô vidaaên ge di nêl xêkizêc lec Apumtau Yesu Kilisi lê bêga bê he i dô nivihha di vông yuac ên tulec yaên.

¹³Xam lige, xam nim i o lêc ma lec môp wê xam ob vông nivihha vô xomxo ge lêm, ¹⁴di xomxo ti obêc vô ninya kitu vô kiyang wê xe kivuu vac kipihac tiga ge od xam xovô xomxo tyo di kol xam mi dô teva ên i, ên i xovô nên soên di ni i yoc ên i. ¹⁵Lêcom xam o lêc wê i xocbê tibii wê vông vevac vô xam ge ti lêm. Nge, xam wê i xocbê xam lime môci ti, di viac kiyang vô i ên i xovô.

Kiyang viwen timuên

¹⁶Apumtau vaci wê kiyang malehe kehe ge i vông xam nilôm i vô malehe lec i tiyi buc vihati, buc viyin hixôn buc nivihha. Apumtau i dô hixôn xam vihati.

¹⁷A, Pol, a kivuu kiyang tiga ya vigêg di a nêl vidiiên vô xam. A mi kivuu kiyang di mi nêl vidiiên vô xam vac kipihac vihati wê a kivuu ge. Môp wê a vông ge yêp bêge.

¹⁸Vizid nivihha wê il nêd Apumtau Yesu Kilisi vông ge i loc dô hixôn xam vihati.

1 TIMOTI

Kipihac taxlee wê Pol kivuu vô

Timoti ge

1 ¹A, Pol, Yesu Kilisi nu sinale a. Anutu wê kitya il nêd nipaên vêl ge hixôn Yesu Kilisi wê il dô bin buc wê il ob xê i ge, yuu xôn vînoo a ên nêb a kô yuac sinale.

²Timoti, ông ge a nug vông vinên nôn. A kivuu kipihac ga loc vô ông. Mag Anutu hixôn Apumtau Yesu Kilisi, yuu i vông vizid nivîha i loc vô ông, di xo vîgwe pisiv ên ông, di vông kiyang malehe i hivun ông xôn.

Xomxo wê nêl kiyang kityooên

³Ilage wê a nêb a ob la vîgwe Masedonia ge, a nêl vô ông ên a nêbê ông dô Epesas. Om a ob nêl vô ông i tii vac bêga bê ông dô Epesas, ên tibii ya dô vac xam mahigun di tixuu xomxo ya xolac ba kityooên. Om ông dô ên le vac kiyang kityooên wê he vông ge xôn. ⁴Ông nêl vô he bêga bê he i sea kiyang kityooên wê he mi nêl ge, ên he mi nêl pivulac pileva di le nêl bue tivae wê dô ilage lê hixôn, om kiyang kityooên tige vông he piyôp vô himena himena, di o vông xovôên vô he lec Anutu kiyang lêm, ên môt vông vinên tibed ge wê ob vông xovôên vô il lec Anutu kiyang. ⁵Om a ob nêl vô ông bêga bê ông le vac he xôn di nêl vô he bê he i sea kiyang kityooên. Om he obêc ngô ông kiyang di timu vô ge od he nilô ob vô paha lec di nipaên ti ob yêp vac he nilô lêm, di he ob vông i vin Yesu. Om he obêc timu vô môt tibêge od he ob vông môt xêyaa vin lecên vô nôn lec. ⁶Xomxo ya sea môt tige di la nêl kiyang vaxvax wê ob vô nôn nivîha vô he lêm ge. ⁷He nêb he ob tixuu xomxo ya xolac wê Moses vông ge. Lêc he lungên xolac tige di lungên kehe hixôn.

⁸Il xovô ên il nêbê il obêc timu vô Moses xolac i tiyi wê Anutu nêl ge od xolac ob vô nivîha vô il. ⁹Di il xovô ên il nêbê Anutu o vông xolac ên nêb i titô xomxo wê nivîha ge lêm. Nge, vông xolac ên nêb i titô xomxo

wê nipaên ge, he wê pwoo Anutu kiyang vac ge, di he wê o ngô xomxo levac kiyang lêm ge, di he wê vô nimi vô Anutu ge, di he wê vông môt nipaên ge, di he wê timu vô môt kibun ga di o timu vô Anutu lêm ge, di he wê yê Anutu hixôn susu ngibua xocbê susu vidaaên ge, di he wê hi tae mae yib ge, di he wê hi tibii yib ge, ¹⁰di he wê vông môt yôdac vêx yuu vux ge, di he vux wê vông môt yôdac vô vux ge, di he wê hôm xomxo xôn di kô mi la nêb tibii i kisuu he ge, di he wê nêl kiyang kityooên ge, di he wê hilung vigê la kisii ên nêb he nêl kiyang nôl lêc he kityoo ge. Anutu vông xolac ên nêb i titô xomxo nipaên tibêgee hixôn he vihati wê vông môt nipaên di pwoo Anutu kiyang nôl vac ge. ¹¹Kiyang nôl tige yêp vac xolac paha nilô wê Anutu vông vô a ên nêb a la nêl vô xomxo ge. Xolac tige nêl Anutu wê xêseac kehe ge kitong.

Pol pimil Anutu ên wê xo vigwe pisiv ên i ge

¹²Il Apumtau Yesu Kilisi vông xêkizêc wê i vông ge vô a, di yaxên a pyap ên nêb a tiyi wê a ob vông i yuac ge. Om a hi vixag pec ên i. ¹³Ilage a so vyag vô Yesu lê, di vông viyin levac vô xomxo wê vông i vin Yesu ge, di a kô a lec di vông he vô nipaên. A mi vông môt tibêgee lê, lêc a gên o vông i vin Kilisi lêm om a o xovô nipaên wê a vông ge lêm. Mêgem il lig Apumtau xo vigwe pisiv ên a, ¹⁴di vông xêyaa vin lecên wê i vông ge lam hivun a xôn, om a vông i vin Yesu Kilisi di a xêgyaa vin lec i.

¹⁵Kiyang yêp bêga ên nêbê Yesu Kilisi lam kibun ga ên nêb ob vô xomxo nipaên vêl ên he nêl nipaên. Kiyang tige kiyang nôl vixôhilôg tiyi wê xomxo ob ngô di vông i vin ge. A ga xomxo nipaên nôl luu xomxo nipaên vihati vêl. ¹⁶Lêc Yesu xo vigwe pisiv ên a ên nêb xomxo nipaên vihati he i yê di xovô bê a ga xomxo nipaên nôl, lêc Yesu o kitya a vêl lutibed lêm. Nge, xo vigwe pisiv ên a. Om he ob yê di vông i vin Yesu di dô maviha luta lêc luta. ¹⁷Anutu tu king mi dô luta lêc luta di obêc yib lêm. Xomxo ti manôn o yê i lêm, di ici va Anutu nôl tibed. Lê levac yuu xêseac wê i vông ge i yêp vô i luta lêc luta. Nôn.

Timoti i vông vevac ya xolac

¹⁸Timoti, a nug ông, ilage Anutu vông xovôên vô xe xomxo vông vinên lec yuac wê Anutu ob vông vô ông ge, mêgem xe nêl kitong vô ông. Om gwêbaga a ob nêl vô ông bêga bê ông xovô kiyang wê xe nêl vô ông ilage i tii vac nang ên i ngidu ông xôn di ông hôm xolac xôn pilihi di vông vevac xêkizêc ya. ¹⁹Om ông le xêkizêc vac vông vinên wê ông vông ge di timu vô môt nivaha i tiyi xocbê ông xovô ge. Ên xomxo ya xovô môt nivaha lêc o timu vô lêm. Nge, he vô nimi vô, om vông vinên wê he vông ge vô nipaên tiyi xocbê sip wê val hibû sea lec ngidax manôn wê le vac gwec ge. ²⁰Haimenias yuu Aleksanda vông môt tibêge om a vông yuu la vac Seten vigê ên a nêb yuu i pilepac yuu di sea môt wê yuu mi nêl Anutu lê vô nipaên ge.

Môp kitaaên

2 ¹Om yuac wê a nêl vô xam ên a nêb xam vông ge, kiyang taxlee lec yuac tige bêga bê xam kitaa vô Anutu lec xomxo vihati ên i ngidu he xôn, di xam pimil Anutu ên he. ²Di xam kitaa vô Anutu lec king hixôn gavman levac vihati ên he i viac il nivihia di il dô vac kiyang malehe kwa ngibi di timu vô môp wê Anutu hixôn xomxo ob yê nivihia ge. ³Kitaaên tibêge nivihia di Anutu wê vô il vêl ên il nêd nipaên ge ob yê nivihia, ⁴ên Anutu nêb xomxo vihati i xovô kiyang nôn wê i vông ge kehe di pilepac nilô i loc vô i ên i kitya he nêb nipaên vêl. ⁵Anutu nôn tived, di xomxo tived wê vông kisoac mi le vac il Anutu mahigun. Xomxo tige Yesu Kilisi. ⁶Vô buc wê Anutu nêl ilage, Yesu vông ici va lam yib ên nêb ob vô il vêl ên il nêd nipaên. Om môp wê Yesu vông ge nêl kitong vô il bêga ên nêbê Anutu nêb ob kitya xomxo vihati nêb nipaên vêl. ⁷Om Anutu vînoo a ên nêb a la vông yuac sinale di la nêl kiyang tige vô xomxo. A o kityoo lêm. Nge, a nêl vixôhilôg nôn. Anutu vînoo a ên nêb a la tixuu he wê o Yuda lêm ge ya kiyang nôn ên he i vông i vin.

⁸Om a ob nêl vô xam bêga bê he vux vac vigwe vihati ge he i kitaa vô Anutu. Lêc he i sea môp kunac maên yuu ni nyagên di pilepac nilô i vô paha lec lê, lêc kitaa.

Môp wê vêx ob vông ge

⁹A ob nêl vô he vêx bêga bê he i vinyum ngakwi i tiyi wê he xomxo levac ob yê nivihia ge, di he i o vinyum ngakwi wê ob vông vux yetac ên he ge lêm, di he i o léc vông nilô i loc vô môp wê he ob vunac vô bazub lihi di vunac vô ninivi ya komkom gol di vinyum nivimihia wê mone levac ge lêm. ¹⁰Nge, he i vông nilô i loc vô môp nivihia wê ob ngidu xomxo xôn ge, ên vêx wê nêl ên nêbê he Anutu nue ge wê he ob vông môp bêge. ¹¹He i vô nipwo lec mi dô kiyang maên di ngô xolac mi xovô. ¹²Kiyang wê vêx ob nêl xolac ge a ob le vac xôn. Di he ob tu vux bazub lêm. Nge, he i dô kiyang maên di vô ninya vô kiyang. ¹³Ên Anutu tung Adam tax, léc tung Iv timuên. ¹⁴Di Adam o ngô kiyang kityooên wê Seten nêl ge lêm. Nge, Iv môci wê vông i vin Seten kiyang di pwoo Anutu kiyang vac. ¹⁵Om vô buc wê vêx obêc kô nipwo ge od obêc tulec myavinê levac. Lêc vêx obêc vông i vin xêkizêc di xo vigwe pisiv ên xomxo di dô i tiyi xocbê vêx ngibua di kol he ên nipaên ge od Anutu obêc ngidu he xôn di vô he vêl ên he nêb nipaên.

Kiyang lec gyovixa

3 ¹Kiyang ti wê nôn ge yêp bêga ên nêbê vux ti obêc xo vînux ên nêb ob kô yuac gyovixa ge od yuac wê nêb ob kô ge yuac nivihia. ²Mêgem xam yaxên i, di vînoo xomxo wê mi viac môp wê i vông ge

niviha om xomxo ti o tiyi wê ob tulec soên ti vô i lêm ge, di wê vinê tived, di i viac i niviha ên môp nipaên, di timu vô piyôp niviha, di vông môp wê lie ob yê nêb niviha ge, di kô tibii mi la vac ben di viac he niviha, di tixuu xomxo i niviha ya xolac, ³di o num mi vô mavmav lêm, di xêyaa o vô myavinê decdec di hi xomxo lêm. Nge, lum mi nêl kiyang vô xomxo, di o kunac xomxo vaxvax lêm, di o xo mone luu vêl lêm, ⁴di viac vinê nue niviha, di titô nue ên nêb he i ngô kiyang wê i vông ge di timu vô. ⁵Ên xomxo ti o tiyi wê obêc viac vinê nue di titô he lêm ge od ob tu Anutu nue nêb levac di viac he tibêna? ⁶Xomxo wê gên vông i vin paha ge ti o tiyi wê ob kô yuac gyovixa ge lêm, ên obêc yong i ge od Anutu ob tii i vêl tiyi xocbê tii Seten vêl ilage. ⁷Om xam vinoa xomxo wê tibii madiluhu yê niviha ge. Ên tibii madiluhu obêc yê i nipaên lêc i tu gyovixa ge od he ob nêl nipaên lec i di vông i ni yoc di Seten ob hôm i xôn vac leac wê i vông ge.

Kiyang lec xomxo wê vông yuac vac konglegesen

⁸Xomxo ya obêc nêb vông yuac vac konglegesen ge od xam yaxên he lêc vinoa he wê mi timu vô môp niviha bêga nêbê he vông nilô la vô he yuac, di he o nêl kiyang yuu lêm, di he o num mi vô mavmav lêm, di he o doma vô mone yuu susu lêm, ⁹di nipaên ti o yêp vac he nilô lêm. Nge, he mi hôm Anutu kiyang nôn wê nêl môp vông vinên kitong ge xôn pilihi. ¹⁰Om xam yaxên môp wê he vông ge lê, lêc xam obêc wê he niviha ge od he i vông yuac vac konglegesen. ¹¹Xomxo tigeê vinêe êno he i vông nilô i loc vô he yuac, di he i o lêc nêl kiyang wê ninya ninya ge lêm, di he i viac he niviha ên môp nipaên, di he i vông môp vihati i yêp niviha. ¹²Xomxo ti wê ob vông yuac vac konglegesen ge i ii vêx tived di i titô nue di viac vinê nue niviha di titô he. ¹³Om he wê vông yuac vac konglegesen di vông he yuac niviha ge, he lê ob yêp niviha, di he ob nêl Yesu Kilisi xolac wê he vông i vin ge i yêp seac di xonaên ob ma.

Anutu kiyang nôn kehe

¹⁴Timoti, a nêb a ob loc xê ông decdec. Lêc a kivuu kipihac tiga di vông i loc vô ông, ¹⁵ên a obêc miloc vô ông decdec lêm ge od ông kitong kipihac tiga di xovô môp niviha wê xomxo vông vinên vihati ob timu vô ge. Ên il wê il vông i vin ge, Anutu maviha nue il, om il vông Anutu kiyang nôn i le xêkizêc i tiyi xocbê teac wê le pilihi di hôm xumac xôn ge. ¹⁶Anutu kiyang nôn ge kehe levac mabu, om xomxo ti o tiyi wê ob yax vun bê xolac nôn maên ge lêm. Kiyang tige kehe nêl bêga ên nêbê,

Kilisi lam tu xomxo kibun ga mi xomxo
yê i,
di Myakilôhô Ngibua nêl kitong ên nêbê
Kilisi ge xomxo niviha.

Angela yê i,
 di xomxo la nêl i kitong vac vigwe
 viyang viyang,
 di xomxo kibun ga vông i vin i,
 di Anutu kô i mi lax mi la lag puunê.

Kiyang lec xomxo wê nêl kiyang kityooên ge

4 ¹Myakilôhô Ngibua nêl kiyang seac vô il bêga ên nêbê vô buc timuên ge tibii ya ob sea vông vinên wê he vông ge, di ngô kiyang kityooên wê vimwo nipaên ob nêl ge di timu vô kiyang wê Seten nue ob nêl vô he ge. ²Tibii nipaên tige xomxo kityooên wê mi nêl kiyang kityooên, om he hêm kiyang nipaên xôn mi i yêp vac he nilô, lêc he o yaxên nipaên wê he mi vông ge lêm. ³Di he tixuu xomxo ya kiyang kityooên nêbê he iimaên i ma, di he vibu he nêbê he i o ya yaên mangwe lêm. Lêc môt ge kityooên, ên Anutu vông yaên vihati yang vô il ên nêb il ob kitaa vô i di pimil i ên yaên tige lê, lêc xa. Om il wê il vông i vin di xovô Anutu kiyang nôn ge il ob xa yaên vihati. ⁴Ên susu wê Anutu tung ge vihati yang nivîha. Om il ob pisôh ti lêm. Nge, il ob xa susu vihati yang di hi vixad ên Anutu lec susu tige, ⁵ên Anutu kiyang hixôn kitaaên wê il vông ge vông susu vihati ge tu ngibua.

Timoti ge Yesu Kilisi nu yuac nivîha ti

⁶Timoti, ông obêc nêl kiyang wê a kivuu ga vô lime vông vinên ge od ông ob tu Yesu Kilisi nu yuac nivîha ti, di kiyang wê nêl môt vông vinên kehe kitong ge hixôn kiyang nôn wê ông ngô di timu vô ge, kiyang tige ob vông xêkizêc vô ông. ⁷Om le i lêc ngô pivulac vidaaên wê o nêl kiyang nôn lec Anutu ge lêm. Nge, ông tixuu ông ya Anutu kiyang di timu vô i tiyi lec buc vihati. ⁸Ên il obêc tixuu il ya môt kibun ga wê nivîha ge od ob vô nivîha vô il nipwo titi. Lêc il obêc tixuu il ya Anutu kiyang mi timu vô ge od ob ngidu il xôn i luu vêl, ên ob vô nivîha vô il gwêbaga wê il dô madviha lec kibun ga ge, di ob vô nivîha vô il vô buc timuên wê il ob dô madviha gê kisii ganê hixôn. ⁹Kiyang tige nôn vixôhilôg tiyi wê xomxo ob ngô di vông i vin ge. ¹⁰Il dô bin Anutu wê maviha ge, om il ob vông vevac ya xolac di vông yuac xêkizêc. Anutu tiyi wê ob vô xomxo vihati vêl ên he nêl nipaên, lêc il wê il vông i vin i ge wê Anutu ob vô il vêl.

¹¹Timoti, ông nêl kiyang wê a nêl ga vô xomxo di tixuu he ya kiyang tiga ên he i timu vô. ¹²Ông ngivîhi ti, om xomxo ti obêc nêb hi ông lêm i tô ên wê ông ngivîhi ge od ông ngôên he i ma. Lêc ông vông môt nivîha vac xomxo vông vinên mahigun ên he i yê di timu vô. Om ông nêl kiyang nivîha, di vông môt bôbac, di xemyaa i vin lec xomxo, di ông vông i vin xêkizêc ta di nilôm yuu xovôên i yêp paha. ¹³Ông kitong xolac vac xomxo mahigun ên he i ngô, di nêl xolac kehe kitong vô he, ditixuu he

ya xolac di i loc tyip vô buc wê a ob milôc vô ông ge. ¹⁴Ông nim i o léc ma ên xêkizêc wê Anutu vông vô ông ên nêb ông vông i yuac ya ge lêm. Ên Anutu vông xêkizêc tige vô ông ilage lec buc wê gyovixa vyax vigê lec ông di nêl kitong vô ông lec yuac wê Anutu nêb ob vông vô ông ge. ¹⁵Om ông vông yuac tige i tiyi lec buc vihati, di vông nilôm i loc vô yuac tige ên xomxo vihati he i yê di xovô bê ông le xêkizêc vac xolac. ¹⁶Ông viac ông nimviha di viac kiyang wê ông ob tixuu xomxo ya ge i niviha hixôn, di vông yuac tige xêkizêc i tiyi buc vihati. Ên ông obêc vông bêge ge od yuac wê ông vông ge obêc vô niviha vô ông di ob vô niviha vô he wê ngô ông kiyang ge hixôn.

Môp titôên

5 ¹Timoti, ông ngivih i ti, om le i léc titô kipwoc ya kiyang higacên lêm. Nge, ông titô kipwoc ya kiyang wê ông ob lum nêl ge i tiyi xocbê ông nêl vô mam ge. Di ông titô he ngivih i tiyi xocbê ông titô lime vux ge, ²di titô he vêxta i tiyi xocbê ông titô tame ge, di titô he vêxwo hixôn nilôm paha i tiyi xocbê ông titô lime vêx ge.

Kiyang lec vêxôv

³Xam viac vêxôv wê bue nue ma ge ên ti o dô wê ob viac he ge lêm. ⁴Lêc vêxôv bue nue obêc dô ge od he i viac bu vêx tyo di viac tae mae hixôn, i tiyi wê he ob hi myaviwen wê tae mae vông vô he ge. Ên he obêc viac tae mae bue niviha ge od Anutu ob yê he niviha. ⁵Vêxôv wê bue nue ma di i dô gilon ge, vêxôv tige ob vông nilô la vô Anutu di kitaa vô i vidiiên yuu bucên vihati ên nêb Anutu i ngidu i xôn. ⁶Lêc vêxôv ti obêc vông nilô la vô môp kibun ga di timu vô môp wê ici va xovô ge od ge tiyi xocbê vêxôv tige yib waa. ⁷Om ông nêl kiyang tige vô he ên he i dô niviha di nipaên ti i o léc yêp vô he lêm. ⁸Ên xomxo ti obêc viac tae mae lie niviha lêm ge od tiyi xocbê xomxo tige sea vông vinên wê i vông ge, mêd tu xomxo nipaên wê luu tibii madiluhu vêl ge.

⁹Om vêxôv wê bue nue ma ge, ông kivuu he lê i yêp vac kipihac, ên konglegesen i kitong di viac he wê lê yêp vac kipihac ge. Le i léc kivuu vêxôv vihati lê lêm. Nge, he wê ông ob kivuu he lê i yêp vac kipihac ên konglegesen i viac he ge, he gee wê tu vêxta tiyi xocbê klismas mîla 60 di he kô liya tibed lêc liya yib, ¹⁰di he lê vô levac ên môp niviha wê he mi vông ge, di he viac nue niviha om nue lig mi vô levac di timu vô môp niviha, di he mi kô tibii mi la vac ben di la viac he niviha, di he viac xomxo vông vinên niviha yang, di ngidu xomxo wê tulec viyin ge xôn, di mi vông môp niviha viyang viyang ge. Om vêxôv tibêgee wê ông ob kivuu he lê i yêp vac kipihac ên konglegesen i viac he ya susu.

¹¹⁻¹²Di vêxôv lê obêc yêp vac kipihac ge od he i hilu kiyang taxlee bêga bê he ob kô vux ti i ti vac lêm. Nge, he ob dô vêxôv di vông yuac

vac konglegesen. Om vêxôv wê gên dô vêxwo ge, le i léc kivuu he lê vac kipihac lêm, ên he ob xo ên nêbê he ob kô vux i tii vac. Om he lê obêc yêp vac kipihac di he kô vux tii vac ge od tiyi xocbê he pwoo kiyang wê he hilu ge vac di vô nimi vô Kilisi. Om Anutu ob yê he nipaên. ¹³Di he vêxôv wê gên dô vêxwo ge, he lê obêc yêp vac kipihac mi konglegesen viac he ya susu ge od he ob vô ni maên ên yuac, di he ob la vilee vilee vô lie di vôngên yuac ob ma. Di he ob vông môp nipaên wê luu vêl ge hixôn bêga bê he ob la ngô xomxo nên kiyang pyap di la tiyoo i la, di he ob nêl kiyang nipaên tiyi wê xomxo vông vinên nêlên ob ma ge. ¹⁴Mêgem a ob nêl vô xam bêga bê he vêxôv wê gên dô vêxwo ge, konglegesen i o léc viac he lêm. Nge, vêxôv tibêgee he i kô vux i tii vac di kô nue di viac he xumac, ên he obêc vông bêge ge od tibii wê yê il nipaên ge ob tulec môp tiyi wê he ob nêl kiyang nipaên lec il ge lêm. ¹⁵Il xovô ên il nêbê vêxôv ya sea môp nivîha di la timu vô Seten vông môp. ¹⁶Om vêx wê vông i vin ge, li vêxôv ti obêc dô ge od i viac i nivîha di vôngên viyin vô konglegesen i ma, ên konglegesen ob viac vêxôv wê nue bue ma di i dô gilon ge.

Kiyang lec xomxo levac

¹⁷Xomxo levac wê viac xam di vông he yuac nivîha ge, xam wê he nivîha di pimil he di ngidu he xôn ya susu nivîha. Di he wê nêl Anutu kiyang vô xam di tixuu xam ya xolac ge, xam viac he nivîha i luu vêl, ¹⁸i tiyi kiyang wê yêp vac Moses xolac bêga ên nêbê, “Bwoc levac ti obêc vông yuac vô ông di kê wit ninivi vêl ge od le i léc ku i mya xôn lêm.” Kiyang nêl bêge di

kiyang ngwe yêp vac Moses xolac bêga ên nêbê, “Xomxo ti obêc vông yuac ge od ob kô mone lec yuac wê i vông ge.” ¹⁹Xomxo tixed obêc nêl kiyang lec gyovixa ti ên nêb i vông môp soên ge od ông o léc ngô kiyang wê ici va nêl ge lêm. Léc xomxo yuu me yon obêc nêl kiyang tiyima lec gyovixa ên nêbê i vông môp soên ge od ông ngô di yaxên kiyang wê he vông ge. ²⁰Xomxo levac ti obêc vông môp nipaên ge od xam nêl i nêl nipaên lec i manôn vac konglegesen mahigun ên lie vihati i yê di xona nêl.

²¹A, Pol, a le vô Anutu yuu Yesu Kilisi hixôn Anutu nue angela manôn di a nêl vô ông bêga bê ông ngô kiyang vihati wê a nêl ga di timu vô di yaxên xomxo ya kiyang tige. Léc le i léc yaxên he lutibed lêm. Nge, ông ngô he kiyang di yaxên kehe i yêp seac lê. Le i léc nêl kiyang xêkizêc vô xomxo ya di lum nêl kiyang vô lime lêm. Nge, ông wê he vihati tiyima. ²²Le i léc vinoo xomxo ti decdec di tung i vac yuac wê konglegesen vông ge lêm. Di le i léc loc vac môp nipaên wê xomxo ya mi vông ge lêm. Nge, ông viac ông nimvîha di dô hixôn nilôm paha.

²³Le i léc num mia ningigooên pileva lêm. Nge, ông num mia wain nipwo ti hixôn ên i ngidu ông xêmyaa xôn, ên yidac wê mi vông ông nginong ge i ma.

²⁴Nipaên wê xomxo ya mi vông ge yêp seac vô il, om il xovô ên il nêbê he ob tulec myaviwen nipaên. Lêc nipaên wê xomxo ya vông ge yêp xôpacên, lêc obêc timuên ge od ob yêp seac êno. ²⁵Di môp nivihã wê xomxo mi vông ge tiyi bêge êno, ên mangwe yêp seac di mangwe yêp xôpacên, lêc vihati obêc yêp seac timuên.

Kiyang lec xomxo wê vông yuac vidaaên

6 ¹Xam wê xam tu xomxo levac nue yuac di vông yuac vidaaên vô he ge, xam loc vac xomxo levac wê viac xam ge kwa ngibi di pimil he lê ên he i o nêl nipaên lec Anutu hixôn i xolac lêm.

²Xam wê xam vông yuac vidaaên vô tibii wê vông i vin ge, xam ya mi nêl bêga ên xam nêbê, “Tibii wê viac a ge a lig vông vinên ti om xii tiyima, om a ob la vac i kiyang kwa ngibi lêm.” Kiyang bêge o nivihã lêm. Om xam nêl bêga bê, “Tibii tige a lig vông vinên wê a xêgyaa vin lec i ge, om a ob ngô kiyang wê i nêl ge di vông yuac wê i vông vô a ge xêkizêc, ên yuac tige i vô nôn nivihã vô i.”

Timoti, ông tixuu xomxo ya kiyang tibêge ên he i timu vô.

³Kiyang nôn wê il Apumtau Yesu Kilisi vông ge didii il vac môp nivihã wê Anutu vông ge. Om xomxo ti obêc sea Yesu kiyang nôn di tixuu xomxo ya kiyang baba ge, ⁴od xomxo tige yong i di xovôên ti o yêp vô i lêm. Xomxo tibêgee mi xo môp nipaên wê he ob ngaênma di kunacma lec kiyang pileva wê nôn maên ge. Om kiyang tibêge vô nôn nipaên di vông he yê lie tiyiên ma ên susu me lê levac wê he kô ge, di vông he hima, di he nêl kiyang lecma, di he vô nilô vôma, ⁵di he kunacma vaxvax. Xomxo tibêgee sea kiyang nôn om he piyôp vô yacyac. He so ên he nêb he obêc timu vô Anutu vông môp ge od he ob tulec susu tibeac. ⁶Vixôhilôg, xomxo ti obêc timu vô môp wê Anutu vông ge di obêc xo ên nêbê i nêl susu wê i kô ge tiyi pyap ge od ob vô nôn nivihã vô i. ⁷Ên il xovô ên il nêbê buc wê il yubac lec ge od il o kô susu ti lêc lam lêm. Nge, il lam pileva. Om buc wê il obêc xib lec ge od il ob kô susu ti lêc lax hixôn lêm. Nge, il ob lax mi la pileva. ⁸Mêgem il xed yaên yuu nêd ngakwi obêc tiyi il ge od il ob nêl bêga bê, “A nêg susu tiyi a om pyap.” ⁹Ên xomxo xêyaa obêc vin lec susu yuu mone levac ge od môp nipaên tigege obêc yaxên he di hôm he xôn tiyi xocbê pulac hôm lilii xôn ge. Om he nilô obêc kidu he ên môp nipaên wê xovôên nivihã ti yêp vacên ma ge hixôn môp wê ob vông he vô nipaên ge, om he ob vô nipaên di ob la dô hixôn Anutu lêm. ¹⁰Ên môp wê xomxo xêyaa vin lec mone ge tu môp nipaên vihati ge kehe. Xomxo ya gee, he vông nilô la vô mone, om môp tige didii he la vac nipaên di he sea vông vinên wê he vông ge, om he kilê viyin levac.

Pol nêl môp wê Timoti ob vông ge vô i

¹¹Timoti, ông tu Anutu nu, om ông le teva ên môp nipaên wê a nêl kitông vô ông ge vihati yang. Ông vông nilôm i loc vô Anutu hixôn môp

niviha, di vông i vin Anutu xêkizêc ta, di xo vîgwe pisiv ên xomxo, di le xêkizêc vac viyin, di lum nêl kiyang vô lime. ¹²Môp vông vinên wê il vông ge tîyi xocbê xomxo tup mi luuma. Om ông tup xêkizêc ên nginoo di tulec nôn maviha. Anutu nêl ên nêbê ông obêc dô mamviha luta, om ilage ông la le vô xomxo tibeac manôn di nêl vông vinên wê ông vông ge kitong yêp seac vô he mi he ngô. ¹³Anutu ge wê vông il vihati dô madviha, di Yesu Kilisi ge wê la le vô Pontias Pailat manôn di nêl i kiyang kitong yêp seac vô i. Om a le vô Anutu yuu Kilisi manôn di nêl yuac wê ông ob vông ge vô ông bêga bê ¹⁴le i lêc vông kiyang wê yêp vac xolac ge ti i vô nipaên lêm, ên xomxo ti i o lêc nêl nipaên lec xolac lêm. Ông vông yuac tibêge i tîyi buc vihati di i loc tyip vô buc wê il lig Apumtau Yesu Kilisi obêc vena lec ge. ¹⁵Buc wê Yesu ob lop mi lôm ge yêp vô Anutu vaci wê tu môp xêyaa nivîha kehe, di ici va tîbed tu il nêd levac wê viac il ge. Anutu ge king vihati nêl king, di xomxo levac vihati nêl levac, ¹⁶di ici va tîbed wê ob yib lêm. Anutu dô vac xêseac pileva di xomxo ti o tîyi wê ob la kwabo vô xêseac tige lêm. Xomxo ti o yê Anutu nôn ilage lêm, di gwêbaga xomxo ti o tîyi wê ob yê i ge lêm. Lê levac hixôn xêkizêc wê i vông ge i yêp luta lêc luta. Nôn.

Kiyang lec xomxo wê susu tibeac ge

¹⁷Ông nêl vô he wê susu tibeac ge bêga bê he i o kô he lec vô xomxo ên susu tibeac wê he vông ge lêm, di he i o vông nilô i loc vô susu wê ob vô nipaên lutîbed ge lêm. Nge, he i vông he nilô i loc vô Anutu, ên Anutu vông susu nivîha vihati vô il ên nêb i vông il xêdyaa i vô nivîha yang. ¹⁸Om ông nêl vô he wê susu tibeac ge bêga bê he i vông yuac nivîha ên i ngidu xomxo xôn, di he i vông yuac tige i vô levac, di he i vông susu vô xomxo wê nêl susu maên ge ên i ngidu he xôn. ¹⁹Ên he obêc vông bêge ge od tîyi xocbê he kituc susu nivîha wê ob vô nôn nivîha vô he timuên ge, di he obêc dô maviha luta lêc luta.

Timoti i viac yuac wê Anutu vông ge

²⁰Timoti, ông viac Anutu yuac wê vông vô ông ge i nivîha, di vô nimim vô kiyang vaxvax wê o tîyi Anutu xolac lêm ge. Di le i lêc ngô kiyang kityooên wê xomxo nêl ge lêm. Ên he so ên he nêb kiyang kityooên tige xovôên kehe. ²¹Xomxo ya vông nilô la vô kiyang kityooên tibêge, om he sea vông vinên wê he vông ge.

Xêyaa vin lecên wê Anutu vông ge i ngidu xam xôn.

2 TIMOTI

Pol kivuu kipihac wê vông yuu ge la vô Timoti

1 ¹A, Pol, Anutu vinoo a ên nêb a tu Yesu Kilisi nu sinale. Ilage Anutu hilu kiyang pyap bêga ên nêbê xomxo wê vông i vin Yesu ge obêc dô maviha luta léc luta. Om Anutu xovô kiyang wê hilu pyap ge di vông yuac sinale vô a ên nêb a la nêl Yesu Kilisi kiyang kitong.

²Timoti, a kivuu kipihac tiga vô ông. Ông ge a nug vông vinên wê a xêgyaa vin lec ông ge. Mag Anutu hixôn il lig Apumtau Yesu Kilisi, yuu i xo vîgwe pisiv ên ông di vông vizid nivîha hixôn kiyang malehe i loc vô ông.

Il nid ob yoc ên xolac lêm

³A mi timu vô Anutu môp di vông i yuac tiyi xocbê a mage buge vông ilage, di nipaên ti o yêp vac a nilôg lêm. Timoti, a xo ông di a pimil Anutu ên ông vac kitaaên wê a kitaa vidiiên yuu bucên vihati ge. ⁴Di a xo wê ông byag vô buc wê a sea ông ge, om a nêb a ob lôc vô ông i tii vac ên i vông a nilôg i vô nivîha. ⁵A xovô ên a nêbê vông vinên wê ông vông ge nôn di o kityooên lêm. Ilage ông bum vêx Lois yuu tam Yunis vông i vin tibêge, om a xovô ên a nêbê gwêbaga vông vinên wê ông vông ge tiyi xocbê yuu vông ge. ⁶Om a ob nêl vô ông bê ông xovô xêkizêc wê Anutu vông vô ông ilage i tii vac. Ông kô xêkizêc tige vô buc wê a vyax vigêg lec ông ge. Om gwêbaga ông kô xêkizêc tige di vông yuac ya. ⁷Ên Anutu o vông môp xonaên vô il lêm. Nge, vông xêkizêc wê i vông ge vô il di vông môp xêyaa vin lecên vô il, di vông il nilôd xovô môp yuu kiyang nivîha ên nêb il timu vô.

⁸Anutu vông xêkizêc wê i vông ge vô il, om ông nim i o léc yoc ên Apumtau Anutu kiyang wê ông ob nêl ge lêm. Di ông nim i o léc yoc ên

a ên wê tibii tung a lam dô vac kalabuhu lec Apumtau lê ge lêm. Nge, ông kilê viyin lec xolac hixôn a, di le xêkizêc vac viyin tige ya xêkizêc wê Anutu vông vô ông ge. ⁹Anutu vô il vêt ên il nêd nipaên di tyuc il ên nêb il timu vô môm ngibua wê i vông ge. Lêc o vô il vêt ên il nêd nipaên ên yuac ti wê il vông ge lêm. Nge, ilage wê Anutu gên o tung lag yuu kibun lêm ge, od ici va xo vîgwe pisiv ên il di xovô pyap ên nêb Yesu Kilisi ob yib ên il nêd nipaên. ¹⁰Di gwêbaga môm wê Anutu xo vîgwe pisiv ên il ge yêp seac vô il, ên wê Yesu Kilisi lam yib di vô il vêt ên il nêd nipaên ge. Yesu kitya xêkizêc wê yibên vông ge vêt di vông xolac nivihia vô il ên nêb kiyang wê nêbê il ob dô madviha luta ge i yêp seac vô il.

¹¹Anutu vînoo a ên nêb a tu sinale di la nêl xolac vô xomxo di tixuu he ya xolac tige. ¹²A vông yuac tibêge om tibii vông viyin wê a tulec gwêbaga ge vô a. Lêc a nig o yoc ên viyin tige lêm, ên a xovô xomxo ti wê a vông i vin i ge, di a xovô ên a nêbê xomxo tyo tiyi wê ob viac yuac wê vông vac a vîgêg ge i tiyi buc vihati di i miloc vô buc wê Yesu obêc vena lec ge.

¹³Ông timu vô kiyang nôn wê a nêl vô ông mi ông ngô ge, di vông i vin Yesu Kilisi xêkizêc ta, di ông xêmyaa i vin lec i, ên ông tu Kilisi xe pyap. ¹⁴Myakilôhō Ngibua dô vac il nilôd, om ông viac kiyang nôn wê Anutu vông vac ông vîgêm ge i nivihia ya xêkizêc wê Myakilôhō Ngibua vông ge.

¹⁵Timoti, ông xovô pyap ên ông nêbê Piselas yuu Hemosenis hixôn xomxo vông vinên vihati wê dô vac vîgwe levac Esia ge, he sea a. ¹⁶Lêc Onesipolas ge, a kitaa vô Apumtau lec i bêga bê i xo vîgwe pisiv ên Onesipolas yuu vinê di nue, ên mi ngidu a xôn di vông a nilôg vô nivihia lu tibeac di ni o yoc ên wê a lam dô vac kalabuhu ga lêm. ¹⁷Nge, buc wê Onesipolas val vîgwe Lom ga ge od vông yuac levac lec myagên a mi val yêvô a. ¹⁸Om a kitaa vô Apumtaubêga bê i xo vîgwe pisiv ên Onesipolas vô buc timuên wê Yesu obêc vena ge. Ông xovô pyap ên ông nêbê buc ilage wê a la dô Epesas ge Onesipolas mi ngidu a xôn ya môm nivihia tibeac.

Il tiyi xocbê Yesu Kilisi nue vevac

2 ¹A nug Timoti, Yesu Kilisi vông vizid nivihia vô ông pyap om ông hôm vizid wê i vông ge xôn pîlihi di le xêkizêc ya. ²Kiyang vihati wê a nêl vô xomxo tibeac di ông ngô hixôn ge, ông vông kiyang tigege vô xomxo wê ob ngô di viac nivihia ge ên he i loc nêl kiyang tigege vô xomxo ya ên he i ngô hixôn.

³Ông le xêkizêc i tiyi xocbê Yesu Kilisi nu vevac ti wê vông i yuac nivihia ge, di ông kilê viyin hixôn xe lec yuac tige. ⁴Xomxo ti wê kô yuac vevac ge ob vông yuac bangwe hixôn lêm. Nge, ob vông nilô vô yuac vevac tibeac ên nêb tibii levac wê viac i ge i yê yuac wê i vông ge nivihia. ⁵Di xomxo ti obêc nêb tup mi nginoo ge od ob tup i tiyi môm wê ob kô

nôn ge. Ên obêc ma ge od ob mila kô nô n wê tup ên ge lêm. ⁶Di xomxo ti obêc xin vê vac yuac di viac yuac nivihã ge od ob kô nô n mi ya tax. ⁷Om ông xovô kiyang tiga wê a nêl ga, ên Apumtau ob vông xovôên vô ông ên ông xovô kiyang vihati kehe.

⁸Ông xovô kiyang lec Yesu Kilisi i tii vac. Yesu pum lec Devit di yib di kidi lec maviha vac yibên. Kiyang tiga xolac nivihã wê a mi nêl ge. ⁹Lêc tibii yê a nipaên ên xolac tige, om vông viyin vô a di ku a xôn ya sen di vông a lam dô vac kalabuhu ga tiyi xocbê tibii nipaên ti. Lêc he tiyiên ma wê he ob ku Anutu kiyang xôn ge. ¹⁰Mêgem a le xêkizêc ta vac viyin, ên a nêb xomxo wê Anutu vinoo he ên nêb he i tu i nue ge he i ngô xolac di vông i vin Yesu Kilisi di dô maviha hixôn i vac Anutu ben lag puunê luta lêc luta.

¹¹Kiyang tiga nô n bêga ên nêbê

“Il obêc xib hixôn i ge od il obêc dô madviha hixôn i. ¹²Il obêc le xêkizêc vac viyin ge od il ob tu levac mi dô hixôn i. Lêc il obêc yax i vun ge od i êno ob yax il vun. ¹³Il obêc sea vông vinên wê il vông ge od i ob sea il lêm, ên o tiyi wê ob pilepac kiyang wê i vông ge lêm.”

Xomxo wê vông Anutu yuac vô nivihã ge

¹⁴Ông nêl kiyang tige vô xomxo ên he i xovô i tii vac nang, di ông le Apumtau manôn di nêl vô he bê he i o lêc vông vevac voma lec kiyang vaxvax lêm, ên môp tibêge ob vô nô n nivihã vô he lêm. Nge, ob vông he wê ngô kiyang tige vô nipaên.

¹⁵Ông vông yuac nivihã ên Anutu i yê ông nivihã i tiyi xocbê i nu yuac ti wê ông nêl xolac wê nô n ge bôbac di ông nim o yoc ên yuac tige lêm ge. ¹⁶Ông kol ông ên kiyang vaxvax wê nô n maên ge. Ên kiyang tige ob didii xomxo la vac nipaên di he ob vô nîmi vô Anutu kiyang, di ob vông môp tige vô levac. ¹⁷Kiyang nipaên wê he nêl ge ob vô levac tiyi xocbê kityax wê ob vô levac mi ya xomxo ninivi ma vêl ge. Haimenias yuu Pailitas, yuu mi vông bêge. ¹⁸Yuu sea kiyang nô n di nêl kiyang kityooên bêga ên nêbê, “Il kidi lec vac yibên pyap.” Yuu mi nêl bêge mi xomxo vông vinên ya ngô, om vông vinên wê he vông ge vô nipaên. ¹⁹Lêc Anutu xolac le xêkizêc xocbê teac le xêkizêc ge. Xolac bo ti nêl bêga ên nêbê, “Apumtau xovô xomxo wê tu i nue ge pyap.” Di ngwe nêl bêga ên nêbê, “Xomxo ti obêc nêl ên nêbê i tu Apumtau nu ti ge od i vô nîmi vô môp nipaên vihati.”

²⁰Vac xumac levac ti pile yuu dêg wê silva yuu gol ge vaci o dô vac lêm. Nge, dêg kibun yuu pile xax le vac hixôn. Dêg yuu pile ya vông yuac nivihã, di ya dô vaxvax. ²¹Mêgem xomxo vông vinên ti

obêc vô nîmi vô kiyang yuu môp nipaên di dô nivihã ge od tiyi xocbê pile yuu dêg wê vông yuac nivihã ge, ên xomxo tige vông nilô la vô

Apumtau di viac i pyap tiyi wê ob vông yuac nivihha wê Apumtau vông vô i ge vihati.

²²Om ông le teva ên môt nipaên vihati wê yêp vac xam ngivihi nilôm ên xam nêb xam ob vông ge. Di ông vông nilôm i loc vô môt nivihha, di môt vông vinên, di môt xêyaa vin lecên, di môt malehe hixôn. Om ông hixôn xomxo vihati wê xam xôn nilôm vô paha lec di xam kitaa vô Apumtau ge, xam vihati timu vô môt tibêgee. ²³Ông kol ông ên kiyang vaxvax wê xovôên nivihha ti o yêp vac lêm ge, ên kiyang tibêge wê ob vông xomxo kunacma di vông vevac vôm. ²⁴Xomxo ti obêc tu Apumtau nu yuac ge od i o vông vevac vô xomxo ya kiyang lêm. Nge, i lum nêl kiyang vô xomxo di tixuu he i nivihha ya xolac, di xêyaa i o vô myavinê vô xomxo wê vông viyin vô i ge lêm, ²⁵di i lum nêl kiyang vô he wê vông vevac vô xolac ge di titô he, ên mêd Anutu ob vông he pilepac he di he ob xovô kiyang nô. ²⁶Ilage Seten ku he xôn vac leac wê i vông ge di vông he timu vô ici va kiyang. Lêc he obêc xovô Anutu kiyang nô ge od he piyôp obêc yêp nivihha di he ob sea leac wê Seten ku he xôn ya ge.

Môt nipaên wê ob val vô buc timuên ge

3 ¹Ông xovô bêga bê vô buc myahipu ge od viyin tibeac obêc val. ²Ên xomxo ob timu vô môt nipaên bêga nêbê he ob xovô heche va, di he ob doma vô mone, di he ob yong heche va lê, di he ob kô he lec vô xomxo, di he ob nêl xomxo lê nipaên, di he ob vô ninya kitu vô tae mae, di he ob pimil xomxo wê ngidu he xôn ge lêm, di he ob la vac Anutu kiyang kwa ngibi lêm, ³di he ob vông nivihha vô lie lêm, di he xêyaa ob vô myavinê lec kiyang di hôm xôn, di he ob nêl kiyang nimi vaxvax, di he ob kol he ên môt nipaên wê he ninivi xovô ge lêm, di he ob vông xomxo vô nipaên, di he ob vông vevac vô môt nivihha vihati, ⁴di he ob kityoo lie di vông he la vac xomxo nipaên vigê, di he ob timu vô piyôp nipaên wê he vông ge lutibed, di he ob xovô heche va ên nêbê he xomxo levac, di he xêyaa ob vin lec Anutu lêm. Nge, he xêyaa ob vin lec môt toto wê ninivi xovô ge, ⁵di he ob yê da di kitaa lê, lêc he nêl vac mya pileva, ên he vô nimi vô Anutu hixôn xêkizêc wê i vông ge. Timoti, ông le teva ên he wê mi vông môt nipaên tibêgee. ⁶Ên he ya nêl xolac kityooên vô vêx wê o vông i vin xêkizêc lêm ge. Vêx tige mi vông môt nipaên wê vông he nilô vô viyin ge, di he vông piyôp la vô kiyang nipaên tibeac. ⁷Vêx tige mi ngô kiyang viyang viyang ge ên nêb he ob kô xovôên lec, lêc he o tiyi wê he ob xovô kiyang nô ge lêm. ⁸Ilage vux yuu lê nêbê Janis yuu Jamblis, yuu vông vevac vô Moses vac vigwe Isip. Di gwêbaga xomxo tige wê nêl kiyang kityooên vô vêx ge he tiyi xocbê Janis yuu Jamblis, ên he vông vevac vô kiyang nô, di piyôp wê he vông ge vô nipaên di he sea vông vinên wê nô ge. ⁹Lêc môt kityooên wê he vông ge ob vô levac lêm. Ên xomxo ob yê môt wê he vông ge ên nêbê môt yacyac, tiyi xocbê xomxo yê môt wê Janis yuu Jamblis vông ilage ên nêbê môt yacyac.

Pol nêl vô Timoti ên nêb i hôm Anutu kiyang xôn pilihi

¹⁰Ông dô hixôn a ila, om ông xovô kiyang pyap wê a tixuu xomxo ya ge, di ông xovô môp vihati wê a mi timu vô ge, di piyôp wê a vông ge, di môp vông vinên wê a vông ge, di ông xovô wê a mi lum nêl kiyang malehe vô xomxo, di a xo vîgwe pisiv ên he, di a le xêkizêc di kilê viyin vihati, ¹¹di ông xovô môp nipaên vihati wê tibii vông vô a ge hixôn viyin levac wê tulec a vac vîgwe Antiok yuu Aikoniam yon Listla ge. A tulec viyin yuu myavinê mabu yocên, lêc Apumtau vô a vêl ên viyin tigege vihati. ¹²Vixôhilôg nôn, tibii ob vông viyin yuu myavinê vô xomxo vihati wê nêb ob timu vô môp wê Yesu Kilisi vông ge. ¹³Di xomxo nipaên hixôn xomxo kityooên ob vông môp nipaên vô levac, di nipaên wê he vông ge ob viyum he xôn, di he ob kityoo xomxo tibeac, lêc Seten ob kityoo he.

¹⁴Lêc ông mô, kiyang nôn wê ông kô di vông i vin xêkizêc ge, ông hôm kiyang tige xôn pilihi, ên ông xovô xe vêx yuu vux wê xe tixuu ông ya kiyang tige, ¹⁵di ông xovô ên ông nêbê ilage ông gên dô nipwo, lêc ông kô xovôên lec Anutu kiyang di i val tyip lec gwêbaga hixôn. Anutu kiyang tiyi wê ob vông xovôên vô xomxo ên he i vông i vin Yesu Kilisi di i kitya he nên nipaên vêl. ¹⁶Anutu kiyang vihati wê yêp vac kipihac xolac ge, Anutu vaci vông vô xomxo mi he kivuu. Anutu kiyang tige nivîha tiyi wê ob vông xovôên vô il, di ob hilung il nêd nipaên vô il, di ob titô môp wê il vông ge, di ob tixuu il ya môp wê Anutu yê nêb nivîha ge. ¹⁷Om Anutu vông xolac vô il ên nêb i vông xovôên yuu xêkizêc vô il wê Anutu nue ge tiyi wê il ob vông yuac nivîha vihati ya ge.

Pol nêl vô Timoti ên nêb i nêl Anutu xolac nôn kitong

4 ¹Yesu Kilisi obêc yaxên xomxo vihati nên kiyang, he wê dô maviha hixôn he wê yib ge, di Yesu Kilisi ob vena le seac di tu xomxo vihati nên levac wê ob viac he luta ge. Om a le vô Anutu yuu Yesu Kilisi manôn di a nêl vô ông bêga bê ²ông nêl Anutu kiyang i tiyi buc vihati, di xomxo ob nêb ngô me ngôên obêc ma ge od ông nêl xolac vô he. Ông nêl xolac vô he i tiyi wê he ob ngô mi xovô di vông i vin, di ông nêl he nên nipaên kitong vô he ên i kitiv he nilô di he i pilepac he vêl ên môp nipaên wê he vông ge, di ông nêl kiyang wê ob ngidu he xôn ge, di môp wê ông ob lum nêl kiyang vô xomxo di tixuu he ya xolac ge, le i lêc sea môp tige lêm. ³Ên obêc buc timuên ge od xomxo ob nêb ngô kiyang nôn lêm. Nge, he ob timu vô môp wê heche va xovô ge, di vinoo xomxo wê ob tixuu he ya kiyang vaxvax wê he ngô nêb nivîha ge. ⁴Di he ob vô nîmi vô kiyang nôn di vô nînya vô kiyang wê pivulac pileva ge. ⁵Lêc ôcông va, ông piyôp i yêp nivîha i tiyi buc vihati, di ông kilê viyin, di ông loc nêl Kilisi kiyang vô tibii madîluhu ên he i ngô di vông i vin. Yuac wê Anutu vông vac ông vîgêm ge, ông vông yuac tigege vihati i vô nôn lec.

⁶Ên a ga, tibii madiluhu nêb ob hi a xib, om a hi ob kipyax sea di a ob tu xocbê daa vô Anutu. Om buc wê a ob xib di sea kibun ga ge vô kwabo lec. ⁷Vevac nivihia wê a vông ya xolac ge, a vông pyap. A tup vac môp vông vinên di la tiyôô lec myahipu. Di a o sea vông vinên wê a vông ge lêm. Nge, a hôm xôn pilihi. ⁸Om Apumtau viac nôn nivihia pyap ên nêb a ob kô. Nôn tige bêga nêbê i ob yê a nêb a xomxo nivihia. Om Apumtau wê yaxên xomxo ya môp bôbac ge obêc vông nôn tige vô a vô buc wê obêc vena lec ge. Lêc ob vông vô aca va tived lêm. Nge, ob vông vô xomxo vihati wê he xêyaa vin lec ên nêb he ob yê i vô buc wê obêc vena lec ge.

Kiyang viwen timuên

⁹Timoti, ông seb lam vô a lutibed, ¹⁰ên Klesens la vîgwe Galesia, di Taitas la vîgwe Dalmesia. Dimas vông nilô la vô susu kibun ga om sea a dô di la vîgwe Tesalonaika. ¹¹Luk tived wê dô hixôn a. Om ông loc kô Mak di muu lam vô a, ên Mak tiyi wê ob ngidu a xôn vac yuac ge. ¹²Tikikas ge, a vông i la Epesas.

¹³Ilage wê a la vîgwe Tloas ge od a sea a saket levac dô vac Kapas ben. Om buc wê ông obêc lam vô a ge od ông loc kô a saket tige mi lam, di kô a kipihac hixôn, di le i lêc lungên a kipihac wê he vông ya bwoc ninivi ge lêm. Nge, ông kô kipihac vihati mi lam hixôn.

¹⁴Aleksanda wê vông yuac lec ain siên ge vông nipaên levac vô a, om Anutu obêc vông myaviwen nipaên vô i lec nipaên wê i vông vô a ge. ¹⁵Om ông êno, ông viac ông ên xomxo tige, ên xêyaa vô myavinê ên nêb ob le vac kiyang nivihia wê il mi nêl ge xôn.

¹⁶Vô buc wê a la le vac kot taxlee ge, xomxo ti o le hixôn a di nêl kiyang wê ob ngidu a xôn ge lêm. Nge, he vihati sea a dô. Mêlêc a kitaa vô Anutu ên a nêbê i kitya he nêb nipaên wê he vông vô a ge vêl. ¹⁷He vihati sea a mi la, lêc Apumtau dô hixôn a di vông xêkizêc wê i vông ge vô a, om a nêl Kilisi xolac vihati yêp seac di tibii madiluhu wê lam le vac kot ge vihati ngô. Om tiyi xocbê Anutu vô a vêl ên noo laion mya. ¹⁸Apumtau obêc vô a vêl ên nipaên vihati wê xomxo nêb ob vông vô a ge, di obêc kô a mi la vac ben lag puunê di obêc viac a luta. Om il ob pimil i lê i yêp luta lêc luta. Nôn.

¹⁹Ông nêl vô Akwila yuu vinê Plisila hixôn Onesipolas he vinê nue bêga bê a nêl vidiiên vô he. ²⁰Elastas gên dô vac vîgwe Kolin, di Tlopimas vông yidac ti om a sea i vac vîgwe Mailitas mi i dô. ²¹Ông seb lam vô a lutibed, di le i lêc bin buc wê lun yuu ningigooên ob val lec ge lêm. Yubyulas yuu Pyudens di Lainas yuu Klodia hixôn lime vông vinên vihati vac vîgwe tiga, he nêl vidiiên vô ông.

²²Apumtau i ngidu ông xôn, di vizid nivihia wê i vông ge i viac xam vihati.

TAITAS

Kipihac wê Pol kivuu vô

Taitas ge

1 ¹A, Pol, a ga Anutu nu yuac ti, di Yesu Kilisi nu sinale a. Anutu vông a la vô xomxo wê i vinoo he ên nêb he i tu i nue ge ên nêb a la ngidu he xôn ên he i vông i vin xêkizêc, di he i xovô Anutu kiyang nôn wê ob didii he mi la vac môp wê Anutu vông ge, ²di he i xovô bê he obêc dô maviha luta lêc luta. Ilage wê Anutu gên o tung lag yuu kibun lêm ge od hilu kiyang pyap ên nêbê il obêc dô madviha luta lêc luta. Di Anutu o tiyi wê ob kityoo il ge lêm. ³Om buc wê Anutu nêl ge wê vông xomxo la nêl kiyang tige yêp seac. Anutu wê vô il vêl ên il nêd nipaên ge nêl ên nêb a êno kô yuac xolac nêlên tige.

⁴Taitas, a kivuu kipihac tiga vô ông. Ông ge a nug wê u xôn vông i vin ge. Mag Anutu yuu nu tuc Yesu Kilisi wê vô il vêl ên il nêd nipaên ge, yuu i vông vizid nivihax hixôn kiyang malehe i ngidu ông xôn.

⁵A sea ông vac vigwe Klit ên a nêbê ông dô vac Klit di vông yuac wê a vông ge myahipu i yêp nivihax, di ông vinoo he wê ob kô yuac gyovixa vac vigwe toto i tiyi wê a nêl vô ông ilage. ⁶Om ông yaxên he di vinoo he wê nipaên ti o yêp vô he lêm, di wê vinê tived, di wê nue vông i vin Yesu om xomxo ti o tiyi wê ob nêl bê xomxo tige nue mi vông môp nipipaa me vô ninya kitu vô tae mae ge lêm. ⁷Ên he gyovixa wê ob viac Anutu yuac, om he i timu vô môp nivihax ên xomxo i o lêc tulec he nêl nipaên ti lêm, di he i o lêc kô he lec vô xomxo lêm, di he xêyaa i o lêc vô myavinê lutived lêm, di he i o lêc num mi vô mavmav lêm, di he i o lêc hi xomxo vaxvax lêm, di he i o lêc doma vô mone i luu vêl lêm. ⁸Nge, he i kô tibii mi loc viac he vac xumac di vev ngwax vô he, di he xêyaa i vin lec môp nivihax vihati, di he i viac he piyôp i yêp nivihax, di he i dô i tiyi xocbê xomxo wê viac i nivihax ge, di he i timu vô môp wê Anutu vông ge vihati, di he i viac he nivihax ên môp vihati wê he xovô ên nêb ob vông ge, ⁹di he i hôm Anutu kiyang nôn wê

xomxo tixuu he ya ge xôn pilihi, ên he obêc hôm xôn pilihi ge od he tiyi wê he ob nêl xolac nôn vô tibii di hi he wê yax xolac vun ge nên kiyang i tô.

¹⁰Ên xomxo tibeac vac vîgwe Klit vô ninya kitu vô Anutu kiyang, di nêl kiyang vaxvax wê vông xomxo piyôp vô himena himena ge. He wê mi timu vô Yuda vông môm ninivi gôlên gee, he tibeac mi nêl kiyang tibêgee. ¹¹He nêb he ob kô mone yuu susu vô xomxo, om he tixuu he ya môm nipaên wê o tiyi wê il ob vông ge lêm. Om kiyang wê he nêl ge vông xomxo hixôn he tae mae lie vô nipaên. Mêgem ông le vac he xôn ên he i o nêl kiyang nipaên tibêge lêm. ¹²Ilage Klit levac ti nêl lec lie Klit bêga ên nêbê, “He Klit ge xomxo vîgwe kityooên, di he tiyi xocbê bwoc vimen ge, di he mi ya levac, di mi dô ni maên.” ¹³Kiyang tige vixôhilôg nôn. Om ông nêl he Klit nêl nipaên vô he ya kiyang xêkizêc ên vông vinên wê he vông ge i yêp bôbac, ¹⁴di he i o ngô pivulac pileva wê xomxo Yuda mi nêl ge lêm, di he i o ngô kiyang baba wê xomxo wê vô nimi vô Anutu kiyang nôn ob nêl ge lêm.

¹⁵Xomxo wê nilô paha ge ob yê susu vihati nêb nivîha. Lêc xomxo wê nilô ningeac wê o vông i vin Kilisi lêm ge, he ob yê susu ti nivîha lêm, ên piyôp yuu nilô vô ningeac tiyima. ¹⁶He mya mi nêl bêga en nêbê, “A xovô Anutu.” Lêc môm wê he vông ge nêl he kitong nêbê he mi yax Anutu vun. He mi vô ninya kitu vô Anutu kiyang, di he o tiyi wê he ob vông yuac nivîha ti ge lêm. Om Anutu yê he nipaên.

Kiyang lec kipwoc

2 ¹Taitas, ông lêc tixuu xomxo ya môm nivîha i tiyi xocbê Anutu kiyang nôn nêl ge. ²Om ông nêl vô he kipwoc bêga bê he i o lêc num mi vô mavmav lêm. Nge, he i timu vô môm nivîha tiyi wê ob vông xomxo yê he nivîha ge, di he i viac he piyôp i yêp nivîha, di he i vông i vin xêkizêc ta, di he xêyaa i vin lec xomxo, di he i le xêkizêc vac viyin vihati wê ob val vô he ge.

Kiyang lec vêxta yuu vêxwo

³Ông nêl vô he vêxta bêga bê he i timu vô môm i tiyi xocbê xomxo vông vinên vông ge, di he i o lêc nêl kiyang nipaên lec xomxo lêm, di he i o num mia xêkizêc di mia i viac he lêm. Nge, he i tixuu he vêxwo ya môm nivîha, ⁴ên he vêxwo gee i xovô mi timu vô môm nivîha bêga bê he xêyaa i vin lec liyae nue, ⁵di he i viac he piyôp i yêp nivîha, di he i o loc vô vux bangwe di vông môm nipaên lêm, di he i viac he xumac i nivîha, di he i ngidu xomxo xôn, di he i loc vac liyae kiyang kwa ngibi. He i timu vô môm tibêgee vihati ên xomxo ti i o nêl nipaên lec Anutu xolac lêm.

Kiyang lec ngivîhi

⁶Ông nêl vô he ngivîhi bêga bê he i viac he piyôp i yêp nivîha. ⁷Taitas, ôcông va ge ông timu vô môm nivîha ên he ngivîhi he i yê di timu vô

ông vixam. Di wê ông obêc tixuu he ya kiyang ge, od le i léc nêl kiyang kityooên hixôn lêm. Nge, ông vông piyôp i loc vô môm nivihha di vông ông yuac tige. ⁸Ông nêl kiyang nôn wê xovôên nivihha ge ên xomxo ti i o léc tulec nipaên ti i yêp vac lêm. Om xomxo obêc nêb vông vevac vô ông ya kiyang ge od he ni ob yoc ên he, ên he o tiyi wê ob nêl kiyang nipaên lec il ge lêm.

Kiyang lec xomxo wê tu xomxo levac nue yuac

⁹Ông nêl vô he wê tu xomxo levac nue yuac ge bêga bê he i loc vac xomxo levac wê viac he ge kwa ngibi, di vông he yuac vihati i nivihha i tiyi wê xomxo levac ob yê nivihha ge. Di he i o luu kiyang vô xomxo levac ya kiyang nipaên lêm. ¹⁰He i o léc vun xomxo levac susu lêm. Nge, he i vông he yuac vihati i yêp nivihha ên xomxo levac i yê bê he o vông yuac ti vô nipaên lêm. Ên nue yuac obêc vông bêge ge od xomxo ob yê xolac wê il mi nêl vô he ge nêb nivihha. Xolac tiga, Anutu wê vô il vêl ên il nêd nipaên ge kiyang nôn.

¹¹Ên môm wê Anutu xo viḡwe pisiv ên il ge lam yêp seac pyap. Môm tige tiyi wê ob vô xomxo vihati vêl ên he nêd nipaên, ¹²di ob tixuu il ya môm nivihha bêga nêbê il ob sea môm wê il vô nimid vô Anutu ge, di sea môm nipaên kibun ga, di kol il ên môm nipaên, di vông môm wê bôbac ge, di timu vô môm wê Anutu vông ge vihati i tiyi buc vihati wê il dô kibun ga ge. ¹³Il ob bin nôn nivihha ti wê ob vông il xêdyaa vô nivihha ge. Nôn tige bêga nêbê il Mag Anutu wê levac ge hixôn Yesu Kilisi wê vô il vêl ên il nêd nipaên ge obêc vena hixôn xêseac wê i vông ge di lam le seac vô il. ¹⁴Kilisi lam yib ên il ên nêb ob vô il vêl ên nipaên vihati yang di vông il vô paha lec, ên nêb il tu i nue wê xo vinux ên nêb il vông yuac nivihha ge.

¹⁵Om ông nêl kiyang tige vô xomxo vihati, di tipi vô he piyôp ên he i timu vô kiyang tige, di nêl he nêd nipaên kitong vô he. Le i léc vông xomxo ti i yê ông i tiyi xocbê xomxo vidaaên ge lêm.

Môm nivihha wê il ob timu vô ge

3 ¹Taitas, ông nêl vô tibii Klit bêga bê he i loc vac gavman hixôn xomxo levac vihati kwa ngibi, di ngô he vya, di he i viac he i tiyi wê he ob vông yuac nivihha vihati ge, ²di he i o nêl kiyang nipaên lec xomxo ti lêm, di he i o ngaênma lêm. Nge, he i lum nêl kiyang vô xomxo, di he i vông nivihha vô he vihati.

³Ên ilage il piyôp maên êno, di il vô ninyad kitu vô kiyang, di Seten didii il mi la vac môm nipaên, di il nilôd kidu il ên môm viyang viyang wê il xovô ên il nêb il ob vông ge, hixôn môm wê il nidnivi yê nivihha ge, om môm nipaên tibêgee viac il ilage, di il nilôd xo nipaên lec xomxo, di il do mad vô susu wê xomxo vông ge. Xomxo yê il nipaên, di il xê he nipaên. ⁴Il mi vông môm tibêgee ilage. Mêlêc Anutu wê vô il vêl ên il nêd nipaên

ge xêyaa vin lec il di vông niviha vô il. Om buc wê xêyaa vin lecên yuu niviha wê i vông ge lam yêp seac vô il madnôn, ⁵ge wê i vô il vêl ên il nêd nipaên. Lêc Anutu o vô il vêl ên il nêd nipaên ên yuac niviha ti wê il vông ge lêm. Nge, Anutu vaci xo vigwe pisiv ên il, om lipac il vô paha lec di il tu i nue paha, di Myakilôhô Ngibua vông il dô madviha. ⁶Yesu vô il vêl ên il nêd nipaên, om Anutu kipyax Myakilôhô Ngibua lam vô il luu vêl lec yuac wê Yesu Kilisi vông ge ⁷ên nêb môm wê i xo vigwe pisiv ên il ge i vông il tu xomxo wê Anutu ob yê niviha ge di vông il tu i nue di il dô bin buc wê il ob dô madviha luta lêc luta ge.

⁸Kiyang tige vixôhilôg nô. Om a nêl vô ông bêga bê ông nêl kiyang tige xêkizêc vô xomxo, ên he wê vông i vin Anutu ge he i vông nilô i loc vô yuac niviha vihati di le xêkizêc vac yuac tige. Yuac tige niviha di ob ngidu xomxo xôn.

⁹Ông lêc le teva ên kiyang vaxvax wê xomxo kunacma lec ge, di kiyang wê he nêl lec bue tivae lê ge, di kiyang higacên, di kiyang wê he ngaênma lec Moses xolac ge. Ông le teva ên kiyang tibêge, ên ob ngidu il xôn lêm di ob vô nô niviha vô il lêm.

¹⁰Xomxo ti obêc lam nêl kiyang ti wê ob vông xomxo vông vinên hibu sea mi la le kidu kidu ge od ông nêl i nê nipaên vô i manôn lu ti me lu yuu. Lêc ngôên obêc ma ge od ông vô nimim vô i, ¹¹ên ông xovô ên ông nêbê xomxo tibêge sea môm niviha di la vô môm nipaên, om nipaên wê ici va vông ge vông i vô nipaên di kitya i vêl.

Kiyang viwen timuên

¹²A nêb a obêc vông Atemas me Tikikas i loc vô ông vô buc timuên. Om buc wê yuu ngwe obêc val vô ông ge od ông sea vigwe Klit di seb lam vô a lutibed vac vigwe Nikopolis, ên a nêl pyap ên a nêb a ob dô vac Nikopolis tiyi dentuc wê lun yuu ningigooên ge. ¹³Xomxo ti lê nêbê Sinas ge wê i xovô môm wê gavman vông ge vihati. Ông vông Sinas yuu Apolos i loc lutibed, di ông ngidu yuu xôn êdêc susu ti i o lêc ma ên yuu vac môm lêm.

¹⁴A nêl vô il lige vông vinên vihati bêga bê he i le xêkizêc vac yuac vihati wê niviha ge ên i ngidu he xôn i tiyi buc vihati di i ngidu xomxo wê susu maên ge xôn êno. Om he i vông yuac niviha wê ob vô nô niviha ge, di he i o dô vidaaên lêm.

¹⁵Xomxo vihati wê dô hixôn a ge nêl vidiiên vô ông. Ông nêl vidiiên vô il lige vông vinên wê xêyaa vin lec il ge.

Vizid niviha wê Anutu vông ge i viac xam vihati.

PAILIMON

Kipihac wê Pol kivuu vô

Pailimon ge

¹A, Pol, hixôn il lig Timoti, xii kivuu kipihac ga vô ông Pailimon. Pailimon, ông ge xii lig yuac wê xii xêmyaa vin lec ông ge. Tibii vông a lam dô vac kalabuhu ên wê a mi nêl Yesu Kîlisi xolac ge, om a kivuu kiyang ga i loc vô ông, ²di i loc vô il lig vêx Apia hixôn, di i loc vô Akipas wê xe xôn mi vông yuac xolac xêkizêc ge, di i loc vô xomxo vông vinên vihati wê xam mi kitucma vac ông bom ge. ³Vizid nivîha yuu kiyang malehe wê il mag Anutu yuu Apumtau Yesu Kîlisi vông ge i hivun xam xôn.

Pailimon vông i vin Yesu di xêyaa vin lec lie vông vinên

⁴Pailimon, tiyi lec buc vihati wê a mi kitaa vô Anutu ge od a mi xovô ông vac kitaaên di a pimil Anutu ên ông, ⁵ên a ngô wê ông vông i vin Apumtau Yesu di ông xêmyaa vin lec xomxo vông vinên vihati ge. ⁶Il xôn vông i vin mi dô tibed vac xolac nilô, om a kitaa vô Anutu lec ông ên a nêb ông dô nivîha vac vông vinên, ên vyac xovô vizid nivîha vihati wê il kô vô Kîlisi ge. ⁷A lig Pailimon, ông xêmyaa mi vin lec lime vông vinên vihati di ông mi ngidu he xôn di vông he nilô vô nivîha, om môp wê ông vông ge vông a xêgyaa vô nivîha di vông a nilôg vô viyin maên.

Kiyang lec Onisimas

⁸Ông môp tibêge, mêgem a nêb a ob nêl kiyang ti vô ông. Ên môp nivîha ti yêp wê a nêb ông vông ge, di a tiyi wê a ob nêl xêkizêc lec Yesu lê bê ông vông môp tige lê, ⁹lêc a nêb a ob kidu ông lêm. Ên u xêdyaa vin lecma, om a nêb a ob lum nêl kiyang vô ông. A, Pol, a vô kipwoc di gwêbaga a lam dô vac xumac kalabuhu ên wê a mi nêl Yesu Kîlisi xolac ge, ¹⁰om a nêb a ob nêl vô ông lec a nug Onisimas. Ên a lam dô vac

kalabuhu lê, lêc Onisimas ngô Yesu xolac wê a mi nêl ge di vông i vin, om tu a nug vông vinên ti. ¹¹Vixôhilôg, ilage Onisimas tu ông num yuac pileva, lêc o vông yuac nivaha wê ob ngidu ông xôn ge lêm. Lêc gwêbaga tiyi wê ob vông yuac nivaha wê ob ngidu u xôn ge.

¹²A xêgyaa vin lec Onisimas luu vêl, lêc gwêbaga a vông i lôc ên a nêb i lôc vô ông. ¹³Tibii vông a lam dô vac kalabuhu ên wê a mi nêl Yesu xolac ge, om a nêb Onisimas i tu ông mamnôn di dô hixôn a ên viac a vac kalabuhu. ¹⁴A xo bêga lê, lêc a nêb ông obêc lee yuu lec lêm ge od a ob hôm Onisimas xôn lêm. Ên a nêb a ob kidu ông bê ông vông môp tige lêm. Nge, a nêb ôcông va xovô nivaha wê ông ob vông vô a ge, lêc vông.

¹⁵Ilage Onisimas pec ên ông di lam dô teva ên ông nipwo tya, lêc kehe bêga bê obêc lôc mi loc vô ông di muu dô luta. ¹⁶Lêc gwêbaga Onisimas obêc milôc dô xocbê ông num yuac ilage lêm. Nge, obêc dô tiyi xocbê u lig vông vinên ti wê u xêdyaa vin lec i ge. Ên a ga, a xê i tiyi xocbê a lig wê a xêgyaa vin lec i ge, lêc ông ge, ông xêmyaa obêc vin lec i luu vêl, ên Onisimas ge ông num yuac wê ob vông yuac vô ông ge, di i ge ông lim vông vinên êno.

¹⁷Mêgem ông obêc xovô bê a ga ông lim wê u xôn mi vông yuac xolac ge od ông lêc viac Onisimas nivaha i tiyi xocbê ông viac a nivaha ge.

¹⁸Lêc Onisimas obêc vông ông susu ti vô nipaên ilage, me myaviwen ti obêc yêp vô i ge od aca va obêc vông vac. ¹⁹Mêgem a Pol, aca va kivuu kiyang ga ya vigêg bêga bê a obêc hi myaviwen wê Onisimas vông ge. Vixôhilôg, myaviwen wê a nêl xolac vô ông ilage yêp vô ông lê, lêc a ob nêl kiyang lec tige lêm. ²⁰A lig Pailimon, u xôn vông i vin Kîlisi, om a nêl lec Apumtau lê bê ông vông nivaha vô a di vông a nilôg i vô viyin maên.

²¹Kiyang wê a kivuu vac kipihac ga, a xovô ên a nêbê ông obêc ngô di vông i vô nôn lec, di a xovô hixôn bê ông obêc vông môp nivaha ya hixôn i luu kiyang wê a nêl ga vêl. ²²Di kiyang ngwe, a nêb ông viac xumac nilô wê a ob dô vac ge ti, ên a vông i vin ên a nêb Anutu ob ngô kitaaên wê xam mi kitaa lec a ge di ob vông a lôc mi loc vô xam.

²³Eaplas wê xii xôn dô vac kalabuhu ga lec wê xii mi nêl Yesu Kîlisi xolac ge, i mi xo ông om nêl vidiiên vô ông. ²⁴Mêd Mak yuu Alistakas di Dimas yuu Luk, he ma ti wê xe xôn vông yuac xolac ge, he êno nêb ob nêl vidiiên vô ông. ²⁵Xêgyaa vin lecên yuu vizid nivaha wê Apumtau Yesu Kîlisi vông ge i viac xam.

HIBLU

Kipihac wê la vô tibii Hiblu ge

Anutu nu tuc kô i kiyang mi lam nêl vô il

1 ¹Ilage Anutu nêl i kiyang vô plopete tiyi buc tibeac ên nêb he i loc nêl vô il buge ên he i ngô. Om wê Anutu nêl i kiyang vô plopete ilage, od o timu vô môp tived lêm. Nge, timu vô môp toto di nêl i kiyang vô he. ²Lêc buc timuên viwen gwêbaga Anutu vông môp paha bêga nêbê vông nu tuc lam ên nêb i lam nêl Anutu kiyang i yêp seac vô il. Ilage Anutu nêl om nu tuc tung lag yuu kibun, di Anutu vînoo i pyap ên nêb ob nêl nu tuc lê lec susu lag yuu kibun vihati. ³Xêseac wê Yesu vông ge tiyi xocbê xêseac wê Anutu vông ge, di Yesu hixôn Anutu, yuu xôn tiyima. Di kiyang wê Yesu vông ge xêkizêc om ngidu susu lag yuu kibun vihati yang ge xôn di vông he dô xêkizêc. Yesu lam yib ên nêb ob vô xomxo vêl ên he nên nipaên. Pyap dêc lax mi la dô vô Anutu vigê hiyôv gê kisii ganê.

Anutu nu tuc nginoo angela vêl

⁴Anutu vông lê levac vô nu tuc om nu tuc nginoo angela vihati vêl, ên lê levac wê Anutu nu tuc vông ge luu angela lê vêl. ⁵Ilage Anutu nêl vô nu tuc ên nêbê,

“Ông ge a nug, di gwêbaga a vông ông lêm vô levac.”

Anutu nêl bêge. Nang di nêl vô nu tuc tii vac nang ên nêbê,

“A tu ông mam, di ông tu a nug.”

Anutu nêl bêge, lêc o nêl bêge vô angela ti lêm. Nge, nêl vô nu tuc tived. ⁶Om vô buc wê Anutu nêb obêc vông nu tuc lam kibun ga ge od Anutu nêl ên nêbê,

“Angela wê a vông ge, he vihati i yev vixa kitu vô a nug tuc.”

⁷Nang dêc nêl kiyang lec angela tii vac nang bêga ên nêbê,

“Angela wê a vông ge tu a nuge yuac, om a obêc nêl ge od he obêc tiyi xocbê lea, me he obêc tiyi xocbê ngwax mahelac di ob la vông yuac tiyi xocbê a nêl ge.”

⁸ Anutu nêl vô angela ên nêbê he tu i nue yuac, lêc nêl vô nu tuc bêga ên nêbê,

“O Anutu, ông tu xomxo nên levac wê ông obêc dô luta lêc luta, di ông viac nume vihati ya kiyang yuu môp bôbac. ⁹ Ông xêmyaa mi vin lec môp niviha vihati, dom kiyang yuu môp nipaên ge vông ông xêmyaa vô myavinê. Mêgem a wê ông Anutu a ge, a vinoo ông di vông ông xêmyaa vô niviha luu wê a vông vô lime ge vêl.”

¹⁰ Nang dêc Anutu nêl vô nu tuc tii vac nang ên nêbê,

“Apumtau, vô buc taxlee ge ôcông va tu kibun kehe, di ôcông va vigêm tung lag hixôn. ¹¹ Obêc buc ti ge od susu lag yuu kibun vihati yang xôa obêc ma, dom ông obêc dô luta. Susu lag yuu kibun vihati obêc vô tikwê tiyi xocbê nivimihi tikwê ge, ¹² om ông obêc vilun he i tiyi xocbê xomxo vilun nivimihi tikwê ên nêb ob nêx i la vêl ge, di ông obêc pilepac he vô paha lec. Dom ôcông va ge, ông obêc pilepac lêm. Nge, ông obêc dô tiyi xocbê ông dô gwêbaga di ông obêc dô luta lêc luta.”

¹³ Nang dêc Anutu nêl ên nêbê,

“Ông lam dô vô a vigêg hiyôv, di i loc tyip vô buc wê a obêc vông xomxo wê vông vevac vô ông ge he i lam dô vac ông kwa ngibi.”

Anutu nêl bêge, lêc o nêl vô angela ti lêm. Nge, nêl vô nu tuc tived, ¹⁴ ên angela ge Anutu nue yuac wê tiyi xocbê myakilôhê ge. Om Anutu vông yuac vô he ên nêb he i loc ngidu xomxo wê Anutu ob vô he vêl ên he nên nipaên ge xôn.

Il ob vô ninyad vô Yesu kiyang

2 ¹ Yesu nginoo angela vêl, om a ob nêl vô xam bê kiyang wê il ngô pyap ge il ob hóm xôn pilihi di seaên kiyang tige i ma. ² Ilage Anutu nêl i xolac vô angela di vông he lam nêl kitong vô xomxo kibun ga. Kiyang wê he lam nêl ge vixôhilôg nô. Ilage xomxo wê ngôên angela kiyang ma di vô nimi vô ge, he vihati kô myaviwen tiyi wê he vông ge. ³ Lêc Yesu lê nginoo angela vêl di Yesu vông vizid levac vô il ên wê vô il vêl ên il nêd nipaên ge. Om il obêc vô nimid vô vizid levac tige ge od il ob pec ên myaviwen nipaên wê Anutu ob vông vô il ge tibêna? Apumtau Yesu nêl taxlee ên nêbê obêc kitya il nêd nipaên vêl, di xomxo wê ngô Yesu vya ge nêl kitong vô il hixôn ên nêbê, “Kiyang tige vixôhilôg nô.” ⁴ Mêdêc Anutu nêb ob ngidu kiyang tige xôn, om vông do levac viyang viyang hixôn xêkizêc manôn toto, di vông xovôên toto wê Myakilôhê Ngibua vông ge vô xomxo toto tiyi xocbê ici va xovô ên nêb ob vông vô he ge.

Yesu tu il badzub wê vô il vêl ên il nêd nipaên ge

⁵ A ob nêl kiyang lec môp wê Anutu obêc vông gê kibun ga vô buc timuên ge. Anutu o nêl vô angela ên nêbê he ob tu levac di viac kibun vô buc tige lêm. ⁶ Nge, kiyang yêp vac xolac bêga ên nêbê,

“O Anutu, xomxo ga xomxo kibun, léc bêna léc ông xo he? Di he ge xomxo kibun nu, léc bêna léc ông viac he?”

⁷ Vô buc myabo tya ông vông xomxo kibun ga la dô vac angela kwa ngibi. Nang dèc ông vông he lê vô levac di hôm he lê lec,

⁸ di ông vông susu vihati la vac he kwa ngibi.”

Xolac nêl bêge, om il ob xovô bê Anutu tung susu vihati dô vac xomxo kwa ngibi, om susu ti o dô vaxvax lêm. Léc gwêbaga il o xê wê susu vihati dô vac xomxo kwa ngibi ge lêm. ⁹Nge, il xovô Yesu môci. Ilage Anutu lee yuu ên nêbê Yesu i loc dô vac angela kwa ngibi i tiyi buc myabo wê i lam dô kibun ga ge. Anutu xo vîgwe pisiv ên il om vông Yesu lam yib ên il vihati nêd nipaên. Yesu kilê myavinê levac di yib, mêgem Anutu yong Yesu di vông lê levac vô i.

¹⁰ Anutu tung susu lag yuu kibun vihati ên nêb he i vông i lê i vô levac. Di Anutu nêb ob vông xomxo tibeac i tu i nue mi tung he la dô vac xêseac wê i vông ge. Mêgem vông Yesu lam kilê myavinê levac ên nêb myavinê wê i kilê ge i vông i tu il nêd mugên wê ob vô il vêl ên il nêd nipaên ge. Om Anutu piyôp wê vông Yesu lam kilê myavinê ge, ge môp nivîha. ¹¹ Il ge Anutu nue il, ên wê Yesu kitya il nêd nipaên vêl di vông il tu xomxo ngibua ge. Mêgem il xôn Yesu, il Mag tived. Om Yesu nêl il ên nêbê i lie il, di i ni o yoc ên wê nêl bêge lêm. ¹² Om Yesu nêl vô Anutu bêga ên nêbê,

“A obêc nêl ông lêm i yêp seac vô lige, di a obêc vông lilo wê ob pimil ông lêm vô levac ge vac lige vông vinên mahigun.”

¹³ Nang dèc Yesu nêl tii vac nang ên nêbê,

“A vông i vin bêga ên a nêbê Mag Anutu ob ngidu a xôn.”

Yesu nêl bêge, nang dèc nêl i tii vac nang ên nêbê,

“Wê lê. A dô ga, di Anutu nue wê vông vô a ge dô hixôn a.”

Yesu lam tu xomxo kibun xocbê il ga

¹⁴ Il wê Anutu nue ge, il xomxo kibun wê il nidnivi kibun. Om Yesu êno lam kô ninivi kibun ga tiyi il nidnivi, di yib ên nêb yibên wê i vông ge i kitya Seten hixôn xêkizêc wê i vông ge i loc vêl, ên xêkizêc wê Seten vông ge didii xomxo vac yibên. ¹⁵ Buc vihati wê xomxo dô maviha lec kibun ga ge, he vihati xona ên buc wê he ob yib lec ge, om xonaên tige hôm he xôn. Mêgem Yesu lam yib ên nêb ob piwelac he vêl ên xonaên ên yibên. ¹⁶ Il ob xovô bê Yesu o lam yib ên nêb ob ngidu angela xôn lêm. Nge, lam yib ên nêb ob ngidu Eblaham bue il xôn. ¹⁷ Anutu vông Yesu lam tu xomxo kibun ga xocbê il ge, di Yesu kô viyin yuu nipaên vihati tiyi xocbê il kô ge. Yesu vông bêge om tu il xomxo levac wê mi vông daa vô Anutu ên nêb i kitya xomxo nêd nipaên vêl, tiyi xocbê xomxo Islel daa

siên nêñ levac wê Hetplis^a ge vông ilage. Om Yesu tu il nêñ Hetplis wê xo vîgwe pisiv êñ il dî vông yuac wê Anutu vông vô i ge vô nôn lec, dî vông ici va tu daa vô Anutu êñ nêñ i kitya il nêñ nipaên vêl dî kitya ni nyagên wê Anutu xo lec il ge vêl êno. ¹⁸Buc wê Yesu lam dô kibun ga ge od viyin yuu myavinê toto tulec i dî yaxên i, om gwêbaga viyin yuu myavinê obêc tulec il ge od Yesu tiyi wê ob ngidu il xôn ge.

Yesu kô lê levac luu Moses lê vêl

3 ¹Xam lige vông vinên wê Anutu vînoo xam êñ nêñ xam obêc dô hixôn i vac i ben kisiinê ge, xam xo Yesu pilihi, êñ Yesu ge il Sinale yuu Hetplis^b wê il vông i vin i dî nêl i lê yêp seac. ²Anutu vînoo Yesu êñ nêñ i kô yuac tige, om Yesu vông i tiyi dî o sea yuac tige lêm, tiyi xocbê Moses vông yuac wê Anutu vông vô i êñ nêñ i vông vac Anutu nue Islel mahigun ge. ³Lêc Anutu vông Yesu lê vô levac luu Moses lê vêl. Êñ il ob nêl xumac ti lê i vô levac lêm. Nge, xomxo ti wê lox xumac tige, il ob nêl i lê i vô levac luu xumac vêl. ⁴Êñ xumac vihati wê le lec kibun ga ge, xomxo toto lox, lêc Anutu ge wê tung susu vihati yang. ⁵Moses vông yuac wê Anutu vông vô i ge vô nôn lec vac Anutu nue Islel mahigun. Yuac wê Moses vông ge bêga nêbê nêl yuac wê Anutu nêñ ob vông timuên ge kitong. Om Moses vông yuac tiyi xocbê Anutu nu yuac ti. ⁶Dom Kilisi ge Anutu nu nôn, om o vông yuac tiyi xocbê Anutu nu yuac ti lêm. Nge, vông yuac tiyi xocbê ma ob vông vô nu ti. Om tu Anutu nue nêñ levac dî vông yuac wê Anutu vông vô i ge nivihia. Mêgem il obêc hôm vông vinên wê il vông ge xôn pilihi dî dô hixôn xêdyaa nivihia dî bin vizid wê Anutu nêñ obêc vông vô il ge od ge wê il obêc dô i tiyi Anutu nue.

Xomxo Islel o tulec seac dô vêlên lêm

⁷Ngô lê. Myakilôhông Ngibua nêl vac xolac bêga êñ nêbê,
 “Gwêbaga xam obêc ngô Anutu kiyang ge ⁸od le i lêc vông i tiyi xocbê bume Islel vông ilage lêm, êñ a nêl a kiyang vô bume Islel vac vîgwe myadongên, lêc he vô ninya kitu vô êñ he nêñ ob yaxên a.
⁹He dô vac vîgwe myadongên tiyi klismas kehe yuu, dî yê yuac wê a vông vac he mahigun ge. Lêc he lungên a nang, dî he vông môt nipaên nang nêñ ob yaxên a.

^a 2:17 Lê Hetplis ge nêl lec xomxo Islel ti wê tu xomxo daa siên nêñ levac ge. Yuac wê xomxo tige vông ge bêga nêbê la vac Anutu xumac ngibua nilô ngwe wê ngibua nôn ge mî la si daa vô Anutu êñ nêñ i kitya he Islele vihati nêñ nipaên vêl. Lêc o vông vô buc tibeac lêm. Nge, vông lu tibeac vac klismas ti. Vac kîpihac wê Matyu, Mak, Luk dî Jon kivuu lec Yesu Kilisi ge od xe kivuu xomxo tige lê bêga nêbê xomxo daa siên nêñ levac, me xomxo wê mî si daa ge nêñ levac. Lêc vac kîpihac Hiblu ga kiyang tige yêp tibeac om xe kivuu myabo bê Hetplis. ^b 3:1 ông wê Hiblu 2:17.

10 Mêgem a nig nyag vô he, ên he vông nilô la vô môt nipaên di he o ngô a kiyang mi timu vô lêm.

11 A nilôg vô myavinê vô he, om a nêl vixôhilôg nôl bê he obêc lam dô seac vêl hixôn a lêm.”

12 Anutu nêl bêge, om xam lige, xam viac xam, gec lêc xam divông nilôm la vô môt nipaên di sea vông vinên wê xam vông ge di vô nimim vô Anutu maviha. 13 Buc wê Anutu nêl ilage ên nêbê, “Gwêbaga”, ge Anutu o nêl lec buc ilage tived lêm. Nge, nêl lec gwêbaga hixôn. Om buc vihati ge, xam nêl kiyang nivaha wê ob ngidu xam xôn ge voma, êdêc môt nipaên i o lêc kityoo xam di vông xam nilôm i le teva ên Anutu lêm. 14 Ên ilage il ngô Kilisi kiyang di vông i vin. Om gwêbaga il ob hôm vông vinên wê il vông ge xôn pilihi di i loc tyip vô buc wê il ob xib lec ge. Il obêc vông bêge ge od il obêc la dô madviha hixôn Kilisi.

15 Om xam ngô Anutu kiyang i tii vac nang wê nêl ên nêbê,
“Gwêbaga xam obêc ngô Anutu kiyang ge, od le i lêc vông i tiyi xocbê bume Islel vông ilage lêm. Ên a nêl a kiyang vô he lêc he vô ninya kitu vô.”

16 Ilage xomxo letyae ngô Anutu kiyang lêc vô ninya kitu vô? Ge he wê Moses kô he vêl vac vîgwe Isip mi didii he mi la vac vîgwe myadongên ge. 17 Di Anutu xêyaa vô myavinê vô xomxo letyae tiyi klismas kehe yuuê? Anutu xêyaa vô myavinê vô he Islel wê vông môt nipaên vac vîgwe myadongên ge, om hi he yib mi he ninivi yêp vac vîgwe myadongên. 18 Di Anutu nêl kiyang vixôhilôg nôl vô letyae ên nêbê he ob la dô seac vêl hixôn i lêmê? Anutu nêl kiyang bêge vô he Islel wê o ngô kiyang wê i vông ge lêm. 19 Mêgem il ob xovô bê he o vông i vin lêm om he o tiyi wê he ob la dô seac vêl hixôn Anutu ge lêm.

Seac dô vêlên ge yêp vô Anutu

4 1 Ilage Anutu hilu kiyang mi i yêp pyap. Kiyang tige nêl ên nêbê,
“Xam obêc lam dô seac vêl hixôn a.” Kiyang nêl bêge, om il ob xona nêd di viac il, ên Anutu obêc yê vông vinên wê il vông ge tiyiên ma ge od il obêc la dô seac vêl hixôn i lêm. 2 Ên Anutu xolac nivaha lam vô il tiyi xocbê lam vô xomxo Islel ilage. Lêc kiyang tige o ngidu he xôn lêm. Ên he ngô lê, lêc he o vông i vin lêm. 3 Lêc il wê il vông i vin Anutu kiyang tige, il obêc la dô seac vêl hixôn Anutu. Lêc Anutu nêl kiyang lec he wê o vông i vin lêm ge bêga ên nêbê,

“A nilôg vô myavinê vô he, om a nêl vixôhilôg nôl bêga bê he ob lam dô seac vêl hixôn a lêm.”

Anutu nêl bêge lec seac dô vêlên wê i vông ge, ên taxlee wê Anutu tung lag yuu kibun hixôn susu vihati pyap ge od o vông yuac ti tii vac lêm. Nge, dô seac vêl di viac vô vîgwe wê il ob la dô seac vêl lec ge. 4 Om buc wê vông vîgê vilu di sec yuu ge, kiyang yêp lec buc tige vac xolac bêga ên nêbê,

“Anutu vông i yuac vihati tiyi buc vigê vilu di sec ti. Pyap dêc buc ti wê vông vigê vilu di sec yuu ge od dô seac vêl.”

⁵Nang dêc Anutu nêl lec he wê o vông i vin lêm ge bêga ên nêbê, “He obêc lam dô seac vêl hixôn a lêm.”

⁶Ilage he Islel vô ninya kitu vô Anutu kiyang niviha, mêgem he o la dô seac vêl hixôn Anutu lêm. Kiyang wê Anutu hilu ilage ên nêbê xomxo obêc la dô seac vêl hixôn i ge, kiyang tige yêp vô il gwêbaga hixôn.

⁷Ên he Islel vô ninya kitu vô Anutu kiyang. Om Anutu vinoo buc paha gwêbaga ên nêbê il ngô i kiyang di vông i vin êdêc la dô seac vêl hixôn i. Anutu nêl buc tige ên nêbê buc gwêbaga. Klismas tibeac lam la vêl, lêc kiyang wê a nêl pyap ge, Anutu nêl tii vac vô Devit, om Devit nêl kiyang tyo yêp seac tii vac nang bêga ên nêbê,

“Gwêbaga, xam obêc ngô Anutu kiyang ge, od le i lêc vô ninya kitu vô lêm.”

⁸Ilage xomxo Islel la dô vac vigwe myadongên, mêd Josua didii he mi la vac vigwe paha. Josua obêc didii he mi he la dô seac vêl hixôn Anutu ge od Anutu ob nêl kiyang lec buc paha ngwe lêm. Lêc Josua o vông vigwe seac dô vêlên vô he lêm. Om Anutu nêl buc paha wê xomxo ob la dô seac vêl hixôn i ge. ⁹Om il xovô ên il nêbê Anutu viac buc timuên wê nue obêc la dô seac vêl hixôn i ge. Buc seac dô vêlên tige tiyi xocbê buc da wê il mi dô seac vêl lec ge. ¹⁰Om xomxo wê ob la dô seac vêl hixôn Anutu ge, he ob la vông yuac ti tii vac lêm. Nge, he yuac tiyôd om he obêc dô seac vêl i tiyi xocbê Anutu wê tung lag yuu kibun pyap di dô seac vêl ge. ¹¹Mêgem a ob nêl bê il ob vông yuac xêkizêc êdêc la dô seac vêl hixôn Anutu, ên xomxo ti obêc timu vô Islel vông môp ilage di vô nimi vô Anutu kiyang ge od o tiyi wê obêc la dô seac vêl hixôn Anutu ge lêm.

¹²Xam xovô bêga bê Anutu kiyang ge maviha di luu yipac wê manôn vilu vilu ge vêl, om vông yuac xêkizêc vac il nilôd tiyi xocbê il gôl bwoc ya yipac di susu wê dô vac nilô nilô ge yêp seac. Anutu kiyang êno vông yuac vac il nilôd di vông kiyang yuu môp wê yêp vac il nilôd ge yêp seac vô il mi il xovô. ¹³Xomxo hixôn susu wê Anutu tung ge, ti o tiyi wê ob xôpac ên Anutu ge lêm. Nge, vihati le seac vô Anutu manôn, di i yê kiyang yuu môp wê yêp vac il nilôd ge vihati, di Anutu vaci wê ob yaxên il toto môp yuu nilôd.

¹⁴Il nêd xomxo levac dô wê kô lê Hetplis^c mi la dô kisii ganê. Ge Yesu wê Anutu nu tuc ge. Il xovô bêge om il ob hôm vông vinên wê il vông ge xôn pilihi. ¹⁵Ên buc wê il nêd Hetplis Yesu lam dô kibun ga ge od viyin yuu yaxên vihati tulec i tiyi xocbê tulec il gwêbaga, lêc i o vông nipaên ti lêm. Il nêd xêkizêc ti o yêp wê il ob vông vevac vô nipaên ya ge lêm, lêc Yesu tulec yaxên vihati tiyi xocbê il mi yaxên ge om xovô di xo vigwe

^c 4:14 ông wê Hiblu 2:17.

pisiv ên il. ¹⁶Il xovô bêge, mêgem il ob la kwabo vô Anutu wê vizid nivihha kehe ge, di il ob xona ên i lêm. Nge, il ob kitaa vô i vô buc wê il tulec viyin ge, ên Anutu i xo vigwe pisiv ên il di vông vizid nivihha wê i vông ge i ngidu il xôn.

Yesu ge Hetplis wê kitya il nêd nipaên vêl ge

5 ¹Hetplis ge xomxo Islel ti wê Anutu vînoo i ên nêb i tu Hetplis, om yuac wê i vông ge bêga nêbê tu Islel vihati manôn di la le vô Anutu manôn. Om mi tung daa di si daa vô Anutu ên nipaên wê he Islel vông ge. ²Lêc xomxo tige, xomxo xêhelehe wê môp nipaên tixuu i tiyi xocbê tixuu il ge. Om ob lum nêl kiyang vô xomxo wê lungên môp nivihha di sea Anutu vông môp mi la vac nipaên ge. ³Om buc wê obêc tung daa vô Anutu ên nipaên wê lie Islel vông ge, od ob tung daa ên nipaên wê ici vông ge hixôn.

⁴Lê levac wê nêbê Hetplis ge, xomxo ti o tiyi wê ici va ob kô lê tige lêm. Nge, Anutu vaci wê ob vînoo xomxo Hetplis tige, tiyi xocbê Anutu vînoo Elon ilage ên nêb i tu Hetplis wê mugên taxlee ge.

⁵Kilisi êno o yong ici va ên nêb ob tu Hetplis lêm. Nge, Anutu vaci vînoo i ên nêb i kô yuac Hetplis, di nêl vô i ên nêbê,

“Ông ge a nug ông, om gwêbaga a ob vông ông lêm i vô levac.”

⁶Nang dêc Anutu nêl vô Yesu tii vac nang ên nêbê,

“Ông kô yuac Hetplis wê ob yêp luta tiyi xocbê Melkisedek ge.”

⁷Vô buc wê Yesu lam dô kibun ga ge, od kitaa vô Anutu ên nêb i vô i vêl ên môp wê ob yib ge, di tyuc la kisii di byag hixôn. Yesu ngô ma Anutu kiyang di dô vac i kwa ngibi, om Anutu ngô kitaaên wê i vông ge. ⁸Yesu ge Anutu nu, lêc kilê myavinê levac, di myavinê tige vông i vô ninya lehe vô Anutu kiyang, ⁹di vông i tu xomxo wê nipaên ti o yêp vô i lêm ge. Mêgem xomxo wê ngô Yesu kiyang mi timu vô ge, Yesu ob tu he nêb levac wê ob kitya he nêb nipaên vêl di vông he la dô vac nivihha wê luta lêc luta ge. ¹⁰Anutu vînoo Yesu ên nêb i tu Hetplis tiyi xocbê Melkisedek ge.

Il ob dô tiyi xocbê nipipwo lêm

¹¹Xe nêb xe ob nêl kiyang tibeac vô xam lec Melkisedek, lêc xam ob xovô kiyang paha decdec lêm. Om xam vông yuac levac vô xe wê xe ob nêl kiyang tige kehe kitong vô xam ge. ¹²Xam ngô xolac mi xovô ilatikwê tiyi wê xam ob nêl xolac vô xomxo gwêbaga. Lêc xam o tiyi lêm. Om xomxo ob nêl xolac wê o viyin lêm wê xam ngô ilage i tii vac vô xam. Xam o tiyi xocbê xomxo levac wê ob ya yaên xêkizêc ge lêm. Nge, xam tiyi xocbê nume nipipwo wê gên lul ge. ¹³Ên Anutu kiyang wê viyin ge, xomxo vông vinên wê o vvac xovô kiyang tige lêm ge, he tiyi xocbê nipipwo wê gên lul ge, om he tiyiên ma wê ob yaxên môp nivihha

di nipaên ge. ¹⁴Dom xomxo wê xovô Anutu kiyang wê viyin ge, he tiyi xocbê xomxo levac wê ya yaên xêkizêc ge. Ên he mi yaxên môp wê he vông ge tiyi buc vihati, om he tiyi wê he ob yaxên môp vihati mi xovô bê nivihâ me nipaên.

Kilisi kiyang wê viyin maên ge

6 ¹⁻²Kilisi kiyang wê xam ngô ilage o viyin lêm om xam ngô mi xovô pyap. Ên kiyang wê viyin maên ge nêl bêga ên nêbê il sea môp wê ob vông il vô nipaên ge di vông nilôd i loc vô Anutu, di vông i vin i. Nang dêc Kilisi kiyang taxlee wê viyin maên ge nêl môp lipacên yuu môp wê xomxo vyax vigê lec lie bazub ge kitong, di nêl ên nêbê xomxo yibên obêc kidi lec maviha, di Anutu ob yaxên xomxo nipaên di ob vông myaviwen nipaên wê ob yêp luta ge vô he. Kiyang tige o viyin lêm om xam ngô mi xovô pyap. Om il ob nêl kiyang tige i tii vac vac lêm. Nge, il ob la vô Kilisi kiyang wê viyin ge ên xam xovô. ³Anutu obêc tyuc lec ge od a ob nêl kiyang tige kitong vô xam.

Xomxo wê sea vông vinên wê he vông ge

⁴Xomxo obêc vông i vin, nang dêc sea ge od he o tiyi wê he ob pilepac nilô i tii vac ge lêm. Vixôhilôg, he ngô Anutu kiyang di vông i vin, di Anutu vông he la dô vac xêseac, di he tulec vizid wê Anutu vông lam ge, di Myakilôhông Ngibua lam dô vac he nilô, ⁵di he kitong Anutu kiyang mi yaxên, lêc nêbê nivihâ, di he xovô xêkizêc wê ob val vô buc timuên ge. ⁶He vông bêge lê, lêc wê he obêc sea vông vinên wê he vông ge di vô nimi vô vihati ge od môp ti o yêp wê he ob lôm vô Anutu tii vac ge lêm. Ên môp wê he vông i vin lêc sea ge tiyi xocbê he tul Anutu nu tuc lec xax pola tii vac nang ên nêb xomxo i yê di so vya vô i tii vac.

⁷A ob nêl kiyang pilepacên lec xomxo wê vông i vin hixôn he wê sea vông vinên ge. He vihati tiyi xocbê kibun wê lun tô lec ge. Lun tô lec kibun, lêc vê obêc tyip nivihâ mi vô nôn nivihâ wê ob ngidu xomxo xôn ge od Anutu ob yê kibun tige nivihâ di vông yaên tige vô nôn tibeac. ⁸Lêc nita obêc tyip vac yuac tige di yaên ob vô nôn nivihâ lêm ge od ob ngidu xomxo xôn lêm, om Anutu ob yê kibun ge nêb nipaên, di obêc buc timuên ge od ngwax ob ya vêl.

⁹Xam lige wê xe xemyaa vin lec xam ge, xe nêl kiyang tiga vô xam, lêc xe xovô ên xe nêbê xam vông i vin xêkizêc ta di Anutu vô xam vêl ên nipaên, om gwêbaga yuac yuu môp wê xam vông ge vô nôn nivihâ. ¹⁰Ên Anutu o xomxo nipaên ti lêm, om ob lungên yuac nivihâ wê xam vông vò i ge lêm. Nge, Anutu yê di xovô yuac nivihâ wê xam vông ge, di xovô ên nêbê xam xemyaa vin lec i om xam mi ngidu lime vông vinên xôn. Xam vông yuac tyo ilage di i yêp gwêbaga hixôn. ¹¹Mêgem xe xo vinux yang ên xe nêb xam toto vông yuac tige i xêkizêc ta di hôm vông vinên wê

xam vông ge xôn pilihi, di bin buc wê Anutu ob tyuc xam ge, ¹² di xam nim i o léc ma lec lêm. Nge, xam timu vô xomxo wê vông i vin di ni o ma lec kiyang lêm ge, ên he ge wê tulec vizid nivihã vihati wê Anutu hilu kiyang pyap ilage ên nêbê ob vông vô he ge.

Anutu hilu kiyang di nêl i lê hixôn

¹³ Môp wê xomxo ngwe ob hilu kiyang ti vô xomxo ngwe ge od ob nêl xomxo levac ti lê hixôn ên nêb xomxo levac tige lê i ngidu i kiyang xôn. Léc ilage wê Anutu hilu kiyang vô Eblaham ge od o nêl xomxo levac ti lê hixôn ên nêb i ngidu kiyang tige xôn lêm. Ên xomxo ti lê o nginoo Anutu lê vêl lêm. Om Anutu nêl ici va lê hixôn. ¹⁴ Kiyang wê Anutu hilu vô Eblaham ge bêga ên nêbê,

“A hilu kiyang vixôhilôg nôn vô ông bê a obêc vông vizid nivihã vô ông, di a obêc vông ông bume i vô tibeac.”

¹⁵ Eblaham ngô kiyang wê Anutu hilu ge di ni o ma lec kiyang tige lêm. Nge, yaxên kiyang ên nêbê obêc vô nôn lec timuên, om kiyang tige vô nôn lec.

¹⁶ Vixôhilôg nôn, xomxo ngwe obêc hilu kiyang vô xomxo ngwe ge od ob nêl xomxo levac lê hixôn, êdêc xomxo ngwe ge i xovô bê i o kityoo kiyang tige lêm. ¹⁷ Mêgem kiyang wê Anutu hilu ge, Anutu nêl ici va lê hixôn ên nêb xomxo wê ob tulec nôn ge, he i xovô bêga bê i o kityoo lêm di ob vô pilepac pilepac vô i kiyang ti lêm. ¹⁸ Om môp yuu ge. Ngwe wê Anutu hilu kiyang di ngwe wê nêl ici va lê hixôn. Môp yuu ge obêc pilepac lêm, di Anutu o tiyi wê ob kityoo il ya môp yuu ge lêm. Om il wê il pec ên môp nipaên mi la kwabo vô Anutu ge, il ob xovô bê Anutu obêc vông i tiyi kiyang wê hilu ge. Om xovôên tige vông il le xêkizêc ta di il hôm kiyang tige xôn pilihi di bin buc wê kiyang vihati obêc vô nôn lec vô il timuên ge. ¹⁹ Om kiyang wê Anutu hilu vô il ge ob pilepac lêm. Nge, ob vông il le xêkizêc tiyi xocbê anka hôm sip xôn pilihi mi i le kizêc ge. Il vông i vin kiyang tige om gwêbaga il vihati tiyi wê il ob la le vô Anutu manôn di kitaa vô i, tiyi xocbê ilage Hetplis tibed la le vô Anutu manôn vac Anutu xumac ngibua nilô di kitaa vô i ge. Nivimihi dia ti yux kisuu xumac nilô tige lec. ²⁰ Léc Yesu la mug vac xumac ngibua nilô tige mi la le vô Anutu manôn ên il kibun ga vihati. Ên Yesu ge kô yuac Hetplis wê ob yêp luta tiyi xocbê Melkisedek ge.

Kiyang lec Hetplis ti wê lê nêbê Melkisedek

7 ¹ A ob nêl kitong lec xomxo ti lê nêbê Melkisedek. Melkisedek tu xomxo Selem nêl king, di kô yuac Hetplis^d hixôn, om vông yuac vô Anutu kisiinê. Ilage Eblaham la vông vevac vô king ya mi hi he

^d 7:1 ông wê Hiblu 2:17.

yib, mêd lax nêb ob la ben, lêc mila tulec Melkisedek vac môp, mêdêc Melkisedek kitaa lec i, om il xovô ên il nêbê Melkisedek ge xomxo levac, ²om Eblaham tung susu vihati wê i kô vac vevac ge la kidu vigê yuu di vông kidu ti vô Melkisedek. Lê Melkisedek kehe bêga nêbê king wê viac xomxo ya môp bôbac ge. Melkisedek tu xomxo Selem nêbê king di lê wê nêbê Selem ge, kehe bêga nêbê king wê viac xomxo ya kiyang malehe ge. ³Xomxo o vyac kivuu Melkisedek lê mi nêl kitong lêm, om il lungên Melkisedek ta yuu ma, di mae bue taxlee, di buc wê yubac lec ge, di buc wê yib lec ge êno. Melkisedek ge tiyi xocbê Anutu nu tuc ên wê kô yuac Hetplis wê ob yêp luta ge.

⁴Xam xovô Melkisedek di xovô bêga bê Melkisedek ge xomxo levac. Om Eblaham tung susu vihati wê kô vac vevac ge la kidu vigê yuu dêc vông kidu ti vô Melkisedek. ⁵Ilage Anutu vinoo xomxo wê pum lec Livai gee vaci ên nêb he i kô yuac daa siên. He Islel vihati, he pum lec Eblaham tiyi xocbê Livai he bue ge. Lêc Moses xolac nêl vô he Islel ên nêbê he i tung he susu vihati i loc kidu vigê yuu, dêc vông kidu ti vô lie Livai wê vông yuac daa siên ge. ⁶Melkisedek ge o pum lec Livai lêm, lêc Eblaham tung susu vihati wê i vông ge la kidu vigê yuu di vông kidu ti vô Melkisedek. Mêdêc Melkisedek kitaa lec i ên nêbê Anutu wê hîlu kiyang vô Eblaham ge i vông vizid nivîha vô i. ⁷Il xovô pyap ên il nêbê xomxo ngwe wê vông kitaaên vô xomxo ngwe ge luu ngwe wê kô kitaaên ge vêl, om il xovô ên il nêbê Melkisedek luu Eblaham vêl. ⁸Livai bue wê kô susu vô lie Islel, di he ge xomxo kibun wê ob yib ge. Lêc Melkisedek ti wê Eblaham vông susu kidu ti vô i ge, xolac nêl ên nêbê i xomxo wê maviha ge. ⁹⁻¹⁰Mêgem il xovô ên il nêbê ilage xomxo Islel mi vông susu kidu ti vô Livai bue ên wê he mi vông yuac daa siên ge. Lêc buc wê Livai gên o dô lêm ge, bu Eblaham tulec Melkisedek taxlee di vông susu kidu ti vô i, om tiyi xocbê Livai êno vông susu kidu ti vô Melkisedek. Om il xovô ên il nêbê Melkisedek luu Livai bue wê vông yuac daa siên ge vêl.

¹¹Ilage Anutu vông yuac daa siên vô Livai he bue timuên, di yuac tige tu Moses xolac vihati kehe. Lêc yuac wê Livai vông ge o tiyi wê ob kitya xomxo nêb nipaên vêl di vông he vô nivîha nôn ge lêm. Om Anutu vông xomxo wê ob vông yuac tige paha ngwe lam vô il, lêc xomxo tige o tiyi xocbê Elon wê pum lec Livai ge lêm. Nge, tiyi xocbê Melkisedek. ¹²Anutu vông xomxo paha ti wê tung daa vô Anutu ge lam vô il, om pilepac Moses xolac vac hixôn. ¹³Ên xomxo paha tige o pum lec Livai lêm. Nge, kehe le vac xomxo ti wê o vông yuac daa siên ilage lêm. ¹⁴Il xovô pyap ên il nêbê il Apumtau kehe yêp vac Yuda. Lêc Moses xolac o nêl ên nêbê Yuda bue ob kô yuac daa siên lêm. Nge, Livai bue wê he ob kô yuac tige.

¹⁵Anutu vông xomxo paha ti lam ên nêb i tu Hetplis tiyi xocbê Melkisedek. Om kiyang wê nêbê Anutu pilepac Moses xolac vac ge yêp seac. ¹⁶Yesu kô yuac Hetplis tige, lêc o pum lec Livai lêm, om o kô yuac tiyi xocbê

Moses xolac nêl ge lêm. Nge, Yesu obêc dô maviha luta, om kô lê Hetplis ya xêkizêc wê ici va vông ge. ¹⁷Di Anutu nêl kiyang lec Yesu bêga ên nêbê,

“Ông kô yuac Hetplis wê ob yêp luta tiyi xocbê Melkisedek ge.”

¹⁸Anutu kitya Moses xolac vêl, ên môm daa siên o xêkizêc lêm, di o tiyi wê ob ngidu xomxo xôn ge lêm. ¹⁹Ên xolac wê Moses vông ge o vô xomxo vêl ên he nêl nipaên lêm, om Anutu vông môm paha vô il. Môm paha tige luu môm wê Moses xolac vông ge vêl, ên môm paha tige ob vông il la dô kwabo vô Anutu.

²⁰Anutu vînoo Yesu ên nêbê i tu Hetplis, lêc o vînoo i pileva lêm. Nge, vînoo i di nêl ici va lê hixôn. Lêc Hetplis ilage, wê lie vînoo he ge, Anutu o nêl ici va lê hixôn lêm. Nge, heche va tu Hetplis tiyi xocbê Moses xolac nêl ge. ²¹Lêc Yesu ge Anutu vînoo i di nêl ici va lê hixôn, di nêl vô i bêga ên nêbê,

“A Apumtau, a hilu kiyang di nêl aca va lêg hixôn, om o tiyi wê a obêc pilepac kiyang wê a nêl lec ông ge vac lêm. Om a nêb ông ob kô yuac Hetplis wê ob yêp luta ge.”

²²Anutu vînoo Yesu di nêl ici va lê hixôn, om il xovô ên il nêbê môm paha wê Yesu vông ge ob vô nivîha vô il luu xolac wê Moses vông ge vêl.

²³Vac Moses xolac ge xomxo ti kô yuac Hetplis, lêc yib di xomxo ngwe kô i nipilêhê. Om he wê kô yuac Hetplis ge vô tibeac, ên he o dô luta lêm. Nge, he yib. ²⁴Lêc Yesu ge wê kô yuac Hetplis di ob dô luta, om ob vông yuac Hetplis sox vac xomxo ngwe lêm. ²⁵Om xomxo obêc vông i vin Yesu di vông nilô la vô Anutu ge, od Yesu tiyi wê ob vô he vêl ên he nêl nipaên di vông he dô maviha luta lêc luta ge, ên Yesu ob dô maviha luta di kitaa vô Anutu ên nêb i ngidu he xôn.

²⁶Yesu tu Hetplis tiyi wê ob ngidu il xôn ge, ên i ngîbua di nipaên ti o yêp vô i lêm di susu ningeac ti o yêp vac i nilô lêm, di i o timu vô môm wê xomxo nipaên vông ge lêm, di i lê vô levac tiyi xocbê Anutu lê ge. ²⁷Ilage xomxo ti wê Hetplis ge mi si daa vô Anutu lu tîbed vac klîsmas ti, om taxlee si daa ên nipaên wê ici va vông ge. Pyap dêc si lu ngwe nang ên nipaên wê lie Islel vông ge êno. Lêc Yesu o vông yuac tiyi xocbê he vông ge lêm. Nge, Yesu vông daa lu tîbed, ên wê vông ici va ninîvi yib ge. Om vông môm daa siên ge tip vac. ²⁸Xomxo wê Moses xolac vînoo ên nêb he i kô yuac Hetplis gee, he xomxo xêlehelehe. Lêc timuên ge, Anutu hilu kiyang di nêl i lê hixôn di vînoo nu tuc wê nipaên ti o yêp vô i lêm ge ên nêb i kô yuac Hetplis mi dô luta lêc luta.

Yesu vông yuac Hetplis gê lag puunê

8 ¹Kiyang vihati wê xe nêl vô xam gwêbaga ge, kiyang tige kehe nêl bêga ên nêbê Yesu ge il nêd Hetplis^e wê la dô vô Anutu vigê hiyôv

^e 8:1 ông wê Hiblu 2:17.

gê lag puunê. ²Om Yesu la dô lag puunê di vông yuac Hetplis vac Anutu ben. Xumac sel nilô wê ngibua ge tixuu lec Anutu ben kisiinê, lêc Anutu ben kisiinê ge, xomxo ti o lox lêm. Nge, vigwe tige Apumtau vaci ben.

³Hetplis vihati ge, Moses xolac vinoos he ên nêb he i loc mi tung daa di si daa vô Anutu. Yesu êno kô yuac Hetplis, om Anutu nêbê i êno obêc vông daa vô i. ⁴Yesu obêc dô lec kibun ga ge od ob kô yuac Hetplis lêm. Ên xomxo kibun ga dô wê ob kô yuac Hetplis di tung daa vô Anutu tiyi xocbê Moses xolac nêl ge. ⁵He vông he yuac vac Anutu xumac lilo ngibua gê kibun ga, lêc yuac wê he vông ge tiyi xocbê kinu wê tixuu lec Anutu ben lag puunê ge. Om tiyi xocbê kiyang wê Anutu nêl vô Moses, vô buc wê Moses nêb ob lox xumac lilo sel ge. Anutu nêl vô i ên nêbê,

“Ông xona nêb di lox xumac lilo sel di tung susu vihati vac i tiyi kinu wê a hilung pyap vô ông lec kitôn Sainai ge.”

⁶Yuac wê Yesu vông ge luu wê xomxo Islel vông ilage vêl. Mêd kiyang paha wê Anutu vông vô il ge luu kiyang tikwê wê Moses xolac vông ge vêl, mêd Yesu vông kiyang paha tige vô nôl lec vô il. Om kiyang paha tige ob vô nôl nivîha vô il luu nôl wê Moses xolac nêl ge vêl.

Kiyang paha luu kiyang tikwê wê Moses vông ge vêl

⁷Môp daa siên wê Moses xolac nêl lec ge obêc tiyi wê ob kitya xomxo nêl nipaên vêl ge od Anutu ob vông kiyang paha vô il lêm. Lêc xolac tikwê ge tiyiên ma. ⁸Om ilage Anutu nêl xomxo nêl nipaên kitong ên nêbê,

“A, Apumtau, a nêl vô xam ên a nêbê obêc buc timuên ge od a obêc hilu kiyang paha vô xam wê kehe Islel hixôn xam wê kehe Yuda ge.

⁹Kiyang paha wê a obêc hilu vô xam ge o tiyi xocbê kiyang wê a vông vô bume ilage lêm. Ilage vô buc wê a kô he vac vigwe Isip di didii he mi la ge od a vông kiyang vô he ên a nêb he i timu vô. Lêc he o ngô kiyang wê a nêl ge lêm, om a vô nimig vô he. A, Apumtau, a nêl bêge.

¹⁰Nang dêc a nêl ên a nêbê buc tige obêc lam la vêl lê, lêc a obêc hilu kiyang paha vô xam Islel bêga bê a obêc vông a xolac paha i yêp vac xam piyôp, di kivuu i yêp vac xam nilôm, di a obêc tu xam Anutu di xam ob tu a nuge.

¹¹Om xam ob nêl vô xomxo me lime ti bê i xovô a Apumtau lêm. Ên vô buc tige xomxo wê lê levac hixôn he wê lê nipwo ge, he vihati obêc xovô a.

¹²Ên a obêc xo vigwe pisiv ên he di kitya he nêl nipaên vêl di a obêc xovô he nêl nipaên i tii vac lêm. A, Apumtau, a nêl bêge.”

¹³Om kiyang paha wê Anutu hilu ge vông xolac tikwê tiyôd vac. Ên susu wê vô tikwê ge ob dô buc myabo tya di vô nipaên di ob la xôa ma.

Kiyang lec xumac lilo sel wê he Islel lox ilage

9 ¹A ob nêl kitong lec môt tikwê wê Anutu vông vô Moses ge. Anutu hilung môt wê he Islel ob vông lilo vô i ge, di nêl kiyang vô he ên nêbê he i lox xumac lilo sel ti i le kibun ga. ²Om he lox xumac sel wê nilô yuu yêp vac ge. Nilô ngwe yêp tax di ngwe yêp timuên. Mêdêc lam ti le vac xumac nilô ngwe wê yêp tax ge. Di tevol ti wê he mi tung blet lec ge le vac xumac nilô tige hixôn. Blet tige tiyi xocbê he tung daa vô Anutu. Om xumac nilô ngwe wê yêp tax ge he nêl ên nêbê xumac nilô ngibua. ³Mêd he yu nivimihi levac

yux kisuu xumac nilô ngwe wê yêp timuên ge lec. Di he nêl ên nêbê xumac nilô ngwe wê yêp timuên ge xumac nilô ngibua wê ngibua nôn. ⁴Alta ti wê he vông ya gol ge le vac xumac nilô tige, di he wê vông yuac daa siên ge mi si susu nivivea nivaha lec alta tyo. Di kilong ti wê he nêl ên nêbê kilong wê Anutu kiyang yêp vac ge le hixôn. Di he tul kilong tige ya xax di lipac gol lec vihati. Di susu yon yêp vac kilong tyo nilô bêga nêbê, dêg gol ti wê mana dô vac ge, di xax ti wê Elon pitoa ila lêc den lec ge, di ngidax yuu wê Anutu kivuu xolac lec di vông vô Moses ilage. ⁵Mêd he sev xax xocbê angela ge yuu di lipac gol lec di lax yuu le lec kilong tige kisii di yuule vilu vilu di vinihi wê yuu vông ge tidii mi la le kisii. Yuu tixuu lec xêseac wê Anutu vông ge. Vac angela yuu mahigun ge Hetplis mi hivip bwoc hi la lec kilong kisii ên nipaên wê he Islel vông ge. Susu mangwe yêp vac xumac lilo sel tige hixôn, lêc a ob nêl kiyang dia lec susu vihati lêm.

⁶Susu wê he vông vac xumac lilo sel ge a nêl gwêbaga. Om a ob nêl kiyang lec xomxo wê mi vông yuac daa siên ge. He mi la vac xumac lilo sel nilô ngwe wê yêp tax ge di vông he yuac tiyi xocbê xolac wê Anutu vông vô Moses ge. ⁷Dom xomxo ti wê kô yuac Hetplis ge ici va tived wê ob la vac xumac nilô ngwe wê yêp timuên ge. Lêc ob la vac i tiyi buc vihati lêm. Nge, ob la vac xumac nilô tige lu tived tiyi kliskas ti. Om yuac wê Hetplis vông vac xumac nilô ngwe wê yêp timuên ge bêga ên nêbê kô bwoc hi mi la vac xumac nilô tige di vông daa vô Anutu ên nipaên wê i vông ge hixôn nipaên wê lie Islel vông ge êno. ⁸Om Myakilôhô Ngibua nêl môt tige kehe kitong vô il bêga ên nêbê xumac sel nilô ngwe wê yêp taxlee ge yuac obêc gên yêp vac ge od xomxo vihati o tiyi wê ob la le vô Anutu manôn vac xumac sel nilô ngwe wê yêp timuên ge lêm. Nge, Hetplis tived wê ob la vac. ⁹Xumac lilo sel tige tixuu lec buc gwêbaga. He mi tung daa di mi si daa, lêc daa vihati wê he vông ge o tiyi wê ob kitya he nêl nipaên vêl di vông he nilô vô paha lec ge lêm. ¹⁰Di môt wê he vông ge xocbê môt yaên yuu mia numên di mia lipacên, môt tigege ngidu ninivi pileva xôn. Lêc Anutu vông môt tigege vô he ên nêbê he i timu vô, di i loc tyip lec buc timuên wê ici va obêc vông môt paha ge.

Kilisi vông ici va hi la tu daa

¹¹Lêc Kilisi val tu il nêd Hetplis^f wê viac vizid nivihā vihati wê Anutu nêb ob vông vō il ge, mēdec lax dō lag puunê. Vigwe tige nivihā yang luu xumac lilo sel wê yêp kibun ga ilage vêl, di xomxo ti o lox ya vigê lêm, ên vigwe tige o vigwe kibun ga ti lêm.

¹²Lêc Kilisi o kô memek hi me bwoc levac nu hi mi la vac xumac sel nilô ngibua ngwe wê yêp timuên ge lêm. Nge, kô ici va hi mi la tung daa vac xumac ngibua tige lu tived. Mêd Anutu yê daa wê i vông ge nivihā om vō il vêl ên il nêd nipaên di obêc vông il la dō hixôn i luta lêc luta. ¹³Môp wê he Islel mi vông ge bêga ên nêbê xomxo ti obêc vông môp nipaên vō Anutu manôn ge, od xomxo wê mi si daa ge ob kô memek hi di bwoc levac vux ti hi di ob pilepac viwev wê he si bwoc levac vêx ge hixôn mia, mēdêc hivip hi yuu viwev la lec xomxo tige ên nêb i lipac ninivi i vō paha lec vō Anutu manôn. ¹⁴Lêc hi wê Kilisi vông ge luu bwoc hi vêl. Ên nipaên ti o yêp vō Kilisi lêm, di Myakilôhō Ngibua wê ob dō luta lêc luta ge ngidu i xôn, mêd Yesu vông hi wê i vông ge la tu daa vō Anutu. Om hi wê i vông ge o lipac il nidnivi pileva lêm. Nge, lipac il nilôd vō paha lec di vō il vêl ên môp wê nôn maên ge ên nêb il vông yuac vō Anutu maviha.

¹⁵Kilisi vông ici va hi la tu daa vō Anutu, om vông kisoac vac il hixôn Anutu mahigun di vông môp paha wê Anutu vông vō il ge vō nôn lec. Yesu yib om vō il vêl ên nipaên vihati wê il vông vō buc wê il timu vō Moses xolac ge. Om xomxo vihati wê Anutu tyuc he lam ge, he wê ob dō maviha luta lêc luta tiyi xocbê kiyang wê Anutu nêl di hilu pyap ilage.

¹⁶Xomxo ti obêc yaxên buc wê ob yib ge, od ob nêl nue lie lê lec susu vihati wê i vông ge, di xomxo tyo obêc yib ge, od nue ob kô susu wê ma vông ge. ¹⁷Ên ma obêc yib vêl ge, od kiyang wê i nêl ge obêc vō nôn lec vō nue. Lêc ma obêc gên dō maviha ge od kiyang wê i nêl ge ob vō nôn lec vō buc wê i gên dō maviha ge lêm. ¹⁸Mêgem wê xomxo hi bwoc di kô hi mi la tung daa vō Anutu ge od hi tige nêl kitong ên nêbê bwoc tige yib vêl. Lêc hi obêc ma ge od Moses xolac ob vō nôn lec vō he lêm. ¹⁹Ilage xomxo Islel kitucma mi dō di Moses kitong xolac wê Anutu vông vō i ge vihati mi he ngô. Kitong pyap dêc pilepac bwoc hi hixôn mia ningigooên. Mêdêc hōm xax ngen ti wê lê nêbê hisop ge di vivil ya bwoc sipsip niviluhu wê he lipac ya busa hi ge. Mêd hoo xax tige la vac hi di hivip hi la lec kipihac xolac hixôn xomxo, ²⁰di nêl ên nêbê,

“Hi tiga nêl kitong vō xam bê kiyang wê Anutu hilu pyap ge obêc vō nôn lec vō xam.”

²¹Pyap dêc Moses hivip hi la lec xumac lilo sel, di la hivip hi la lec susu vihati wê dō vac xumac sel nilô ge. ²²Om môp wê xolac taxlee vông

^f 9:11 ông wê Hiblu 2:17.

ge bêga ên nêbê susu tibeac ob vô paha lec ya hi. Lêc hi kipyaxên obêc ma ge od Anutu ob kitya xomxo nê nipaên vêl lêm.

Kilisi vông ici va tu daa di kitya il nêd nipaên vêl

²³Mêgem he vông xumac lilo sel hixôn susu wê dô vac xumac nilô ge vô paha lec ya bwoc hi. Susu tigege susu kibun, om tiyi xocbê kinu wê tixuu lec susu nôn wê dô kisii ganê ge. Lêc daa nivihha wê luu bwoc hi vêl ge tiyi wê ob vông xomxo vô paha lec. ²⁴Lêc Yesu o la vac xumac lilo gê kibun ga wê xomxo lox ya vîgê ge ti lêm. Xumac lilo kibun ga tiyi xocbê kinu wê tixuu lec vîgwe nôn lag puunê. Om Yesu la dô lag puunê di gwêbaga tu il madnôn mi la le vô Anutu manôn ên nêb ob ngidu il xôn.

²⁵Xomxo Islel ti wê kô yuac Hetplis ge la vac xumac lilo sel nilô wê yêp timuên ge lu tived vac klismas ti di kô bwoc hi mi la vông daa vô Anutu, di o vông ici va hi lêm. Dom Kilisi ge vông ici va hi la tu daa vô Anutu lu tived. ²⁶Ên Yesu obêc vông ici va hi la tu daa lu tibeac ge od obêc tiyi xocbê lam kô myavinê di yib lu tibeac, vô buc taxlee wê Anutu tung lag yuu kibun ge di i val tyip gwêbaga hixôn. Lêc Kilisi o vông tibêge lêm. Nge, lam kibun ga lu tived vô buc wê vô kwabo lec buc myahipu ge, di vông ici va la tu daa vô Anutu ên nêb Anutu i kitya il nêd nipaên vêl. ²⁷Xomxo vîhati ob yib lu tived, nang dêc Anutu ob yaxên môp yuu kiyang wê he vông ge. ²⁸Om Kilisi êno lam yib lu tived di vông ici va hi la tu daa vô Anutu ên nêb i kitya xomxo tibeac nê nipaên vêl. Di Yesu obêc vena lu ngwe nang, lêc ob lôm ên kitya xomxo nê nipaên vêl i tii vac lêm. Nge, obêc lôm ên kô he wê xovô i mi dô bin i ge.

Bwoc levac hi o tiyi wê ob kitya il nêd nipaên vêl ge lêm

10 ¹Xolac taxlee wê nêl môp daa siên ge tiyi xocbê kinu wê tixuu lec môp yuu vizid nivihha wê Kilisi ob vông vô il timuên ge. Om xomxo wê nêb ob la kwabo vô Anutu ge, daa wê he mi si tiyi klismas vîhati ge o tiyi wê ob kitya he nê nipaên vêl ge lêm. ²Ên daa tige obêc tiyi wê ob kitya he nê nipaên vêl ge od he ob la si daa lu tibeac lêm. Nge, he ob la si lu tived. Ên xomxo wê vông lilo di kítaa vô Anutu ge, he obêc vông daa lu tived tiyi wê ob vông he nilô vô paha lec ge od he ob xovô nipaên wê yêp vac he nilô ge i tii vac lêm. ³Lêc daa wê he mi si tiyi klismas vîhati ge vông he xovô nipaên wê yêp vô he ge tii vac. ⁴Ên bwoc hi o tiyi wê ob kitya xomxo nê nipaên vêl ge lêm.

⁵Môp daa siên tige tiyiên ma, om buc wê Kilisi lam kibun ga ge od nêl vô Anutu ên nêbê,

“Môp wê xomxo si daa di tung daa ge o tiyi wê ob vông ông wê he nivihha ge lêm. Om ông viac ninivi wê ông nêb ông ob vông vô a ge pyap.

⁶Môp wê he si bwoc di tung daa mangwe hixôn ên nipaên wê he vông ge, ông xêmyaa o vin lec môp tige lêm.

7 Om a nêl vô ông ên a nêbê, Anutu, a val ên a nêb a ob vông yuac tiyi xocbê ông xovô ên ông nêb a vông ge, tiyi xocbê kiyang wê yêp vac kipihac ilage.”

8 Môt daa siên ge, he Islel vông i tiyi wê Moses xolac nêl ge. Lêc kiyang tax ngwe wê Yesu nêl ge nêl bêga ên nêbê, “Môt wê he si daa di tung daa mangwe hixôn ge, di môp wê he si bwoc di tung daa ên nipaên wê he vông ge, môp tigeê ông xêmyaa o vin lec lêm.” 9 Nang dêc kiyang wê Kilisi nêl timuên ge bêga ên nêbê, “A val ên a nêb a ob vông yuac i tiyi xocbê ông xovô ên ông nêb a vông ge.” Kilisi nêl bêge, om Anutu kitya môp daa siên vêl di vông môp paha wê Kilisi ob lam yib ge. 10 Om Yesu Kilisi vông tiyi xocbê Anutu nêl ge di vông ici va ninivi tu daa vô Anutu lu tixed. Om daa wê Yesu vông ge kitya il wê il vông i vin ge vihati nêd nipaên vêl di vông il tu xomxo ngibua lec.

11 Xomxo vihati wê kô yuac daa siên ge, he mi si daa vô Anutu tiyi buc vihati. Lêc daa tigeê o tiyi wê ob vô he vêl ên he nêd nipaên ge lêm. 12 Lêc Kilisi vông daa lu tixed tiyi wê ob kitya il nêd nipaên vêl i yêp luta ge. Pyap dêc la dô vô Anutu vigê hiyôv, 13 di la dô bin buc wê Anutu ob vông xomxo wê vông vevac vô i ge la dô vac Kilisi kwa ngibi. 14 Om daa tixed wê Yesu vông ge vông xomxo wê vông i vin ge vô paha lec mi i yêp luta.

15 Myakilôhò Ngibua êno nêl vô il bêga ên nêbê,

16 “Buc tigeê obêc lam la vêl, nang dêc a obêc hilu kiyang paha vô he bêga bê a ob vông a xolac paha i yêp vac he nilô, di kivuu i yêp vac he piyôp. A, Apumtau a nêl bêge.”

17 Nang dêc nêl tii vac nang ên nêbê,

“A obêc xovô he nêd nipaên hixôn môp nipaên wê he vông ge i tii vac lêm.”

Myakilôhò Ngibua nêl bêge. 18 Anutu kitya il nêd nipaên vêl pyap, om môp ti o yêp wê il ob si daa vô Anutu ên nêb i kitya il nêd nipaên vêl ge lêm.

Il tiyi wê il ob la vô Anutu

19 Xam lige, Yesu yib di vông ici va hi la tu daa vô Anutu. Om il tiyi wê il ob la vô Anutu vac vigwe kisiinê, di il ob xona ên i lêm. 20 Ên môp wê Yesu vông ge lêx nivimihi dia wê yux kisuu xumac lilo nilô wê ngibua nôd ge, di vông môp paha ti wê maviha ge vô il om il êno tiyi wê il ob la le vô Anutu vac i ben kisii ganê ge. Nivimihi dia ge tixuu lec wê Yesu yib ge. 21 Di Yesu tu il nêd Hetplis wê viac Anutu nue il, 22 di i hi vông il nilôd vô paha lec di kitya il nêd soên wê yêp vô il ge la vêl, di Yesu lipac il nidnivi vô paha ya mia mayodaên. Om il ob sea kiyang kityooên vihati wê yêp vac il nilôd ge i loc vêl, di il ob vông i vin di nilôd i o vô yuu lêm, di il la kwabo vô Anutu. 23 Il ob nêl vông vinên wê il vông ge hixôn

vizid nivihā wê il dô bin ge kitong i yêp seac di il ob hôm kiyang tige xôn pilihi, ên il xovô ên il nêbê Anutu wê hilu kiyang pyap vò il ge obêc vông i vô nôn lec tiyi wê i nêl ge. ²⁴Il ob xovô il lige di vông he nilô i kidu he ên he xêyaa i vin lecma di he i vông yuac nivihā, ²⁵di il ob sea môp wê il kitucma di xê da ge lêm, ên xomxo ya sea môp tige lê, lêc il ob timu vô môp wê he vông ge lêm. Nge, il ob ngiduma xôn, ên buc wê Apumtau obêc vena lec ge vô kwabo lec.

²⁶Ên il wê il xovô kiyang nôn pyap ge, il obêc sea kiyang tige vihati di lax vac môp nipaên tiyi xocbê il vông ilage ge, od daa ti o yêp wê ob kitya il nêd nipaên vêl ge lêm. ²⁷Nge, Anutu obêc vông myaviwen nipaên vô il, di xomxo wê vông vevac vô Anutu ge ngwax ob ya he ma vêl. ²⁸Xolac taxlee wê Anutu vông vô Moses ge nêl bêga ên nêbê xomxo ti obêc pwoo Moses kiyang ti vac di xomxo yuu me yon obêc yê nipaên wê i vông ge di nêl i nêd nipaên kitong ge od lie obêc xo viġwe pisiv ên i lêm. Nge, xolac nêl ên nêbê he ob hi i yib. ²⁹Om xam ob nêbê va lec xomxo wê ob vô nimi vô Anutu nu tuc ge? Kilisi hi vông kiyang paha wê Anutu hilu vô il ilage vô nôn lec, di kitya il nêd nipaên vêl. Lêc xomxo vông vinên ti obêc vô nimi vô Yesu di nêl kiyang nipaên lec Yesu hi di yê Myakilôhô Ngibua wê xo viġwe pisiv ên il ge nipaên ge od xomxo tige ob kô myaviwen levac lec luu xomxo wê pwoo Moses xolac vac ge vêl. ³⁰Ên il xovô Anutu wê nêl bêga ên nêbê, “Môp myaviwen ge, aca va yuac om a ob vông nipaên vac nipaên.” Di Anutu nêl tii vac nang ên nêbê, “Apumtau vaci ob titô i nue vêx yuu vux vihati.” ³¹Anutu nêl bêge, om Anutu maviha obêc hôm xomxo ti xôn ên nêb ob vông myaviwen vô i ge od xomxo tige ob xona mabu.

³²Xam lêc xovô buc taxlee i tii vac nang. Vô buc tige xam kô xovôên lec Anutu. Nang dêc tibii vông viyin levac vô xam ên wê xam vông i vin ge, lêc xam le xêkizêc ta. ³³Vô buc mangwe he kô xam mi lam lax xam le vac he mahigun di nêl kiyang nipaên lec xam di hi xam. Di buc mangwe lime tulec viyin tibêge di xam kilê viyin hixôn he. ³⁴Di xam xo viġwe pisiv ên he wê xomxo tung he la vac kalabuhu ên wê he vông i vin ge, di buc mangwe tibii la vac xam toto bom di kô xam nêd susu mi la. Lêc xam o vông vevac vô he lêm. Nge, xam dô hixôn xêmyaa nivihā, ên xam xovô ên xam nêbê susu wê xam ob kô timuên ge luu susu kibun ga vêl ên ob dô luta. ³⁵Om xam lêc hôm vông vinên wê xam vông ge xôn pilihi, ên xam obêc vông bêge ge od Anutu obêc vông nôn nivihā vô xam timuên. ³⁶Xam le xêkizêc ta vac vông vinên, ên obêc bêge ge od xam ob vông môp vihati i tiyi xocbê Anutu xo nêb xam vông ge, di xam ob kô nôn nivihā vihati wê Anutu hilu pyap vô xam ge. ³⁷Ên kiyang yêp vac xolac taxlee bêga ên nêbê,

“Obêc buc myabo ge, od xomxo ti wê nêbê ob vena ge obêc vena, di ob hiyi lec lêm.

³⁸ Di xomxo bôbac wê tu a nuge ge, he ob vông i vin a tiyi buc vihati wê he dô maviha lec kibun ga ge. Lêc he ti obêc sea vông vinên wê i vông ge od a nilôg obêc vô niviha vô i lêm.”

³⁹Kiyang nêl bêge, lêc il o tiyi xomxo wê sea vông vinên wê he vông ge wê Anutu kitya he vêl ge lêm. Nge, il vông i vin om il obêc dô madviha luta.

Môp vông vinên kehe

11 ¹Môp vông vinên wê il vông ge kehe bêga nêbê susu hixôn nôn vihati wê il nêb il ob kô ge, il xovô ên il nêbê Anutu ob vông vô il timuên. Di susu yuu vizid vihati wê il xêên ma ge, il xovô ên il nêbê susu tigege dô vixôhilôg. ²Xomxo wê dô ilage, he vông i vin om Anutu yê he niviha. ³Il vông i vin om il xovô ên il nêbê Anutu tung lag yuu kibun ya kiyang wê ici va nêl ge. Om susu vihati yang wê il xê gwêbaga, Anutu tung he ya susu wê il xêên ma ge.

Ebel yuu Inok yon Nôa

⁴Ilage Ebel vông i vin Anutu om la tung daa vô i, di Anutu yê daa wê Ebel vông ge niviha luu daa wê li tuc Ken vông ge vêl. Anutu yê Ebel niviha ên wê i vông i vin ge di nêl ên nêbê i xomxo niviha nôn, om Anutu xêyaa vin lec daa wê Ebel vông ge. Ebel yib ilage, lêc vông vinên wê i vông ge nêl môp vông vinên kitong vô il gwêbaga hixôn.

⁵Ilage Inok vông i vin Anutu, om o yib lêm. Nge, dô maviha di Anutu kô i hixôn ninivi yuu kinu yadiluhu mi la lag puunê, om xomxo myag lêc o yêvô lêm ên Anutu kô i mi la lag puunê. Di xolac taxlee nêl kitong lec Inok ên nêbê buc wê gên dô maviha ge od vông i vin Anutu om Anutu yê i niviha. ⁶Lêc xomxo ti obêc vông i vin Anutu lêm ge od Anutu ob yê xomxo tige niviha lêm. Ên xomxo ti obêc nêb la kwabo vô Anutu ge, od i vông i vin bêga bê Anutu dô maviha di obêc vông nôn niviha vô he wê myag i ge.

⁷Nôa vông i vin Anutu, om ngô kiyang wê Anutu nêl vô i lec lun wê obêc val timuên ge. Nôa xovôên buc tige ma, lêc vông i tiyi wê Anutu nêl vô i ge, om lox sip levac ti di he vinê nue la dô niviha vac sip nilô. Om vông vinên wê Nôa vông ge nêl xomxo kibun ga nêl nipaên kitong, di Anutu yê Nôa niviha ên wê vông i vin ge, om nêl ên nêbê Nôa ge xomxo niviha.

Eblaham yuu Sela

⁸Ilage Anutu nêl vô Eblaham ên nêbê i sea ben di loc vigwe bangwe wê Anutu nêl i lê lec ên nêb obêc vông vô i ge. Eblaham lungên môp wê ob la vô ge, lêc vông i vin om ngô Anutu kiyang di sea ben mi la. ⁹Eblaham vông i vin om la dô vac vigwe Kenan wê Anutu nêl ên nêbê ob vông vô i

ge. Di la dô vac vigwe tige tiyi xocbê dô dug ge. Om o lox xumac ti lêm. Nge, mi dô vac xumac sel hixôn nu Aisak yuu bu Jekop, ên Anutu hilu kiyang vô yuu êno ên nêbê yuu lê lec vigwe tige om obêc vông vigwe tige vô yuu.

¹⁰Lêc Eblaham o vông nilô la vô vigwe Kenan lêm. Nge, vông nilô la vô vigwe lag puunê wê Anutu vaci xovô ên nêb ob vông vô i ge.

¹¹Sela vô vêxta om o tiyi wê ob kô nipwo ge lêm. Lêc Sela vông i vin kiyang wê Anutu nêl vô i lec nipwo ge ên xovô nêbê Anutu obêc vông kiyang tige vô nôn lec. Mêgem Anutu vông xêkizêc vô Sela om Sela vivi nu. ¹²Eblaham vô kipwoc om o tiyi wê ob kô nipwo ti ge lêm. Eblaham xomxo tibeđ, lêc bue timuên vô tibeac hiwocên tiyi xocbê pitua wê le lec lag kisiinê đi luda wê dô vô gwec ninya ge, om xomxo ti o tiyi wê ob kitong Eblaham bue wê vô tibeac ge lêm.

¹³Xomxo tigege vông i vin Anutu tiyi buc vihati mi i la tyip vô buc wê he yib ge hixôn. Lêc buc wê he dô kibun ga ge kiyang wê Anutu hilu pyap ge o vô nôn lec vô he lêm. Om tiyi xocbê he le teva đi yê ma la nôn nivihã wê Anutu nêb obêc vông vô he timuên ge, đi he xêyaa vô nivihã, đi he nêl seac ên nêbê, “Il dô kibun ga tiyi xocbê il lam dô tibii ba ben om il ob dô buc dia lêm. Nge, il ob dô buc myabo tyatya.” ¹⁴Xomxo wê nêl kiyang tibêge vông xovôên vô il bêga nêbê he myag vigwe ti wê ob tu he ben ge. ¹⁵Om he o xo vigwe ti wê he sea ilage lêm. Wê he ob nêb lax mi la ben viyang bulac tii vac ge, od ge tiyi, lêc he o vông nilô lax vô vigwe tige lêm. ¹⁶Nge, he xo ben nivihã ti wê luu he ben ilage vêl. Ge vigwe kisiinê. Om he nêl ên he nêbê Anutu ge he Anutu. Đi Anutu ni o yoc ên kiyang tibêge lêm, ên ici va viac vigwe pyap vô he.

¹⁷⁻¹⁸Ilage Anutu hilu kiyang vô Eblaham ên nêbê, “Bume timuên obêc pum lec num tuc Aisak đi he obêc vô tibeac.” Anutu nêl bêge, nang đêc buc timuên ge Anutu nêb ob yaxên Eblaham om nêl vô i ên nêbê, “Ông hi num tuc Aisak i yib đi vông i tu daa vô a.” Mêgem Eblaham vông i vin kiyang wê Anutu hilu pyap ge om nêb ob vông Aisak i tu daa tiyi xocbê Anutu nêl vô i ge. ¹⁹Eblaham xovô bêga ên nêbê Anutu tiyi wê obêc tipi vô Aisak kidi lec mavihã vac yibên tii vac nang ge. Om Eblaham nêb ob hi Aisak i yib lêc Anutu le vac xôn, om tiyi xocbê Eblaham kô Aisak vac yibên.

Aisak yuu Jekop yon Josep

²⁰Ilage Aisak kitaa lec nu Jekop yuu Iso ên nêb Anutu i vông vizid nivihã vô yuu vô buc timuên, đi Aisak vông i vin ên nêbê Anutu obêc vông i tiyi wê i kitaa ge.

²¹Jekop vông i vin Anutu, om vô kwabo lec buc wê ob yib ge od kitaa lec Josep nu yuu ên nêb Anutu i vông vizid nivihã vô yuu. Pyap đêc hêm pitoa xôn đi yu kwa vac đi hi vixa pec ên Anutu. Jekop vông i vin ên nêbê Anutu obêc vông i tiyi wê i kitaa ge.

²²Josep vông i vin kiyang wê Anutu hilu vô he Islel ge. Om vô kwabo lec buc wê ob yib ge od Josep nêl ên nêbê vô buc wê he Islel obêc sea Isip ge od he i kô i len mi loc hixôn di loc yev vac vigwe paha.

Moses

²³He Islel dô vac vigwe Isip, di Isip nêl king ti lê nêbê Pelo ge kidu he Islel ên nêbê he i hi nue vux i yib. Moses yubac di ta yuu ma yê ên nêbê manôn nivaha yang, mêgem yuu kô mi la vun i tiyi dentuc yon. Ên yuu vông i vin Anutu om yuu o xona ên Pelo lêm. ²⁴Pelo nu vêx ti viac Moses tiyi xocbê i ta ge. Mêdêc Moses lig mi vô levac, lêc vông i vin Anutu om xona nêb tibii i o nêl bê i Pelo nu byac nu lêm. ²⁵Ên Moses xovô ên nêbê i obêc dô tiyi xocbê tibii Isip ti ge od ob la vac môp nipaên wê he Isip mi vông wê ob vông nilô vô nivaha buc myabo tya ge. Om nêb ob la dô hixôn lie Islel wê Anutu nue ge di kilê viyin hixôn he. ²⁶Ên Moses xovô ên nêbê môp wê ob kilê viyin lec Kilisi lê ge luu môp wê ob kô susu nivaha wê he Isip vông ge vêl, ên Moses vông nilô la vô vizid nivaha wê Anutu obêc vông vô i timuên ge.

²⁷Moses vông i vin Anutu om sea vigwe Isip mi la, di Pelo xêyaa vô myavinê vô i, lêc Moses o xona ên Pelo lêm. Xomxo ti ob yê Anutu lec manôn lêm, lêc vông vinên wê Moses vông ge tiyi xocbê yê Anutu lec manôn, om vông i le xêkizêc. ²⁸Anutu nêl vô Moses ên nêbê i hivip bwoc sipsip hi la lec vuayen ên angela ti wê Anutu ob vông i lam ge i o lêc hi he Islel nue lêm. Om Moses vông i vin di vông i tiyi xocbê Anutu nêl ge. Môp tige môp Pasova.

Islel tibeac vông i vin Anutu

²⁹He Islel vông i vin Anutu om he la vac Gwec Hi mahigun tiyi xocbê môp kwepên mi la kehe vilu ganê. Mêdêc tibii Isip nêb ob timu vô he vixa, lêc gwec viwen viwen lôm hivun he xôn, di hi he yib mima vêl.

³⁰⁻³¹Josua vông Islel vux yuu la Jeliko ên nêb yuu i loc xôpac di yê vigwe hixôn susu di lôm nêl kitong vô i. Tibii Jeliko o vông i vin Anutu lêm, lêc vêx yôdac ti lê nêbê Leahap vông i vin. Om kô Islel vux yuu ge mi la vun vac xumac nilô ên nêb tibii Jeliko o hi yuu lêm. Om timuên wê he Islel mila hi tibii Jeliko yib ge od he o hi Leahap hixôn lêm. He Islel vông i vin Anutu ên nêb Anutu ob ngidu he xôn di vông vigwe Jeliko vô he, om he buu di vivac vô vigwe Jeliko tiyi buc vigê vilu di sec yuu. Mêdêc xenac ngidax vixa dia wê vivac Jeliko ge kipê mi la kibun.

³²Om a ob nêl kiyang ya hixôn, me? Ma vêl. Buc tiyiên ma wê a ob nêl kiyang kitong lec Gidion, Balak, Samson, Jepta, Devit, Samyuel, di plopete vihati hixôn. ³³He vihati vông i vin Anutu. King tibeac kô he nue vevac mi la vông vevac vô he, lêc he nginoo tibii vevac vihati vêl. Di he viac xomxo ya môp bôbac. Di he kô nôn nivaha wê Anutu hilu kiyang ên

nêb ob vông vô he ge. Di tibii nêx he ya la vô noo laion ên nêb noo i ya he, lêc Anutu vông noo laion mya tung xôn. ³⁴Di tibii nêx he ya la vac ngwax levac, lêc he vông i vin om Anutu hi ngwax yib. Di tibii nêb ob hi he ya yib ya yipac levac, lêc Anutu vô he vêl. He xomxo xêlehelehe, lêc Anutu vông he tu xomxo xêkizêc, om he le xêkizêc vac vevac, di tii tibii vevac la vêl. ³⁵Di vêx wê nue yib ge, Anutu tipi vô nue kidi lec maviha. Di tibii tung xomxo vông vinên ya la vac kalabuhu di vông myavinê levac vô he di nêl vô he ên nêbê he obêc sea vông vinên wê he vông ge od ob piwelac he vêl ên kalabuhu, lêc obêc ma ge od he ob hi he i yib. Lêc he o sea vông vinên wê he vông ge lêm, ên he xovô ên he nêbê he obêc yib lec vông vinên ge od he ob kidi lec mi dô maviha i luu wê he ob dô maviha gê kibun ga vêl.

³⁶Di he ya kô viyin bêga nêbê tibii nêl kiyang nipipaa lec he, di pisa he ya yihi, di ku ya xôn ya sen, di tung ya la dô vac kalabuhu. ³⁷Di tibii nêx he mangwe ya ngidax nêb he i yib, di kiku he mangwe la yuu ya so, di hi he ya yib ya yipac. He vinyum bwoc sipsip yuu memek niviluhu tiyi xocbê ngakwi ge ên he nên susu ma ên he, di he tulec viyin levac, di tibii vông myavinê levac vô he. ³⁸Tibii tii he la, om he ya la dô vac vigwe myadongên, di ya la dô lec vigwe kitôn, di ya la dô vac ngidax kehe, di ya la dô vac vitovac. Xomxo vông vinên tigeê, xomxo nivîha yang, om tibii kibun ga o nivîha tiyi wê xomxo vông vinên ob dô vac he mahigun ge lêm.

³⁹Xomxo vông vinên wê a nêl kiyang lec he ge, he vông i vin, om Anutu yê he nivîha. Lêc kiyang wê Anutu hilu pyap ge o vô nôn lec vô he lêm. ⁴⁰Ên Anutu xo ên nêb obêc vông nôn nivîha luu vêl vô il, om nêb ob kituc il hixôn he wê vông i vin ilage la kidu tixed di ob vông il xôn vô nivîha nôn vô buc tixed.

Il ob vông madnôn i loc vô Yesu

12 ¹Xomxo wê a nêl kiyang lec he gwêbaga ge, he vihati dô ila lêc yib. Lêc vông vinên wê he vông ge yêp seac vô il, om tiyi xocbê he hilung môp vông vinên vô il. Om il ob sea môp nipaên yuu susu kibun ga wê ku il xôn ge di tup xêkizêc ya vông vinên wê Anutu vông vô il ge êdêc la nginoo. ²Om il ob le madnôn i loc vô Yesu, ên Yesu ge tu vông vinên wê il vông ge kehe di ici va ob vông môp vông vinên wê il vông ge vô nôn lec timuên. Yesu xovô ên nêbê obêc timuên ge od Anutu obêc vông i xêyaa vô nivîha, om Yesu le xêkizêc di kilê viyin di yib lec xax tiyi xocbê xomxo nipaên ti. Lêc ni o yoc ên wê xomxo yê i nipaên ge lêm. Om yib lec xax di lax mi la dô vô Anutu vigê hiyôv.

Anutu vông viyin vô il ên nêb ob titô il

³Xam lêc xovô Yesu. Ên tibii nipaên vông viyin levac vô i, lêc i le xêkizêc ta. Om xomxo obêc vông viyin vô xam ge od xam nim i o lêc ma

lêm, di xam o léc xona ên viyin wê ob tulec xam ge lêm. ⁴Xam mi vông vevac vô nipaên, léc xam gên o vông vevac di kip yax xam hi sea lêm.

⁵Xam mêd lungên kiyang wê Anutu nêl vô xam ên nêb i ob ngidu xam xôn ge, me? Anutu nêl vô xam tiyi xocbê ma nêl vô nu ti ên nêbê,

“Nug, Apumtau obêc vông viyin ti vô ông ên nêb ob titô ông nêb nipaên ge, od ông o léc wê ên ông nêbê môt tige vidaaên lêm. Di Anutu obêc hilung ông nêb nipaên vô ông ên nêb ob titô ông ge od ông xêmyaa i o léc vô viyin lêm.

⁶Ên xomxo wê Anutu xêyaa vin lec he ge, Anutu ob vông viyin vô he vihati ên i titô he nêb nipaên, di xomxo vihati wê Anutu nêl ên nêbê i nue ge, Anutu ob hilung he nêb nipaên vô he di titô he.”

⁷Kiyang nêl bêge, om xam le xêkizêc di lee yuu bê Anutu i titô xam. Ên môt wê ob titô xam ge nêl kitong vô xam ên nêbê xam tu i nue. Nu tina dô wê ma o titô i lêm ge? Ti o dô lêm. ⁸Ên mae vihati mi titô nue. Om Mag Anutu titôên xam obêc ma ge od obêc tiyi xocbê xam o tu i nue nôn lêm. Nge, xam ob tiyi xocbê nipwo wê ma maên ge. ⁹Il ob xovô kiyang bêga hixôn bê il mage kibun ga, he hi il ên nêb ob titô il, léc il la dô vac he kiyang kwa ngibi. Om Mag Anutu wê tu il kinud kehe ge, obêc titô il ge od il ob la vac i kiyang kwa ngibi i luu vêl di la dô madviha. ¹⁰Il mage kibun ga, he dô buc myabo tya, di titô il tiyi xovôên wê he vông ge. Léc Anutu titô il ên nêb môt titôên i vô nôn nivihã vô il di il tu xomxo ngibua xocbê Anutu vaci ge. ¹¹Vô buc wê Anutu ob titô il ge, il ob tulec myavinê, di il nilôd ob vô nivihã lêm. Léc Anutu obêc titô il pyap ge od môt titôên tige obêc vô nôn nivihã vô il bêga bê il ob tu xomxo wê mi timu vô môt nivihã ge di il ob dô vac kiyang malehe kwa ngibi.

¹²Anutu titô il ên nêb i vô nôn nivihã vô il, om xam vigêm wê yux kizêc ge xam titô ên i vô xêkizêc ên xam vông yuac ya. Di xam vixam wê vô xêlehe ge xam titô ên i vô xêkizêc lec. ¹³Di xam vixam i kô xam mi loc vô môt nivihã, êdêc lime wê o vông i vin xêkizêc lêm ge he i o sea vông vinên wê he vông ge lêm. Nge, he i yê môt bôbac wê xam vông ge di lôm timu vô.

¹⁴Xam vông yuac levac lec môt wê xam ob nêl kiyang malehe vôma ge, di xam vông nilôm i loc diluhu vô Anutu di tu xomxo wê ngibua ge, ên obêc ma ge od xam ob la dô hixôn Apumtau lêm. ¹⁵Xam viac xam, gec léc xam sea môt wê Anutu ob xo vigwe pisiv ên xam ge. Di xam viac xam, gec léc xomxo ti didii xam mi la vac môt nipaên, ên xomxo tige tiyi xocbê xax nôn kilin wê ob vông xam tibêac vô nipaên. ¹⁶Xam viac xam ên môt yôdac vêx yuu vux, di xam o léc vô nimim vô Anutu tiyi xocbê Iso vông ilage lêm. Ên Iso ge tuc, om tiyi wê ob kô kitaaên nivihã vô ma. Léc Iso kitaa yaên vô li môn nêb ob ya. Léc li môn nêl ên nêbê, “Ông obêc tyuc lec bê mag i vông kitaaên wê nêb ob vông vô ông ge vô a ge od a ob vông yaên vô ông.” Om Iso lee yuu, ¹⁷mêd buc ya

lam la vêl, lêc Iso nêb ob kô kitaaên nivîha vô ma, lêc ma nêbê tiyiên ma, om Iso byag levac di myag môp wê ob pilepac nilô di kô kitaaên nivîha tige, lêc môp ti o yêp lêm.

Il ob la vô Anutu gê lag puunê

¹⁸Gwêbaga xam la kwabo vô Anutu, lêc xam o la kwabo vô susu kibun ga ti tiyi wê xam ob hôm ya vigêm ge lêm. Om xam o tiyi xocbê he Islel ilage lêm. Ên he Islel la le kwabo vô kitôn Sainai, mêd he yê ngwax levac wê tum vac vigwe tige, di mapitoc wê mapitoc ta ge hivun kitôn tige xôn, di vigwe viyii levac mabu, ¹⁹di vuac tyuc vac, di he ngô vya ti, lêc he nêl ên he nêbê he ob ngô vya tige tii vac lêm, ²⁰ên he xona mabu yocên ên vya wê nêl ên nêbê,

“Xomxo ti obêc lii vigê lec kitôn tiga ge od xam nêx i ya ngidax ên i yib. Di bwoc ti obêc kê kitôn tiga ge od xam hi i yib hixôn.”

²¹He Islel yê di ngô, om xona mabu, di Moses nêl ên nêbê, “A êno xona mabu di a yetac hixôn.”

²²Lêc il o la vô kitôn Sainai tiyi xocbê he Islel ilage lêm. Nge, il la kwabo vô Anutu om tiyi xocbê il la lec kitôn bangwe lê nêbê Saion di la dô vac Anutu maviha ben Jerusalem. Vigwe yuu ge tixuu lec Anutu ben lag puunê. Om il obêc mila tulec angela tibeac wê tibeac hiwocên wê he kitucma di pimil Anutu ge, ²³di il ob la dô hixôn Anutu nue wê Anutu kivuu he lê pyap gê lag puunê ge, di il ob la le vô Anutu wê obêc yaxên xomxo vihati nên môp yuu kiyang ge, di il ob la tulec xomxo vông vinên ilage kinu. He gee wê xomxo nivîha om Anutu vông he vô nivîha nôn. ²⁴Di il ob la le vô Yesu wê vông kiyang paha wê Anutu hilu vô il ge vô nôn lec ya ici va hi wê kipyax sea ge. Ilage Ebel yib di hi kipyax sea, lêc Yesu hi luu Ebel hi vêl, ên Yesu hi nêl kiyang nivîha kitong bêga ên nêbê Anutu kitya il nêd nipaên vêl.

Xam viac xam

²⁵Xam viac xam di le i lêc vô ninyam kitu vô Anutu kiyang wê nêl vô xam ge lêm. Ilage Moses nêl Anutu kiyang kitong vô he Islel, lêc he ngôên ma, om Anutu vông myaviwen vô he di he o tiyi wê he ob pec ên myaviwen tige lêm. Di gwêbaga Anutu dô lag puunê di vông kiyang lam vô il. Om xam obêc vô ninyam kitu vô kiyang wê Anutu vaci vông ge od xam ob pec ên myaviwen nipaên wê Anutu ob vông vô xam ge lêm. Nge, xam obêc kô myaviwen luu wê xomxo ilage kô ge vêl. ²⁶Ilage Anutu vya vông kibun yoc. Di gwêbaga Anutu nêl vô il pyap ên nêbê, “Obêc buc timuên ge a obêc vông kibun i yoc tii vac nang. Lêc o kibun pileva lêm. Nge, a obêc vông lag yuu xôn kibun i yoc.” ²⁷Anutu nêl bêge, om kiyang wê nêl ên nêbê, “A obêc vông kibun i yoc tii vac nang”, kiyang tige kehe bêga nêbê lag yuu kibun wê Anutu tung ilage obêc yoc di xôa obêc ma, lêc Anutu ben wê yocên obêc ma ge wê ob dô.

²⁸Mêgem gwêbaga il ob pimil Anutu lê ên wê il ob la dô vac i ben wê ob yoc lêm ge. Om il ob kitaa vô Anutu di vông i yuac i tiyi wê Anutu obêc yê nivihâ ge, di il ob xona ên i, di vông i lê i vô levac, ²⁹ên Anutu wê il vông i vin i ge tiyi xocbê ngwax mahelac wê obêc ya susu vihati ma vêl ge.

Môp toto wê Anutu yê nivihâ ge

13 ¹Xam wê xam vông i vin Kilisi ge, xam xêmyaa i vin lecma i tiyi buc vihati. ²Di xam nim i o lêc ma lec tibii wê val vô xam ge lêm. Nge, xam kô he mi loc vac bom di viac he nivihâ, ên ilage xomxo ya kô angela mi la vac ben di viac he nivihâ, lêc he lungên di so ên nêb mêd tibii kibun ga.

³Lime vông vinên wê tibii tung he la dô vac xumac kalabuhu ge, xam lêc xovô he i tiyi xocbê xam dô hixôn he ge. Di xam xovô he wê tibii vông he ninivi kilê viyin ge, ên he ninivi tiyi xocbê il nidnivi ge.

⁴Xam vihati, xam lêc wê môp iimaên i tiyi môp nivihâ di le i lêc vông môp tige i vô nipaên lêm, ên Anutu obêc vông myaviwen vô he wê vông môp yôdac vêx yuu vux hixôn he wê vông môp iimaên vô nipaên ge.

⁵Le i lêc vông nilô i loc vô mone tived lêm. Nge, xam lêc xovô bêga bê, “Mone wê a kô ge, a kô tiyi a pyap.” Xam lêc nêl bêge, ên Anutu nêl bêga ên nêbê, “A obêc sea ông di vô nimig vô ông lêm.” ⁶Anutu nêl bêge, om il xonaên ob ma di il ob nêl bêga bê,

“Apumtau vaci ob ngidu a xôn, om a ob xona lêm. Letya tiyi wê ob vông a vô nipaênê?”

⁷Xam xovô lime gyovixa wê dô ilage, ên he nêl Anutu kiyang vô xam di he mi timu vô môp vông vinên di i la tyip lec buc wê he yib ge hixôn. Om xam xovô di timu vô môp vông vinên wê he vông ilage.

⁸Yesu Kilisi dô ila di gwêbaga di obêc dô luta, di obêc pilepac i lêm. ⁹Xomxo ya obêc val nêl xolac ba vô xam ên nêb ob pilepac xam la vac môp wê he vông ge od xam o lêc sea Anutu di timu vô môp wê he vông ge lêm. Ên xomxo ya nêl kiyang kityooên lec susu yaên ên nêbê xomxo obêc timu vô ge od ob vô nivihâ vô he. Lêc môp tibêge o tiyi wê ob ngidu il xôn ge lêm. Nge, vizid wê Anutu vông ge wê obêc ngidu il xôn di il obêc dô nivihâ ya.

Daa wê Anutu yê nivihâ ge

¹⁰Il alta ti le. Alta tige tixuu lec Yesu wê yib ên il nêd nipaên ge, om gwêbaga xomxo obêc timu vô Moses xolac di si daa ge, od môp wê Yesu yib ge ob ngidu he xôn lêm. ¹¹Xomxo ti wê Hetplis ge kô bwoc hi mi la vac xumac lilo sel nilô di vông i tu daa ên nêb Anutu i yê di kitya he nêb nipaên vêl. Lêc bwoc nôn ge, he kô mi la si vac ngwax gê ninyawehe. ¹²Om vô buc wê Yesu yib ge he kô i êno mi la vac vîgwe ninyawehe, di

i kilê viyin levac di yib ên nêb ob kitya xomxo vihati nên nipaên vêl di vông he vô paha lec ya i

hi. ¹³Yesu la vac vîgwe ninyawehe di kilê viyin, om il êno ob kilê viyin i tiyi xocbê i kilê ge. ¹⁴Ên il xovô ên il nêbê il bed kibun ga ob yêp luta lêm. Om il ob myag vîgwe ti wê il ob tulec timuên ge. ¹⁵Om il ob hi vixad i pec ên Anutu i tiyi buc vihati ên yuac wê Yesu vông ge. Ên daa wê Anutu nêb il ob vông vô i ge bêga, il ob hi vixad i pec ên i di nêl i lê i yêp seac vac myad i tiyi buc vihati.

¹⁶Le i lêc sea môp wê xam mi ngiduma xôn nivihã ge lêm. Om xam titang susu wê xam vông ge i loc vô lime wê nêb susu maên ge ên i ngidu he xôn. Ên môp tibêgee tiyi xocbê daa wê xam vông vô Anutu ge, om Anutu yê môp tibêge nivihã.

¹⁷Lime gyovixa mi viac xam nivihã ên he xovô ên he nêbê obêc buc timuên ge he ob nêl yuac wê he vông ge kitong vô Anutu ên i yaxên he. Om xam ngô he kiyang di loc vac he kwa ngibi, ên xam obêc vông bêge ge od he ob vông he yuac hixôn nilô nivihã. Lêc obêc ma ge od he ob vông hixôn nilô viyin, di ob vô nivihã vô xam lêm.

Kitaaên wê ob ngidu il xôn ge

¹⁸Xam lêc kitaa vô Anutu ên i ngidu xe xôn. Xe xovô ên xe nêbê nipaên ti o yêp vac xe nilôm lêm, ên xe nêb xe ob timu vô môp bôbac i tiyi buc vihati. ¹⁹Om a nêbê xam kitaa vô Anutu ên i vông a lôc vô xam lutibed.

²⁰Anutu ge kiyang malehe kehe, di i tîpi vô il lig Apumtau Yesu kidi lec mavihã vac yibên. Yesu yib di kipyax i hi sea om vông kiyang wê Anutu hilu nêbê ob yêp luta ge vô nôn lec vô il, om Yesu tu il nêd levac wê viac il tiyi xocbê xomxo viac bwoc sipsip ge. ²¹Om a kitaa vô Anutu ên a nêb i vông vizid yuu susu nivihã vihati vô xam êdêc xam timu vô môp nivihã wê i vông ge. Di a kitaa vô i ên a nêbê i vông yuac wê i yê nivihã ge vac xam nilôm lec Yesu Kilisi lê. Om il ob pimil Kilisi lê di vông i lê i vô levac i yêp luta lêc luta. Nôn.

Kiyang viwen timuên

²²Xam lige, a kidu xam ên a nêbê xam ngô kiyang vihati wê a kivuu vac kipihac ga ên i ngidu xam xôn. Ên kiyang wê a kivuu vô xam ga, a kivuu kiyang myabo. ²³Xam ngô lê. Tibii piwelac il lig Timoti vac kalabuhu di vông i la. Om Timoti obêc val vô a lutibed ge od xii xôn ob mîloc vô xam.

²⁴Xe nêl vidiiên vô xam gyovixa hixôn xomxo vông vinên vihati wê dô hixôn xam ge. Il lige vông vinên wê dô vac vîgwe Itali ge, he êno nêl vidiiên vô xam.

²⁵Vizid nivihã wê Anutu vông ge i ngidu xam vihati xôn. Nôn.

JEMS

Kipihac wê Jems kivuu ge

1 ¹A Jems, a ga Anutu yuu Apumtau Yesu Kilisi nu yuac a, om a kivuu kipihac tiga i loc vô xam Islele wê xam pum lec Jekop nue vigê yuu di tô mi la yuu ge, léc gwêbaga xam sea bom di toto loc dô vac tibii viyang ba ben. A nêl vidiiên vô xam.

Viyin i vông xovôên vô il

²Xam lige, buc wê xam obêc tulec viyin ya ge od xam nilôm i o léc vô viyin lêm. Nge, xam nilôm i niviha, ³di xam vyac xovô bê viyin tigege tulec xam nêb ob yaxên xam nêm vông vinên, léc wê xam obêc vông i vin Anutu xêkizêc ge od xam obêc le pilihi mi dô. ⁴Om xam le pilihi vac viyin mi dô i tiyi lec buc vihati, êdêc i vô niviha vô xam di vông xam tu xomxo wê niviha lee i tiyi wê xam ob timu vô Anutu kiyang vihati ge.

Xomxo ti piyôp obêc myabo ge od i kitaa vô Anutu

⁵Xam ti piyôp obêc myabo ge od i kitaa vô Anutu bê Anutu i vông piyôp niviha vô i, ge od Anutu obêc vông vô i. Ên Anutu ge wê ob vông susu vô xomxo vihati ge di ob kol ên xomxo ti di kunac i lêm. ⁶Lêc xomxo ti obêc kitaa ge, od i vông i vin xêkizêc, di nilô i o léc vông yuu lêm. Ên xomxo ti wê nilô vông yuu ge tiyi xocbê gwec wê lea vivêê di i vô myapilôhê pileva ge. ⁷Om xomxo tibêge i o léc so bê Apumtau ob vông susu ti vô i lêm, ⁸ên xomxo tibêge mi xo kiyang tibeac di o timu vô môt tibed lêm.

Xomxo wê nên susu maên gee yuu xomxo wê susu tibeac gee

⁹Lige vông vinên wê nên susu maên ge, he i dô hixôn xêyaa niviha, ên wê Anutu hêm he lec niviha ge. ¹⁰Di lige vông vinên wê susu tibeac ge, he i dô hixôn xêyaa niviha ên wê he susu tibeac lê, léc he tiyi xocbê xomxo pileva ge. Ên xomxo wê susu tibeac gee obêc yib tiyi xocbê nita maviya wê vuac ge, ¹¹léc hiyôv obêc linac myapilili ge od ya i ngigo di

maviya nivihā tyo ob yal la vêl di i yib. Om xomxo wê susu tibeac gee obêc vông yuac lec mi dô lê, lêc buc wê obêc yib ge od ob sea yuac yuu susu vihati obêc dô xel, di ob yib mi la pileva.

Susu wê ob yaxên xomxo ge

¹²Xomxo ti obêc le pilihi vac viyin ge od i xêyaa i vô nivihā, ên Anutu obêc pimil i di vông i dô maviha luta tiyi xocbê hilu kiyang pyap nêb ob vông vô xomxo wê he xêyaa vin lec i ge. ¹³Lêc xomxo ti nilô obêc kidu i nêb i vông soên ti ge od i o lêc nêl bê Anutu didii i vac nipaên tige lêm. Ên nipaên ti o tiyi wê ob yaxên Anutu ge lêm, di Anutu ob didii xomxo ti vac nipaên lêm. ¹⁴Lêc yaxên tige kehe yêp vac il toto nilôd, om kidu il nêb il vông môp soên. ¹⁵Nang dêc nipaên wê yêp vac il nilôd ge vô nôn lec di vông il vac nipaên. Om nipaên obêc vô levac ge od nôn bêga nêbê il obêc xib di la xôa ma timuên.

¹⁶Om xam lige, le i lêc vông i vin kiyang kityooên wê nêl ên nêbê Anutu ob didii il vac nipaên ge lêm. ¹⁷Ên vizid yuu susu nivihaviha vihati lam gê lag puunê. Ge Mag Anutu vaci vông i lam vô il. Anutu ge xêseac kehe, di ob pilepac i xocbê hiyôv yuu dentuc ge lêm. Nge, i xêseac kehe wê obêc dô luta. ¹⁸Anutu vaci xovô nêb ob vông il tu i nue om vông il vô paha lec ya kiyang nôn wê i vông ge. Anutu vông bêge, ên nêb il tu i nue mugên wê il luu susu vihati wê i tung ge vêl.

Il ob ngô Anutu vya di timu vô

¹⁹Xam lige, xam vyac xovô môp bêga bê xam vihati ngô kiyang mi xovô nivihā lê, di le i lêc nêl kiyang lec lutibed lêm, di le i lêc kunacma decdec lêm. ²⁰Ên xêyaa myavinê wê xomxo vông ge ob vông môp nivihā wê Anutu vông ge i vô nôn lec lêm. ²¹Om xam sea môp nipaên yuu judajuda wê yêp vac xam nilôm ge, di xam loc vac Anutu kwa ngibi di hôm kiyang wê Anutu vông mi i yêp vac xam nilôm ge xôn. Ên kiyang tige tiyi wê obêc vô xam vêl ên nipaên di vông xam lax vô Anutu.

²²Om xam timu vô Anutu kiyang vihati di xam o lêc ngô pileva lêm. Ên xam obêc ngô pileva ge od xam kityoo xam. ²³Ên xomxo ti obêc ngô Anutu kiyang lê, lêc ngô pileva di o timu vô lêm ge, od ge tiyi xocbê xomxo ti yê manôn vac deac ge. ²⁴Yê manôn vac deac pyap lêc la ge od o xovô manôn wê yê vac deac ge lêm. ²⁵Anutu xolac nivihā ge wê piwelac il vêl ên nipaên wê ku il xôn ge, om xomxo ti obêc xovô xolac tige nivihā mi timu vô, di o ngô pileva di lungên lêm ge, od xomxo tige obêc dô hixôn xêyaa nivihā tiyi lec buc vihati.

²⁶Xomxo ti obêc xo nêbê i xomxo nivihā ên wê mi vông lilo di mi kitaa vô Anutu ge, lêc o viac mya nivihā lêm ge od kityoo i di vông lilo yuu kitaa ge pisiv. ²⁷Xomxo vông vinên nêb môp wê Mag Anutu ob yê nivihā ge bêga nêbê il ob ngidu pibua yuu vêxôv wê dô vac viyin ge xôn, di il ob viac il nivihā êdêc môp kibun ga i o lêc vông il vô nipaên lêm.

Il ob xê xomxo vihati i tiyima

2 ¹Xam lige, xam vông i vin Apumtau Yesu Kilisi, wê il nêd levac di xêseac kehe ge, om xam o lêc hôm xomxo wê lê levac ge lec di vô nimim vô xomxo wê nêd susu maên ge lêm. ²Ên obêc tiyi xocbê xam kitucma mi dô lê, lêc xomxo yuu miloc vô xam, xomxo ngwe ob miloc hixôn ngakwi yuu vunac vunac niviha, di ngwe ob miloc hixôn nêd ngakwi nipaên. ³Mêd xam obêc hôm ngwe wê ngakwi niviha ge lec di nêl vô i bêga bê, “Lam dô lec sia niviha tiga,” di nêl vô xomxo susu maên ngweo bêga bê, “Ông loc le ganê, mad lam dô nêd vô a vixag ga.” ⁴Xam obêc vông bêge ge od ge xam yaxên xomxo ya piyôp soên wê xam vông ge mi wê xomxo ya niviha di wê ya nipaên.

⁵Xam lige, xam ngô lê. Xomxo wê susu maên gê kibun ga ge wê Anutu vinoo he pyap nêb he i tu xomxo wê vông vinên xêkizêc ge, di nêl nêb he ge wê ob la dô vac i ben lag puunê di kô vizid niviha wê Anutu hilu pyap nêb ob vông vô xomxo wê he xêyaa vin lec i ge. ⁶Om bêna lêc xam vông xomxo wê susu maên ge vô nipaên mi dô hixôn ni yocênê? Xam xovô ên xam nêbê viyin lam gê na vô xamê? Xam xovô bê xomxo wê susu tibeac yuu mone levac ge wê mi vông viyin vô xam di kô xam mi la vac kot ge. ⁷Xam vông i vin Yesu lê di tu i nue, lêc xomxo wê mone levac ge wê mi so vya vô lê niviha tige, lêc bêna lêc xam kô he lecê?

⁸Il Apumtau Anutu nêl kiyang ti mi i yêp vac xolac bêga ên nêbê, “Ông xêmyaa i vin lec xomxo baba ge i tiyi xocbê ông xêmyaa vin lec ôcông va ge.” Om xam obêc timu vô kiyang tige ge od xam vông môt niviha mêgê. ⁹Lêc xam obêc hôm xomxo mangwe lec mi pimil he di wê mangwe nipaên ge od xam vông ge so, di xolac nêl xam nêd kitong nêbê xam vông nipaên. ¹⁰Ên xomxo ti obêc timu vô xolac vihati niviha, lêc vông bo ti la tiyiên ma ge od tiyi xocbê pwoolac vihati ge vac. ¹¹Ên Anutu nêl bêga nêbê, “Xam o lêc vông yôdac vêx yuu vux lêm,” di nêl hixôn ên nêbê, “Xam o lêc hi xomxo i yib lêm.” Om yôdac vêx yuu vux obêc ma, lêc ông hi xomxo ti yib ge od ông vông xolac vihati vô nipaên. ¹²Om xam vyac xovô di vông môt yuu kiyang vihati i tiyi xocbê kiyang wê yêp vac Anutu xolac ge. Ên xolac tige wê piwelac il vêl ên nipaên di vông il lôm dô vac niviha ge, om buc timuên Anutu obêc yaxên il nêd môt lec xolac tige. ¹³Mêgem xomxo ti obêc xo vîgwe pişiv ên xomxo baba lêm ge od Anutu obêc xo vîgwe pişiv ên xomxo tibêge lec buc wê ob titô il nêd kiyang ge lêm. Lêc xomxo wê xo vîgwe pişiv ên xomxo baba ge, ge wê obêc la dô niviha vô buc wê Anutu ob titô il nêd kiyang ge.

Vông vinên nôn yuu vông vinên mayibên

¹⁴Xam lige, xomxo ti obêc nêb i xomxo vông vinên, lêc o vông môt niviha hixôn lêm ge od i nêd vông vinên ge, mya nêl pişeva di o tiyi wê

ob vô i vêl ên nipaên di vông i dô vac niviha ge lêm. ¹⁵Xam lime wê ngakwi yuu yaên ma ge ti obêc miloc vô xam, ¹⁶lêc xam ti obêc nêl vô i bêga bê, “Loc hixôn xêmyaa niviha, di vinyum ngakwi lec ên lea di wa yaên ên i den ông.” Xam obêc nêl bêge, lêc xam obêc vông yaên yuu ngakwi wê ob ngidu i ninivi xôn ge lêm ge od kiyang tige ob vô niviha vô i tibêna? ¹⁷Il nêd môm vông vinên tiyi bêge. Ên vông vinên wê il vông ge obêc vông môm niviha ti lêm ge od il nêd vông vinên ge mayibên.

¹⁸Lêc xomxo ti mêd obêc nêl bêga bê, “A ga wê a vông i vin di ông ge wê ông mi vông môm niviha.” Lêc a ob nêl vô i bêga bê, “Ông nêb ông vông i vin lê, lêc ông o vông môm niviha ti hixôn lêm. Om ông nêb vông vinên ob yêp seac mi xe xê tibêna? Dom a ga, a vông i vin nôn, om môm niviha wê a mi vông ge nêl vông vinên wê a vông ge kitong seac.” ¹⁹Ông vông i vin ên ông nêbê Anutu tived. Ge niviha lê, lêcom vimwo nipaên êno vông i vin kiyang tige di xona mabu, lêc he o tu Anutu nue lêm. ²⁰Ông ge piyôp maên, ên ông vông i vin pileva di ông o vông môm niviha hixôn lêm, om ông nêb vông vinên ge mayibên di nôn ma. Lêc mêd ông nêb a nêl kiyang tige kehe kitong vô ông, om ông ngô lê. ²¹Ilage il bug Eblaham vông nu Aisak tu daa vô Anutu tiyi xocbê Anutu nêl vô i ge, om Anutu yê môm wê i vông ge nêb i xomxo niviha. ²²Om ông xovô bêga bê Eblaham vông i vin Anutu di vông môm niviha hixôn, om môm niviha wê ivông ge vông i nêb vông vinên vô nôn lec. ²³Mêgem kiyang wê yêp vac xolac ge vô nôn lec bêga nêbê, “Eblaham vông i vin Anutu om Anutu yê vông vinên wê i vông ge di nêl nêbê i xomxo niviha.” Di Anutu yê Eblaham nêbê i nu wê yuu xêyaa vin lecma ge. ²⁴Om il ob xovô bêga bê Anutu ob yê nêbê xomxo ti niviha lec vông vinên pileva lêm. Nge, Anutu obêc yê nôn niviha wê yêp seac vac vông vinên wê i vông ge od ob nêl bê i xomxo vông vinên nôn.

²⁵Tiyi xocbê môm wê vêx yôdac Lehap vông ge. Ên xomxo yuu wê Josua vông yuu la ên nêb yuu loc yê vîgwe ge, Lehap viac yuu niviha di vông yuu lax mi la môm bangwe mi la, om Anutu yê vêx tige niviha lec yuac wê i vông ge. ²⁶Om il ob xovô bêga bê xomxo ti obêc vông i vin ya mya pileva di o vông môm niviha hixôn lêm ge od vông vinên wê i vông ge mayibên, tiyi xocbê xomxo ninivi wê myakilôhô la vêl di ninivi vaci yêp ge.

Il ob viac myad i niviha

3 ¹Xam lige, xam o lêc nêl bê xam tibeac ob tu xomxo xolac nêlên lêm, ên il xovô bê buc timuên wê Anutu obêc titô il nêd kiyang ge od obêc pilii xe wê xomxo xolac nêlên ge, xe nêb kiyang lê, lêc vông myaviwen nipaên vô xe luu xomxo baba vêl. ²Il vihati mi vông môm soên, lêc xomxo ti obêc nêl kiyang niviha di ti soên ma ge od xomxo tibêge niviha yang, tiyi wê ob viac i ninivi yuu môm vihati niviha êno ge. ³Xam

xovô lê. Il obêc tung ain nipwo tya vac xôhô mya ge od il ob pop xôhô nôn levac tige ya susu nipwo tya gedi i la bôbac vô môm wê il nêb il ob la vô ge. ⁴Di xam xovô lec sip êno. Sip ge susu mabu yocên lê, léc obêc le pileva ge od lea obêc kô mi la vac gwec. Di sip stia ge susu nipwo tya lê, léc xomxo ti wê mi kô sip ge obêc hóm lec mî ngibina ge od sip la bôbac vô môm ti wê nêb ob la vô ge. ⁵Di get êno bêge. Il get ge nipwo tya, léc yong i tiyi xocbê susu levac ti.

Di xam xovô lec ngwax. Ên ngwax nipwo tya tiyi wê ob ya nagyi levac ma vêl. ⁶Di il get ge tiyi xocbê ngwax. Ên il get wê dô vac il myad ge keac kiyang nipaên tibeac di vông il nidnivi vihati vô nipaên. Seten vaci vông nipaên vac il get, mêmeg tum mahelac xocbê ngwax ge lec il nêd môm di ya i vô nipaên. ⁷Xomxo tiyi wê ob kô bwoc vimen yuu menac di myel yuu lilii wê dô vac nita di dô vac mia ge viyang viyang di vông he vô malehe lec ge, om xomxo mi vông bêge. ⁸Léc xomxo ti o tiyi wê ici va ob vông get vô malehe lec ge lêm. Ên il get mi nêl kiyang nipaên vaxvax tibeac om nipaên tige la vông xomxo nilô vuac di hibû sea. ⁹Il pimil Mag Apumtau ya il get lê, nang dèc il get so vya vô xomxo wê Anutu tung he tiyi ici va kinu ge. ¹⁰Om kiyang yuu lam vac il myad tibeac. Ngwe, il pimil Anutu, di ngwe, kiyang nipaên. Xam lige, môm bêge tiyiên ma vêl. ¹¹Mia numên yuu mia gwec, yuu xôn o pituv vac maliyuhu tibeac lêm. ¹²Xam lige, kwacsung mêd tiyi wê ob vuac nôn hîguc ge, me? Me xeb tiyi wê ob vô nôn xocbê gulac nôn ge, me? Ma vêl. Di gwec êno o tiyi wê ob pilepac mia numên ge lêm. Om xam xovô bêga bê xomxo wê kiyang nipaên yêp vac i nilô ge od ob nêl kiyang nipaên, dom xomxo wê kiyang nivîha yêp vac i nilô ge od ob nêl kiyang nivîha.

Piyôp yuu xovôên nivîha lam vô Anutu

¹³Xomxo wê piyôp yuu xovôên nivîha ge od i léc tup vô môm nivîha di i o léc yong i lêm, êdêc xomxo i yê di xovô bê i xomxo xovôên nôn. ¹⁴Léc xam obêc dô hixôn nilôm nipaên vô xomxo ya di xam obêc xovô nêbê xam ob vông i tiyi wê xam nilôm xovô ge ên i vô nivîha vô xacxam va ge, od xam o léc yong xam bê xam piyôp levac lêm, ên ge xam pwoo kiyang nôn di nêl kiyang kityooên. ¹⁵Ên xovôên tibêge o lam gê lag puunê vô Anutu lêm. Nge, ge nipaên kibun ga wê xomxo nilô xovô di Seten vaci tu kehe ge. ¹⁶Ên xomxo obêc dô hixôn nilô nipaên vô xomxo ya, di obêc xovô nêbê he ob vông i tiyi wê he nilô xovô ge ên i vô nivîha vô heche va ge od he ob dô vac nivîha ti lêm. Nge, he ob dô vac viyin di nipaên viyang viyang obêc hivun he xôn. ¹⁷Léc xomxo wê kô xovôên nivîha vô Anutu ge od ob vông môm bêga bê nipaên ti o yêp vac he nilô lêm, di he dô vac malehe, di he lum nêl kiyang voma, di he vô nînya lehe vô lie kiyang, di he xo vigwe pisiv ên xomxo di vông môm nivîha vô he, di he vông môm nivîha vô xomxo vihati tiyima, di he vông i vin nôn di o nêl ya

mya pileva lêm. ¹⁸Di xomxo wê nêl kiyang malehe vô lie ên nêb he xôn ob dô hixôn xêyaa nivîha ge, ge tiyi xocbê he xin vê vac yuac om vê tige obêc tyip mi vô nôn nivîha.

Xomxo wê xêyaa vin lec susu kibun ga ge vông vevac vô Anutu

4 ¹Xame, xam kunacma di nêl kiyang vevac voma ên va? Kehe bêga bê xam nêl nêlôm ngaên vông xam nim nyag voma di xam kunacma di hima lec. ²Ên xam xêmyaa vin lec susu viyang viyang gee ên xam nêb xam ob kô lê, léc xam kôên ma, om xam nêbê xam ob hi xomxo i yib lec. Di xam do mam vô susu viyang viyang gee, léc tiyiên ma wê xam ob kô ge, om xam kunacma di hima lec. Xam o kô susu wê xam nêb xam ob kô ge lêm, di kehe bêga bê xam o mi kitaa vô Anutu lec susu tige lêm. ³Léc buc ya xam kitaa vô Anutu ên xam nêb i vông susu vô xam lê, léc Anutu vôngên ma, ên xam o kitaa i la nivîha lêm. Nge, xam kitaa ên xam nêb Anutu i vông susu wê ob vô nivîha vô xaxam va ge. ⁴Xam ge wê xam sea Anutu xolac ge mêge. Ên xomxo xêyaa obêc vin lec susu yuu môp kibun ga ge, od ge tiyi xocbê he vông vevac vô Anutu ge, léc mêd xam lungên tige, me? Ga a nêl vô xam ên a nêbê xomxo ti obêc vông nilô la vô susu kibun ga ge od tiyi xocbê vông vevac vô Anutu. ⁵Ên kiyang yêp vac xolac bêga nêbê, “Il kinud wê Anutu tung vac il nilôd ge, Anutu yê xôn nêb il vông i loc diluhu vô ici va.” Kiyang nêl bêge, léc xam mêd xo ên xam nêb Anutu nêl kiyang ga kityooên vô xam, me?

⁶Léc Anutu xêyaa vin lec il luu vêl om nêb ob ngidu il xôn, tiyi xocbê kiyang wê yêp vac xolac bêga ên nêbê, “Xomxo wê yong he vô Anutu ge, od Anutu obêc ngiloo he vêl. Léc xomxo wê vông he vô nipwo lec di la vac Anutu kwa ngibi ge, od Anutu obêc xo vigwe pisiv ên he di ngidu he xôn.” ⁷Om xam pilepac xam di loc vac Anutu kwa ngibi. Di xam le pilihi di tii Seten ên i pec vêl ên xam. ⁸Xam loc kwabo vô Anutu, ên xam obêc la kwabo vô Anutu ge od Anutu êno ob lam kwabo vô xam. Léc xam ge tibii nipaên, om xam pilepac nilôm i vô paha lec i tiyi xocbê xomxo lipac vigê vô paha lec ge. Xam nilôm ge vông yuu, om xam sea vilu wê nipaên ge di vông nilôm yuu piyôp i loc diluhu vô Anutu. ⁹Di xam nilôm i vô viyin di xam byag ên nêl nêl nêl nêl. Gwêbaga xam nap hixôn xêmyaa nivîha, lêcom xam pilepac nilôm napên di byag hixôn nilôm viyin ên nêl nêl nêl wê xam vông ge lê. ¹⁰Xam pilepac xam vô Apumtau manôn, ên xam obêc vông bêge ge od Apumtau obêc hêm xam lec di vông lê levac vô xam.

Il ob so vyad vô lige ngwe lêm

¹¹Xam lige, xam o léc so vyam vô lime vông vinên lêm. Ên xomxo ti obêc so vya vô li ngwe, me yaxên i nêb i xomxo nipaên ti ge od ge tiyi xocbê so vya vô xolac di yaxên nêbê xolac ge nipaên. Di xam obêc yaxên

xolac bêge ge od xam o timu vô xolac lêm. Nge, xam dô tiyi xocbê xomxo wê nêb ob yaxên xolac mi yê bêc nivîha me nipaên ge. ¹²Lêc Anutu tîbed wê tu xolac kehe ge di i tîbed wê ob yaxên xomxo ge. Om Anutu tiyi wê ob hôm xomxo lec, di i tiyi wê ob kitya xomxo vêl ge. Lêc xam letya wê xam nêb xam ob yaxên lime ge?

¹³Xam ngô lê. Xam ya yong xam di nêl ên xam nêbê, “Gwêba me titige od xe ob la vac vigwe levac tiganê, ên la dô klîsmas ti di vông yuac bisnis ên kô mone levac lec.” Lêc a ob nêl vô xam bê ¹⁴xam o xovô susu wê ob val vô xam titige lêm. Di buc wê xam ob dô mamviha ge, od xam ob dô bêna? Ge xam lungên, ên xam dô ge tiyi xocbê ngwaxlu wê ob didii loc myabo tya di xôa ma lutibed ge. ¹⁵Om xam lêc nêl kiyang ngwe bêga bê, “Apumtau obêc tyuc lec nêb il dô madviha di vông yuac ngwe ga me ngwe ganê ge, od il ob vông.” Xam obêc nêl ngwe bêge od obêc nivîha. ¹⁶Lêcom xam yong xam di pimil xam, lêc kiyang tîbêge nipaên. ¹⁷Om xam xovô lê. Xomxo ti obêc xovô môp nivîha wê Anutu nêb il vông ge lê, lêc vôngên ma ge od i nên so.

Xomxo wê mone yuu susu tîbeac gee

5 ¹Xam wê mone levac yuu susu tîbeac gee, xam ngô di xovô viyin wê obêc val vô xam ge lê, di xam byag di iac ên xam lê. ²Susu vihati wê xam vông ge pital sea, di xam nêm vinyumên vihati ge, mun yuu gwaakivac kitov sea. ³Di xam nêm mone gol yuu silva ge, guva iac sea, om guva tige obêc nêl xam nêm nipaên kitong, di myavinê obêc ya xam nimnivi tiyi xocbê ngwax ya ge. Ên xam kituc susu yuu mone tîbeac dô, lêc buc tîmuên wê xam ob kô myaviwen lec ge vô kwabo lec. ⁴Xam ngô lê. Xomxo wê vông yuac vô xam lec yaên gee, xam mi kityoo he ya mone nipwo tya di hôm viwen xôn. Om he nên mone wê dô vô xam ge nêl xam nêm nipaên kitong, di xêkizêc kehe Apumtau ngô xam nêm soên wê nume yuac tîgee nêl ge. ⁵Tiyi buc vihati wê xam dô kibun ga, xam kô susu nivîhaviha tîbeac di dô hixôn xêmyaa nivîha, di xam vet nilôm ya yaên mi i pup lec, lêc buc wê myaviwen ob kitya xam vêl ge vô kwabo lec pyap. ⁶Xam mi vông kot vô xomxo nivîha mi hi he yib, lêc he o hi xam di vông myaviwen ti lôc vô xam lêm.

Il ob le pîlihi vac viyin di dô bin Apumtau

⁷Om xam lige vông vinên, xam le pîlihi vac viyin di dô bin buc wê Apumtau obêc lop mi lôm ge. Il xovô ên il nêbê xomxo wê vông yuac yaên ge nêb ob kô yaên nôn om dô bin buc wê lun ob tô lec yaên tige ên nêb i vô nôn nivîha. ⁸Om xam le pîlihi di dô bin Apumtau êno bêge. Di xam vông i vin xêkizêc ta mi dô, ên buc wê Apumtau obêc lôm ge vô kwabo lec.

⁹Xam lige, xam o lêc kunac lime di so vyam vô he lêm, êdêc kô myaviwen nipaên lec lêm. Ên xomxo ti wê obêc yaxên il nêd kiyang

timuên ge val le kwabo pyap. ¹⁰Xam lige, xam xovô plopete môp ilage wê he nêl xolac lec Apumtau lê di tibii le vông viyin levac vô he, lêc he le xêkizêc di kilê viyin. Mêgem xam kilê viyin mi timu vô he vixa xocbê he kilê ge. ¹¹Ên il mi nêl ên il nêbê xomxo wê le xêkizêc vac viyin gee, he ob dô hixôn xêyaa nivîha. Xam xovô Jop kiyang pyap wê nêl ên nêbê Jop le pilihi vac viyin viyang viyang wê tulec i ge, di timuên Apumtau vông môp nivîha vô Jop tii vac, ên Apumtau ge wê xo vigwe pisiv ên il vihati om ob ngidu il xôn.

Il ob nêl bê il nêl kiyang nôn lag puunê lêm

¹²Xam lige, a ob nêl kiyang levac ti vô xam mi xam ngô lê. Kiyang bêga bê xam ti obêc nêl kiyang ti ge od xam o lêc nêl lag puunê me kibun me susu ti lê hixôn ên i ngidu ông kiyang xôn lêm. Nge, xam obêc lee yuu lec xomxo ngwe kiyang ge od xam nêl myabo bê “ngee”, ge od pyap. Lêc ma ge od xam nêl bêga bê “ma”, ge od pyap. Xam nêl bêge êdêc myaviwen nipaên i o lêc lôm lec xam lêm.

Kitaaên wê xomxo vông vinên vông ge xêkizêc

¹³Xam lime ti obêc tulec viyin ge od i kitaa vô Anutu lê. Me xam ti xêmyaa obêc vô nivîha ge od i vông lilo vô Anutu hixôn pimilên. ¹⁴Lêc xam ti obêc vông yidac ge od i nêl gyovixa i lam, ên he i lam lipac wel lec i ninivi lec Apumtau Yesu lê di kitaa lec i bê Anutu i vông i vô nivîha lec. ¹⁵Di he obêc vông i vin Anutu di kitaa ge od Apumtau Anutu obêc vông xomxo tige vô nivîha lec tii vac, di i nêl nipaên obêc yêp ge od Anutu obêc kitya vêl. ¹⁶Mêgem xam nêl nêl nipaên kitong vômâ di xam toto kitaa vô Anutu lec lime, ên Anutu i vông he i vô nivîha lec. Ên kitaaên wê xomxo vông vinên vông ge xêkizêc tiyi wê ob vô nôn di ngidu xomxo xôn ge. ¹⁷Xam xovô lec Ilaija lê. Ên Ilaija ge xomxo tiyi xocbê il ga, lêcom kitaa xêkizêc vô Anutu ên nêbê lun i nux, mêgem lun nux tiyi klismas yon di dentuc vigê vilu di sec ti. ¹⁸Nang dêc kitaa nang nêbê lun i val, om lun val mêd yaên tyip mi vô nôn.

Il ob vô il vêl ên môp nipaên

¹⁹Xam lige, xam lime ti obêc sea xolac nôn di la vac môp nipaên, lêc li ngwe obêc didii i lôm vac nivîha ge, ²⁰od xam xovô bêga bê xomxo ti obêc vô li ngwe vêl ên môp nipaên ge, od tiyi xocbê vô li tige vêl ên wê ob yib mi la vac nipaên ge, di Anutu ob kitya i nêl nipaên toto ge vêl.

1 PITA

Kipihac taxlee wê Pita kivuu ge

1 ¹A, Pita, Yesu Kilisi nu sinale a. A kivuu kipihac tiga i loc vô xam wê Anutu nue ge vihati vac vîgwe levac Pontas di Galesia di Kapadosia di Esia di Bitinia hixôn. Ilage tibii vevac tii xam moo sea mi xam loc dô vac vîgwe tige. ²Ilage Mag Anutu xovô pyap ên nêb ob vinoo xam. Om vinoo xam ên nêb xam tu i nue. Di Myakilôhô Ngibua vông xam tu xomxo ngibua ên nêb xam vô ninyam lehe vô Yesu Kilisi kiyang di Yesu i lipac xam vô paha lec ya ici va hi.

Vizid nivîha hixôn kiyang malehe wê Anutu vông ge i loc vô levac vô xam vihati.

Viyin toto obêc tixuu vông vinên wê il vông ge

³Il ob pimil Anutu wê il lig Apumtau Yesu Kilisi Ma yuu Anutu ge lê. Ên Anutu xo vîgwe pisiv ên il luu vêl, om vông il tu xomxo paha xocbê il yubac paha tii vac ge ên wê Yesu Kilisi kidi lec maviha vac yibên. Om il xovô ên il nêbê il obêc dô madviha luta lêc luta, di il bin buc wê Anutu obêc vena kô il ge. ⁴Om Anutu obêc vông nôn nivîha ti vô il bêga nêbê il obêc dô madviha hixôn i. Nôn nivîha tige pitalên obêc ma di obêc vô nipaên lêm di xôa obêc ma lêm. Nge, Anutu viac nôn nivîha tige pyap gê lag puunê mi dîbin xam. ⁵Xam vông i vin Anutu om Anutu viac xam nivîha ya xêkizêc wê i vông ge, di xam obêc la dô mamviha hixôn i, om Anutu viac môp tige pyap wê obêc lam yêp seac timuên.

⁶Xam xovô ên xam nêbê xam obêc la dô hixôn Anutu, om xam mi dô hixôn xemyaa nivîha. Mêlêc gwêbaga Anutu obêc nêl ge od viyin toto ob tulec xam di vông myavinê vô xam. Lêc ob dia lêm. ⁷Anutu ob vông viyin toto tulec xam ên nêb viyin tige i tixuu vông vinên wê xam vông ge ên xam xovô bê vông vinên wê xam vông ge vô xêkizêc lec, me? Xam xovô bêga bê gol ge xomxo mi yê nivîha. Lêc gol tîyi wê ob vô nipaên ge, om xomxo si gol vac ngwax ên nêb ob yê bê gol ob dô xêkizêc vac ngwax me ob didee sea. Di vông vinên wê xam vông ge luu gol vêl. Om viyin wê

tulec xam ge ob tixuu vông vinên wê xam vông ge tiyi xocbê ngwax tixuu gol ge ên nêb vông vinên wê xam vông ge i le xêkizêc ta, di buc timuên wê Yesu Kilisi obêc vena le seac ge od ob pimil xam di yong xam di vông xam lêm i vô levac. ⁸Xam mamnôn o yê Yesu ilage lêm, lêc xam xêmyaa vin lec i. Di gwêbaga xam o wê i lec mamnôn lêm, lêc xam vông i vin i di xam xêmyaa vô nivîha yang ên i, luu susu kibun ga vihati vêl, om tiyiên ma wê il ob nêl vac myad pileva ge. ⁹Di vông vinên wê xam vông ge vô nôn nivîha vô xam bêga nêbê Anutu vô xam vêl ên xam nêm nipaên.

¹⁰Plopete vihati wê dô ilatikwê, he nêl kiyang wê Anutu vông vô he ge yêp seac. Kiyang tige nêl ên nêbê Anutu ob xo vigwe pisiv ên il di vô il vêl ên il nêd nipaên. Kiyang tige vô nôn lec vô il, lêc he plopete ilage lungên kiyang tige kehe. Om he myag di kinêg kiyang wê nêbê Anutu obêc vô il vêl ên il nêd nipaên ge kehe. ¹¹Myakilôhô Ngîbua wê Yesu Kilisi vông ge dô vac he plopete nilô di nêl vô he bêga nêbê, “Obêc buc timuên ge xomxo ti obêc lam kilê viyin toto pyap. Nang dêc obêc la kô xêseac yuu lê levac.” Myakilôhô Ngîbua vông xovôên tibêge vô he di he ngô, lêc he o xovô kehe lêm, om he kinêg ên nêbê, “Xomxo tyo obêc val lec buc tina di ob val tibêna?” ¹²Lêc Anutu nêl kitong vô he bêga ên nêbê, “Xam plopete, a vông kiyang tige lec xomxo tyo vô xam ên a nêb xam loc nêl kiyang tige kitong vô xomxo vihati. Lêc a o vông yuac tige vô xam ên a nêb i ngidu xacxam xôn lêm. Nge, yuac tige obêc ngidu he wê obêc yubac timuên ge xôn.” Anutu nêl bêge vô he ilage, di il xovô ên il nêbê kiyang wê he nêl ge vô nôn lec vô il, di gwêbaga xomxo nêl xolac nivîha tige kehe kitong vô xam mi xam ngô. Anutu vông Myakilôhô Ngîbua wê dô lag puunê ge lam kibun ga, om xomxo nêl xolac vô xam ya xêkizêc wê Myakilôhô Ngîbua vông ge. Di angela êno xo ên nêb ob xovô xolac kehe.

Anutu tyuc il ên nêb il tu xomxo ngîbua i tiyi xocbê ici va ge

¹³Mêgem xam viac piyôp i yêp nivîha, di xam viac xam nivîha di vông xam piyôp yuu nilôm i loc diluhu vô vizid nivîha wê Yesu Kilisi obêc vông vô xam vô buc timuên wê obêc vena seac vô xam ge. ¹⁴Xam dô i tiyi xocbê Anutu nue wê vô ninya lehe vô kiyang wê i nêl ge. Ilage xam lungên Anutu, om xam timu vô môt nipaên wê xam nilôm kidu xam ên nêb xam vông ge. Om le i lêc vông môt nipaên tibêgee i tii vac lêm. ¹⁵Anutu wê vînoo xam ge ici va xomxo ngîbua. Om xam êno, xam tu xomxo ngîbua di timu vô môt nivîha. ¹⁶Ên xolac nêl bêga ên nêbê, “A xomxo ngîbua, om xam êno, xam tu xomxo ngîbua i tiyi xocbê aca va ge.”

¹⁷Xam mi kitaa vô Anutu di nêl bêga bê, “Xe Mag ông.” Di il Mag tige ob yaxên il lec il lêd lêm. Nge, ob yaxên il toto lec il nêd môt yuu yuac wê il vông ge. Om xam xona nêm di vyac xovô Anutu di timu vô môt nivîha wê i vông ge i tiyi buc vihati wê xam dô kibun ga ge. ¹⁸Xam xovô

pyap ên xam nêbê ilage xam dô vac môp wê bume vông ge. Lêc môp tigeo o vô nivihã vô xam lêm. Om Anutu kisuu xam di vô xam vêl ên môp nipaên tigeo. Lêc o kisuu xam ya susu kibun ga xocbê silva me gol wê ob vô nipaên ge lêm. ¹⁹Nge, kisuu xam ya hi wê Kilisi vông ge. Anutu yê Yesu hi tiyi xocbê susu levac. Ilage xomxo si bwoc sipsip nu tu daa vô Anutu. Bwoc sipsip tige ninivi nivihã di ningeac yuu nidodo ti o yêp vac hixôn lêm. Om Yesu tiyi xocbê bwoc sipsip, ên nipaên ti o yêp vô i lêm, om i tu daa vô Anutu. ²⁰Ilage Anutu gên o tung lag yuu kibun lêm, di i nêl pyap ên nêb Yesu i tu daa xocbê bwoc sipsip nu ti. Nang dêc timuên Anutu vông i lam le seac ên nêb i ngidu il xôn. ²¹Yesu lam yib ên il nêd nipaên om il vông i vin Anutu. Anutu tipi vô Yesu kidi lec maviha vac yibên di vông lê levac hixôn xêseac wê i vông ge vô i. Om xam vông i vin pyap di bin nôl nivihã wê Anutu obêc vông vô xam timuên ge.

Anutu xolac vông il vô paha lec

²²Xam ngô Anutu kiyang nôl di vô ninyam lehe vô, om môp tige vông xam nilôm vô paha lec, di vông xam xêmyaa vin lec lime vông vinên vihãti. Di xam o kityoo he lêm. Nge, xam xêmyaa vin lec he nôl. Xam mi vông bêge, om xam lêc vông yuac xêkizêc di vông môp xêyaa vin lec maên i loc diluhu vô lime. ²³Xam tu xomxo paha tiyi xocbê xam yubac paha tii vac nang ge. Lêc tame o kô xam tii vac tiyi wê xam ob wib ge lêm. Nge, Anutu xolac vông xam vô paha lec, om xam obêc dô mamvihã luta. Xolac tige maviha di obêc yêp luta lêc luta. ²⁴Ên xolac nêl bêga ên nêbê,
 “Xomxo vihãti yang tiyi xocbê pikunta, di lê levac hixôn susu nivihã wê he vông ge vihãti tiyi xocbê maviya. Di pikunta obêc ngigo, di maviya obêc yal la. ²⁵Lêc kiyang wê Apumtau vông ge obêc yêp luta lêc luta.”

Kiyang tige xolac nivihã wê xomxo nêl kitong vô xam ge.

Apumtau tiyi xocbê ngidax wê maviha ge

2 ¹Om xam sea môp nipaên vihãti yang, di sea kiyang kityooên, di sea môp nipaên wê xam viyum vac kiyang nivihã ge, di sea môp wê xam nim nyag vô xomxo ên susu wê he kô ge, di sea môp wê xam nêl kiyang nimi lec xomxo ge hixôn. ²Il xovô ên il nêbê il nuge nipwo mi byag tiyi buc vihãti ên nêb ob lul. Om he mi lul di le lig hixôn xêkizêc di vô levac. Om xam êno byag ên lul wê nivihã ge i tiyi buc vihãti. Lul ge Anutu kiyang nôl. Om xam kitong Anutu kiyang i tiyi buc vihãti ên i ngidu xam xôn di xam le xêkizêc mi dô nimvihã, di i loc tyip lec buc wê xam obêc la dô mamvihã hixôn Anutu ge. ³Ên xam xovô ên xam nêbê xêyaa vin lecên wê Apumtau vông ge vô nivihã vô xam.

⁴Om xam lam vô Yesu. Yesu ge tiyi xocbê ngidax maviha. Lêc xomxo yê ngidax tige nipaên ên nêb tiyiên ma wê ob ngidu xumac xôn ge, om

nêx i la. Lêc Anutu vînoo pyap di yê ên nêb nivîha yang. ⁵Di xam êno ge, xam tiyi xocbê ngidax wê mavîha ge. Om xam tyuc lec ên Anutu i vilu vô xam di vông xam tu xumac ngibua wê Myakilôhông Ngibua ob dô vac ge. Di xam ob vông yuac wê ngibua ge di vông xam tu xocbê daa vô Anutu. Xam vông bêge ên Anutu i xo yuac wê Yesu Kilisi vông ge di yê daa wê xam vông ge i nivîha. ⁶Xolac nêl bêga nêbê,

“Xam ngô lê. A vînoo ngidax nivîha ti. Ngidax tige nivîha yang om tu ngidax levac wê ob le vac xumac xêkitu di hông xumac xôn mi i le xêkizêc. Om gwêbaga a tung ngidax tige dô gê Saion. Om xomxo obêc vông i vin i ge od he ni ob yoc lêm. Nge, a ob vông vông vinên wê he vông ge i vô nôn lec.”

⁷Xolac nêl bêge, om xam xovô pyap ên xam nêbê Kilisi vông nivîha vô xam wê xam vông i vin i ge. Lêc xomxo wê o vông i vin lêm ge, xolac nêl he kitong bêga ên nêbê,

“Xomxo nêx ngidax nivîha tige la ên nêb nipaên, lêc gwêbaga ngidax tyo tu levac mi le vac xumac xêkitu di hông xumac xôn mi i le pilîhi.”

⁸Di xolac nêl kiyang ngwe lec he wê o vông i vin lêm ge bêga ên nêbê, “Ngidax tige wê he obêc vînox vîxa lec, om obêc vông he vô nipaên.”

Kiyang nêl bêge, ên he vô nîmi vô Anutu kiyang, om kiyang tige wê he obêc vînox vîxa lec di vông he vô nipaên ge. Ilage Anutu nêl ên nêb obêc vông bêge vô he.

⁹Lêc xam ge, Anutu vînoo xam pyap mi xam tu xomxo wê Anutu nêb ob viac xam ge, di xam tu xomxo wê xam ob vông yuac vô Anutu tiyi xocbê xomxo wê si daa vô Anutu ge, di xam tu xomxo ngibua, di xam tu xomxo wê Anutu vông ge, di Anutu vînoo xam ên nêb xam loc nêl yuac nivîha wê i vông ge kitong. Anutu tyuc xam om xam sea mapitoc di i didii xam vô xêseac nivîha wê i vông ge. ¹⁰Ilage xam o dô tiyi xocbê Anutu nue ge lêm, lêc gwêbaga xam tu Anutu nue. Ilage Anutu o xo vîgwe pisiv ên xam lêm, lêc gwêbaga Anutu xo vîgwe pisiv ên xam.

Anutu nue yuac il

¹¹Xam lige, xam dô gê kibun ga tiyi xocbê tibii vitevac wê he ob dô buc myabo tya ge. Om a nêl vô xam bê xam kol xam ên môt nipaên wê xam nilôm kidu xam ên nêb xam vông ge. Ên môt nipaên tige wê ob vông vevac vô kiyang nivîha wê yêp vac xam nilôm ge. ¹²Xam tup vô môt nivîha vac tibii madîluhu mahîgun, ên he obêc so ên nêbê xam vông môt nipaên ge od he obêc yê môt nivîha wê xam vông ge di xovô bê he nêl kiyang soên. Om he ob pîmil Anutu vô buc timuên wê i obêc val vô he ge.

¹³Xam tu Apumtau xe om xam xovô i di timu vô môt vîhati wê xomxo levac toto vông ge, di loc vac he kwa ngîbi. Di gavman levac ti wê tu il

badzub ge, xam ngô kiyang wê i vông ge di timu vô. ¹⁴Gavman nue yuac vihati yang ge, xam loc vac he kwa ngibi, ên gavman levac ti wê tu il badzub ge vông he lam vô il ên nêb he i vông myaviwen vô xomxo wê vông môm nipaên ge di he hi i vixa pec ên xomxo wê vông môm nivihha ge. ¹⁵Anutu nêb xam loc vac he gavman kwa ngibi di vông môm nivihha. Ên xomxo wê piyôp maên ge he ya nêb ob nêl kiyang nipaên lec xam, léc môm nivihha vihati wê xam vông ge ob tung he mya xôn. ¹⁶Xam loc dô i tiyi xochê xomxo wê Anutu piwelac he vêl ên kalabuhu ge. Léc o piwelac xam ên nêb xam loc vông môm nipaên lêm. Nge, piwelac xam ên nêb xam loc tu i nue yuac, om xam loc vông yuac wê i vông ge. ¹⁷Xam vông xomxo vihati lê i vô levac di xêmyaa i vin lec xomxo vông vinên vihati yang, di xam xona ên Anutu, di vông gavman levac ti wê tu il badzub ge lê i vô levac.

Il ob timu vô Kilisi vixa di kilê viyin

¹⁸Xam wê xam tu xomxo levac nue yuac di vông yuac vidaaên vô he ge, xam xona nêb di loc vac he wê viac xam ge kwa ngibi di ngô he kiyang. Om xam loc vac he wê viac xam nivihha di lum nêl kiyang vô xam ge kwa ngibi, di loc vac he wê viac xam nipaên ge kwa ngibi hixôn. ¹⁹Ên xam obêc vông xam yuac nivihha, léc xomxo ob vông myavinê vô xam ge od xam xovô Anutu di le xêkizêc di kilê viyin wê he vông vô xam ge. Ên xam obêc vông bêge ge od Anutu ob yê xam nivihha. ²⁰Léc xam obêc vông môm soên di xomxo hi xam lec di xam le xêkizêc di kilê viyin tige ge od xam lêm ob vô levac ên wê xam kilê viyin tige lêm. Léc xam obêc vông môm nivihha, léc xomxo hi xam lec di xam le xêkizêc di kilê viyin tige ge od Anutu ob yê xam ên nêb xam xomxo nivihha. ²¹Anutu tyuc xam ên nêb xam le xêkizêc vac viyin, ên Kilisi êno kilê viyin ên xam om hilung môm tige vô xam ên nêb xam timu vô i vixa. ²²Ên Kilisi o vông nipaên ti lêm di xomxo o tulec kiyang kityooên ti lec i lêm. ²³Di xomxo nêl kiyang nipaên lec i, léc Kilisi o luu kiyang nipaên ti lax vô he lêm. Di he vông myavinê levac vô i, léc i o vông myaviwen luu mi lax vô he lêm. Nge, vông i vin Anutu di vông ici va la vac Anutu vigê, ên xovô ên nêbê Anutu obêc yaxên xomxo vihati nêb kiyang di vông nivihha me nipaên vô he tiyi xochê môm wê he vông ge. ²⁴Kilisi vaci kô il nêd nipaên lec ici va ninivi di yib lec xax pola ên nêb il sea môm nipaên vihati yang di dô madviha di timu vô môm nivihha vihati. He hi Kilisi ninivi vô myavinê sea, léc myavinê wê i vông ge vông xam vô nivihha lec. ²⁵Ilage xam la vaxvax tiyi xochê bwoc sipsip wê xomxo ti o didii he lêm ge. Léc gwêbaga xam pilepac xam pyap di lôm lam timu vô Yesu wê didii xam di viac xam tiyi xochê xomxo ti viac bwoc sipsip ge.

Kiyang lec vêx yuu vux wê iima ge

3 ¹A nêl pyap gwêba ên a nêbê xam loc vac xomxo levac kwa ngibi, om a ob nêl kiyang tiga vô xam vêx wê xam kô vux ge bêga bê xam

loc vac liyame kiyang kwa ngibi, ên he ya obêc vông i vin Anutu kiyang lêm ge od he ob yê môm nivîha wê xam mi vông ge di ob pilepac he nilô la vô Anutu. Lêc he ob pilepac nilô ên kiyang wê xam ob nêl vô he ge lêm. ²Nge, he ob yê xam di xovô bê xam xona ên Anutu di timu vô môm nivîha, om he ob pilepac nilô la vô Anutu. ³Lêc xam vêx ge, le i lêc vông nilôm i loc vô môm vunacên i tiyi xocbê xam vunac vô bamzub lihi di nux komkom gol lec kwam di vinyum ngakwi paha ge lêm. ⁴Nge, xam vunac vô xam nilôm môci bêga bê kiyang malehe i yêp vac xam nilôm. Ên vunacên tige ob vô nipaên lêm. Nge, obêc dô luta, di Anutu obêc yê vunacên tige nêb nivîha yang. ⁵Ilage vêx wê tu vêx ngibua wê vông nilô la diluhu vô Anutu ge, he vunac vô nilô ya vunacên tibêge di ngô liyae kiyang di la vac he kwa ngibi. ⁶Sela êno vông môm tibêge di la vac liya Eblaham vya kwa ngibi di nêl vô i ên nêbê, “A nêg levac ông.” Om xam vêx ge, xam obêc timu vô môm nivîha di xonaên obêc ma ge od xam ob tiyi xocbê Sela nue.

⁷A ob nêl vô xam vux wê xam ii vêx ge bêga bê xam xovô vinême di dô nivîha hixôn he, ên xêkizêc wê he vông ge o tiyi wê xam vux vông ge lêm. Om xam viac he nivîha. Di xam xovô bêga bê Anutu vông vizid nivîha vô xam vux di vông vô vinême hixôn. Vizid tige bêga nêbê xam obêc dô mamvîha luta hixôn Anutu. Om xam vux, xam dô nivîha hixôn vinême ên môm nipaên ti i o lêc le vac kîtaaên wê xam vông ge xôn lêm.

II ob kilê viyin lec môm nivîha wê il vông ge

⁸A ob nêl kiyang ti hixôn bêga bê xam nilôm i yêp tîbed, di xam xo vigwe pisiv ênma, di xam xêmyaa i vin lec lime vông vinên vihati, di xam viac lime vihati i nivîha, di xam o yong xam vô lime lêm. ⁹Di xam o vông nipaên vac nipaên lêm, di xomxo obêc nêl kiyang nipaên vô xam ge od le i lêc luu kiyang nipaên i loc vô he lêm. Nge, xam kîtaa vô Anutu ên i vông vizid nivîha vô he. Anutu tyuc xam ên nêb xam vông môm tibêge, om xam obêc vông bêge ge od Anutu ob vông vizid nivîha vô xam vô buc timuên. ¹⁰Om xam timu vô môm nivîha bêgee, ên xolac nêl bêga ên nêbê, “Xomxo ti obêc nêb dô hixôn xêyaa nivîha gê kibun ga di tulec nivîha i tiyi buc vihati ge od i vibu mya xêkizêc di kiyang nipaên ti i o lêc tyip vac mya lêm, di i viac mya nivîha di i o lêc nêl kiyang kityooên ti lêm. ¹¹Mêd i vô nîmi vô môm nipaên vihati di timu vô môm nivîha, di myag môm wê ob dô ya kiyang malehe ge di timu vô. ¹²Ên Apumtau yê xomxo wê nivîha ge di ngidu he xôn, di ngô kîtaaên wê he kîtaa vô i ge. Lêc he wê vông môm nipaên ge, Apumtau vô nîmi vô he di vông myaviwen nipaên vô he.”

¹³Xam obêc vông yuac xêkizêc di la vac môm nivîha ge od letya ob vông xam vô nipaênê? ¹⁴Lêc xam obêc vông môm nivîha lêc xomxo obêc vông viyin vô xam ge od xam xêmyaa i vô nivîha, di le i lêc xona ên he

lêm, di xam nilôm i o xo kiyang tibeac lêm. ¹⁵Nge, xam vông nilôm i loc diluhu vô Kilisi di vông i tu xam nêm xomxo levac. Di xam viac xovôên wê xam vông ge, ên xomxo ti obêc kinêg xam lec vông vinên wê xam vông ge kehe ge od xam obêc tiyi wê xam ob nêl kitong vô he mi he xovô. Om xam wê he tiyi xocbê he xomxo levac ge di lum nêl kiyang malehe vô he. ¹⁶Di xam viac nilôm i vô paha, di nipaên ti i o yêp vô xam lêm, ên xomxo obêc nêl nipaên vô xam ên wê xam vông i vin Kilisi di timu vô môp nivihâ ge od he ni ob yoc ên kiyang nipaên wê he nêl lec xam ge. ¹⁷Xam obêc vông môp nivihâ, lêc Anutu obêc tyuc lec ên nêbê xam tulec viyin ge od Anutu ob yê nivihâ. Ên môp tibêge luu môp wê xam tulec viyin ên môp nipaên ge vêl. ¹⁸Ên Kilisi êno tulec viyin di yib ên il nêd nipaên lu tibed di obêc yib lu ngwe hixôn tii vac lêm. Kilisi ge xomxo nivihâ yang, lêc yib ên il wê nipaên ge ên nêb ob didii il lôm vô Anutu. Xomxo hi Yesu ninivi yib lêc i kinu dô maviha. ¹⁹⁻²⁰Ilage vô buc wê Nôa dô maviha ge xomxo ya dô hixôn, lêc he o vông i vin Anutu kiyang lêm, om he yib mi la dô vac vigwe nipaên. Om buc timuên wê Kilisi yib ge od Kilisi kinu la nêl xolac vô xomxo yibên tigege kinu. Buc wê he gên dô maviha ge od he o vông i vin Anutu kiyang lêm. Lêc Anutu o kitya he vêl lutibed lêm. Nge, Anutu dibin he ên nêb he i pilepac nilô loc vô i. Nôa dilox sip levac ti, lêc he o pilepac he lêm. Om xomxo yuutyabed tiyi xocbê he vigê vilu di sec yon ge wê he la dô vac sip nilô, di mia dung di lig, mêd he wê dô vac sip nilô ge vihati dô maviha di ti o yib vac mia lêm. ²¹Om môp wê Nôa dô maviha vac sip ge tixuu il lec môp wê il lipac mia ngibua ge bêga nêbê môp mia lipacên ge vô il vêl ên il nêd nipaên om il obêc dô madviha. Lêc il o lipac nidnivi ên il nêb ningeac i loc vêl lêm. Nge, mia lipacên wê il vông ge tiyi xocbê il kitaa vô Anutu ên il nêb i kitya il nêd nipaên vêl di vông il nilôd i vô paha lec. Om wê Anutu kitya il nêd nipaên vêl ge, kehe lec wê Yesu Kilisi kidi lec maviha vac yibên ge. ²²Yesu lax mi la lag puunê di la dô vô Anutu vigê hiyôv, om angela di he wê kô lê levac gê lag puunê hixôn xêkizêc toto wê dô lag puunê ge vihati dô vac Kilisi kwa ngibi.

Il sea môp nipaên wê tibii madiluhu vông ge

4 ¹Kilisi kilê viyin lec ninivi om xam xovô wê i kilê viyin ge di timu vô i vixa, ên xomxo ti obêc kô myavinê lec ninivi ge od sea môp nipaên pyap di ob timu vô i tii vac lêm. ²Mêgem buc vihati wê obêc dô kibun ga ge, od ob la vac môp wê nilô kidu i ên nêb i vông ge lêm. Nge, ob vông môp nivihâ vihati wê Anutu xovô ên nêb i vông ge. ³Ilage xam la vô môp nipaên toto wê tibii madiluhu xêyaa vin lec ge di xam vông môp nipaên luu vêl, om gwêbaga i tip loc. Môp nipaên wê xam vông ilage bêga nêbê môp yôdac vêx yuu vux, di môp nipaên wê xam nilôm kidu xam nêb xam vông ge, di xam num mi vô mavmav, di xam wa yaên

levac di xam o vông mahigun vac lêm, di xam num mia xêkizêc di mia viac xam di xam vông môt nipaên ya, di xam vô nimim vô Anutu kiyang di yev vixam kitu vô anutu kityoôên di kitaa vô he. ⁴Ilage xam mi vông môt nipaên tibêgee, léc gwêbaga xam sea môt nipaên la dô xel. Om tibii madiluhu yetac ên wê xam o vông môt nipaên hixôn he lêm ge, om he nilô vô nipaên vô xam di he nêl kiyang nipaên lec xam. ⁵Lêc obêc buc timuên ge od he obêc la le vô Anutu manôn di nêl môt nipaên wê he mi vông ge kehe kitong vô i di Anutu ob yaxên he. Anutu viac i pyap ên nêb obêc yaxên xomxo vihati yang nêl kiyang, he wê dô maviha hixôn he wê yib ge. ⁶Vô buc wê he dô maviha ge Anutu yaxên he di he yib tiyi xocbê xomxo vihati ob yib ge. He yib pyap dêc Anutu kiyang nivihia la vô he ên nêb he i ngô di he kinu i léc dô maviha i tiyi xocbê Anutu dô maviha ge.

Xovôên toto wê Anutu vông vô il ge

⁷Buc wê susu vihati yang obêc tiyôô ge vô kwabo lec. Om xam viac xam di xovô nivihia di kitaa vô Anutu i tiyi buc vihati. ⁸Môt xêyaa vin lecên tibed wê luu môt vihati yang ge vêl. Om xam xêmyaa i vin lec lime vihati, ên môt xêyaa vin lecên tiyi wê ob pilepac nipaên wê xomxo vông vô il ge vêl. ⁹Xam lime vông vinên ya obêc miloc vô xam ge od xam vev ngwax vô he di viac he nivihia di le i léc vông hixôn nilôm yuu lêm. ¹⁰Anutu vông xovôên toto vô xam ên nêb xam toto vông yuac ya. Om xam vông yuac i nivihia ên i ngidu xam lime xôn. Xam obêc vông bêge ge od xam ob vông xovôên toto wê Anutu vông vô xam ge vô nôn lec. ¹¹Om Anutu obêc vông xovôên vô xomxo ti ên nêb i nêl kiyang ge od xomxo tige i nêl Anutu kiyang. Di Anutu obêc vông xovôên vô xomxo ti ên nêb i ngidu xomxo xôn ge od xomxo tige i ngidu xomxo xôn ya xêkizêc wê Anutu vông vô i ge. Xam obêc vông Anutu yuac toto bêge ge od xomxo ob yê yuac wê xam vông ge nivihia di pimil Anutu lec Yesu Kilisi lê. Xêkizêc hixôn xêseac i yêp vô i luta léc luta. Nôn.

Il ob kilê viyin lec Kilisi lê

¹²Xam lige wê a xêgyaa vin lec xam ge, gwêbaga viyin yuu myavinê levac, tiyi xocbê ngwax myavinê nux xam ge, tulec xam ên nêb ob tixuu xam. Om le i léc yetac ên viyin tige lêm, di le i léc xo di nêl bêga bê viyin tige paha ti lêm. ¹³Nge, xam kilê viyin tiyi xocbê Kilisi kilê ge, om xam xêmyaa i nivihia. Ên buc timuên wê Kilisi hixôn xêseac wê i vông ge obêc lam le seac ge od xam xêmyaa ob vô nivihia yang. ¹⁴Om xomxo obêc nêl nipaên lec xam ên wê xam vông i vin Kilisi ge od xam xêmyaa i nivihia, ên Anutu Myakilôhô Ngibua hixôn xêseac wê i vông ge dô hixôn xam pyap. ¹⁵Lêc xam obêc kô myavinê ge od le i léc kô lec wê xam hi xomxo ti yib ge lêm, me xam vun xomxo susu ge lêm, me xam vông môt nipaên viyang viyang ge lêm, me xam tung mamnôn loc vô xomxo susu ya hixôn

lêm. Nge, xam obêc kô myavinê ge od xam kô lec wê xam vông i vin Yesu ge. ¹⁶Om xomxo ti obêc vông vîyin vô xam ên wê xam vông i vin Kîlisi ge od xam nim i o yoc lêm. Nge, xam pîmil Anutu lec Kîlisi lê. ¹⁷Ên buc wê Anutu ob yaxên xomxo vîhati nê n kiyang ge vô kwabo lec. Di obêc yaxên il wê il tu i nue ge taxlee. Om Anutu obêc yaxên il wê il vông i vin i kiyang ge taxlee ge od ob vô bêna vô he wê pwoo i kiyang vac ge? ¹⁸Xolac nêl bêga ên nêbê,

“Xomxo vông vinên ob tulec vîyin levac, di obêc timuên ge he ob la dô mavîha. Di he wê pwoo Anutu kiyang vac di vông môp nîpân ge, he obêc la na?”

¹⁹Xolac nêl bêge, mêgem Anutu obêc tyuc lec ên nêb vîyin ti i tulec xam ge od xam vông môp nivîha di vông nilôm yuu nîmîvi i loc vô Anutu. Ên Anutu tung il lec kibun ga di viac il nivîha, di obêc sea kiyang wê hilu vô il ge lêm.

Xam gyovîxa xam viac Anutu nue sîpsîp

5 ¹A nêb a ob nêl kiyang ti vô he gyovîxa vac xam mahîgun. A êno gyovîxa ti, di a xê Kîlisi lec magnôn di xê wê i kilê vîyin ge. Di obêc buc timuên ge xêseac wê Anutu vông ge obêc lam seac, mêd a hîxôn xam, il xôn obêc la dô vac xêseac tige. Om a ob nêl xêkîzêc vô xam gyovîxa bêga bê ²xam viac Anutu nue i nivîha ên he tîyi xocbê bwoc sîpsîp wê xam ob viac ge. Lêc

xam nim obêc ma, lêc xomxo ti kidu xam vac yuac tige ge od o nivîha lêm. Om xam xêmyaa i vin lec yuac gyovîxa tige di xam vông yuac tyo i tîyi xocbê Anutu vông vô xam ge. Di le i lêc xo bê xam ob vông yuac gyovîxa ên kô mone lec lêm. Nge, xam nilôm i kidu xam, di xam vông yuac tige. ³Di xam o lêc wê xacxam va tîyi xocbê xomxo levac di wê lime wê Anutu vông vac xam vîgêm ge nîpân di vông vîyin vô he lêm. Nge, xam viac he nivîha di didii he vac môp nivîha ên he i yê di timu vô xam vîxam. ⁴Xam wê gyovîxa ge, xam obêc vông yuac bêge ge od buc timuên wê Yesu Kîlisi obêc vena ge od xam obêc kô xêseac wê vîxôlên obêc ma ge. Yesu Kîlisi ge il bazub wê viac il ge.

Il ob pilepac il di vô nîpwo lec

⁵A ob nêl vô xam ngîvîhi bêga bê xam loc vac gyovîxa kwa ngîbi di ngô he vya. Di a ob nêl vô xam vêx yuu vux vîhati bêga bê le i lêc kô xam lec vô xomxo lêm. Nge, xam pilepac xam mî vô nîpwo lec di loc vac lime vông vinên vîhati kwa ngîbi, ên kiyang yêp bêga ên nêbê, “Anutu obêc vông vevac vô he wê kô he lec vô xomxo ge, di obêc vông vîzîd nivîha vô he wê pilepac he mî vô nîpwo lec ge.” ⁶Kiyang nêl bêge, mêgem xam pilepac xam di vô nîpwo lec di loc vac Anutu xêkîzêc kwa ngîbi, êdêc vô buc timuên wê Anutu vaci vînoo ge od i hôm xam lec di vông xam lêm i

vô levac. ⁷Anutu xo xam di viac xam, om xam vông viyin vihati wê tulec xam ge i loc vac i vîgê.

⁸Xam piyôp i yêp nivîha di xam viac xam, ên Seten wê vông vevac vô xam ge la di lôm di la di lôm di myag xomxo ên nêb ob hi i tiyi xocbê noo laion vô vya levac ên nêb ob nga xomxo ge. ⁹Om xam le xêkizêc ya vông vinên wê xam vông ge di vông vevac vô Seten, ên xam xovô pyap ên xam nêbê lime vông vinên vac vîgwe vihati yang tulec viyin yuu myavinê tiyi xocbê xam tulec ge. ¹⁰Anutu ge vizid nivîha vihati yang kehe i, di tyuc il ên nêbê il obêc la dô vac xêseac wê i vông ge luta lêc luta lec yuac wê Kilisi vông ge. Om gwêbaga xam ob kilê viyin vac buc myabo tya. Lêc viyin obêc tiyôô, di Anutu vaci obêc vông xam vô nivîha lec i tii vac nang, di ngîdu vông vinên wê xam vông ge xôn, di vông xam le xêkizêc. ¹¹Xêkizêc wê Anutu vông ge ob yêp luta lêc luta. Nôn.

Pita kiyang timuên

¹²A, Pita, a nêl kiyang bo wê yêp vac kipihac tiga di Sailas kivuu ya vîgê. A xê Sailas tiyi xocbê a lig nivîha wê vông yuac nivîha ge. A kivuu kipihac tiga loc vô xam ên a nêb a ob ngîdu xam xôn di nêl xêyaa vin lecên wê Anutu vông ge kitong vô xam bêga bê xêyaa vin lecên wê Anutu vông ge vixôhilôg nôn. Om xam le xêkizêc ya kiyang nôn tige. ¹³Xomxo vông vinên Babilon wê Anutu vînoo he pyap ge, he nêl vidiiên vô xam. Di a nug Mak êno nêl vidiiên vô xam. ¹⁴Xam vihati pul lime vông vinên vîgê ên i nêl kitong vô he bê xam xêmyaa vin lec he.

Kiyang malehe i loc ngîdu xam wê xam tu Kilisi xe ge xôn.

2 PITA

Pita kipihac wê vông yuu ge

1 ¹A, Saimon Pita, a ga Yesu Kilisi nu yuac di a tu sinale ti. A kivuu kipihac tiga loc vô xam wê xam vông i vin Anutu tiyi xocbê xe vông i vin ge. Mốp vông vinên tige nivihã. Il vông i vin lec mốp nivihã wê Kilisi vông ge. Yesu Kilisi ge il Anutu i wê vô il vêl ên il nêd nipaên. ²Xam xovô Anutu yuu il lig Apumtau Yesu, om xam vông xovôên tige i vô levac, ên xêyaa vin lecên yuu kiyang malehe i vô levac vô xam.

Il ob vông mốp wê Anutu tyuc il di vînoo il ge i vô nôn lec

³Anutu vông susu hixôn nôn nivihã vihati vô il ya xêkizêc wê i vông ge ên nêb nôn tigege i ngidu il xôn gê kibun ga di didii il mi la vac mốp nivihã wê Anutu vông ge vihati mi il timu vô. Om il kô nôn tigege vihati ya xovôên nivihã wê Anutu vông vô il lec ici va ge. Anutu tyuc il ya xêseac yuu lê levac wê i vông ge ên nêb il tu i nue. ⁴Ilage Anutu hilu kiyang tibeac vô il ên nêb ob vông nôn nivihã vihati vô il ya xêseac yuu lê levac wê i vông ge. Nôn tigege nivihã yang. Lêc mốp nipaên wê il nilôd kidu il ên nêb il vông ge yêp vô il gê kibun ga om vông il vô nipaên. Om Anutu vông kiyang wê hilu pyap ge vihati vô nôn lec vô il di vông nôn nivihã vihati vô il ên nêbê he i ngidu il xôn di il pec ên mốp wê ob vông il vô nipaên ge, di il tu xomxo nivihã nôn i tiyi xocbê Anutu vaci ge.

⁵Anutu nêb il ob tu xomxo nivihã i tiyi xocbê i ge, mêgem a ob nêl vô xam bê xam lêc vông yuac xêkizêc di vông mốp nivihã vihati i yêp hixôn vông vinên wê xam vông ge, di xam kô xovôên nivihã hixôn, ⁶di xam viac xam ên mốp wê nimnivi xovô ge, di xam le xêkizêc vac viyin, di xam timu vô mốp wê Anutu vông ge vihati, ⁷di xêmyaa i vin lec lime, di xêmyaa i vin lec xomxo vihati hixôn. ⁸Ên xam obêc timu vô mốp bêgee di vông i vô levac ge od xovôên wê xam xovô lec il lig Apumtau Yesu Kilisi ge obêc yêp vîdaaên lêm. Nge, ob vô nôn nivihã vô xam, di xam ob vông yuac nivihã ya. ⁹Lêc xomxo vông vinên ti obêc vông mốp tibêgee lêm ge od tiyi xocbê manôn toc di o yê viğwe lêm, ên ilage xovô wê Anutu kitya i nêb nipaên vêl ge lê, lêc gwêbaga lungên mốp tige nang.

¹⁰Xam lige, Anutu tyuc xam di vinoa xam pyap ên nêb xam tu i nue. Mêgem xam vông yuac xêkizêc, ên môp wê Anutu tyuc xam di vinoa xam ge i vô nôn lec. Ên xam obêc vông bêge ge od xam ob le xêkizêc di susu ti ob pwoo xam pec lêm, ¹¹di Anutu obêc tax vuayen ên xam di xam la vac Yesu Kilisi ben di Anutu obêc hi vixa pec ên xam di viac xam dô luta lêc luta. Yesu Kilisi ge il Apumtau wê vô il vêl ên il nêd nipaên.

¹²Kiyang wê a nêl vô xam ge, xam ngô di vông i vin pyap, di xam mi le xêkizêc vac kiyang nôn tige. Lêc a nêb a ob nêl kiyang tige i tii vac nang vô xam, ¹³om tiyi buc vihati wê a dô magviha gê kibun ga ge od a ob nêl kiyang tige i tii vac vac vô xam ên xam ngô di hôm xôn pilihi. A obêc vông bêge ge od nivha, ¹⁴ên il lig Apumtau Yesu Kilisi nêl kitong vô a om a xovô bêga ên a nêbê buc wê a ob xib ge vô kwabo lec. ¹⁵Om a nêb a ob vông yuac xêkizêc di nêl kiyang tige i tii vac vô xam, êdêc wê a xib ge od kiyang wê a nêl vô xam ge i yêp vac xam piyôp di xam xovô i tiyi buc vihati.

Pita yê xêseac wê Kilisi vông ge

¹⁶Xe nêl xêkizêc wê il lig Apumtau Yesu Kilisi vông ge kitong vô xam, di xe nêl vô xam ên xe nêbê Yesu obêc vena i tii vac nang. Lêc xe o ngô pivulac vidaaên ti lec Yesu mi nêl kitong vô xam lêm. Nge, xe xê Yesu lec mamnôn, di xe xê xêseac wê i vông ge. Om xe nêl kitong vô xam. ¹⁷Mag Anutu vông Yesu lê vô levac di vông xêseac wê i vông ge vô i. Anutu wê xêseac kehe ge vông kiyang lam vô Yesu bêga ên nêbê, “Xomxo tige a nug wê a xêgyaa vin lec i di a xê i nivha ge.” ¹⁸Xe dô hixôn Yesu lec kitôn ngibua om xe ngô vya tige wê lam gê lag kisiinê ge.

¹⁹Om xe xovô bêga ên xe nêbê kiyang wê plopete vihati nêl ilage, he nêl vixôhilôg nôn. Om xam obêc hôm he kiyang tige xôn pilihi ge, od xam ob dô nivha. Ên kiyang wê he nêl ge tiyi xocbê lam wê linac vac mapitoc ge. Om xam timu vô he kiyang di i loc tyip vô buc wê Kilisi obêc vena hixôn xêseac ge. Xêseac wê i vông ge nginoo xêseac wê lam vông ge vêl. Vô buc tige il ob xovô plopete kiyang wê he nêl ilage i yêp seac. ²⁰Lêc taxlee ge xam xovô bêga bê xomxo ti o tiyi wê ob nêl plopete kiyang kehe kitong ya xovôên wê ici va vông ge lêm. ²¹Ên ilage he plopete ti o nêl kiyang ya xovôên wê heche va xovô ge lêm. Nge, Myakilôhô Ngibua vông Anutu kiyang vô he lêc he nêl.

Môp nipaên wê plopete kityooên vông ge

2 ¹Ilage plopete kityooên ya kidi lec vac he Islel mahigun. Di gwêbaga plopete kityooên ya obêc kidi lec vac xam mahigun di kityoo xam ya xolac kityooên, di he ob viyum kiyang nipaên vac kiyang nivha nilô, di nêl kiyang kityooên viyang viyang wê obêc vông xomxo vô nipaên ge, di he ob yax Apumtau wê vô he vêl ên nipaên ge vun. Om môp nipaên wê

he vông ge wê Anutu obêc kitya he vêl lutibed. ²Di he obêc didii xomxo tibeac la vac môp yôdac hixôn môp wê vaxvax ge. Om môp nipaên wê he vông ge ob vông xomxo nêl kiyang nipaên lec Anutu môp yuu kiyang nô. ³Plopete kityooên tige mi vông nilô la vô mone, om he ob nêl kiyang kityooên vô xam ên nêb ob kô mone vô xam. Lêc ilage Anutu nêl mi i yêp pyap ên nêb obêc yaxên he nêl kiyang di vông myaviwen vô he. Anutu wê obêc kitya he vêl ge o lungên he lêm. Nge, dô bin buc wê obêc vông myaviwen vô he ge.

⁴Ilage angela ya vông môp nipaên, lêc Anutu o xo vîgwe pisiv ên he lêm. Nge, tii he la vac vîgwe nipaên, di vông he la dô kalabuhu vac lôva wê mapitoc ta ge. Om he ob la dô di i la tyip lec buc wê Anutu ob yaxên he nêl kiyang ge. ⁵Ilage lec buc wê Nôa dô maviha ge od xomxo vô nîmi vô Anutu, lêc Anutu o xo vîgwe pisiv ên he lêm. Nge, vông mia tyip vac kibun di hi he ma vêl. Mêd Nôa tîbed wê mi nêl môp nivîha kitong mi i yêp seac, om Anutu viac Nôa di xomxo vîgê vilu di sec yuu ge he dô maviha vô buc wê mia hi tibii ge. ⁶Ilage Anutu yaxên môp nipaên wê tibii Sodom yuu Gomola vông ge. Om vông myaviwen vô vîgwe yuu ge, di nyuu yuuya ngwax levac di ngwax ya yuu ma vêl, om vîgwe tu viwev pileva. Anutu vông bêge ên nêb xomxo wê vô nîmi vô i ge he i yê di xovô bê Anutu obêc vông myaviwen vô he. ⁷Lot mi dô vac vîgwe Sodom, lêc Anutu hôm Lot vêl ên ngwax wê ob ya vîgwe Sodom yuu Gomola ge, ên Lot ge xomxo nivîha ti. Om môp yôdac hixôn môp nipaên vîhati wê tibii Sodom yuu Gomola vông ge vông Lot nilô vô viyin. ⁸Ên Lot ge xomxo nivîha wê nilô timu vô môp nivîha ge, lêc dô vac he mahîgun om yê môp nipaên wê he vông ge di ngô kiyang nipaên wê he nêl ge. Om vông i nilô vô viyin mabu yocên tiyi buc vîhati. ⁹Kiyang tige wê nêl lec angela nipaên hixôn Nôa yuu Lot ge ob vông xovôên vô il bêga bê Apumtau xovô viyin wê tulec xomxo nivîha ge om ici va tiyi wê ob vô he vêl ên viyin tige. Di xovô môp nipaên wê xomxo nipaên vông ge om ici va tiyi wê ob vông myaviwen vô he di i la tyip vô buc wê obêc yaxên xomxo vîhati nêl kiyang ge. ¹⁰Plopete kityooên obêc kô myaviwen nipaên i luu vêl, ên he mi vông môp yôdac hixôn môp nîngeac vîhati, di yê Anutu kiyang hixôn xomxo levac kiyang tiyi xocbê kiyang pileva ge, di he mi yong he di timu vô môp wê he nilô xovô ge, di he nêl kiyang nipaên lec angela lag kisiinê di o xona lêm. ¹¹Angela tige lê hixôn xêkîzêc wê he vông ge luu xomxo vîhati vôngo vêl. Lêc angela tige o luu kiyang nipaên ti lax vô plopete kityooên tige lêm, di he o vông kiyang vô Apumtau lec nipaên wê xomxo tige nêl lec he ge lêm.

¹²Plopete kityooên tige mi timu vô môp nipaên wê nînivî vông ge, om he tiyi xocbê bwoc vîmen wê piyôp maên wê xomxo ob tii he di hi he yib ge. Ên he nêl kiyang nipaên vaxvax lec kiyang wê he xovôên kehe ma ge. Om môp nipaên wê he vông ge obêc vông he vô nipaên di kitya he vêl,

¹³Di he obêc kô myaviwen nipaên lec nipaên wê he vông ge. Ên he xêyaa vin lec wê he ob num di vông môt nipaên vô vidiiên wê hiyôv ge. Di he ya yaên hixôn xam, lêc he nilô vô nivihâ ên môt nipaên wê he mi vông ge, om he tiyi xocbê do nipaên vac xam mahigun ge. ¹⁴Di he manôn yê vêu di xo môt yôdac, di he o dô seac vêu ên môt nipaên lêm. Di he didii xomxo wê o vông i vin xêkizêc lêm ge mi la vac môt nipaên, di he vông piyôp yuu nilô la vihati vô susu kibun ga. Anutu nêl pyap ên nêbê obêc kitya he vêu. ¹⁵Plopete kityooên tige sea môt nivihâ di la vaxvax vac môt nipaên, di timu vô môt nipaên wê Bio nu vux Belam vông ilage. Belam xêyaa vin lec wê ob vông môt nipaên di kô mone lec. ¹⁶Lêc bwoc donki wê Belam vông ge nêl i nêl nipaên kitong vô i. Bwoc donki o tiyi wê ob nêl kiyang ge lêm. Lêc donki tige keac vô Belam tiyi xocbê xomxo keac ge di nêl Belam nêl nipaên kitong vô i. Om donki tige le vac plopete Belam nilô judajuda xôn.

¹⁷Om plopete kityooên tige vihati tiyi xocbê lôva wê xomxo mi kilê mia vac lêc mia tuacên ge, di he tiyi xocbê lun mapitoc lêc lun valên ma ge. Om Anutu viac viğwe mapitoc ta wê he obêc la dô vac ge. ¹⁸Xomxo tige kô he lec di keac vya levac lec kiyang pileva wê nôn maên ge. Di he kityoo xomxo wê gên sea môt nipaên wê tibii madiluhu vông ge, di didii he lax mi la vac môt yôdac hixôn môt nipaên wê he ninivi xovô ge. ¹⁹Xomxo kityooên tige nêl bêga ên nêbê, “Xam obêc nêb xam ob vông môt ti i tiyi wê xam xêmyaa vin lec ge od xam vông. Lêc môt tige ti o tiyi wê ob viac xam ge lêm.” He nêl bêge lê, lêc he nêl kiyang kityooên. Ên he tu xomxo yuac wê môt nipaên viac he ge. Ên môt nipaên ti obêc viac xomxo ge od xomxo tige ob tu môt nipaên tige nu yuac. ²⁰Xomxo ob xovô il lig Apumtau Yesu Kilisi wê vô il vêu ên il nêd nipaên ge, di vông i vin i, di pec ên môt nipaên kibun ga wê vông he vô nipaên ge, lêc he obêc pilepac he mi lax vô môt nipaên tii vac nang di môt nipaên obêc hôm he xôn ge, od he obêc dô vac nipaên luu wê he dô vac tax ge vêu. ²¹Ên ilage he o xovô môt nivihâ lêm om he dô vac nipaên. Lêc gwêbaga he xovô di vông i vin Anutu kiyang, lêc he vô nîmi vô, om he ob dô vac nipaên luu wê he dô vac ilage vêu. ²²Om nipaên wê tulec he ge tiyi xocbê kiyang ti wê yêp bêga ên nêbê, “Noo mi ya susu wê he mutac ge tii vac nang.” Di kiyang ngwe nêl bêga ên nêbê, “Bwoc ti wê loc hixôn ninivi nivihâ ge ob lax lipac i vac lôm tii vac nang.”

Apumtau Yesu obêc vena vixôhilôg

3 ¹Xam lige, ilage a kivuu kipihac ti vô xam, nang dêc gwêbaga a kivuu kipihac ngwe ga wê vông yuu ge vô xam. Lêc a kivuu kipihac yuu ge vô xam ên a nêb i tipi vô xam piyôp i yêp seac di xam xovô kiyang tiga i tii vac. ²A nêb xam xovô kiyang wê plopete ngibua nêl ilage i tii vac, ên he nêl kitong lec buc wê obêc val timuên ge. Di xam xovô xolac

wê il Apumtau vông ge. Apumtau vô il vêl ên il nêd nipaên, di vông i xolac vô lime sinale di he nêl kitong vô xam mi xam ngô. Om xam ngô di xovô i tii vac.

³Om xam lêc xovô taxlee bêga bê vô buc timuên ge od tibii ya obêc val vô xam di ob timu vô môp wê he nilô kidu he ên nêb he ob vông ge, di he ob so vya vô xam ên wê xam vông i vin Anutu ge, om he ob yax mang di nêl vô xam bêga ên nêbê, ⁴“Yesu nêl vô xam ên nêbê obêc vena vô xam, me? Om tyo dô gê tina? Wê lê, Yesu o vena lêm. Nge, vô buc wê Anutu tung lag yuu kibun ge, di i la vô buc wê il mage buge yib ilage, di i val tyip gwêbaga hixôn, susu hixôn kiyang vihati dô tiyi xocbê dô ilage di ti o pilepac lêm.” ⁵He ob nêl kiyang tibêge vô xam, lêc he nêbê he ob xovô yuac wê Anutu vông ilage lêm. Yuac wê Anutu vông ilage bêga nêbê Anutu nêl di lag yêp di kibun val tyip vac mia nilô di yêp vac mia mahigun. ⁶Lêc kibun o yêp bêge xuhu dia lêm. Nge, timuên ge od Anutu nêl di mia hivun kibun xôn ên wê xomxo vông nipaên ge. ⁷Lêc lag yuu kibun wê yêp gwêbaga, Anutu nêl ên nêbê yuu ob yêp di i loc tyip lec buc wê ngwax obêc ya yuu xôn vêl ge. Vô buc tige Anutu obêc yaxên xomxo vihati nêl kiyang di obêc kitya he wê vô nimi vô i ge vêl.

⁸Xam lige, le i lêc lungên kiyang tiga lêm. Kiyang tiga nêl bêga ên nêbê buc wê il xê ên il nêb buc myabo tya ge Anutu yê nêb buc dia tiyi xocbê klismas 1,000, di buc wê il xê ên il nêb buc dia ge Anutu yê tiyi xocbê buc tibed. ⁹Om xomxo ya so ên he nêb mêd Apumtau vông yuac hiyi hiyi om kiyang wê nêb ob vena ge gên o vô nôn lec lêm. Ge he so. Ên Apumtau o vông yuac hiyi hiyi lêm. Nge, bin xomxo wê vô nimi vô i ge ên nêb he i pilepac he vêl ên nipaên wê he vông ge, ên Apumtau xo ên nêbê xomxo ti i o lêc yib mi la vac nipaên lêm.

Lag yuu kibun xôa obêc ma

¹⁰Buc timuên wê Apumtau obêc vena lec ge, buc tige obêc val tiyi xocbê xomxo yôdac ti. Ên buc tige il o xovô lêm. Vô buc tige lag obêc vô nididun levac di xôa obêc ma, di ngwax obêc ya lag yuu kibun hixôn susu vihati ma vêl. ¹¹Vixôhîlôg nôn, Anutu obêc kitya susu lag yuu kibun vihati vêl. Om gwêbaga xam ob dô bêna? Xam vông môp ngibua i vô nôn lec vô xam di timu vô môp wê Anutu vông ge, ¹²di xam dô bin Anutu buc wê obêc val timuên ge di vông yuac xêkizêc ên buc tige i val sebseb. Vô buc tige ngwax obêc ya lag ma vêl, di susu vihati obêc didee ên ngwax levac di xôa obêc ma. ¹³Ilage Anutu hilu kiyang pyap ên nêbê lag yuu kibun paha obêc yêp timuên, di kiyang nivaha obêc hivun xôn, di nipaên ti obêc yêp hixôn lêm. Om il bin lag yuu kibun paha wê obêc val ge.

¹⁴Xam lige, xam mi dô bin lag yuu kibun wê paha ge, om xam viac xam nivaha di vông yuac xêkizêc ên Anutu i yê xam tiyi xocbê nipaên ti o yêp vô xam lêm ge di i yê xam tiyi xocbê xam dô vac kiyang malehe ge.

¹⁵Xam xovô bêga bê Apumtau venaên gên ma, ên dô bin xomxo vihati ên nêb he i pilepac he ên i kitya he nêb nipaên vêl. Kiyang tige tiyi xocbê kiyang wê Pol kivuu ge. Pol ge il lig wê il xêdyaa vin lec i ge. Anutu vông xovôên vô i, ¹⁶om i kivuu kiyang tiga vac kipihac vihati wê i kivuu ge. Kiyang wê Pol kivuu ge, kiyang ya viyin di kehe o yêp seac lêm, om vông yuac levac vô il ên wê il ob xovô kiyang wê i kivuu ge kehe. Om xomxo piyôp maên wê o le xêkizêc lêm ge, he ya pilepac xolac wê Pol kivuu ge vac di kiyang vihati wê yêp vac xolac ge hixôn. Om Anutu obêc kitya xomxo tige vêl vô buc timuên.

¹⁷Xam lige, xam xovô pyap ên xam nêbê xomxo tige mi nêl kiyang kityooên di pwoo Anutu kiyang vac. Om xam viac xam ên he, gec lêc he didii xam la vac kiyang kityooên wê he nêl ge di vông xam sea vông vinên wê xam vông ge. ¹⁸Apumtau Yesu Kilisi vô il vêl ên il nêd nipaên. Om a nêl vô xam bêga bê xam vông xovôên yuu xêyaa vin lecên wê Yesu vông ge i vô levac vac xam nilôm. Yesu lê i vô levac gwêbaga di i yêp luta lêc luta. Nôn.

1 JON

Kipihac taxlee wê Jon kivuu ge

Kiyang maviha kehe

1 ¹Xomxo ti wê kiyang maviha kehe ge, wê dô taxlee di kibun yuu susu viyang viyang ge gên ma ge, xe ob nêl i kitong vô xam, ên xe mamnôn yê i di xe ngô kiyang wê nêl ge, di xe vigêm hôm lec i mi xê. ²Ên xomxo maviha kehe tige lam le seac vô xe mi xe xê di xovô, om xe nêl kitong vô xam bêga bê maviha luta dôên kehe tige dô hixôn ma Anutu lê, lêc lam le seac mi xe xê. ³Xe xê di ngô pyap, om xe nêl kitong vô xam êno, ên xe nêb xam vông i vin di lam kituc lec xe, êdêc il vihati le tived hixôn Mag Anutu yuu nu tuc Yesu Kîlisi. ⁴Om kiyang ga a kivuu vô xam ên a nêbê il xovô di i vông il nilôd i vô niviha lee.

Kiyang wê il ob dô vac xêseac ge

⁵Kiyang wê xe ngô vô Yesu ge, xe nêl kitong vô xam bêga bê Anutu ge xêseac kehe di mapitoc ti o pitii lec i lêm. ⁶Om il obêc nêbê il le kidu tived hixôn Anutu, lêc il obêc tup vô môp mapitoc ge od il nêl kiyang kityooên di il o timu vô kiyang nôl lêm. ⁷Lêc il obêc tup vô môp xêseac tiyi xocbê Anutu wê dô vac xêseac ge od il hixôn lige vihati, il ob dô hixôn xêdyaa vin lec maên, di Anutu nu tuc Yesu hi ob kitya il nêd nipaên vihati vêl di vông il vô paha lec.

⁸Xame, il obêc nêbê nipaên ti o yêp vac il nilôd lêm ge od il kityoo il di kiyang nôl o yêp vac il nilôd lêm. ⁹Lêc il obêc nêl nêd nipaên kitong seac vô Anutu ge od Anutu obêc pwoo i vya vac di sea il lêm, ên i ge niviha lee kehe, om obêc kitya il nêd nipaên vihati vêl di vông il vô paha lec. ¹⁰Il obêc nêbê il o vông nipaên ti lêm ge, od ge tiyi xocbê il nêb Anutu ge xomxo kityooên, mêlêc il kityoo ge di Anutu kiyang ti o yêp vac il nilôd lêm.

Yesu ge il nêd ngidu xônên

2 ¹Xam nuge vông vinên, a kivuu kiyang ga vô xam ên a nêbê xam ti vôngên nipaên i ma. Lêc ti obêc vông nipaên ti ge od il nêd ngidu

xônên dô wê obêc tu il madnôn di le vô Mag Anutu manôn ên il nêd nipaên ge. Ge xomxo nivihha lee Yesu Kilisi mê. ²Ên ici va yib lec il nêd nipaên ên nêb ob kitya il nêd nipaên vêl. Lêc o vông ên icil va lêm. Nge, vông ên il xomxo kibun ga vîhati yang.

³Il obêc timu vô Anutu kiyang ge od obêc vông xovôên vô il bêga bê il xovô Anutu pyap. ⁴Lêc xomxo ti obêc nêbê i xovô Anutu pyap, lêc o vông Anutu kiyang vô nôn lec lêm ge, od ge xomxo kityoôên kehe, di Anutu kiyang nôn o yêp vac i nilô lêm. ⁵⁻⁶Ên xomxo wê timu vô Anutu kiyang ge, ge wê xêyaa vin lec Anutu vixôhilôg. Om xomxo ti obêc nêbê i dô vac Anutu nilô ge od i tup vô môm i tiyi xocbê Yesu vông ge lê, ên môm bêge wê obêc vông xovôên vô il ên nêb il dô vac Anutu nilô.

Xomxo wê xêyaa vin lec lie gee dô vac xêseac

⁷Xam lige, kiyang wê a kivuu vô xam lec môm xêyaa vin lecên ge, ge o kiyang paha ti lêm. Nge, ge kiyang tikwê wê val vô xam vô buc wê xam ngô Yesu xolac taxlee ge, om xam ngô pyap. ⁸Mêlêc kiyang ga, tiyi xocbê kiyang paha, ên xêseac nôn val dô gwêbaga om ob tii mapitoc la vêl. Mêd kiyang paha tiga, Yesu vông i vô nôn lec di i vô nôn vac xam nilôm gwêbaga hixôn, om il xovô ên il nêbê ge kiyang nôn vixôhilôg.

⁹Xomxo ti obêc nêbê i dô vac xêseac, lêc nilô nipaên yêp vô lie vông vinên, ge od i gên dô vac mapitoc nilô. ¹⁰Di xomxo ngwe wê xêyaa vin lec lie ge, dô vac xêseac nilô, di nipaên ti o le vac i nilô wê ob vông i vô nipaên ge lêm. ¹¹Lêcom xomxo ngwe wê nilô vô nipaên vô lie ge, dô vac mapitoc nilô di la vac mapitoc di vô lung lungên môm, ên mapitoc vun manôn xôn.

¹²Xam nuge, a kivuu kiyang ga vô xam, ên wê Kilisi yib om Anutu kitya xam nêb nipaên vêl ge. ¹³Xam mage, a kivuu kiyang ga vô xam, ên xam xovô xomxo ti wê dô taxlee ilage di dô gwêbaga hixôn ge. Di xam ngivihhi, a kivuu kiyang ga vô xam ên wê xam pwoô Seten hixôn i nipaên vêl ge.

¹⁴Xam nuge, a kivuu kiyang ga vô xam ên wê xam xovô Mag Anutu ge. Di xam mage, a kivuu kiyang ga vô xam, ên xam xovô xomxo ti wê dô taxlee ilage di dô gwêbaga hixôn ge. Di xam ngivihhi, a kivuu kiyang ga vô xam ên wê xam vô xêkizêc lec di Anutu kiyang yêp vac xam nilôm, om xam pwoô Seten hixôn i nipaên vêl ge.

Il xêdyaa i o lêc vin lec môm yuu susu kibun ga lêm

¹⁵Xam xêmyaa i o lêc vin lec susu yuu môm nipaên kibun ga lêm. Ên xomxo ti xêyaa obêc vin lec môm kibun ga ge od xêyaa o vin lec Mag Anutu lêm. ¹⁶Ên môm nipaên kibun ga vîhati, xocbê nilô ngaên, di môm madoên, di xomxo yong he lec susu kibun ga, môm tigege ti o lam vô Mag Anutu lêm. Nge, ge môm wê xomxo kibun ga xovô ge. ¹⁷Om kibun yuu

susu kibun ga wê xomxo doma vô gee vihati xôa obêc ma, lêc xomxo wê ngô Anutu xolac mi timu vô ge wê obêc la dô luta lêc luta.

Xomxo wê vông vevac vô Kilisi gee

¹⁸Xam nuge, gwêbaga buc myahipu vô kwabo lec. Ên xam ngô kiyang pyap ilage wê nêb xomxo levac ti obêc val vông vevac vô Kilisi vô buc myahipu ge, mêd gwêbaga xomxo nipaên tibêgee tibeac divông vevac vô Kilisi ya kiyang kityooên, om il xovô ên il nêbê ga buc myahipu vô kwabo lec. ¹⁹Xomxo nipaên tigege dô vac il mahigun lê, lêc sea il, ên he o il lige vông vinên lêm. Ên he obêc il lige ge od he obêc dô hixôn il. Lêc he sea il, om ge nêl he kitong seac nêbê he o il lige ya lêm.

²⁰Lêc xam mô, Anutu vông Myakilôhô Ngibua lam dô vac xam vihati nilôm pyap, om xam xovô kiyang nôn pyap. ²¹Om ga o tiyi xocbê xam lungên om a kivuu kiyang ga vô xam ge lêm. Nge, a kivuu kiyang ga vô xam ên wê xam xovô kiyang nôn pyap ge, di xam xovô ên xam nêbê kiyang kityooên ti o yêp vac kiyang nôn lêm.

²²Om xam xovô lê. Letya wê kiyang kityooên kehe? Ge xomxo wê nêl ên nêbê Yesu ge o Kilisi wê Anutu vông i lam ge lêm. Xomxo tibêgee wê vông vevac vô Kilisi, ên wê he vô nîmi vô Mag Anutu yuu nu tuc Yesu ge. ²³Ên xomxo wê vô nîmi vô Yesu ge, ge tiyi xocbê vô nîmi vô ma Anutu êno. Di xomxo ngwe wê vông i vin Yesu ge, od ge vông i vin ma Anutu êno.

²⁴Kiyang wê xam ngô ilatikwê taxlee ge, xam hôm pilihi. Ên xam obêc hôm pilihi ge od xam obêc le hixôn Mag Anutu yuu nu Kilisi mi dô. ²⁵Ên Kilisi hilu kiyang vô il pyap ên nêbê il obêc dô madviha luta lêc luta.

²⁶Kiyang ga, a kivuu vô xam lec xomxo wê nêb ob kityoo xam ya kiyang kityooên ge. ²⁷Lêc xam ge, Kilisi vông Myakilôhô Ngibua lam dô vac xam nilôm pyap mi dô gwêbaga. Om xam gên o lungên lêm, om xomxo paha ti o tiyi wê ob val vông xovôên vô xam ge lêm. Ên Myakilôhô Ngibua vaci mi vông xovôên vô xam lec kiyang yuu môp vihati, di xovôên wê vông vô xam ge, o kityooên lêm. Nge, ge kiyang nôn mêge. Om xam hôm Kilisi kiyang xôn pilihi mi dô i tiyi xocbê Myakilôhô Ngibua nêl vô xam ge.

²⁸Om xam nuge, gwêbaga xam hôm Kilisi kiyang xôn pilihi mi dô, êdêc buc wê Kilisi obêc lop mi lôm le seac ge od il le nidviha vô i manôn di xonaên yuu nid yocên i ma. ²⁹Xam xovô pyap ên xam nêbê Anutu ge xomxo nivîha lee, om xam ob xovô bêga bê xomxo wê vông môp nivîha lee ge, ge wê tu Anutu nue.

Il tu Anutu nue pyap

3 ¹Xame, Mag Anutu xêyaa vin lec il luu vêl, om nêl nêbê i nue il, om vixôhilôg il tu i nue nôn. Lêc xomxo nipaên kibun ga lungên il,

di kehe bêga bê he lungên Anutu, om lungên Anutu nue il. ²Xam lige, gwêbaga il tu Anutu nue pyap, di buc timuên, il lungên, il obêc dô bêna? Tige gên o yêp seac vô il lêm, lêcom il xovô pyap bê buc wê Kilisi obêc lop mi lôm ge od il obêc vyac xê i, di tu xocbê ici va. ³Om xomxo vihati wê vông i vin kiyang ga mi dô bin buc wê Kilisi ob vông i vô nôn lec ge, od he ob viac he nilô i vô nivîha i tiyi xocbê Kilisi nilô nivîha ge.

⁴Xomxo vihati wê vông nipaên ge, ge he pwoo Anutu kiyang vac, ên môp nipaên ge wê ob pwoo Anutu kiyang vac ge. ⁵Di xam xovô pyap bê Kilisi lam ên nêb ob lam kitya il nêd nipaên vêl, di Kilisi ge, nipaên ti o yêp vac i nilô lêm. ⁶Om xomxo vihati wê dô vac Kilisi nilô ge obêc vông môp nipaên lêm. Di xomxo wê vông nipaên ge, he lungên Kilisi di o xovô i lêm.

⁷Xam nuge, xam o lêc vông i vin kiyang kityooên wê xomxo ob nêl vô xam ge lêm. Nge, xam xovô bê xomxo wê vông môp nivîha ge, ge xomxo nivîha tiyi xocbê Kilisi ge. ⁸Lêc xomxo wê mi vông môp nipaên ge, he tu Seten xe, ên Seten vaci vông nipaên vô buc taxlee ilage, di i lam tyip gwêbaga hixôn, om Anutu vông nu Yesu lam kibun ên nêbê i lam kitya Seten yuac vêl. ⁹Xomxo wê Anutu nue ge obêc vông môp nipaên lêm, ên maviha wê Anutu vông ge lam le vac he nilô pyap. Om he tiyiên ma wê he ob vông nipaên ge, ên he tu Anutu nue pyap. ¹⁰Om môp wê obêc nêl kitong vô il bê Anutu nu nae di Seten nu nae, môp bêga bê xomxo wê o vông môp nivîha lêm, me xomxo wê xêyaa o vin lec lie lêm ge, ge o Anutu nue lêm.

Môp xêyaa vin lecên lie

¹¹Kiyang wê xam ngô ilatikwê taxlee ge, kiyang bêga bê il xêdyaa i vin lecma, ¹²di il o lêc tiyi xocbê Adam nu tuc Ken ge lêm, ên Ken ge Seten nu om hi li môn yib. Lêc

hi i yib lec kehe tina? Kehe bêga bê Ken mi vông môp nipaên di li môn mi vông môp nivîha. ¹³Om xam lige, tibii nipaên kibun ga obêc vông vevac vô xam di yê xam nipaên ge od xam yetacên i lêc ma, ên ge o môp paha ti lêm.

¹⁴Il xêdyaa mi vin lec lige vông vinên, om il xovô pyap ên il nêbê il sea môp mayibên di il dô vac môp maviha. Lêc xomxo wê xêyaa o vin lec lie lêm ge, gên dô vac môp mayibên. ¹⁵Ên xomxo wê nilô vô nipaên vô lie ge tiyi xocbê xomxo wê hi xomxo ngwe yib ge. Di xam xovô pyap bê xomxo wê hi xomxo ngwe yib ge, maviha dôên kehe o yêp vac he nilô lêm. ¹⁶Il xovô môp xêyaa vin lec maên pyap lec Kilisi môp wê xêyaa vin lec il om sea maviha wê i vông ge di yib ên nêb ob kisuu il lec ên nipaên. Mêgem il êno, il xêdyaa i vin lec lige tiyi wê il ob sea maviha wê il vông ge ên i ngidu he xôn. ¹⁷Om xomxo susu tibeac ti obêc dô di yê li ngwe wê susu maên ge, lêc o xo vîgwe pisiv ên i lêm, ge od xêyaa vin lecên wê Anutu vông ge o yêp

vac i nilô lêm. ¹⁸Om xam nuge, il xêdyaa i o léc vin lec lige ya kiyang yuu myad pileva lêm. Nge, il xêdyaa i vin lec lige nô n di il vông i vô nô n lec.

Xomxo vông vinên le nivaha vô Anutu manôn

¹⁹⁻²⁰Mêgem il xêdyaa obêc vin lec lige tibêge ge od obêc vông xovôên vô il bê il dô vac kiyang nô n. Om il nilôd obêc so vya vô il lec il nêd nipaên ge od il obêc vông nilôd i vô viyin maên vô Anutu manôn, ên il xovô ên il nêbê Anutu ge levac luu il nilôd wê so vya vô il ge vêl di xovô i la tiyi lec myahipu. ²¹Xam lige, il nilôd obêc so vya vô il lêm ge od il ob le nivaha vô Anutu manôn di xonaên ob ma, ²²di susu vihati wê il ob kitaa vô i ge, od obêc vông vô il, ên wê il tup vô i xolac di vông môp wê i yê manôn nivaha lec ge. ²³Di i xolac bêga ên nêbê il vông i vin nu tuc Yesu Kilisi lê, di il xêdyaa i vin lecma, i tiyi xocbê xolac nêl vô il ge. ²⁴Xomxo wê tup vô Anutu xolac ge, ge wê dô vac Anutu nilô di Anutu dô vac he nilô. Di Myakilôhô Ngibua wê Anutu vông vô il ge vông xovôên vô il ên nêbê Anutu dô vac il nilôd.

Kiyang nô n yuu kiyang kityooên

4 ¹Xam lige, plopete kityooên tibeac dô vac viğwe viyang viyang, om le i léc vông i vin xomxo vihati kiyang wê nêl ên nêbê Myakilôhô Ngibua dô vac he nilô di vông xovôên vô he ge lêm. Nge, xam yaxên he di xovô bê ge Anutu Myakilôhô Ngibua nô n, me ge bangwe? ²Xam ob xovô Myakilôhô Ngibua wê Anutu vông ge lec môp bêga, xomxo obêc nêl Yesu kitong bê Yesu Kilisi lam tu xomxo ge, od xam xovô bêga bê xomxo tigege, Myakilôhô Ngibua wê Anutu vông ge dô vac he nilô. ³Léc xomxo wê o nêl Yesu kitong bêge lêm ge, od Anutu Myakilôhô Ngibua o dô vac he nilô lêm. Nge, he kô kiyang vô xomxo kityooên kehe ti wê ob vông vevac vô Kilisi ge, ên xam ngô pyap bê kiyang kityooên tige obêc val kibun ga, om tyo val dô gwêbaga.

⁴Xam nuge, xam ge Anutu nue, om xam pwoop plopete kityooên pec pyap, ên Myakilôhô Ngibua wê dô vac xam nilôm ge xêkizêc wê i vông ge luu xêkizêc wê dô vac xomxo kibun ga nilô ge vêl. ⁵Plopete kityooên tigege, ge xomxo nipaên kibun ga, om he mi nêl kiyang kibun pileva di xomxo kibun mi vô ninya lehe vô he kiyang. ⁶Di il ga, il Anutu nue, om xomxo wê xovô Anutu pyap ge, ge wê ob vô ninya lehe vô il kiyang, di xomxo wê o tu Anutu nue lêm ge, ge wê ob ngô il kiyang lêm. Om môp bêge wê ob vông xovôên vô il bê kiyang lam vô Myakilôhô Ngibua wê kiyang nô n kehe ge, me lam vô kiyang kityooên kehe.

Anutu ge xêyaa vin lecên kehe

⁷Xam lige, il xêdyaa i vin lecma, ên xêyaa vin lecên kehe yêp vô Anutu tibed, om xomxo wê xêyaa vin lec lie ge, ge wê tu Anutu nue di xovô

i nivihā. ⁸Di xomxo wê xêyaa o vin lec lie lêm ge, o xovô Anutu lêm, ên Anutu ge xêyaa vin lecên kehe. ⁹Anutu nu tuc tived, léc vông i lam kibun ga ên nêb i lam vông il dô madviha, om môp tige nêl kitong vô il nêbê Anutu xêyaa vin lec il. ¹⁰Di xêyaa vin lecên kehe, ge o xocbê il xêdyaa vin lec Anutu tax lêm. Nge, Anutu vaci xêyaa vin lec il tax om vông nu tuc lam kibun ên nêb i lam kitya il nêd nipaên vêl. ¹¹Xam lige, Anutu xêyaa vin lec il bêge, mêgem il êno xêdyaa i vin lecma. ¹²Xomxo ti manôn o yê Anutu lêm. Lêcom il xêdyaa obêc vin lec lige ge, od ge tiyi xocbê Anutu vaci dô vac il nilôd, di xêyaa vin lecên wê Anutu vông ge vô nôn pyap vac il nilôd.

¹³Anutu vông Myakilôhō Ngibua lam dô vac il nilôd, om vông xovôên vô il ên nêbê il dô vac Anutu nilô di Anutu dô vac il nilôd. ¹⁴Xe xê Yesu om xe nêl kitong vô xomxo vihati bêga bê Mag vông nu tuc lam kibun ên nêb i lam vô xomxo kibun ga vêl ên he nêd nipaên. ¹⁵Om xomxo ti obêc nêl Yesu kitong bê Yesu ge Anutu nu ge od Anutu dô vac i nilô di i dô vac Anutu nilô. ¹⁶Mêgem il xovô di il vông i vin bê Anutu xêyaa vin lec il nôn.

Xêyaa vin lecên kehe yêp vô Anutu tived, om xomxo wê dô vac môp xêyaa vin lecên ge, ge wê dô vac Anutu nilô di Anutu dô vac he nilô. ¹⁷Xêyaa vin lecên ob vô nôn nivihā vô il bêga bê buc timuên wê Anutu obêc yaxên xomxo nêd kiyang ge, od il obêc le pilihî di xonaên obêc ma, ên gwêbaga il dô kibun ga di vông i tiyi Yesu môp wê vông ilage. ¹⁸Môp xêyaa vin lecên ge, xonaên o yêp vac lêm. Ên môp xêyaa vin lecên obêc vô nôn nivihā vac il nilôd ge od obêc tii xonaên vêl, ên xonaên kehe bêga bê xomxo xona ên myaviwen nipaên wê ob kô lec nêd nipaên ge. Om xomxo ti obêc xona ge, od xêyaa vin lecên o vô nôn vac i nilô lêm.

¹⁹Il xêdyaa vin lec Anutu di vin lec lige, di kehe bêga bê Anutu vaci xêyaa vin lec il tax. ²⁰Xomxo ti obêc nêbê i xêyaa vin lec Anutu, léc nilô vô nipaên vô lie ge od kityoo ge. Ên manôn yê lie lê, léc xêyaa o vin lec lêm, om xêyaa obêc vin lec Anutu wê manôn yêên ma ge bêna? ²¹Yesu xolac wê nêl vô il ge, bêga nêbê xomxo ti xêyaa obêc vin lec Anutu ge od xêyaa i vin lec lie êno.

Vông vinên nôn obêc pwoo nipaên kibun ga pec

5 ¹Xomxo vihati wê vông i vin Yesu ên nêb i Kilisi wê Anutu vông i lam ge, ge he tu Anutu nue. Di he xêyaa obêc vin lec Mag Anutu ge od he xêyaa obêc vin lec Anutu nue hixôn. ²Om il xêdyaa obêc vin lec Anutu di il tup vô i xolac ge od il obêc xovô bêga bê il xêdyaa vin lec Anutu nue êno. ³Il xêdyaa obêc vin lec Anutu ge od il obêc tup vô i xolac. Di i xolac ob vô viyin vô il lêm, ⁴ên xomxo vihati wê tu Anutu nue ge, ge wê ob le xêkizêc di pwoo nipaên kibun ga pec. Vông vinên wê il vông ge, ge wê ob pwoo nipaên kibun ga pec.

⁵Om letya tiyi wê ob le xêkizêc di pwoo nipaên kibun ga pec ge? Ge xomxo wê vông i vin Yesu nêb i Anutu nu nôn ge wê obêc pwoo i pec.

Anutu nêl Yesu kitong nêb Yesu ge i nu nôn

⁶Yesu Kîlisi ge wê lam kibun mêd lam lipac mia di lam kipyax i hi sea di yib. Lêc o lam lipac mia pileva lêm. Nge, lipac mia di kipyax i hi sea hixôn. Mêd Myakilôhô Ngîbua ge wê mi nêl Yesu kitong vô il, ên Myakilôhô Ngîbua ge kiyang nôn kehe. ⁷Om yon wê nêl Yesu kitong nêbê Yesu ge Anutu nu ge, ⁸Myakilôhô Ngîbua yuu mia yon hi. Mêd yon ge, yon xôn nêl kiyang tibed lec Yesu. ⁹Il mi vông i vin kiyang wê xomxo kibun ga nêl nêbê kiyang nôn ge, lêc kiyang wê Anutu nêl ge luu kiyang wê xomxo nêl ge vêl, di kiyang wê Anutu nêl ge, ge nêl nu tuc Yesu kitong vô il. ¹⁰Om xomxo wê vông i vin Anutu nu ge, ge wê hôm Anutu kiyang wê nêl Yesu kitong ge pilihî vac nilô. Lêc xomxo wê o vông i vin Anutu lêm ge tiyi xocbê nêb Anutu ge kityooên, ên xomxo tige o vông i vin Anutu kiyang wê nêl Yesu kitong ge lêm. ¹¹Kiyang wê Anutu nêl lec Yesu ge bêga nêbê Anutu ob vông il la dô madviha luta lêc luta, di maviha dôên kehe ge nu tuc Yesu Kîlisi. ¹²Om xomxo wê vông i vin Yesu di tu i nue ge, od obêc la dô maviha luta lêc luta, lêc xomxo wê o vông i vin Yesu lêm ge od obêc la dô maviha lêm.

Il obêc dô madviha luta lêc luta

¹³Kiyang ga vihati, a kivuu vô xam wê xam vông i vin Anutu nu ge, ên a nêbê xam xovô bê xam kô maviha luta dôên pyap, om xam obêc dô luta lêc luta. ¹⁴Il xovô ên il nêbê il obêc kîtaa susu ti vô Anutu tiyi xovôên wê Anutu vaci vôngo ge od Anutu obêc ngô. Anutu môp bêge, om il o xona ên i lêm. Nge, il ob kîtaa hixôn nilôd nivîha. ¹⁵Ên il xovô ên il nêbê Anutu ob ngô kîtaaên vihati wê il ob kîtaa vô i ge, om il ob xovô hixôn bê susu wê il obêc kîtaa vô i ge od ob vông vô il.

¹⁶Xomxo ti obêc yê wê li ngwe vông môp nipaên ti, lêc o nipaên levac tiyi wê obêc vông li tige yib lec ge lêm ge, od xomxo wê yê ge i kîtaa vô Anutu bê Anutu i pilepac li tige nêl nipaên vêl di i dô maviha. Kiyang ga a nêl lec xomxo wê nêl nipaên o levac tiyi wê ob yib lec ge lêm. Vixôhîlôg, nipaên dô wê xomxo ob yib lec ge, lêcom a o nêl bê xam kîtaa lec nipaên tibêge lêm. ¹⁷Môp soên vihati ge nipaên, lêc nipaên ya ge o tiyi wê ob vông xomxo yib lec ge lêm. Nge, tiyi wê Anutu ob kitya vêl ge.

¹⁸Il xovô pyap ên il nêbê xomxo wê tu Anutu nue ge ob vông môp nipaên lêm, ên Yesu, Anutu nu, viac he nivîha di kisuu he lec ên nêb Seten i o lêc vông he vô nipaên lêm.

¹⁹Il xovô pyap ên il nêbê il ga Anutu nue, di xomxo nipaên kibun ga, he vihati dô vac Seten kwa ngîbi.

²⁰Il xovô ên il nêbê Anutu nu tuc lam vông xovôên vô il ên nêb il xovô Anutu nôn. Mêd gwêbaga il dô vac Anutu yuu nu tuc Yesu Kîlisi nilô. Di Anutu ge, Anutu nôn vixôhîlôg di maviha kehe wê il ob dô madviha luta lêc luta ge.

²¹Om xam nuge, xam viac xam di vô nîmim vô anutu kityooên.

2 JON

Jon kipihac wê vông yuu ge

¹ Ông vêx^a wê Anutu vinoa ông ge, a wê gyovixa ge, a kivuu kipihac ga vô xam nume wê a xêgyaa vin lec xam hixôn nôn ge. Lêc ge o aca tibeclêm. Nge, xomxo vihati wê xovô Anutu kiyang nôn ge, he xêyaa vin lec xam hixôn. ² Xe xêmyaa vin lec xam, kehe bêga bê kiyang nôn yêp vac il nilôd pyap di obêc yêp luta lêc luta. ³ Mag Anutu yuu nu tuc Yesu Kilisi ge, vizid nivihha yuu xêyaa vin lecên di kiyang malehe wê yuu vông ge i hivun il xôn di il dô vac kiyang nôn yuu môp xêyaa vin lec maên.

Il xêdyaa i vin lecma

⁴ A nilôg nivihha yang, ên a ngô wê ông nume mangwe timu vô xolac nôn tiyi xocbê Mag Anutu nêl vô il nêb il vông ge. ⁵ Om ông vêx ge, a nêl vô ông bê il xêdyaa i vin lecma. Ên kiyang ga o paha ti lêm. Nge, kiyang ga tikwê wê il ngô mi xovô pyap ilage. ⁶ Môp xêyaa vin lecên bêga ên nêbê il ob timu vô Anutu xolac. Di xolac wê xam ngô ilatikwê taxlee ge bêga nêbê xam timu vô môp xêyaa vin lecên.

Il viac il ên kiyang kityooên

⁷ Xomxo kityooên tibeac dô vac vigwe vihati. Xomxo tigege mi nêl ên nêbê Yesu Kilisi o lam tu xomxo lêm, om xomxo tibêgee xomxo kityooên wê he vông vevac vô Kilisi ge. ⁸ Om xam viac xam nivihha êdêc yuac wê xam vông ge, nôn i o lêc loc xôa ma lêm. Nge, xam lêc kô myaviwen nivihha lec timuên.

⁹ Xomxo ti obêc hôm Kilisi kiyang pilihi lêm di obêc sox la vac xolac bangwe ge od o tu Anutu nu lêm. Di xomxo wê mi hôm Kilisi kiyang pilihi ge, ge wê tu Mag Anutu yuu nu tuc Yesu xe. ¹⁰ Om xomxo ti obêc val vô xam ên nêb ob nêl xolac vô xam, lêc o nêl xolac tiyi wê Yesu vông ge lêm ge od xam o lêc kô i mi loc vac bom xumac lôma lêm, me xam

^a ¹ Kiyang ti wê Jon kivuu lec vêx ge, xomxo ya xo nêbê ge vêx ti nôn, di xomxo ya xo nêbê ge kiyang pilepacên wê Jon kivuu lec konglegesen ti vac vigwe Esia ge.

o léc pul i vigê mi nêl kiyang myalehe vô i lêm. ¹¹ Ên xomxo wê ob nêl kiyang myalehe vô i ge, tiyi xocbê ngidu yuac nipaên wê i vông ge xôn.

Kiyang myahipu timuên

¹² Kiyang tibeac yêp wê a ob nêl vô xam ge lê, léc a nêb a ob kivuu lec kipihac lêm. Nge, a nêb aca va ob loc vô xam di il dô di keac lec kiyang di dô hixôn xêdyaa nivaha.

¹³ Ông lim vêx wê Anutu vînoo i ge, nue nêl vidiiên vô ông.

3 JON

Jon kipihac wê vông yon ge

¹A lig Gaias, a wê gyovixa ge, a kivuu kiyang ga vô ông wê a xêgyaa vin lec ông hixôn nôn ge.

²Lig, a kitaa lec ông bê ông yuac vihati i vô nivihha di ôcông va dô nimvihha i tiyi xocbê ông kinum dô nivihha ge. ³Ên lige vông vinên ya val vô a mi nêl ông kitong vô a nêbê Anutu kiyang nôn hivun ông xôn di ông mi loc hixôn kiyang nôn. Mêgem a ngô kiyang wê he nêl lec ông ge di a xêgyaa vô nivihha, ⁴ên a obêc ngô wê a nuge tup vô Anutu kiyang nôn bêge ge, od ge wê ob vông a xêgyaa vô nivihha yang luu kiyang baba vêl.

Yuac nivihha wê Gaias vông ge

⁵O a lig Gaias, ông môt nivihha lee yêp vac ôcông va bom, ên ông mi viac lige vông vinên nivihha, di tibii vông vinên ya obêc val vac vigwe ti lêc ông lungên he ge, od ông mi viac he nivihha êno. ⁶Mêd he val nêl ông kitong vô konglegesen ga ên nêbê ông vông môt xêyaa vin lecên nivihha vô he. Om ông obêc xovô Anutu yuac wê he vông ge di viac he ya susu wê ob ngidu he xôn vô môt ge od obêc nivihha. ⁷Ên he kô Yesu lê di la vilee vac vigwe ya, lêc he o kô susu wê ob ngidu he xôn ge ti vô tibii madiluhu lêm. ⁸Om yuac yêp vô icil va ên nêb il ob ngidu xomxo bêge xôn, êdêc il xôn vông yuac lec Anutu kiyang nôn.

Kiyang lec Daiotlepis yuu Demitlias

⁹A kivuu kipihac ti mi vông i loc vô konglegesen vac ông bom, lêc Daiotlepis wê mi yong i ên nêb ob tu xam nêm levac ge nêb ob ngô a kiyang lêm. ¹⁰Om buc wê a obêc mîloc vô xam ge, od a ob nêl i môt wê mi vông ge kitong vô xam, ên xomxo tige mi nêl kiyang nipaên vaxvax lec xe. Lêc o vông môt tige tibed lêm. Nge, vông môt nipaên hixôn bêga nêbê ici va nêb ob hôm xomxo vông vinên wê val vac xam bom ge lec lêm, di lime wê nêb ob hôm xomxo tigeec lec ge, Daiotlepis mi le vac he xôn di tii he la vêl ên konglegesen.

¹¹Om a lig Gaias, ông o léc timu vô xomxo wê mi vông môt nipaên ge lêm. Nge, ông timu vô môt nivîha. Ên xomxo wê mi vông môt nivîha ge, ge wê tu Anutu xe, di xomxo wê mi vông môt nipaên ge, he o xovô Anutu lêm. ¹²Di lim Demitlias ge, xomxo vihati kô i lê lec, di Demitlias timu vô kiyang nôn wê Anutu vông ge, om môt tigege nêl i kitong nêb i xomxo nivîha. Di a êno pîmil i, di ông xovô pyap ên ông nêbê kiyang wê a nêl ge, kiyang nôn vixôhilôg.

Kiyang myahipu timuên

¹³Kiyang tibeac yêp wê a ob nêl vô ông ge lê, léc a nêb a ob kivuu lec kipihac lêm. ¹⁴Nge, a nêb a ob seb loc vô ông dèc u xôn keac lec.

¹⁵Ông nilôm i dô nivîha. Di lime wê dô hixôn a ga nêb a nêl vidiiên vô ông. Di a, Jon nêb ông loc nêl vidiiên vô lige wê dô hixôn ông ge.

JUT

Kipihac wê Jut kivuu ge

¹A, Jut, Yesu Kilisi nu yuac a, di Jems ge, a lig. A kivuu kipihac ga vô xam wê Anutu tyuc xam di xam timu vô i ge. Mag Anutu xêyaa vin lec xam di Yesu Kilisi viac xam nivihã. ²Anutu i xo vîgwe pisiv ên xam, di i vông kiyang malehe hixôn xêyaa vin lecên i hivun xam xôn di i yêp dia.

Xomxo kityooên wê vông vevac vô Anutu xolac ge

³Xam lige, a xo xam vinux yang ên a nêb a ob kivuu kipihac vô xam lec wê Anutu vô il vêl ên il nêd nipaên ge. Lêc gwêbaga a xo ên a nêb a ob kivuu kiyang bangwe i loc vô xam bêga bê xam hôm vông vinên wê xam vông ge xôn pilihã di vông vevac vô xomxo wê xolac kityooên ge. Anutu vông môp vông vinên lu tived vô il wê il tu i nue ge, di ob vông lu ngwe tii vac nang vô il lêm. ⁴Om a nêb a ob kivuu kiyang lec xomxo kityooên vô xam, ên he ya xôpac mi loc dô vac xam mahigun. He vô nimi vô Anutu, di pilepac vizid wê Anutu vông ge lax lec kiyang kityooên ya ên nêb i ngidu môp nipaên wê yêp vac he nilô ge xôn. Di he yax Yesu Kilisi vun. Yesu Kilisi tived ge wê tu il nêd xomxo levac di i Apumtau. Mêgem ilage Anutu nêl ên nêb xomxo kityooên tigege ob tulec myaviwen.

⁵Om Anutu ob kitya xomxo kityooên tigege vêl i tiyi xocbê i kitya xomxo Islel wê vông vinên ma ilage vêl ge. Xam xovô pyap ên xam nêbê ilage Apumtau vô he Islel vêl ên vîgwe Isip di he lop mi la. Lêc timuên he ya o vông i vin lêm, om Anutu kitya he vêl. Xam xovô kiyang tiga pyap ila, lêc a nêb a ob nêl i tii vac vô xam ên xam xovô nang. ⁶Ilage angela ya sea yuac hixôn lê levac wê Anutu vông vô he gee di sea Anutu ben. Mêgem Anutu ku he xôn ya sen di tung he la vac vîgwe mapitoc ta. Om he ob la dô di i la tyip vô buc levac wê Anutu ob yaxên he nên kiyang ge. ⁷Ilage he Sodom yuu Gomola hixôn he vac vîgwe ya wê yêp kwabo vô vîgwe levac yuu ge ninya ge, he êno vông môp nipaên. He vông môp yôdac vêx yuu vux, di vêx vaci vông yôdac vôma, di vux vaci vông yôdac vôma. Om Anutu vông myaviwen vô he di ngwax wê yibên ma ge ya he

ma vël. Anutu hilung kiyang tige yêp seac vô il ên nêb il xê di il o timu vô môt wê he vông ge lêm.

⁸Gwêbaga xomxo kityooên wê vông môt nipaên tibêgee, he dô hixôn xam. He yê vivia bucên lec môt nipaên wê he ninivi xovô ge. He pwoo Apumtau hixôn xomxo kibun ga kiyang vac, di he yong he vô Anutu nue angela. ⁹Ilage angela ti lê nêbê Maikel ge yuu Seten ngaênma ên nêbê letya ob kô Moses wê yib ge ninivi. Maikel ge angela levac ti, léc o yong i vô Seten di tii i la vël lêm. Nge, nêl vô Seten ên nêbê, “Apumtau vaci obêc nêl kiyang xêkizêc vô ông.” ¹⁰Mêlêc xomxo kityooên mô mi nêl kiyang nipaên lec susu wê he o xovô kehe lêm ge, di vông môt wê heche va xovô ge tiyi xocbê bwoc vông môt wê he yê di xovô ge. Om môt nipaên wê he nilô kidu he nêb he ob vông ge ob kitya he vël. ¹¹Anutu obêc vông myaviwen nipaên luu vël vô he, ên wê he timu vô môt nipaên wê Ken vông ilage, di he vông he nilô la diluhu vô mone om he timu vô môt wê Belam vông ilage di nêl kiyang kityooên di kô mone lec. Di he yong he di nêl kiyang nipaên lec Anutu tiyi xocbê Kola vông vô Anutu ilage. Om Anutu ob kitya he vël lec môt tibêgee.

¹²Buc vihati wê xam kituc yaên mi wa i yêp tived ên wê xam xêmyaa vin lecma ge od xomxo kityooên tibêgee lam kituc lec xam di vông môt nipaên vac xam mahigun. He viac heche va di o ngidu xam xôn lêm. Om he tiyi xocbê susu ningec wê vông xam kitucmaên vô nipaên ge. Di he tiyi xocbê lun mapitoc, léc lun valên ma di lea vivêê lam la vël. Di he tiyi xocbê xax wê ob vuac nôn ge, léc buc wê ob vuac ge od o vuac nôn lêm. Di he tiyi xocbê xax wê mupac di xomxo pul vël hixôn ngilôhô ge. ¹³Xomxo kityooên tige mi vông môt nipaên wê ob vông ni yoc lec ge lê, léc he ni o yoc lêm. Om he tiyi xocbê gwec wê vuac mabu mi lam kipyax myasong ningec la kehe ge. Di he tiyi xocbê pitua wê yal vël ên lag mi lam di sea ben ge. Mêgem Anutu vông he nêl vîgwe nipaên wê mapitoc ge yêp di he ob la dô vac luta.

Xomxo kityooên ob tulec myaviwen nipaên

¹⁴Inok ge xomxo vîgê vilu di sec yuu wê pum lec Adam ge,^a léc ilage Inok nêl xomxo kityooên tige kitong ên nêbê, “Xam ngô lê. Apumtau obêc val hixôn angela wê i vông ge tibeac hiwocên, ¹⁵ên ob vông myaviwen nipaên vô xomxo nipaên vihati. Di he wê pwoo i kiyang vac di o timu vô lêm gee, di he wê mi nêl kiyang nipaên lec Anutu gee, Anutu ob nêl he nêl nipaên kitong di he ob tulec myaviwen mabu.” Inok nêl bête ilage lec xomxo kityooên. ¹⁶Xomxo kityooên tige mi nêl kiyang

^a ¹⁴Kiyang wê nêl lec xomxo vîgê vilu di sec yuu ge bêga nêbê Adam nu Set, di Set nu Inos, di Inos nu Kenan, di Kenan nu Mahalalel, di Mahalalel nu Jalet, di Jalet nu Inok, om he vîgê vilu di sec yuu.

nipaên lec Anutu, di he xêyaa vô myavinê lec môp yuu susu vihati, di he nilô kidu he ên môp nipaên wê yêp vac he nilô ge, di he mi keac vaxvac di yong he lê, di nêl kiyang hizi vô xomxo ên nêb he i vông susu ya vô he.

Xam hôm vông vinên xôn pilihi

¹⁷Xam lige, xam ngô kiyang wê il lig Apumtau Yesu Kilisi nue sinale nêl vô xam ilage i tii vac nang, ¹⁸ên he nêl ên he nêbê, “Obêc vô kwabo lec buc timuên myahipu ge od xomxo ya ob yax xolac wê Anutu vông ge vun di ob vô nîmi vô Anutu, di he nilô ob la vô môp nipaên wê yêp vac he nilô ge.” Sinale nêl bêge ilage. ¹⁹Om xomxo nipaên tigeê hibû xomxo vông vinên sea di he mi timu vô môp wê xomxo kibun ga vông. Om Myakilôhò Ngibua o dô vac he nilô lêm.

²⁰Lêc xam lige, xam hôm vông vinên wê Anutu vông vô xam ge xôn xêkizêc ta ên i ngidu xam xôn. Di xam kitaa vô Anutu ya xêkizêc wê Myakilôhò Ngibua vông ge. ²¹Xam hôm xêyaa vin lecên wê Anutu vông ge xôn pilihi. Di xam dô bin buc wê il lig Apumtau Yesu Kilisi obêc hilung xêyaa vin lecên wê i vông ge lam yêp seac, di ob vông xam la dô mamviha luta lêc luta. ²²Xomxo ya vông nilô la yuu lec vông vinên, om xam xo vîgwe pisiv ên he di ngidu he xôn. ²³He tiyi xocbê he dô vac ngwax nipaên, om xam kô he mi lôm vêl ên ngwax lutibed. Di he ya, xam xo vîgwe pisiv ên he, lêc xam xona nêm ên nipaên wê he vông ge, ên môp nipaên wê he vông ge tiyi xocbê ngakwi ningeac wê he vinyum ge, om xam le teva ên môp tibêgee.

Jut pîmil Anutu

²⁴Anutu vaci tiyi wê obêc viac xam nivihâ ên xam o lêc loc vac nipaên lêm. Anutu tiyi wê ob kô xam mi lam le vô i manôn vac xêseac, di nêl vô xam bêga bê nipaên ti o yêp vô xam lêm, mêgem xam xêmyaa obêc vô nivihâ yang. ²⁵Anutu tibed dô di ici va wê vô il vêl ên il nêd nipaên lec yuac wê il lig Apumtau Yesu Kilisi vông ge. Om il ob hi vixad ên Anutu wê tu il nêd xomxo levac, di i xêkizêc kehe, di il hixôn susu vihati la vac i kwa ngîbi. Anutu dô bêge ilage di dô gwêbaga hixôn di obêc dô luta lêc luta. Kiyang nôn.

LEVELESEN

Yesu Kilisi hilung buc wê obêc val timuên ge vô Jon

1 ¹Ilage kiyang wê yêp vac kipihac tiga yêp xôpacên, mêdêc Yesu Kilisi nêl kiyang tiga yêp seac ên nêb il xovô buc wê ob val timuên ge. Anutu nêl kiyang tiga kitong vô Yesu ên nêb i nêl kitong vô nue yuac, ên buc wê kiyang tyo obêc vô nôn lec ge vô kwabo lec. Om Yesu vông nue angela ti lam hilung susu hixôn kiyang wê obêc val timuên ge vô a Jon wê Anutu nu yuac a ge. ²Om a Jon, a xê pyap, om a nêb a obêc nêl Anutu kiyang tige kitong i yêp seac vô xam, di a obêc nêl Yesu Kilisi kiyang kitong vô xam hixôn bêga nêbê kiyang tige nôn vixôhilôg.

³Kiyang tiga nêl buc wê obêc val timuên ge kitong. Om xomxo ti obêc kitong kiyang tiga vô xomxo ge od Anutu obêc vông xomxo tige wê kitong kiyang ge xêyaa vô nivîha. Di xomxo obêc ngô kiyang tiga mi timu vô ge od Anutu obêc vông he xêyaa vô nivîha êno, ên buc wê kiyang tiga obêc vô nôn lec ge val vô kwabo lec.

Jon kivuu kiyang vô konglegesen vigê vilu di sec yuu vac vigwe levac Esia

⁴A, Jon, a kivuu kiyang tiga vô konglegesen vigê vilu di sec yuu vac vigwe levac Esia. Anutu wê dô mugên ilage di dô gwêbaga di obêc dô luta lêc luta ge i vông vizid nivîha i lam vô xam di vông xam nilôm i vô malehe lec. Di Myakilôhô Ngîbua vigê vilu di sec yuu wê dô vô Anutu sia king manôn ge, he i vông vizid nivîha i lam vô xam di vông xam nilôm i vô malehe lec. ⁵Yesu Kilisi ge wê nêl kiyang vîhati kitong yêp seac di o yax ti vun lêm, di i mugên wê kidi lec maviha vac yibên ge di ngînoo king wê dô kibun ga vîhati vêl di tu he nêb xomxo levac. Om a nêb i vông vizid nivîha i lam vô xam di vông xam nilôm i vô malehe lec.

Yesu xêyaa vin lec il, om ici va hi wê kipyax sea ge kitya il nêd nipaên vêl, ⁶di vông il tu i nue di ici va viac il, di vông il tu Ma Anutu nue yuac

xocbê xomxo wê mi si daa ge. Xêseac yuu xêkizêc wê Yesu Kilisi vông ge i yêp luta lêc luta. Nôn.

⁷Xam ngô lê. Kilisi obêc vena vac vîyobtoc di xomxo vihati obêc yê i, di he wê tul i ya bilem di wê byêx i ya yii ge vihati ob yê i êno, di xomxo kibun ga vihati ob xo heche va di byag ên he. Vixôhilôg, kiyang ga obêc vô nôn lec. Nôn.

⁸Apumtau Anutu wê xêkizêc kehe ge dô mugên ilage di dô gwêbaga di obêc dô luta lêc luta, di i nêl ên nêbê, “Aca va mugên di timuên.”

Jon yê Yesu Kilisi

⁹A, Jon, xam lim a, di il xôn tu Yesu xe. A hixôn xam, il xôn kô myavinê di kilê viyin lec Yesu lê mi il le xêkizêc vac viyin tige, di il xôn tu Anutu nue. A nêl Anutu xolac di a nêl wê a vông i vin Yesu ge vô xomxo, om he tii a lam dô lec vigwe kitôn tiga wê yêp vac gwec mahigun ge. Vigwe tiga lê nêbê Patmos. ¹⁰Om a lam dô, mêdêc Apumtau buc da, di Myakilôhô Ngibua lam hivun a xôn, mêdec a ngô vya levac ti lam vô a nimig. Vya tige tiyi xocbê vuac tyuc, ¹¹di nêl bêga vô a ên nêbê, “A ob hilung buc wê ob val timuên ge vô ông mi ông wê di kivuu i tiyi xocbê ông ob wê ge vac kipihac di vông i loc vô xomxo vông vinên vac vigwe vigê vilu di sec yuu ge. Vigwe tige lê nêbê Epesas, Smena, Pegamam, Taiataila, Sadis, Piladelpia, di Leodisia.”

¹²Vya tige nêl bêge, om a pilepac a ên a nêb a ob xê xomxo tyo wê nêl kiyang tige vô a ge. Om a pilepac, lêc a xê lam gol vigê vilu di sec yuu, ¹³di a xê xomxo ti le vac lam mahigun. Xomxo tige tiyi xocbê xomxo nu, di vinyum ngakwi dia ti, di vêx let gol ti lec yagtôv xôn, ¹⁴di bazub lihi kwem tiyi xocbê bwoc sipsip niviluhu hixôn vîyobtoc ge, di mangiluhu linac xocbê ngwax, ¹⁵di vixa tiyi xocbê ain wê xomxo si lec ngwax mi i vô hi ge, di vya nididun levac xocbê mia levac didun, ¹⁶di xomxo tyo hôm pitua vigê vilu di sec yuu vac vigê hiyôv, di yipac levac wê xônên manôn vilu vilu ge yêp vac mya, di manôn linac tiyi xocbê hiyôv linac myapilihi.

¹⁷A xê bêge, om a xona di vixog mi la xêp kibun vac i vixa kwa ngibi xocbê a xib ge. Mêlêc i vyax vigê hiyôv lec a di nêl vô a ên nêbê, “Ông xonaên i ma, ên a xomxo mugên di timuên, ¹⁸di a dô magviha. Ilage a xib, lêc a kidi lec magviha tii vac nang. Om wê lê, a obêc dô magviha luta lêc luta, di a kô ki wê Seten ben hixôn yibên ge. ¹⁹Om ông kivuu kiyang lec susu wê ông wê pyap gwêbaga di susu wê a obêc hilung vô ông timuên ge hixôn. ²⁰Ông wê pitua vigê vilu di sec yuu wê dô vac a vigêg hiyôv ge hixôn lam gol vigê vilu di sec yuu. Susu tigae xocbê kiyang pilepacên, lêc a ob nêl kehe kitong vô ông. Lam gol vigê vilu di sec yuu ge kehe bêga ên nêbê konglegesen vigê vilu di sec yuu. Di pitua vigê vilu di sec yuu ge kehe bêga ên nêbê konglegesen vigê vilu di sec yuu ge he nên bazub.”

Kiyang la vô konglegesen Epesas

2 ¹Yesu nêl vô a, Jon, bêga ên nêbê, “Ông kivuu a kiyang ga i loc vô xomxo wê tu konglegesen Epesas nêl bazub ge bêga bê a ga wê a hôm pítua vigê vilu di sec yuu vac vigêg hiyôv, di a vilee vac lam gol vigê vilu di sec yuu gee mahigun. ²A nêl vô xam Epesas bêga bê a xovô môp vihati wê xam vông ge hixôn yuac levac wê xam vông ge, di a xovô ên a nêbê xam mi le xêkizêc vac viyin, di xam xêmyaa o vin lec xomxo nipaên lêm. Ên he kityoo ên he nêbê he êno tu sinale, lêc xam yaxên kiyang wê he vông ge pyap, om xam xovô ên xam nêbê he o sinale lêm. Nge, he xomxo kityooên. ³A xovô ên a nêbê xam mi kilê viyin lec a lêg di le xêkizêc vac viyin tige, di xam o sea vông vinên wê xam vông ge lêm, di xam nim o ma lec yuac wê a vông ge lêm. ⁴Lêc kiyang ti yêp bêga ên nêbê ilage wê xam vông i vin a paha ge, xam xêmyaa vin lec a nôl, lêc gwêbaga xam xêmyaa o vyac vin lec a tiyi xocbê ilage lêm. ⁵Om xam lêc xovô môp wê xam vông vô a ilage i tii vac, di pilepac nilôm i loc vô yuac nivihia wê xam vông taxlee ge. Lêc xam obêc pilepac xam lêm ge od a obêc val vô xam nêl lam gol vêl. ⁶Lêc a xê xam môp nivihia ti yêp bêga nêbê xam xêmyaa o vin lec môp nipaên wê Nikolas he nue vông ge lêm. A êno, a xêgyaa o vin lec môp tibêge lêm.

⁷“Xam ninyam obêc yêp ge od xam ngô kiyang ga wê Myakilôhò Ngibua nêl vô xomxo vông vinên vac vigwe vihati gee. Xomxo ti obêc vông vevac vô môp nipaên mi pwoo i pec ge od a obêc lee yuu ên i yul xax nôl wê ob dô maviha ya ge mi ya. Xax tige Anutu yev i le vac vigwe paladis.”

Kiyang la vô konglegesen Smena

⁸Nang dêc Yesu nêl vô a, Jon ên nêbê, “Ông kivuu a kiyang ga i loc vô xomxo wê tu konglegesen Smena nêl bazub ge bêga bê a xomxo mugên di timuên wê a xib lêc kidi lec magviha nang ge. ⁹A nêl vô xam Smena bêga bê a xovô viyin wê tulec xam ge di a xovô ên a nêbê xam nêl susu maên, lêc Anutu vông vizid tibeac vô xam. Di a xovô kiyang nipaên wê xomxo ya nêl lec xam ge. He kityoo ên nêbê he xomxo Yuda, lêc he o xomxo Yuda lêm. Nge, he tibii wê Seten viac he ge. ¹⁰Om le i lêc xona ên viyin wê obêc val vô xam ge lêm. Wê lê, Seten nue obêc tung xam ya la vac xumac kalabuhu ên nêb he obêc yaxên xam. Om xam obêc kilê viyin i tiyi buc vigê yuu. Lêc xam obêc kilê viyin di vông i vin xêkizêc ta di wib hixôn ge od a obêc vông nôl nivihia wê maviha dôen ge vô xam.

¹¹“Xam ninyam obêc yêp ge od xam ngô kiyang ga wê Myakilôhò Ngibua nêl vô xomxo vông vinên vac vigwe vihati gee. Xomxo ti obêc vông vevac vô môp nipaên mi pwoo i pec ge od yibên ngwe wê vông yuu ge obêc vông i vô nipaên lêm.”

Kiyang la vô konglegesen Pegamam

¹²Nang dëc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Pegamam nêl bazub ge bêga bê a ga wê a hôm yipac levac wê xônên manôn vilu vilu ge. ¹³A nêl vô xam Pegamam bêga bê a xovô xam bom. Seten tu levac vac xam bom. Mêlêc a xovô ên a nêbê xam mi hôm a lêg xôn di vông i vin xêkizêc di xam o yax vông vinên wê xam vông ge vun lêm. Ilage xomxo vông vinên ti lê nêbê Antipas dô hixôn xam di nêl kiyang wê a vông ge vô xam di o sea kiyang wê a vông ge ti lêm. Lêc tibii hi Antipas yib vac xam mahigun vac vîgwe wê Seten tu levac vac ge di xam wê. Lêc xam o sea vông vinên wê xam vông ge lêm. ¹⁴Mêlêc kiyang ya yêp bêga ên nêbê xam ya mi timu vô môt nipaên wê Belam vông ilage. Belam hilung môt kityooên vô xomxo ngwe lê nêbê Belak, di Belak hilung môt nipaên tige vô xomxo Islel om he ya susu yaên wê tibii vông i tu daa vô anutu kityooên wê mayibên ge, di he vông môt yôdac vêx yuu vux hixôn. Lêc gwêbaga xam ya mi timu vô môt soên bêge. ¹⁵Di xam ya mi timu vô kiyang nipaên wê Nikolas he nue nêl ge. ¹⁶Mêgem xam pilepac nilôm i loc vô môt nivîha, lêc obêc ma ge od a obêc miloc vô xam lutibed di hi he wê hôm môt nipaên xôn ge ya yipac levac wê yêp vac a myag ge.

¹⁷“Xam ninyam obêc yêp ge od xam ngô kiyang ga wê Myakilôhô Ngîbua nêl vô xomxo vông vinên vac vîgwe vîhati ge. Xomxo ti obêc vông vevac vô môt nipaên mi pwoo i pec ge od a obêc vông yaên lag puunê lê nêbê mana wê dô xôpacên ge vô i ên i ya, di a obêc vông ngîdax kwem ti vô i di kivuu i lê paha lec ngîdax tyo, di xomxo bangwe ob xovô lê paha tige lêm. Nge, xomxo ti wê lê yêp lec ngîdax tige vaci obêc yê di xovô.”

Kiyang la vô konglegesen Taiataila

¹⁸Nang dëc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Taiataila nêl bazub ge bêga bê Anutu nu tuc a wê a magngiluhu linac tiyi xocbê ngwax ge di a vîxag tiyi xocbê ain wê xomxo si lec ngwax mi i vô hi ge. ¹⁹A nêl vô xam Taiataila bêga bê a xovô môt wê xam vông ge vîhati, om a xovô môt xêyaa vin lecên hixôn môt vông vinên wê xam vông ge. Di a xovô ên a nêbê xam mi ngîdu xomxo xôn, di xam le xêkizêc vac vîyin, di gwêbaga xam vông yuac levac luu wê xam vông ilage vêl. ²⁰Mêlêc kiyang ti yêp vô xam bêga nêbê xam o sea vêx nipaên ti lê nêbê Jesebel ge lêm. Nge, xam vông i dô hixôn xam. Vêx tige kityoo ên nêbê i plopete ti, di kityoo a nuge yuac mi didii he la vac môt yôdac vêx yuu vux, di vông he ya yaên wê tibii vông i tu daa vô anutu kityooên ge. ²¹A vông buc ya vô vêx tige ên a nêbê i pilepac i, lêc vêx tige nêb ob pilepac i vêl ên môt yôdac vêx yuu vux lêm. ²²Om ngô lê, a obêc vông yidac levac vô vêx tige. Di he wê vông yôdac vô i ge,

he obêc pilepac he vêl ên môp nipaên lêm ge od a obêc vông myavinê mabu vô he, ²³di a obêc hi vêx tyo nue yib. Mêgem xomxo vông vinên vac vîgwe vîhati gee ob yê mi xovô bêga bê a ga wê a yaxên xomxo vîhati piyôp yuu nilô mi xovô, di a obêc vông nipaên me nivîha vô xam toto i tiyi môp wê xam vông ge.

²⁴“Lêc xam ya vac Taiataila ge, xam o timu vô kiyang kityooên wê Jesebel nêl ge lêm, di xam o xovô Seten piyôp wê yêp xôpacên vac i nilô ge lêm. Om a nêl vô xam ên a nêbê a obêc vông vîyin ngwe vô xam hixôn lêm, ²⁵lêc xam hôm kiyang yuu yuac nôn xôn pilihi mi dô di i loc tyip vô buc wê a obêc vena lec ge. ²⁶Xomxo obêc vông vevac vô môp nipaên mi pwoo i pec di vông a yuac di i la tyip lec buc wê obêc yib ge od a ob vông i tu levac di i viac xomxo vac vîgwe vîhati. ²⁷Om obêc hôm xax ain di viac he xêkizêc tiyi xocbê xomxo hôm xax ain vac vîgê di hi dêg hibû sea ya ge. Yuac wê he viac ge tiyi xocbê yuac wê Mag vông vô a ge. ²⁸Di a ob vông pitua wê vîgwe vidiiên ge vô xomxo tigeê.

²⁹“Xam ninyam obêc yêp ge od xam ngô kiyang ga wê Myakilôhô Ngîbua nêl vô xomxo vông vinên vac vîgwe vîhati gee.”

Kiyang la vô konglegesen Sadis

3 ¹Nang dêc Yesu nêl vô a, Jon, ên nêbê, “Ông kivuu a kiyang ga i loc vô xomxo wê tu konglegesen Sadis nêl bazub ge bêga bê a wê Anutu Myakilôhô Ngîbua vîgê vilu di sec yuu dô hixôn a, di a hôm pitua vîgê vilu di sec yuu vac vîgê.

“A nêl vô xam Sadis bêga bê a xovô xam nêl yuac. Xomxo pimil xam ên nêbê xam mi timu vô môp maviha. Lêc xam o timu vô môp tige lêm. Nge, xam timu vô môp mayibên. ²Om xam kidi lec di sea yêpên, di vông xam yuac wê xam sea ge i yêp nivîha i tii vac, ên a o xê xam yuac ti nivîha vô Mag Anutu manôn lêm. ³Ilage xam ngô kiyang tige mi xovô. Om xam xovô kiyang tige i tii vac di hôm xôn pilihi, di pilepac xam. Lêc xam obêc kidi lec di sea yêpên mi pilepac xam lêm ge od a obêc val vô xam tiyi xocbê tibii yôdac ge di xam ob xovô buc tige lêm. ⁴Lêcom xam Sadis ya ge, xam o vông môp nipaên lêm, om tiyi xocbê xam o vînyum ngakwi ningeac lêm. Om a xê xam tiyi wê xam obêc vînyum ngakwi kwem di lam dô hixôn a ge. ⁵Xomxo ti obêc vông vevac vô môp nipaên mi pwoo i pec ge od a ob vông ngakwi kwem tibêge vô i mi i vînyum, di a ob kitya i lê vêl ên kipihac lêm. Kipihac tige nêl xomxo wê obêc dô maviha luta gee lê. Di a ob nêl xomxo tige lê kitong i yêp seac vô Mag, di a ob nêl i lê kitong vô Mag vông angela hixôn.

⁶“Xam ninyam obêc yêp ge od xam ngô kiyang ga wê Myakilôhô Ngîbua nêl vô xomxo vông vinên vac vîgwe vîhati gee.”

Kiyang la vô konglegesen Piladelpia

⁷Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Piladelpia nêl bazub ge bêga bê a ga, a xomxo

ngibua di a kiyang nôn kehe. A kô ki wê Devit vông ge. Om a obêc tax vuayen ge od ti o tiyi wê ob tung lec ge lêm, di a obêc tung lec ge od ti o tiyi wê ob tax i tii vac ge lêm. ⁸A nêl vô xam Piladelpia bêga bê a xovô xam nêmu yuac, om wê lê. A vông vuayen ti le taxên vô xam mamnôn, di ti o tiyi wê ob tung lec ge lêm. A xovô ên a nêbê xam nêmu xêkizêc tiyiên ma, lêc xam mi timu vô kiyang wê a vông ge di xam o yax a vun lêm. ⁹Om ngô lê. Seten nue nêl ên nêbê he xomxo Yuda, lêc he o xomxo Yuda lêm. Nge, he xomxo kityooên. Om a obêc vông he i loc yêp vac xam kwa ngibi ên he i xovô bê a xêgyaa vin lec xam. ¹⁰Xam mi le xêkizêc vac viyin tiyi xocbê a nêl vô xam ilage. Mêgem a obêc vô xam vêl ên viyin wê obêc val vô xam ge. Viyin tige obêc yaxên xomxo vihati wê dô kibun ga ge. ¹¹A obêc miloc vô xam lutibed, om xam hêm vông vinên wê xam vông ge xôn pilihî ên xomxo ti i o lêc vô nôn nivîha wê Anutu vông vô xam ge vêl ên xam lêm. ¹²Xomxo ti obêc vông vevac vô môp nîpâên mi pwoô i pec ge od a obêc vông i le tiyi xocbê xax xêkizêc wê le vac Mag Anutu xumac ngibua nilô ge, di xomxo tige ob sea xumac ngibua nilô di lam lop mi la vêl lêm, di a ob kivuu Mag Anutu lê lec i di kivuu Mag Anutu viğwe levac lê lec i hixôn. Viğwe tige, Jerusalem paha wê Mag Anutu obêc vông i lop mi lam gê lag puunê ge. Di a ob kivuu a lêg paha lec xomxo tyo hixôn. ¹³“Xam ninyam obêc yêp ge od xam ngô kiyang ga wê Myakilôhō Ngibua nêl vô xomxo vông vinên vac viğwe vihati gee.”

Kiyang la vô konglegesen Leodisia

¹⁴Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Leodisia nên bazub ge bêga bê kiyang nôn kehe a, di a mi nêl Anutu kiyang vihati ge yêp nivîha, di a o yax ti vun lêm, di susu vihati wê Anutu tung ge a tu kehe ên. ¹⁵A nêl vô xam Leodisia bêga bê a xovô xam nêmu yuac. Xam o dô tiyi xocbê mia ningigooên nivîha ge lêm di xam o dô tiyi xocbê mia nivînê nivîha ge lêm. A nêb xam dô i tiyi xocbê mia ningigooên nivîha me mia nivînê nivîha ge. ¹⁶Lêc xam mi dô vac mia nivînê yuu ningigooên mahîgun. Om a ob mutac xam vêl ên myag, ¹⁷ên xam mi nêl ên xam nêbê, ‘Xe mone levac di susu tibeac, om susu ti o ma ên xe lêm.’ Xam mi nêl bêge, lêc xam dô nîpâên tiyi wê xomxo ob xo viğwe pisiv ên xam ge, di xam dô tiyi xocbê xomxo wê nên susu maên ge, di xam mamnôn toc di xam dô xêmtuac, lêc xam so ên xam nêb mêd xam dô nimviha. ¹⁸Mêgem a vông xovôên vô xam bêga bê xam lam kisuu gol wê ngwax ya mi i vô paha ge vô a, ên a ob vông xam tulec vizid tibeac, di xam lam kisuu ngakwi kwem mi vînyum ên xomxo i o yê wê xam dô xêmtuac ge lêm ên ob vông ni yocên vô xam, di xam lam kisuu hizî wê xam ob lipac mamnôn ya ge ên xam mamnôn i seac di xam wê viğwe i tii vac. ¹⁹Xomxo wê a xêgyaa vin lec he ge, a nêl he nên nîpâên kitong vô he di titô he. Om xam xovô môp wê xam vông ge di sea

môp nipaên vihati i loc yêp xel, di pilepacxam mi vô paha lec. ²⁰Xam wê lê, a val le kwabo vô vuayen di a hi vigêg lec xumac di keac. Om xomxo ti obêc ngô a vyag di lam tax xumac ge od a obêc la vac xumac lôma di la dô hixôn i, di xii xôn ob xa myam i yêp tived. ²¹Xomxo ti obêc vông vevac vô môp nipaên mi pwoo i pec ge od a obêc tyuc lec di i dô lec sia king wê a vông ge hixôn a, tiyi xocbê a vông vevac mi pwoo nipaên pec ge od a la dô lec sia king hixôn Mag Anutu.

²²“Xam ninyam obêc yêp ge om xam ngô kiyang ga wê Myakilôhô Ngibua nêl vô xomxo vông vinên vac vigwe vihati gee.”

He pimil Anutu gê lag puunê

4 ¹Kiyang wê a kivuu vô konglegesen ge tiyôd, mêdec a, Jon, a xê mag la kisiinê, lêc a xê vuayen wê le taxên gê lag puunê ge. Di vya wê a ngô taxlee tiyi xocbê vuac tyuc ge, a ngô vya tige tii vac, di vya tyo nêl vô a ên nêbê, “Ông lec lam kisii ga lê, lêc a obêc hilung buc wê obêc val timuên ge vihati vô ông.” ²Mêdec lutibed Myakilôhô Ngibua lam hivun a xôn di a xê mag la sia king ti gê lag puunê di xomxo ti dô lec. ³Xomxo tige wê dô lec sia king ge linac xêseac tiyi xocbê ngidax kwem lê nêbê jaspâ hixôn ngidax hi ngwe lê nêbê konilian. Vilub koo di buu vô sia king tige di a xê tiyi xocbê ngidax niyuu lê nêbê emelal. ⁴Di sia 24 le i vivac vô xomxo ti wê dô lec sia king tige, di gyovixa 24 dô lec sia tige. Di he vinyum ngakwi kwem di tung kilung gol tiyi xocbê king mi tung ge lec bazub. ⁵Sia king tige tiyi xocbê deac hixelac di tug di vô didun levac, di ngwax tumên vigê vilu di sec yuu tum mi le vô sia king manôn. Ngwax vigê vilu di sec yuu gee tiyi xocbê Anutu Myakilôhô Ngibua vigê vilu di sec yuu. ⁶Susu ti tiyi xocbê gwec ge yêp vô sia king manôn, di gwec tige xêseac ta tiyi xocbê deac ge.

Lilii maviha yuudiyuu buu sia king tige. Ti le vô manôn di ti le vô nimi di yuu le vilu vilu. He mangiluhu tibeac dô lec he ninivi vihati, ⁷di lilii maviha ti xocbê noo laion, di ti xocbê bwoc levac, di ti xocbê xomxo, di ti xocbê tul wê mi bôb mi la kisii ge, ⁸di he toto ge vinihi vigê vilu di sec ti, di he mangiluhu tibeac hivun he ninivi yuu nilô xôn, di he mi vông lilo tiyi bucên yuu vidiiên vihati bêga ên nêbê,

“Apumtau Anutu xêkizêc kehe ông, ông ngibua, ông ngibua, ông ngibua, di ông dô mugên ilage, di dô gwêbaga, di ông obêc dô luta lêc luta.”

He nêl kiyang tibêge di o vông mahigun vac lêm.

⁹Anutu ge wê dô lec sia king mi dô maviha luta lêc luta. Di lilii maviha yuudiyuu gee mi nêl Anutu xêseac kitong, di vông i lê vô levac, di pimil i. Buc vihati wê he vông bêge ge ¹⁰od gyovixa 24 tige la yêp kipôm manôn vac kibun vô Anutu wê dô lec sia king mi dô maviha luta lêc luta ge di pimil i, di nêx he kilung gol la dô vô sia king manôn di nêl ên nêbê,

11 “O Apumtau, xe Anutu ông. Ông tiyi wê xomxo ob nêl xêseac wê ông vông ge kitong, di vông ông lêm i vô levac, di dô vac xêkizêc wê ông vông ge kwa ngibi, ên ông tung susu vihati ya xovôên wê ôcông va vông ge, mêgem susu tyoe dô gwêbaga.”

Jon yê kipihac ti

5 ¹A xê wê Anutu dô lec sia king ge, di i hôm kipihac ti vac vigê hiyôv, lêc kiyang yêp vac nilô di yêp lec nimi hixôn. Di he vilun kipihac xôn di pitii ya tep vigê vilu di sec yuu. ²Mêdec a xê angela xêkizêc ti keac vya levac bêga ên nêbê, “Letya nivîha tiyi wê ob tax tep di tidii kipihac tigea?” ³Angela nêl bêge, lêc xomxo wê dô lag puunê, di he wê dô lec kibun, di he wê yib di dô vac kibun nilô gee, ti o nivîha tiyi wê ob tidii kipihac tyo mi yê di kitong ge lêm. ⁴Di a xê wê he o tulec xomxo ti tiyi wê ob tidii kipihac mi kitong ge lêm, om vông a byag levac. ⁵Mêdec gyovixa ti nêl vô a ên nêbê, “Le i byag lêm. Ngô lê. Xomxo ti wê xêkizêc tiyi xocbê noo laion ge pum lec kehe Yuda, di Devit ge i bu ilage. Xomxo tyo vông vevac vô môp nipaên mi pwoo i pec om tiyi wê obêc tax tep vigê vilu di sec yuu ge vêl di tidii kipihac tyo.”

Jon yê Yesu xocbê bwoc Sipsip Nu ti

⁶A xê Anutu sia king wê lilii maviha yuudiyuu le i buu ge, di a xê bwoc Sipsip Nu ti le vac sia king yuu gyovixa mahigun, di bwoc Sipsip Nu tyo tiyi xocbê xomxo hi i yib ge, di i levac vigê vilu di sec yuu, di mangiluhu vigê vilu di sec yuu. Mangiluhu tige, ge Anutu Myakilôhô Ngibua vigê vilu di sec yuu wê i vông he la vac vigwe vihati ge. ⁷Mêdec bwoc Sipsip Nu tige la hôm kipihac wê yêp vô Anutu wê dô lec sia king ge vigê hiyôv. ⁸Hôm kipihac pyap, mêdec lilii maviha yuudiyuu hixôn gyovixa 24 ge la yêp kipôm manôn vac kibun vô bwoc Sipsip Nu tyo. Gyovixa tige toto hôm gita tiyi he vac vigê di hôm pile gol vac vigê tiyi he vihati. Ngwaxlu nivivea nivîha dô vac pile gol tige mi pup lec vihati. Ngwaxlu nivivea nivîha ge xomxo vông vinên kitaên wê he mi kítaa ge. ⁹Mêdec he gyovixa vông lilo paha ti bêga ên nêbê, “Ông nivîha tiyi wê ông ob hôm kipihac tyo di tax tep vêl ên ge. Ên xomxo hi ông wib ilage, di ông kisuu xomxo vêl ya hi wê ông vông ge di kitya he nên nipaên vêl, di vông he loc vô Anutu. Ông kisuu xomxo kehe toto, di vya toto, di ninivi toto, di xomxo vac vigwe toto ge hixôn, ¹⁰di ông vông he tu il Anutu nue yuac, di i tu he nên levac, di he ob tu xomxo levac gê kibun.”

He pimil bwoc Sipsip Nu tige

¹¹Pyap dêc a xê mag la, di a ngô angela tibeac vya. He tibeac wê tibeac tiyi xocbê tausen yuu milion ge. Di he le ngivina sia king hixôn lilii maviha yuudiyuu di he gyovixa, ¹²di keac vya levac ên nêbê,

“Bwoc Sipsip Nu tiga wê xomxo hi i yib ge, i nivihia tiyi wê ob kô lê levac hixôn susu nivihia di xovôên yuu xêkizêc vihati, di i tiyi wê xomxo vihati ob nêl i lê i vô levac di nêl i xêseac kitong, di pimil i ge.”

¹³Mêd a ngô xomxo hixôn susu wê Anutu tung ge vihati vya, he wê dô lag puunê di dô lec kibun di dô vac kibun nilô di dô vac gwec ge, he vihati nêl ên nêbê,

“Anutu wê dô lec sia king ge yuu bwoc Sipsip Nu tyo, il ob pimil yuu, di nêl yuu lê i vô levac, di nêl xêseac yuu xêkizêc wê yuu vông ge kitong i yêp luta lêc luta.”

¹⁴Di lilii maviha yuudiyuu ge nêl ên nêbê, “Nôn!” Mêdêc gyovixa vihati la yêp kipôm manôn vac kibun vô yuu di pimil yuu.

Bwoc Sipsip Nu tige tax tep vigê vilu di sec ti vêl ên kipihac

6 ¹Pyap dêc bwoc Sipsip Nu tige hôm kipihac wê tep vigê vilu di sec yuu pitii xôn ge. Nang dêc a xê wê i tax tep taxlee tip. Mêd a ngô lilii maviha yuudiyuu ge ti tyuc vya levac tiyi xocbê deac tug ge di nêl ên nêbê, “Lam!” ²Di a xê mag la, lêc a xê xôhô kwem ti val, di xomxo ti dô lec di hôm vixev yuu vihol vac vigê. Mêdêc Anutu vông kilung ti vô i. Kilung tige, he mi vông vô xomxo wê vông vevac mi nginoo ge. Xomxo tige la vông vevac mi nginoo gwêbaga, di i yuac gên yêp wê ob vông vevac mi nginoo xomxo tibeac vêl.

³Nang dêc bwoc Sipsip Nu tyo tax tep ngwe wê vông yuu ge tip. Lêc a ngô lilii maviha ti wê vông yuu ge vya wê nêl ên nêbê, “Lam!” ⁴Mêd xôhô ngwe wê ninivi hi ge ti val, di xomxo ti dô lec. Mêdêc Anutu vông xêkizêc vô i ên nêb i kitya môt malehe vêl ên vigwe vihati ên xomxo i vông vevac voma di hima mi yib. Om he vông yipac dia ti vô xomxo tige mi i kilê.

⁵Nang dêc bwoc Sipsip Nu tyo tax tep ti wê vông yon ge tip. Nang di a ngô lilii maviha ti wê vông yon ge vya wê nêl ên nêbê, “Lam!” Mêdêc a xê xôhô viliaç ti val, di xomxo ti dô lec di hôm skel ti vac vigê vilu, ⁶di a ngô vya ti lam vac lilii maviha yuudiyuu gee mahigun bêga ên nêbê, “Ông yev plaua ya kap ti ên tibii i kisuu ya mone levac xocbê mone kehe ti, di yev pidi ya kap lu yon ên tibii i kisuu ya mone levac xocbê mone kehe ti. Lêc glis yuu mia ge mone i nipwo tya.”

⁷Nang dêc bwoc Sipsip Nu tige tax tep ti wê vông yuudiyuu ge tip. Mêdêc a ngô lilii maviha ti wê vông yuudiyuu ge vya wê nêl ên nêbê, “Lam!” ⁸Di a xê xôhô zang ti val, di xomxo ti dô lec lê nêbê Yibên, di xomxo ngwe lê nêbê Vigwe Yibên ge timu vô i mi val. Mêd Anutu vông xêkizêc vô yuu ên nêb yuu i hibû xomxo vihati i loc dô kidu yuudiyuu, lêc hi kidu ti i yib di kidu yon i dô. Om yuu hi he ya yib ya yipac wê manôn vilu vilu ge, di vông vip i den ya mi he yib, di yidac kehe toto tulec he ya di he yib, di bwoc vimen kibun ga nga he ya ma vêl.

⁹Nang dêc bwoc Sipsip Nu tyo tax tep ti wê vông vigê vilu ge tip. Mêdec a xê xomxo yibên kinu dô vac alta ngibi. Ilage xomxo tigeo dô maviha di hêm xolac xôn pilihi di nêl i yêp seac, lêc tibii hi he yib. ¹⁰Om he tyuc vya levac ên nêbê, “O Apumtau, xe king ông, ông ngibua, di kiyang nôn kehe ông. Buc vaba obêc lam la vêl di ông ob yaxên xomxo wê kipyax xe hi sea ge nêl kiyang di vông myaviwen vô he?” ¹¹He kinêg bêge, mêdec Anutu vông ngakwi kwem dia vô he toto di nêl vô he ên nêbê, “Xam dô seac vêl myabo lê, lêc tibii obêc hi xam lime yuac ya yib di hi xam lime ya yib hixôn, tiyi xocbê he hi xam wib ilage. Di obêc la pyap ge od a ob vông myaviwen vô he lec wê he kipyax xam hi sea ge.”

¹²Nang dêc bwoc Sipsip Nu tyo tax tep ti wê vông vigê vilu di sec ti ge tip. Mêdec a xê ngayêg levac ti yoc, di hiyôv vô viliac tiyi xocbê nivimihi viliac ge, di dentuc vô hi xocbê xomxo hi ge, ¹³di pitua lag puunê tô mi lam kibun tiyi xocbê lea lîloo xax nôn wê huu ge toc mi lam kibun ge. ¹⁴Mêd lag vilun xôn tiyi xocbê guhu vilunên ge mi la xôa ma, di kitôn wê le kibun ge hixôn kitôn wê le vac gwec mahigun ge vihati, he sea ben di la. ¹⁵Mêd king wê dô kibun ge vihati hixôn xomxo levac, di tibii vevac wê levac ge, di xomxo wê susu tibeac ge, di he wê xêkizêc ge, di he wê tu xomxo nue yuac gee, di he wê viac nue yuac ge, he vihati yang pec mi la xôpac vac vu madia hixôn ngidax wê yux lec kitôn vac madia ge. ¹⁶Di he tyuc la vô kitôn yuu ngidax ên nêbê, “Lam tô lec xe mi hivun xe xôn ên Anutu wê dô lec sia king ge manôn, ên yêên xe i ma, di lam hivun xe xôn ên xêyaa myavinê wê bwoc Sipsip Nu tige vông ge, ¹⁷ên buc levac wê xêyaa myavinê wê Anutu yuu bwoc Sipsip Nu vông ge val gwêbaga, om letya tiyi wê ob le xêkizêc vac viyin tiga?”

Xomxo Islel 144,000 kô mak wê Anutu vông ge

7 ¹Pyap dêc a, Jon, a xê angela yuudiyuu wê le vô kibun myahipu yuudiyuu ge. He hêm lea xôn vac kibun myahipu yuudiyuu ên nêb lea i o lêc vivêê kibun yuu gwec me xax ti lêm. ²Angela yuudiyuu gee, Anutu vông xêkizêc vô he ên nêb he i vông kibun yuu gwec i vô nipaên. Mêdec a xê angela ba ti kidi vac viwen wê hiyôv tyip lam ge, di i hêm Anutu wê maviha ge susu ti wê ob vông mak lec xomxo ya ge, di i tyuc vya levac vô angela yuudiyuu gee ên nêbê, ³“Xam o lêc vông kibun yuu gwec di xax i vô nipaên lutibed lêm. Nge, xe obêc vông mak lec xomxo wê tu Anutu nue yuac ge manôn tax lê. Nang dêc timuên xam vông kibun yuu gwec di xax i vô nipaên.” ⁴Nêl bêge mêdec nêl kitong ên nêbê he ob vông mak lec xomxo Islel 144,000, di ob vînoo he vac Islel kehe vihati. ⁵Mêgem 12,000 pum lec kehe Yuda, di 12,000 pum lec kehe Luben, di 12,000 pum lec kehe Gat, ⁶di 12,000 pum lec kehe Asa, di 12,000 pum lec kehe Naptalai, di 12,000 pum lec kehe Manasa, ⁷di 12,000 pum lec kehe Simion, di 12,000 pum lec kehe Livai, di 12,000 pum lec kehe

Isakal, ⁸di 12,000 pum lec kehe Sebyulan, di 12,000 pum lec kehe Josep, di 12,000 pum lec kehe Bensamin. He gee wê he kô mak wê Anutu vông ge.

Xomxo kidu levac ti pimil Anutu

⁹Pyap dêc a xê mag la, lêc a xê xomxo tibeac kitucma mi dô, lêc he tibeac hiwocên, om o tiyi wê xomxo ti ob kitong he ge lêm. He lam vac vigwe toto, di kehe toto, di ninivi toto, di vya toto. Di he vinyum ngakwi kwem di le vô sia king yuu bwoc Sipsip Nu tige manôn, di he vihati hôm bii lihi vac vigê, ¹⁰di tyuc vya levac ên nêbê,

“Il nêd Anutu wê dô lec sia king ge hixôn bwoc Sipsip Nu tyo, yuu vô il vêl ên il nêd nipaên di vông il dô nidviha.”

¹¹Mêdec angela vihati le i buu sia king yuu gyovixa di lili maviha yuudiyuu, di he la le vô sia king manôn di la yêp kipôm manôn vac kibun vô Anutu, di pimil i bêga ên nêbê, ¹²“Vixôhilôg nô! Il obêc hi vixad ên il Anutu, di nêl xêseac wê i vông ge i yêp seac. Anutu tu xovôên nivihavihati kehe, di il pimil i, di yong i lê i vô levac. Xêkizêc vihati ge yêp vô i, di xêkizêc vihati yang ge tu ici va xe di obêc yêp luta xel. Nôn.”

¹³Mêdec gyovixa ti kinêg vô a ên nêbê, “Xomxo tigae wê vinyum ngakwi kwem gee, he letyae, di he lam gê na?” ¹⁴Om a luu i vya bêga ên a nêbê, “Xomxo levac, a lungên di ôcông va xovô pyap.” Mêdec gyovixa tyo nêl vô a ên nêbê, “Xomxo tigae wê tibii vông myavinê levac vô he ên wê he vông i vin ge, om tiyi xocbê bwoc Sipsip Nu lipac ngakwi wê he vông ge vô paha ya i hi. ¹⁵Mêgem he le vô Anutu wê dô lec sia king ge manôn, di pimil i vac xumac ngibua tiyi bucên yuu vidiiên vihati, di Anutu vaci wê dô lec sia king ge obêc dô hixôn he di viac he. ¹⁶Om vip ti ob den he lêm, di mia ob ma ên he lêm, di hiyôv ob ya he lêm, di susu ti obêc vô myavinê vô he ninivi lêm, ¹⁷ên bwoc Sipsip Nu tige wê dô lec sia king ge obêc tu he nên xomxo wê ob viac he di didii he mi he la num mia maviha luta dôên ge, di Anutu obêc kitya he maluc vêl ên he manôn, di he ob byag i tii vac lêm.”

Bwoc Sipsip Nu tige tax tep ti wê vông vigê vilu di sec yuu ge tip

8 ¹Nang dêc bwoc Sipsip Nu tige tax tep ti wê vông vigê vilu di sec yuu ge tip, om vigwe kisii ganê yêp didun maên tiyi xocbê hiyôv manôn vilubed. ²Di a xê angela vigê vilu di sec yuu wê mi le vô Anutu manôn ge, di he hôm vuac vigê vilu di sec yuu vac vigê.

³Mêdec angela ti kô pile gol di la le vô alta, di Anutu vông susu nivivea nivihavihati tibeac vô i ên nêb i kituc susu nivivea tyoe hixôn xomxo vông vinên nên kitaaên, di la tung vihati xocbê daa lec alta gol wê le vô Anutu manôn ge. ⁴Mêdec susu nivivea lu hixôn xomxo vông vinên nên kitaaên lec vac pile wê angela hôm vac vigê ge di la vô Anutu. ⁵Mêdec angela tyo

hôm pile gol tige di tung ngwax wê dô lec alta ge vac pile mi i pup lec, di nêx i la lec kibun, mêdêc deac tug, di vigwe vô nididun, di deac hixelac, di ngiyêg yoc.

Angela yuudiyuu vê vuac

⁶Nang dêc angela vigê vilu di sec yuu wê kô vuac vigê vilu di sec yuu gee viac he ên nêb he ob vê vuac tyoe.

⁷Mêgem angela ti wê le mugên ge vê i vuac taxlee. Di Anutu vông yôg vac kibun hixôn xax vihati la kidu yon. Mêdec ais yuu ngwax hixôn hi tô mi la kibun di ya kibun hixôn xax kidu ti ma vêl, di kidu yuu yêp niviha. Di ngwax tige ya nita wê paha ge vihati ma vêl.

⁸Nang dêc angela ngwe wê vông yuu ge vê vuac wê i vông ge. Mêdec Anutu nêx susu levac ti xocbê kitôn wê ngwax tum lec ge la tô vac gwec, di vông yôg vac gwec la kidu yon, lêc kidu ti vô hi xocbê xomxo hi ge, di kidu yuu yêp niviha, ⁹di Anutu hibu lili maviha wê dô vac gwec ge la kidu yon, lêc kidu ti yib mima vêl, di kidu yuu dô maviha, di he hibu sip la kidu yon di kidu ti vô nipaên, di kidu yuu le niviha.

¹⁰Nang dêc angela ti wê vông yon ge vê i vuac. Anutu hi mia tip la bo yon. Mêdêc pítua levac ti wê tum xocbê ngwax ge lam gê lag puunê di tô mi la kibun vac mia bo ti, di bo yuu yêp niviha, di pítua tige tô mi la vac mia wê yêp vac lôva ge vihati. ¹¹Pítua tyo lê nêbê kilin xocbê pixoho. Om vông mia kidu ti vô kilin, lêc kidu yuu dô niviha. Xomxo tibeac num mia kilin tige di yib mima vêl.

¹²Nang dêc angela ti wê vông yuudiyuu ge vê i vuac. Anutu vông yôg vac hiyôv yuu dentuc di pítua la kidu yonyon. Mêdêc hiyôv yuu dentuc di pítua, kidu titi linacên ma, di kidu yuuyuu linac. Mêgem vô vidiiên yuu hucên ge, hiyôv kityê ti vô mapitoc ta, di kityê yuu linac. Di vô bucên ge dentuc yuu pítua kidu titi linacên ma, di kidu yuuyuu linac.

¹³Nang dêc a xê tul ti bôb mi la kisii ganê, di a ngô menac tige tyuc vya xêkizêc bêga ên nêbê, “Axi! Axi! Axi! Angela yon gên dô, om yon obêc vê yon vuac ge od viyin levac mabu obêc val vô vêx yuu vux vihati wê dô kibun ge.”

Angela ti wê vông vigê vilu ge vê vuac

9 ¹Nang dêc angela ti wê vông vigê vilu ge vê i vuac. Mêd a xê pítua ti hoo gê lag puunê di la kibun, di Anutu vông ki wê ob tax madia wê mapitoc ta ge vô pítua tige. ²Om tyo tax madia tyo, di ngwaxlu levac xocbê ngwax ya yuac ge lam tyip vac, di hivun hiyôv yuu lag xôn di vigwe vô mapitoc ta. ³Mêdêc hiveac tibeac lam vac ngwaxlu tige di lam la lec kibun. He kô xêkizêc tiyi xocbê kipyêc wê dô kibun ge. ⁴Mêdêc kiyang la vô hiveac bêga ên nêbê, “Xam o lêc vông nita yuu xax hixôn susu wê tyip lec kibun ge i vô nipaên lêm. Nge, xam loc vô xomxo wê

Anutu mak o yêp lec he manôn lêm ge, di xam loc vông he i vô nipaên.
⁵Om xam loc vông myavinê mabu vô he i tiyi dentuc vigê vilu, léc le i léc hi he i yib lêm.” Kiyang nêl bêge, di myavinê wê hiveac vông vô xomxo ge tiyi xocbê myavinê wê kipyêc

ving xomxo ge. ⁶Vô buc tigege xomxo ob myag môp wê he ob yib lec ge, léc he ob yêvô môp ti lêm, di he xêyaa ob vin lec nêb he ob yib, léc he ob yib lêm.

⁷Hiveac tigege, he tiyi xocbê xôhô wê xomxo viac pyap nêb ob la vevac ge. Susu ti xocbê kilung gol ge dô lec he bazub, di manôn tiyi xocbê xomxo manôn ge, ⁸di bazub lihi dia xocbê tibii vêx bazub lihi ge, di nivu tiyi xocbê noo laion nivu ge, ⁹di nibu tiyi xocbê ngakwi ain, di he vinihi vô nididun levac tiyi xocbê pêt nipwo tibeac wê xomxo dô lec di xôhô didii mi la vevac ge. ¹⁰Di he xêxuhu tiyi xocbê kipyêc xêxuhu ge di mya kilin wê ob ving xomxo ya ge dô vac he xêxuhu. Om xêkizêc wê he vông ge kehe yêp vac he xêxuhu, om ob vông myavinê vô xomxo tiyi dentuc vigê vilu. ¹¹Angela tige wê viac madia mapitoc ta ge tu hiveac tigege nêl king. Vac Hiblu vya angela tyo lê nêbê Abadon, di vac Glik vya lê nêbê Apolion. Lê tige kehe bêga ên nêbê xomxo ti wê ob kitya susu hixôn xomxo vêl ge.

¹²Mêgem viyin wê mugên wê hiveac vông ge tiyôô. Om wê lê, viyin yuu obêc val timuên hixôn.

Angela ti wê vông vigê vilu di sec ti ge vê i vuac

¹³Nang di angela ti wê vông vigê vilu di sec ti ge vê i vuac. Mêd a ngô vya ti lam vac alta gol levac dia yuudiyuu. Alta tige le vô Anutu manôn. ¹⁴Vya tyo nêl vô angela ti wê vông vigê vilu di sec ti wê hôm vuac ge ên nêbê, “Pewelac angela yuudiyuu wê he ku xôn vac mia levac Yupletis ge di vông he loc.” ¹⁵Om angela tige piwelac he yuudiyuu gee, di vông he la ên nêb he i loc hibu xomxo vihati ge i loc kidu yon, di he i hi kidu ti i yib, di kidu yuu i dô maviha. Ilage angela tyoe viac he pyap di he dibin kliskas di dentuc di buc hixôn hiyôv manôn wê he ob vông vevac lec ge. ¹⁶Om he didii nue vevac wê dô léc xôhô ge mi la. Xomxo vevac tigege tibeac hiwocên tiyi xocbê 200 milion ge, di a ngô wê he nêl he naba tibêge. ¹⁷Di a xê xocbê a xê vivia, léc xomxo vevac tigege dô lec xôhô. Xomxo tigege vinyum ngakwi ain lec pikopac xôn di ngakwi tigege manôn hi yuu niyuu di zang, di xôhô wê he dô lec ge bazub tiyi xocbê noo laion ge, di ngwax yuu ngwaxlu yon ngidax salpa wê ngwax tum vac ge, yon xôn lam vilup vac xôhô mya mi la. ¹⁸He hi xomxo kidu ti yib ya susu nipaên yon ge, di kidu yuu dô maviha. He hi xomxo ya ngwax yuu ngwaxlu yon ngidax salpa wê lam vac xôhô mya ge. ¹⁹Xêkizêc wê xôhô vông ge yêp vac he mya yuu xêxuhu. He xêxuhu tiyi xocbê myel léc bazub le lec, di he mi vông vevac ya xêxuhu yuu bazub.

²⁰Om susu nipaên yon ge hi xomxo ya yib. Lêc he wê gên dô maviha ge, he o pilepac he ên môp nipaên wê he vigê mi vông ge lêm, di he o sea môp wê he mi kitaa vô vimwo nipaên di kitaa vô anutu kityooên kinu ge lêm. Kinu tigege wê he vông ya gol di silva di ain di ngidax di sev ya xax, om kinu tigege o tiyi wê ob yê vigwe di ngô kiyang di la vac vigwe ya ge lêm. ²¹Di xomxo tigege mi hi xomxo yib di vông môp yevac di môp yôdac vèx yuu vux, di vông yôdac vô xomxo susu. Lêc he o pilepac he di vô nîmi vô môp nipaên tibêge lêm.

Angela vông kipihac nipwo ti vô Jon mi i ya

10 ¹Pyap dêc a xê angela xêkizêc ti lop mi lam gê lag puunê, lêc viyobtoc hivun i xôn, di vilub koo mi yêp lec bazub kisii, di manôn linac xocbê hiyôv ge, di vixa yuu xôn tiyi xocbê teac di ngwax tum lec. ²Di i hóm kipihac nipwo wê tidii pyap ge ti vac vigê, di lax vixa vilu hiyôv la vac gwec, di lax vixa vilu kêd la lec kibun kisii, ³di i tyuc vya levac tiyi xocbê noo laion vô vya ge. Tyuc pyap di deac vigê vilu di sec yuu gee tug di nêl kiyang. ⁴Deac vigê vilu di sec yuu gee tug di nêl kiyang pyap, om a nêb a ob kivuu kiyang wê he nêl ge, mêlêc a ngô vya ti lam gê lag puunê bêga ên nêbê, “Le i lêc kivuu kiyang wê deac vigê vilu di sec yuu gee tug di nêl ge lêm. Nge, i yêp xôpacên vac ôcông va piyôp.”

⁵Mêdêc angela ti wê a xê pyap wê vixa vilu le vac gwec di vilu le lec kibun ge, angela tyo hilung vigê hiyôv la kisii ⁶ên nêb ob nêl kiyang vixôhilôg nôn lec Anutu wê dô maviha luta lêc luta ge lê. Anutu tung lag hixôn susu wê dô vac ge, di tung kibun hixôn susu wê dô lec ge, di tung gwec hixôn susu wê dô vac ge. Om angela tyo nêl bêga ên nêbê, “Buc val pyap, om Anutu obêc bin buc ngwe hixôn lêm. ⁷Nge, angela ti wê vông vigê vilu di sec yuu ge obêc vê i vuac ge od Anutu obêc vông kiyang xôpacên wê vông vô nue yuac plopete mi he nêl mi i yêp seac ilage vô nôn lec.”

⁸Angela nêl bêge, mêdêc vya ti wê lam gê lag puunê mi a ngô ilage nêl vô a tii vac ên nêbê, “Loc hóm kipihac nipwo ti wê tidii pyap mi yêp vac angela vigê ge vêl. Angela tigege wê vixa vilu le vac gwec di vilu le lec kibun.” ⁹Om a la vô angela tyo mi la nêl vô i ên a nêbê, “Vông kipihac tiga vô a.” Om i nêl vô a ên nêbê, “Hóm kipihac tiga mi loc wa. Di ob vô nyen vac ông myam tiyi xocbê vinoluc ge di ob la dô vac xêmyaa di obêc kilin.” ¹⁰Mêdêc a kô kipihac nipwo tigege vac angela tyo vigê di xa i ma vêl, di kipihac vô nyen vac a myag, di a ngôn i la lê, lêc tyo la vô kilin levac vac a xêgyaa. ¹¹Mêdêc angela tyo nêl vô a ên nêbê, “Loc nêl Anutu kiyang i tii vac lec buc yuu susu vihati wê obêc val timuên vô xomxo vac vigwe tibeac, di vya tibeac, di ob val vô king tibeac hixôn.”

Xomxo yuu nêl kiyang kitong

11 ¹Nang dêc Anutu vông pitoa wê mi kô mak vô susu ya ge ti vô a, di nêl vô a ên nêbê, “Kidi lec mi loc kô mak vô Anutu xumac

ngibua yuu alta di kitong xomxo wê dô vac xumac ngibua nilô mi kitaa ge. ²Lêc xumac ninyawehe ge, le i lêc kô mak vô hixôn lêm. Nge, ông sea i yêp xel, ên a vông vô tibii madiluhu, om he ob kê vigwe ngibua Jelusalem vô nipaên tiyi xocbê dentuc 42 ge. ³Di a obêc vông xêkizêc vô a nuge yuac yuu ên yuu i loc nêl kiyang wê a vông ge vô xomxo. Om yuu obêc vêx nivimihi wê xomxo mi vinyum lec buc wê he dô vac viyin ge, di yuu obêc la nêl kiyang wê a vông ge i tiyi buc 1,260.” Angela nêl bêge, di buc 1,260 ge tiyi xocbê klismas yon di dentuc vigê vilu di sec ti ge.

⁴Xomxo yuu ge tiyi xocbê xax oliv yuu di lam yuu wê le vô Apumtau wê viac kibun vihati ge manôn. ⁵Lêc tibii obêc nêb vông yuu i vô nipaên ge od ngwax obêc tum vac yuu mya di ya tibii vevac tige i ma. Vixôhilôg, tibii obêc vông nipaên vô yuu ge od ngwax obêc ya he yib. ⁶Xêkizêc wê yuu vông ge tiyi wê yuu ob kol lag lec di lun valên ob ma i tiyi buc vihati wê yuu ob nêl Anutu xolac ge. Di xêkizêc wê yuu vông ge tiyi wê yuu ob pilepac mia di i vô hi xocbê xomxo hi ge, di xêkizêc wê yuu vông ge tiyi wê yuu ob vông xomxo vô nipaên ya viyin kehe toto ge. Om tiyi buc vihati wê yuu obêc nêb vông viyin tibêge ge od yuu obêc vông.

⁷Yuu obêc nêl Anutu kiyang pyap ge od bwoc vîmen ti obêc lec vac vu mada wê mapitoc ta ge mi val tyip, di ob vông vevac vô yuu di nginoo yuu vêl di hi yuu yib, ⁸di yuu ninivi ob yêp vac môp levac vac vigwe levac Jelusalem wê nêl kiyang pilepacên nêbê Sodom yuu Isip. Vigwe levac Jelusalem wê ilage tibii hi Apumtau wê yuu vông ge yib lec xax. ⁹Mêdêc xomxo ya vac ninivi toto di kehe toto di vya toto di vigwe toto ge, he ob yê yuu ninivi tiyi buc yon diluhu di buc ti viwen hixôn, di he ob tyuc lec nêb xomxo i o yev yuu lêm. ¹⁰Om xomxo kibun ga vihati xêyaa ob vô nivaha ên wê plopete yuu ge yib, om he ob yoo di myêl levac mi ya di vông susu nivihaviha vôma, ên yuu nêl xomxo kibun ga nêl nipaên lec he manôn di vông viyin vô he.

¹¹Mêdêc buc yon yadiluhu di ti viwen lam la vêl lê, lêc Anutu vê myakilôhô maviha la vac yuu nilô di yuu kidi lec maviha mi le kisii, di xomxo vihati wê yê yuu ge xona mabu ên yuu. ¹²Mêdêc vya levac ti lam gê lag puunê di lam vô yuu bêga ên nêbê, “Muu lec mi lam kisii ga.” Mêgem yuu lec vac viyobtoc mi la lag puunê di xomxo wê vông vevac vô yuu ge yê wê yuu lec mi la ge. ¹³Mêdêc lutibed ngiyêg levac yoc di kipê vigwe levac tige mya ti vêl, di mya vigê vilu di sec yuudiyuu gên le nivaha. Ngiyêg tige hi xomxo 7,000 yib, di he wê gên dô maviha ge xona mabu yocên, om pimil Anutu lag puunê.

¹⁴Om viyin levac ti wê vông yuu ge val pyap. Om ngô lê, viyin levac ti wê vông yon ge obêc val lutibed.

Angela ti wê vông vigê vilu di sec yuu ge vê i vuac

¹⁵Nang dêc angela ti wê vông vigê vilu di sec yuu ge vê i vuac di vya ya lam gê lag puunê di tyuc xêkizêc bêga nêbê,

“Il Apumtau Anutu hixôn Kilisi, yuu tu king wê xomxo kibun vihati vông, di ob tu king wê ob dô luta lêc luta ge.”

¹⁶Nêl bêge mêdêc gyovixa 24 wê mi dô lec sia wê le vô Anutu manôn ge, he kipôm manôn vac kibun di pimil Anutu ên nêbê,

¹⁷“Apumtau Anutu, ông xêkizêc kehe, ông dô mugên ilage, di dô gwêbaga hixôn. Ông kô xêkizêc wê ông vông ge lec pyap di ông ob tu xomxo vihati nêl king, om xe ob pimil ông. ¹⁸Tibii madiluhu xêyaa vô myavinê vô ông, lêcom ông êno ge, ông xêmyaa vô myavinê vô he pyap. Om gwêbaga buc wê ông ob yaxên xomxo yibên nêl kiyang ge val, di buc gwêbaga wê ông obêc vông nôn nivaha vô nume yuac, he wê tu plopete hixôn xomxo vông vinên vihati, di he wê xona ên ông di la vac ông kwa ngibi, di he wê lê levac di he wê o le levac lêm ge vihati. Di buc gwêbaga wê ông obêc kitya he wê vông xomxo hixôn kibun vô nipaên ge vêl.”

¹⁹He nêl kiyang tige pyap, mêdêc Anutu xumac ngibua lag puunê tax mi le myadongên, di Anutu kilong yêp seac vac xumac ngibua tyo ni lô. Kilong tige tiyi xocbê kiyang wê Anutu hilu pyap ilage. Mêdêc deac hixelac, di vigwe vô nididun, di deac tug, di ngiyêg yoc, di lun tiyi xocbê hikwelac kwem ge tô hixôn.

Vêx ti yuu myel levac ti kiyang

12 ¹Nang dêc do levac lag puunê ti val le seac bêga nêbê vêx ti dô, lêc vinyum hiyôv lec ninivi xocbê ngakwi ge, di dentuc dô vac vixa ngibi, di pitua vigê yuu di tô mi la yuu ge dô lec bazub tiyi xocbê kilung ti. ²Vêx tyo nu dô vac xêyaa, lêc kê ên nêb ob yubac, om ta yaxên myavinê levac di iac mabu. ³Nang dêc do levac lag puunê ngwe val bêga nêbê myel levac mabu ti yêp. Myel tige ninivi hi, di bazub vigê vilu di sec yuu, di levac vigê yuu le lec bazub, di kilung vigê vilu di sec yuu xocbê kilung wê king mi tung ge dô lec bazub toto. ⁴Myel tige xêxuhu pityp pitua kidu ti ma vêl di nêx he la lec kibun, di pitua kidu yuu ge dô vac lag. Mêdêc myel tige la le vô vêx tyo wê ob kô nu ge manôn ên nêb nipwo tige obêc yubac ge od ob ya. ⁵Mêdêc vêx tyo kô nu vux ti. Vô buc timuên wê nipwo tyo obêc vô levac ge od obêc hôm xax tiyi xocbê ain ge vac vigê di viac xomxo vihati ya. Nu tyo yubac om myel tige nêb ob ya, lêc he kô i mi la vô Anutu lec i sia king. ⁶Vêx tyo pec mi la vac vigwe myadongên mi la dô vac vigwe ti wê Anutu viac pyap vô i ge, om he ob vông yaên vô i di viac i tiyi buc 1,260 (klismas yon di dentuc vigê vilu di sec ti).

⁷Mêdêc vevac levac tyip gê lag puunê. Maikel he nue angela vông vevac vô myel he nue angela nipaên, om he vông vevac vôma. ⁸Lêc

Maikel he nue angela luu myel he nue vêl, om myel he nue tiyiên ma wê ob dô lag puunê ge. ⁹Om Maikel he nue angela nêx myel levac tyo lam kibun. Myel tige dô ilage, di lê ngwe nêbê vimwo nipaên Seten, di lê ngwe nêbê Devil wê mi nêl kiyang kityooên vô xomxo kibun ga vihati. Lêc Maikel he nue angela nêx myel nipaên tige hixôn nue angela nipaên lam kibun.

¹⁰Pyap dèc a ngô vya levac ti lam gê lag puunê bêga ên nêbê, “Gwêbaga il Anutu vô il vêl ên xêkizêc wê myel nipaên vông ge, om xêkizêc wê Anutu vông ge yêp seac di i tu king wê il vông ge, di Kilisi wê i vông i lam ge tu levac, ên angela wê Anutu vông ge tii xomxo nipaên tyo lam kibun. Ilage xomxo nipaên tige mi le vô Anutu manôn tiyi vidiiên yuu bucên vihati, di nêl kiyang kityooên lec il lige vông vinên vô Anutu. Lêc angela wê Anutu vông ge nêx i lam kibun. ¹¹Lêc hi wê bwoc Sipsip Nu vông ge kitya il lige nêl nipaên vêl, om he nginoô Seten vêl, di he mi nêl Kilisi kiyang yêp seac, om he luu Seten vêl, ên he o vông nilô la vô môp wê nêb he ob dô nivîha ge lêm. Nge, he nêb xomxo obêc hi he yib ge od ge nivîha di kiyang ti o yêp lêm. ¹²Mêgem ông vigwe kisii ganê hixôn xam vihati wê xam dô kisii ge, xam xêmyaa i nivîha. Lêc xam kibun yuu xam gwec, xam xona nêl ên viyin levac ob val vô xam, ên Seten loc kibun pyap vô xam di xêyaa vô myavinê levac, ên xovô nêb i nêl buc wê Anutu obêc kitya i vêl ge val vô kwabo lec.”

¹³Vya tyo nêl bêge, mêdêc myel levac tige yê wê he nêx i lam kibun ge, om la tii vêx tyo wê kô nu vux tige ên nêb ob hi i yib. ¹⁴Lêcom Anutu vông tul levac vinihi yuu vô vêx tyo ên nêb i vinyum lec i di bôb mi loc kisii ya di sea myel i dô, di loc ben vac vigwe mahigun pileva ên he ob vet i ya yaên di viac i tiyi klismas yon di dentuc vigê vilu di sec ti. ¹⁵Mêlêc myel tige mutac mia levac vac mya timu vô vêx tige vixa ên nêb i loc byêx vêx tyo i loc. ¹⁶Lêc kibun ngidu vêx tyo xôn bêga nêbê sux mya di ngôn mia wê myel mutac i la ge, om o la hi vêx tyo lêm. ¹⁷Mêdêc myel xêyaa vô myavinê vô vêx tyo, om loc mi la nêb ob la vông vevac vô vêx tyo nue. He gee wê mi timu vô Anutu xolac di vông i vin Yesu di nêl i kiyang yêp seac. ¹⁸Mêdêc myel tige mila le vô gwec ninya.

Bwoc vimen yuu val

13 ¹A xê bwoc vimen levac ti lam vac gwec. Bwoc vimen tige bazub vigê vilu di sec yuu, di levac vigê yuu le lec bazub, di kilung vigê yuu tiyi xocbê kilung wê king mi tung ge dô lec levac toto, di lê nipaên ti yêp lec bazub toto. Lê kehe bêga nêbê kiyang nipaên toto wê xomxo nêl vaxvax lec Anutu ge. ²Di bwoc vimen wê a xê ge tiyi xocbê noo lepat, di vixa xocbê noo bea vixa ge, di mya xocbê noo laion mya ge.

Di myel levac vông xêkizêc wê i vông ge vô bwoc vimen tige, di vông i tu levac xocbê ici va ge, di vông lê levac vô i. ³Bwoc vimen tige bazub vigê vilu di sec yuu, léc ti vô nipaên tiyi xocbê xomxo nêx i yib ge. Léc bazub tige vô nivaha lec nang, om xomxo vihati yê di yetac ên i di he xêyaa vô nivaha di he la timu vô i vixa. ⁴Mêdêc xomxo yev vixa kitu vô myel levac di pimil i, ên wê vông xêkizêc wê i vông ge vô bwoc vimen tige. Om he yev vixa kitu vô bwoc vimen êno di nêl ên nêbê, “Letya vông xêkizêc tiyi xocbê bwoc vimen tiga? Di letya tiyi wê ob vông vevac vô i ge? Ti tiyiên ma vêl.”

⁵Bwoc vimen tige yong i di nêl kiyang nipaên lec Anutu. Di kô xêkizêc tiyi wê ob vông môp nipaên tibêgee i miloc tyip vô dentuc 42 i lam loc vêl. Di Anutu diyê ya manôn di o keac ti lec lêm. ⁶Om bwoc vimen tige nêl kiyang nipaên lec Anutu, om nêl kiyang nipaên lec Anutu lê di nêl lec Anutu ben di nêl lec Anutu nue wê dô kisii ganê. ⁷Bwoc vimen tige vông vevac vô xomxo vông vinên di nginoo he vêl. Léc Anutu diyê ya manôn di o nêl kiyang ti lec i lêm. Di bwoc vimen kô xêkizêc wê ob tu king di viac xomxo kehe toto di ninivi toto di vya toto di vigwe toto ge. ⁸Om xomxo wê he lê o yêp vac Anutu kipihac lêm ge, he vihati ob yev vixa kitu vô bwoc vimen tige. Taxlee ilage wê Anutu gên o tung kibun hixôn susu vihati lêm ge od kivuu xomxo wê ob dô maviha luta léc luta ge lê yêp vac kipihac wê bwoc Sipsip Nu vông ge, di he tu i xe. Bwoc Sipsip Nu tige wê xomxo hi i yib ilage.

⁹Xam ninyam obêc yêp ge od xam ngô kiyang tiga lê. ¹⁰Anutu obêc lee yuu nêb xomxo ti i loc kalabuhu ge od ob la kalabuhu. Di Anutu obêc lee yuu nêb xomxo ti i yib ya yipac ge od ob yib ya yipac. Om môp viyin tibêge obêc val ge od xomxo vông vinên he i le xêkizêc ta vac viyin di hôm vông vinên wê he vông ge xôn pilihi.

¹¹Nang dêc a xê bwoc vimen ngwe val tyip vac kibun di lam le seac. Levac nipwo yuu tiyi xocbê levac wê bwoc sipsip nu ti vông ge tyip lec bazub, di keacên wê i vông ge tiyi xocbê myel levac vya. ¹²Mêdêc bwoc vimen ngwe wê tax ge vông xêkizêc vô bwoc vimen wê vông yuu ge ên nêb i vông yuac ya di i kidu xomxo vihati ên nêbê he i yev vixa kitu vô bwoc vimen ngwe wê tax ge. Bwoc vimen ngwe wê tax ge wê bazub ti vô nipaên tiyi xocbê xomxo hi i yib ge, léc vô nivaha lec nang. ¹³Mêdêc bwoc vimen ngwe wê vông yuu ge vông do tibeac. Do ti wê i vông ge bêga nêbê i le vô xomxo manôn di nêl di xomxo yê ngwax ti tum gê kisii ganê di lam tô lec kibun. ¹⁴Anutu yê bwoc vimen wê vông yuu ge ya manôn, di o keac ti lec lêm. Om bwoc vimen tige vông do tibeac vô bwoc vimen wê tax ge manôn, di kityoo xomxo tibeac ya do wê i vông ge, di nêl vô he ên nêbê, “Xam sev xax ti i tiyi xocbê bwoc vimen ngwe wê tax ge kinu, di xam yev vixam kitu vô. Ilage bwoc vimen tige yib ya yipac, léc kidi lec maviha tii vac nang.” Nêl bêge, om xomxo sev xax ti tiyi

xocbê bwoc vimen kinu. ¹⁵Anutu yê ya manôn di o nêl kiyang ti lec lêm. Om bwoc vimen ngwe wê vông yuu ge vê myakilôhò vac kinu tyo, om kinu tige keac. Di xomxo obêc yev vixa kitu vô kinu tige lêm ge od kinu tige obêc hi he yib.

¹⁶Di bwoc vimen wê vông yuu ge nêl om xomxo vihati kô mak wê i vông ge lec he vigê hiyôv me he manôn, he wê lê levac hixôn he wê lê nipwo, di he wê mone yuu susu tibeac hixôn he wê nêl susu maên ge, di he wê tu levac di viac nue yuac ge hixôn he wê tu xomxo levac nue yuac ge. ¹⁷Om bwoc vimen mak yuu naba ob yêp lec xomxo ti lêm ge od o tiyi wê ob la kisuu susu ge lêm di o tiyi wê ob vông susu mi tibii i kisuu ge lêm. Mak hixôn naba tige nêl bwoc vimen lê kitong. ¹⁸Mêgem il ob xovô nivihâ. Xomxo ti xovôên nivihâ obêc yêp vô i ge od i kitong naba wê bwoc vimen vông ge di xovô kehe. Naba tige tiyi xocbê naba wê xomxo vông. Naba wê i vông ge tiyi xocbê 666.

Xomxo 144,000 vông lilo paha ti

14 ¹Nang dêc a Jon, a xê bwoc Sipsip Nu tige le lec kitôn ti lê nêbê Saion, di xomxo 144,000 le hixôn i. Bwoc Sipsip Nu lê di ma lê, yuu xôn lê yêp lec xomxo tige manôn. ²Mêdêc a ngô vya ti lam gê lag puunê. Vya tige wê nididun levac xocbê mia levac didun, di xocbê deac tug levac, di xocbê xomxo tibeac hi gita mi vông lilo vac ge. ³Xomxo 144,000 gee le vô Anutu wê dô lec sia king ge manôn, di he le vô lili maviha yuudiyuu hixôn gyovixa 24 manôn hixôn, di he vông lilo paha ti. Xomxo 144,000 gee wê Anutu vô he vêl ên xomxo nipaên wê dô lec kibun ge mahigun di kô he mi la vô i. Xomxo tige vaci wê ob xovô lilo paha tige, di xomxo bangwe ob xovô lilo tige lêm. ⁴Xomxo 144,000 gee, he o vông môp nipaên ti vô vêx lêm. Nge, he dô tiyi xocbê xomxo ngivihi ge. Di vigwe vihati wê bwoc Sipsip Nu la vilee vac ge od he timu vô i vixa. Anutu vô he vêl ên xomxo kibun ga vihati di vông he lôm tu Anutu hixôn bwoc Sipsip Nu nue mugên. ⁵He o nêl kiyang kityooên ti lêm, di nipaên ti o yêp vô he lêm.

Angela yon nêl kiyang

⁶Nang dêc a xê angela ti bôb mi la kisii, di i la nêl xolac nivihâ wê obêc dô luta lêc luta ge vô xomxo kibun ga vihati. Om la nêl xolac vô xomxo vigwe toto, di xomxo kehe toto di vya toto di ninivi toto. ⁷Om angela tige nêl vya levac ên nêbê, “Buc wê Anutu obêc yaxên xomxo vihati nêl kiyang ge val pyap. Om xam xona nêl ên i di pimil i, di yev vixam kitu vô i. Anutu ge wê tung lag yuu kibun di gwec yuu mia vihati ilage.”

⁸Nang dêc angela ngwe wê vông yuu ge timu vô angela ngwe wê tax ge mi val, di nêl ên nêbê, “Vigwe levac Babilon vô nipaên. Vô nipaên pyap.

Xomxo Babilon mi didii xomxo vac vîgwe vîhati ge la vac mîp yôdac vêx yuu vux wê he mi vông ge, om tiyi xocbê tibii Babilon vông mia xêkizêc vô he ên nêb he i num di loc vac mîp nipaên.”

⁹Nang dêc angela ti wê vông yon ge timu vô angela yuu wê tax ge mi val, di nêl vya levac ên nêbê, “Xomxo ti obêc yev vixa kitu vô bwoc vimen hixôn i kinu di kô i lê tiyi xocbê mak lec manôn me vîgê ge ¹⁰od obêc num mia xêkizêc. Mia tige, Anutu xêyaa myavinê wê obêc vông vô he ge. Di Anutu obêc pilepac mia ningigooên vac mia xêkizêc tige lêm. Nge, xomxo obêc num xêyaa myavinê wê Anutu vông ge tiyi xocbê num mia xêkizêc ge. Om ngwax mahelac wê tum lec ngîdax salpa ge obêc tum lec he di vông myavinê levac vô he, vô angela ngîbua hixôn bwoc Sipsip Nu manôn. ¹¹Di ngwax wê tum lec he di vông myavinê vô he ge, lu obêc la kisii luta lêc luta. Om xomxo wê yev vixa kitu vô bwoc vimen hixôn i kinu di kô i lê tiyi xocbê mak lec he manôn me vîgê ge, he obêc yaxên myavinê mabu tiyi buc vîhati, vidiiên yuu bucên, di obêc dô seac vêl lêm.”

¹²Mîp tibêge obêc val, om xomxo wê vông i vin Anutu di ngô i xolac di vông i vin Yesu ge, he i le xêkizêc.

¹³Nang dêc a ngô vya ti lam gê lag puunê bêga ên nêbê, “Ông kivuu kiyang bêga bê gwêbaga di i loc vô buc vîhati wê yêp timuên ge, xomxo obêc vông i vin Apumtau di yib vac vông vinên wê he vông ge od he obêc dô hixôn xêyaa nivîha.” Vya nêl bêga, mêdêc Myakilôhō Ngîbua tyuc lec ên nêbê, “Vixôhilôg nôn. He ob sea he yuac levac wê he vông ge di lam dô seac vêl, di he obêc lam pileva lêm. Nge, yuac nivîha wê he vông ge obêc lam hixôn he.”

Buc wê xomxo la kô susu yaên nôn wê huu ge

¹⁴Nang dêc a xê mag la, lêc a xê vîyobtoc kwem ti, di xomxo ti xocbê xomxo nu ge dô lec vîyobtoc tyo. Xomxo tige tung kilung gol ti lec bazub di hôm yipac wê manôn ta ge ti vac vîgê. ¹⁵Mêdêc angela ti lam vac Anutu xumac ngîbua wê dô kisii ganê ge di tyuc la vô xomxo ti wê dô lec vîyobtoc ge ên nêbê, “Hôm ông yipac lec di loc vuv susu nôn wê huên ge ya di kô mi loc, ên susu vîhati wê dô kibun ge vô nôn pyap. Om gwêbaga buc wê ob la kôên nôn mi lam.” ¹⁶Angela nêl bêge, mêgem xomxo ti wê dô lec vîyobtoc ge hôm i yipac di la vuv susu nôn wê dô kibun ge vîhati.

¹⁷Nang dêc angela ngwe wê vông yuu ge lam vac Anutu xumac ngîbua wê yêp kisii ganê ge, di i êno hôm yipac wê manôn ta ge ti. ¹⁸Mêdêc angela ti wê vông yon ge sea alta mi lam. Angela tige kô xêkizêc wê ob viac ngwax ge. Mêdêc tyuc vya levac vô angela ti wê hôm yipac wê manôn ta ge ên nêbê, “Hôm ông yipac lec di loc kiku wain nôn wê dô kibun ge vêl ên yatôv di kituc i loc dô kidu ti, ên wain nôn huu mîma vêl.” ¹⁹Om angela tige hôm i yipac di la kiku wain nôn vêl ên yatôv di kituc

vihati la dô kidu tived, di kip yax i la vac lôva madia tiyi xocbê tang ge nêb he ob kê ya vixa. Kiyang tige nêl lec xêyaa myavinê wê Anutu vông ge. ²⁰Mêdêc he kê wain nôn vac lôva madia wê le vô vigwe levac tige ninya. Om hi pup lec lôva madia tige di vuac mi lam tyip lec xôhô mya di butac mi la tiyi xocbê 300 kilomita ge.

**Angela vigê vilu di sec yuu ge hôm susu nipaên
vigê vilu di sec yuu vac he vigê**

15 ¹Nang dêc a xê do levac ti gê kisii ganê di a xo kiyang tibeac lec. A xê do tiga bêga nêbê angela vigê vilu di sec yuu, lêc he hôm susu nipaên vigê vilu di sec yuu wê ob vông xomxo vô nipaên ge vac vigê. Buc wê susu nipaên tige obêc pyap ge od xomxo obêc tulec nipaên ti tii vac lêm, ên xêyaa myavinê wê Anutu vông ge ob tiyô vac vô buc tige.

²Mêdêc a xê susu ti tiyi xocbê gwec levac ge. Gwec tige tiyi xocbê glas wê he pilepac hixôn ngwax ge. Di a xê xomxo tibeac. Ilage he vông vevac vô bwoc vîmen hixôn i kinu yuu naba wê lê yêp lec ge di nginoo i vêl. He le vô gwec wê xocbê glas ge ninya, di hôm gita wê Anutu vông vô he ge vac vigê. ³Di he vông lilo ti wê Anutu nu yuac Moses vông ilage, di bwoc Sipsip Nu tige vông hixôn. Lilo bêga bê,

“O Apumtau Anutu, xêkizêc kehe ông, yuac vihati wê ông vông ge xêkizêc, di xe xê di xovô ên xe nêbê ông yuac nivîha. Ông tu xomxo vihati nêl king, di môp wê ông vông ge bôbac di vixôhilôg nôn. ⁴O Apumtau, ôcông va tived wê ông ngîbua ge. Xomxo vihati obêc xona ên ông di pimil ông di lam yev vixa kitu vô ông. Ên môp bôbac wê ông vông ge vihati lam le seac mi yêp pyap.”

⁵He vông lilo tyo pyap, nang dêc a xê mag la, lêc xê Anutu xumac ngîbua sel le taxên gê lag puunê. Xumac ngîbua tige kehe bêga nêbê kiyang wê Anutu vông ge vô nôn lec. ⁶Mêdêc angela vigê vilu di sec yuu wê hôm susu nipaên vigê vilu di sec yuu vac vigê ge, he lop vac Anutu xumac ngîbua tige. He vinyum ngakwi kwem wê paha ge, di vêx let gol lec yagtôv xôn. ⁷Mêdêc lîlii maviha yuudiyuu gee, ti vông pile gol titi vô angela vigê vilu di sec yuu gee, di Anutu wê ob dô maviha luta lêc luta ge, xêyaa myavinê wê i vông ge pup lec pile gol vigê vilu di sec yuu gee mya. ⁸Mêdêc ngwaxlu lam vac xêseac yuu xêkizêc wê Anutu vông ge di lam pup vac xumac ngîbua nilô, om xomxo ti o tiyi wê ob la vac xumac ngîbua nilô ge lêm. Lêc angela vigê vilu di sec yuu gee ob vông yuac lec susu nipaên vigê vilu di sec yuu ge pyap lê, lêc xomxo ob la vac xumac ngîbua nilô tige timuên.

Pile vigê vilu di sec yuu wê Anutu xêyaa myavinê pup lec vac ge

16 ¹Nang dêc a ngô vya levac ti lam vac Anutu xumac ngîbua tige, di vya tyo nêl vô angela vigê vilu di sec yuu gee ên nêbê, “Xêyaa

myavinê wê Anutu vông wê pup lec xam pile vigê vilu di sec yuu gee, xam loc kipyax vihati i loc kibun.”

²Mêgem angela taxlee tyo la kipyax susu nipaên wê pup lec i pile ge la kibun. Mêdêc kityax nipaên wê myavinê levac ge ya xomxo vihati wê bwoc vimen mak yêp lec he di he yev vixa kitu vô bwoc vimen kinu ge. Kityax ya xomxo tigege vihati ma vêl.

³Nang dêc angela ngwe wê vông yuu ge la kipyax susu nipaên wê pup lec i pile ge la vac gwec. Mêdêc gwec tu hi tiyi xocbê xomxo yibên hi ge, om susu vihati wê dô maviha vac gwec gee yib mima vêl.

⁴Nang dêc angela ti wê vông yon ge la kipyax susu nipaên wê pup lec i pile ge la vac mia levac di mia wê yêp vac lôva ge hixôn, di mia tu hi xocbê xomxo hi ge. ⁵A ngô angela wê mi viac mia ge vya wê nêl ên nêbê,

“O Anutu ngibua, ông dô mugên ilage di dô gwêbaga hixôn. Gwêbaga ông yaxên xomxo nipaên nêl kiyang di vông myaviwen vac vô he. Om môp wê ông vông myaviwen vô xomxo ge môp nivîha, ⁶ên he mi hi plopete hixôn xomxo vông vinên yib di kipyax he hi sea. Mêgem gwêbaga ông vông hi vô xomxo nipaên tigege ên ông nêb he i num. Om he kô myaviwen nipaên tiyi môp wê he vông ge.”

⁷Nang dêc a ngô vya ti lam vac alta di tyuc vya levac ên nêbê,

“Vixôhilôg nôl, Apumtau Anutu xêkizêc kehe ông, ông yaxên xomxo nêl kiyang di vông myaviwen vô he i tiyi môp wê he vông ge. Môp wê ông yaxên xomxo nêl kiyang ge nivîha vixôhilôg.”

⁸Nang dêc angela ti wê vông yuudiyuu ge kipyax susu nipaên wê pup lec i pile ge la vô hiyôv, di Anutu nêbê hiyôv i linac mabu mi ya xomxo xocbê ngwax ge. ⁹Mêgem hiyôv myavinê nux he xocbê ngwax nux ge. Mêdêc he nêl kiyang vaxvax lec Anutu wê lee yuu di vông myavinê levac tige vô he. Lêc he o pilepac he di pimil Anutu lêm.

¹⁰Nang dêc angela ti wê vông vigê vilu ge kipyax susu nipaên wê pup lec i pile ge la vô sia king wê bwoc vimen vông ge. Mêd vigwe vô mapitoc ta di hivun xomxo wê dô vac bwoc vimen kwa ngibi ge vihati xôn, om he yaxên myavinê mabu di he dô nipaên, ¹¹di he nêl kiyang nipaên lec Anutu wê dô kisii ganê ge ên wê vông myavinê hixôn kityax tulec he ge. Lêc he o pilepac he ên môp nipaên wê he vông ge lêm.

¹²Nang dêc angela ti wê vông vigê vilu di sec ti ge kipyax susu nipaên wê pup lec i pile ge la vac mia levac lê nêbê Yupletis. Mêdêc mia tuac mîma vêl, om vông môp vô king he nue wê lam vac vigwe viwen wê hiyôv tyip lam ge. ¹³Pyap dêc a xê vimwo nipaên yon tiyi xocbê vidubac yon ge. Ti lam vac myel levac tige mya, di ti lam vac bwoc vimen mya di ti lam vac plopete kityooên tyo mya. ¹⁴Vimwo nipaên yon ge, Seten nue yuac yon, om yon vông do tibeac di la vô king wê dô kibun ge vihati ên nêb ob kituc he i lam ên he i vông vevac vô Anutu wê xêkizêc kehe ge, om ob vông vevac vô Anutu lec buc levac wê Anutu vông ge.

¹⁵Yesu nêl ên nêbê, “Wê lê. A obêc val tiyi xocbê tibii yôdac ge, om xam obêc xovô buc wê a obêc val lec ge lêm. Mêgem xomxo ti obêc bin a di yêpên obêc ma, di obêc vêx i nivimihi dô pilihi lec i di la vô môt ge om ni obêc yoc ên i lêm, ên ob la xêtuac mi xomxo yê lêm. Xomxo tige i dô hixôn xêyaa nivaha.” Yesu nêl bête.

¹⁶Vimwo nipaên yon ge kituc king vihati la dô vac vigwe ti wê Hiblu vya nêl ên nêbê Amagedon.

¹⁷Nang dêc angela ti wê vông vigê vilu di sec yuu ge kipyax susu nipaên wê pup lec i pile ge la vac lea. Mêdêc vac xumac ngibua vya ti lam vac sia king wê Anutu vông ge di lam vixun di tyuc xêkizêc ên nêbê, “Gwêbaga yuac vihati wê a vông ge pyap vac.” ¹⁸Mêdêc deac hixelac di vigwe vô nididun di deac tug di ngiyêg mabu ti yoc. Vô buc ilage di i val tyip gwêbaga hixôn, xomxo o yaxên ngiyêg levac wê yoc tiyi xocbê ngiyêg levac tige lêm. ¹⁹Om vigwe levac Babilon hibua la yon, di vigwe nipwopwo vihati ge kipê sea di vô nipaên. Om Anutu xo he Babilon tii vac ên nêb he i num wain wê i vông ge. Wain tige xêyaa myavinê wê Anutu vông ge. ²⁰Mêdêc kitôn wê le vac gwec mahigun ge vihati la mima vêl di kitôn wê le kehe ge vihati xôa ma hixôn. ²¹Mêd lun hikwelac lam gê lag puunê di lam tô lec xomxo. Lun hikwelactige viyin mabu xocbê pidi yul ti. Mêdêc xomxo nêl kiyang nipaên lec Anutu ên wê vông viyin mabu tige tiyi xocbê lun hikwelac ge lam hi he vô nipaên.

Vêx yôdac tige kô myaviwen nipaên

17 ¹Nang dêc angela vigê vilu di sec yuu wê hôm pile vigê vilu di sec yuu gee, he ti lam nêl vô a ên nêbê, “Lam, ên vêx yôdac wê dô vô mia levac ninya ge obêc kô myaviwen lec nipaên wê mi vông ge. Om a obêc hilung vêx tyo vô ông. Vêx tige tixuu lec vigwe levac Babilon wê yêp vô mia ninya ge. ²King wê dô kibun ge vihati vông yôdac vô vêx tige,^a di xomxo kibun vihati mi hôm môt yôdac wê vêx tyo vông ge xôn pilihi, om tiyi xocbê he num mi vô mavmav ge.”

³Angela nêl bête, mêdêc Myakilôhê Ngibua lam hivun a xôn di kô a mi la vac vigwe myadongên wê xomxo dô vacên ma ge. Lêc a xê vêx ti dô lec bwoc vimen wê ninivi hi ge ti. Bwoc vimen tige, lê tibeac hiwocên yêp lec ninivi. Lê tige kehe bêga nêbê nêl kiyang nipaên lec Anutu. Bwoc vimen tige bazub vigê vilu di sec yuu di levac vigê yuu le lec bazub. ⁴Vêx tige vinyum ngakwi hi tiyi xocbê manôn yuu ge, di vunac vô ya susu gol toto hixôn komkom di ngidax nivihaviha wê mone levac ge. Di hôm kap gol ti vac vigê, di môt nipaên toto tiyi xocbê susu byepacên ge hixôn

^a 17:2 Kiyang pilepacên lec king wê vông yôdac vô vêx tige tixuu lec xomxo wê sea Anutu di la vông i vin anutu bangwe ge. Ge tiyi xocbê he sea Anutu mavaha di la vô anutu mayibên, om Anutu yê he tiyi xocbê vux wê sea vinê mi la vông yôdac vô vêx ngwe ge.

ningeac toto wê vêx yôdac vông ge pup lec kap tige. ⁵Di lê ti yêp lec vêx tyo manôn, léc lê tige tiyi xocbê kiyang pilepacên ti wê kehe nêl bêga ên nêbê, “Vigwe levac Babilon wê tu vêx yôdac hixôn môp nipaên kibun ga vihati kehe.” ⁶Vêx tige hi Anutu nue hixôn he wê vông i vin Yesu Kilisi di nêl i kiyang ge yib. Om tiyi xocbê vêx tige num he hi mi vô mavmav ge. A xê vêx tige di a yetac mabu.

⁷Lêc angela tige nêl vô a ên nêbê, “Bêna léc ông yetac ên vêx tige? A ob nêl kiyang pilepacên wê nêl lec vêx tige kehe vô ông, di nêl bwoc vimen wê vêx tyo dô lec ge kehe vô ông hixôn. Bwoc vimen tige bazub vigê vilu di sec yuu di levac vigê yuu le lec bazub. ⁸Bwoc vimen tige wê ông wê ge, ge dô ilage, léc gwêbaga o dô lêm. Lêc obêc timuên ge od obêc val tyip vac vu madia wê mapitoc ta ge mi lam, di Anutu ob kitya i vêl. Vô buc mugên taxlee ge Anutu kivuu xomxo wê ob dô mavaha ge lê vac kipihac. Lêc xomxo wê he lê o yêp vac kipihac lêm ge he obêc yê bwoc vimen tige di yetac mabu ên wê i dô ila léc gwêbaga o dô lêm di obêc dô timuên i tii vac nang ge.

⁹“Om xomxo wê piyôp xovôên ge heche va tiyi wê ob xovô kiyang tiga kehe. Bwoc vimen bazub vigê vilu di sec yuu ge kehe ngwe bêga ên nêbê kitôn vigê vilu di sec yuu wê vêx yôdac la dô lec ge, ¹⁰di kehe ngwe bêga ên nêbê xomxo vigê vilu di sec yuu wê tu king ge. He vigê vilu tu king ilage, léc he o dô gwêbaga lêm, di ti dô gwêbaga, di ti gên o tu king lêm om obêc tu king timuên léc ob dô buc myabo tya. ¹¹Lêc bwoc vimen wê dô ila léc o dô gwêbaga lêm ge, ilage i ge king vigê vilu di sec yuu ge ti, léc obêc tu king ti wê vông vigê vilu di sec yon ge. Lêc Anutu ob kitya i vêl.

¹²“Ông wê levac vigê yuu wê le lec bwoc vimen tige bazub ge pyap. Om levac tige kehe bêga nêbê king vigê yuu léc he gên o tu king lêm. Lêc obêc timuên ge od he ob kô xêkizêc hixôn bwoc vimen, di he obêc tu king mi dô buc myabo tya. ¹³King vigê yuu ge, he nilô hixôn piyôp yêp tibed, om he ob vông lê levac yuu xêkizêc wê he vông ge vô bwoc vimen ên i kô. ¹⁴Mêdêc he ob vông vevac vô bwoc Sipsip Nu. Lêc bwoc Sipsip Nu obêc nginoo he vêl, ên i tu xomxo levac vihati nêl Apumtau, di tu king vihati nêl king. Di xomxo wê dô hixôn i di ngô i vya mi timu vô i vixa, di ici va vino he, di he vông i vin xêkizêc ge, xomxo tige vông vevac hixôn bwoc Sipsip Nu mi he nginoo vêl.”

¹⁵Angela nêl bêge, nang dêc nêl kiyang ngwe vô a bêga ên nêbê, “Mia wê vêx yôdac tige dô lec ge, kehe bêga ên nêbê ge xomxo vac vigwe toto di xomxo kidu toto di ninivi toto di vya toto ge. ¹⁶Di levac vigê yuu wê ông wê pyap ge, he gee king vigê yuu, di he hixôn bwoc vimen tige he xêyaa ob vô myavinê levac vô vêx yôdac tige. Om he ob vông i vô nipaên di kwax i nêl ngakwi vêl di i obêc dô ninivi pileva, di he obêc ya vêx tige liyôhô di nêx i la vac ngwax ên nêb ngwax i ya i ma vêl. ¹⁷Anutu vông

piyôp vô he ên nêb he i vông piyôp wê i nêl ge i vô nôn lec, om he vông lê levac yuu xêkizêc wê he vông ge vô bwoc vimen tige di i la tyip vô buc wê Anutu obêc vông kiyang vihati wê i vông ge vô nôn lec. ¹⁸Vêx yôdac wê ông wê pyap ge, nêl lec vigwe levac Babilon wê king vihati dô vac i kwa ngibi ge.”

Vigwe Babilon vô nipaên

18 ¹Pyap dêc a xê angela ti lam gê lag puunê. Angela tige lê levac, di xêseac wê i vông ge linac lec kibun di i vô xêseac ta, ²di tyuc vya xêkizêc ên nêbê,

“Vigwe levac Babilon vô nipaên. Vô nipaên vêl, om tu vimwo nipaên ben. Om vimwo nipaên di menac nipaên wê il xaên mi ma ge, he dô vac vigwe tige. ³Vigwe tige vô nipaên, ên tibii Babilon didii xomxo vihati vac môp yôdac, om tiyi xocbê he num mia xêkizêc wê tibii Babilon vông vô he ge di la vac môp nipaên. Di king kibun ga, he la vông môp yôdac hixôn tibii Babilon. Di xomxo kibun ga wê mi vông yuac bisnis ge, he kê mone levac vô tibii Babilon lec môp nipaên wê he vông ge.”

⁴Angela nêl bêge, pyap dêc a ngô vya levac ti lam gê lag puunê bêga ên nêbê,

“Xam vihati wê xam tu a nuge ge, xam lop mi lam vêl ên vigwe tige gec lêc xam dô hixôn he di timu vô môp nipaên wê he vông ge di xam kê myaviwen nipaên wê obêc val vô he ge hixôn. ⁵Nipaên wê he vông ge tibeac luu vêl mi la vô Anutu, om Anutu yê he nên nipaên tigege di xovô pyap. ⁶Mêgem xam loc vông myaviwen nipaên vô tibii Babilon i tiyi xocbê nipaên wê he vông ge. Om xam vông myaviwen nipaên i luu vêl i loc vô he. Tibii Babilon vông mia xêkizêc vô xomxo tibeac, om xam vông mia xêkizêc i nginoo vêl vô he ên he i num. ⁷Tibii Babilon yong he lê lec môp nipaên tibeac wê he mi vông ge. Om xam vông myavinê levac vô he i tiyi nipaên wê he vông ge, di vông he byag mabu, ên he tiyi xocbê vêx ti wê yong ici va di xo vac nilô ên nêbê, ‘A ga a kwin ti om a dô lec sia king, di a o vêxov ti lêm, di viyin ti ob val vô a di vông a byag lêm.’ ⁸Nêl bêge, mêgem viyin toto ob val vô tibii Babilon lec buc tived. Om viyin wê ob val vô he ge bêga nêbê he ob vông yidac, di he lie ob yib di he ob byag, di vip ob den he ma vêl, di ngwax ob ya he ben Babilon ma vêl, ên Apumtau Anutu wê ob yaxên he nên nipaên di vông myaviwen nipaên vô he ge, i xêkizêc kehe.”

⁹Angela nêl kiyang tige pyap, di king kibun ga vihati wê mi vông môp yôdac hixôn tibii Babilon di mi vông môp nipaên tibeac hixôn ge, he ob yê ngwaxlu wê tyip vac ngwax tumên di ya vigwe Babilon ma vêl ge, om he xêyaa ob vô viyin di he ob byag levac. ¹⁰Di he ob xona ên myaviwen

nipaên wê val vô vigwe tige, om he ob le teva ên vigwe tige di nêl ên nêbê,

“Ông Babilon, ông Babilon, ông vigwe levac, di ông xêkizêc, lêc myaviwen nipaên val vô ông lutibed tiyi hiyôv manôn tibed, ên nipaên wê ông vông ge.”

¹¹Mêd xomxo kibun ga vihati wê mi vông yuac bisnis ge, he xêyaa viyin di he byag, ên tibii Babilon wê ob kisuu he susu ge ti dôên ma. ¹²Susu wê he vông mi tibii Babilon mi kisuu ge bêga nêbê gol, silva, ngidax nivihã, komkom wê mone levac ge, nivimihi kwem wê paha nivihã ge, nivimihi hi toto, nivimihi xêlehe, xax wê nivivea nivihã toto, susu vihati wê he sev elepan levac ge, di susu vihati wê he sev xax tiyi wê mone levac ge, di susu wê he vông ya kapa di ain di ngidax nidodo ge, ¹³di xax ninivi yuu lehac wê tibii mi ya ge, di viwev wê ngwaxlu nivivea nivihã ge, di susu hizi hizi wê nivivea nivihã ge, di sanda nivivea nivihã, di mia wain, di wel, di plaua, di pidi, di bwoc levac hixôn bwoc sipsip, di xôhông hixôn pêt wê xôhông mi didii ge, di xomxo wê vông yuac pileva ge, ge he maviha. Xomxo wê ob kisuu susu tige ge ti o dô lêm. ¹⁴Mêgem xomxo wê mi vông yuac bisnis ge ob yê vigwe Babilon di nêl ên nêbê,

“Susu nivihã wê xam Babilon nêb xam obêc kô ge vihati sea ông di la xôa ma, di susu yaên nivihã wê mone levac ge hixôn susu vunacên nivihã ge vihati la xôpac ên xam. Om xam ob wêvô he i tii vac nang lêm!”

¹⁵He wê vông yuac bisnis lec susu tibêgee di kô mone levac vô tibii Babilon ge, he ob xona ên myavinê levac wê vigwe Babilon ob tulec ge, om he ob le teva ên vigwe tige di byag mi dô hixôn xêyaa viyin, di nêl ên nêbê,

¹⁶“Ông Babilon, ông vigwe levac, viyin levac tulec ông. Ilage xam tibii Babilon vinyum ngakwi nivihã xocbê ngakwi kwem yuu hi ge, di xam vunac vô ninivi ya gol yuu ngidax nivihã hixôn komkom wê mone levac ge. ¹⁷Lêc hiyôv manôn tibed tige mone yuu susu nivihã vihati la vêl lutibed.”

Nang dêc xomxo vihati wê mi kô sip ge, di he wê kisuu sip ên nêb ob la vigwe bangwe ge, di he wê mi vông yuac vac sip ge, hixôn he wê vông yuac bisnis lec gwec ge, he vihati le teva ên vigwe Babilon ¹⁸di yê ngwaxlu wê tyip vac ngwax tumên di ya Babilon ma vêl ge, om he nêl vya levac ên nêbê, “Vigwe levac ngwe yêp gê na wê il ob xê i tiyi xocbê vigwe levac Babilon ge?” ¹⁹Mêdêc he yev viwev lec he sea di byag mi dô hixôn xêyaa viyin, di iac levac ên nêbê,

“Ông Babilon, ông vigwe levac, viyin nipaên tulec ông. Ilage xomxo wê viac sip di kô mi la vac gwec ge, he vihati kô mone levac vô ông lec yuac tige. Lêc hiyôv manôn tibed tige vigwe Babilon yêp pileva.”

²⁰“Xam lag puunê ge, di xam wê Anutu nue ge, hixôn xam sinale yuu plopete ge, xam xêmyaa i vô nivaha ên wê vigwe tyo vô nipaên ge, ên Anutu yaxên i di vông myaviwen nipaên vô i, ên vigwe tige vông viyin levac vô xam.”

²¹Kiyang tiga pyap, nang dêc angela xêkizêc ti kô ngidax levac tiyi xocbê xomxo mi sax wit nôn ya ge ti di nêx i la vac gwec, di nêl ên nêbê, “A nêx ngidax tige la vac gwec om xôa ma. Om xomxo obêc kitya xêkizêc wê vigwe levac Babilon vông ge vêl tiyi bêge, om xomxo obêc yê vigwe tige tii vac lêm. ²²Mêgem xomxo wê hi gita di vông lîlo, di vê ngivêg, di vê vuac gee, he ob vông bêge vac vigwe Babilon tii vac nang lêm. Di xomxo wê kô xovôên nivaha lec he yuac toto ge, he vihati xôa ob ma vac vigwe tige. Di he wê mi sax wit ya ngidax ge, he êno xôa ob ma vac vigwe tige. ²³Di xomxo ob byêx ngwax vac lam vac vigwe tige tii vac lêm. Di vêx yuu vux obêc iima vac vigwe tige tii vac lêm. Ilage tibii Babilon mi vông yuac bisnis di tu levac gê kibun ga, di he kityoo xomxo vac vigwe vihati ge ya môp yevac wê he mi vông ge. ²⁴Anutu yê vigwe Babilon nên soên levac yêp bêga nêbê he hi plopete hixôn Anutu nue yib, di xomxo kibun ga vihati wê xomxo hi he yib ge, soên levac tige kehe yêp gê Babilon tived.”

Xomxo vihati xêyaa vô nivaha ên wê vigwe Babilon vô nipaên ge

19 ¹Pyap dêc a ngô vya levac ti tiyi xocbê xomxo tibeac wê dô lag puunê ge tyuc bêga ên nêbê,

“Il obêc pimil il Anutu, ên vô il vêl ên il nêd nipaên. Xêkizêc yuu lê levac yêp vô i, ²di i yaxên xomxo di vông myaviwen vô he tiyi nipaên wê he vông ge, om môp tibêge nivaha. Vigwe levac Babilon vông xomxo vô nipaên ya môp yôdac, di he hi Anutu nue yuac yib om Anutu vông myaviwen nipaên vac vô he.”

³He nêl bêge di tyuc tii vac nang ên nêbê,

“Il ob pimil Anutu. Ngwax ya vigwe Babilon ma vêl om ngwaxlu tige obêc tyip di le luta léc luta.”

⁴Pyap dêc gyovixa 24 hixôn lilii maviha yuudiyuu gee yev vixa kitu vô Anutu wê dô lec sia king ge di nêl ên nêbê, “Kiyang nôn, om il ob pimil Anutu.” ⁵Mêdêc vya ti lam vac Anutu sia king di nêl ên nêbê, “Xam wê xam tu Anutu nue yuac di xam mi xona ên i ge, xam wê lêm nipwo ge hixôn xam wê lêm levac ge, xam vihati pimil il Anutu.”

Kiyang pilepacên lec bwoc Sipsip Nu wê nêb ob kô vêx ti ge

⁶Nang dêc a ngô vya ti tiyi xocbê xomxo tibeac kitucma mi vô nididun levac ge di tiyi xocbê mia yubac vô didun ge di tiyi xocbê deac tug nididun levac ge, di vya tige nêl ên nêbê,

“Il ob pimil il Anutu. Il Apumtau Anutu ge xêkizêc kehe i di i tu king wê il vihati vông ge. ⁷Om il ob dô hixôn xêdyaa nivihã di hi vixad i pec ên i di pimil i lê, ên gwêbaga buc wê bwoc Sipsip Nu obêc ii vêx ti, om vêx tyo viac i pyap mi dô.^b ⁸Om Anutu vông nivimihi kwem paha nivihã ge vô vêx tige ên nêb i vinyum.”

Nivimihi kwem kehe bêga nêbê môm nivihã vihati wê xomxo vông vinên mi vông ge.

⁹Mêdêc angela ti nêl vô a ên nêbê, “Ông kivuu kiyang bêga bê xomxo wê Anutu ob nêl vô he ên nêbê he i lam ya vizid lec buc wê bwoc Sipsip Nu ob kô vêx ge, he xêyaa i vô nivihã.” Angela nêl bêge, nang dêc nêl vô a tii vac nang ên nêbê, “Kiyang tiga Anutu kiyang nôñ.”

¹⁰Mêdêc a yev vixag kitu vô angela tige ên a nêb a ob kitaa vô i, lêc angela nêl vô a ên nêbê, “Le i lêc yev vixã kitu vô a lêm, ên a ga Anutu nu yuac ti xocbê ông hixôn lime vông vinên wê nêl Yesu lê kitong ge. Om ông yev vixam kitu vô Anutu tibed. Ên xomxo wê nêl Yesu kiyang kitong ge, Myakilôhô Ngibua ngidu he xôn tiyi xocbê Anutu ngidu plopete xôn ilage mi he nêl i xolac yêp seac vô xomxo ge.”

Xomxo ti dô lec xôhõ kwem ti

¹¹Nang dêc a xê vuayen tax gê lag puunê, lêc a xê xôhõ kwem ti, di xomxo ti dô lec xôhõ tige, di i lê ngwe nêl bêga ên nêbê, “Xomxo wê viac i yuac nivihã” di lê ngwe nêl bêga ên nêbê, “Xomxo wê nêl kiyang nôñ.” Xomxo tyo obêc yaxên xomxo nêñ kiyang di obêc vông vevac vô he ge od obêc vông tiyi xovôen nivihã wê yêp vô i ge. ¹²Xomxo tige manôn tiyi xocbê ngwax mahelac di i tung kilung tiyi xocbê kilung wê king mi tung ge tibeac lec bazub, di lê ti yêp lec i, lêc ici va xovô lê tige di xomxo ya o xovô lê tige lêm. ¹³Di i vinyum ngakwi dia ti wê hi lipac lec ge di xomxo nêl i lê ên nêbê, “Anutu kiyang nôñ.” ¹⁴Di tibii vevac lag puunê vinyum ngakwi kwem nivihã wê paha ge, di he toto dô lec xôhõ kwem mi la timu vô xomxo tyo vixã. ¹⁵Yipac dia wê manôn ta ge ti le vac i myã, om ob hi xomxo vac vigwe vihati ya yipac tige mi he yib, di ob hóm xax xocbê ain ge ti di viac he ya, di ob kê xax wain nôñ vac lôva madia tiyi xocbê tang ge. Kiyang tige nêl lec xêyaa myavinê wê Anutu xêkizêc kehe vông ge. ¹⁶Lê ti yêp lec xomxo tyo ngakwi yuu vixã pob bêga ên nêbê, “KING VĪHATI NĒN KING, DĪ XOMXO LEVAC VĪHATI NĒN LEVAC.”

¹⁷Nang dêc a xê angela ti le vac hiyôv manôn, di i tyuc vya levac la vô menac vihati wê bôb mi la kisii ge ên nêbê, “Xam kitucma mi lam wa vizid levac wê Anutu vông vô xam ge. ¹⁸Xam ob wa king liyôhõ, di tibii

^b **19:7** Vêx tige kehe bêga nêbê xomxo wê vông i vin Kilisi ge, om kiyang wê nêl ên nêbê Kilisi ob ii vêx tige ge nêl lec wê Yesu ob kô xomxo vông vinên mi he la dô hixôn i vac i ben ge.

vevac liyôhô, di xomxo levac liyôhô, di xôhô hixôn xomxo wê dô lec xôhô ge liyôhô, di wa xomxo vihati liyôhô, he wê vông yuac pileva ge hixôn he wê viac nue yuac ge, di he wê lê nipwo hixôn he wê lê levac ge. Xam ob wa he liyôhô i ma vêl.”

¹⁹Pyap dèc a xê bwoc vimen tige di king kibun ga vihati, hixôn he nue vevac. He vihati lam kitucma ên nêb he ob vông vevac vô xomxo tige wê dô lec xôhô kwem ge hixôn nue vevac wê i vông ge. ²⁰Mêdêc xomxo tyo hôm bwoc vimen hixôn plopete kityooên xôn. Plopete kityooên tige wê mi le vô bwoc vimen manôn di vông do levac ên nêb ob kityoo xomxo ya do tige. Om kityoo xomxo wê bwoc vimen mak yêp lec he di he yev vixa kitu vô i kinu ge. Yuu gên dô maviha, di xomxo tige nêx yuu la vac madia wê ngwax yuu ngidax salpa tum vac ge. ²¹Xomxo ti wê dô lec xôhô kwem ge hi bwoc vimen nue vevac vihati yib ya yipac wê le vac mya ge. Mêdêc menac vihati lam ya xomxo tige liyôhô di i den he.

Seten la dô vac madia tiyi klismas 1000

20 ¹Nang dèc a xê angela ti lop gê lag puunê di lam, di i hôm ki yuu sen levac vac vigê, lèc ki tige wê ob tax vu madia wê mapitoc ta ge ya. ²Mêdêc angela tige hôm myel levac tige xôn. Myel tige dô mugên ilage, di lê yuu, ngwe nêbê Devil di ngwe nêbê vimwo nipaên Seten. Om angela tige ku myel tige xôn ya sen ên nêb i dô klismas 1,000. ³Mêdêc nêx i la vac vu madia wê mapitoc ta ge di tung vuayen lec xôn di yu lok lec xôn pilihi ên nêb myel tige i o loc kityoo xomxo vac vigwe vihati lêm i tiyi xocbê klismas 1,000. Om obêc dô di klismas 1,000 lam la vêl pyap, lèc angela obêc tax vuayen ên i di i lam lop mi loc vilee buc myabo yang tya.

⁴Nang dèc a xê sia king ya wê le ge di xomxo ya dô lec. Mêgem Anutu vông yuac vô he ên nêb he i yaxên xomxo nên kiyang. Di a xê xomxo tibeac kinu. Ilage xomxo tige vông i vin Yesu di nêl i lê kitong di hôm Anutu kiyang xôn pilihi, di he o yev vixa kitu vô bwoc vimen hixôn i kinu lêm, di mak wê bwoc vimen vông ge o yêp lec he manôn me vigê lêm. Om xomxo kiku he kwa vêl di he yib, lèc he kidi lec maviha di tu king hixôn Kilisi tiyi xocbê klismas 1,000. ⁵Buc tige tiyi xocbê buc taxlee wê xomxo kidi lec maviha ge. Lèc xomxo yibên ya o kidi lec maviha hixôn he lêm. Nge, he obêc dô di klismas 1,000 lam la vêl lê. ⁶Om xomxo wê kidi lec maviha taxlee ge, he dô hixôn xêyaa nivihia di tu xomxo ngibua, di yibên wê vông yuu ge nên xêkizêc ti o yêp wê ob nginoo he vêl ge lêm. Nge, he ob tu Anutu hixôn Kilisi nue yuac wê ob vông daa ge, di ob tu king hixôn Kilisi mi dô tiyi klismas 1,000.

Anutu nginoo Seten vêl

⁷Klismas 1,000 obêc lam la vêl di he ob tax vuayen vêl ên Seten wê dô vac vu madia mapitoc ge ên nêb i lam lop mi loc vilee. ⁸Om ob lop

mi la kityoo xomxo vac kibun myahipu yuudiyuu wê nêl he lê nêbê Gok yuu Megok. Mêdêc Seten ob kituc he vihati ên nêb he ob la vevac. He tibeac hiwocên tiyi xocbê luda wê dô vô gwec ninya ge. ⁹Mêdec he kitucma di loc mi la kibun vihati di mila le buu vigwe Jelusalem hixôn xomxo vông vinên wê dô vac vigwe tige. Lêc Anutu xêyaa vin lec vigwe tige om ngwax ti tum gê lag puunê di lam tô lec tibii vevac tige mi ya he yib mima vêl. ¹⁰Seten mi kityoo xomxo vevac tige, om Anutu nêx i la vac madia wê ngwax yuu ngidax salpa tum vac ge. Om la dô hixôn bwoc vimen yuu plopete kityooên wê Anutu nêx yuu la vac ngwax ilage. Mêgem yon ob dô vac ngwax di kô myavinê nipaên tiyi vidiiên yuu bucên vihati luta lêc luta.

Anutu yaxên xomxo nên kiyang

¹¹Nang dêc a xê sia king levac ti wê kwem ge di xomxo ti dô lec, di kibun yuu xôn lag pec ên xomxo tyo di la xôa ma. ¹²Mêdêc a xê xomxo yibên, he wê lê levac ge hixôn he wê lê nipwo ge, he vihati le vô sia king manôn. Mêdêc xomxo tyo wê dô lec sia king ge tidii kipihac ya. Nang dêc tidii kipihac ngwe wê xomxo wê ob dô maviha ge lê yêp vac, di kitong kipihac wê

nêl môp wê xomxo yibên vông ge di yaxên he nên kiyang tiyi xocbê he vông ge. ¹³Mêdêc gwec vông xomxo wê yib mi yêp vac nilô ge lax vô Anutu, di vigwe Yibên hixôn Seten ben wê lê nêbê Hel ge vông xomxo wê yib mi dô vac ge lax vô Anutu, di Anutu yaxên he toto nên kiyang tiyi wê he vông ge. ¹⁴Pyap dêc nêx Yibên yuu Hel la vac madia wê ngwax tum vac ge. Madia wê ngwax tum vac ge, ge yibên ngwe wê vông yuu ge. ¹⁵Anutu kitong kipihac ti wê he wê ob dô maviha ge lê yêp vac. Om xomxo ti va lê obêc ma ên kipihac tige ge od Anutu obêc nêx i la vac madia wê ngwax tum vac ge, di i lê obêc yêp vac ge od ob dô maviha luta.

Anutu tung lag paha yuu kibun paha

21 ¹Nang dêc a xê lag paha hixôn kibun paha val yêp, ên lag tikwê hixôn kibun tikwê xôa ma di gwec yêpên ma. ²Di a xê vigwe ngibua Jelusalem wê paha ge. Vigwe tige dô hixôn Anutu, lêc sea ben lag puunê di lam kibun, di i vunacên nivîha tiyi xocbê vêx wê ob kô vux om vunac lec pyap ge. ³Di a ngô vya levac ti lam vô sia king di i tyuc bêga ên nêbê, “Xam ngô lê. Gwêbaga Anutu ben lam dô hixôn xomxo om Anutu ob dô vac he mahigun, di he obêc tu i nue, di ici va obêc dô hixôn he, ⁴di obêc kitya he maluc vêl ên he manôn, di he obêc yib i tii vac lêm, di he xêyaa obêc vô viyin i tii vac lêm, di he obêc byag nang lêm, di he obêc kilê myavinê tii vac lêm, ên môp tige wê yêp ilage, vihati obêc tip vac di ti ob yêp i tii vac lêm.”

⁵Di xomxo tige wê dô lec sia king ge nêl ên nêbê, “Ngô lê. A vông susu vihati vô paha lec. Om ông kivuu kiyang wê a nêl vô ông pyap gwêbaga, ên kiyang tige nôn tiyi wê xomxo vihati ob vông i vin ge. ⁶Gwêbaga yuac vihati wê a vông ge pyap vac. A ga, aca va xomxo mugên di timuên, di a tu susu vihati yang kehe, di a vông a yuac vihati la tiyi. Xomxo ti obêc nêb num mia ge od a obêc vông mia maviha dôên mi i num. Lêc ob kisuv vô a lêm. Nge, a ob vông pileva mi i num. ⁷Xomxo ti obêc vông vevac vô nipaên mi nginoo vêl ge od a obêc vông vizid nivaha vô i, di a obêc tu Anutu wê i vông ge di i obêc tu a nug. ⁸Dom xomxo wê xona di o le xêkizêc lêm, di he wê o vông i vin lêm, di he wê vông môp ningeac di he wê hi xomxo yib, di he wê vông môp yôdac vêx yuu vux, di he wê vông yevac, di he wê yev vixa kitu vô anutu kityooên, di he wê nêl kiyang kityooên gee, he vihati ob la dô vac madia wê ngwax yuu ngidax salpa tum vac ge. Ge yibên ngwe wê vông yuu ge.”

Jelusalem paha

⁹Angela vigê vilu di sec yuu wê hêm pile vigê vilu di sec yuu wê susu nipaên vigê vilu di sec yuu dô vac gee, he ti lam nêl vô a ên nêbê, “Lam ên a obêc hilung vêx ti wê bwoc Sipsip Nu ii ge vô ông.”^c ¹⁰Mêdêc Myakilôhông Ngibua lam hivun a xôn di angela tige kô a mi xii la tyip lec kitôn levac ti kisii, di i hilung vigwe ngibua Jelusalem wê dô hixôn Anutu ge vô a. Di a xê vigwe tige lop gê lag puunê mi lam. ¹¹Di xêseac wê Anutu vông ge vông vigwe tige xêseac ta tiyi xocbê ngidax jaspâ wê mone levac ge, om xêseac ta xocbê deac ge. ¹²Xenac vixa dia le i buu vigwe tyo, di vuayen vigê yuu di tô mi la yuu (12) le vac xenac tige, di angela vigê yuu di tô mi la yuu ge he toto le vô vuayen titi, di Islel kidu vigê yuu di tô mi la yuu ge, he toto lê yêp lec vuayen titi. ¹³Vuayen yon le vô byeac vilu, di yon le vô byeac vilu, di yon le vô liyuhu viwen, di yon le vô liyuhu viwen. ¹⁴Xenac wê buu vigwe levac tige le lec ngidax levac vigê yuu di tô mi la yuu wê ngidu xenac xôn ge, di bwoc Sipsip Nu tige nue ngivihi vigê yuu di tô mi la yuu ge, he toto lê yêp lec ngidax tige.

¹⁵Angela tige wê nêl kiyang vô a ge hêm xax gol ti vac vigê ên nêb ob kô mak vô vigwe levac hixôn xenac di vuayen vihati ya xax tige. ¹⁶Vigwe levac tige xêkitu yuudiyuu ge vihati tiyima. Om vigwe dia di myakipwoc levac tiyima tiyi xocbê 2,400 kilomita, di dia lec mi la kisii tiyi xocbê 2,400 kilomita. ¹⁷Mêdêc angela tige kô mak vô xenac êno, om xenac tige vixa dia tiyi xocbê 144 mita. Mita tige wê xomxo mi vông mak ya ge, lêc angela vông mak ya tige hixôn.

^c 21:9 Vêx tige kehe bêga nêbê xomxo wê vông i vin Kilisi ge, om kiyang wê nêl ên nêbê Kilisi ob ii vêx tige ge nêl lec wê Yesu ob kô xomxo vông vinên mi he la dô hixôn i vac i ben ge.

¹⁸Anutu vông xenac tige ya ngidax jasper, di lox vigwe Jerusalem ya gol wê xêseac tiyi xocbê deac ge. ¹⁹Ngidax levac vigê yuu di tô mi la yuu wê xenac le lec ge, Anutu vunac vô ngidax tige ya ngidax wê manôn toto ge.

Om ngidax taxlee ti wê xenac le lec ge lê nêbê jasper,
 di ngidax ngwe wê vông yuu ge blu lê nêbê sapaia,
 di ti wê vông yon ge kwem lê nêbê aget,
 di ti wê vông yuudiyuu ge niyuu lê nêbê emelal,
²⁰di ti wê vông vigê vilu ge hi yuu kwem lê nêbê sadonikis,
 di ti wê vông vigê vilu di sec ti ge hi lê nêbê konilian,
 di ti wê vông vigê vilu di sec yuu ge zang lê nêbê klisolait,
 di ti wê vông vigê vilu di sec yon ge niyuu lê nêbê belil,
 di ti wê vông vigê vilu di sec yuudiyuu ge zang lê nêbê topas,
 di ti wê vông vigê yuu ge niyuu hixôn zang lê nêbê klisoples,
 di ti wê vông vigê yuu di tô mi la ti ge blu lê nêbê haiasin,
 di ti wê vông vigê yuu di tô mi la yuu ge hi lê nêbê ametis.

²¹Vuayen vigê yuu di tô mi la yuu wê le vac xenac tige, ge komkom kwem vigê yuu di tô mi la yuu wê mone levac ge. Vuayen titi ge Anutu vông ya komkom levac ti, di môp vihati wê la vac vigwe tige, gol pileva, léc xêseac tiyi xocbê deac ge.

²²A o xê xumac ngibua ti le vac vigwe Jerusalem lêm, ên Apumtau Anutu wê xêkizêc kehe ge yuu bwoc Sipsip Nu ge, yuu tu xumac ngibua mi le vac vigwe tige. ²³Di hiyôv yuu dentuc ge, yuu o vông yuac di linac vac vigwe tige lêm, ên xêseac wê Anutu vông ge vông vigwe tige vô xêseac, di bwoc Sipsip Nu tige xocbê lam di linac vac vigwe hixôn. ²⁴Xomxo vihati ge tibeac ob la ya xêseac tige, di king kibun ga vihati ob kô lê levac mi la hixôn vac vigwe tige. ²⁵Vô vidiiên ge he ob tung vuayen lec xôn lêm, di bucên ge obêc vô mapitoc vac vigwe tige lêm. ²⁶Di xomxo levac vac vigwe vihati ge obêc kô vunacên nivihia wê he vông ge mi la vac vigwe tige. ²⁷Lêc susu ningeac di xomxo wê vông môp nipaên gee hixôn xomxo kityooên, he o tiyi wê ob vac la vac vigwe tige hixôn lêm. Bwoc Sipsip Nu tige kivuu xomxo wê obêc dô maviha ge lê vac kipihac maviha. Om he wê he lê yêp vac kipihac ge wê obêc la dô vac vigwe tige nilô.

Mia maviha dôên di xax maviha dôên

22 ¹Nang dêc angela tige hilung mia levac wê maviha dôên ge ti vô a. Mia tige xêseac ta tiyi xocbê deac ge, di lam vac sia king wê Anutu hixôn bwoc Sipsip Nu vông ge di lam la, ²di la vô môp wê la vac vigwe Jerusalem ge mahigun. Di xax wê maviha dôên ge le vô mia ninya vilu vilu. Xax tige vuac nô n lu vigê yuu di tô mi la yuu lec klismas titi, om mi vuac nô n lec dentuc titi. Xax tige lihi ob vông xomxo vac vigwe

vihati vô nivîha lec. ³Di susu nipaên wê Anutu yê tiyiên ma ge ti ob dô vac vigwe tige lêm.

Anutu yuu bwoc Sipsip Nu wê yuu dô lec sia king ge yuu ob dô vac vigwe tige di nue yuac obêc kitaa vô yuu. ⁴He obêc yê Anutu manôn, di Anutu obêc kivuu ici va lê lec he manôn. ⁵Di bucên ob yêp i tii vac lêm, om xomxo ob byêx ngwax vac lam i tii vac lêm, di hiyôv ob linac i tii vac lêm, ên xêseac wê Apumtau Anutu vông ge obêc linac vô he, di he obêc tu king mi dô luta léc luta.

Yesu obêc lop mi lam lutibed

⁶Nang dêc angela tige nêl vô a ên nêbê, “Kiyang tiga, kiyang vixôhilôg nôn yang tiyi wê xomxo vihati ob vông i vin ge. Apumtau Anutu vông xovôên vô plopete ên nêb he i loc nêl i kiyang kitong, di gwêbaga Anutu vông nu angela ti la vô nue yuac ên nêb i hilung susu hixôn buc vihati wê obêc val lutibed ge vô he. ⁷Om ngô lê, Yesu nêl bêga ên nêbê, ‘A obêc vena lutibed.’ Yesu nêl bêge, om xomxo obêc ngô kiyang wê yêp vac kipihac tiga di vông i vin ge od he ob dô hixôn xêyaa nivîha. Kiyang tiga nêl lec buc wê obêc val timuên ge.”

⁸A, Jon, a ngô kiyang tiga vihati di xê susu tiga vihati pyap, om a yev vixag kitu vô angela tyo wê hilung susu tigae vô a ge ên a nêb a ob kitaa vô i. ⁹Lêc angela tige nêl vô a ên nêbê, “Ông o kitaa vô a lêm. A ga, a Anutu nu yuac ti tiyi xocbê ông hixôn lime plopete di he wê vông i vin kiyang wê yêp vac kipihac tiga. Om ông kitaa vô Anutu vaci tibed. ¹⁰Anutu kiyang wê nêl lec buc wê obêc val timuên ge yêp vac kipihac tiga, om le i léc vilun xôn ên xomxo di lii i loc yêp lêm, ên buc wê Anutu nêb ob vông kiyang tiga vô nôn lec ge vô kwabo lec. Om ông tidii mi i yêp seac vô he manôn. ¹¹Mêgem xomxo wê mi vông môp nipaên ge od he i timu vô môp nipaên, di he wê mi vông môp ningeac ge he i vông môp ningeac, di he wê mi vông môp nivîha ge od he i vông môp nivîha, di he wê tu ngîbua ge od he i dô tiyi xomxo ngîbua.”

¹²Angela nêl bêge, pyap dêc Yesu nêl ên nêbê, “Xam ngô lê. A obêc vena lutibed, di a obêc vông myaviwen nipaên vô he wê nipaên ge, di vông nivîha vô he wê nivîha ge, om a ob vông vô he toto ge tiyi xocbê môp wê he vông ge. ¹³A ga a xomxo mugên di timuên, di a dô buc mugên taxlee ge, di a obêc dô luta léc luta, di susu vihati yang ge a tu kehe, di a ob vông a yuac vihati loc tiyi myahîpu.

¹⁴“Xomxo wê mi lipac he nivîmihi ge he xêyaa i vô nivîha, ên he tiyi wê he obêc ya xax maviha dôên nôn, di he tiyi wê ob la vac vuayen Jelusalem di la dô vac nilô. ¹⁵Lêc xomxo nipaên, di xomxo wê he mi vông yevac ge, di he wê vông yôdac vêx yuu vux ge, di he wê hi xomxo yib ge, di he wê kitaa vô anutu kityooên ge, di he vihati wê xêyaa vin lec kiyang kityooên di timu vô ge, xomxo tige wê he ob dô vixun ên Anutu ben di ti tiyiên ma wê ob la vac nilô ge.

¹⁶ “A, Yesu, a vông a angela ti loc vô xam pyap ên a nêb i nêl kiyang tiga kitong vô xomxo vông vinên vac konglegesen vihati. A kehe yêp vac Devit di a tiyi xocbê pitua wê linac vîgwe vidiiên ge.”

¹⁷ Myakilôhô Ngîbua hixôn xomxo vông vinên vihati nêl bêga nêbê, “Yesu, ông lam!” Om xomxo wê ob ngô kiyang tiga ge he i nêl bêga bê, “Yesu, ông lam!” Di xomxo wê xo mia ên nêb ob num ge, he vihati i lam num mia maviha dôên wê Anutu ob vông pileva vô he ge.

¹⁸ A, Jon, a ob nêl kiyang vô xomxo vihati wê ngô kiyang wê yêp vac kipihac tiga ge. Kiyang tiga nêl lec buc wê obêc val timuên ge, om a ob nêl bêga bê xomxo ti obêc nêl kiyang bangwe yêp hixôn Anutu kiyang vac kipihac tiga ge, od susu nipaên vihati wê Anutu nêl kitong mi i yêp vac kipihac tiga ge, Anutu ob vông susu tige vihati myaviwen vô i.

¹⁹ Di xomxo ti obêc kitya Anutu kiyang wê nêl lec buc timuên wê yêp vac kipihac tiga ge bo ti vêl ge od Anutu obêc vông xomxo tige i ya xax maviha dôên nô nêl wê i vông ge lêm, di xomxo tige o tiyi wê ob dô vac vîgwe ngîbua Jelusalem nilô ge lêm. Kipihac tiga nêl vîgwe ngîbua hixôn xax maviha dôên kitong.

²⁰ Yesu wê nêl kiyang tiga vihati kitong ge nêl gwêbaga ên nêbê, “Vixôhilôg nô n. A obêc vena lutibed.”

A, Jon, a lee yuu ên a nêbê kiyang nô n. Apumtau Yesu, ông lôm lam.

²¹ Vizid nivaha wê Apumtau Yesu vông ge i loc viac xam vihati. Kiyang nô n.